

New Testament

Buryat Language

Buryat - Bible - New Testament

Матвей	3	
Марк	108	
Лука	172	
Иоанн	280	
Элшэнэрэй бүтээһэн хэрэгүүд	362	
Яковай хандалга	460	
Пётрой 1-дэхи хандалга	471	
Пётрой 2-дохи хандалга	483	
Иоаннай 1-дэхи хандалга	490	
Иоаннай 2-дохи хандалга	501	
Иоаннай 3-дахи хандалга	503	
Иудын хандалга	505	
Римэйхиндэ	508	
Коринфынхидтэ 1-дэхи	553	
Коринфынхидтэ 2-дохи	598	
Галадуудта	626	
Эфесэйхиндэ	641	
Филиппынхидтэ	656	
Колоссынхидтэ	667	
Фессалоникиинхидтэ 1-дэхи	678	
Фессалоникиинхидтэ 2-дохи	687	
Тимофейдэ 1-дэхи	693	
Тимофейдэ 2-дохи	705	
Тидтэ	714	
Филимондо	719	
Еврейнүүдтэ	722	
Гэршэлгэ	754	



Buryat - Bible - New Testament

Матвей

Матвей 1

Иисус Христосой уг гарбал

¹Абраһамай үри хадаһан болохо Давидай үри хадаһан Иисус Христосой уг гарбалынһ иимэ:

²Абраһам болбол Исаагай эсэгэ, Исаак – Яковай эсэгэ, Яков – Иудын ба тэрэнэй аха дүүнэрэй эсэгэ байгаа.

³Иуда болбол Тамар гэдэг эхэнэрһээ Перец Зерах хоёр хүбүүтэй байгаа. Перец – һэцрон хүбүүтэй, һэцрон – Арам гэдэг хүбүүтэй,

⁴Арам – Аминадаб хүбүүтэй, Аминадаб – Нахшон хүбүүтэй, Нахшон – Салмон хүбүүтэй байгаа.

⁵Салмон болбол Рахаб гэдэг эхэнэрһээ Боаз хүбүүтэй болоо. Боаз Руфь хоёрһоо Обед хүбүүн түрөө. Обедһээ Иесай хүбүүн түрөө.

⁶⁻¹¹Иесайн уг тэрэнэй хүбүүн Давид хаан залгамжалаа. Давид хаанай захиралтаһаа эхилээд, Израилиин арад зоние хашалтаар Вавилон руу нүүлгэһэн саг хүрэтэр Иисусай элинсэг үбгэ эсэгэнэрынһ иимэ: Давидай уг Соломон залгамжалаа. Соломоной эхэнь түрүүн Урия гэдэг хүнэй һамганиинһ һэн. Соломонһоо Рехобоам хүбүүн, Рехобоамһаа – Абия, Абияһаа – Аса, Асаһаа – Иошафат, Иошафадһаа – Иорам, Иорамһаа – Узия, Узияһаа – Иотам, Иотамһаа – Ахаз, Ахазһаа – Езекия, Езекияһаа – Манассий, Манассийһаа – Амон, Амонһоо – Иосий түрөө. Иосийһоо Иехони болон тэрэнэй аха дүүнэрынһ түрэхэн юм.

¹²Вавилон руу хашалтаар нүүлгэгдэхэнһэйнһ хойшо Иехониһоо Залафиил гараа, Залафиилһаа Зоробабэл,

¹³Зоробабэлһээ – Абиуд, Абиудһаа – Елиаким, Елиакимһаа – Ацор,

¹⁴Ацорһоо – Садок, Садокһоо – Ахим, Ахимһаа – Елиуд,

¹⁵Елиудһаа – Елеазар, Елеазарһаа – Матфан, Матфанһаа – Яков,

¹⁶Яковһаа Мариятай һууһан Иосиф түрэхэн байгаа. Марияһаа Бурханай табисуурта гэжэ алдаршаһан Иисус хүбүүн түрөө.

¹⁷Иигээд, Абраһамһаа Давид хүрэтэр арбан дүрбэн үе болоно. Мүн Давидһаа эхилээд, Вавилондо нүүлгэгдэхэн саг болотор арбан дүрбэн үе, Вавилондо нүүлгэгдэхэнһээ хойшо Бурханай табисууртын түрэтэр баһал арбан дүрбэн үе болоно.

Бурханай табисуурта Иисусай түрэхэн тухай

¹⁸Бурханай табисуурта Иисус Христосой түрэхэн түүхэ иимэ: Мария эжынь хадагаа табиһан Иосиф нүхэртэйгөө гэрлэхынгээ урда Нангин хүлдэхөө хээлитэй болоһоноо мэдэрбэ.

¹⁹Мариягай Иосиф нүхэрынь үнэн сэдхэлтэй хүн байжа, зоной урда басаганай нэрэ муугаар хэлүүлэн бузарлахагүйн тула түрэ хуримаа шэмээгүйхэн болуулха гэжэ шиидэбэ.

²⁰Тиигэжэ бодоод, Иосифой дууран хэбтэхэдэнь, Бурханай Эльгээмэл зүүдэндэнь үзэгдөөд, иигэжэ хэлэбэ: «Давидай үри һадаһан Иосиф, Мариягай түрэхэ хүбүүн Нангин хүлдэхөө бүрилдэхэн юм. Тиимэхээ ши тэрэниие һамган болгожо абахаяа бү ай.

²¹Тэрэшни хүбүү түрэхэ, тэрээндэ Иисус гэжэ нэрэ үгэхэш, юундэб гэбэл, тэрэ арад зоноо нүгэл хилэнсэгһээ абарха юм».

²²Тиигэжэл Дээдын Эзэнэй лүндэншөөрөө иигэжэ дамжуулжа айладхаһаниинь бүтэбэ даа:

²³«Басаган хээлитэй болоод, хүбүү түрэхэ, тэрэниие Эммануил гэжэ нэрлэхэ», энэ нэрэнһэ Бурхан мантай хамта байна гэхэн удхатай.

²⁴Иосиф нойрһоо һэрээд, уданшьегүй Бурханай Эльгээмэлэй захирһан ёһоор Мариятайгаа гэрлэжэ һууба.

²⁵Хүбүүнэйнгээ түрэтэр Иосиф һамгантайгаа хамта унтаагүй һэн. Хүбүүндээ тэрэ Иисус гэжэ нэрэ үгөө һэн.

Матвей 2

Зүүн зүгэй сэсэшүүл Иисуста мүргэбэ

¹Иисус болбол Иудейн Вифлеем хотодо Ирод хаанай зонхилжо байха үедэ түрэбэ. Тэрэ үедэ зүүн зүгһөө Иерусалим хотодо сэсэшүүл ерээд,

²хүнүүдһээ иигэжэ асууба: «Иудейн хаан болохоор заяагдажа түрэхэн үхибүүн хаанаб? Бидэ тэрээнэй одоной зүүн зүгтэ мандахые хараад, тэрээндэ мүргэхээ ерээбди».

³Энээниие дуулаад, Ирод хаан, тэрээнтэй хамта бүхы Иерусалимай зон ханаата болобо.

⁴Тиигээд Ирод бүхы ахамад санаартаниие, Хуули заадаг багшанарые суглуулаад: «Бурханай табисуурта Христос хаана түрэхэ ёһотой байгаа?» – гэжэ тэдэнһээ һураба.

⁵Тэдэнь иимэ харюу үгэбэ: «Иудейн Вифлеемдэ түрэхэ ёһотой байгаа, лүндэншын иигэжэ бэшэхэн ёһоор:

⁶„Иудейн орон дайдын Вифлеем хото, ши Иудын мэдэлэй бусад шухала хотонуудһаа юугээрээшье дутанагүйш, юундэб гэхэдэ, минии Израилиин арад зониие хүтэлхэ ехэ ударидагша шамһаа мүндэлэн гараха юм“».

⁷Тиихэдэнь Ирод зүн зүгһөө ерэхэн сэсэшүүлэе нюусаар дуудаад, одоной мандаһан саг тэдэнһээ мэдэжэ абаба.

⁸Тиигээд тэдэниие Вифлеем эльгээхэ зуураа: «Ошоод, тэрэ хүбүүе хайнаар бэдэрэгты. Тэрэниие олоод, намда дуулгаарайгты. Би баһа ошожо тэрээндэ мүргэхэ ханаатайб», – гэжэ хэлэбэ.

⁹⁻¹⁰Тэдэнь хаанай хэлэхэн үгэ шагнаад, замдаа мордобо. Зүүн зүгтэ хараһан одоёо дахин харахадаа тэдэнэр угаа ехээр баярлаба. Тэрэ одон

тэдэниие хүтэлэн, урдань ябажа, һүүлэй һүүлдэ хүбүүнэй байһан газарта асараад тогтошобо.

¹¹Сэсэшүүл гэртэ ороод, хүбүүнэй Мария эхэтэйгээ байхыень хараба, тиигээд газар хүрэтэр дохин тэрээндэ мүргэбэ. Асарһан бэлэгүүдээ дэлгэжэ, хүбүүндэ алта мүнгэ, сан санзай, һайхан үнэртэй ургамалай тоһо үргэбэ.

¹²Зүүдэндээ тэдэ Иродтэ бусажа бү ошогты гэхэн һэргылэмжэ Бурханһаа абаһан хадаа ондоо харгыгаар өөрынгөө нютаг орондо бусаба.

Египет руу зугадаһан тухай

¹³Тэдэ сэсэшүүлэй ябаһан хойно Бурханай Эльгээмэл Иосифой зүүдэндэ үзэгдөөд, иигэжэ хэлэбэ: – Ирод энэ хүбүүе алахая һанаашалаад, бэдэржэ орохонь. Тиимэхээ ши бушуухан бодоод, хүбүүгээ эхэтэйнь абажа, Египет руу тэрьедэ. Тиигээд минии шамда дуулгатар тэндээ байгаарай.

¹⁴Иосиф үхибүүгээ эхэтэйнь абажа, тэрэл хүнндөө Египет ябаба.

¹⁵Тэдэнэр Иродэй үхэтэрынь тэндэ байгаа. Тиигэжэл Дээдын Эзэнэй лүндэншөөрөө дамжуулан: «Би Египедһээ өөрынгөө Хүбүүе дуудааб», – гэжэ айладхаһаниинь бүтэбэ даа.

Үхибүүдые алаха тухай Иродэй үгэхэн захиралта

¹⁶Сэсэшүүлдэ мэхэлүүлһэнээ мэдэрхэдээ, Ирод аргагүй ехээр сухалдаба. Тиигээд Вифлеем хото болон тэрэниие оршон тойроһон нютагуудай хоёр наһанһаа доошо хүбүүдые алагты гэхэн захиралтатайгаар сэрэгшэдээ эльгээбэ. Үхибүүнэй наһа Ирод сэсэшүүлһээ мэдэжэ абаһан сагаар багсаһан байна.

¹⁷Тиигэжэл Иеремия лүндэншын айладхаһан ёһоор Дээдын Эзэнэй найдуулһаниинь бүтэбэ даа:



¹⁸«Рама соо айхабтар гашуудалтайгаар уйлаха бархирха абяан дуулдана. Рахель хюдуулхан үхибүүдээ шаналан уйлана, ханааень заһахын аргагүйл».

Египедһээ бусалга

¹⁹Иродэй үхэхэн хойно Египедтэ байһан Иосифой зүүдэндэ Бурханай Эльгээмэл үзэгдөөд:

²⁰«Ши бодоод, хүбүүгээ эхэтэйнь абажа, Израиль нютагаа бусажа ошо. Хүбүүнэй ами хороохоёо ханагшад мүнөө хосороо», – гэжэ хэлэбэ.

²¹Иосиф үхибүүгээ эхэтэйнь абажа, Израиль нютагаа бусаба.

²²Иродэй орондо Архелай хүбүүниинь Иудейдэ хаан болоо гэжэ дуулаад, Иосиф тиишэ ошохоёо айгаа. Харин Иосиф зүүдэндээ дахин зүблэл абаад, Галилейн можо зүглэбэ.

²³Тэндэ Иосиф гэр бүлэтэйгөө Назарет хотодо түбхинэн нютагжаба. Тиигэжэл «Тэрэ Назаредэй гэжэ нэрлүүлхэ» гээд лүндэншэдэй айладхаһаниинь тудaa.

Матвей 3

Уһаар Арюудхагша Иоаннай номнол

¹Тэрэ сагта Уһаар Арюудхагша Иоанн Иудейн сүл губи ерээд, номнол хэбэ.

²«Бурханай хаан түрэ һаяар мандахань, тиимэһээ нүгэл үйлэдэхээ болёод, Бурханда хандагты», – гэжэ тэрэ хэлэбэ.

³Иоанн тухай лүндэншэ Исаяя иигэжэ хэлээ: «Дээдын Эзэнэй ябаха замынь бэлдэгты, алхаха харгыень дардам сэхэ болгогты гэжэ хэн бэ даа сүл губида хашхарба».

⁴Иоанн тэмээнэй ноһон хубсаһа үмдэдэг, һур бэһэ бэһэлээд ябадаг бэлэй. Тэрэ таршаагаар, зэрлиг зүгын балаар хооллодог байгаа.

⁵Тиихэдэ Иерусалимайхид, Иудей можын хамаг зон, Иордан гол тойрон һуугшад булта тэрээндэ ошобо.

⁶Тэдэ зон нүгэл шэбэлнүүдээ мэдэрэн гэмшэбэ, тиин Иоанн тэдэниие Иордан голдо шунгуулан уһаар арюудхаба.

⁷Уһанда арюудхуулхаяа олон фарисейнүүдэй, саддукейнэрэй ерэжэ ябахые хараад, Иоанн тэдэндэ иигэжэ хэлэбэ: «Хорото могойн таһардахад! Бурханай буулгаха хэһээлтэһээ иигээд хулжахыетнай таанарта хэн заагааб?»

⁸Таанар буянтай хайн юумэ бүтээжэ, Бурханда хандаһанаа харуулагты.

⁹Үбгэ эсэгэмнай Абраһам юм гэжэ өөһэд тухайгаа бү бодогты, юундэб гэхэдэ, Бурхан энэ хэбтэһэн шулуугааршые Абраһамда үри хүүгэдые бүтээжэ шадаха юм гэжэ танда хэлэхэ байнаб.

¹⁰Модо үндэһөөрнь таһа сабшаха алма хүхэ бэлэн байна: хайн үрэ жэмэс үгэдэггүй алишые модон таһа сабшагдаад, галда хаягдаха.

¹¹Нүгэлөө гэмшэһыетнай баталан би таанадые уһаар арюудханаб, теэд минии хойноһоо Заларан ерэгшэ таанадые Нангин хүлдэ гал хоёроор арюудхаха. Тэрэ намда ороходоо агууехэ юм. Би тэрэнэй гуталыеньшые абажа ябаха эрхэгүйб.

¹²Тэрэ таряагаа сэбэрлэхээр хүрзээе гартаа адхаад байна: таряагаа суглуулжа амбаартаа хадагалха, харин мэхийнэ һолоомыень залиршагүй галда шатааха».

Иисусые уһаар арюудхаба

¹³Тэрэ сагта Иисус Иоаннаа уһан арюудхалда хүртэхээ Галилейһээ Иордан голдо ерэбэ.

¹⁴Тиихэдэнь Иоанн Иисусай һанал хубилгаха зорилготойгоор: «Би шамһаа уһан арюудхалда хүртэхэ ёһотойлби, тиигэн гэһээ ши намда ерэбэ гүш?» – гэбэ.

¹⁵Теэд Иисус тэрээндэ: «Мүнөө энээниие хэе, бидэ иигэжэл Бурханай эрхэ хүсэл бүтээхэбди», – гэбэ. Тиихэдэнь Иоанн зүбшөөбэ.



¹⁶Уһаар арюудхууламсаараа Иисус уһанһаа гараба. Тиихэдэнь тэрээндэ огторгой сэлигдэн нээгдэбэ, тэрэ гулабхаадал мэтэ Бурханай һүлдүн дээрэнь буухые хараба.

¹⁷«Энэ минии хайрата Хүбүүмни гээшэ, һанаа сэдхэлдэмни таатай юм», – гэхэн абяан огторгойһоо дуулдаба.

Матвей 4

Шолмос Иисусые туршана

¹Удаань һүлдэ Иисусые альбан шолмосоор һорюулха туршуулхаяа сүл губи руу хүтэлжэ абаашаба.

²Иисус дүшэн үдэр, дүшэн хүни масаглаад, һүүлдэнь гэдэһэниинь аргагүй ехээр үлдэбэ.

³Тиихэдэнь һоригшо шолмос тэрээндэ ерээд: «Хэрбээ ши Бурханай Хүбүүн юм һаа, эдэ шулуунуудта хилээмэн болохыень захира», – гэбэ.

⁴Тиихэдэнь Иисус: «„Хүн гансал хилээмээр амидардаг бэшэ, харин Бурханай хэлэһэн үгын ашаар амиды ябадаг юм“, – гэжэ Нангин Бэшэгтэ хэлэгдэнэ», – гэжэ харюусаба.

⁵Һүүлдэнь Иисусые шолмос нангин Иерусалим хото абаашажа, Бурхан хүмын орой дээрэ байлгаба.

⁶«Хэрбээ ши Бурханай Хүбүүн юм һаа, эндэһээ доошоо хүрэ. Тиигэбэлшни, „Бурхан өөрынгөө Эльгээмэлнүүдтэ шинии тушаа захиралта үгэхэ, шулуунда бүдэржэ унахагүйншни тулада тэдэ шамайе гар дээрээ үргөөд ябаха“, – гээд Нангин Бэшэг соо хэлэгдэнэ ха юм», – гэжэ Иисуста шолмос хэлэбэ.

⁷Тиихэдэнь Иисус: «Бурханшни болохо Дээдын Эзэнээ бү турша гээд баһа тэндэ бэшээтэй юм», – гэжэ шолмосто харюусаба.

⁸Иисусые шолмос дахин үндэр гэгшын хада дээрэ абажа гараад, дэлхэйн бүхы хаан оронуудые, тэдэнэй һүр жабхалангые харуулна.

⁹«Хэрбээ хүлдэм унажа мүргөө наашни, би эдэ бүгэдые шамда үгэхэб!» – гэжэ тэрээндэ шолмос хэлэбэ.

¹⁰Тиихэдэнь Иисус шолмосто: «Ай, сатана! Намһаа зайла! „Ши Эзэн Бурхандаал шүтэжэ, гансал тэрээндээ алба хэжэ бай!“ – гээд Нангин Бэшэг соо хэлэгдэнэ», – гэжэ харюусаба.

¹¹Тиихэдэнь шолмос Иисусые орхижо ошобо, харин Бурханай Эльгээмэлнүүд тэрээндэ туһалхаяа ерэбэ. Иисус Галилей можодо ажалаа хэжэ эхилбэ.

¹²Иоаниие түрмэдэ хаагаа гэжэ дуулаад, Иисус Галилей можо ошобо.

¹³Тээд Назарет хотодоо байхын орондо тэрэ Капернаум хотодо һуурижаба. Тэрэ хото Галилей далайн хажууда, Забулон ба Нафталим обогүүдай газарта оршожо байгаа.

¹⁴Тиигэжэл лүндэншэ Исаягаар дамжуулан Бурханай айладханиинь бүтэбэ даа:

¹⁵«Забулоной газар, Нафталимай газар, нуурай шадархи харгын дэргэдэхи газарнууд, Иордан голой саада бэе, бусад үндэһэтэнүүдэй Галилейн газар дайда,

¹⁶харанхы мунхагта һуугаашад тон ехэ гэрэл туяа үзэхэ! Үхэлэй ороной һүүдэртэ һуугаашадта гэрэл туяа сасарха!»

¹⁷Тэрэ саһаа хойшо Иисус: «Нүгэл үйлэдэхээ болижо, Бурханда хандагты, Бурханай хаан түрын мандахань ойртоод байнал», – гээд номножо эхилбэ.

Иисус түрүүшын дүрбэн шабинараа шэлэжэ абаба

¹⁸Нэгэтэ Галилей далайн хажуугаар ябажа ябахандаа, Иисус аха дүү хоёрые хараба. Тэдэ загаһашадай нэгэнь Пётр гэжэ ара нэрэтэй Симон, нүгөөдэнь тэрэнэй Андрей гэдэг ахань байгаа. Тэдэ хоёр загаһашад гүльмээ далайда хаяжа байба.

¹⁹«Таанар хойноһоомни ябагты, загаһа барихын орондо хүнүүдые намда хандуулха албанда би таанадые хургахаб», – гэжэ Иисус тэдэндэ хэлэбэ.

²⁰Тиигэхэдэнь тэдэнэр дары гүльмэеэ орхёод, Иисусай хойноһоо ябаба.

²¹Тэндэһээ саашалжа ябатараа Иисус Зэбэдэйн хүбүүдые, Яков Иоанн хоёрые хараба. Аха дүү хоёр Зэбэдэй эсэгэтэеэ хамта онгосодо һуугаад, гүльмэеэ заһажа байгаа. Иисус тэдэниие хамта ябалсахаарнь дуудаба.

²²Тэдэнь дары онгосоёо, эсэгэеэ орхёод, Иисустай ябаба.

Иисус хургана, номноно, үбшэ хабшанһаа эдэгээнэ

²³Иисус бүхы Галилей можоор ябажа, мүргэлэй гэрнүүдтэ арад зониие хургаба, Бурханай хаан түрэ тухай һайн мэдээсэл номнобо, элдэб янзын үбшэ хабшатай хүнүүдые эмнэн эдэгээбэ.

²⁴Иисус тухай алдар суу бүхы Сири ороноор хаа хаанагүй тараба. Тиимэһээ тэрээндэ ехээр үбдэжэ зобожо байһан, досоогоо ада шүдхэртэй болоһон, унадаг үбшэнтэй, саа үбшэнтэй, мүн бусадшые элдэб янзын үбшэ хабшантай зониие олоор асаржа байба, тиин Иисус тэдэниие бултыень эдэгээбэ.

²⁵Галилей можоһоо, Арбан хото можоһоо, Иерусалимһаа, Иудей можоһоо, Иордан голой саада бэеһээ ерэхэн үй түмэн зон Иисусые дахажа ябаба.

Матвей 5

Хада дээрэ айладхагдаһан номнол

¹Хажуудаа олон зоной сугларһые харахадаа, Иисус хада дээрэ гаража, тэндээ һууба. Тэрэниие тойроод шабинарын сугларба.

²Иисус тэдэ зониие хургажа эхилбэ.

Үнэн бодото жаргал

³«Бурханай һүлдөөр дуталдагшад, жаргалтайл, Огторгойн хаан түрэ тэдэнэй ха юм.

- ⁴Гуниглан уйлаашад жаргалтайл, Бурхан тэдэнэй ханаае амаруулхал.
- ⁵Даруу номгон зон жаргалтайл, тэдэнэр дэлхэе уг залгамжалхал.
- ⁶Үнэн зүбые угаа ехээр хүсэгшэд жаргалтайл, тэдэнэр ханаһандаа хүрэхэ юм.
- ⁷Бусад зоние хайрлаашад жаргалтайл, тэдэниие өөһэдыень хайрлахал.
- ⁸Арюун сэдхэлтэн жаргалтайл, тэдэнэр Бурхание үзэхэл.
- ⁹Амгалан байдал найруулагшад жаргалтайл, Бурхан тэдэниие үхибүүдни гэжэ нэрлэхэл.
- ¹⁰Бурханай эрхэ хүсэлөөр ажаһууһанайнгаа түлөө хашуулагшад жаргалтайл, Огторгойн хаан түрэ тэдэнэй ха юм.
- ¹¹Минии түлөө доромжолуулһан, хашуулжа намнуулһан, элдэбээр хардуулһан байбал, таанад жаргалтайт.
- ¹²Баярлажа, хүхижэ ябагты! Тэнгэридэ таанадта агууехэ шагнал бэлдээтэй байна. Эртэ урда ажамидарһан лүндэншэдые баһал иигэжэ хашажа үлдэжэ байһан юм».

Дабһан ба гэрэл туяа тухай

- ¹³Таанад газар дэлхэйн зоной дабһан хужарынь гээшэт. Хэрбээ дабһанай амтаяа гээгээ хаань, дахин тэрэниие яажа гашуун болгохоб? Тиигээ хаа дабһан юундээшье хэрэггүй болоод, миил хаягдажа, хүнэй хүлдэ гэшхүүлхэ зэргэтэйл.
- ¹⁴Таанад газар дэлхэйн зоной гэрэл туяа гээшэт. Хада дээрэ бодхоогдоһон хото хоргодожо шадахагүйл.
- ¹⁵Зула аһаагаад, хэншье тэрэнээ амһарта доро табидаггүй, харин гэртэ байһан зоние бултыень гэрэлтүүлжэ байхын тула зулын табуур дээрэ бадараадаг юм.



¹⁶Энээндэл адляар танай гэрэл туяа улад зоной урда гэрэлтэжэ байхань болтогой, тиигэбэл дэмбэрэлтэ найхан хэрэгүүдыетнай зон хараад, тэнгэридэхи Эсэгэдэтнай магтаал соло дуудахал.

Моисейн Хуули тухай

¹⁷Моисейн Хуули гү, али лүндэншэдэй бэшээшые болюулхаяа намайе ерээ гэжэ бү бодогты. Би эдээниие болюулхаяа бэшэ, харин үнэн дээрэнь бүтээхээе ерээб.

¹⁸Газар тэнгэри хоёрой байгаал сагта, Хуулиин багаханшые зүйл, бишыханшые үзэгынь үгы болохогүй гэжэ таанадта баталан хэлэнэб. Досоонь бэшээтэй бүхы юумэнүүд заабол бээлхэ зэргэтэй юм.

¹⁹Тиин Хуулиин тон эгээлэй заабариие эбдэһэн, улад зоние тиимэ юумэндэ хургаһан хүн Огторгойн хаан орон дотор тон бирагүй хүн байха. Зүгөөр эдэ заабаринуудые сахидаг, улад зоние тиимэ юумэндэ хургадаг хүн Огторгойн хаан орон дотор агууехэ хүн байха.

²⁰Хэрбээ таанар Бурхантай баталһан Хэлсээе Хуули заадаг багшанарһаа, фарисейнүүдһээ үлүү найнаар дүүргэдэггүй һаа, Огторгойн хаан орондо орохогүйт гэжэ баталан хэлэнэб.

Уур сухал тухай

²¹«Хүниие бү ала, алууршан зарга шүүбэридэ үгтэхэ», – гэжэ эртэ урда сагта хүнүүдэй хэлэдэгые таанар дуулаһан бээт.

²²Хүндэ дэмы уурлаһан хүн зарга шүүбэридэ орохо зэргэтэй гэжэ би мүнөө таанадта хэлэнэб. Хүниие «рака» гэхэн хүн Зүблэлэй гэшүүдэй заргада үгтэхэ ёһотой; хүниие «тэнэг» гэхэн хүн гал тамада унаха ёһотой гэжэ би таанадта хэлэнэб.

²³Хэрбээ ши үргэлэй шэрээгэй хажууда үргэл хэхээе ябаһанаа, хүнэй шамда гомдолтой байһые һанаандаа оруулбал,

²⁴үргэлэй шэрээгэй хажууда үргэлөө орхи. Тиигээд бушуухан ошожо, нүгөө хүнтээ эбтэй боло, тиигэхэн хойноол үргэл мүргэлөө үргөөрэй.



²⁵Хэрбээ хэн нэгэн шинии урдаһаа зарга барижа, шамайе зарга шүүбэридэ абаашажа байбал, зарга шүүгшын мэдэлдэ ороогүйдөө, замдаа хэрэгээ түргэхэн шийдхэхые оролдо. Тиигээгүй хааш, шамайе зарга шүүбэридэ үгэхэ, зарга шүүгшэ шамайе түрмын харуулшанда тушааха, харин харуулшан шамайе түрмэдэ нуулгаха.

²⁶Үри шэриее дууһан, һүүлшын хашарһан хүрэтэр түлөөгүй хаа, ши тэндэһээ гарахагүйш гэжэ шамда баталан хэлэнэб.

Эрэдээ гү, али эхэнэртээ урбаха тухай

²⁷«Эрэдээ гү, али эхэнэртээ бү урба», – гэжэ эртэ урда сагта хүнүүдэй хэлэдэгыг таанар дуулаһан бэээт.

²⁸Харин би мүнөө иигэжэ хэлэхэ байнаб: ондоо эхэнэр тээшэ хараад, тэрээнтэй ниилэхэ ханаатай байһан алишье хүн ханал бодолдоо тэрэ эхэнэртэй орёолдон, өөрынгөө һамганда урбаба гээшэ.

²⁹Хэрбээ баруун нюдэншни шамайе нүгэлдэ оруулаа хаа, тэрэнээ һуга татаад хая. Бүрин эрхэтэнтэйгээ гал тамада хаягдахын орондо гансахан эрхэтэнгүй ябабалшни шамда дээрэ байха.

³⁰Хэрбээ баруун гаршни шамайе нүгэлдэ оруулаа хаа, тэрэнээ таһа отолоод хая. Бүрин бүтэн эрхэтэнтэйгээ гал тамада хаягдахын орондо гансахан лэ мүсыншни хосорбол, шамда дээрэ байха.

Ханиһаа халаха тухай

³¹Һамганһаа халажа байһан эрэ бүхэн халаһан тухайгаа гэршэлгэ һамгандаа бэшэжэ үгэхэ ёһотой гэжэ баһа хэлэгдэһэн байдаг.

³²Харин би мүнөө таанадта иигэжэ хэлэхэб: өөртэнь урбаагүй эхэнэрһээ бусад шалтагаануудаар халаһан алишье эрэ һамгаяа урбалтада түлхинэ; мүн тиимэ эхэнэрээр һамга хэһэн хүн баһал урбагша болоно.

Тангариг тухай

³³«Дээдын Эзэндэ үгэһэн тангаригаа бү эбдэ, тэрэнээ сахижа яба», – гэжэ эртэ урда сагһаа хүнүүдтэ хэлэдэгыг таанар баһа дуулаа һэн бэээт.

³⁴Харин би мүнөө танда иигэжэ хэлэхэб: найдуулга үгэхэдөө огто бү тангаригла, огторгой тэнгэрээрше бү тангаригла, юундэб гэбэл, огторгой хадаа Бурханай һуудаг шэрээ гээшэ.

³⁵Газар дэлхэйгээрше бү тангаригла, юундэб гэбэл, газар дэлхэй Бурханай хүлэйн түшэг гээшэ. Иерусалимаарше бү тангаригла, юундэб гэбэл, Иерусалим агууехэ Хаанай хото гээшэ.

³⁶Өөрынгөө толгойгоорше бү тангаригла, юундэб гэхэдэ, гансаханше үһээ сагаан болгожо гү, али хара болгожо шадахагүйш.

³⁷Зүгөөр, найдуулгаа үгэхэдөө, «зай, зай», али «үгы, үгы» гэжэл хэлэ. Энээнһээ үлүү үгэ муу мэхэтэй шолмосхоо гарадаг.

Үһөөгөө абаха тухай

³⁸«Нюдэнэй харюу нюдэн, шүдэнэй харюу шүдэн» гэжэ хэлэдэгыг таанар дуулаа ёһотойт.

³⁹Харин би мүнөө танда иигэжэ хэлэхэб: хоротоноор бү үһөөрхэлдэ. Хэрбээ баруун хасарыешни хүнэй альгадабал, тэрэ хүндэ зүүн хасараа табижа үгэ.

⁴⁰Хэрбээ хэн нэгэнэй шамтай заргалдаад, самсыешни буляаха һанаатай байбалнь, ши тэрээндэ дэгэлээ тайлажа үгэ.

⁴¹Хэрбээ нютагыешни эзэлһэн сэрэгшэд шамайе нэгэ модоной зайда юумыень шэрэжэ абаашахыешни хүсөөр баалабалнь, ши тэдэнэй юумэ хоёр модоной зайда абаашажа үгөөрэй.

⁴²Шамһаа юумэ эриһэн хүндэ үгэ, шамһаа юумэ урьһаар абаха гээ һаань, буруу бү хараарай.

Дайсадтаа дуратай байха тухай

⁴³«Нүхэртөө дуратай бай, дайсанаа үзэн яда» гэжэ хэлэдэгыг таанар дуулаа бэээт.

⁴⁴Харин би мүнөө танда иигэжэ хэлэхэб: дайсадтаа дуратай байгты, таниие хашагшадай түлөө зальбаржа байгты.

⁴⁵Тиигээ хаа, огторгойдо байгша Эсэгэдээл адли бээе абажа ябадаг болохот. Юундэб гэбэл, Эсэгэтнай өөрынгөө муушуулдашье, найшуулдашье нара гэрэлтүүлнэ, мүн зүбтэндэшье, буруутандашье хура бороо оруулна.

⁴⁶Хэрбээ өөртөө хайра дуратай зониел хайрлажа байбалтнай, Бурхан яагаад таанадые шагнаха юм? Алба татаашадшье тиидэг бэшэ аал?

⁴⁷Баһа хэрбээ гансал өөрынгөө нүхэдые мэндэшэлжэ яабал, таанад үлэмжэ хайн ямар юумэ хэнэ гээшэбта? Мүн бусад арадуудшье баһал тиидэг бэшэ аал?

⁴⁸Тиимэхээ эрхим түгэс Огторгойн Эсэгэдээл адли таанадшье эрхим хайн байгты.

Матвей 6

Үгытэйшүүлдэ бадар үгэхэ тухай

¹Хүнүүдтэ харагдаха мэдэгдэхын лэ тула тэдэндэ туһа хүргэжэ бү байгты. Тиигээ хаа, Огторгойдохи Эсэгэхээ шагналда хүртэхэгүйт.

²Тиин үгытэйшүүлдэ бадар үгэхэдөө, тэрээн тухайгаа бүхы хото хүдөөгөөр бү донгодо. Хоёр нюуртан лэ тиигэжэ бээе магтуулхын тула мүргэлэй гэрээр дүүрэн, газаагууршье тунхагладаг ха юм. Тэдэнэр өөһэдынгөө шагнал энэ дээрээл абажа байна гэжэ танда үнэниие хэлэнэб.

³Үгытэйшүүлдэ бадар үргэхэдөө, тэрээн тухайгаа хани нүхэдтөөшье бү мэдүүлэ.

⁴Үргэл хэхэдээ, нюудагаар хэжэ бай. Тиигэбэлшни нюуса юумэ хаража мэдэжэ байдаг шинии Эсэгэ ашыеш заатагүй харюулха.

Зальбарха тухай

⁵Зальбархадаа, ши хоёр нюуртанда адли бү боло. Тэдэнэр улад зондо үзэгдэхэ харагдахын тула мүргэлэй гэртэ бодоод, гудамжын булангуудаар зогсоод зальбарха мүргэхэ дуратай байдаг. Тэдэнэр

өөһэдынгөө шагнал энэ дээрээл абажа байна гэжэ танда үнэниие хэлэнэб.

⁶Харин ши зальбархадаа, өөрынгөө таһалгада орожо, үүдээ хаагаад, шамтай далда газарта байһан Эсэгэдээ зальбараарай. Тиигэбэлшни нюуса юумэ хаража мэдэжэ байдаг шинии Эсэгэ ашыешни заатагүй харюулхал.

⁷Зальбархадаа, ши онгондо мүргэгшэ хүнүүдтэл адляар дэмы үгэнүүдые бү шаша. Тэдэ үлүү үгэтэн олон табые шашахадаа, онгонуудтаа дуулдахабди гэжэ һанадаг ха юм.

⁸Тэдэ зониие бү һажаагты: эрихэ гуйхыншни урда тээ Эсэгэшни шамда хэрэгтэй юумэнүүд тухай мэдээд байдаг ха юм.

⁹Иигээд зальбаржа байгаарай: «Тэнгэридэ оршодог Эсэгэмнай! Нангин нэрэшни алдаршахань болтогой.

¹⁰Хаан түрэшни мандахань болтогой, тэнгэри огторгойтойл адляар газар дэлхэй дээрэшье эрхэ хүсэлшни бэелхэнь болтогой!

¹¹Ажамидаралаймнай хоол мүнөөдэр мандаа хайрлыш!

¹²Манда муу юумэ хэгшэдые манай хүлисэдэгтэл адляар, маанадай буруу хэрэгүүдые хүлисыш даа.

¹³Горидолго хорхойтуулгада маниие бү оруулыш даа, муу мэхэтэй шолмошоо аршалжа байгыш даа! Хаан түрэ, хүсэ шадал, алдар соло мүнхэдөө шинии ха юм. Болтогой!»

¹⁴Хэрбээ ондоо хүнүүдэй танда хэһэн муу юумэнүүдые хүлисэжэ байбалтнай, тэнгэридэ оршодог Эсэгэтнайшье таниие хүлисэхэл.

¹⁵Хэрбээ бусадые танай хүлисэхэгүй байбал, огторгойдо оршодог Эсэгэтнай баһа танай буруу ябадалнуудые хүлисэхэгүйл.

Масаглаха тухай

¹⁶Масаглахадаа хоёр нюуртан мэтээр гунигтай шарай харуулхаяа бү оролдогты. Тэдэнэр масаглаһанаа хүн бүхэндэ мэдүүлхын тула

уйдхартай барагар шарай үзүүлдэг юм. Тэдэнэр өөһэдынгөө шагнал энэ дээрээл абажа байна гэжэ танда үнэниие хэлэнэб.

¹⁷Хоол барингүй ябахандаа, ши үһээ һамнаад, нюураа угаа.

¹⁸Тиигэбэлшни, масаглаһан тухайшни бусад зон мэдэхэгүй. Харин шамтай далда газарта байһан Эсэгэшни мэдэжэ байха. Тиин нюуса юумэ мэдэжэ байдаг Эсэгэшни ашыеш заатагүй харюулха.

Тэнгэридэхи баялиг тухай

¹⁹Газар дэлхэй дээрэ баялиг зөөри өөртөө бү суглуулагты, тэрэниетнай хүйр хорхой, жэбэ жонхо эдижэ магадгүй, хулгайшад шургажа ороод, хулуужа магадгүй.

²⁰Харин баялиг зөөри огторгой дээрэ суглуулагты, тэндэ хибэн хорхойшые, жэбэ жонхошые эдихэгүй, хулгайшадшые шургажа ороод хулуухагүй.

²¹Ушарынь хэлэбэл, эрдэни баялигайтнай байһан газарта зүрхэ сэдхэлтнайшые оршодог бшуу.

Бэеын гэрэл тухай

²²Нюдэн болбол бэеын гэрэл дэн юм. Нюдэнэйшни арюун гэрэлтэй байгаа һаа, бүхы бэешни гэрэлтэй гэгээн байха.

²³Хэрбээ нюдэнэйшни харасын сэбэр бэшэ юм һаань, бүхы бэешни харанхы бүрэнхы байхал. Теэд досоохи гэрэлэйшни харанхы юм һаань, харанхынь өөрөө ямар бад балай байлтай гээшэб?

Бурхан ба эд зөөри тухай

²⁴Хэншые хоёр эзэндэ зарагдажа шадахагүй: нэгэн гэбэл, таанад нэгэ эзэндээ дурагүй, нүгөөдэдөө дуратай байхалта; али үгышые һаа, нэгэ эзэндээ дуратайгаар, нүгөөдэдөө дурагүйгөөр ажаллаха бшуут. Таанад Бурханда болон эд зөөридэ нэгэ зэргэ алба хэжэ шадахагүйлта.

Юрын ажабайдал тухай һанамжа

²⁵Тиимэһээл таанадта иигэжэ хэлэхэб: амиды ябахын тула юу эдихэ уухабибди, юу үмдэхэбибди гэжэ һанаагаа бү зобогты. Амимнай эдеэ

хоолһоо шухала бэшэ аал? Бэемнай хубсаһа хунарһаа шухала бэшэ аал?

26Огторгойгоор ниидэдэг шубуудые ажаглан харыт: тэдэнэр юумэ тарیداггүй, хададаггүй, амбаарта үрэхэ таряа суглуулжа хадагалдаггүйл. Зүгөөр, танай Огторгойн Эсэгэ тэдэниие тэжээдэг ха юм. Таанар тэдэ шубуудта ороходоо үлүү шухала бэшэ аалта?

27Таанадай хэнтнай шадалаараа оролдоод, тохоногойшые шэнээн ургажа шадахаб?

28Баһа хубсаһа хунар тухай һанаагаа юундэ зобонобта? Хээрэдэ сэсэгүүдэй яажа ургадагые харыт: тэдэ ажал хэдэггүйл, өөһэдтөө утаһа ээрэжэ хубсаһа оёдоггүйл.

29Алдар суутай Соломоншые аргагүй ехэ эд баялигтай байһаншые һаа, эдэ сэсэгүүд шэнги тиимэ гоёор хубсалдаггүй һэн гэжэ би танда хэлэнэб.

30Мүнөөдэр эндэ ургажа байгаад, үглөөдэрынь, магад, галда шатаагдажашые болохо хээрэ ургаһан алишые ногоо Бурхан үзэсхэлэнтэ гоёор шэмэглэдэг юм. Харин таанадые Бурхан тэрэ ногоонһоо һураггүй ехээр анхараа бэээ, этигэл багатан!

31Тиимэхээ «Бидэ юу эдихэмнай гээшэб?» али «Юу уухамнай гээшэб?» али «Юу үмдэхэмнай гээшэб?» гэжэ өөһэдтөө бү хэлэгты, һанаагаа бү зобогты.

32Юундэб гэдэл, Бурхание мэдэхэгүй хүнүүд лэ иимэ юумэнүүдээр һанал бодолоо бүрин эзэлүүлдэг юм. Эдэ бүгэдэ юумэнэй таанадта хэрэгтэй байһые Огторгойн Эсэгэтнай һайн мэдэжэ байна бшуу.

33Түрүүшээр Бурханай хаан түрые, Бурханай үнэн зүбые бэдэрэгты, тиигээ һаатнай бусад бүгэдэ юумэнүүд танда үгтэхэ.

³⁴Тиимэһээ үглөөдэрэйнгөө тухай ханаагаа бү зобогты, юундэб гэбэл, үглөөдэртнай өөрөө өөр тухайгаа ханаагаа зобохол: үдэр бүхэндэ ханаагаа зобохо юумэниинь олон байдаг лэ.

Матвей 7

Бусадые зэмэлхэ тухай

¹Бусадые бү шүүбэрилэн зэмэлэгты, тиигэбэл Бурхан таанадые шүүбэрилэн зэмэлхэгүйл.

²Ушарынь хэлэбэл, бусадые яжа зэмэлнэбта, тиигэжэл Бурхан таанадые зэмэлхэ, ямар хэмжээгээр хэмжэнэбта, тиимэл хэмжээгээр танда хэмжэжэ үгэхэ.

³Нүхэрэйнгөө нюдэндэ байһан гэшүүһэ хараад, өөрынгөө нюдэндэ байһан модо юундэ обёорногүйбши?

⁴Үгышье хаа, нюдэндэшни модоной орожо тороод байхада, ши нүхэртөө: «Байза, би шинии нюдэндэ ороод байһан гэшүүһэ гаргаһууб», – гэжэ яагаад хэлэхэбши?

⁵Хоёр нюуртан! Түрүүшээр өөрынгөө нюдэнэй модо гарга, тиигээ хаа, нүхэрэйнгөө нюдэнэй гэшүүһэ яжа гаргахые мэдэхэлши.

⁶Нангин юумэ нохойдо бү хаягты, тэдэ эрьеэд лэ өөртэтнай добтолхол. Субад эрдэни гахайн урда бү сасагты, тэдэ тэрэниетнай миин лэ хүлөөрөө гэшхэхэл.

Тоншогы – таанадта нээжэ үгэхэ

⁷Тиимэһээ эригты, тиихэдэтнай танда үгэхэл; бэдэрэгты, тиихэдээ олохот; үүдэ тоншогы, тиихэдэтнай танда нээхэ.

⁸Юундэб гэбэл, эриһэн алишье хүн абадаг, бэдэрһэн хүн олодог, тоншоһон хүндэ үүдэ нээжэ үгэдэг.

⁹Хилээмэ эриһэн хүбүүндээ гартань шулуу барюулха эсэгэ таанарай дунда олдохо аал?

¹⁰Мүн загаһа эрихэдэнь могой үгэхэ хүн байха аал?

¹¹Хэрбээ нүгэл шэбэлтэй таанадай үхибүүдтээ хайн юумэ үгэжэ шададаг байхадатнай, Огторгойн Эсэгэтнай эрижэ байһан хүндэ бүришые бэлэнээр хайн хайханиее үршөөхэ бэшэ аал?

¹²Бусад хүнүүд танда ямараар хандаһай гэжэ хананабта, тиигэжэл таанад бусаддуудта хандажа байгты: энэ болбол Моисейн Хуулийн ба лүндэншэдэй хургаалай гол удхань мүн.

Уйтахан хаалга тухай

¹³Уйтахан хаалгаар орогты: юундэб гэбэл, тамада хүргэдэг хаалгань үргэн, харгынь уужам юм, тиин тэрээгээр олон лэ зон ябадаг.

¹⁴Ажамидаралда хүргэдэг хаалгань уйтахан, харгынь нариихан бэрхэ юм, тэрээниие олоошо зон үсөөн байдаг.

Модон үрэ жэмэсээрээ танигдаха

¹⁵Хуурмаг лүндэншэдһөө болгоомжолжо байгты. Тэдэнэр гадаада талаһаа хонид байһан хэбэр үзүүлэн таанадта ерэбэшые, досоогоо арьяатан шоно мэтэ байха.

¹⁶Тэдэниие таанад хэһэн хэрэгүүдэйнэ үрэ дүнгөөр танихат. Үүргэнэ модон үзэм жэмэс үгэдэггүй, үргэхэтэй буртаг үбһэн амтан жэмэс ургуулдаггүй.

¹⁷Тэрээндэл адляар, алишые хайн модон хайн үрэ жэмэс үгэдэг, муу модон муу үрэ жэмэс үгэдэг.

¹⁸Хайн модон муу үрэ жэмэс ургуулжа шадахагүй, муу модон хайн үрэ жэмэс ургуулжа шадахагүй.

¹⁹Хайн үрэ жэмэс үгэдэггүй алишые модон таһа сабшагдаад, галда хаягдадаг юм.

²⁰Тиимэхээл таанар хуурмаг лүндэншэдые хэрэгүүдээрнэ танихат.

Хуурмаг шабинар

²¹«Дээдын Эзэн! Дээдын Эзэн!» гэжэ намда хэлэгшэ хүн бүхэн Бурханай хаан орондо орохогүй, зүгөөр тэнгэридэ байгша Эсэгымни эрхэ хүсэл бүтээдэг хүнүүд лэ тиишээ орохо юм.

²²Зарга шүүбэрийн Үдэрэй болоходо, олон зон намда: «Дээдын Эзэн! Дээдын Эзэн! Шинии алдар нэрэхээл бидэ номнодог хэмди. Баһа шинии алдар нэрээр бидэ ада шүдхэрнүүдые намнажа гаргадаг хэмди, шинии алдар нэрээр гайхамшагтай хэрэгүүдые бүтээдэг хэмди», – гэжэ хэлэхэл.

²³Одоо тиихэдэнь би: «Би хэзээшье таанадые мэдэдэг байгаагүйб. Холо бологты намһаа, нүгэлтэ зон», – гэжэ харюусахалби.

Хоёр барилгашан тухай

²⁴Минии хэлэхэн энэ хургаалые шагнажа, бээлүүлдэг алишье хүниие би шулуун хуури дээрэ гэрээ бариган, бодомжотой сэсэн хүнтэй адлишаахаб.

²⁵Аадар бороо адхараад, уһа мүрэнүүд үерлөө, шанга халхин буужа, тэрэ гэр руу шуумайгаа. Харин шулуун хуури дээрэ бодхоогдоһон тэрэ гэр унажа хандарбагүй.

²⁶Харин минии энэ хургаал шагнаад, бээлүүлдэггүй хүн бүхэн элхэн дээрэ гэрээ бариган бодомжолгүй тэнэг хүнтэй адли юм.

²⁷Аадар бороо адхараад, уһа мүрэнүүд үерлөө, шанга халхин буугаад, үнөөхи гэр дайраа. Тиихэдэнь тэрэ гэр аймшагтайгаар хандаран унаа.

Иисусай эрхэ засаг тухай

²⁸Иисусай иигэжэ хургажа дүүргэхэдэ, үй түмэн зон тэрэнэй хургаалда гайхажа байба.

²⁹Юундэб гэбэл, Иисус Хуули заадаг багшанарта, фарисейнүүдтэ адляар бэшэ, харин эрхэ засаг баригшада адляар улад зониие хургажа байгаа.

Матвей 8

Иисус үбшэн хүниие эдэгээбэ

¹Хада дээрэхээ Иисусай буухадань, тэрэнэй хойноһоо олон зон дахажа ябаба.

²Гэнтэ хэлхэ бузар үбшэнтэй нэгэ хүн ойртоод, Иисусай хүлдэнь мургэжэ: «Дээдын Эзэн, аа! Хэрбээ ши хүсэбэл, намайе арюудхан эдэгээжэ шадахаш», – гэбэ.

³Иисус гараа харбайжа, тэрэ хүндэ хүрөөд абаха зуураа: «Эдэгээхэ хүсэлтэйб, арюун больш даа», – гэбэ. Тиихэдэнь тэрэ хүн хэлхэ бузар үбшэнһөө дары арюудхагдан эдэгэбэ.

⁴Иисус тэрэ хүндэ: «Энээн тухай ши хэндэшье бү хэлэ. Зүгөөр санаартада ошожо, бээ үзүүлэ. Тиигээд эдэгэһэнээ бултанда гэршэлхын тула ши Моисейн зарлигай ёһоор үргэл хээрэй», – гэбэ.

Иисус зуунай даргын зарасые эдэгээбэ

⁵Иисусай Капернаум хото орожо байхадань, зуунай нэгэ дарга тэрээндэ ойртожо, туһалхыень гуйба:

⁶«Эзэн, аа! Минии зараса саа үбшэндэ даруулаад, гэртээ тулижа хэбтэнэ», – гэбэ.

⁷«Зай, би ошоод, тэрээниешни эдэгээхэб», – гэжэ Иисус харюусаба.

⁸Тиихэдэнь зуунай дарга иигэжэ харюусаба: «Ай, эзэн! Шамайе гэртээ урижа оруулхаар бэшэ хүн гээшэлби даа. Ганса зарлигаа буулгыш даа, тиигэбэлшни зарасамни эдэгэжэрхихэ.

⁹Ушарынь хэлэбэл, бишье баһал дээрээ ноёдтой, мүн мэдэлдээ сэрэгшэдтэй хүнби. Тэдэнэйнгээ нэгэндэнь: „Ошо“ гэхэдэм ошодог, нүгөөдэдэнь: „Ерэ“ гэхэдэм ерэдэг, зарасадаа: „Тэрээниие хэ“ гэхэдэм хэдэг юм».

¹⁰Иисус энээниие дуулаад, ехээр гайхаба, тиигээд хойноһоонь ябаһан зондо: «Би израильшуудайшье дунда иимэ хүзэг этигэлтэй хүниие үзөөгүйб гэжэ таанадта үнэниие хэлэнэб», – гэбэ.

¹¹«Тэрээнһээ гадна зүүн, баруун зүгһөө олон зон ерэжэ, Огторгойн хаан орондо Абраһамтай, Исаагтай, Яковтай зэргэлээд найрай шэрээдэ һууха.

¹²Харин хаан орондо орохо ёһотой байгаад, орохоёо дурлаагүй хүнүүд харанхы бүрэнхыдэ хаягдаад, уйлаха бархиралдаха, шүдөө хабиралдаха».

¹³Тиигээд Иисус зуунай даргада: «Ши гэртээ хари, шинии этигэдэгэй ёһоор лэ болохо», – гэжэ хэлэбэ. Тиигэжэ хэлэхэтэйнь сасуу зуунай даргын зараса эдэгэшэһэн байгаа.

Иисус олон зоние эдэгээбэ

¹⁴Иисус Пётрой гэртэ ороод, тэрэнэй хадам эхын халуунтай үбшэн хэбтэхые хараба.

¹⁵Эхэнэрэй гарта халта хүрөөд абахадань, халууниинь буураба. Тиигээд Пётрой хадам эхэнь хэбтэриһээ бодожо, айлшанаа хүндэлбэ.

¹⁶Үдэшэ болоходо, ада шүдхэртэ барюулһан олон хүнүүдые тэрээндэ асарба. Иисус ганса үгөөр ада шүдхэрнүүдые намнажа гаргаба, хамаг үбшэн зоние эдэгээбэ.

¹⁷«Манай ядарал тэрэ өөр дээрээ үргэлжэ, үбшэ хабшыемнай абажа ябаа», – гээд Исаяя лүндэншын хэлэһэниинь бүтэбэ даа.

Иисустай хамта ябахаяа һанаһан хүнүүд тухай

¹⁸Иисус хажуудань олон зоной сугларшаһые харахадаа, далайн нүгөө бээдэ тamarжа ошохыень шабинартаа захирба.

¹⁹Нэгэ Хуули заадаг багша Иисуста дүтэлөөд: «Багша! Шинии хаанашье ошоо һаа, би һалангүй дахаад ябахаб», – гэбэ.

²⁰Тиихэдэнь Иисус тэрээндэ: «Араата үнэгэн орохо нүхэтэй, тэнгэрийн шубуун хонохо уургайтай юм, харин Хүн түрэлхитэнэй Хүбүүн толгойгоо табижа амарха газаргүйл», – гэжэ хэлэбэ.

²¹Иисусай ондоо нэгэ шабинь тэрээндэ: «Дээдын Эзэн, аа! Түрүүшээр гэртээ харижа, эсэгээ хүдөөлүүлээд ерэхыемни табиш даа», – гэбэ.

²²Теэд Иисус тэрээндэ: «Намтай яба. Үхэхэн хүнүүд өөһэдөө үхөөшэдөө хүдөөлүүлэг лэ», – гэжэ харюусаба.

Иисус һалхи номгоруулна

²³Тэндэһээ хүдэлэн Иисус онгосодо һууба, шабинаныньше хойноһоонь орожо һуулсаба.

²⁴Гэнтэ далай ехээр долгилжо, долгинууд онгосыень хушан, шэнгээн алдаба. Тэрэ үедэ Иисус унтажа байгаа.

²⁵Шабинанынь хажуудань ерээд һэрэжэ: «Ай, багша! Маниие абарыш, хосорхомнай!», – гэлдэбэ.

²⁶«Таанад юундэ иитэрээ айгаабта? Һүзэг этигэлээр хомор байнат даа», – гэжэ Иисус тэдэндэ хэлэбэ. Удаань хүл дээрээ бодожо, дошхон һалхинда, нуурай долгинуудта зогсохыень захирба. Тиихэдэнь оршон тойрон огто аалин намдуу болошобо.

²⁷Онгосо соо байһан улад гайхалдажа: «Һалхишье, далайшье мэдэлдээ оруулаад байдаг энэ хэн гээшэб?» – гэлдэбэ.

Иисус ада шүдхэртэ барюулһан хоёр хүниие эдэгээбэ

²⁸Далайн нүгөө бээдэ оршодог Гадара хотын шадар тамаржа ерээд, замаар ябатарнь, ада шүдхэртэ барюулһан хоёр хүн үхэхэн хүнүүдые хүдөөлүүлдэг агы нүхэн сооһоо гаража, Иисуста ойртобо. Тэдэ хоёрой ехэл галзуу гайтай хадань тэрэ харгыгаар хэншье ябахаяа зүрхэлдэггүй бэлэй.

²⁹Тиигээд тэдэ галзуу амидад: «Ай, Бурханай Хүбүүн, ши маанадтай юу хэхэ һанаатайбши? Ши маниие саһаа урид хэхээхээ иишэ ерэбэ гүш?» – гэжэ хашхаралдаба.

³⁰Тэндэһээ холохон хүрэг ехэ гахайнууд бэлшэжэ байба.

³¹«Хэрбээ маниие эндэһээ намнажа гаргаха гээ һаа, тэрэ гахайн хүрэгтэ ошохыемнай зүбшөөгыш», – гэжэ тэдэ ада шүдхэрнүүд Иисусые гуйба.

³²«Ошогты», – гэжэ Иисусай хэлэхэдэнь, ада шүдхэрнүүд үнөөхи хоёрой бээһэнь гараад, гахайн хүрэгтэ оробо. Тиихэдэнь бүхы гахайн хүрэг хабсагайн хүбөөһөө далай уруу хүрэжэ үхэбэ.

³³Гахай манаашад тэндэһээ гүйлдэжэ, хото ороод, ушарһан бүхы юумэн тухай, мүн ада шүдхэртэ барюулһан хүнүүдтэй юу тохёолдоһон тухай хөөрөбэ.

³⁴Тиихэдэнь хотын хамаг зон Иисусые угтахаяа гараба. Тэрэниие хараад, нютагһаань гаража ошохыень гуйба.

Матвей 9

Иисус саа үбшэнтэй хүниие эдэгээбэ

¹Тиигээд Иисус онгосодо һуугаад, һөөргөө ажаһуудаг хото руугаа тамаржа ерэбэ.

²Хэдэн хүн тэрээндэ саа үбшэндэ дайруулһан нэгэ хүниие шэрдэгтэйн тэлээд асарба. Иисус тэдэ зоной аргагүй ехэ этигэл хүзэгтэй байхые хараад, саа үбшэнтэндэ хандан: «Ши, хүбүүн, зоригоо бү алда! Нүгэлнүүдшни хүлисэгдэбэ», – гэжэ хэлэбэ.

³Тиихэдэнь Хуули заадаг зарим багшанар: «Энэшни Бурханиие доромжолжо байнал», – гээд досоогоо һанаба.

⁴Тэдэнэй һанал бодол мэдэжэ байһан Иисус хэлэбэ: «Таанар юундэ иимэ харата һанал сэдхэлдээ бодобот?

⁵„Нүгэлнүүдшни хүлисэгдэбэ“ гэхэдэ гү, али „бодоод яба“ гэжэ хэлэхэдэ бэлэн гү?

⁶Хүн түрэлхитэнэй Хүбүүнэй газар дэлхэй дээрэ нүгэл шэбэлнүүдые хүлисэхэ эрхэтэй байһые таанарай мэдэжэ байхын тула би таанарта баталжа харуулхаб». Тиигээд Иисус үбшэн хүндэ: «Хүл дээрээ бодоод, дэбисхэрээ абажа, гэртээ хари», – гэжэ хэлэбэ.

⁷Тиихэдэнь үнөөхи хүн бодоод, гэртээ ябаба.

⁸Улад зон энээниие хараад айн хүрдэбэ, хүн түрэлхитэндэ иимэ ехэ эрхэ засаг хайрлаһанайнь түлөө Бурханиие магтан алдаршуулба.

Иисус Матвейе шэлэжэ абаба



⁹Тэндэһээ саашаа ябажа ябатараа, Иисус Матвей гэдэг алба татагшын татабари суглуулдаг газартаа нуухые хараад: «Хойноһоомни яба», – гэжэ хэлэбэ. Тиихэдэнь Матвей бодоод, хойноһоонь ябаба.

¹⁰Хожомынь Иисусай шабинартайгаа хамта Матвейндэ хоол барижа байхадань, алба татагшад, нүгэл хэгшэд олоороо ерэжэ, тэдэнээр хамта хоол бариба.

¹¹Зарим фарисейнүүд энээниие хараад, Иисусай шабинарта: «Юундэ танай багша алба татагшадтай, нүгэл хэгшэдтэй хамта эдинэ ууна гээшэб?» – гэбэ.

¹²Иисус тэдэнэй хэлэһые дуулаад, иигэжэ харюусаба: «Элүүр уладта эмшэн хэрэггүй, харин үбшэн хүнүүдтэ хэрэгтэй юм.

¹³Таанад ошожо, „Намда тахил тахихын орондо бусад зондо үршөөл хайратай байхыетнай хүсэнэб“ гэжэ Нангин Бэшэг соо хэлэгдэһэн үгын удха мэдэжэ абагты. Би үнэн сэдхэлтэниие бэшэ, харин нүгэл хэгшэдые дуудахаяа ерээ хүнби».

Масаглаха тухай асуудал

¹⁴Иоаннай шабинарынь Иисуста ерээд: «Юундэ бидэнэр, мүн фарисейнүүд байгаад лэ масаглажа байдагбибди, харин шинии шабинар огто масагладаггүйб?» – гэжэ нураба.

¹⁵Тиихэдэнь Иисус тэдэндэ иигэжэ харюусаба: «Түрэ хуримай айлшад хүрьгэн хүбүүнтэйгээ хамта байха сагтаа гуниглаха аал? Үгыл даа! Зүгөөр хүрьгэн хүбүүниие тэдэнһээ абаад ябаха үдэрэй ерэхэдэнь, тэдэ айлшад масаглахал.

¹⁶Хэншые хуушан хубсаһанда шэнэ бүдөөр халааһа табидаггүй бшуу. Тиигэбэлнь шэнэ табиһан халааһан хуушан хубсаһые удара татажа, хахархайень улам ехэ болгохол.

¹⁷Мүн баһа һая нэрэһэн архияа хуушан туламда хэдэггүйл. Тиигээ һаа, арһан тулам хахараад, архинь адхархал, арһан тулам хэрэгһээ гарахал.

Теед һая нэрэһэн архияа шэнэ арһан туламда хэхэдэ, алинииншые бүтэн зандаа байхал».

Наһа бараһан басаган ба үбшэн эхэнэр тухай

¹⁸Тиигэжэ хэлэжэ байтарнь, нэгэ дарга ерээд, Иисусай хүлдэ мүргэжэ: «Басагамни һаяхан наһа барашабал. Манда ерэжэ, тэрээндэмни гараараа хүрөө һаашни, басагамни амидырхал», – гэбэ.

¹⁹Тиихэдэнь Иисус шабинартайгаа бодоод, тэрэ хүнтэй хамта ябаба.

²⁰Арбан хоёр жэл соо шуһа гоожоод тогтодоггүй үбшэнгөөр зобожо байһан нэгэ эхэнэр Иисуста хойноһоонь ойртоод, хубсаһандань халта гараараа хүрэбэ.

²¹Юундэ тиигээб гэхэдэ, «Хубсаһандань халта хүрөөд абаал һаа, эдэгэхэб» гэжэ тэрэ эхэнэр досоогоо этигэжэ байгаа бшуу.

²²Иисус эрьежэ, тэрэ эхэнэрые хараад: «Басаган, ши зоригтой бай! Этигэлшни шамайе абараа», – гэбэ. Тэрэ дороо эхэнэр эдэгэшэбэ.

²³Даргын гэртэ ороод, Иисус наһа барагшые шаналха хүгжэмшэдэй болон улад зоной бахардан үймэлдэжэ байхые хараба.

²⁴«Эндэһээ гарагты. Энэ балшар басаган үхөөгүй, миил унтажа байна ха юм», – гэхэдэнь, Иисусые улад зон наада барин энеэлдэбэ.

²⁵Улад зоной газашаа гарахадань, Иисус басаганай хэбтэһэн таһалгада орожо, гарһаань баряад, бодоходонь туһалба.

²⁶Энэ ушар тухай һураг суу тэрэ орон дайдаар хаа хаанагүй тараба.

Иисус хоёр һохор хүниие эмшэлбэ

²⁷Иисусай тэндэһээ ябажа ябаханда, хойноһоонь хоёр һохор хүн дахажа: «Давидай үри һадаһан, Иисус, маниие үршөөжэ хайрлыш!» – гэжэ хашхаралдаба.

²⁸Тиигээд Иисусай гэртэ ороходонь, үнөөхи хоёр хүн тэрээндэ дүтэлбэ. Иисус тэдэнһээ: «Таанарые элүүр мэндэ болгохо аргатай байһандамни

этигэнэ гүт?» – гэжэ һураба. Тэдэнь: «Тиимэ даа, Дээдын Эзэн!» – гэжэ харюусаба.

²⁹Тиигэхэдэнь Иисус тэдэ хоёрой нюдые гараараа хүрөөд: «Таанарай этигэһэнэй ёһоор лэ болог», – гэжэ хэлэбэ.

³⁰Тиин тэдэ хоёрой нюдэниинь харадаг болошобо. Иисус тэдэ хоёрто: «Энээн тухай хэндэшье бү хэлэгты», – гэжэ найнаар захиба.

³¹Харин тэдэнь гэрһээ гараад лэ, Иисус тухай һураг бүхы тэндэхи орон дайдаар тарааба.

Иисус хэлэ амагүй хүниие эдэгээбэ

³²Тэдэ хоёрой гаража байха үедэ ада шүдхэртэ барюулһан хэлэ амагүй нэгэ хүниие Иисуста асарба.

³³Ада шүдхэрыень гаргаһан хойнонь, хэлэ амагүй хүн юумэ хэлэдэг болобо. Улад зон гайхалдажа: «Израильда иимэ мэтын юумэн хэзээшье үзэгдөөгүйл», – гэлсэбэ.

³⁴Харин фарисейнүүд: «Энэшни ада шүдхэрнүүдэй ноёной хүсөөр лэ ада шүдхэрнүүдые дарана», – гэбэ.

Иисус сугларһан уладые хайрлаба

³⁵Иисус бүхы хото турануудаар, хүдөө нютагуудаар ябажа, мүргэлэй гэрнүүдтэ хүнүүдые һургаба, Бурханай хаан түрэ тухай һайн мэдээсэл номнобо, ямаршье үбшэ хабшатай, гай ядаралтай зониие аргалан эдэгээбэ.

³⁶Олон мянган зониие харахадаа, Иисус тэдэниие хайрлаба. Тэдэ зон ядаршаһан, эндэ тэндэ тарашаһан хонишонгүй хонидтол мэтэ байгаа бшуу.

³⁷Тиимэхээ Иисус шабинартаа иигэжэ хэлэбэ: «Ургаса ехэ байна, теэд тэрэниие суглуулха хүнүүдын үсөөн лэ.

³⁸Тиимэхээ ургасаяа суглуулха хүдэлмэрилэгшэдые ябуулхыень Ургасын Эзэндэ зальбарагты».

Матвей 10

Иисус арбан хоёр элшэнэрээ шэлэжэ абаба

¹Иисус өөрынгөө арбан хоёр шабинарые дуудаад, ада шүдхэрнүүдые намнажа гаргаха, ямаршые үбшэн хабшанһаа, ядаралһаа хүнүүдые эдэгээхэ эрхэ тэдээндээ үгэбэ.

²Арбан хоёр элшэнэрэйн нэрэнүүд иимэ: түрүүшынхинь Пётр гэжэ нэрлүүлһэн Симон, тиигээд тэрэнэй дүү Андрей, Яков ба Иоанн гэдэг Зэбэдэйн хоёр хүбүүд,

³Филипп Варфоломей хоёр, Фома ба алба татагша Матвей, Алфейн Яков, Фаддей гэжэ нэрлүүлһэн Леввей,

⁴Патриот бүлгэмэй гэшүүн Симон, мүн хожомын Иисуста урбаһан Иуда Искариот гэгшэд болоно.

Арбан хоёр элшэнэрэй зорилго тухай

⁵Эдэ арбан хоёр шабинараа эльгээхэдээ, Иисус тэдээндээ иигэжэ захиба: «Бусад арадуудта бү ошогты, самаряан хотонуудаар бү орогты.

⁶Гансал Израилиин арадта ошогты, тэдэ төөригдэһэн хүрэг хонидто адли бшуу.

⁷Таанар ошожо, Огторгойн хаан түрын мандахань ойртоо гэжэ номногты.

⁸Үбшэн хүнүүдые эдэгээгты, үхэһэн хүнүүдые амидыруулагты, хэлхэ бузар үбшэнтэниие арюудхагты, ада шүдхэрнүүдые намнажа гаргагты. Таанад түлөөһэгүй абаһанаа түлөөһэгүй үгэжэ байгты.

⁹Өөһэдтөө алта, мүнгэшые, зэд садшые абажа бү гарагты.

¹⁰Харгыда туулмаг сүүмхэшые, хэлгэхэ хубсаһашые, гуталшые, тулга таягшые бү абагты. Юундэб гэхэдэ, хүдэлмэрилэгшые хэрэгтэй юумээрнь хангаха зэргэтэй юм.



¹¹Ямаршые хотодо, хүдөө нютагта ороходоо, таанадые гэртээ байлгаха дуратай зохид найн хүниие оложо, тэрэнэйдэ зогсогты, тиигээд тэрэ нютагһаа гаража ошотороо тэндээл байгты.

¹²Гэртэ ороходоо: „Амгалан мэндэ нуухатнай болтогой“, – гэжэ амаршалжа байгты.

¹³Хэрбээ тэрэ айлай таанадые угтажа абабал, танай хүсэһэн амгалан тайбантнай тэрэ гэртэ тогтожо үлдэг лэ. Хэрбээ тэрэ айлай таанадые угтажа абахагүй байбалнь, амгалан тайбаниие хүсэһэн үреэлтнай таанадтаа бусаг.

¹⁴Ямар нэгэн айлай гү, али хотынхидой таанадые угтажа абаха дурагүй хаань, үгы һаа таанадай хэлэһые шагнаха дурагүй хаань, тэрэ гэрһээ гү, али хотоһоо гаража ошогты, хүлдэтнай халдаһан тооһыень һэжэржэ өөһэдтэнь орхигты.

¹⁵Зарга шүүбэрийн Үдэрэй болоходо тэрэ хотын зониие Бурхан Содом, Гоморро хотынхидһоо бүри үлүү аймшагтай хэһээлтэдэ хүртөөхэ гэжэ таанарта үнэниие хэлэнэб.

Хашалга зоболонгууд тухай һэргылнэ

¹⁶Шонын хүрэгтэ хонидые тууһан мэтээр би таанадые эльгээнэб. Тиимэһээ таанар могой мэтэ сэсэн, гулабхаа мэтэ эгээлэй даруу байгты.

¹⁷Таанадые зарга шүүбэрийн газарта абаашажа тушааха гү, али үгы һаа мүргэлэй гэрнүүд соо сохихо наншаха хүнүүдһээ бээ һэргылжэ ябагты.

¹⁸Минии түлөө таанарые захирагшадай, мүн хаашуулай урда байлгабал, тэдэндэ, мүн бусад арадуудта нам тухай хэлэхэт.

¹⁹Таниие барижа тушаахадань, юу хэлэхэ, яаж хэлэхэ тухайгаа һанаагаа бү зобооройгты. Тэрэ сагтаа хэлэхэ үгэнүүдтнай таанадта үршөөгдэхэ.

²⁰Тиихэдэ, таанар өөһэдөө хэлэхэгүйт, харин танай Эсэгын һүлдэ танаар хэлүүлхэ.

²¹Аха дүүнэр бэе бээ, эсэгэнь хүбүүгээ үхэлдэ үгэхэ; баһа үхибүүдынь эхэ эсэгынгээ урдаһаа үһөөрхэн бодожо, тэдэнээ алаха.

²²Минии түлөө таанадые булта үзэн ядаха; зүгөөр эсэстэнь хүрэтэр тэсэжэ гараһаниинь абарагдаха.

²³Таанарые нэгэ хотодо хашажа мүрдэбэлнь, ондоо хото руу зугадажа ошогты. Ушарынь хэлэбэл, Израилиин бүхы хотонуудаар таанарай ябажа үрдеэгүй байтар Хүн түрэлхитэнэй Хүбүүн заларжа ерэхэ гэжэ би таанадта баталан хэлэнэб.

²⁴Шабинь өөрынгөө багшаһаа дээгүүр байхагүй, мүн барлагынь өөрынгөө эзэнһээ дээгүүр байхагүй.

²⁵Шабинь багшынгаа зэргэ болобол, барлагынь эзэнэйгээ зэргэ болобол, болохо даа. Хэрбээ гэрэй эзэниие Веельзевул гэжэ шолмосой нэрээр нэрлэбэл, тэрэнэй гэртэхиние бүришые муухайгаар нэрлэхэ бэшэ гү?

Хэнһээ айха хэрэгтэйб?

²⁶Тиин тэдэ зонһоо бү айгты: эли болохогүй ямаршые далда юумэн байдаггүй, мэдээжэ болохогүй нюуса юумэн байдаггүй.

²⁷Харанхыда таанарта хэлэһыемни гэрэлтэйдэ дабтажа хэлэхэ ёһотойт. Шэхэндэтнай шэбэнэжэ хэлэһыемни гэрэй оройһоо айладхаха ёһотойт.

²⁸Хүнэй бэе хүнөөгөөд, хүнэһыень хүнөөхэ хүсэ шадалгүй хүнүүдһээ бү айгты, зүгөөр хүнэй хүнэһыеньшые, бэеыеньшые гал тамада хаяжа хүнөөхэ аргатай Бурханһаал айжа хүрдэжэ ябагты.

²⁹Хоёр борбилоо хашарһа мүнгөөр худалдадаг. Гэбэшые нэгэшые бишыхан борбилоо Бурханай зүбшөөлгүйгөөр газарта унахагүйл.

³⁰Харин таанадые абажа үзэбэл, толгойнтнай үһэншые хүрэтэрөө тоолоотой бшуу.

³¹Тиимэһээ бү айгты: таанар олон борбилоонуудһаа үнэтэй сэнтэйт.

Бурханай табисууртые угтажа абаха, тэрээнһээ арсаха тухай



³²Улад зоной урда минии мэдэлдэ байнаб гэжэ айладхаһан хүн бүхэниие бишье Огторгойдо оршодог Эсэгынгээ урда минии гэжэ гэршэлхэб.

³³Харин улад зоной урда намһаа арсаһан хүн бүхэнһөө бишье Огторгойдо оршодог Эсэгынгээ урда арсахалби.

Амгалан байдал бэшэ, харин нэлмэ асарааб

³⁴Газар дэлхэй дээрэ амгалан байдал тогтоохоёо ерээ гэжэ нам тухай бү һанагты. Би амгалан байдал бэшэ, харин нэлмэ абажа ерээб.

³⁵Би хүбүүдые эсэгэнэрэйн урдаһаа, басагадые эжынэрэйн урдаһаа, бэридые хадам эхэнэрэйн урдаһаа бодхоохоёо ерээб.

³⁶Нэгэ гэрэй гэшүүд хоорондоо харша дайсад байха.

³⁷Эсэгэдээ гү, али эхэдээ намһаа үлүү ехээр дуратай байһан алишье хүн минии шабиин зэргэдэ хүртэхэ эрхэгүй. Мүн баһа хүбүүндээ гү, али басагандаа намһаа үлүү ехээр дуратай алишье хүн минии шабиин зэргэдэ хүртэхэ эрхэгүй.

³⁸Өөрынгөө хэрээһэ абаад, минии хойноһоо дахаагүй хүн минии шабиин нэрэ зэргэдэ хүртэхэгүй.

³⁹Ами наһаяа гамнагша тэрэнээ алдаха, харин ами наһаяа минии түлөө үгэһэн хүн тэрэнээ алмаха.

Шагнал

⁴⁰Таанарые угтажа абаһан хүн намайе угтажа абана. Намайе угтажа абаһан хүн намайе эльгээһэн Эсэгые угтажа абана.

⁴¹Лүндэншые лүндэншэ байһанайнь түлөө угтажа абаһан хүн тэрэ лүндэншэтэй адли шагналда хүртэхэ. Баһа үнэн сэдхэлтэниие үнэн сэдхэлтэй байһан хадань угтажа абаһан хүн тэрэ үнэн сэдхэлтэнтэй адли шагналда хүртэхэ.

⁴²Баһа хамагай бага шабидамни гансал шабимни байһанайнь түлөө аяга хүйтэн уһа үгэһэн хүн өөрынгөө шагнал заабол абаха гэжэ би таанадта баталан хэлэнэб».

Матвей 11

Уһаар арюудхагша Иоанн

¹Арбан хоёр шабинартаа эдэ заабаринуудые үгэһэн хойноо Иисус тэрэ газарһаа хүдэлжэ, улад зоние хото турануудаар ябажа хургаба.

²Түрмэдэ хаалтатай Уһаар арюудхагша Иоанн Христосой бүтээжэ байһан хэрэгүүд тухай дуулаад, хоёр шабинараа

³иигэжэ асуухыень тэрээндэ эльгээбэ: «Ерэхэ ёһотойнь ши гээшэ гүш, али бидэ ондооо хүлээхэ ёһотой гүбди?»

⁴⁻⁵Тиихэдэнь Иисус тэдэндэ иигэжэ харюусаба: «Һохор хүнүүдэй дахин харадаг болоһые, дохолон хүнүүдэй ябадаг болоһые, арһанай халдабарита үбшэнтэй хүнүүдэй арюудхагдаһые, дүлии хүнүүдэй һонор болоһые, үхэһэн хүнүүдэй үндын бодоһые, үгытэй хүнүүдэй Бурханай хаан түрэ тухай номнол дуулаһые, хаража байһанаа, мүн дуулажа байһанаа Иоаннда ошожо хэлэгты.

⁶Нам тухай һэжэг түрөөгүй хүн зол жаргалтай даа».

⁷Иоаннай шабинарай ябахадань, Иисус Иоанн тухай улад зондо иигэжэ хэлэбэ: «Иоаннда сүл губи руу ошоходоо, ямархан юумэ харахаяа найдаабта? һалхинда найгалзажа байһан хулһа харахаяа гү?»

⁸Таанар юу үзэхэеэ тишэ ошообта? Зөөлэн хубсаһа үмдөөд ябаһан хүниие гү? Теэд зөөлэн хубсаһа үмдөөд ябадаг хүнүүд хаанай үргөөдэ ажаһуунал.

⁹Таанар юу үзэхэеэ тишэ ошообта? Лүндэншые гү? Тиимэ даа, тиихэдэ таанад лүндэншэһөө дээгүүр хүниие хараалта гэжэ таанарта хэлэнэб.



¹⁰Иоанн тухай Нангин Бэшэг соо: „Шинии ябаха харгы бэлдэхыень би түрүүндэшни өөрынгөө Эльгээмэлые ябуулнаб гэжэ Бурхан хэлэнэ“, – гээд бэшээтэй юм.

¹¹Уһаар арюудхагша Иоанһаа агууехэ хүн эхын умайһаа түрөөгүй юм гэжэ баталан таанадта хэлэнэб. Тиимэшье һаа, Огторгойн хаан ороной мэдэлдэ һуугшадай эгээлэй багань тэрээнһээ агууехэ юм даа.

¹²Уһаар Арюудхагша Иоаннай мэдээсэлээ номноһон үдэрнүүдһээ эхилээд мүнөөдэр болотор Огторгойн хаан орон һүр хүсэ нэмэнэ, тиин хүсэ шадал гаргаһан зон энээниие туйлана.

¹³Иоаннай ажамидарха үе саг хүрэтэр юунэй болохо тухай лүндэншэдэй номууд соо болон Моисейн Хуули соо бүрин хэлэгдээтэй юм.

¹⁴Хэрбээ таанад тэдэ номуудта этигэжэ байбал, мэдэгты: Иоанн болбол ерэхэ ёһотой гэжэ уридшалан хэлэгдэһэн Илия гээшэ.

¹⁵Шэхэтэй юм һаа, анхарагты!

¹⁶Мүнөө, энэ оршон үеын зоние хэнтэй жэшэхэбиб? Эдэнэр газраа һууһан үхибүүдтэ адли. Нэгэ бүлэгынь нүгөө бүлэгтөө иигэжэ хашхарна:

¹⁷„Таанарта жэмбүүрээр наадахадамнай, хатараагүйт. таанарта гунигтай дуу дуулахадамнай, бархираагүйт“.

¹⁸Иоаннай ерээд, масагладаг, архи дарһа амсадаггүй байхадань, хүн бүхэн: „Ада шүдхэртэ барюулһан хүн“ гэлсээ.

¹⁹Хүн түрэлхитэнэй Хүбүүнэй ерээд, юумэ эдидэг, дарһа болгодог байхадань, хүн бүхэн: „Харагты даа! Энэтнай эдимэр, архиншан, алба татаашадай, нүгэл хэгшэдэй нүхэр“ гэлсэбэ. Тиигэбэшье Бурханай эсээн мэргэниинь хэрэгүүдэйнь үрэ дүнгөөр баталагдадаг юм».

Этигэл хүзэггүй хотонууд тухай



²⁰Иисусай гайхамшагта хэрэгүүдээ үлэмжэ олоор бүтээһэн хотонуудта зоной нүгэл үйлэдэхээ болижо, Бурханда хандахагүйдэнь, Иисус тэдэниие зэмэлэн хэлэбэ:

²¹«Хоразин хотынхид, таанад уй гашуудал үзэхэт! Бетсаида хотынхид, таанад баһал уй гашуудал үзэхэт! Хэрбээ танай хотонуудта бүтээһэн гайхамшагта хэрэгүүдээ Тир Сидон хотонуудта үзүүлһэн байбални, тэдэ хотын зон үни гэхээр Бурханда хандаха һэн. Тэдэнэр хахархай хубсаһа үмдэжэ, тархи дээрээ үнэхэ адхажа нүгэлнүүдээ гэмшэхэнэ баталха бэлэй.

²²Зарга шүүбэрийн Үдэрэй болоходо Бурхан Тир, Сидон хотынхидто таанадта ороходоо бүри үршөөл хайратайгаар хандаха гэжэ баталан хэлэнэб.

²³Капернаум хотынхид, таанад огторгойдо алдаршаха ханаатай байна гүт? Таанад тамын оёрто унахат. Хэрбээ танай хотодо бүтээһэн гайхамшагта хэрэгүүдээ Содомдо харуулһан байбални, тэрэ хотынхид гэмээ наманшалаад, хотонь мүнөөшье хүрэтэр бүтэн байха бэлэй.

²⁴Зарга шүүбэрийн Үдэрэй болоходо, Бурхан Содом хотынхидто таанадта ороходоо үлүү үршөөл хайратайгаар хандаха гэжэ танда баталан хэлэнэб».

Намда ерэжэ, ханаагаа амарагты

²⁵Баһа тэрэ сагта Иисус иигэжэ хэлэбэ: «Газар тэнгэрийн Дээдын Эзэн, Эсэгэмни! Сэсэн мэргэн, эрдэм номтой зонһоо далдалан нюуһан юумээ эгээлэй юрын зондо нээжэ элирүүлһэнэйшни түлөө шамда баяр баясхалан хүргэнэб.

²⁶Зүб даа, Эсэгэмни! Ши иимэл юумэнэй болохые хүсэжэ байгаа ха юмши.

²⁷Бүхы юумые Эсэгэмни намда үгөө. Эсэгэхээ ондоо хэншье Хүбүүе мэдэхэгүй, мүн Хүбүүнхээ, баһа Хүбүүнэй дуулгаһан хүнүүдхээ ондоо хэншье Эсэгы мэдэхэгүй.



²⁸Хүшэр хүндэ ашаанда даруулжа ядархан зон булта намда ерэгты, би танай ханаа амаруулхаб.

²⁹Минии хазаар абажа өөһэдыгөө хазаарлагты, намһаа нуража абагты, ушарынь юуб гэбэл, би даруу, номгон сэдхэлтэйб, тиин таанад ханаагаа амархат.

³⁰Минии таанадта үгэхэ хазаар хашар бэшэ юм даа, таанадта ашаха ашаан хүнгэн юм даа».

Матвей 12

Субботын үдэр тухай асуудал

¹Нэгэ Субботын үдэр Иисус шабинартайгаа таряалангаар ябаба. Шабинарынь гэдэһэ үлдөөд ябаһан дээрэһээ таряанай залаа таһалан эдижэ байгаа.

²Фарисейнүүд энээниие хараад: «Харалши даа, шабинаршни субботодо хэжэ болохогүй юумэ хэнэл», – гэжэ Иисуста хэлэбэ.

³Тиихэдэнь Иисус тэдэндэ иигэжэ харюусаба: «Давидай, мүн тэрээнтэй хамта ябагшадай гэдэһэ ехээр үлдэхэдөө юу хэһэн тухайнь таанар уншаагүй юм аалта?

⁴Давид Бурханай гэртэ ороод, хамта ябаһан хүнүүдтэйгээ үргэлэй хилээмэ абажа эдэе һэн. Харин Хуулийн ёһоор Давидшые, тэрээнтэй хамта ябалсагшадшые тэрэ хилээмэ эдихэ ёһогүй байгаа, гансал санаартан тэрэниие эдихэ эрхэтэй бэлэй.

⁵Мүн суббото бүхэндэ Бурхан хүмэ соо алба хэжэ байһан санаартан Субботын үдэрэй тогтоол эбдэнэ гэжэ Моисейн Хуули соо хэлэгдэһые таанар уншаагүй аалта? Тиигэһэншые муртөө тэдэнэр зэмэгүй гээшэ гү?

⁶Зүгөөр Бурхан хүмэдэ ороходоо агууехэ юумэн эндэ байна гэжэ танда хэлэнэб.



⁷Хэрбээ таанар: „Намда тахил тахихын орондо бусад зондо үршөөл хайратай байхыетнай хүсэнэб“ гэжэ Нангин Бэшэг соо хэлэгдэһэн үгын үнэн удха мэдэжэ байбал, зэмэгүй зоние буруушаахагүй һанта.

⁸Ушарынь хэлэбэл, Хүн түрэлхитэнэй Хүбүүн субботыншые Эзэн мүн».

Хатаһан гартай хүн тухай

⁹Иисус тэндэһээ ябажа, мүргэлэй гэртэ оробо.

¹⁰Тэндэнь нэгэ хатаһан гартай хүн байба. Буруу юумэ хэһэнэйн түлөө Иисусые зэмэлхэ һанаатайшуул тэрээнһээ: «Субботодо хүниие эмшэлхэнь зүб гү?» – гэжэ һураба.

¹¹Иисус тэдэндэ иигэжэ харюусаба: «Танай хэнтнай нэгэ хонитой аад, тэрэнэйнгээ Субботын үдэр гүнзэги нүхэ уруу унашабалынь, тэрэнээ барижа, дээшэнь татажа гаргахагүйб?

¹²Тиихэдэ хүн гээшэмнай хониндо ороходоо бүри үнэ сэнтэй юм. Тиимэһээ Субботын үдэр һайн юумэ бүтээхэнь зүб даа».

¹³Тиигээд Иисус нүгөө хатаһан гартай хүндэ: «Гараа һарбай», – гэбэ. Тэрэнь гараа һарбайба; тиин хатаһан гарынь нүгөө гартайгаа адли һайн болошобо.

¹⁴Харин фарисейнүүд мүргэлэй гэрһээ гаража ошоод, Иисусые яжа алаха тухай зүбшэн хэлсэбэ.

Шэлэгдэжэ абтаһан Бурханай зараса

¹⁵Зүгөөр Иисус тэдэнэй хэлсээн тухай мэдээд, тэндэһээ гаража ошобо. Хойноһоонь олон зон дахажа ябаба. Иисус үбшэн хабшантай байһан зоние бултыень эмшэлэн эдэгээгээд,

¹⁶Бурханай табисуурта байһыемни нэгэшые хүндэ бү мэдүүлэгты гэжэ улад зондо захирба.

¹⁷Иигэжэл лүндэншэ Исаягаар дамжуулан Бурханай найдүүлһаниинь бүтэбэ даа:

¹⁸«Энэ болбол минии шэлэжэ абаһан зараса, сэдхэлдэмни таатай инаг хайрата Хүбүүмни гээшэ. Нангин һүлдээ тэрээндэ хайрлахаб, тэрэ бүхы арадуудта Зарга шүүбэри тухаймни айладхаха.

¹⁹Тэрэ арсалдахагүй, хашхархагүй, шанга гэгшээр газаагуур хүрхирхэгүй,

²⁰хухарһан хулһые таһа татахагүй, залиржа байһан дэн унтараахагүй. Үнэн зүб зарга шүүбэри илалтада хүргэхэ,

²¹Тиин бүхы арадууд тэрээндэ найдажа байха».

Иисус ба шолмос тухай

²²Нэгэтэ хүнүүд ада шүдхэртэ барюулһан дээрэһээ һохор, хэлэ амагүй хүниие Иисуста асарба. Иисус тэрэ хүниие эдэгээбэ: тэрэ юумэ хэлэдэг, харадаг болобо.

²³Тиихэдэнь хамаг зон гайхажа: «Энэмнай найдуулагдаһан Давидай үри һадаһан бэшэ гү?» – гэлсэбэ.

²⁴Тээд фарисейнүүд энээниие дуулаад: «Энэшни Веельзевулай, ада шүдхэрнүүдэй ноёной хүсөөр лэ ада шүдхэрнүүдые дарана», – гэжэ хэлэбэ.

²⁵Тэдэ фарисейнүүдэй һанал бодол мэдэжэ байһан Иисус тэдээндэ иигэжэ хэлэбэ: «Хэдэн бүлэг боложо хубааралдаад, хоорондоо хёморолдоһон алишье хаан орон хоһорон, бутаран һалаха. Баһа хоорондоо хубааралдажа хёморолдоһон алишье хото, үгы һаа гэр бүлэ мүн лэ бутаран һалаха.

²⁶Хэрбээ шолмосой хаан оронойхин хоорондоо хубааралдаад, хёморолдожо барисалдажа байбал, хаан орониинь хэр удаан тогтоборитой бүтэн байхаб?

²⁷Хэрбээ би танай хэлэһэн ёһоор Веельзевулай хүсөөр ада шүдхэрнүүдые намнажа гаргадаг байгаа һаа, танай шабинар хэнэй хүсөөр тэдэниие намнажа гаргадаг гээшэб? Шабинарайтнай хэжэ байһан хэрэгүүд буруу байһыетнай баталха.

²⁸Хэрбээ Бурханай Нангин Һүлдөөр ада шүдхэрнүүдые дарадаг хаамни, тэрэ Бурханай хаан түрын эндэтнай тогтоод байһые баталха.

²⁹Ямар хүн бар хүсэтэй хүнэй гэртэ ороод, түрүүн эзэниенъ хүлижэ уяагүй хаа, эд зөөриенъ тоножо гаргахаб? Эзэниенъ хүлиһэн хойноол гэр барааенъ дээрмэдэхэ бшуу.

³⁰Минии талада байгаагүй хүн намда харша тэмсэгшэ гээшэ, намтай хамта ургаса суглуулаагүй хүн тэрэниие дэмы үринэ гээшэ.

³¹Тиимэхээл би таанарта иигэжэ хэлэхэ байнаб: ямаршые харата үгэ хэлэхэн, али нүгэлтэ хэрэг үйлэдэхэн хүн бүхэн хүлисэгдэхэ; харин Нангин Һүлдые хараажа муушалһан хүн хүлисэгдэхэгүй.

³²Тиихэдэ Хүн түрэлхитэнэй Хүбүүндэ харша юумэ хэлэхэн хүн бүхэн хүлисэгдэхэ; харин Нангин Һүлдэдэ харша юумэ хэлэхэн хүн энэшые наһандаа, мүн хэтэ заяандаашые хүлисэгдэхэгүй.

Модон ба тэрэнэй үрэ жэмэс тухай

³³Һайн модон Һайн үрэ жэмэс үгэдэг, муу модон муу үрэ жэмэс асардаг. Модоной шанарынь тэрэнэй үрэ жэмэсээрнь танигдадаг юм.

³⁴Ай, хорото могойн түрэлтэн! Таанар хара ханаатайшуул аад, Һайн юумэ яажа хэлэхэбта? Ушарынь юуб гэбэл, зүрхэ сэдхэлдэ байһан юумэн хэлэнэй үзүүртэ гарадаг ха юм.

³⁵Һайн хүн үнэтэ баялиг сооһоо Һайниенъ гаргадаг, харин хара ханаатай хүн харата дорой суглуулбарихаа мууень гаргадаг.

³⁶Зарга шүүбэриин болохо Үдэр таанад хэзээшыеб дэмы шашаһан үгэ бүхэнэйнгөө түлөө тоосоо хэжэ харюусахат гэжэ таанарта баталан хэлэнэб.

³⁷Тиигэжэ таанад өөһэдынгөө үгэнүүдһээ боложо зүбтэнэй тоодо гү, али үгы хаа буруутаһан зэмэтэнэй тоодо орохот».

Гайхамшагта дүлгэ тэмдэг харуулха тухай эрилтэ табина

³⁸Тиигээд зарим Хуули заадаг багшанар болон фарисейнүүд: «Багшааа! Манда нэгэ гайхамшагта дүлгэ тэмдэг үзүүлхыешни хүсэнэбди», – гэбэ.

³⁹Тиихэдэнь Иисус тэдэндэ харюусаба: «Харата муухай, забхай оршон үеын зон, гайхамшагта дүлгэ тэмдэг харахаяа ханаба гүт? Теэд Иона лүндэншэтэй ушархан гайхамшагта дүлгэ тэмдэгхээ ондоо дүлгэ тэмдэг таанадта үгтэхэгүй.

⁴⁰Яажа Иона халим загаһанай гэдэһэн дотор гурбан үдэр, гурбан хүни үнгэргөө һэм, тон тиигэжэл Хүн түрэлхитэнэй Хүбүүн гурбан үдэр, гурбан хүни соо газарай гүндэ оршохо.

⁴¹Зарга шүүбэриин Үдэрэй болоходо Ниневи хотынхид бодожо, таанадые буруушаан гэмнэхэ, юундэб гэбэл, тэдэнэр Ионын номнол шагнаад, нүгэлнүүдээ орхижо, Бурханда хандаһан юм. Харин мүнөө эндэ Ионһоо бүри шухала нэгэн байна гэжэ таанадта хэлэнэб.

⁴²Зарга шүүбэриин болохо Үдэр Урда зүгэй хатан бодожо, таанадые буруушаан гэмнэхэ. Тэрэ хатан Соломон хаанай сэсэн үгые шагнахаяа газарай мухарһаа ерэхэн байгаа бшуу. Теэд мүнөө эндэ Соломонһоо бүри шухала нэгэн байна.

Хорото ада шүдхэрэй бусажа ерэхэн тухай

⁴³Хүнэй бэеһээ гараһан ада шүдхэр уһагүй сүл губьяр тэнэжэ, амар заяа бэдэрээд, олохогүйдөө:

⁴⁴„Байһан гэртээ бусахам даа“, – гэдэг. Бусажа ерэхэдэнь, гэрынэ эзэлэгдээгүй, хамагдаһан, сэбэрлэгдэхэн байдаг.

⁴⁵Тиигээд тэрэ ада шүдхэр өөрһөөн хураггүй хоротой ондоо долоон ада шүдхэрые абажа ерэдэг. Тэдэнь үнөөхи гэртэнь орожо байрладаг. Тиигэхэдэнь тэрэ хүниинь урдынхидаа ороходоо бүри ехээр тамаа үзэдэг. Тон энээндэл адляар энэ оршон үеын зон иимэ дорой байдалтай болохо», – гэжэ Иисус хэлэбэ.

Иисусай эжы ба аха дүүнэрынэ

⁴⁶Иисусай иимэ мэтээр улад зониее хургажа байха үедэнь тэрэнэй эжы, дүүнэрын тэрээнтээ хөөрэлдэхэ ханаатай ерээд, гэрэй газар зогсожо байба.

⁴⁷Тиимэхээ нэгэ хүн Иисуста: «Хара даа, эжышни, дүүнэршни газар зогсожо байна. Шамтайгаа хөөрэлдэхэ ханаатай байна», – гэбэ.

⁴⁸Иисус тэрэ хэлэһэн хүндэ: «Эжымни хэн бэ, аха дүүнэрни хэд бэ?» – гэжэ хэлэбэ.

⁴⁹Тиигээд шабинар тээшээ гараараа заагаад, «Хара даа, эжымни, аха дүүнэрни эдэ гээшэ.

⁵⁰Огторгойдо оршодог Эсэгымни эрхэ хүсэл бүтээгшэд минии аха дүүнэр, эгэшэ дүүнэр, эжымни гээшэ», – гэбэ.

Матвей 13

Таряшан тухай хургаалта үгэ

¹Иисус тэрэ үдэртөө гэрһээ гараад, далайн эрьедэ ошожо хууба.

²Хажуудань хара мянган зоной суглархада, Иисус онгосодо хууха болобо, тиихэдэнь улад зон бүгэдөөрөө далайн эрьедэ зогсобо.

³Тэрэ хургаалта үгэнүүдые хөөрэн, улад зоние олон юумэндэ хургаба: «Нэгэ таряшан таряа тарихаяа гараба.

⁴Үрэхээ сасахадань, зариманинь харгын хажууда унаба, тэдэниень шубууд ерэхэ тоншобо.

⁵Зарим үрэхэниень хүрһэ багатай, шулуутай газарта унаба, тиигээд нимгэн хүрһэтэй газарһаа түргэн бултайба.

⁶Харин наранай гарахада, гүнзэгы үндэхэлээгүй зүлгэ ногоон уршыгаад хаташаба.

⁷Баһа зарим үрэхэнүүд үүргэнэ соо унажа, хөөгтэ даруулагдаба.



⁸Зарим үрэнэнийнь үрэжэлтэй газарта унажа, хайн ургаса үгэбэ: нэгэ зариманиинь тариһанһаа зуу дахин ехэ, нүгөөдүүлынь жара дахин ехэ, бусадынь гуша дахин ехэ үрэ үгэбэ.

⁹Шэхэтэй юм һаа, анхарагты!»

Һургаалта үгэнүүдэй зорилго тухай

¹⁰Шабинанынь Иисуста дүтэлжэ: «Ши юундэ улад зондо таамаг удхатай Һургаалта үгэнүүдые хэлэнэбши?» – гэжэ һураба.

¹¹Тиихэдэнь Иисус иигэжэ харюусаба: «Огторгойн хаан түрэ тухай гүн нюусанууд таанадтал тайлбариллагдана.

¹²Ушарынь юуб гэбэл, юумэтэй байһан хүндэ нэмэгдэжэ үгтэхэ, тиимэхээ тэрэ хүн улам арьбажаха. Юумэгүй байһан хүнһөө һүүлшын юумэнийнь абтаха.

¹³Юундэ тэдэндэ таамаг удхатай Һургаалта үгэнүүдые хэлэнэбиб гэбэл, тэдэнэр хаража байһанаа обёорногүй, шагнажа байһанаа дууланагүй, юумэ ойлгоногүй.

¹⁴Тиихэдээ Исаяя лүндэншын тэдэн тухай уридшалан хэлэһэн ёһоор болоно: „Хүнүүд хэдышые шагнаад, ойлгохогүй; хэдышые шэртэжэ хараад, юумэ обёорхогүй.

¹⁵Юундэб гэбэл, эдэ зоной сэдхэлынь мохоороо, шэхэнь таглараа, нюдэнь анигдаа. Тиимэхээ тэдэ нюдөөрөө юумэ харанагүй, шэхээрээ дууланагүй, ухаагаараа юумэ ойлгоногүй, тэдэниие аргалжа эдэгээхымни тула намда ханданагүй“.

¹⁶Харин таанад аза жаргалтайт: нюдэнтнай харана, шэхэнтнай дуулана.

¹⁷Олон лүндэншэд, Бурханай хүнүүд таанадай хаража байһан юумэ харахые ехээр хүсэбэшье, хараагүй, таанадай дуулажа байһан юумэ дуулаха дуратай байгаад, дуулажа шадаагүй гэжэ таанадта баталан хэлэнэб.

Таряшан тухай Һургаалта үгын удхые Иисус тайлбарилна



¹⁸Мүнөө таанар таряашан тухай хургаалта үгын удха ушарые шагнагты.

¹⁹Бурханай хаан түрэ тухай мэдээсэл шагнаад, юумэ ойлгоогүй хүнүүд – харгын хажууда сасагдаһан үрэхэндэ адли юм. Тэдэндэ муу шолмос ерээд, сэдхэл зүрхэндэнь таригдаһые абаад арилдаг.

²⁰Шулуутай газарта унаһан үрэхэн гээшэнь мэдээсэл шагнаад, тэрэниие гансата баяртайгаар хүлээн абаһан хүнүүд тухай хэлэгдэнэ.

²¹Зүгөөр тэрэ мэдээсэл сэдхэлдэнь гүнзэги үндэхлөөгүй ушарһаа удаан тогтодоггүй: мэдээсэлэй түлөө зоболонгой тохёолдоо һаань, али мүрдэжэ намнажа эхилээ һаань, тэрэниие удангүй орхижорхидог.

²²Үүргэнэ соо унаһань иимэ удхатай: хэн нэгэн мэдээсэл дуулажа абабашье, энэ ажамидаралайнгаа түлөө оролдолгонь, эд зөөридэ обтолгонь мэдээсэлые даражархидаг, тиин тэрэ мэдээсэл ямаршые үрэ дүнгүй байдаг.

²³Үрэхэлтэй хүрэхэндэ таригдаашань иимэ удхатай: мэдээсэл шагнаад, тэрэниие ойлгоһон хүнүүд аша үрэ ехэтэй юм – тэдэнэй нэгэ зариманиинь тариһанһаа зуу дахин ехэ, нүгөөдүүлынь жара дахин ехэ, баһа бусадынь гуша дахин ехэ үрэхэлтэй байдаг».

Таряан дундуур ургаһан буртаг үбһэн тухай хургаалта үгэ

²⁴Иисус ондоо хургаалта үгэ тэдэндэ хэлэбэ: «Огторгойн хаан түрэ иимэ нэгэ ушартай адлишаажа болохо: Нэгэ хүн таряаландаа һайн үрэхэ тариба гэхэ.

²⁵Хүнүүдэй унтахада, дайсаниинь ерээд, шэниисынь хоорондуур буртаг үбһэ таряад ябашоо ха.

²⁶Таряалангайнь ногоорон, эдешэжэ эхилхэдэ, буртаг үбһэншые бултайжа харагдаба.



²⁷Гэрэй эзэндэ зарасанарынь ерээд: „Эзэн аа! Ши таряаландаа хайн үрэхэ таряа бэшэ һэн гүш? Теэд хаанаһаа тэндэшни буртаг үбһэн ургааб?“ – гэбэ.

²⁸„Дайсан хүн тиимэ юумэ хээ“, – гэжэ эзэниинь тэдээндээ хэлэбэ. Тиихэдэнь зарасанарынь: „Хүсэбэлшни, бидэ ошожо буртаг үбһэ түүхэбди“, – гэбэ.

²⁹Зүгөөр гэрэй эзэн иигэжэ харюусаба: „Үгы, буртаг үбһэ түүхэдээ, тэрээнтэй хамта шэниисын таряа түүлсэжэ болохот.

³⁰Таряа хуряалгын болотор али алинииньшые ургажа байг. Ургаса хуряаха хаһада таряа хуряагшадта түрүүн буртаг үбһыень суглуулжа боогоод, галдахыень захихаб, тиигэһэн хойнонь шэниисэ суглуулжа, амбаартамни хадагалхые захихаб“».

Горчицын үрэхэн тухай хургаалта үгэ

³¹Иисус баһа ондоо хургаалта үгэ дурадхан хэлэбэ: «Огторгойн хаан түрэ иимэ ушартай адлишаажа болохо: Нэгэ хүн таряаландаа горчицын үрэхэ тариба гэхэ.

³²Тэрэ үрэхэн бусад хүрэнгэнүүдэй захада эгээн жэжэхэншые һаа, ургахадаа, ямаршые ургамалһаа ехэ модон боложо ургадаг. Тиихэдэнь тэнгэрийн шубууд ниидэжэ ерээд, мүшэр соонь уургайгаа түхээрдэг».

Эһээбэри тухай хургаалта үгэ

³³Иисус тэдэндэ ондоо хургаалта үгэ хэлэбэ: «Огторгойн хаан түрэ эһээбэритэй сасуулжа болохо: нэгэ эхэнэр багахан эһээбэри абажа, гурбан хэмжүүрэй гурилтай худхажа эһэтэрын эдьхэбэ».

Иисусай хургаалта үгэ хэрэглэнэнэй ушар

³⁴Иисус эдэ бүгэдые улад зондо хургаалта үгэнүүдээр зураглажа байгаа, хургаалта үгэнүүдые хэрэглэнгүй юумэ хөөрэдэггүй бэлэй.

³⁵«Би хургаалта үгэнүүдые тэдэндэ хэлэхэб, юртэмсын бүтээгдэхэнэ нааша нюуса байһан бүхы юумэнүүдые тайлбарилхаб», – гэжэ лүндэншын хэлэхэниинь бүтэжэ байгаа.

Буртаг үбһэн тухай хургаалта үгын удхые тайлбарилна

³⁶Иисусай улад зониие табяад, гэртэ ороходонь, тэрээндэ шабинарынь дүтэлжэ: «Таряалан дээрэхи буртаг үбһэн тухай хургаалта үгын удха манда тайлбарилжа үгыш», – гэбэ.

³⁷Тиихэдэнь Иисус харюусаба: «Һайн үрэхэ таригшань Хүн түрэлхитэнэй Хүбүүн гээшэ.

³⁸Таряалан гээшэнь газар дэлхэй мүн. Һайн үрэхэниинь Бурханай хаан ороной хүнүүд, харин буртаг үбһэниинь шолмосой хүнүүд мүн.

³⁹Буртаг үбһэ тарихан дайсан гээшэнь альбан шолмос гээшэ. Хадалан – хамаг юумэнэй эсэсынь, тиин таряа хадагшад – Бурханай Эльгээмэлнүүд гээшэ.

⁴⁰Буртаг үбһэ түүжэ галда шатааһантай тон адли юумэн хамаг юумэнэй эсэстэ болохо:

⁴¹Хүн түрэлхитэнэй Хүбүүн Эльгээмэлнүүдэ ябуулха, тэдэнь хаан орон соонь бүхы буруу ябадалтаниие болон бусад зониие нүгэлдэ оруулагшадые суглуулха,

⁴²тиигээд тэдэниие гал дүлэ руу хаяха. Тэндэ хүнүүд бархиралдаха, шүдөө хабиралдаха.

⁴³Харин үнэн сэдхэлтэн Эсэгынгээ хаан түрэ соо нарандал адляар яларха. Шэхэтэй юм һаа, анхарагты!

Далда хадагалагдаһан баялиг тухай хургаалта үгэ

⁴⁴Огторгойн хаан түрэ баһа иимэ юумэндэ адли: Нэгэ хүн таряалан соо хадагалагдаһан баялиг эрдэни олоод, тэрэнээ һөөргэнь нюуба. Олзодоо аргагүй ехээр баярлаһан хүн бүхы зөөриез наймаалаад, үнөөхи таряалан худалдажа абаба.

Үнэтэй субад эрдэни тухай хургаалта үгэ

⁴⁵Огторгойн хаан түрэ баһа үнэтэй субад эрдэни бэдэрһэн наймаашанай

⁴⁶дээдэ зэргын субад эрдэни олоод, бүхы зөөриее наймаалан, тэрэниие худалдажа абаһантай адли юм.

Губшуур тухай хургаалта үгэ

⁴⁷Баһа Огторгойн хаан түрэ иимэ юумэндэ адли: Загаһашад губшуураа далайда хаяжа, элдэб түрэлэй загаһа бариба гэе.

⁴⁸Тиигээд дүүрэшэһэн губшуураа эрьедэ татажа гаргамсаараа загаһа илгажа оробо: найн загаһыень үлөөгөөд, муунуудыень хаяба.

⁴⁹Хамаг юумэнэй эсэстэ эгээл тиимэ юумэн болохо: Бурханай Эльгээмэлнүүд ерэжэ, нүгэл хэгшэдые үнэн сэдхэлтэнэй дундаһаа илгаха,

⁵⁰тиигээд тэдэ нүгэл хэгшэдые галтай пеэшэн руу хаяха: тэндэ хүнүүд бархиралдаха, шүдөө хабиралдаха».

Шэнэ болон урданай баялиг тухай

⁵¹Иисус шабинарһаа: «Эдэ бүгэдые таанар ойлгобо гүт?» – гэжэ хураба. Тиихэдэнь шабинарынь: «Ойлгообди!» – гэжэ харюусаба.

⁵²Иисус тэдэндэ иигэжэ хэлэбэ: «Огторгойн хаан түрэ дахаһан алишье Хуули заадаг багша эрдэни баялигайнгаа санһаа шэнэшье, мүн урданайшье баялигуудые абажа хэрэглэдэг эзэндэ адли юм».

Нютагтаа лүндэншэ нэрэ хүндэтэй болодоггүй

⁵³Эдэ хургаалта үгэнүүдээ түгэсхөөд, Иисус тэрэ нютагһаа гаража,

⁵⁴өөрынгөө түрэл хото ерэбэ. Тиигээд мүргэлэй гэр соо зониие хургаба. «Иимэ сэсэн ухаан, гайхамшагта хэрэгүүдые бүтээхэ хүсэ энэшни хаанаһаа абанаб?» – гэжэ тэрэниие шагнаһан зон гайхалсаба.

⁵⁵«Энэмнай дарханай хүбүүн бэшэ гү? Эхэнь Мария бэшэ гү? Яков, Иосиф, Симон, Иуда гэгшэд дүүнэрынь бэшэ гү?

⁵⁶Дүү басагадынь бултадаа эндэ ажамидардаг бэшэ гү? Яажа энэшни эдэ бүгэдые бүтээнэ гээшэб?»



⁵⁷Тиигэжэ зон тэрэнэй талаар хэжэглэбэ. Иисус тэдэндэ: «Лүндэншэдые нютагынхидһаань, гэр бүлэһөөнь бусад зон булта хүндэлжэ ябадаг юм», – гэжэ хэлэбэ.

⁵⁸Улад зоной этигэл хүзэггүй байһан туладань Иисус нютагтаа гайхамшагта хэрэгүүдые ехээр бүтээбэгүй.

Матвей 14

Уһаар Арюудхагша Иоаннай ами таһалба

¹Тэрэ үедэ Галилей можын Ирод захирагша Иисус тухай һураг дуулаад:

²«Энэ Уһаар арюудхагша Иоанн байна. Энэшни амидыраа, тиимэһээл гайхамшагта хэрэгүүдые бүтээнэ», – гэжэ албатандаа хэлэбэ.

³Урдань Ирод Филипп дүүгэйнгээ Иродиада һамганһаа боложо Иоанные барижа хүлээд, түрмэдэ хаахыень захирһан байгаа.

⁴Юундэб гэхэдэ, Иоанн: «Ши Иродиатай һууха ёһогүйш», – гэжэ Иродтэ хэлэһэн байгаа.

⁵Ирод Иоанные алахая һанабашье, улад зонһоо айгаа, ушарынь гэхэдэ, улад зон Иоанные лүндэншэ гэжэ тоолодог байгаа.

⁶Иродэй түрэхэн үдэрэй найрта Иродиадын басаганиинь айлшадай урда хатаржа, Иродтэ ехээр һайшаагдаба.

⁷Тиимэһээ басаганай ямаршые эриһэн юумые үгэхэб гэжэ Ирод амалба.

⁸Эхынгээ һургаһан ёһоор басаган: «Мүнөө эндэ Уһаар арюудхагша Иоаннай толгойе табаг дээрэ табяад намда үгэ!» – гэжэ хэлэбэ.

⁹Тиихэдэнь Ирод хаан һанаата болобошые, бүхы айлшадай урда үгөө үгэһэн тула басаганай хүсэл дүүргэгты гэжэ захирба.

¹⁰Тиимэһээ түрмэ соо Иоаннай толгойе таһа сабшаба.

¹¹Тиигээд толгойень табаг дээрэ табяад, басаганда асараа, тэрэнь эхэдээ абаашажа үгөө.



¹²Иоаннай шабинарынь бэеыень абаашажа хүдөөлүүлээ бэлэй. Тиигээд энээн тухай Иисуста ошожо дуулгаа һэн.

Иисус таба мянган хүниие садхааба

¹³Иисус Иоанн тухай дуулаад, байһан газарһаа гансаараа онгосоор тамаржа эзэгүй зэлүүд газарта ошобо. Энээн тухай улад зон дуулаад, тура хотонуудһаа гаража, хойноһоонь ябагаар ошобо.

¹⁴Иисус онгосоһоо буухадаа олон зониие хараад, тэдэниие хайрлан, үбшэнтэниинь аргалжа эдэгээбэ.

¹⁵Үдэшэ болоходо, Иисусай шабинарынь тэрээндэ ерэжэ: «Энэ эзэгүй газар байна, тиигээдшые орой болоо. Хүдөө тосхонуудта ошожо, эдихэ юумэ худалдажа абахыень улад зоноо табиш», – гэбэ.

¹⁶Зүгөөр Иисус тэдэндэ: «Улад зоной ошоһоной хэрэггүй, таанад тэдэндэ эдихэ юумэ үгэгты», – гэжэ хэлэбэ.

¹⁷Тиихэдэнь шабинарынь: «Бидэ оройдоол табахан монсогор хилээмэтэй, хоёр загаһатай байнабди», – гэжэ харюусаба.

¹⁸«Тэдэнээ иишэнь намда абажа ерэгты», – гэжэ Иисус хэлэбэ.

¹⁹Тэрэ улад зондо ногоон дээрэ һуухыень захирба. Тиигээд табан хилээмэ, хоёр загаһыень абажа, тэнгэри өөдэ шэртэн, Бурханда баяр баясхалан хүргэбэ. Удаань хилээмэ хухалжа, шабинартаа үгэбэ, тэдэнь улад зондо дам тарааба.

²⁰Зон бүгэдөөрөө эдижэ садаба. Тиигэхэдэнь эдээнэй үлөөдэхөөр арбан хоёр түрсүүгы дүүргэбэ.

²¹Эхэнэрнүүдһээ, үхибүүдһээ гадна тэндэ табан мянга шахуу эрэшүүл эдеэлһэн байба.

Иисусай уһан дээгүүр ябаһан тухай

²²Тиигээд Иисус шабинараа онгосодо һуулгажа, түрүүндэнь далайн нүгөө бээдэ тамаржа ошохыень захирба. Харин өөрөө улад зоной таратар үлөө һэн.

²³Зоноо тараагаад, Иисус хада өөдөө зальбархаяа гансаараа гараба. Үдэшэндөөшье тэрэ тэндэ гансаараа байгаа.

²⁴Эгээл тэрэ үедэ шабинарайнь тамаржа байһан онгосо далайн тэгэндэ хүрөөд, урдаһаань һалхинай үлээхэдэ, долгиндо сохюулжа байба.

²⁵Үүр сайхын урдахана Иисус далайн уһан дээгүүр ябаад, шабинартаа ошоо һэн.

²⁶Шабинарынь тэрэнэй уһан дээгүүр ябаһыень хараад, айн мэгдэжэ: «Энэ хии үзэгдэл байна», – гэжэ айһандаа хашхаралдаба.

²⁷Зүгөөр Иисус тэдэнтэй дары дуугаралсан: «Зоригтой байгты. Энэ биб, бү айгты», – гэбэ.

²⁸Пётр тэрээндэ: «Дээдын Эзэн аа, хэрбээ энэ үнэхөөрөө ши юм һаа, намайе уһан дээгүүр ябаад, шамда ерэхыемни захирыш», – гэбэ.

²⁹Тиихэдэнь Иисус: «Ерэ», – гэбэ. Пётр онгосоһоо гараад, багшынгаа урдаһаа уһан дээгүүр ябаба.

³⁰Тээд шанга һалхинай үлээхые обёорходоо айгаад, уһанда шэнгэжэ эхилбэ. «Дээдын Эзэн! Намайе абарыш», – гэжэ тэрэ хашхарба.

³¹Иисус тэрэ дороо гараа һарбайжа, Пётрые дүнгэн баряад: «Ямар бирагүй этигэл хүзэгтэйбши! Юундэ һэжэглэбэш?» – гэбэ.

³²Тэдэ хоёрой онгосодо һуухатайнь сасуу һалхин намдаба.

³³Онгосодо байһан шабинарынь Иисуста мүргэжэ: «Ши үнэхөөрөөл Бурханай Хүбүүн байнаш», – гэбэ.

Иисус Геннисаредтэ үбшэнтэниие эдэгээбэ

³⁴Иисус шабинартайгаа далай гаталжа, Геннисаредэй газарта хүрэжэ ерэбэ.

³⁵Тэндэхи зон Иисусые таяад, бүхы оршон тойронхи газарта хүнүүдые эльгээжэ, хамаг үбшэнтэниие тэрээндэ асаржа байгаа.

³⁶Хубсаһандатнай халташые хүрэхые зүбшөөгыт даа гэжэ тэдэ Иисусаа гуйба. Тиигээд хубсаһандань хүрэхэн хүн бүхэн эдэгэбэ.

Матвей 15

Үбгэ эсэгэнэрэй заншал тухай

¹Тиигээд Иерусалимһаа хэдэн Хуули заадаг багшанар, фарисейнүүд Иисуста ерэжэ:

²«Шабинаршни юундэ үбгэ эсэгэнэрэймнай заншалнуудые баримталнагүйб? Тэдэнэршни эдихынгээ урда тээ гараа угаанагүйл», – гэбэ.

³Иисус тэдээндэ иигэжэ харюусаба: «Тиихэдээ юундэ таанар Бурханай захяа заабари дүүргэнгүй, өөһэдынгөө ёһо гуримые баримталнабта?

⁴„Аба эжы хоёроо хүндэлэ“ гэжэ Бурхан заабарилаа бэшэ һэн гү? Мүн баһа „Аба эжы хоёроо муушалһан хүн үхэлдэ хүртэхэ“ гээ бэшэ һэн гү?

⁵Харин таанар эхэ эсэгэдээ үгэжэ туһалха аргатай байһан юумэеэ: „Би Бурханда үргөөб“ гэжэ хэлэбэл,

⁶өөрынгөө эхэ эсэгые хүндэлхэ хэрэггүй гэжэ заанат. Тиигэжэ таанар Бурханай захяа заабари сахингүй, өөһэдынгөө тогтооһон ёһо заншалаар һэлгэнэт.

⁷Хоёр нюуртан! Таанар тухай лүндэншэ Исаяя үнэн сохомые уридшалан хэлээ һэн лэ:

⁸„Энэ улад зон хэлэ амаараа намайе хүндэлнэ, харин зүрхэ сэдхэлдээ нам тухай огто бодоногүй.

⁹Хүнүүдэй зохёоһон ёһо гуримуудта хургажа байхадаа, тэдэ дэмы намда мүргэнэ даа“».

Ямар юумэнүүд хүниие бузарланаб?

¹⁰Иисус улад зоние дуудаад: «Хэлэһыемни шагнажа, ойлгохые хэшээгты!

¹¹Амандатнай ородог эдээн таниие бузарладаггүй, харин аманһаатнай гарадаг муухай үгэнүүд таниие бузарладаг юм», – гэжэ хэлэбэ.

¹²Тиихэдэнь шабинарын Иисуста ойртоод: «Хэлэһэн үгэнүүдшни фарисейнүүдэй ханаанда таарабагүй гэжэ мэдэнэ гүш?» – гэжэ нураба.

¹³Иисус иигэжэ харюусаба: «Тэнгэридэ байгша Эсэгымни таряагүй ямаршые ургамал үндэһэтэйгөө хамта абтажа хаягдаха.

¹⁴Тэдэн тухай ханаагаа огто бү зобогты. Тэдэнэр хохор хүнүүдэй хохор ударидагшад мүн; теэд хохор хүн хохорые хүтэлжэ ябабал, хоюулаа нүхэ руу унаха юм».

¹⁵«Хүниие бузарладаг юумэнүүд тухай хөөрэхэнөө маанадта тайлбарилжа үгыш даа», – гэжэ Пётр гуйба.

¹⁶«Хэлэһемни хэнтнайшые мүнөө болотор ойлгоогүй гээшэ гү?

¹⁷Ойлгоногүй аалта, амандаа хэһэн эдеетнай хотондотнай ороод, һүүлдэнь бэеһэтнай гарадаг.

¹⁸Харин аманһаатнай гараһан үгэнүүд зүрхэ сэдхэлһэйтнай гарадаг; тэдэнтэй таанадые бузарладаг ха юм.

¹⁹Ушарын юуб гэбэл, зүрхэнһөөтнай хара һанал бодолнууд гарадаг, тиигээд таанадые алахада, эрэдээ гү, али эхэнэртээ урбахада, забхай зальхай ябадалда, хулгай хэхэдэ, бусадые хардахада, муушалхада түлхидэг юм.

²⁰Эдэ бүхы ябадалнууд таанадые бузарладаг. Зүгөөр угаагдаагүй гараараа юумэ эдихэдээ таанад бэеэ бузарладаггүйт».

Эхэнэрэй хүзэг этигэл тухай

²¹Иисус байһан газарһаа хүдэлжэ, Тир Сидон хотонуудай шадархи газар дайдада хүрэжэ ерэбэ.

²²Тэндэ ажаһуудаг нэгэ хананей эхэнэр Иисуста ерэжэ: «Дээдын Эзэн, Давидай үри һадаһан, намайе хайрлажа үршөөгыш! Басагамни ада шүдхэртэ барюулаад, аймшагтай зобожо байна», – гэжэ хашха уухи табиба.



²³Тeэд Иисус тэрэ эхэнэртэ юушые хэлэбэгүй. Тиixэдэнь тэрэнэй шабинaрын дүтэлжэ: «Энэ эхэнэрые ябуулыш, хойноһоомнай дахаад лэ, хашхараад лэ һаланагүйл», – гэжэ гуйба.

²⁴«Би имагтал Израилиин төөрижэ хосорһон хонидто эльгээгдэһэн байгаа», – гэжэ Иисус харюусаба.

²⁵Харин тэрэ эхэнэр бүри ойртоод, Иисусай урда дохин мүргэжэ: «Дээдын Эзэн! Намда туһалыш», – гэжэ гуйба.

²⁶«Хүүгэдэй эдихэ хоол абаад, нохойнуудта хаяхань зохиhoгүй юм», – гэжэ Иисус тэрээндэ харюусаба.

²⁷Тиигэхэдэнь тэрэ эхэнэрын: «Зүб даа, Дээдын Эзэн! Теэд эзэдэй шэрээ дээрэһээ унаһан бутархай нохойнуудшые эдидэг бшуу», – гэжэ урдаһаань хэлэбэ.

²⁸Тиixэдэнь Иисус тэрээндэ: «Ай, эхэнэр! Шинии хүзэг этигэл ехэ байна! һанаһан хүсэһэн юумэншини бүтэхэ!» – гэжэ харюусаба. Эгээл тэрэ үедэ эхэнэрэй басаганиинь эдэгэшэбэ.

Иисус олон зониие эдэгээбэ

²⁹Тэндэһээ Иисус Галилей далайн шадар ерэбэ. һүүлдэнь нэгэ гүбээ дээрэ гаража һууба.

³⁰Тэрээндэ олон зон ерэжэ байгаа. Тэдэ дохолон, һохор, хэлэгүй, бэртэһэн, мүн бусадшые элдэб янзын үбшэнтэй зониие Иисуста асаржа, хүлэйн дэргэдэ һуулгаба. Тэдэ үбшэн зониие Иисус бултыень эдэгээбэ.

³¹Тиин хэлэгүй байһан зоной хэлэхые, бэртэһэн хүнүүдэй эдэгэхые, дохолонуудай ябахые, һохорнуудай хараатай болоһые хараһан зон аргагүй ехээр гайхаа бэлэй. Тиигээд Израилиин Бурханда алдар соло дуудаа һэн.

Иисус дүрбэ мянган хүниие садхааба

³²Иисус шабинараа дуудажэ: «Би эдэ зониие хайрланаб. Тэдэ намтай гурбан үдэр байлсаа, теэд мүнөө эдихэ юумэгүй болоод байна. Эдэниие

үлэн хооһоор табиха дурагүй байнаб. Гэртээ бусаха замдаа эдэ һуларжа ядархал», – гэбэ.

³³Тээд шабинарынъ: «Иимэ сүл губида эдэ олон зониие эдеэлүүлжэ садхааха хоол бидэ хаанаһаа абахабибди?» – гэжэ урдаһаань һураба.

³⁴«Танда хэды шэнээн хилээмэн бииб?» – гэжэ Иисусай һурахада, тэдэнь: «Долоон хилээмэн, хэдэхэн загаһан би», – гэжэ харюусаба.

³⁵Иисус улад зониие һуухыень захирба.

³⁶Тиигээд долоон хилээмэ, загаһа абажа, Бурханда баяр баясхалан хүргэбэ, тэдэниинь хухалаад, шабинартаа үгэбэ, шабинарынъ улад зондо дам тараажа үгөө һэн.

³⁷Хүн бүхэн дураараа эдижэ садаад, үшөө тиихэдэ эдээнэй үлөөдһэн долоон түрсүүгээр дүүрэн болоо.

³⁸Эхэнэрнүүдһээ, үхибүүдһээ гадна дүрбэн мянган эрэшүүл эдеэлжэ садаһан байгаа.

³⁹Иисус улад зониие табяад, онгосодо һуужа, далайгаар тамаран, Магадан хотын шадархи газар дайдада хүрэжэ ерэбэ.

Матвей 16

Гайхамшаг үзэгдэлнүүдые харуулха гэнэн эрилтэ

¹Хэдэн фарисейнүүд, саддукейнэр Иисусые туршаха зорилготойгоор тэрээндэ ойртобо. Тиигээд гайхамшагта дүлгэ тэмдэг харуулхыень дурадхаба.

²Иисус тэдэндэ харюусаба: «Үдэшэндөө огторгойн барагар улаан байбалнь, таанад: „Үглөөдэр сэлмэг байха“ гэдэгта.

³Харин үглөөгүүр огторгойн барагар улаан, бүрхэг байбалнь, таанад: „Мүнөөдэр бороо орохонь“ гэдэгта. Хоёр нюуртан! Таанад огторгой хараад, ямар үдэрэй болохые мэдэдэг аад, харин мүнөө сагай дүлгэ тэмдэгүүдые тайлбарилха аргагүй байнат.

⁴Харата муухай, забхай оршон үеын зон, гайхамшагта дүлгэ тэмдэг харахаяа ханаба гүт? Теэд Иона лүндэншэтэй ушархан гайхамшагта дүлгэ тэмдэгхээ ондоо дүлгэ тэмдэг таанадта үгтэхэгүй». Тиигээд Иисус тэдэнхээ холодобо.

Фарисейнүүдэй болон саддукейнэрэй эхээбэри

⁵Шабинарын хилээмэ абахаяа мартаад, далайн нүгөө эрьедэ тамаржа гараба.

⁶Иисус тэдэндэ: «Һэргэлэн байгты! Фарисей, саддукейнэрэй эхээбэрихэнь болгоомжолжо байгты», – гэжэ хэлэбэ.

⁷Шабинарын өөһэд хоорондоо: «Маанадай хилээмэ абаагүй хадамнай тиигэжэ хэлээ ёһотой», – гэлсэбэ.

⁸Энээниие Иисус мэдээд, тэдэндэ иибэ: «Этигэл багатан, таанар хилээмэ абаагүйбди гэжэ юундэ хоорондоо хэлсэбта?

⁹Таанад мүнөө болотор ойлгобогүй гэшэ гүт? Табан хилээмээр табан мянган хүнэй садаһан тухай, үшөө тиихэдэ хэдэн түрсүүг үлөөдэһэнэй суглархан тухай таанар хананагүй аалта?

¹⁰Долоон хилээмээр дүрбэн мянган хүнэй садаһан тухай, үшөө тиихэдэ хэдэн түрсүүг үлөөдэһэнэй суглархан тухай мартаа аалта?

¹¹Хилээмэн тухай таанарта хэлээгүй байһыемни мүнөө болотор ойлгоногүй гүт? Фарисейнүүдэй, саддукейнэрэй эхээбэрихэ һэргылжэ байгты!»

¹²Һүүлэй һүүлдэ шабинарын хилээмэнэй эхээбэрихэ бэшэ, харин фарисейнүүдэй, саддукейнэрэй хургаалһаа һэргылэгты гэжэ хэлэһыень ойлгобо.

Пётр Иисусые Бурханай табисуурта гэжэ айлрадхана

¹³Иисус Филиппэй Кесари хотын хажууда ерээд байхадаа, өөрын шабинарһаа: «Хүн түрэлхитэнэй Хүбүүн тухай хүнүүд юун гэнэб?» – гэжэ һураба.



¹⁴«Зарим хүнүүд шамайе Уһаар арьудхагша Иоанн гэнэ, бусадын Илия гэжэ һанана, баһа нүгөөдүүлүн Иеремия гү, али ондоо лүндэншэдэй нэгэн гэлсэнэ», – гэжэ тэдэн харюусаба.

¹⁵«Теэд таанар намайе хэн гэжэ һананабта?» – гэжэ Иисус тэдэнһэ һураба.

¹⁶«Ши Бурханай табисуурташ, Амиды Бурханай Хүбүүнши», – гэжэ Симон Пётр харюусаба.

¹⁷Тиихэдэн Иисус: «Ионын хүбүүн Симон, ши золтойш! Энэ үнэн зүбые шамда хүнэй һанаан нээгээ бэшэ, харин тэнгэридэ оршодог минии Эсэгэ тайлбарилаа.

¹⁸Тиимэһэ би шамда хэлэнэб: ши Пётр – шулуун гээшэш, тиин би энэ шулуун дээрэ өөрынгөө һүзэглэгшэдэй бүлгэмые бодхоохоб, тэрэниемни үхэлшые өөрөө диилэхэгүй.

¹⁹Огторгойн хаан ороной түлхюурые би шамда үгэхэб. Тиин газар дээрэ хорихон юумэнши огторгой дээрэ хоригдохо; газар дээрэ зүбшөөһэн юумэнши огторгой дээрэ зүбшөөгдэхэ», – гэбэ.

²⁰Тиигээд Бурханай табисуурта байһан тухайн хэндэшые хэлэхэгүйень Иисус шабинартаа захирба.

Иисус зобохо, үхэхэ тухайгаа хэлэнэ

²¹Тэрэ саһаа эхилээд Иисус өөртэйн юунэй ушарха тухай шабинартаа хэлэдэг болобо. «Би Иерусалим ошохо ёһотойб, тэндэ ахамадһаа, түрүү санаартанһаа, Хуули заадаг багшанарһаа боложо ехэ зоболон эдлэхэб. Би алуулхаб, тиигээд гурбан үдэрһөө амидырхаб», – гэдэг байба.

²²Тиихэдэн Пётр тэрэниие хажуу тээшэн дуудаж абаашаад: «Дээдын Эзэн, үгы даа! Тиимэ юумэн шамтай хээээшые болохогүйн болтогой!» – гэжэ зогсоожо байгаа.

²³Иисус Пётрто хандан: «Холо боло намһаа, Сатана! Ши намда һаад хэнэш. Шинии һанал бодолнуудши Бурханһаа үршөөгдэнэ бэшэ, харин хүн шанарһааши бүрилдэнэ», – гэбэ.

²⁴Тиигээд Иисус өөрынгөө шабинарта хэлэбэ: «Намтай ябалсаха дуратай хүн өөр тухайгаа бодохоёо болёод, үдэр бүхэн хэрээһээ үргэлөөд, хойноһоомни яба.

²⁵Ами наһаяа гамнаха һанаатайшуултнай тэрэнээ алдаха; харин минии түлөө амиа үгэһэнтнай тэрэнээ алмаха.

²⁶Хэрбээ танай бүхы дэлхэйе олзолоод, ами хүнэхээ алдабалтнай, танда ашагтай гү? Үгыл даа! Таанад ямаршые юумэ түлөөд, ами хүнэхээ бусаажа шадахагүйлта.

²⁷Хүн түрэлхитэнэй Хүбүүн Эсэгынгээ алдар соо Эльгээмэлнүүдтэйгээ хамта һаяар ерэхэл, тиигээд хэһэн хэрэгэйнэ зэргээр хүн бүхэниие шиидхэхэл.

²⁸Эндэ байгшадай зариман Хүн түрэлхитэнэй Хүбүүнэй хаан түрээ баряад заларжа ерэхые үзөөгүйдөө үхэхэгүй гэжэ таанадта баталан хэлэнэб».

Матвей 17

Иисусай хубилалга

¹Зургаан хоногой үнгэрхэдэ, Иисус Пётрые, аха дүү Яков Иоанн хоёрые абажа, хүнүүдэй нюдэнһөө далда байдаг үндэр хада өөдэ гараба.

²Тэндэ Иисус шабинарайнгаа урда хубилба: нюурынэ наран шэнгээр ялараа, хубсаһаниинэ туяа мэтэ сагаан болоо.

³Гэнтэ тэрээнтэй хөөрэлдэжэ байһан Моисей Илия хоёр бии болоо.

⁴Пётр Иисуста: «Дээдын Эзэн! Эндэ байхадамнай манда ямар һайн гээшэб! Хэрбээ хүсэбэлшни, эндэ гурбан майхан бодхоохобди: нэгыень шамда, нэгыень Моисейдэ, үшөө нэгыень Илияда», – гэбэ.

⁵Тиигэжэ хэлэжэ байтарнэ ялагар үүлэнэй һүүдэр тэдэниие хушаба, үүлэнһээ: «Энэ минии инаг хайрата Хүбүүмни юм, намда таатай юм; үгыень дуулагты», – гэһэн абяан дуулдаба.



⁶Энэ абяе дуулахадаа, шабинарынь ехээр айжа, уруугаа хаража газарта унаба.

⁷Зүгөөр Иисус дүтэлжэ, тэдэниие гараараа хүрөөд: «Бодогты, бү айгты», – гээ.

⁸Тэдэнэй өөдөө харахадань, Иисусаа ондоо хэншые тэдэндэ харагдабагүй.

⁹Шабинартаяа хадаһаа буужа ябахадаа, Иисус: «Хүн түрэлхитэнэй Хүбүүнэй үхөөд амидыртар, энэ үзэхэнөө хэндэшые бү хөөрэгты», – гэжэ тэдээндээ захирба.

¹⁰«Хуули заадаг багшанар юундэ Бурханай табисуурта Христосой ерэхын урда тээ Илия лүндэншэ ерэхэ ёһотой гэдэг бэ?» – гэжэ шабинарынь Иисусаа асууба.

¹¹Тиихэдэнь Иисус: «Үнэхөөрөө Илия түрүүн ерэжэ, бүхы юумые бэлэн болгохо ёһотой.

¹²Гэбэшые Илия заларжа ерээ, харин хүнүүд тэрээниие таняагүй, дура зоргоороо тэрээнтэй болоо гэжэ танда хэлэхэ байнаб. Эгээл тиигэжэ тэдэ Хүн түрэлхитэнэй Хүбүүниие зобоохо юм», – гэжэ харюусаа.

¹³Тиихэдэнь Уһаар Арюудхагша Иоанн тухай тэрэ хэлэнэ гэжэ шабинарынь ойлгобо.

Ада шүдхэртэ барюулһан хүбүүе эдэгээбэ

¹⁴Иисусай шабинартайгаа улад зондо бусажа ерэхэдэнь, тэрээндэ нэгэ хүн ойртоод, урдань үбдэг дээрээ һүгэдэн,

¹⁵«Эзэн! Минии хүбүүе үршөөжэ хайрлыш. Тэрэмни таталзажа унадаг, ада шүдхэрэй хэрзэгыгээр добтолходо, гал, уһа руу ходо хүрэдэг.

¹⁶Би тэрэнээ танай шабинарташые асарааб, теэд тэдэ эдэгээжэ шадаагүй», – гэжэ хэлэбэ.

¹⁷«Этигэл хүзэггүй, забхай ябадалтай зон аа! Үшөө хэды шэнээн таанадтай байхабиб? Үшөө хэды болотор таанадые тэсэжэ байхабиб? Хүбүүгээ наашань намда абаад ерэ», – гэжэ Иисус хэлэбэ.

¹⁸Иисусай ада шүдхэртэ захирхадань, тэрэнь хүбүүнэй бэе сооһоо гаража, хүбүүн дары эдэгэшөө һэн.

¹⁹Хожомынь шабинарынь Иисуста дүтэлжэ: «Яахадаа бидэ тэрэ ада шүдхэрые даража шадабагүй гээшэбибди?» – гэжэ гансаараа байхадань һураба.

²⁰Иисус тэдэндэ харюусаба: «Таанарай этигэл багадаһанда тиигээ. Хэрбээ таанад горчицын жэжэхэн үрэнэнэйшые шэнээхэн этигэлтэй байжа, энэ хадада хандан: „Эндэһээ хүдэлжэ тишээ боло“ гээ һаатнай, хада тишэлхэ юм. Таанар юушые хэжэ шадаха һэнта гэжэ танда баталан хэлэнэб.

²¹Эдэ мэтын ада шүдхэрнүүдые имагтал зальбаралаар, масаг сахин даража болохо юм».

Иисус дахин үхэхэ тухайгаа хэлэнэ

²²⁻²³Бүхы шабинарайнгаа Галилейдэ суглараад байхада Иисус тэдээндээ өөр тухайгаа: «Хүн түрэлхитэнэй Хүбүүн хүнүүдэй гарта тушаагдахань, тиигээд тэрэ алуулаад, гурбадахи үдэртөө амидырха», – гэжэ хэлэбэ. Шабинарынь булта ехээр гашуудаба.

Бурхан хүмэдэ алба татабари түлэхэ тухай

²⁴Иисусай шабинартайгаа Капернаумда ерэхэдэнь, Бурхан хүмын алба татабари суглуулагшад Пётрто ойртоод: «Багшатнай Бурхан хүмэдэ алба татабари түлэхэ гү?» – гэжэ һураба.

²⁵«Түлэнгүй яахаб», – гэжэ Пётр хэлээ. Тиигээд Пётрой гэртэ ороходонь, Иисус түрүүлэн: «Симон, ши юун гэжэ һананабши? Энэ дэлхэйн хаашуул хэнһээ түлөөһэ, алба татабари абадаг бэ? Өөһэдынгөө албатанһаа гү, али хариин зонһоо абадаг гү?» – гэжэ һураба.



²⁶Пётр тэрэндэ: «Хариин зонһоо абадаг», – гэжэ харюусаа. Иисус тиигэхэдэнь: «Тиимэһээ албатан зондонь түлэхэ хэрэггүй гэхэн удхатай бэшэ аал?

²⁷Зүгөөр бидэ эдэ зониие сухалдуулхагүйбди. Тиимэһээ ши далайн эрьедэ ошожо, загаһа хахуулида. Хахуулидашни ороһон түрүүшын загаһа абаад, амандань мүнгэ олохош. Тэрэниие абаад, алба татагшадта минии түлөө, өөрынгөөшье түлөө үгөөрэй», – гээ һэн.

Матвей 18

Хэн агууехэнь бэ?

¹Тэрэ үедэ шабинанынь ерээд: «Огторгойн хаан түрэдэ хэниинь агууехэб?» – гэжэ Иисусаа һураба.

²Тиихэдэнь Иисус нэгэ үхибүүе дуудажа, шабинарайнгаа урда байлгаад,

³хэлэбэ: «Хэрбээ таанар хубилжа, үхибүүдтэл адли болоогүй һаа, Огторгойн хаан орондо орохогүйт гэжэ баталан хэлэнэб.

⁴Энэ үхибүүндэл адли хэн номгон даруу болоноб, тэрэ Огторгойн хаан түрэдэ үлэмжэ ехэнь гээшэ.

⁵Минии нэрээр иимэ нэгэ үхибүүе тогтоожо абаһан хүн намайе тогтоожо абаһан болоно.

Нүгэл шэбэлдэ түлхихэ тухай

⁶Зүгөөр намда этигэгшэ эдэ багашуулай нэгыеньшье нүгэл хилэнсэдэ түлхихэн хүн дээрэ аймшагтай хэһээлтэ бууха. Тэрэ хүнэй хүзүүндэ тээрмын шулуу уюулаад, далайн гүн руу шэдүүлжэ шэнгэбэлнь, тэрээндэ өөртэнь дээрэ байха һэн.

⁷Хүнүүдые нүгэл хилэнсэдэ түлхидэг юмэнүүдһээ боложо газар дэлхэйдэ уй гашуудал тулгарна. Зүгөөр хүнүүдые нүгэл хилэнсэдэ түлхидэг юмэнүүд ходо олдод лэ байха, тиигээд нүгэл хилэнсэдэ түлхигшэ аймшагтай уй гашуудал үзэхэ.



⁸Хэрбээ гарайшни гү, али хүлэйшни нүгэлдэ шамайе оруулаа хаань, тэдэнээ таһа сабшаад хая, хоёр гартайгаа, хоёр хүлтэйгөө залиршагүй галай тамада хаягданхаар, гаргүйгөөр гү, али хүлгүйгөөр хэтэдээ амиды ябабалшни дээрэ.

⁹Хэрбээ нюдэнэйшни нүгэлдэ шамайе оруулаа хаа, тэрэнээ хуга татаад хая. Хоёр нюдэтэйгөө галай тама руу хаяуланхаар, үрөөһэн нюдэтэйгөө хэтэдээ амиды ябабалшни дээрэ.

Үгы болоһон хонин тухай хургаалта үгэ

¹⁰Таанад эдэ багашуулай нэгыеньшье доогуур бү харагты, тэдэнэй тэнгэридэ оршогшо һахюуһан – Эльгээмэлнүүдынь – минии Эсэгын шарайе хододоо тэнгэридэ хаража байдаг юм гэжэ танда хэлэнэб.

¹¹Ушарынь хэлэбэл, Хүн түрэлхитэнэй Хүбүүн хосорогшодые оложо абархаяа ерээ.

¹²Таанар юун гэжэ һананабта? Зуун хонитой нэгэ хүн ганса хонинойгоо төөрижэрхёо хаань, ерэн юһэн хонидоо хада дээрэ орхёод, төөриһэн ганса хониёо бэдэржэ ошохогүй аал?

¹³Тиигээд тэрэнээ оложорхёо хаа, үнөөхи хүн төөрээгүй ерэ юһэн хонидойнгоо тушаа бэшэ, харин олоһон ганса хонинойнгоо тушаа аргагүй ехээр баярлаха гэжэ танда үнэниие хэлэнэб.

¹⁴Энээндэл тон адляар, тэнгэридэ оршогшо танай Эсэгэ эдэ багашуулай нэгыеньшье алдаха дурагүй байна.

Хэн нэгэнэй нүгэлдэ орохо тухай

¹⁵Хэрбээ хүзэглэгшэ аха дүүнэрэйшни нэгэн шамда харша нүгэлтэ юумэ хээ хаань, тэрээндээ ошожо, гансаарандань буруу байһыень заажа үгэ. Хэрбээ тэрэ хэлэһыешни дуулабал, ши хүзэглэгшэ аха дүүгээ һөөргэнь бусаабаш.

¹⁶Хэрбээ шагнахаяа арсабалнь, үшөө нэгэ хоёр хүниие абаад ошо: ямаршье гэмнэлгэ хоёр гү, али гурбан хүнэй гэршэлгээр баталагдаха.

¹⁷Тэдэниешье дуулахая арасабалнь, хүзэглэгшэдэй бүлгэмдэ дуулга. Хэрбээ хүзэглэгшэдэй бүлгэмые дуулахая арасабалнь, ши тэрэ хүндэ ондоо яһатанай хүндэ гү, али алба татаашада хандаһандал адляар хандажа бай.

Зүбшөөхэ ба хорихо тухай

¹⁸Газар дээрэ хорихон юумэнтнай огторгой дээрэ хоригдохо; газар дээрэ зүбшөөрһэн юумэнтнай огторгой дээрэ зүбшөөгдэхэ гэжэ таанарта үнэниие хэлэнэб.

¹⁹Тэрээнһээ гадна, хэрбээ таанадай хоёртнай газар дэлхэй дээрэ үгээ ойлголсоод, ямаршые юумэ эрээ һаатнай, эрээшыетнай Огторгойдо оршодог минии Эсэгэ танда үгэхэ гэжэ хэлэхэ байнаб.

²⁰Ушарынь юуб гэхэдэ, хоёр гү, али гурбан хүн минии нэрээр хаана сугларнаб, тэндэнь би хоорондонь байхаб».

Хайрагүй зараса тухай һургаалта үгэ

²¹Тиихэдэнь Пётр Иисуста ойртоод: «Дээдын Эзэн! Намда харша нүгэл үйлэдэгшэ аха дүүгээ би хэды дахин хүлисэхэ ёһотой болонобиб? Долоо дахин гү?» – гэжэ һураба.

²²Иисус тэрээндэ иигэжэ харюусаба: «Долоо дахин бэшэ, харин долоон дала дахин гэнэб.

²³Ушарынь хэлэбэл, Огторгойн хаан түрэ өөрынгөө зарасанартай тоосоо хэхээ һанаһан хаанда адлишуу юм.

²⁴Тоосожо эхилхэдэнь, тэрээндэ арба мянган талант мүнгэ үритэй хүниие абажа ерэбэ.

²⁵Үриее түлэхэ юумэгүй байхадань, эзэн хаан тэрэниие, тэрэнэй һамгыень, үхибүүдыень, мүн эдлэжэ байһан бүхы зөөриень худалдаад, үрииень түлүүлхые захирба.

²⁶Тиихэдэнь барлаг хаанай хүлдэнь унажа, „Эзэн хаан! Намайе хүлээжэ хайрлыш, би үриее шамда дууһыень түлэхэлби“, – гэжэ гуйба.



- ²⁷Эзэн хаан барлагыг хайрлажа, үриенг хүлисөөд, гэртэнг табиба.
- ²⁸Тэрэ зараса гадагшаа гаража ябатараа, өөртэнг зуун динари үритэй нэгэ нүхэртэйгөө тааралдаба. Тиигээд тэрэнээ һабардажа баряд: „Үриег намда түлэ“ гэжэ байгаад, хоолойенг бахалуурдаба.
- ²⁹Тиихэдэнг нүхэрынг хүлдэнг унан: „Намайе хүлеэжэ хайрлыш, би шамда үриег дууһыенг түлэхэлби“, – гэжэ ехэтэ гуйба.
- ³⁰Төөд түрүүшынг зараса хүлеэхээ арсаба. Тэрээнһээ гадна, үриег түлэтэрынг нүхэрөө түрмэдэ һуулгаба.
- ³¹Энэниие бусад зарасанарынг хараад, урмаа хухаржа, эзэн хаандаа ерэжэ хөөрөбэ.
- ³²Тиихэдэнг эзэн хаан түрүүшын зарасаа дуудуулжа асараад: „Хэрэггүй нобшын зараса! Намайе гуйхадашни, би үриешни дууһан хүлисөө бэлэйб.
- ³³Шамайе минии хайрлаһандал адляар, шишье нүхэрөө хайрлаха ёһотой байгаа бэшэ гүш?“ – гэжэ сухалтайгаар хэлэбэ.
- ³⁴Тиигээд уурлаһан эзэн хаан бүхы үриег түлэтэргн тэрэниие түрмын тамалагшадта тушааба.
- ³⁵Хэрбээ һүзэглэгшэ аха дүүгээ танай үнэн зүрхэнһөө хүлисөөгүй һаа, Огторгойдо оршогшо Эсэгэмни танда баһал тиигэжэ хандаха юм», – гэбэ Иисус.

Матвей 19

Һамганһаа һалаха тухай

- ¹Иигэжэ һургаһанайнгаа һүүлээр Иисус Галилейһээ гаража, Иордан голой саада бэеын Иудейн можо хүрэжэ ерэбэ.
- ²Хойноһоонг олон хүн дахажа ябаба, тиин Иисус тэдэнэй үбшэн зонийенг бултыенг аргалба.



³Хэдэн фарисейнүүд Иисуста ойртожо, тэрэниие туршаха ханаатайгаар: «Хүн ямаршые шалтагаанаар хамганһаа халаха эрхэтэй гү?» – гэжэ һураба.

⁴Иисус харюусаба: «Бүтээгшэ түрүүшээр эрэ эмэ хоёрые зохёон бүтээгээ гэжэ таанар уншаагүй аалта?

⁵Тиигээд: „Эрэ хүн эхэ эсэгээ орхёод, хамгантайгаа нэгэдэхэ, тиин тэрэ хоёр ганса бэе болон эблэрхэ“ гэжэ хэлээ юм.

⁶Тиихэлээрээ тэдэ хоёр болбол хоёр бэшэ, харин нэгэ бэе гэшэ. Тиимэхээ Бурханай нэгэдүүлһэн юумые хүн хубааха ёһогүй».

⁷Урдаһаань фарисейнүүд: «Тиигээ хаа, юүндэ Моисей халаха тухай гэршэлгэ хамгандаа үгөөд лэ тэрээнһээ халажа болохо гэхэн зүбшөөл үгөөб?» – гэжэ Иисусһаа һураба.

⁸Иисус тэдэндэ: «Шулуун сэдхэлтэй байһан хадатнай хамганһаа халаха зүбшөөл Моисей таанарта үгөө; теэд Бурхан анханһаа тиигэжэ заяагаагүй юм.

⁹Зүгөөр би таанарта иигэжэ хэлэхэб: өөртэнь урбаагүй хамганһаа халаад, ондоо эхэнэртэй гэрлэхэн хүн бүхэн урбагша болоно», – гэжэ хэлээ.

¹⁰Шабинарын тэрээндэ: «Хэрбээ хүн хамганайнгаа урда тиимэ уялгатай байбалнь, юрэдөө хамга абангүй байбал дээрэ бэшэ гү», – гэжэ хэлэбэ.

¹¹Иисус тэдэндэ иигэжэ харюусаа: «Энэнь хүн бүхэндэ хамаатай бэшэ, гансал Бурханай заяаһан хүнүүдтэ хамаатай юм.

¹²Яахадааб гэхэдэ, хүнүүд элдэб янзын шалтагаанаар хамга абадаггүй юм: зариман түрэхөөн зэмдэг дутагдалтай байдаг, бусадые хүнүүд тиимэ болгожорхидог, үшөө зариман Огторгойн хаан ороной аша туһада хамга абадаггүй. Зүгөөр энэниие ойлгожо абаха арга бэлигтэй хүнүүд ойлгожо абаха ёһотой».

Иисус балшар үхибүүдые адислана

¹³Иисусай гарһаа адис абуулжа, зальбаралдань хүртөөхын тула зарим хүнүүд тэрээндэ үхибүүдээ асарба. Гэбэшье шабинанынь тэдэ зондо дураггүйгөөр дуугаржа байгаа.

¹⁴Тээд Иисус: «Үхибүүдые нашань табигты, намда ерэхэдэнь һаалта бү хэгты, юундэб гэхэдэ, эдэ үхибүүдтэ адлишуу хүнүүд лэ Огторгойн хаан оронойхин юм», – гэжэ хэлээ.

¹⁵Иисус үхибүүдые гараараа адислаад, тиигээд тэндэһээ ябаа һэн.

Баян залуу хүн тухай

¹⁶Хэншьеб нэгэтэ Иисуста ерэжэ: «Эрхим багша! Мүнхын амидаралда хүртэхын тула би ямар буянтай юумэ хэхэ ёһотойбиб?» – гэжэ һураба.

¹⁷«Юундэ намайе эрхим гэбэш? Гансал Бурхан эрхим гээшэ. Хэрбээ мүнхын амидаралда хүртэхээ һанабал, тэрэнэй захяа заабаринуудые сахижа бай», – гэжэ Иисус тэрэ хүндэ харюусаба.

¹⁸«Ямар захяа заабаринуудые?» – гэжэ нүгөөдэнь асууба. Тиихэдэнь Иисус: «Бү ала, ханидаа бү урба, хулгай бү хэ, бусад тухай худал юумэ бү хэлэ,

¹⁹эхэ эсэгээ хүндэлэ, баһа бусад зондо өөртөөл адли дуратай бай», – гэжэ тоолон хэлэбэ.

²⁰«Эдэ захяа заабаринуудые бултыень би эдир наһанһаа сахижа ябадаг хүнби. Энээнһээ гадна би юу хэхэ ёһотойбиб?» – гэжэ залуу хүбүүн һураба.

²¹Иисус тэрээндэ: «Хэрбээ эрхим түгэс байха гэбэл, ошожо зөөри зөөшээ бултыень худалдаад, мүнгыень үгытэйшүүлдэ хубаажа үгэ, тиигээ һаа, тэнгэри дээрэ баялиг зөөритэй болохош. Тиигээд намда ерэжэ, хажуудамни ябаарай», – гэбэ.

²²Энээниие дуулахадаа залуу хүбүүн уйдхартайгаар саашалба, ушарынь юуб гэхэдэ, тэрэ хүбүүн аргагүй ехэ эд зөөритэй байгаа ха юм.



²³Иисус шабинартаа: «Баян хүнэй Огторгойн хаан орондо орохонь ехэл бэрхэтэйл байха даа.

²⁴Баян хүнэй Бурханай хаан орондо орохоһоонь бэлээр зүүнэй хүбөөр тэмээн ороод гарахал гэжэ таанарта дабтан хэлэхэб», – гээ бэлэй.

²⁵Энээниие дуулаад, шабинарынь ехээр гайхалдан: «Тиигэхэдээ хэн абарагдаха аргатайб?» – гэлсэбэ.

²⁶Иисус тэдэниие харан: «Хүнүүд өөһэдыгөө абаржа шадахагүй, харин Бурхан юушые шадаха», – гэбэ.

²⁷Тиихэдэнь Пётр: «Бидэ хамаг юумээ орхёод, шамайе дахаабди. Бидэ юундэ хүртэхэбибди?» – гэжэ Иисучаа нураба.

²⁸Иисус тэдэндэ хэлэбэ: «Хүн түрэлхитэнэй Хүбүүнэй өөрынгөө алдарта Хаан шэрээдэ нуухадань, намайе дахажа ябаһан таанад баһа арбан хоёр хаан шэрээдэ нуужа, Израилиин арбан хоёр угсаатаниие шүүбэрилхэт гэжэ баталан таанадта хэлэнэб.

²⁹Баһа минии түлөө гэр байраяа гү, аха дүүнэрээ гү, эгэшэ дүүнэрээ гү, аба эжыгээ гү, һамга үхибүүдээ гү, али эдлэжэ байһан газараа орхихон хүн бүхэн зуу дахин ехэ юумэ абаха, үшөө тиихэдэ мүнхын амидаралда хүртэхэ.

³⁰Зүгөөр мүнөө түрүү зэргэдэ байгшадай олониинь һүүл хабида орохо, тиихэдэ мүнөө һүүл зэргэдэ байһанай олониинь түрүүлэн гараха.

Матвей 20

Үзэмэй сэсэрлигтэ хүдэлдэг хүнүүд тухай нургаалта үгэ

¹Огторгойн хаан түрэ иимэрхүү юм: Нэгэ хүн үзэмэйнгөө сэсэрлигтэ ажалшадые хүлһэлхээ гэрһээ эртэ үглөөгүүр гаража ошобо.

²Тиигээд үдэрэй нэгэ динари түлэхөөр хүлһэншэдтээ хэлсээд, тэдэниие ажаллахыень сэсэрлигтээ эльгээбэ.

³Тэрэл үглөөгүүр юһэн сагай багта тэрэ наймаа хэдэг газар ошожо, тэндэ ямаршые ажалгүй хэдэн хүнүүдэй байхые хараба.

⁴Эзэн тэдэндэ хандажа: „Таанаршые минии үзэмэй сэсэрлигтэ ошожо ажаллагты, хүлһыетнай таанарта зүбөөр үгэхэб“, – гэхэдэнь,

⁵тэдэ хүнүүд ажаллахаяа ошобо. Тэрэ хүн хахаддэр, мүн үдэрэй гурбан сагта дахин наймаанай газар ошожо, баһал ажалгүй хүнүүдые хүлһэлбэ.

⁶Һүүлэй һүүлдэ табан сагай багаар гарахадаа, үшөө хэдэн хүнэй зугаатай зогсохые хараба, тиигээд тэдэндэ хандажа: „Таанар юундэ ямаршые юумэ хэнгүй бүхэли үдэр эндэ зогсонобта?“ – гэжэ асууба.

⁷Тэдэнь: „Маниие хэншые хүлһэлөөгүйл“, – гэжэ харюусаба. Тиихэдэнь тэрэ хүн: „Зай, тиимэ һаа, таанар минии үзэмэй сэсэрлигтэ ошожо ажаллагты“, – гэжэ хүнүүдтэ хэлэбэ.

⁸Үдэшэ болоходо, үзэмэй сэсэрлигэй эзэн эрхилэгшэдээ хандажа: „Ши хүдэлмэришэдые дуудажа, һүүлдэ ажаллахаяа гараһан хүнүүдһээ эхилээд, түрүүшээр гараһан хүнүүдээр түгэсэн, ажалайнь хүлһэ түлэ“, – гэбэ.

⁹Табан сагта хүдэлхээ гараһан хүнүүд нэгэ-нэгэ динари ажалай хүлһэ абаба.

¹⁰Тиимэхээ түрүүн ажаллажа эхилһэн хүнүүд: „Үлүү ехэ мүнгэ абахабди“, – гэжэ һанаа, теэд тэдэ баһал нэгэ-нэгэ динари ажалай хүлһэ абаба.

¹¹Тэдэ хүлһээ абаад, гэрэй эзэнэй урдаһаа гэмэрэлдэбэ.

¹²„Һүүлдэ ерэхэн эдэ хүнүүд оройдоол нэгэ саг ажалаа, харин ши эдэндэ бүхэли үдэр бүгшэм халуунда зобожо хүдэлһэн бидэндэл адли мүнгэ түлэбэш“, – гэбэ.

¹³Гэрэй эзэн тэдэнэй нэгэндэнь иигэжэ хэлэбэ: „Нүхэр! Би шамайе мэхэлээгүйлби, нэгэ динари ажалай хүлһэ абахаш гэжэ ши бидэ хоёр зүбшөө бэшэ һэнгүбди?

14Ши өөрынгөө ажалай хүлһэ абаад яба. Һүүлдэ хүлһэлһэн энэ хүндэ би шамда түлһэнтэй адли мүнгэ үгэхэ һанаатайб.

15Өөрынгөө мүнгэтэй би дуратай юумэеэ хэхэ эрхэтэй бэшэ гүб? Али минии гар бардам байһанда ши атаархахаяа һанаба гүш?«

16Тон тиигэжэл адагай Һүүлдэ байгшад түрүү зэргэдэ гараха, тиин түрүү зэргэдэ байгшад адагай Һүүлшын болохо».

Иисус үхэхэ тухайгаа гурбадахия хэлэнэ

17Иисус Иерусалим ошохо замдаа арбан хоёр шабинараа хажуу тээшэн дуудаад:

18«Мүнөө бидэ Иерусалим орохоннай. Тэндэ Хүн түрэлхитэнэй Хүбүүниие түрүү санаартанай, Хуули заадаг багшанарай гарта тушааха. Тэдэнэр Хүбүүе гэмнэн, үхэлэй саазада хүртөөхэ гэжэ шийдэхэ.

19Тиигээд тэрэниие хариин зоной гарта тушааха. Тэдэнэ тэрэниие доромжолон наада бариха, сохихо, хэрээһэндэ хадаха. Тиигэбэшье Хүбүүн үхөөд, гурбадахи үдэртөө амидырха», – гэбэ.

Зэбэдэйн хүбүүдэй эхын гуйлта

20Зэбэдэйн хүбүүдэй эхэнэ хүбүүдтэеэ хамта Иисуста ерээд, урданэ дохин мүргэжэ, тэрээнэй үршөөл гуйба.

21«Ши юу хүсэнэбши?» – гэжэ Иисус тэрэ эхэнэрһээ асууба. Тэрэнэ Иисуста: «Ши Хаан шэрээдээ һуухадаа, эдэ хоёр хүбүүдэймни нэгыень баруун таладаа, нүгөөдыень зүүн таладаа һуулгажа хайрлыш даа», – гэбэ.

22Иисус харюуданэ: «Таанад юун тухай гуйжа байһанаа үнэхөөрөө ойлгоногуйт. Минии амсаха ёһотой зоболонгой аягаһаа таанад уужа амсажа шадаха аалта?» – гэбэ. Тиихэдэнэ Яков Иоанн хоёр: «Шадахабди», – гэжэ тэрээндэ харюусаба.

23Иисус тэдэндэ: «Үнэхөөрөө таанад минии зоболонгой аягаһаа амсахат. Теэд баруун таладамни, зүүн таладамни һууха хүнүүдые



һунгахань минии мэдэлдэ бэшэ юм. Эдэ һууринуудта минии Эсэгын табиһан хүнүүд һууха юм», – гэжэ хэлэбэ.

²⁴Бусад арбан шабинанынь энээн тухай дуулахадаа, аха дүү хоёрто сүхаллаа ехээр хүрэбэ.

²⁵Тиимэхээ Иисус тэдэниие дуудажа: «Хариин захирагшад өөһэдынгөө арад зониие зонхилхо дуратай байдаг, мүн түшэмэд һайдуудыньшые албатанаа захирха бүрин засагтай байдаг гэжэ таанар мэдэнэт.

²⁶Харин таанад тэдэндэл адляар бээе абажа бү ябагты. Агууехэ болохо һанаатай хүнтнай бусадайнгаа бултанайнь зараса болохо ёһотой.

²⁷Али таанарай дунда түрүү зэргэдэ гараха һанаатай хүнтнай бусадайнгаа бултанайнь барлаг болохо ёһотой.

²⁸Хүн түрэлхитэнэй Хүбүүн хүнүүдые зарахаяа ерээ бэшэ, харин бусад уладта алба хэхее, мүн үнэтэ ами наһанайнгаа сэнгээр олон хүнүүдые абархаяа ерээ», – гэбэ.

Иисус хоёр һохор хүниие эдэгээбэ

²⁹Иисусай шабинартайгаа Иерихонһоо гаража ябаханда, тэдэнэй хойноһоо үй түмэн зон дахажа ябаба.

³⁰Тэрэ үедэ харгын захада һууһан хоёр һохор хүн хажуугаарнь Иисусай гаража ябаһан тухай дуулаад: «Эзэн, Давидай үри һадаһан, маниие үршөөжэ хайрлыш!» – гэжэ хашхаралдаба.

³¹Улад зоной тэдэ хоёрто дуугүй бологты гэбэшье, тэдэ хоёрынь бүри шангаар: «Эзэн, Давидай үри һадаһан! Маниие үршөөн хайрлыш», – гэжэ хашхаралдаба.

³²Иисус зогсожо, тэдэниие дуудаад: «Таанад намһаа юу хүсэнэбта?» – гэжэ һураба.

³³Тэдэ хоёрынь: «Эзэн! Хараатай болохые хүсэнэбди», – гэжэ харюусаба.



³⁴Иисус тэдэниие хайрлажа, нюдэнүүдтэнь халта хүрөөд абаа. Тэрэ дороо нюдэнүүдын хардаг боложо, тэдэ хоёр Иисусай хойноһоо ябаба.

Матвей 21

Иисус Иерусалимда оробо

¹Иисус шабинартайгаа Иерусалимда ойртожо ерээд, Элеон хадын хаяада оршодог Беттагэ тосхон ошобо. Иисус түрүүлэн тишэнь хоёр шабияа эльгээхэ зуураа

²тэдээндээ иигэжэ захиба: «Сэхэ урдатнай байһан тосхон ошогты. Тэндэ орохотойгоо сасуу нэгэ залуу элжэгэнэй эхэтээ суг уяатай байхые олохот. Тэдэниие уяаһаань тайлаад, намда асарагты.

³Таанарта хэн нэгэнэй юумэ хэлээ һаань, „Эдэнэр Эзэндэ хэрэгтэй болоо“ гэжэ харюусаарайт, тийхэдэтнай элжэгэнүүдые абажа ябахыетнай дары зүбшөөхэ».

⁴Иигэжэл лүндэншөөр дамжуулан Бурханай найдүүлһан бүгдэ юумэнүүд бүтэбэ даа:

⁵«Номгон даруу шинии Хаан Эмэ элжэгэ унаад, тэрэнэй унага – даагыень унаад, шамда заларжа ерэнэ гээд Сионий хотодо дуулгаарайгты».

⁶Шабинарынь ошоод, Иисусай захиһан ёһоор хэбэ:

⁷элжэгы даагатайнь асаржа, нюрган дээрэнь хубсаһаяа дэбдээд, Иисусые унуулба.

⁸Үй түмэн зон ябаха харгы дээгүүрнь хубсаһаяа дэбдибэ, зарим зон мүшэрнүүдые отолоод, харгы дээгүүрнь табиба.

⁹Урдуурнь ябаһан зон, мүн хойноһоонь дахагшад: «Давидай үри һадаһан алдар солотой байһай! Дээдын Эзэнэй нэрээр заларан Ерэгшэ үршөөл хайратай байһай! Дээдын тэнгэридэ оршоһон Бурханда алдар соло!» – гэжэ шанга шангаар хашхаралдаба.

¹⁰Иисусай Иерусалимда ороходонь, бүхы хото шэбээгэйхин хүлгэнэжэ: «Энэ хэн бэ?» – гэлдэбэ.

¹¹«Энэ Иисус алдартай Галилейн Назаредэй лүндэншэн мүн», – гэжэ улад зон харюусажа байгаа.

Иисусай Бурхан хүмэ ошоһон тухай

¹²Иисус Бурхан хүмэ ошожо, тэндэ хонжоо наймаа хэгшэдые, юумэ худалдажа абагшэдые бултыень намнажа гаргаба. Мүнгэ холигшодой шэрээнүүдые, гулабхаа худалдагшадай һандалинуудые хүмэрюулбэ.

¹³Тиигээд тэдэндэ: «Минии гэр мүргэл зальбаралай гэр гээд нэрлэгдэхэ гэжэ Нангин Бэшэг соо хэлээтэй байдаг. Харин таанад энэ гэр дээрмэшэдэй шэбээлдэг үүр болгожорхёот», – гэбэ.

¹⁴Бурхан хүмэдэ Иисуста һохор дохолон хүнүүд ерэбэ, Иисус тэдэниие эдэгээбэ.

¹⁵Иисусай бүтээһэн гайхамшагта хэрэгүүдые хараад, мүн Бурхан хүмэ дотор: «Давидай үри һадаһан алдар солотой байһай!», – гэжэ үхибүүдэй шанга шангаар хашхаралдахые дуулаад, түрүү санаартан, Хуули заадаг багшанар сухалаа хүрэжэ:

¹⁶«Эдэнэй юу хэлэжэ байхые дуулана гүш?» – гэжэ Иисусаа асууба. «Дуулангүй яахаб! Теэд: „Ши үхибүүдэй, нарай нялха хүүгэдэй аманһаа магтаал соло гаргуулааш“ гэжэ Нангин Бэшэгтэ хэлээтэй байһые таанад хэзээшье уншаагүй аалта?» – гэжэ Иисус тэдэндэ хэлэбэ.

¹⁷Иисус тэдэниие орхёод, Иерусалим хотоһоо гаража, Бетани тосхон ошожо хоноо һэн.

Иисус үрэ жэмэсгүй боди модо хараалдаа хүртөөбэ

¹⁸Хойто үглөөгүүрнь һөөргөө хото руу ошожо ябахадаа, Иисус ехээр гэдэһээ үлдэбэ.

¹⁹Харгын захата нэгэ боди модоной ургажа байхые хараад, хажуудань ошобо, теэд тэндэнь набшаһадһаа бэшэ ямаршые жэмэс олдобогүй.

Тиимэһээ Иисус тэрэ модондо хандажа: «Энээнһээ хойшо шамһаа ямаршые жэмэс гарахагүй», – гэжэ хэлээ. Тэрэ дороо модон хаташаба.

²⁰Энээниие шабинарынь хараад, «Боди модон хайшан гээд иимэ амархан хаташаба гээшэб?» – гэжэ гайхалсаба.

²¹Иисус: «Хэрбээ таанар ямаршые һэжэггүй, бүрин этигэл хүзэгтэй байбал, минии энэ боди модонтой хэһэнтэй адли юумэ, мүн бүришые ехэ юумэ бүтээхэ аргатай байхат гэжэ таанадта баталан хэлэнэб. Энэ уулада хандан: „Эндэһээ хүдэлөөд, далай руу хүрэ“ гээ һаатнай, тиимэ юумэн болохо.

²²Зальбаржа байхадаа этигэл хүзэгтэй байбал, ямаршые эриһэн юумэнтнай танда үгтэхэ», – гэжэ шабинартаа хэлээ бэлэй.

Иисусай эрхэ засаг тухай асуудал

²³Бурхан хүмэдэ Иисусай дахин ерээд хургажа байхадань, түрүү санаартан, улад зоной ахамдууд тэрээндэ ойртожо: «Ши иимэ юумэ хэхэ ямар эрхэтэйбши? Иимэ эрхэ засаг шамда хэн үгөөб?» – гэжэ асууба.

²⁴Иисус: «Бишые таанадһаа нэгэ юумэ һурахамни. Хэрбээ намда харюу үгэбэлтнай, бишые иимэ юумэ хэхэ ямар эрхэтэй байһанаа таанарта хэлэхэб.

²⁵Уһаар арюудхаха эрхэ Иоаннда Бурхан үгөө юм гү, али хүнүүд гү?» – гэжэ урдаһаань һураба. Түрүү санаартан, ахамдууд өөһэд хоорондоо зүбшэлдэн: «Хэрбээ Бурханһаа тиимэ эрхэ үгтөө гэбэлнай, тиигэбэл яахадаа Иоаннда этигэдэггүй байгааба гэхэл.

²⁶Хэрбээ хүнүүд үгөө гээ һаамнай, зон маниие яахаб бү мэдэе, аймшагтай юумэ болохо», – гэлдэбэ, юундэб гэбэл, хүн зон бултадаа Иоанне лүндэншэн гэжэ тоолодог байгаа.

²⁷Тиимэһээ тэдэнэр Иисуста: «Бидэ мэдэнэгүйбди», – гэжэ харюусаа һэн. Тиихэдэнь Иисус: «Эдэ юумэнүүдые хэхэ эрхэ намда хэнэй үгэһые би баһа хэлэхэгүйб!» – гэжэ тэдэндэ хэлээ һэн.

Хоёр хүбүүд тухай хургаалта үгэ

28«Би таанадта хоёр хүбүүдтэй байһан нэгэ хүн тухай хургаалта үгэ хөөрэхүүб. һүүлдэнь таанад һанал бодолоороо хубаалдаарайт. Эсэгэнь ехэ хүбүүндээ ойртожо: „Хүбүүн аа! Мүнөөдэр үзэмэй сэсэрлигтэ ошожо ажаллыш даа“, – гэбэ.

29Тээд тэрэ хүбүүниинь: „Ажаллаха дурагүй байнаб“, – гэжэ харюусаба. Зүгөөр хожомынь буруу байһанаа ойлгоод, ажаллахаяа ошобо.

30Тиигээд үнөөхи хүн бага хүбүүндээ ойртожо, баһал үзэмэй сэсэрлигтэ ошожо ажаллахыень хэлэбэ. Тэрэнь: „Эзэн, би ошохоб“, – гэхэн аад, ошобогүй.

31Эдэ хоёр хүбүүдэй алиниинь эсэгынгээ хүсэхэниие дүүргээб?» – гэжэ Иисусай һурахадань, тэрээндэ: «Ехэ хүбүүниинь», – гэжэ харюусаба. Тиихэдэнь Иисус тэдэндэ хэлэбэ: «Алба татаашад, мүн янхан эмэнүүд таанарай түрүүндэ Бурханай хаан орондо орохо гэжэ үнэниие хэлэнэб.

32Ушарынь хэлэбэл, Иоанн танда Бурханай зүб зам заажа үгөө, тээд таанар тэрээндэ этигээгүйт, харин алба татаашад, янхан эмэнүүд тэрээндэ этигээ. Тиин таанар энэниие хараадшые, удаань гэмшэжэ Иоаннда этигээгүйт».

Үзэмэй сэсэрлиг хүлһөөр абаһан хүнүүд тухай

33«Үшөө иимэ нэгэ хургаалта үгэ шагнагты», – гэжэ Иисус түрүү санаартанда, ахамадуудта хэлэбэ. «Гэрэй нэгэ эзэн үзэмэй сэсэрлиг таряад, тойруулжа хүрээлбэ, тиигээд сэсэрлиг соогоо үзэмэй шүүһе шахажа байхаар нүхэ малтаба, харуулай үндэр башни бариба, тиигээд тэрэнээ үзэмшэдтэ хүлһэлөөд, аянда мордобо.

34Жэмэс түүхэ сагай болоходо сэсэрлигэй эзэн үрэ жэмэсэй ургасаһаа минии хубиие абажа ерэгты гэжэ үзэмшэдтэ барлагуудаа эльгээбэ.

35Тиихэдэнь үзэмшэд эзэнэй барлагуудые бариһан бэээрээ нэгыень зада сохибо, нүгөөдыень алаба, үшөө нэгыень шулуугаар үхэтэрынь шэдэбэ.



³⁶Эзэн түрүүшынхийнээ олон барлагуудыг дахин эльгээбэ; тэдэнтэйн үзэмшэд мүн урдынхидаал адли юумэ үйлэдөө бэлэй.

³⁷Һүүлэй һүүлдэ эзэн хүбүүемни тэдэ хүндэлхэ аабза гэжэ һанан, өөрынгөө хүбүүе үзэмшэдтэ эльгээбэ ха.

³⁸Теэд үзэмшэд хүбүүень хараад, өөһэд хоорондоо: „Энэ хүбүүн эсэгынгээ эд зөөри залгамжалха. Энэниие алая, тиигэбэл бүхы зөөринь манай болохо“, – гэлдэбэ.

³⁹Тиигээд тэрэ хүбүүень барижа, үзэмэй сэсэрлигһээ гаргаад, алажархёо бэлэй.

⁴⁰Зай, тиихэлээрээ үзэмэй сэсэрлигэй эзэн ерээд, тэдэ үзэмшэдыг яаха болоноб?» – гэжэ Иисус һураба.

⁴¹«Харатай тэдэ үзэмшэдыг эзэн зобоожо алаха, тиигээд үзэм жэмэсэй ургасаһаа эзэнэй хубиинь саг соонь түүжэ эзэндэнь асардаг ондоо үзэмшэдтэ сэсэрлигээ хүлһэлэн даалгаха», – гэжэ Иисуста харюусаба.

⁴²Иисус тэдэндэ хэлэбэ: «„Хэрэггүй гэжэ барилгашадай голожо хаяһан шулуунинь гэрэй гол шухала тулга шулуунинь болоо: энэниие Дээдын Эзэн бүтээгээ, тиин манда ехэл үзэсхэлэнтэ гоёор харагдана“, – гэжэ Нангин Бэшэгтэ хэлэгдэһые таанар хэзээшье уншаагүй аалта?

⁴³Тиимэһээ танда хэлэхэ байнаб, Бурханай хаан түрэ таанарһаа абтаад, тэрэнэй эрхэ хүсэл дүүргэдэг зондо үгтэхэ.

⁴⁴Тэрэ шулуу мүргэжэ унаһан хүн хаха бута унаха; тэрэ шулуун хүнэй дээрэ унаа һаа, тэрэниие низа дараха».

⁴⁵Түрүү санаартад, фарисейнүүд Иисусай хөөрөһэн һургаалта үгэнүүдыг дуулахадаа, өөһэд тухайн хэлэжэ байна гэжэ ойлгобо.

⁴⁶Тиимэһээ Иисусыг барижа хэһээхээ хүсэбэ, теэд улад зонһоо айба, юундэб гэбэл, зон тэрэниие лүндэншэ гэжэ тоолодог байгаа.

Матвей 22

Түрэ найр тухай һургаалта үгэ



- ¹Иисус хүнүүдтэ баһа һургаалта үгэнүүдээр иигэжэ хэлэбэ:
- ²«Огторгойн хаан түрэ болбол нэгэ хаанай хүбүүндээ түрэ хуримай найр хэһэнтэй адлишуу юм.
- ³Хаан зарасанараа эльгээжэ, урилгатай айлшадаа түрэ хуримай найрта хүрэжэ ерэхыень дуудаба, теэд тэдэнь ерэхэ дурагүй байба.
- ⁴„Найрай хоол мүнөө бэлэн болоо; шахамалнууд гаргаатай, бүхы юумэн түхээрээтэй байна; түрэдэ хүрэжэ ерэгты“, – гэһэн мэдээсэлтэйгээр хаан дахин ондоо зарасанараа урилгатай айлшадта эльгээбэ.
- ⁵Теэд урилгатай хүнүүдынъ ямаршые анхарал хандуулбагүй: зариманиинъ өөһэдынгөө таряаланда гараба, нүгөөдүүлынъ наймаа хэхээе ошобо,
- ⁶бусадынъ хаанай зарасанарые барижа сохибо, тиигээд алаба.
- ⁷Хаан энээн тухай дуулахадаа уурлаад, сэрэгээ эльгээжэ, тэдэ алууршадые хюдаба, хото шэбээнүүдынъ шатаажа усадхаба.
- ⁸Тиигээд хаан зарасанартаа: „Түрэ найр хэхэдэ бүхы юумэн бэлэн болоо, теэд урилгатай байһан айлшад иигэжэ хүндэлхээр бэшэ байшаба.
- ⁹Тиимэхээ харгын бэлшэртэ гараад, дайралдаһан хүн бүхэниие түрэ найрта уригты“, – гэбэ.
- ¹⁰Тиин зарасанар гудамжануудта гаража, дайралдаһан муушые, һайншые һанаатай зониие бултыень суглуулба; тиигээд түрэ найр боложо байһан гэр айлшадаар дүүрэшэбэ.
- ¹¹Хаан айлшадые харахаяа гэртэ ороходоо, тэндэ хуримай дэгэл үмдөөгүй нэгэ хүниие хараад,
- ¹²тэрээндэ хандажа: „Нүхэр! Ши хуримай дэгэлгүйгөөр иишээ хайшан гээд орообши?“ – гэжэ һураба. Теэд нүгөө хүниинъ юушые дуугарбагүй.



¹³Хаан зарасанартаа: „Энээнэй гар хүлыень хүлеэд, газашань харанхыда абаашажа хаягты: тэндэ хүнүүд бархиралдаха, шүдөө хабиралдаха“, – гэжэ хэлэбэ.

¹⁴Уряалаар ерээшэд олоншые наа, шэлэгдэн абтаашад үсөөн юм», – гэжэ Иисус хөөрөөгөө түгэсхэбэ.

Хаанай юумэ хаанда, Бурханай юумэ Бурханда үгэгты

¹⁵Тиихэдэнь фарисейнүүд суглараад, тэрэниие үгэ алдуулжа гэмнэхэ тухай өөһэд хоорондоо хэлсэбэ.

¹⁶Фарисейнүүд өөрынгөө шабинарые Иродэй талынхидтай хамта Иисуста эльгээжэ: «Багша аа! Ши үнэн сэхые хэлэдэгши, Бурханай бодото замаар ябахые хургадагши, хэнэйшые урда билдагуушалдаггүйш, юуб гэбэл, нюур харадаггүйш гэжэ бидэ мэдэнэбди.

¹⁷Тиимэхээ юун гэжэ ханажа байханаа манда хэлэжэ үгыш: Римэй хаанда алба татабари түлэхэмнай зүб гү, али буруу гү?» – гэжэ нуруулба.

¹⁸Тиихэдэнь Иисус тэдэнэй муу мэхые мэдэжэ байгаад: «Хоёр нюуртан! Таанар юундэ намайе туршанабта?

¹⁹Алба татабари түлэхэдэ хэрэглэдэг нэгэ мүнгэ намда асаржа харуулагтыл даа», – гэхэдэнь, нүгөөдүүлэнь нэгэ динари мүнгэ асаржа үгэбэ.

²⁰Тиихэдэнь Иисус: «Эндэ хэнэй дүрсэ зураатай, хэнэй нэрэ бэшээтэй байнаб?» – гэжэ нураба.

²¹«Хаанай», – гэжэ нүгөөдүүлэйн харюусахада, Иисус: «Тиимэхээ хаанай юумые хаандань, Бурханай юумые Бурханда үгэгты», – гэжэ тэдэндэ хэлэбэ.

²²Иимэ харюу дуулахадаа, үнөөхи зон ехээр гайхалдажа, Иисусые орхёод саашалба.

Амидыралга тухай асуудал

²³Хүнүүд үхөөд амидырдаггүй гэжэ тоолодог саддукейнүүдэй зариманиинь тэрэл үдэр Иисуста ерээд, иигэжэ асууба:

²⁴«Багша аа! Хэрбээ һамга абаһан хүн үхибүүдгүйгөөр наһа барабал, тэрэнэй дүүнь бэлбэһэн эхэнэртэйнь һууха ёһотой, тиигээд тэдэнһээ гараһан үхибүүн нүгшэһэн ахынь үхибүүн гэжэ тоологдохо зэргэтэй гэжэ Моисей манда захяа һэн.

²⁵Зай, долоон аха дүүнэр эндэ ажаһуугаа гэе. Тэдэнэй ахань һамга абаад, үхибүүдтэй болонгүйгөөр наһа бараа гэхэ, тиин бэлбэһэн эхэнэрынь дүүдэнь үлэбэ гэхэ;

²⁶ахадаал тон адляар, хоёрдохишье, гурбадахишье саашалан долоодохишье дүүнь үхибүүтэй болонгүй наһанһаа нүгшөө бололтой.

²⁷Һүүлэй һүүлдэ тэдэнэй һамганииньшье наһа бараба.

²⁸Теэд Бурханай үхэһэн хүнүүдые амидыруулхада тэрэ эхэнэр долоон аха дүүнэрэй алинайнь һамган байхаб? Тэдэ долоон аха дүүнэр булта тэрэ эхэнэрые һамга абаа ха юм».

²⁹Иисус тэдээндэ хэлэбэ: «Таанад Нангин Бэшэгэй юун гэжэ һургадагые, Бурханай һүр хүсые мэдэдэггүй туладаа эндүүржэ байнат.

³⁰Үхэһэн хүнүүдые Бурханай амидыруулхада, тэдэ огторгойдо оршодог Бурханай Эльгээмэлнүүдтэл адли байха, тиимэһээ һамгашье абахагүй, хадамдашье гарахагүй.

³¹⁻³²Теэд үхөөшэдэй амидырха тухай Бурханай таанарта: „Би Абраһамай Бурхан, Исаагай Бурхан, Яковай Бурханби“, – гэжэ хэлэһые уншаагүй аалта? Бурхан болбол үхэһэн хүнүүдэй бэшэ, харин амиды хүнүүдэй Бурхан юм».

³³Иисусай һургаалнуудые шагнажа байһан улад зон тэрээндэнь ехэл гайхалдажа байгаа.

Эгээн шухала захяа заабари

³⁴Иисус саддукейнэрые абя аниргүй болгожорхёо гэжэ фарисейнэр дуулаад, сугларба.

³⁵Тэдэнэй дундаһаа нэгэ Хуули заадаг багша Иисусые туршажа:

³⁶«Багша аа! Хуули тогтоолой ямар захяа заабаринь эгээн шухала бэ?» – гэжэ һураба.

³⁷Иисус тэрэндэ: «Ши бүхы зүрхэ сэдхэлээрээ, бүхы хүнэнэ хүлдөөрөө, бүхы ухаан бодолоороо Эзэн Бурхандаа дуратай бай», – гэжэ харюусаба.

³⁸«Энэ болбол нэгэдэхи, эгээн шухала захяа заабари мүн.

³⁹„Бусад зондо өөртөөл адли дуратай бай“ гэнэн хоёрдохи шухала захяа заабари түрүүшынхидээ адлишуу юм.

⁴⁰Моисейн Хуулиин бүхы зүйлнүүд, лүндэншэдэй номууд эдэ хоёр захяа заабари соо тобшологдон баталагдадаг юм».

Давидай үри һадаһан тухай асуудал

⁴¹Зарим фарисейнүүдэй суглархадань, Иисус тэдэнһээ:

⁴²«Бурханай табисуурта тухай таанар юун гэжэ һананат? Тэрэ хэнэй удам байхаб?» – гэжэ һураба. Тэдэнь: «Давид хаанай үри һадаһан байха», – гэжэ харюусаба.

⁴³Иисус тэдэндэ: «Тиигэбэл, юундэ Давид хаан Нангин хүлдын нүлөөдэ абтан Бурханай табисууртые Дээдын Эзэн гэжэ нэрлээб:

⁴⁴„Бузар дайсадыешни хүлдэш мүргүүлтэрни баруун таладамни һуугаарай гэжэ Дээдын Эзэн минии Эзэндэ хэлээ“ гээ юм.

⁴⁵Хэрбээ Давид Бурханай табисууртые Эзэмни гэжэ нэрлэбэл, юундэ Бурханай табисуурта тэрэнэй үри болохоб?»

⁴⁶Тиихэдэнь хэншые Иисуста харюу үгэжэ шадахагүй байба. Тэрэ үдэрһөө хойшо тэрээнһээ юумэ һурахаяа хэншые зүрхэлбэгүй.

Матвей 23



Иисус Хуули заадаг багшанарые, фарисейнүүдые зэмэлнэ

- ¹Иисус улад зондо, өөрынгөө шабинарта
- ²иигэжэ хэлэбэ: «Хуули заадаг багшанар, фарисейнүүд Моисейн Хуули тайлбарилжа байдаг.
- ³Тиимэхээ таанад хургаһан бүхы юумэнүүдыень дүүргэжэ, хэ гэхыень хэжэ байгты; харин тэдэнэй хэһэн юумэ бү хээрэйгты, юуб гэхэдэ, тэдэнэр хэлэһэн номноһоноо хэрэг дээрэ бүтээдэггүй юм.
- ⁴Тэдэнэр даагдашагүй, хүндэ хүшэр ашаануудые хүнүүдэй мүрэ дээрэ хүлижэ табяад, харин тэрэ ашаае абаашахада гансашье хургаараа хүдэлгэжэ туһалдаггүй юм.
- ⁵Зүгөөр юумэ хэжэ байһан хэбэр хүнүүдтэ үзүүлхэ гэжэ бүхы шадалаараа оролдодог. Нангин Бэшэг сооһоо мүрнүүдые бүд дээрэ олоор бэшээд, духаяа боодог, гартаа уядаг, Бурханда зорюулаатай байһыень харуулһан дэгэлдэнь оёотой сасагуудынь бусад зонойхиһоо ута унжагар байдаг, Нангин Бэшэг сооһоо буулгажа абтаһан мүрнүүдые хадагалжа ябадаг арһан туламуудынь ехэл томо байдаг.
- ⁶Мүн түрэ найрта эгээн хүндэтэй һуури эзэлхэ, мүргэлэй гэр соо урдуур һууха дуратай байдаг.
- ⁷Баһа тэдэнэр олон зоной дунда мэндэшэлүүлхэ, „Рабби! Рабби!“ гэжэ нэрлүүлхэ дуратай.
- ⁸Теэд таанарай хэншые багша гэжэ өөрыгөө нэрлүүлхэ ёһогүй, юундэб гэбэл, таанар ори ганса багшатайт, тиин таанад бултадаа аха дүүнэр гээшэт.
- ⁹Баһа газар дэлхэй дээрэ хэниешье эсэгэ гэжэ бү нэрлэгты, юундэб гэхэдэ, таанар огторгойдо оршодог ори ганса Эсэгэтэйт.
- ¹⁰Баһа „хургагша“ гэжэ өөһэдыгөө бү нэрлэгты, юундэб гэбэл, гансал Бурханай табисуурта Христос танай хургагша юм.
- ¹¹Танай дунда агууехэтнай бусадайнгаа зараса болохо ёһотой.

¹²Бэеэ дээгүүр абаһан хүн дарагдаха; харин өөрыгөө дараһан хүн үргэгдэхэ.

¹³Хуули заадаг багшанар, фарисейнүүд, таанад гашуудал зоболон үзэхэт! Хоёр нюурта таанад! Огторгойн хаан ороние хүнүүдһээ хаажа, өөһдөөшье тэндэ ороногүйт, орохо дуратайшуулыешье тишэнь табинагүйт.

¹⁴Хуули заадаг багшанар, фарисейнүүд, таанад гашуудал зоболон үзэхэт! Хоёр нюурта таанад! Бэлбэһэн эхэнэрнүүдэй гэр хооһолдогта, хүнэй харахада ехэ удаан мүргөөшэ болодогта. Энээнэйнгээ түлөө аймшагтайгаар хэһээлгэхэт.

¹⁵Хуули заадаг багшанар, фарисейнүүд, таанад гашуудал зоболон үзэхэт! Хоёр нюурта таанад! Нэгэшье хүниие өөрын шаби болгохын тула уһан далайешье, орон нютагуудыешье тойрон гаталдагта; тиигээд тиимэ шаби олоод, тэрэниие өөрһөөн долоон доро тамада орохо амитан болгодогта.

¹⁶Һохор балай хүтэлэгшэд, таанад гашуудал зоболон үзэхэт! Таанад: „Хэрбээ али нэгэн хүн Бурхан хүмөөр тангариглаа хаа, тангаригынь хүсэнгүй; харин Бурхан хүмэдэ байһан алтаар тангариглаа хаа, тангаригынь хүсэн түгэлдэр“, – гэжэ һурганат.

¹⁷Ай, һохор тэнэгүүд! Алиниинь шухал бэ: алтань гү, али алта арюудхагша Бурхан хүмэнь гү?

¹⁸Мүн таанад: „Хэрбээ али нэгэн хүнэй үргэлэй шэрээгээр тангариглаа хаа, тангаригынь хүсэнгүй, харин тэрэ шэрээ дээрэ табиһан үргэлөөр тангариглаа хаа, тангаригынь хүсэн түгэлдэр“, – гэжэ һурганат.

¹⁹Ай, һохор тэнэгүүд! Алиниинь шухалаб: үргэлынь гү, али үргэл арюудхагша шэрээн гү?

²⁰Тиимэһээ үргэлэй шэрээгээр тангариглагша болбол тэрэ шэрээгээр, мүн тэрээн дээрэ байһан бүхы юумээр тангариглана гээшэ.

²¹Баһа Бурхан хүмөөр тангариглагша болбол тэрээгээр, мүн доторнь оршогшо Бурханаар тангариглана гэшэ.

²²Баһа огторгойгоор тангариглагша болбол Бурханай шэрээгээр, тэрэ шэрээдэ һуугшаар тангариглана гэшэ.

²³Хуули заадаг багшанар, фарисейнүүд, таанад гашуудал үзэхэт! Хоёр нюуртан! Таанар Бурханда ургасынгаа – халуун үбһэ, укроп, тмин гэхэ мэтын ургамалнуудай – арбанай нэгэн хуби үгэнэт, харин Хуулийн эгээл шухала зүйлнүүд болохо зарга шүүбэри, үршөөл хайра, этигэл найдабари тоонгүй орхибот. Эдэ зүйлнүүдые таанад баримталха ёһотой байгаат, мүн арбанайнгаа нэгэ хубиие Бурхандаа үгэжэл байха ёһотойт.

²⁴Һохор балай хүтэлэгшэд, таанар унданһаа боргооһо шүүжэ гаргаад, харин тэмээ залгидагта!

²⁵Хуули заадаг багшанар, фарисейнүүд, таанад гашуудал үзэхэт! Хоёр нюуртан! Таанар аяга табагай газаахиинь аршажа арилгадагта, харин тэдэнэй досоонь хулгай, шуналаар олоһон юумэнүүд байдаг.

²⁶Һохор балай фарисей! Түрүүшээр аяга табагай досоохиинь сэбэрлэ, тиигээ һаашни газаахииньше сэбэрлэгдэхэ.

²⁷Хуули заадаг багшанар, фарисейнүүд, таанад гашуудал үзэхэт! Хоёр нюуртан! Таанар сагаан будагаар шэрдэһэн агы нүхэн хуурсагуудта адлит: газгаа талаһаа гоё һайханаар харагдаашье һаа, досоогоо үхэхэн хүнэй яһануудаар, элдэб бузарнуудаар дүүрэшэһэн байдаг.

²⁸Тэрээндэл адли таанаршые газгаа талаһаа үнэн сэхэ хүнүүд мэтэ харагдаашье һаа, досоотнай гансал билдагуушалга, харатай юумэнүүд дүүрэн бии.

²⁹Хуули заадаг багшанар, фарисейнүүд, таанад гашуудал үзэхэт! Хоёр нюурта таанад! Лүндэншэдтэ үзэхэлэнтэ гоё субаргануудые баринат, үнэн зүбтэнэй шулуун хүшөөнүүдые шэмэглэнэт.

³⁰Тиихэдээ: „Хэрбээ бидэ үбгэ эсэгэнэрэйнгээ ажамидарха үе сагта ажаһуубал, лүндэншэдэй шуһа адхалсахагүй һәмди“, – гэжэ айладханат.

³¹Тиихэдээ таанар лүндэншэдые алагшадай үри хүүгэдынь байһанаа баталан гэршэлнэт.

³²Зай, тиигэбэл үбгэ эсэгэнэрэйнгээ эхилһэн юумэ түгэсхэгты.

³³Могойнууд, хорото могойн таһардахад! Таанар тамада хаягдаха хэһээлтэһээ яжа хулжархые бодонобта?

³⁴Мүнөө би таанарта лүндэншэдые, сэсэн мэргэшүүлые, Хуули заадаг багшанарые эльгээхэмни. Харин таанар тэдэнэймни заримыень алахат, хэрээһэндэ хадажа саазалхат, нүгөөдүүлыень мүргэлэй гэрнүүдтэ сохихот, нэгэ хотоһоо нүгөөдэ хото руу мүрдэн намнахат.

³⁵Тиимэһээ газар дээрэ адхарһан зэмэгүй хүнүүдэй шуһан – зэмэгүй Авелиин шуһанһаа эхилээд, Бурхан һүмэ тахилай шэрээ хоёрой хоорондо таанарта алуулһан Варахиинай Захария хүбүүнэй шуһан хүрэтэрөө – таанарһаа нэхэгдэхэ.

³⁶Эдэ бүхы алагдаһан хүнүүдэй түлөө хэһээлтэ энэ үе сагай хүнүүд дээрэ бууха гэжэ таанарта үнэниие хэлэнэб».

Иисус Иерусалимые хайрлана

³⁷«Ай Иерусалим, Иерусалим, шинии хүнүүд лүндэншэдые аладаг, шамда эльгээһэн Бурханай мэдээсэгшэдые шулуудадаг! Даража дэгжээһэн дальбараануудаа дали дороо суглуулдаг шубуундал адляар шинии үри хүүгэдые суглуулха гэжэ би хэды тэгүүлээ зүдхөө гээшэбиб. Теэд ши намайе зүбшөөгөөгүйш!

³⁸Тиимэһээ хоһон һүмэшни мүнөө шамдаа үлөө.

³⁹„Дээдын Эзэнэй нэрээр заларан Ерэгшэ үршөөл буянтай!“ – гэжэ хэлэтэрээ намайе дахин харахагүйш гэжэ шамда хэлэнэб».

Матвей 24



Иисус Бурхан хүмын хандарха тухай хэлэнэ

¹Иисус Бурхан хүмэһөө гараад ябаба. Тиихэ үедэ шабинанынь тэрэнэй анхарал Бурхан хүмын барилгануудта хандуулха зорилготойгоор хажуудань ерэбэ.

²Иисус шабинартаа: «Эдэ бүгэдые харана гүт? Энэ нууринда ганса шулууншые үлэхэгүй; баран хандаргагдаха гэжэ танда хэлэнэб», – гэжэ хэлэбэ.

Тудаха бэрхэшээл зоболонгууд тухай нэргылэмжэ

³Хожомынь Иисусай Элеон хада дээрэ гараад нуухадань, шабинанынь тэрээндэ ерээд: «Эдэ бүхы юумэн хэзээ болохоб, хэлэжэ үгыш. Шинии заларжа ерэхэдэ, газар дэлхэйн хосорходо ямар дүлгэ тэмдэгүүд харуулагдахаб?» – гэжэ асууба.

⁴Иисус тэдэндэ харюусаба: «Хэн нэгэнэй мэхэдэ орохоһоо болгоомжолжо байгты.

⁵Юуб гэхэдэ, олон хүнүүд минии нэрые зүүжэ ерэхэ: „Би Бурханай табисууртаб“, – гэжэ өөһэд тухайгаа гэршэлхэ, тиигэжэ олонииетнай мэхэдээ оруулха.

⁶Мүн байлдаанууд тухай, дайн сэрэг тухай нураг дуулахат, теэд бү айгаарайгты. Тиимэрхүү юумэнүүд болохо ёһотой. Зүгөөр энэнь үшөөл эсэс бэшэ байха.

⁷Нэгэ арад нүгөө арадтаа добтолон орохо, хаан оронууд хоорондоо хёморолдон тэмсэхэ, эндэ тэндэ үлэсхэлэн зоболон, үхэл тахал дэлгэрхэ, газар ехээр хүдэлхэ.

⁸Зүгөөр эдэ бүхэн бэрхэшээл зоболонгуудай эхиинь лэ табиха.

⁹Тэрэ үедэ таанарые барижа хааха, тамалха, алаха байха. Минии түлөө таанарые бүхы арадууд үзэн ядаха.

¹⁰Тиихэдэ олониинь этигэл хүзэгһөө арсаха, бэе бээдээ урбаха, бэе бээ үзэн ядаха.



¹¹Баһа олон хуурмаг лүндэншэд бии болохо, олон уладай толгой эрьюулэн мэхэдээ оруулха.

¹²Тиигэжэ нүгэл шэбэлэй элбэгжэн дэлгэрхэдэ, олон зоной хайра дуран хүйтэрхэ.

¹³Зүгөөр эсэстэнь хүрэтэр тэсэжэ гараһаниинь абарагдаха.

¹⁴Бурханай хаан түрэ тухай һайн мэдээсэлэй бүхы газар дэлхэйгээр, бүхы арадуудта гэршэлэгдэн номногдоһон хойно эсэс болохо.

Нангин газарта аймшагтай юумэнүүдэй болохо тухай

¹⁵Даниил лүндэншын хэлэһэнэй ёһоор, нэгэтэ нангин газарта хоһоролго һүйдхэлдэ хүргэдэг „жэрхэштэй юумэнэй“ байхые үзэхэт. Эдэ мүннүүдые уншажа байһан хүн бүхэн ушар удхыень ойлгохыень хэшээг лэ.

¹⁶Тиихэдэ Иудейдэ байһан хүнүүд хада гүбээ рүү тэрьедээрэйгты.

¹⁷Гэрэй орой дээрэ байһан зон гэрһээн юумэ абахаяа доошоо бү буугаарайт.

¹⁸Хээрэ талада ябаһан зон хубсаһа хунараа абахаяа гэртээ бү бусаарайт.

¹⁹Тэдэ үдэрнүүдтэ хээлитэй, хүхөөр үхибүүдтэй эхэнэрнүүдтэ ехэл гай зоболон тудаха.

²⁰Таанарай зугадаха саг үбэлэй хүйтэндэ гү, али субботын үдэртэ бү тудай гэжэ Бурхандаа зальбарагты.

²¹Юундэб гэхэдэ, тэрэ үдэрнүүдтэ газар дэлхэйн бүтээгдэхэһээ нааша мүнөөнэй үе саг болотор үзэгдөөгүй, дахинаашье үзэгдэхгүй аймшагтай гай зоболон болохо.

²²Хэрбээ тэдэ зоболонто үдэрнүүдэй тоо Бурханай үсөөрүүлээгүй һаа, хэншье абарагдахагүй һэн. Зүгөөр шэлэжэ абаһан хүнүүдэйнгээ аша туһада Бурхан тэдэ үдэрнүүдэй тоо үсөөрүүлхэ юм.

²³Хэрбээ тэрэ сагта: „Бурханай табисуурта Христос эндэ байна“, али „тэндэ байна“ гэжэ таанарта хэн нэгэнэй хэлээ һаа, бү этигээрэйгты.



²⁴Өөһэдыгөө Бурханай табисуурта гү, али лүндэншэн гэжэ нэрлэһэн олон мэхэшэд бии болохо. Тэдэ аргатайл хаа, Бурханай шэлэжэ абаһан хүнүүдыешье өөрынгөө мэхэдэ оруулхын тула элдэб янзын гайхамшагта тэмдэгүүдые, эди шэди харуулха.

²⁵Болохо бүхы юумые би таанадта эртэнһээ һэргылжэ хэлэбэб.

²⁶Хэрбээ танда: „Харыт, тэрэ сүл губида байна“ гэжэ хүнүүдэй хэлэбэл, тиишэ бү ошооройт; үгы хаа, „Харыт, тэрэ эндэ хоргодоно“ гээ хаань, бү этигээрэйт.

²⁷Хүн түрэлхитэнэй Хүбүүн ерэхэдээ, зүүн зүгһөө баруун хизаар хүрэтэр ялагас гэһэн сахилгаан шэнгээр гэрэлтэн үзэгдэхэ бшуу.

²⁸Үхэһэн бэеын хэбтэһэн газарта бүргэд шубууд сугларха.

Хүн түрэлхитэнэй Хүбүүнэй заларан ерэхэ тухай

²⁹Тиигээд зоболонто тэдэ үдэрнүүдэй үнгэрһэн хойно гэнтэ наран балартаха, һарашье гэрэлтэхээ болихо, одо мүшэдшье тэнгэриһээ унаха, тэнгэрийн хүсэнүүдшье тэнсүүриэ алдаха.

³⁰Тиихэдэ тэнгэридэ Хүн түрэлхитэнэй Хүбүүнэй бэлгэ тэмдэг үзэгдэхэ. Тэрэ сагта газар дэлхэйн бүхы угсаатан Хүн түрэлхитэнэй Хүбүүнэй тэнгэрийн үүлэн дээрэ тамаран, агуу хүсэтэйгөөр, алдар солотойгоор буужа ерэхые харахадаа бархиралдаха.

³¹Шанга дуутай бүрээгэй дуугархада, тэрэ өөрынгөө Эльгээмэлнүүдые замби түбиин дүрбэн хизаарта эльгээхэ, тэдэнь тэрэнэй шэлэжэ абаһан хүнүүдые огторгойн нэгэ захаһаа нүгөө заха хүрэтэр суглуулха.

Боди модонһоо юумэ һуража абаха тухай

³²Боди модонһоо жэшээ абагты: тэрэнэй халаа мүшэрнүүдэй зөөлэрөөд, набша намаагайнь һалбархада, зун ойртобо гэжэ мэдэдэгта.

³³Тон тиигэжэл минии түрүүн хэлэһэн юумэнүүдэй болохые үзэхэдөө, саг дүхэжэ байна, бүри ойртоо гэжэ мэдэхэт.

³⁴Мүнөө ажамидаржа байһан хүнүүдэй бултанайнь үхэжэ үрдегүй байхада минии таанадта хэлэһэн бүхэн тохёолдохо гэжэ таанадта баталан хэлэнэб.

³⁵Огторгой тэнгэри, газар дэлхэйсье хүнэн халаха, харин минии хэлэһэн үгэнүүд мүнхэ оршохо.

Ямар үдэр, хэды сагта ерэхые хэнсье мэдэхгүй

³⁶Тэрэ Үдэрэй, тэрэ сагай болзор хэнсье мэдэхгүй, тэнгэридэ оршодог Бурханай Эльгээмэлнүүдсье мэдэхгүй, Хүбүүн өөрөөсье мэдэхгүй. Гансал Эсэгэ Бурхан тэрэниие мэдэхэ юм.

³⁷Хүн түрэлхитэнэй Хүбүүнэй заларжа ерэхэдэ Ной гэгшын үедэ болоһонтой адли гай гасалан ушарха.

³⁸Уһан галабай эрьехын урда тээхи үдэрнүүдтэ Нойн томо корабльда орожо һууха үдэр хүрэтэр хүнүүд эдеэлжэ, уужа, һамга абажа, хадамда гаража байгаа.

³⁹Уһан галабай эрьежэ, бултыень шэнгээжэ хосороотор хүнүүд юунэй боложо байһые огто мэдээгүй. Эгээл тиимэ юумэн Хүн түрэлхитэнэй Хүбүүнэй ерэхэдэ болохо.

⁴⁰Тэрэ сагта таряалан дээрэ ажаллажа байһан хоёр хүнэй нэгыень абарха, нүгөөдыень орхихо.

⁴¹Сугтаа таряа тээрмэдэжэ байһан хоёр эхэнэрэй нэгыень абарха, нүгөөдыень орхихо.

⁴²Тиимэхээ һэргэлэн байгты, Дээдын Эзэнэйгээ али сагта заларжа ерэхые таанар мэдэнэгүй ха юмта.

⁴³Хэрбээ гэрэй эзэн хулгайшанай хэдыдэ орожо ерэхые мэдэжэ байбал, һэргэлэн байжа, хулгайшаниие гэртээ шургуулан оруулхагүй һэн бээ гэжэ таанар һайн мэдэнэт.

⁴⁴Тиимэхээ таанарсье ходо бэлэн байгты, юундэб гэбэл, Хүн түрэлхитэнэй Хүбүүн хүлээгээгүй сагатнай хүрэжэ ерэхэ юм.

Найдабаритай ба найдабаригүй зарасанар тухай



⁴⁵Тиигэхэдээ этигэл найдабаритай, ухаантай зарасань хэн бэ? Бусад зарасанараа даалгажа, эдээ хоолынь сагтань үгэжэ байхаар гэрэй эзэн хэниие томилхо гээшэб?

⁴⁶Эзэнэйнгээ бусажа ерэхэдэ, үүргэээ найнаар дүүргэжэ байһан зараса аза жаргалтай даа!

⁴⁷Тиимэ зарасаа эзэн гэр буусынгаа эрхилэгшээр табиха гэжэ танда баталан хэлэхэ байнаб.

⁴⁸Хэрбээ муу зараса дайралдабал: „Эзэмни наяар ерэхэгүй“, – гэжэ бодоод,

⁴⁹өөрынгөө зараса нүхэдые сохижо наншажа, архиншадаар хамта эдижэ, уужа байгаа хаа,

⁵⁰тэрэ зарасын хүлээгээгүй үдэртэ, ханаагүй сагта эзэниинь орожо ерэхэ.

⁵¹Тиигээд эзэн тэрэ зарасаяа зада сохёод, билдагуушадые хэхээдэг хэхээлтэдэ оруулха: тэндэнь хүнүүд бархиралдаха, шүдөө хабиралдаха».

Матвей 25

Арбан басагад тухай нургаалта үгэ

¹«Тэрэ үедэ Огторгойн хаан түрэ иимэ ушартай адлишуу байха: Нэгэтэ арбан басагад өөһэд өөһэдынгөө зула баряад, хүрьгэн хүбүүе угтахаяа газашаа гараба гэхэ.

²Тэдэнэй табаниинь сэсэн, табаниинь бодомжогүй тэнэг байгаа һэн гэлэй.

³Бодомжогүй басагадынь зулаяа абаад, тоһо абаагүй.

⁴Сэсэн басагадынь зулатаяа хамта амһарта соо тоһо абажа гаралсаа.

⁵Тиигээд хүрьгэн хүбүүнэй удаархада, тэдэ басагад нажажа байһанаа унташаба.

⁶Һүнийн тэн болоходо: „Зай, хүрьгэн хүбүүн эндэ ерэжэ ябана, тэрэнээ угтахаяа гарагты“, – гэжэ хэншьеб шангаар дуугарба.

⁷Тиихэдэнь арбан басагад булта бодожо, өөһэд өөһэдынгөө зула заһажа оробо.

⁸Тэнэг басагадынь сэсэн басагадтаа хандажа: „Өөһэдынгөө тоһонһоо манда үгэлсыт, зуламнай унтархаяа байна“, – гэбэ.

⁹Тиихэдэнь сэсэн басагадынь: „Манда байһан тоһо бултандамнай хүрэхэгүй, тиимэхээ таанар наймаашадта ошоод, өөһэдтөө тоһо худалдажа абагты“, – гэжэ харюусаба.

¹⁰Бодомжогүй басагадай тоһо худалдажа абахаяа ошоходонь, хүрьгэн хүбүүн ерэбэ. Зүгөөр бэлэн байһан сэсэн басагадынь хүрьгэн хүбүүнтэй хамта түрэ найрта ошобо, тиин үүдэнүүдыньшье хаагдаба.

¹¹Удаань нүгөөдэ басагад ерээд: „Эзэн! Эзэн! Манда үүдээ нээгыш“, – гэжэ хашхаралдаба.

¹²Тээд хүрьгэн хүбүүн: „Үгы даа, би таанарые танихагүйб“, – гэжэ харюусаба».

¹³Тиигээд Иисус түгэсхэлдэнь: «Тиимэхээ таанар ходо һэргэг байгты, юундэб гэбэл, Хүн түрэлхитэнэй Хүбүүнэй ерэхэ үдэрыешье, сагыешье мэдэнгүй ха юмта», – гэжэ шабинартаа хэлэбэ.

Гурбан зараса тухай нургаалта үгэ

¹⁴«Тэрэ үедэ Огторгойн хаан түрэ иимэ ушартай адлишуу байха: Нэгэ гэрэй эзэн холын аянда гарахынгаа урда тээ зарасанараа дуудаж, тэдэндээ зөөри хогшолоо даалгаба.

¹⁵Эзэн зарасанарайнгаа абьяас шадабари мэдэжэ байгаад, хүн бүридэнь шадал абьяасайнь зэргээр мүнгэ үгэбэ: нэгэндэнь табан мянган алтан мүнгэ, нүгөөдэдэнь хоёр мянган алтан мүнгэ, гурбадахидань нэгэ мянган алтан мүнгэ барюулба. Тиигээд аяндаа мордобо.



¹⁶Табан мянган алтан мүнгэ абаһан түрүүшын зарасань мүнгээ ашагтайгаар эрьесэдэ оруулжа, үшөө табан мянган алтан мүнгэнэй ашаг олзотой болобо.

¹⁷Тэрээндэл тон адляар хоёр мянган алтан мүнгэ абаһан зарасань мүнгээ эрьесэдэ оруулаад, үшөө хоёр мянган алтан мүнгэнэй ашаг олзо олобо.

¹⁸Харин нэгэ мянган алтан мүнгэ абаһан зарасань эзэнэйгээ мүнгэ газарта булажа нюуба.

¹⁹Нилээд удаан сагай үнгэрһэн хойно эзэн гэртээ бусажа ерээд, зарасанартайгаа тоосоо хэбэ.

²⁰Табан мянган алтан мүнгэ абаһан зарасань абаһан мүнгэтээ хамта үшөө ондоо табан мянган алтан мүнгэ абажа ерээд: „Эзэн аа! Ши намда табан мянган алтан мүнгэ үгөө бэлэйш. Би тэрээгээршни үшөө табан мянган алтан мүнгэ олооб“, – гэжэ хэлэбэ.

²¹Эзэниинь тэрээндэ: „Ехэ һайн! Ши бэрхэ, найдабаритай зараса байнаш! Бага юумэ эрхилхэдээ ши найдабаритай байбаш, тиимэһээ би шамда бүришье ехэ юумэ даалгахамни! Орожо, эзэнтэйгээ хамта баярла“, – гэбэ.

²²Мүн хоёр мянган алтан мүнгэ абаһан хүниинь ерэжэ: „Эзэн аа! Ши намда хоёр мянган алтан мүнгэ үгөө бэлэйш, би тэрээгээршни үшөө хоёр мянгые олооб“, – гэжэ хэлэбэ.

²³Эзэниинь тэрээндэ: „Ехэ һайн! Ши бэрхэ, найдабаритай зараса байнаш! Бага юумэ эрхилхэдээ ши найдабаритай байбаш, тиимэһээ би шамда бүришье ехэ юумэ даалгахамни! Орожо, эзэнтэйгээ хамта баярла“, – гэбэ.

²⁴Мүн нэгэ мянган алтан мүнгэ абаһан зараса ерэжэ: „Эзэн аа! Би шамайе шэрүүн хатуу хүн гэжэ мэдэнэб. Ши таряагүй байһан газарһаа хуряадагши, үрэхэ сасаагүй байһан газарһаа ургаса суглуулдагши.

²⁵Айһандаа би шинии үгэһэн мянган алтан мүнгэ газарта булажа нюугааб. Энэ мүнгэншни байна“, – гэбэ.

²⁶Эзэниинь тэрээндэ: „Хара һанаатай, залхуу зараса! Ши намайе таряагүй байһан газарһаа хуряадаг, үрэхэ сасаагүй байһан газарһаа ургаса суглуулдаг гэжэ мэдэжэ байгааш, тиимэ гү?

²⁷Тиимэхээ ши минии мүнгэ ядахадаа наймаашадта үгэжэ эрьесэдэ оруулха байгааш, тиигээ һаашни би бусажа ерэхэдээ мүнгээ нэмэритэйгээр абаха бэлэйб“, – гэбэ.

²⁸Тиигээд эзэн: „Энээнһээ мүнгыень абаад, арбан мянган алтан мүнгэтэй хүндэ үгэгты.

²⁹Ушарынь хэлэбэл, юумэтэй хүндэ үшөө ехэ юумэн үгтэхэ, тиимэ хүн бүри элбэг дэлбэг юумэтэй байха; харин юумэгүй байһан хүнһөө һүүлшынхинь абтаха.

³⁰Харин энэ хэндээш хэрэггүй зарасые газаашань, шэб харанхыда абаашаад хаягты: тэндэ хүнүүд бархиралдаха, шүдөө хабиралдаха“, – гэбэ».

Һүүлшын зарга шүүбэри тухай

³¹«Хүн түрэлхитэнэй Хүбүүн алдар солотойгоор бүхы Эльгээмэлнүүдтэйгээ хамта ерэхэдээ, өөрынгөө алдарта шэрээдэ һууха.

³²Бүхы арадуудые тэрэнэй урда суглуулха. Тиихэдэнь хонишоной хонидые ямаануудһаа илгадагтал адляар тэрэ хүнүүдые бэе бэеһээн илгажа, хоёр бүлэг болгожо хубааха.

³³Тиигээд хонидые баруун таладаа, харин ямаануудые зүүн таладаа байлгаха.

³⁴Тиигээд хаан тэрэнэй баруун талада байгаашадта хандажа: „Минии Эсэгын үршөөл хайрада хүртэгшэ таанад ерэжэ, юртэмсэ дэлхэйн бии болохоһоо нааша таанарта бэлдэгдэһэн хаан түрэ халан абагты.

³⁵Минии үлэн хооһон ябахата, таанар намда эдихэ юумэ үгөөт; ундаа хүрөөд ябахатамни, ууха юумэ үгөөт; аяншалжа ябахатамни, намайе гэртээ угтажа абаат;

³⁶нюсэгэн байхатамни, үмдэхэ хубсаһа хунар үгөөт; үбшэн байхатамни, хойноһоомни харууһалаат; түрмэдэ һуухатамни, намтай уулзахаяа ерээт“, – гэжэ үнэн зүбтэндэ хэлэхэ.

³⁷Тиихэдэнь үнэн зүбтэн тэрээндэ: „Дээдын Эзэн! Хэзээ бидэ шамайе үлэн хооһон ябахыешни хараад, эдихэ юумэ үгөөбибди? Али хэзээ ундаа хүрөөд ябахаташни, ууха юумэ үгөөбибди?

³⁸Хэзээ шинии аяншалжа ябахата, бидэ шамайе гэртээ угтажа абаабибди? Али нюсэгэн байхаташни, үмдэхэ хубсаһа хунар үгөөбибди?

³⁹Хэзээ шинии үбдөөд байхата гү, али түрмэдэ һуухаташни гү, бидэ шамтай уулзахаяа ошообибди?“ – гэжэ һураха.

⁴⁰Тиихэдэнь хаан: „Эгээлэй юрын минии дахагшатай нэгэндэнь тиимэ хайн юумэ хэхэдээ, таанад намдашые хайниие хээ гээшэт“, – гэжэ харюусаха.

⁴¹Тиигээд хаан тэрэнэй зүүн талада байгаашадта хандан: „Бурханай хараалда хүртэгшэ таанад, намһаа холо бологты! Шолмосто, мүн тэрэнэй эльгээгдэмэлнүүдтэ бэлдээтэй хэтэ заяанай гал тамада ошогты!

⁴²Минии үлэн хооһон ябахата, намда эдихэ юумэ харбайгаагүй хэнта; ундаа хүрөөд ябахатамни, ууха юумэ үгөөгүй хэнта;

⁴³аяншалжа ябахатамни, гэртээ угтажа абаагүй хэнта; нюсэгэн байхатамни, үмдэхэ хубсаһа хунар үгөөгүй хэнта; үбдөөд байхатамни, түрмэдэ һуухатамни, намтай уулзахаяа ерээгүй хэнта“, – гэжэ буруутаһан зондо хэлэхэ.

⁴⁴Тиихэдэнь тэдэнь: „Дээдын Эзэн! Хэзээ бидэ шинии үлэн хооһон, ундаа хүрөөд ябахые, аяншалжа ябахые, нюсэгэн байхые, үбдэхые,

түрмэдэ һуухые хараад, шамда туһалаагүй гээшэбибди?“ – гэжэ хаанһаа һураха.

⁴⁵Тиихэдэнь хаан тэдэндэ: „Тон эгээлэй юрын хүнүүдэймни нэгэндэньшые тиимэ туһа хүргэхээ арсахадаа, таанар намдашые туһалхаяа арсаба гээшэт“, – гэжэ харюусаха.

⁴⁶Тиигээд тэдэ буруутаһан зон хэтэ заяандаа хэһээгдэхэ, харин Бурханай һайшаалда хүртэһэн зон мүнхын амидаралда хүртэхэ».

Матвей 26

Иисусые алаха гэхэн нюуса хэлсээн тухай

¹Иисус эдэ бүхы һургаалнуудаа номножо дүүргээд, өөрынгөө шабинарт хандан:

²«Хоёр хоноод, Паасхын һайндэр болохо гэжэ мэдэнэт, тиихэдэ Хүн түрэлтэнэй Хүбүүниие хэрээһэндэ хадажа саазалха», – гэжэ хэлэбэ.

³Тэрэ сагта түрүү санаартан, Хуули заадаг багшанар, улад зоной ахаматууд Кайафа гэдэг ахамад санаартын ордондо сугларба.

⁴Тэдэ Иисусые мэхэдээ оруулжа бариха, тиигээд алаха тухай зүбшөө бэлэй.

⁵Теэд улад зоной дунда буһалгаанай үүсхэгдэхэгүйн тула һайндэртэ тиимэ юумэ хэхэгүй гэжэ хэлсээ һэн.

Бетанида Иисусые хангалтай ургамалай шүүһээр түрхинэ

⁶Иисусай Бетанида һэлхэ үбшэндэ дайруулһан Симонэй гэртэ хоол барижа байхадань,

⁷нэгэ эхэнэр домбо соо ехэ үнэтэй һайхан хангалтай тоһо абажа ерээд, Иисусай толгой дээрэнь адхаба.

⁸Иисусай шабинар энээниие хараад, сухалаа хүрэхэ: «Юундэ иимэ гарза гаргана гээшэб?» – гэжэ дураа гутаба.

⁹«Энэ тоһыень ехэ үнэтэйгөөр худалдаад, мүнгыень үгытэйшүүлдэ хубаажа үгэхэ байгаабди», – гэлсэбэ тэдэ.



¹⁰Тээд Иисус шабинарайгаа хэлэжэ байһые мэдэжэ байгаад, тэдэндээ хандан: «Энэ эхэнэрые юундэ түбэгшөөлгэбэт? Тэрэ намда ехэл һайн юумэ хэбэл.

¹¹Үгытэй ядуушуул хододоо таанартай байхал, харин би таанартай ходо байхагүйб.

¹²Энэ эхэнэр нам дээрэ тоһо адхахадаа бэеымни хүдөөлүүлгэдэ бэлдэбэ гээшэ.

¹³Һайн Мэдээсэлэй бүхы газар дэлхэйгээр хаа хаанагүй номногдоходо, энэ эхэнэрэй хэһэн хэрэг тухай хүнүүд дурсан һанажа байха, хэлэжэ байха гэжэ би таанадта баталнаб», – гэбэ.

Иудын урбалга

¹⁴Тэрэ хирэдэ, арбан хоёр шабинарайнь нэгэн болохо Искарриодой Иуда түрүү санаартанда ошоод:

¹⁵«Иисусые таанадта барижа үгэбэлни, таанар намда юу үгэхэбта?» – гэжэ һураба. Тиихэдэнь түрүү санаартан Иудада гушан сагаан мүнгэ тоолоод үгэбэ.

¹⁶Иуда тэрэ саһаа хойшо Иисусые барижа үгэхэ таарамжатай нүхэсэл харгалзадаг болоо.

Иисус шабинартаяа хамта Паасхын хоол барина

¹⁷Эһээгдээгүй хилээмэнэй һайндэрэй түрүүшын үдэртэ шабинарын Иисуста ерээд: «Паасхын хоол шамда хаана бэлдэхыемнай ши хүсэхэ байнабши?» – гэжэ һураба.

¹⁸«Тиимэ нэгэ хүндэ хото ошоод: „Минии саг ойртобо, би шабинартаяа хамта Паасхын хоол гэртэшни барихамни гэжэ багшамнай хэлэнэ“, – гээд хэлээрэйгты», – гэжэ Иисус шабинартаа захиба.

¹⁹Шабинарын Иисусай хэлэһэн ёһоор боложо, Паасхын хоол бэлдэбэ.

²⁰Үдэшэ болоходо, Иисус арбан хоёр шабинартаяа хамта хоол барихаяа һууба.



²¹Эдеэлжэ байха үедөө Иисус: «Таанарай нэгэнтнай намайе барижа үгэхэнь, би баталан хэлэнэб», – гэбэ.

²²Тиихэдэнь шабинанынь ехэл уйдажа, хойно хойноһоон багшаһаа: «Дээдын Эзэн, би бэшэ аабзаб?» – гэжэ һураба.

²³«Намтай хамта энэ табаг соо хилээмээ дүрэхэн хүн намайе барижа үгэхэ», – гэжэ Иисус тэдээндэ харюусаба.

²⁴«Хүн түрэлхитэнэй Хүбүүн Нангин Бэшэг соо хэлэгдэхэнэй ёһоор үхэхэ. Харин тэрэниие барижа үгэхэн хүн аймшагтай гай зоболон амсаха: тэрэ хүнэй юрэдөө түрөөгүй хаань, өөртэнь һураггүй дээрэ байха һэн».

²⁵Мүн Иисусые барижа үгэхээ байһан Иудашье: «Рабби, би бэшэ аабзаб?» – гэжэ һураба. Иисус тэрээндэ: «Ши өөрөө тиигэжэ хэлэбэш», – гэжэ харюусаба.

Дээдын Эзэнэй үдэшин хоол

²⁶Хоол барижа байхадаа Иисус гартаа хилээмэ абаад, Бурханда баяр баясхалан хүргөөд, тэрэнээ хухалаад, шабинартаа хубаажа үгэхэ зуураа: «Энээниие абаад эдигты – энэ минии махабад бэе гээшэ», – гэбэ.

²⁷Тиигээд аяга абаад, Бурханда баяр баясхалан хүргөөд, шабинартаа үгэбэ. «Эндэхээ таанад булта уугты.

²⁸Энэ болбол олон хүнүүдэй нүгэл шэбэлнүүдые хүлисүүлхын тулада адхарха минии шуһан гээшэ, тиин энэ шуһаар Бурхан хүнүүдтэй Шэнэ Хэлсээ батална.

²⁹Энээнһээ хойшо минии Эсэгийн хаан орондо таанартай хамта шэнэ дарһа амсаха үдэрэй болотор би архи дарһа уухагүйб гэжэ таанарта хэлэхэб», – гэбэ.

³⁰Тиигээд тэдэнэр магтаал дуу дуулаһаар Элеон хада дээрэ гараба.

Иисус Пётрой арсаха тухай хэлэнэ

³¹Тэрэ үедэ Иисус шабинартаа: «Энэл хүнэндөө таанар бултадаа намһаа арсажа холодохот, ушарынь гэбэл: „Хонишониенё дайража

налгаахадамни, хүрэг хонидын тарашаха“, – гэжэ Нангин Бэшэг соо хэлэгдэнэ.

³²Харин амидырхан хойноо би таанадай түрүүндэ Галилейдэ ошоод байхаб», – гэбэ.

³³«Бултанай шамайе орхёошье хаань, би шамһаа хэзээшье арсахагүйб», – гэжэ Пётр тэрээндэ хэлэбэ.

³⁴«Энэ хүни эрэ тахяагай дуугархаһаань урда ши намһаа гурба дахин арсахалши даа гэжэ баталан хэлэнэб», – гээд Иисус Пётрто хэлэбэ.

³⁵Пётр урдаһаань: «Шамтай хамта үхэхэшье болобол, би шамһаа арсахагүйб», – гэбэ. Бусадшье шабинарын бултадаа тиимэ юумэ хэлэбэ.

Иисус Гефсимани сэсэрлиг соо зальбарна

³⁶Удаань Иисус шабинартайгаа хамта Гефсимани гэдэг газарта ерээд, тэдэндэ: «Минии тэндэ ошожо зальбараад ерэтэр эндээ һуужа байгты», – гэжэ хэлэбэ.

³⁷Иисус Пётрые, Зэбэдэйн хоёр хүбүүдые абажа ошобо. Тэрэ ехэл гашуудаж, ехэл һанаагаа зобожо,

³⁸абажа гараһан шабинартаа: «Минии ами хүнэн туйлай ехээр уйдажа, үхэнэдэл адли байнаб. Таанар эндэ намтай хамта хэргэг байгты», – гэбэ.

³⁹Тиигээд тээ хажуу тээшээ ошожо, уруугаа харан газар дээрэ хэбтээд: «Эсэгэмни! Хэрбээ арга бии һаа, энэ аягаһаа амсуулангүй, иимэ ехэ зоболон намһаа зайлуулыш даа. Гэбэшье минии дура хүсэлөөр бэшэ, харин шинии эрхэ хүсэлөөр болог лэ», – гэжэ зальбарба.

⁴⁰Удаань шабинартаа бусажа ерэхэдэнь, тэдэнь унтаж байба. Тиимэхээ тэрэ Пётрто хандан: «Таанар гансаханшье саг соо унтангүй, намтай хэргэлэн байлсаха аргагүй гээшэ гүт?

⁴¹Хорхойтуулгада абтахагүйн тула таанад хэргэг байгты, зальбарагты: сэдхэл дорюуншые хаа, бэе махабад ахир нула бшуу», – гэжэ хэлэбэ.

⁴²Иисус дахин хажуу тээшээ ошожо: «Эсэгэмни! Хэрбээ энэ аягаһаа амсуулангүй, энэ зоболон намһаа зайлуулха аргагүй хаа, шинии дура хүсэлөөр болог лэ», – гэжэ зальбарба.

⁴³Тэрэнэй шабинартаа ерэхэдэнь, тэдэнь баһал унтажа байба. Тэдэнэй нюдэниинь анилдаад нээгдэжэ үгэнгүй байгаа бшуу.

⁴⁴Иисус дахин тэдэнээ орхижо, хажуу тээшээ ошоод, түрүүн зальбарһандаал адляар гурбадахия зальбарба.

⁴⁵Тиигээд тэрэ шабинартаа ерээд: «Таанад үшөөл унтажа, амаржа байна гүт? Зай, иигээд Хүн түрэлхитэнэй Хүбүүнэй нүгэл үйлэдэгшэдэй гарта тушаагдаха саг ерэбэ даа.

⁴⁶Бодогты, ябаябди: намда урбагша тээ тэрэ ойртожо ябана», – гэжэ хэлэбэ.

Иисусые барижа абаба

⁴⁷Иисусай иигэжэ хэлэжэ байтарнь, арбан хоёр шабинарайнь нэгэн болохо Иуда ерэбэ. Тэрээнтэй хамта түрүү санаартанай, улад зоной ахаматуудай, Хуули заадаг багшанарай эльгээһэн хэлмэ, шиидам һаднаг бариһан олон зон байба.

⁴⁸Урбагша хамта ябаһан зондоо ямар дохёо тэмдэг үгэхэ тухайгаа хэлсэжэ: «Минии таалан мэндэшэлхэ хүн танда хэрэгтэй хүн гэшэ, тэрэниие баряарайгты», – гэбэ.

⁴⁹Иуда сэхэ Иисуста дүтэлэн ерэжэ: «Рабби, амар мэндэ!» – гэмсээрээ тэрэниие таалаба.

⁵⁰Иисус тэрээндэ: «Нүхэр, ши ханаашалһан юумээ гүйсэдхэ», – гэбэ. Тиихэдэнь ерэхэн хүнүүд ойртожо, Иисусые бариба.

⁵¹Иисустай байлсаһан нэгэ хүн хэлмээ гаргажа далайгаад, ахамад санаартын зарасын шэхые таһа сабшаба.



⁵²Тиихэдэнь Иисус шабидаа: «Һэлмээ байрандань бусаажа хэ. Һэлмэ баригшад булта Һэлмэхээ хосорхо юм.

⁵³Мүнөө Эсэгэхээ туһаламжа гуйхатаймни сасуу намда Эльгээмэлнүүдэй арбан хоёр сэрэгхээ үлүү ехэ сэрэг тэрэ дороо ябуулха аргатай гэжэ мэдэнэгүй аалши?

⁵⁴Теэд тиимэ юумэ гуйбални, Нангин Бэшэг соо хэлээтэй байһан юумэнүүд яжа бүтэхэб?» – гэжэ хэлэбэ.

⁵⁵Тиигээд Иисус зэбсэгтэй ерэнэн улад зондо хандажа: «Таанар дээрмэшэниие барихаяа гараһандал Һэлмэ, шиидам һаднагтайгаар намайе барихаяа ерэбэ гүт? Теэд үдэр бүхэн таанадые Бурхан Һүмэ соо һургахадамни намайе барижа хаадаггүй бэлэйлта», – гэбэ.

⁵⁶Эдэ бүхы ушарнууд Нангин Бэшэг соо лүндэншэдэй бэшэһэн мүрнүүдэй бээлхын тула болоо. Тиихэдэнь Иисусай шабинарынь булта тэрэнээ орхёод, зугадаба.

Иисус Зүблэлэй гэшүүдэй урда зогсоно

⁵⁷Иисусые барижа абаһан хүнүүд тэрээниие Кайафа гэдэг ахамад санаартын гэртэ хүтэлжэ абаашаба. Тэндэнь Хуули заадаг багшанар, ахаматууд суглараад байгаа.

⁵⁸Пётр зай баряд ахамад санаартын хорёо хүрэтэр Иисусай хойноһоо гэтэн ябаа. Тиигээд хорёо соо орожо, юунэй болохые харахаяа харуулшадаар хамта һуулсаба.

⁵⁹Түрүү санаартан, ахаматууд, Зүблэлэй гэшүүд булта Иисусые үхэлэй саазада хүртөөхэ ханаатай байгаа. Тиимэхээ тэдэнэр Иисусые гэмнэхэ хуурмаг гэршэ баримта бэдэрбэ,

⁶⁰теэд олон худал гэршэнэрэй ерээд, тэрээн тухай худал юумэ хэлэбэшье, хэрэгтэйнүүдые олобогүй. Һүүлэй Һүүлдэ хардаха хоёр гэршэнэр ерээд:

⁶¹«„Би Бурхан Һүмые бута буулгаад, гурбан үдэр соо дахин бодхоожо шадахаб“ гэжэ тэрэнэй хэлэхые дуулаа Һэмди», – гэбэд.

⁶²Тиихэдэнь ахамад санаарта бодожо, Иисуста хандан: «Ши юундэ харюусанагүйбши? Шамае зэмэлһэн гэршэлгэнүүдые дууланагүй гүш?» – гэжэ нураба.

⁶³Теэд Иисус юумэ дуугарбагүй. Тиихэдэнь ахамад санаарта тэрээндэ: «Амиды Бурханай урда тангариглан ши манда хэлэжэ үгэ, ши Бурханай табисуурта, Бурханай Хүбүүниинь гүш?» – гэжэ хэлэбэ.

⁶⁴Иисус тэрээндэ: «Ши тиигэжэ хэлээш. Харин би та бүхэндэ иигэжэ хэлэхэб: Мэнэ гэхээр таанад Хүн түрэлхитэнэй Хүбүүе һүр хүсэтэй Бурханай баруун талада һуухыень, тэнгэрийн үүлэнүүд дээрэ тамаран ерэхыень үзэхэт», – гэбэ.

⁶⁵Тиихэдэнь ахамад санаарта хубсаһаяа шуу татаад: «Энэшни Бурхание доромжолжо байна! Бидэндэ үшөө ямар гэршэ хэрэгтэйб? Мүнөө һая энээнэй Бурхание доромжолхыень дуулабат!

⁶⁶Таанад юун гэжэ һананабта?» – гэхэдэнь, «Энэшни зэмэтэй, үхэлэй саазада хүртэхэ ёһотой», – гэжэ булга харюусаба.

⁶⁷Тиигээд тэдэнэр Иисусай нюур руунь нёлбобо, нюдаргаараа сохибо, зариман тэрэнэй хасарые альгадажа байгаад:

⁶⁸«Бурханай табисуурта Христос, манда абарал буулгыш! Шамае хэн сохёоб гэжэ манда хэлэжэ үгыш!» – гэбэ.

Пётр Иисусаа арсаба

⁶⁹Пётрой газар хорёодо һуухадань, нэгэ зараса һамган тэрээндэ ерэжэ: «Ши баһал Галилейн Иисустай хамта байлсаа һэнши», – гэбэ.

⁷⁰Теэд Пётр: «Шинии юун тухай хэлэжэ байһыешни би огто мэдэнэгүйб», – гээд бүгэдын урда мэлзэбэ.

⁷¹Баһа хорёогой үүдээр Пётрой гаража ябахадань, ондоо зараса һамган тэрээниие хараад: «Энэ хүн баһа Назаредэй Иисустай ябалсаа һэн», – гэжэ тэндэ байһан хүнүүдтэ хэлэбэ.

⁷²«Би тэрэ хүниие огто танихагүйб», – гэжэ Пётр тангариглан мэлзэбэ.



⁷³Нэгэ хэды болоод, тэндэ байһан хэдэн хүн Пётрто дүтэлжэ: «Ёһоороо ши тэдэнэй нэгэн ха юмши, тиигээд аялга дууншни шамайе Галилейһээш гэжэ элирхэйлнэ», – гэбэ.

⁷⁴«Энэ хүниие би огто мэдэхэгүйб», – гэжэ Пётр Бурханиие дурдажа байгаад тангариглаба. Эгээл тэрэ үедэ гэнтэ эрэ тахяа дуугарба.

⁷⁵Тиихэдэнь Пётр: «Эрэ тахяагай дуугархаһаань урда ши намһаа гурба дахин арсахалши даа», – гэжэ Иисусай хэлэһые ханажархиба. Тиигээд тэндэһээ гараад, гунигтайгаар уйлаба.

Матвей 27

Иисусые Пиладта асарба

¹Үглөөгүүр болоходо, хамаг түрүү санаартан, улад зоной ахмадууд эртээн сугларжа, Иисусые үхэлэй саазада хүртөөхэ гэжэ зүбшэн шийдэбэ.

²Иисусые тэдэ гэнжээр хүлээд, Пиладта абаашажа тушааба.

Иудын хосорһон тухай

³Иисуста урбаһан Иуда Иисусые үхэлэй саазада хүртөөхэнь гэжэ дуулахадаа, буруу хэрэг үйлэдэһэнөө мэдэрэн гэмшэжэ, түрүү санаартанда, улад зоной ахмадуудта гушан сагаан мүнгыень бусаажа асараад:

⁴«Гэм зэмгүй хүниие барижа үхэлэй саазада хүртүүлхэдээ би нүгэл үйлэдэбэб», – гэбэ. Нүгөөдүүлһын: «Тэрэшни манда ямар хамаатай юм? Шинии хэрэг ха юм», – гэжэ харюусаа һэн.

⁵Иуда асарһан мүнгээ һүмэ соо хаяад, газашаа гаража, боожо үхэбэ.

⁶Түрүү санаартан хаяһан мүнгыень суглуулаад: «Энэ мүнгые хүнэй ами хороохо зорилготойгоор түлөө, тиимэһээ энээниие һүмын һанда табиха хэрэггүй», – гэжэ хэлсэбэ.



⁷Тиигэжэ зүбшэлдэһэн хойноо тэдэнэр мүнгөөрнь шабар амһарта хэдэг нэгэ хүнһөө газар худалдажа абахаар болобо. Тэрэ газар дээрэнь нүгшэһэн хариин зоние хүдөөлүүлжэ байха гэжэ шиидээ бэлэй.

⁸Тиимэһээ тэрэ газарые хүнүүд мүнөө хүрэтэр «Шуһан талмай» гэжэ нэрлэдэг.

⁹Тиигэжэ Иеремия лүндэншын иигэжэ хэлэһэниинь бүтөө: «Израилиин зоной тэрэнэй түлөө түлэһэн гушан сагаан мүнгэ абаад,

¹⁰тэрээгээрнь шабар амһарта хэдэг нэгэ хүнһөө газар худалдажа абаа. Тиигэжэ Дээдын Эзэн намда захираа».

Пиладай Иисусые мүшхэһэн тухай

¹¹Иисусые Римэй засаглагша Пиладай урда асаржа байлгаба. Тэрэ захирагша Иисусаа: «Ши еврейнүүдэй хаан гүш?» – гэжэ һураба. «Ши тиигэжэ хэлэнэш», – гэжэ Иисус харюусаба.

¹²Теэд түрүү санаартанай, ахамадуудай Иисусые зэмэлхэдэнь, тэрэ харюу үгэбэгүй.

¹³Тиихэдэнь Пилат: «Шамайе иимэ олон хэрэгүүдтэ гэмнэжэ байһые ши дууланагүй гүш?» – гэбэ.

¹⁴Теэд Иисус харюудань юушые хэлэбэгүй, тиихэдэнь Пилат аргагүй ехээр гайхаа һэн.

Иисусые үхэлэй саазада хүртөөбэ

¹⁵Паасхын һайндэрэй болоходо, захирагша улад зоной таби гэһэн хаалтада һуугшадай нэгыень сүлөөдэ табидаг заншалтай байгаа.

¹⁶Тэрэ сагта улад зондо һайн мэдээжэ Иисус Барабба гэдэг хүн түрмэдэ һуугаа.

¹⁷Тиин улад зоной суглархадань, Пилат тэдэнһээ: «Таанар ямар хүниие сүлөөдэ табюулха дуратай байнабта: Иисус Бараббые гү, али Бурханай табисуурта Христос гэжэ алдаршаһан Иисусые гү?» – гэжэ һураба.

¹⁸Иисуста атаархажа байһан дээрһээ еврейнүүдэй захирагшад тэрэниие барижа асараа гэжэ Пилат хайн мэдэжэ байгаа.

¹⁹Пиладай зарга шүүбэри хэдэг газарта һуухадань, тэрэнэй һамганиинь: «Тэрэ ямаршье гэм зэмэгүй хүндэ муу юумэ бү хэ, юундэб гэбэл, мүнөө һүни зүүдэндэ би тэрэнэй түлөө ехэл зобооб», – гэхэн мэдээсэлтэйгээр хүниие ябуулба.

²⁰Гэбэшье түрүү санаартан, ахамадууд Бараббые сүлөөдэ табихыень, харин Иисусые үхэлэй саазада хүртөөхыень гуйгты гэжэ улад зониие идхаба.

²¹Пилат улад зонһоо: «Эдэ хоёрой хэниинь танда табихабиб?» – гэжэ дахин асууба. «Бараббые», – гэжэ зон харюусаба.

²²Пилат тэдэнһээ: «Бурханай табисуурта Христос гэжэ алдаршаһан Иисусые би яаха болонобиб?» – гэжэ һураба. «Тэрэниие хэрээһэндэ хада!» – гэжэ улад зон бүгэдэ харюусажа байгаа.

²³«Ямар гэмтэй юумэ тэрэ хээб?» – гэжэ засаглагша һураба. Теэд улад зон: «Тэрэниие хэрээһэндэ хада!» – гэжэ бүри шангаар гааралдан хашхарба.

²⁴Юушье хэхэ аргагүй байһанаа хараад, теэдшье буһалгаан үймөөнэй үсхэгдэхэ гэжэ байһые ойлгоходоо, Пилат уһа абаад, улад зоной урда гараа угаагаад: «Энэ хүнэй үхэлдэ би ямаршье зэмэгүйб; энэ таанадай үйлэдэһэн хэрэг», – гэжэ хэлэбэ.

²⁵«Тэрээнэй үхэлдэ бидэ, манай үри хүүгэд зэмэтэй байха», – гэжэ улад зон баран харюусаба.

²⁶Тиихэдэнь Пилат тэдэндэ Бараббые табиба, харин Иисусые сохёод, хэрээһэндэ хадахыень захирба.

Сэрэгшэд Иисусые шоолоно

²⁷Тиихэдэнь Пиладай сэрэгшэд Иисусые ордоной хэрэмэй хорёодо абаашаба. Тэндэнь олон сэрэгшэд суглараад байгаа.

²⁸Тэдэ Иисусай хубсаһа тайлажа хаяад, тэрээндэ улаан суба үмдэхүүлбэ,

²⁹тиигээд үүргэнээр гүрлөө гүрэжэ, толгойдонь үмдэхүүлбэ, баруун гартань модон таяга барюулба. Тиин тэдэнэр Иисусай урда үбдэглөөд: «Еврейнүүдэй хаан мандаха болтогой!» – гэхэ мэтээр тэрээниие шооложо байгаа.

³⁰Тиигээд тэрээниие нёлбобо, таягынь абаад, тархи түрүүень сохибо.

³¹Тиигэжэ Иисусые ханатараа баһаад, удаань үнөөхи улаан субыень тайлажа хаяа. Тиигээд өөрынь хубсаһа үмдэхүүлээд, хэрээһэндэ хадахаяа абаашаа һэн.

Иисусые хэрээһэндэ хадаба

³²Замдаа тэдэ Кириной нютагай Симон гэдэг хүнтэй тааралдаад, Иисусай хэрээһэ үргэлөөд ябахыень баалаба.

³³Тэдэнэр «Хохимой» (еврей хэлээр «Голгофо») гэдэг газарта хүрэжэ ерээ.

³⁴Тэндэ Иисуста гашуун юумэ холиһон архи уухыень үгөө. Иисус тэрээниинь амсаад, уубагүй.

³⁵Сэрэгшэд Иисусые хэрээһэндэ хадаад, жээрэб татажа, хубсаһыень дундаа хубаагаа һэн.

³⁶Тиигээд тэндээ һуугаад, Иисусые харууһалжа байгаа.

³⁷Иисусай толгойн дээрэхэнэ тэдэ «Энэ еврейнүүдэй хаан Иисус» гэжэ хэрээһэндэ хадуулһан шалтагааниинь харуулһан модон хабтагай үлгэбэ.

³⁸Тиихэдэ Иисустай хамта хоёр дээрмэшэдые: нэгыень баруун таладань, нүгөөдыень зүүн тээн хэрээһэндэ хадаба.

³⁹Хажуугаарнь үнгэрһэн зон толгойгоо һэжэржэ, Иисусые шоглон:

⁴⁰«Һүмые хандаргаад, гурбан үдэр соо бодхоохоб гээ бэлэйш! Хэрбээ ши Бурханай Хүбүүн юм хаа, өөрыгөө абарыш! Хэрээһэнһээ буугыш», – гэжэ байба.

⁴¹Тон тиигэжэл түрүү санаартан, Хуули заадаг багшанар, ахаматууд, фарисейнүүд Иисусые шооложо:

⁴²«Бусадые абардаг аад, харин өөрыгөө абаржа шаданагүйл! Хэрбээ энэ Израилиин хаан юм хаа, мүнөө хэрээһэнһээ бууг лэ! Тиигэбэлнь бидэ тэрээндэ этигэхэбди.

⁴³Тэрэ Бурханда найдадаг байгаа, өөрыгөө Бурханай Хүбүүнби гэжэ нэрлээ. Зай, тиигэбэл, Бурханда хэрэгтэй юм хаань, Бурхан тэрээниие абараг лэ!» – гэлдэбэ.

⁴⁴Мүн Иисустай хамта хэрээһэндэ хадуулһан дээрмэшэдшые тэрээниие шоглон баһажа байгаа.

Иисус амья табиба

⁴⁵Хахад үдэрһөө гурбан саг хүрэтэр бүхы газар дэлхэй шэб харанхыда хушагдаба.

⁴⁶Гурбан сагай багта Иисус: «Эли, Эли! Лема сабахтани?» (Бурхамни, Бурхамни! Юундэ намайе орхибош?) – гэжэ шангаар хашхарба.

⁴⁷Тэндэ зогсожо байһан зарим зон хэлэһыень дуулаад: «Тэрэ Илияе дуудана», – гэлсэбэ.

⁴⁸Тэдэнэй нэгэниинь дары гүйжэ ошомсоороо, бамбагар юумэ абажа, дээрэнь гашуун архи нэбтэртэрынь адхаад, тэрэнээ тулуурай үзүүртэ табяад, Иисуста уухыень үгэбэ.

⁴⁹Харин бусад зон: «Байза, Илия тэрээниие абархаяа ерэгшэ аа гү, харая», – гэлдэбэ.

⁵⁰Иисус дахин шангаар хашхараад, амья табиба.

⁵¹Тиихэдэнь хүмэдэ Хамагай Нангин газарта ороходо үлгөөтэй байһан хүшэгэ дээрэһээ доошоо шууража, хоёр боложо хахарба, газар хүдэлбэ, шулуунууд хамхарба,

⁵²мүн агы нүхэн хуурсагууд нээгдэжэ, наһа бараһан хутагтанууд олоороо амидырба.

⁵³Иисусай амидырһан хойно тэдэнэр агы нүхэн хуурсагуудһаа гаража, нангин Иерусалим хото ороо, тэндэ тэдэниие олон хүн хараһан байгаа.

⁵⁴Тиихэдэ зуунай дарга, мүн тэрээнтэй хамта Иисусые һахилсагша сэрэгшэд газарай хүдэлхые, мүн бусадшые болоһон үзэгдэлнүүдые хараад, ехэ айн хүрдэжэ: «Тэрэ үнэхөөрөө Бурханай Хүбүүн байгаа», – гэлсэбэ.

⁵⁵Галилейһээ Иисусые дахажа ерэнэн, тэрээндэ туһалжа байһан олон эхэнэр баһа тээ холохоно зогсоод хаража байгаа.

⁵⁶Тэдэнэй дунда Магдалай Мария, мүн Яков Иосия хоёрой эхэ Мария, баһа Зэбэдэйн хүбүүдэй эжынь байлсаа.

Иисусые хүдөөлүүлһэн тухай

⁵⁷Үдэшэ болоходо Иисусай шабинь байһан Иосиф гэдэг баян хүн Аримафейһээ хүрэжэ ерээ.

⁵⁸Тэрэ хүн Пиладта ерээд, Иисусай шарилые үгэхыень гуйба. Тиихэдэнь Пилат Иисусай шарилые Иосифто үгэхыень захираа һэн.

⁵⁹Иосиф шарилыень абаад, сэбэр бүдөөр орёогоод,

⁶⁰хабсагайда түнхижэ бэлдэһэн шэнэ агы нүхэн соо тэрээниие хадагалба, агы нүхэнэй амһар томо шулуугаар хаагаад ябаба.

⁶¹Тэрэ сагта Магдалай Мария нүгөө Мариятай хамта агы нүхэн хуурсагайн тушаа һуугаа бэлэй.

⁶²Хойто үдэрынь, субботодо түрүү санаартан, фарисейнүүд Пиладтай уулзажа:

⁶³«Эзэн! Тэрэ мэхэшэнэй үшөө амиды байхадаа: „Гурбан үдэрһөө амидырхаб“, – гэжэ хэлэһые һанабабди.

⁶⁴Тиимэхээ гурбан хоног үнгэртэр агы нүхыень һахижа захиралта үгыш. Тиигээгүй һаашни, тэрэнэй шабинар хүнндөө ошожо, бэеынь хулуужа магадгүй, харин улад зондо „Тэрэ амидыраа“ гэжэ хэлэхэдээ болохо. Тиигэбэлнь, энэ һүүлшын мэхэ түрүүшынхиһээ аймшагтай байха», – гэбэд.

⁶⁵«Харуулшадые абагты. Ошожо, өөһэдынгөө мэдэхээр һахижа харуулжа байгты», – гэжэ Пилат тэдэндэ хэлэбэ.

⁶⁶Тиимэхээ тэдэ агы нүхэ таглаһан шулууе тамгалаад, хажуудань харуул табиба.

Матвей 28

Иисусай амидырһан тухай

¹Субботын үнгэрһэн хойно, гарагай нэгэнэй үглөөгүүрнь үүр сайхын үеэр Магдалай Мария нүгөө Мариятай хамта Иисусай хэбтэһэн агы нүхэн хуурсагые харахаяа ерээ һэн.

²Гэнтэ тэндэнь газар аймшагтайгаар хүдэлбэ, тиин Дээдын Эзэнэй Эльгээмэл огторгойһоо бууба. Тэрэ агы нүхэ хаһан шулууе хажуу тээшэнь үмхирүүлээд, дээрэнь һууба.

³Тэрэнэй шэг шарайнь сахилгаандал мэтэ, хубсаһаниинь саһан шэнги сагаан байгаа.

⁴Харуулшад тэрээнһээ аргагүй ехээр айжа шэшэрэлдэн, үхэхэн хүнүүд шэнги болошобо.

⁵Бурханай Эльгээмэл эхэнэрнүүдтэ хандан: «Бү айгты. Таанар хэрээһэндэ хадуулһан Иисусые бэдэрнэт гэжэ би мэдэнэб.

⁶Тэрэтнай эндэ үгы! Өөрынгөө хэлээшээр тэрэтнай амидыраа. Ороод, шарилайнь хэбтэһэн газарые харагты.



⁷Мүнөө түргэхэн ошожо, шабинартань тэрэнэй амидырхан тухай хэлэгты. Тэрэ таанадһаа түрүүн Галилей ошохо, тэндэ тэрэниие харахат гэжэ дуулгагты. Зай, би таанарта энээниие дуулгааб», – гэбэ.

⁸Тиимэхээ эхэнэрнүүд айһаншье, нүгөө талаһаа баярлаһаншье юумэд яаралтайгаар агы нүхэнһөө гаража, тэрэнэй шабинартань энэ мэдээсэл дуулгахаяа гүйлдэбэ.

⁹Замдань гэнтэ тэдэнтэй Иисус тааралдажа: «Амар мэндэ», – гэжэ тэдэниие мэндэшэлбэ. Тиихэдэнь эхэнэрнүүд Иисуста ойртоод, хүлһөөнь барижа, тэрээндэ мүргэбэ.

¹⁰Тиихэдэнь Иисус: «Бү айгты. Аха дүүнэрни болохо шабинартам ошожо, Галилейдэ ерэхыень хэлэгты, тэдэ намтай тэндэ уулзаха», – гэбэ.

Харуулшад болоһон ушар тухай хөөрзбэ

¹¹Эхэнэрнүүдэй үшөө замдаа ябахадань, харуулшадай зариманиинь хото орожо, болоһон бүхы юумэнүүд тухай түрүү санаартанда дуулгаба.

¹²Түрүү санаартан ахаматуудтай уулзажа, зүблөө хээд, сэрэгшэдтэ ехэ мүнгэ үгэжэ:

¹³«Һүниндөө унтажа байхадамнай Иисусай шабинар ерээд, шарилыень хулуугаа гэжэ хүнүүдтэ хэлэхэ ёһотойт.

¹⁴Хэрбээ засаглагшын энээн тухай юумэ дуулабал, бидэ тэрээнтэй уулзажа энэ хэрэг аргалхабди, тиимэхээ таанадта зобохо хэрэггүй», – гэбэ.

¹⁵Харуулшад мүнгэ абаад, түрүү санаартанай зааһан ёһоор бүхы юумэ хэбэ. Тиигэжэ тэдэнэй худал хөөрөөн мүнөө хүрэтэр еврейнүүдэй дунда дэлгэрэнхэй.

Агуухэ захяа үгэһэн тухай

¹⁶Арбан нэгэн шабинарынь Иисусай хэлэһэн ёһоор Галилей ошожо, тэндэ хада дээрэ гараа бэлэй.

¹⁷Тиигээд Иисусые харахадаа, тэрээндэ дохин мүргэбэ, зүгөөр тэдэнэй зариманиинь бүрин этигэнгүй байгаа.

¹⁸Тиигээд Иисус тэдэндэ ойртоод: «Тэнгэридэшье, газар дээрэшье бүрин эрхэ засаг намда үгтэбэ!

¹⁹Зай, ошожо, бүхы арадуудта минии хургаал айладхагты, Эсэгын, Хүбүүнэй, Нангин хүлдын нэрээр тэдэниие уһаар арюудхагты.

²⁰Таанарта минии захиһан бүхы юумэнүүдые сахижа байхыень тэдэниие хургагты. Би таанадтай хамаг юумэнэй эсэс хүрэтэр хододоо хамта байхаб».



Марк

Марк 1

Уһаар арьудхагша Иоаннай номнолго тухай

¹Энэ болбол Бурханай Хүбүүн Иисус Христос тухай һайн Мэдээсэл юм.

²Тэрэнь Исаяя лүндэншын ном соо Бурханай иигэжэ хэлэһэнэй ёһоор эхилнэ: «Шинии ябаха харгы бэлдэхыень би түрүүндэшни өөрынгөө Эльгээмэлые ябуулнаб»,

³баһа «Дээдын Эзэнэй ябаха замыень бэлдэгты, алхаха харгыень дардам сэхэ болгогты гэжэ хэн бэ даа сүл губида хашхарба».

⁴Сүл губида Уһаар арьудхагша Иоанн бии боложо: «Нүгэл шэбэлнүүдээ хүлисүүлхын тула Бурханда хандан, уһаар арьудхуулагты», – гэжэ айладхаба.

⁵Иудейн можоһоо, Иерусалим хотоһоо олон зон Иоанне шагнаһаяа ошобо. Тэдэнэр нүгэл шэбэлнүүдээ мэдэрэн гэмшэбэ, тиин Иоанн тэдэниие Иордан голдо шунгуулан уһаар арьудхаба.

⁶Иоанн тэмээнэй ноһон хубсаһа үмдөөд, һур бэһэ бэһэлээд ябадаг, таршаагаар ба зэрлиг зүгын балаар хооллодог бэлэй.

⁷«Хойноһоомни ерэхэ хүн намда ороходоо аргагүй ехэ һур жабхалантай юм. Би бүгтыгөөд, тэрэнэй гуталайнь оһорышье тайлаха эрхэгүйб.

⁸Би таанадые уһаар арьудханаб, харин тэрэ таанадые Нангин һүлдөөр арьудхаха юм», – гээд Иоанн номнодог бэлэй.

Иисусые уһаар арьудхаһан тухай

⁹Уданшьегүй тэдэ үдэрнүүдтэ Галилей можын Назарет хотоһоо Иисусай ерэхэдэнь, Иоанн тэрэниие Иордан голдо шунгуулан уһаар арьудхаба.

¹⁰Уһанһаа гарахатайгаа сасуу Иисус огторгойн нээгдэхые, Нангин һүлдын гулабхаадал адляар дээрэнь буухые хараба.



¹¹«Ши хайрата Хүбүүмни гээшэш, ханаа сэдьхэлдэмни таатайш», – гэхэн дуун тэнгэриһээ дуулдаба.

¹²Тиигэмсээрнь һүлдэ Иисусые сүл губи руу ябуулба.

¹³Тэндэ Иисус дүшэн үдэрэй туршада сатанагаар туршуулан, зэрлиг ан арьяатанаар хамта байлсаа, зүгөөр Бурханай Эльгээмэлнүүд тэрээндэ туһалжа байгаа.

Иисусай дүрбэн загаһашадые дуудаһан тухай

¹⁴Иоаннье барижа түрмэдэ хаһан хойнонь Иисус Галилейн можо ерэжэ, Бурханай һайн Мэдээсэл номнобо.

¹⁵«Таарамжатай саг ерэбэ! Бурханай зонхилхо хаһа ойртобо. Нүгэл шэбэлээ орхижо, һайн Мэдээсэлдэ этигэгты!» – гэжэ тэрэ айладхаба.

¹⁶Нэгэтэ Галилей далайн хажуугаар ябахандаа, тэрэ Симон ба Андрей гэдэг тэрэнэй ахые хараба. Тэдэ хоёр загаһашад гүльмээ далайда хаяжа байгаа.

¹⁷«Намтай ябалсагты, тиигэбэл загаһа барихын орондо хүнүүдые намда хандуулха ажалда би таанадые һургахаб», – гэжэ Иисус тэдэ хоёрто хэлэбэ.

¹⁸Тиигэхэдэнь тэдэнэр дары гүльмээ орхёод, Иисусай хойноһоо ябаа һэн.

¹⁹Тэндэһээ саашалжа ябатараа, тэрэ Зэбэдэйн хүбүүдые, Яков ба Иоанн гэдэг аха дүүнэрэй онгосо соо һуугаад, гүльмээ заһажа байхыень харамсаараа,

²⁰дуудаба. Тэдэнь Зэбэдэй эсэгээ хүдэлмэришэдтэйн хамта онгосодонь орхёод, Иисустай ябаба.

Ада шүдхэртэ дайруулһан хүн тухай

²¹Иисус шабинартайгаа хамта Капернаум хото ерэжэ, субботын болоходо мүргэлэй гэртэ орожо, хүн зоние һургаба.



²²Тэрэнэй хургаал шагнаһан хүнүүд булта ехээр гайхаба. Ушарынь юуб гэхэдэ, тэрэ Хуули заадаг багшанарта адляар бэшэ, харин эрхэ засаг барижа байһан хүндэл адляар хургаһан байгаа.

²³Тэрэ мүргэлэй гэртэ ада шүдхэртэ барюулһан хүн орожо:

²⁴«Назаредэй Иисус, ши бидэниие яаха гээбши? Ши маниие үгы хэхээ ерээ гүш? Би шамайе мэдэхэб, ши Бурханай нангин Хүбүүнши», – гээд хашхарба.

²⁵«Абья аниргүй болоод, энэ хүнһөө гара!» – гэжэ Иисус шангаар ада шүдхэртэ захирба.

²⁶Тиигэхэдэнь ада шүдхэр үнөөхи хүнөө ехээр ордоһолуулан, шангаар хашхараад, бөөһөөнь гаража арилба.

²⁷Хүн зон булта аргагүй ехээр гайхажа, бэе бээдээ: «Энэшни юун гээшэб? хүр хүсэтэй шэнэ хургаал байнал! Яаһан ехэ эрхэ засагтай хүн гээшэб? Ада шүдхэрнүүдшье тэрэнэй үгэ дуулажа байнал», – гэлдэжэ байгаа.

²⁸Уданшьегүй Иисус тухай нураг суу бүхы Галилейн можоор хаа хаанагүй тараба.

Иисус олон хүнүүдые аргалан эдэгээбэ

²⁹Яков Иоанн хоёр шабинараараа хамта Иисус мүргэлэй гэрһээ гараад, Симон Андрей хоёрой гэртэнь ошоо һэн.

³⁰Иисусай орожо ерэхэтэйн сасуу Симонэй хадам эжын ехэ халууржа хэбтэһэн тухай дуулгаа бэлэй.

³¹Иисус тэрэ эхэнэртэ ойртожо, гарһаань баряад бодхообо. Тиихэдэнь халууниинь бууража, эхэнэр айлшадаа хүндэлжэ оробо.

³²Үдэшэлэн, наранай ороходо, Иисуста үбшэн хүнүүдые, ада шүдхэрнүүдтэ барюулһан хүнүүдые бултыень асаржал байгаа.

³³Хотын зон бултадаа шахуу гэрэй үүдэндэ сугларба.

³⁴Иисус элдэб үбшэнтэй олон зоние аргалан эдэгээбэ, олон ада шүдхэрнүүдые намнажа гаргаба. Тэрэнэй Бурханай табисуурта байһыень ада шүдхэрнүүдэй хайн мэдэжэ байһан хадань, тэдэнэй юумэ хэлэхые тэрэ хорижо байгаа.

Иисусай Галилейн можоор номноһон тухай

³⁵Иисус хойто үглөөнь хара үүрээр бодоод, гэрһээн гаража нэгэ эзэгүй газарта ошоод, Бурханда зальбарба.

³⁶Тиихэдэнь Симон ба тэрээнтэй ябаһан зон хойноһоонь гаража бэдэрбэ.

³⁷Һүүлдэнь тэрээниие олоод: «Бүхы зон шамайе бэдэржэ байнал», – гэбэ.

³⁸«Дүтэ оршодог ондоо тосхонуудаар ябая, би тэндэхи зондо баһал номнохо ёһотой хүм, тиимэл зорилготойгоор би иишэ ерээ ха юмбиб», – гэжэ Иисус тэдээндэ харюусаба.

³⁹Тиигэжэ тэрэ бүхы Галилей можын мүргэлэй гэрнүүдээр хургаалаа номножо, ада шүдхэрнүүдые даража байгаа.

Иисус үбшэнтэй хүниие аргалан эдэгээбэ

⁴⁰Иисуста арһанай бузар үбшэнтэй хүн ерэжэ, үбдэг дээрээ байгаад, тэрэниие гуйна: «Хэрбээ ши хүсэбэл, намайе арюудхан эдэгээжэ шадахаш».

⁴¹Иисус тэрэ хүниие хайрлаад, гараа һарбайжа тэрээндэ хүрөөд: «Эдэгээхэ хүсэлтэйб, арюун болыш даа», – гэбэ.

⁴²Тэрэ дары арһанайнь бузар үбшэниинь үгы боложо, үнөөхи хүмнай арюун сэбэр болобо.

⁴³Тиигээд эмнүүлһэн хүнөө харгыгаараа ябахыень, мүн:

⁴⁴«Энээн тухай ши хэндэшье бү хэлээрэй. Зүгөөр санаартада сэхэ ошожо, бээ үзүүлэ, тиигээд аргалуулһанаа хүн бүхэндэ гэршэлхын тула ши Моисейн зарлигай ёһоор үргэл асараарай», – гэжэ захирба.



⁴⁵Зүгөөр үнөөхи хүнийнь гараад, эмнүүлэн тухайгаа хүн бүхэндэ хөөрэбэ. Тиимэхээ Иисус энэ хотодо үзэгдэхэ байхын аргагүй боложо, хотоһоо гадуур эзэгүй газарта ошоо һэн. Тиигэбэшье хүн зон тэрээндэ газар бүхэнһөө ерэжэ байгаа.

Марк 2

Иисус саа үбшэнтэй хүниие эдэгээбэ

¹Нэгэ хэды үдэр болоод, Иисус Капернаум хотодоо бусажа ерэбэ, тиин тэрэнэй гэртээ байһан тухай нураг дары тараба.

²Удангүй хүн зон олоороо сугларжа, гэртэньше, газаа хаалгандашые багтаха газаргүй болоо һэн. Иисусай сугларагшадта номножо байхада,

³дүрбэн хүн саа үбшэнтэй хүниие тэлээд ерэбэ.

⁴Хүн зоной угаа олон байһанһаа тэрэ үбшэн хүниие Иисуста ойртуулхын арга үгы байгаа. Тиимэхээ үнөөхи ерэнэн хүнүүд Иисусай байһан газарай тушаа гэрэй хушалта задалан, нүхэ гаргаад, үбшэн хүнөө шэрдэгтэйн доошонь буулгаба.

⁵Иисус тэдэ хүнүүдэй этигэл хүзэгэйн аргагүй ехэ байхые харахадаа, саа үбшэнтэндэ хандан: «Хүбүүмни, нүгэлнүүдшни хүлисэгдэбэ», – гэбэ.

⁶Тэндэ нууһан Хуули заадаг хэдэн багшанар досоогоо:

⁷«Юундэ тэрэ иимэ мэтын юумэнүүдые хэлэн, Бурханиие доромжолно гээшэб? Ганса Бурханһаа ондоо хэн хүнэй нүгэлые хүлисэдэг юм?» – гэжэ бодожо байгаа.

⁸Тиигэжэ бодожо байхыень Иисус гансата мэдээд: «Юундэ тиигэжэ сэдхэлдээ бодобот?» – гэжэ асууба.

⁹«Саа үбшэнтэй хүндэ „Нүгэлнүүдшни хүлисэгдэбэ“ гэхэдэ бэлэн гү, али „Бодоод, дэбисхэрээ абаад яба“ гэжэ хэлэхэдэмни бэлэн гү?



¹⁰Хүн түрэлхитэнэй Хүбүүнэй газар дэлхэй дээрэ нүгэл шэбэлнүүдые хүлисэхэ эрхэтэй байһые би таанадта баталан харуулхаб». Тиигээд саа үбшэнтэй хүндэ хандан:

¹¹«Шамда хэлэнэб, бодоод, дэбисхэрээ абаад, гэртээ хари», – гэбэ.

¹²Бүхы хүнүүдэй хараһаар байтар үнөөхи үбшэн хүн бодоод, дэбисхэрээ абаад, гаража ябаба. Улад зон бултадаа айхабтар ехээр гайхалдан: «Бидэ иимэрхүү юумэ хэзээшье хараагүйбди», – гэлдэн, Бурхание алдаршуулжа ороо һэн.

Иисус Левиё шэлэжэ абаба

¹³Иисус дахин Галилей далайн эрьедэ ошобо. Ехэл олон зоной сугларан тэрээндэ ерэхэдэ, Иисус тэдэниё һургаба.

¹⁴Нэгэтэ гансаараа ябатараа тэрэ татабари суглуулдаг Алфейн Левий хүбүүнэй ажалаа хэжэ һуухыень хараа һэн. «Хойноһоомни яба», – гээд Иисус тэрээндэ хэлэбэ. Тиихэдэнь Левий бодоод, хойноһоонь ябаба.

¹⁵Хожомынь Иисус шабинартайгаа хамта, тэрэниё олоороо дахажа ябадаг алба татаашадтай, бусадшье нүгэлтэнүүдтэй хамта Левиин гэртэ үдэшин хоол барижа байгаа.

¹⁶Хуули заадаг зарим багшанар Иисусай нүгэл хэгшэдтэй ба алба татагшадтай хамта хоолложо байхыень хараад, «Юундэ багшатнай иимэ зоноор хамта эдеэлнэб?» – гэжэ шабинарһаань һураба.

¹⁷Иисус тэрэниёнь дуулахадаа: «Элүүр уладта эмшэн хэрэггүй, харин үбшэн хүнүүдтэ хэрэгтэй юм. Би үнэн сэдхэлтэниё бэшэ, харин нүгэл хэгшэдые дуудахаяа ерээ хүнби», – гэжэ хэлэбэ.

Масаг сахиха тухай асуудал

¹⁸Иоаннай шабинарай, мүн фарисейнүүдэй масаглажа байха үедэ зарим хүнүүд Иисуста ерээд: «Иоаннай, мүн фарисейнүүдэй шабинарай масаг сахижа байхада, шини шабинар юундэ масагланагүйб?» – гэжэ асууба.

¹⁹Иисус иигэжэ сасуулан тэдэндэ харюусаба: «Түрэ хуримда ерэнэн айлшад хүрьгэн хүбүүнтэй байхадаа, масаг сахиха аал? Үгыл даа! Хүрьгэн хүбүүнтэй байха сагтаа тэдэнэр масаглахагүйл.

²⁰Зүгөөр хүрьгэн хүбүүниие тэдэнһээ абаад ябаха үдэрэй ерэхэдэнь, тэдэ айлшад масаглахал».

²¹«Хэншье хуушан хубсаһанда шэнэ бүдөөр халааһа табидаггүй бшуу, тиимэ халааһан хуушан хубсаһые удара татахал, хахархайень улам ехэ болгохол.

²²Хэншье һая нэрэнэн архияа хуушан туламда хэдэггүйл, тиигээ һаа, тэрэ архинь эһээд, хуушан туламаа хахалжа, архиньшье, туламыньшье хэндээшье хэрэггүй болохол. Тиимэһээ һая нэрэнэн архи шэнэ туламда хэхэ хэрэгтэй юм».

Суббото тухай асуудал

²³Нэгэ субботодо Иисус шабинартайгаа таряалангай газараар ябажа ябаа. Шабинарынь таряанай залаа таһалан үйрүүлээд, эдижэ байгаа.

²⁴Зарим фарисейнүүд Иисуста: «Үгы, харыш, шабинаршни субботодо хэжэ болохогүй юумэ хэжэ ябанал!» – гэбэ.

²⁵«Давид хаанай, тэрээнтэй хамта ябаһан хүнүүдэй ехээр гэдэһээ үлдэхэдөө юу хэһэн тухайнь хэзээшье уншаагүй һэн гүт?

²⁶Тэрэ ушар Авиафарай ахамад санаарта байхада тохёолдоо юм. Давид Бурханай гэртэ ороод, санаартадһаа бэшэ ондоо хүнүүдэй эдижэ болохогүй үргэлэй хилээмэ эдеэд, хажуудахи хүнүүдтээшье хубаажа үгөө юм», – гэжэ Иисус тэдэндэ харюусаба.

²⁷Түгэсхэлдэнь Иисус тэдэ фарисейнүүдтэ иигэжэ хэлэбэ: «Хүн гээшэмнай субботын тулада бэшэ, харин суббото хүнэй туһада бии болгогдоо юм.

²⁸Тиимэһээ Хүн түрэлхитэнэй Хүбүүн субботыншье Эзэн мүн».

Марк 3

Хатаһан гартай хүн тухай

¹Иисусай дахинаа мүргэлэй гэртэ ошоходонь, тэндэ хатаһан гартай хүн байба.

²Баһа буруу юумэ хэһэнэйнь түлөө Иисусые зэмэлхэ һанаатайшуулшье байжа, үбшэн хүниие субботодо аргална аа гү гэжэ тэрэниие ажаглан хаража байбад.

³«Бодоод, хүн зоной урда гара!» – гээд Иисус хатаһан гартай хүндэ хэлэбэ.

⁴Тиигээд хүн зонһоо: «Субботодо бидэ хайн юумэ бүтээхэ ёһотой гүбди, али харата юумэ үйлэдэхэ гү? Хүнэй ами наһые абарха гү, али хороохо гү?» – гэжэ нураа бэлэй. Тиигэхэдэнь хүн зон абяа аниргүй байгаа һэн.

⁵Иисус тэдэниие сухалтайгаар хараад, зүрхэ сэдьхэлэйнь мохооршоһондо уйдан гашуудажа, үбшэн хүндэ хандан: «Гараа харбай», – гэбэ. Үбшэн хүнэй гараа харбайхадань, хатаһан гарынь эдэгэшэһэн байгаа.

⁶Фарисейнүүд мүргэлэй гэрһээ гараад, дары Иродэй талынхидаар уулзажа, Иисусые яажа алаха тухайгаа зүбшэн хэлсэбэ.

Далайн хажууда аргагүй олон хүнэй сугларһан тухай

⁷Иисусай шабинартайгаа хамта далайн эрьедэ ошоходонь, тэрэниие үй түмэн зон дахажа ябаа. Тэдэ зон Галилей, Иудей можонуудһаа,

⁸Иерусалим хотоһоо, Иордан голой саада бэеһээ, Тир, Сидон хотонуудай оршон тойронһоо сугларһан байгаа. Тэдэнэр булта Иисусай бүтээһэн хэрэгүүд тухайнь дуулаад, тэрээндэ ерэбэ.

⁹Иисус эдэ үй түмэн зондо шахуулжа, низа даруулшахагүйн тула онгосо бэлдээд байхыень шабинартаа захиба.

¹⁰Тэрэнэй ехэ олон хүнүүдые эмшэлэн эдэгээһэн хадань үбшэн хүнүүд тэрээндэ гараараа хүрөөд абаха һанаатайгаар Иисусай зүг руу түлхилсэжэ байгаа.

¹¹Досоогоо ада шүдхэртэй хүнүүд Иисусыг харахадаа, урдань хүгэдэн унаад: «Ши Бурханай Хүбүүн байнаш», – гэжэ хашхаралдадаг байгаа.

¹²Бурханай табисуурта байһыемни нэгэшье хүндэ бү мэдүүлэгты гэжэ Иисус ада шүдхэрнүүдтэ хатуугаар захирдаг һэн.

Иисус арбан хоёр элшэнэрээ шэлэжэ абаба

¹³Иисус хэдэн шабинараа өөртэйн хамта хада дээрэ гарахыень дурадхаба, тиигээд тэдэнь ябалсаба.

¹⁴Тэдэнэйнгээ дундаһаа Иисус арбан хоёрыень шэлэжэ абаад, элшэнэрээр томилоо бэлэй. Тэдэнь Иисустай хамта ябалсахаһаа гадна һайн Мэдээсэл дэлгэрүүлхэ уялгатай,

¹⁵ада шүдхэрнүүдые дараха эрхэ засагтай байгаа.

¹⁶Арбан хоёрой нэгэнь Симон байгаа, Иисус тэрэниие Пётр гэжэ нэрлээ.

¹⁷Баһа Яков ба Иоанн гэдэг Зэбэдэйн хоёр хүбүүд байлсаа. Иисус тэдэ хоёрто тэнгэрийн дуунай хүбүүд гэхэн удхатай «Боанергес» гэхэн нэрэ алдар үгэбэ.

¹⁸Элшэнэрэй тоодо Андрей, Филипп, Варфоломей, Матвей, Фома, Алфейн Яков хүбүүн, Фаддей, Симон Кананит,

¹⁹һүүлдэнь Иисуста урбаһан Иуда Искариот байгаа.

Иисус ба ада шүдхэрнүүдэй ноён Веельзевул

²⁰Иисусай гэртээ ерэхэдэнь, баһал хүн зон олоороо сугларжа, тэрэ шабинартаяа эдеэлхэшье забгүй болобо.

²¹Тэрээн тухай Иисусай түрэлхидынь дуулахадаа, ухааниинь муудаа байна гэжэ бодоод, тэрэнээ асархаяа ошобо.

²²Иерусалим хотоһоо ерэхэн Хуули заадаг багшанар: «Энэ хүн Веельзевулай, ада шүдхэрнүүдэй ноёной мэдэлдэ байна! Веельзевулай аша туһаар ада шүдхэрнүүдыешье дарана!» – гэжэ хэлсэбэ.

²³Тиигэхэдэнь Иисус тэдэ багшанарыг өөртөө дуудаад, хургаалта үгэнүүдые хэлэбэ: «Бодоод үзыт, сатана яжаа өөрыгөө дараха юм?



²⁴Хубааралдаад, хоорондоо дайралдажа байһан хаан орон удаан байнгүй бутарха.

²⁵Хубааралдаад, хоорондоо арсалдажа байһан гэр бүлэ удаан байнгүй халаха.

²⁶Сатанашье өөрынгөө урдаһаа эсэргүүсэн бодобол, удангүй хосорхо юм.

²⁷Бар хүсэтэй хүнэй гэртэ ороод, түрүүн эзэниенъ хүлижэ уяагүй һаа, хэншье эд зөөриенъ тоножо шадахагүйл. Эзэниенъ хүлиһэн хойноол гэр барааень дээрмэдэхэ бшуу.

²⁸Хүнэй үйлэдэһэн нүгэл шэбэлнүүдэй, хэлэһэн харата үгэнүүдэй хэдышье ехэ хара нүгэлтэй байбалнь, Бурхан тэдэниие хүлисэхэ юм,

²⁹харин Нангин һүлдые муушалһан муудхаһан хүниие Бурхан хэзээдэшье хүлисэхэгүй, тэрэ нүгэл шэбэлынъ хүниие хэтэ заяандаа дахажа ябаха юм гэжэ таанадта үнэн зүбые хэлэнэб».

³⁰Досоогоо ада шүдхэртэй байна гэжэ Хуули заадаг багшанарай хэлсэдэг хаданъ Иисус иимэ юмэ хөөрэхэн ушартай юм.

Иисусай эжы ба дүүнэрынь

³¹Иисусай эжынь, дүүнэрынь ерэбэ. Тэдэнэр газаа байгаад, тэрэниие дуудахыень гэр руу хүниие эльгээбэ.

³²Иисусые тойроод һууһан олон зон: «Хара даа, эжышни, дүүнэршни ерээд, шамайе хүлеэжэ байна», – гэбэ.

³³Тиигэхэдэнь Иисус: «Минии эжы хэн гээшэб? Минии аха дүүнэр хэд гээшэб?» – гэжэ урдаһаанъ һураба.

³⁴Тиигээд өөрыень тойроод һууһан зоние шэртэн хараад: «Эдэл минии эжы, минии аха дүүнэр гээшэ».

³⁵Бурханай эрхэ хүсэлые дүүргэжэ байһан хүн бүхэн лэ минии аха дүүнэр, эгэшэ дүүнэр, эжымни гээшэ», – гэбэ.



Марк 4

Таряшан тухай хургаалта үгэ

¹Иисус Галилей далайн дэргэдэ дахин хүн зониее хургаба. Тэрэниие тойроод олон мянган зоной суглархада, Иисус онгосодо хууха болобо. Онгосонь далайн уһанда, харин хүн зон эрье дээрэ зогсожо байгаа һэн.

²Тиигээд Иисус хургаалта үгэнүүдые хэрэглэн зондо ухаа зааба:

³«Шагнагты даа! Нэгэ таряшан таряа тарихаяа гараба.

⁴Үрэхээ сасахадань, зариманиинь харгын хажууда унаба, тэдэниинь шубууд ерэжэ тоншобо.

⁵Зарим үрэхэниинь хүрһэ багатай, шулуутай газарта унаба, тиигээд нимгэн хүрһэтэй газарһаа түргэн бултайба.

⁶Харин наранай гарахада, гүнзэги үндэхэлөөгүй зүлгэ ногоон уршыгаад хатажа байгаа.

⁷Баһа зарим үрэхэнүүд үүргэнэ соо унажа, хөөгтэ даруулаад, ургаса үгэжэ шадабагүй.

⁸Зарим үрэхэниинь үрэхэлтэй газарта унажа, ехэ хайн ургаса үгэбэ: тариһанда ороходоо гуша, жара, али зуу дахин ехэ ургаса хадагдаба.

⁹Тиигээд Иисус: «Шэхэтэй юм һаа, анхарагты», – гэжэ хэлэбэ.

хургаалта үгэнүүдэй зорилго

¹⁰Зоной тарахада Иисусай арбан хоёр элшэнэр, үшөө нэгэ хэды хүн тэрээнтэй үлөөд, хөөрэхэн хургаалта үгэнүүдээ тайлбарилжа үгэхыень гуйба.

¹¹Иисус тэдэндэ: «Бурханай хаан түрэ тухай гүн нюусанууд таанадтал тайлбариллагдана, харин гадуур байһан тэдэ зондо би хургаалта үгэнүүдээр лэ хөөрэнэ гээшэб.

¹²Тиимэхээ: „Тэдэнэр хараба, шэртэбэшье, юумэ обёорхогүй. Тэдэнэр сонособо, шагнабашье, юумэ ойлгохогүй. Хэрбээ юумэ обёордог,



ойлгодог наа, тэдэ Бурханда хандаха һэн, тиигээд Бурхан тэдэниие хүлисэхэ һэн“», – гэжэ хэлэбэ.

Таряашан тухай нургаалта үгэнүүдээ Иисус тайлбарилжа үгэнэ

13 Удаань Иисус нураба: «Нургаалта эдэ үгэнүүдые таанад ойлгоногүй аалта? Тиихэдээ бусад нургаалта үгэнүүдые яжа ойлгохотнай гээшэб?

14 Үнөөхи тарилгашамнай Бурханай үгэ тарина.

15 Бурханай үгэ дуулабашье, тэрээндэ гүйсэд һаналаа табяагүй хүндэ шолмос ерээд, сэдхэл зүрхэндэнь нуурижаагүй үгэ абаад арилшадаг – харгын хажууда таригдаһан үрэхэн тон энээндэл адли юм.

16 Шулуутай газарта таригдаһан үрэхэн тухай тайлбарилбал, иимэ: али нэгэ хүн үгэ шагнаад, тэрээниие абаһаар лэ баяртайгаар сахина,

17 зүгөөр тэрэ үгэ сэдхэлдэнь гүнзэгы үндэхэлээгүй, тиимэхээ удаан тогтоногүй. Үгын түлөө бэрхэшээлэй тудaa һаань, али мүрдэлгэ зоболонгуудай дайраа һаань, энэ хүн айһан хүрдэхэндөө Бурханай үгэхөө тэрэ дороо арсаха.

18 Үүргэнэ соо унаһан үрэхэн тухай удхалбал, иимэ байна: хэн нэгэн Бурханай үгэ шагнабашье,

19 энэ оршолонгой байдалда дашууран абтаһандаа, баялиг зөөридэ, тэрэ мэтын элдэб юмэнүүдтэ шунаһандаа үгын удха ойлгодоггүй, тиимэхээ тэрэ үгэ ямаршые үрэгүй байдаг.

20 Үрэхэлтэй хүрхэндэ ургаһан үрэхэн иимэ удхатай: Бурханай үгэ шагнаад, тэрэниие хэшээлтэйгээр сахижа байһан хүнүүд саашадаа аша туһатай юм. Нэгэ зариманиинь зуу дахин, нүгөөдүүлүнь жара дахин, бусадынь гуша дахин үлүү үрэ дүн асардаг».

Зулын гэрэл тухай

21 Иисус үргэлжэлүүлбэ: «Таанад зула аһаагаад, тэрэнээ ямар нэгэн амһартаар бүглэдэггүйт, али орон дороо табидаггүйт. Харин тэрэнээ үндэр табюур дээрэ табидаг ха юмта.

²²Ямаршые нюуса заабол эли болодог, ямаршые далда юумэн заабол мэдэгдэдэг юм.

²³Тиимэхээ шэхэтэй юм наа, анхарагты.

²⁴Дуулажа байһан юумээ анхаралтайгаар шагнагты! Ямар хэмжээгээр хэмжэнэбта, тэрэл хэмжээгээр, үшөө нэмээдшые Бурхан таанадта хэмжэжэ үгэхэ.

²⁵Ушарынь юуб гэбэл, юумэтэй байһан хүндэ нэмэгдэжэ үгтэхэ. Юумэгүй байһан хүнһөө һүүлшын юумэниинь абтаха».

Ургажа байһан үрэхэн тухай хургаалта үгэнүүд

²⁶Иисус үргэлжэлүүлэн хэлэбэ: «Бурханай хаан түрэ ямархан бэ? Бодоод үзэгты, нэгэ хүн газарта үрэхэ тарина,

²⁷тиигээд хүниндөө унтана, үдэртөө бодоод ябана, зүгөөр үрэхэниинь ургажал байна. Теэд хайшан гээд ургажа байһыень тэрэ хүн мэдэнэгүй.

²⁸Газар өөрөө үрэхыень ургуулна бшуу. Түрүүшээр ногоониинь бултайна, тиигээд залаална, хожомынь залаагаар дүүрэн орооһо таряан бии боложо эдеэшэнэ.

²⁹Тиин ургасын эдеэшэхэдэ хуряалгын саг боложо, үнөөхи хүн хадуураа баряад хадахаяа гарадаг юм».

Горчицын үрэхэн тухай хургаалта үгэнүүд

³⁰Иисус иигээд үүргэлжэлүүлбэ: «Зай, Бурханай хаан түрэ юунтэй адлиб? Ямар хургаалта үгэнүүдээр тэрэниие тайлбарилжа болохоб?

³¹Бурханай хаан түрэ болбол газарта һуулгагдаһан горчицын үрэхэнтэй адли юм. Тэрэ үрэхэн газар дэлхэйдэ ургадаг ургамалнуудай хамагай жэжэниинь юм.

³²Харин ургахадаа, тэрэ бүхы ургамалнуудһаа ехэ болодог, тэнгэриин шубуудай уурхайгаа заһажа боломоор һаглагар томо һалаануудые үгэдэг».

³³Хүнүүдтэй хөөрэлдэхэдөө Иисус бусадшые олон хургаалта үгэнүүдые хэрэглэжэ байгаа, тиихэдэ тэдэнэй ойлгожо абаха аргаар хургадаг байгаа.

³⁴Тэдэ зондо Иисус гансал хургаалта үгэнүүдээр хэлэдэг бэлэй. Харин шабинартайгаа гансаараа үлэхэдөө тэрэ бүхы юумэнүүдые тайлбарилжа үгэдэг хэн.

Иисусай шуурга номгоруулһан тухай

³⁵Тэрэл үдэшэлэн Иисус шабинартаа: «Далайн нүгөө эрьедэ гараябди», – гэжэ дурадхаба.

³⁶Иисус шабинартайгаа хүн зоние орхёод, онгосоороо далай гаталба. Баһа ондоошые онгосонууд хойноһоонь тамарба.

³⁷Гэнтэ хуй һалхин буужа, онгосонь далайн долгинодо сохюулаад, арайл шэнгээгүйхэн уһаар дүүрэшэбэ.

³⁸Энэ үедэ Иисус тархи дороо юумэ дэрлээд онгосын һүүл хабида унтажа байгаа. Шабинарынь багшаяа һэрюулэн: «Багша! Бидэнэй үхэхээ байхада, танда хамаагүй гээшэ гү?» – гэлдэбэ.

³⁹Тиигэхэдэнь Иисус хүл дээрээ бодоод, һалхи саража, долгинуудта: «Аалин бологты, намдагты!» – гэжэ захирба. Тэрэ дороо һалхин намдажа, далай долгилхоёо болижо, оршон тойрон огто аалин намдуу болошобо.

⁴⁰Тиигээд Иисус шабинартаа хандажа: «Таанад юундэ иитэрээ айбабта? Этигэл хүзэггүйл байна гүт?» – гэбэ.

⁴¹Тэдэнь бүришые ехээр айн хүрдэһэн юумэд: «Һалхиешые, далайешые мэдэлдээ оруулаад байдаг энэ хүмнай хэн гээшэб?» – гэжэ өөһэд дундаа хэлсэбэ.

Марк 5

Иисус ада шүдхэртэй хүниие эдэгээбэ

- ¹Иисус шабинартайгаа Галилей далай гаталаад, Гераса хотын шадар ерэбэ.
- ²Тэрэнэй онгосоһоо буухатайнь сасуу досоогоо ада шүдхэртэй нэгэ хүн агы нүхэн хуурсагуудһаа шамдуухан гаража ерэбэ.
- ³Тэрэ хүн агы нүхэн хуурсагуудта байрладаг байгаа, тиихэдэ хэншье тэрэниие гэнжээршье хүлин барижа шададаггүй бэлэй.
- ⁴Тэрэнэй гар хүл оло дахин гэнжээр хүлибэшье, тэрэ гэнжэнүүдээ таһа татадаг, түмэр шүдэрнүүдые эбдэдэг байгаа. Тиигээд хэншье тэрэниие диилэжэ мэдэлдээ абаха аргагүй бэлэй.
- ⁵Тэрэ хүн үдэр хүнигүй хада уулаар гү, али агы нүхэн хуурсагуудаар тэнэжэ, хашхаржа, бэеэрээ шулуу нэшэжэ байдаг һэн.
- ⁶Тэрэ хүн Иисусые холоһоо хараһаар хажуудань гүйжэ ерээд, хүлдэнь унажа:
- ⁷«Иисус, Дээдын Бурханай Хүбүүн, би танда ямар хамаатай хүнбиб? Намайе бү зобоогыш даа гэжэ Бурханай нэрээр гуйнаб!» – гэжэ байгаад бархирба.
- ⁸Тиигэжэ бархирһанайнь ушар хэлэбэл, Иисус ада шүдхэртэ: «Энэ хүнһөө гара!» – гэжэ захирһан байгаа.
- ⁹Тиигээд Иисус: «Нэрэшни хэн бэ?» – гэжэ һураба. «Үй түмэн гэжэ нэрэтэйб, юундэб гэхэдэ, бидэ угаа олонбди», – гэжэ үнөөхи хүниинь харюусаба.
- ¹⁰«Энэ орон нютагһаа ада шүдхэрнүүдые бү үлдыт даа», – гэжэ тэрэ дахин дахин Иисусые гуйба.
- ¹¹Тэрэ үедэ хадын хаяагаар хүрэг гахай бэлшэжэ байгаа.
- ¹²«Маанадые энэ гахайн хүрэгтэ эльгээгыш даа, гахайнууд соо орохыемнай зүбшөөгыш даа», – гэжэ ада шүдхэрнүүд Иисусые гуйба.



¹³Иисусай зүбшөөхэдэ, ада шүдхэрнүүд үнөөхи хүнһөө гараад, гахайнууд руу оробо. Тиин хоёр мянган тооной шахуу гахайн хүрэг эгсэ эрьһээ далай руу хүрэжэ шэнгэшөө бэлэй.

¹⁴Гахай манаашад хото хүдөөгөөр ябаад, энэ ушар тухай зондо дуулгаба. Тиигээд хүн зон юунэй болоһые харахаяа тэрэ газарта ерэжэ байгаа.

¹⁵Тэдэнэй Иисуста ерэхэдэнь, үй түмэн ада шүдхэрнүүдтэ барюулаатай байһан хүн хубсалаад, элүүр ухаантай нууба, тиимэһээ хүн зон ехээр айжа хүрдэбэ.

¹⁶Ада шүдхэрнүүдтэ барюулаатай байһан хүнтэй, гахайн хүрэгтэй юунэй болоһые хараһан зон суглараашадта хөөрэбэ.

¹⁷Тиигэхэдэнь хүн зон нютагһаань гаража ошохые Иисусые гуйба.

¹⁸Иисусай онгосоодоо нуужа байхадань, урдань досоогоо ада шүдхэрнүүдтэй байһан хүн суг ябалсахаар зүбшөөл гуйба.

¹⁹Тээд Иисус зүбшөөбэгүй, харин: «Гэртээ харижа, шамда Дээдын Эзэнэй хэды ехэ юумэ бүтээһэн тухай, үршөөл хайратай байһан тухай гэртэхиндээ хөөрэжэ үгэ», – гээ һэн.

²⁰Тиимэһээ тэрэ хүн Декаполис гэдэг арбан хотын оршон тойроноор ябажа, тэрээндэ Иисусай хэды ехэ юумэ бүтээһэн тухай хүн бүхэндэ хөөрэбэ. Энэ ушар тухай дуулаһан лэ хүн бүхэн гайхажа ханаба.

Үхэнэн басаган ба үбшэн эхэнэр тухай

²¹Иисус онгосоороо дахин Галилейн далай гаталжа, нүгөө эрьедэнь гараба. Тэндэнь тэрэниие тойроод олон зон суглараа бэлэй.

²²Мүргэлэй гэрэй дарганарай нэгэн болохо Иаир гэжэ нэрэтэй хүн тиишээ ерээ. Иисусые хараад, тэрэ хүлдэнь унажа,

²³ехээр гуйжа оробо: «Бага басагамни үхэхээ хэбтэнэ. Ошожо, тэрэнииемни гараараа хүрыш даа, тиигээ һаашни тэрэмни эдэгэхэ, амиды байхал».



²⁴Иисус тэрэ хүнтэй гэртэнь ошобо. Хойноһоонь үнөөхил олон зон дахасалдан, эндэ тэндэһээнь түрисэлдэн ябаба.

²⁵Тэрэ зоной дунда арбан хоёр жэлэй турша соо шуһа гоожоод тогтодоггүй үбшэнтэй нэгэ эхэнэр ябалсаа.

²⁶Тэрэ эхэнэр олон эмшэдээр ябажа, бүхы алта мүнгээ бараһаншые һаа, оройдоо һайжараагүй, харин бүри муудажал байгаа.

²⁷Иисус тухай дуулахадаа, тэрэ улад зоноор түрисэлдэн Иисусай араһаа дүтэлөөд, мэдүүлэнгүйгөөр хубсаһандань халта хүрэбэ.

²⁸Иисусай хубсаһандань халташые хүрөө һаа эдэгэхэб гэжэ тэрэ һанажа байгаа ха юм.

²⁹Тиигэхэтэйнь сасуу үнэхөөрөө шуһаниинь гарахаяа болижо, тэрэ эдэгэһэнээ мэдэрбэ.

³⁰Тэрэл үедэ Иисус хүсэ шадалайнгаа буураһые ойлгобо. «Хэн намайе хүрөөб?» – гэжэ тэрэ асууба.

³¹Багшынгаа юун тухай һураһыень ойлгоогүй шабинарынь: «Таниие тойроод байһан зон эндэ тэндэһээтнай түринэл. „Хэн намайе хүрөөб“ гэжэ юундэ асуугаа юмта?» – гэбэ.

³²Тиихэдэнь Иисус хубсаһандань хүрэхэн хүниие харахаяа тойрон шэртэбэ.

³³Үнөөхи эхэнэр өөртэйнь юунэй ушарһые тухайлаад, айһан һүрдэһэн, шэшэрһэн юумэ Иисуста дүтэлэн, урдань һүгэдэн унажа, сэхыень хэлэбэ.

³⁴«Басаган, этигэлшни шамайе абараа. Ши амгалан тайбан, элүүр энхэ, үбшэ хабшангүй ябыш даа», – гэжэ Иисус эхэнэртэ хэлэбэ.

³⁵Тиигэжэ байтарынь мүргэлэй гэрэй даргада хэдэн хүн ерэжэ: «Басаганшни наһа бараа, ши багшые бү тухашаруула», – гэжэ хэлэбэ.

³⁶Зүгөөр Иисус хэлээшыень тоонгүй: «Бү ай. Этигээд лэ бай», – гэжэ Иаирта хэлэбэ.



³⁷Тиигээд Пётр, Яков, тэрэнэй Иоанн дүү гурбанһаа ондоо хэндэшье хойноһоонь ябахые Иисус зүбшөөбэгүй.

³⁸Тэдэ мүргэлэй гэрэй даргында ерээд, зоной хөөрсэгэнэхые, бахардан үймэхые, шангаар уйлалдахые, бархиралдахые хараба.

³⁹Иисус гэртэ ороод: «Юундэ иитэрээ бархиралдана гээшэбта? Басаган үхөөгүй, миин лэ унтажа байнал», – гэбэ.

⁴⁰Тиигэхэдэнь тойроод байһан улад зон Иисусые наада барин энеэлдэбэ. Иисус бүгэдэ зоние гаргаад, үнөөхи басаганай аба эжытэй, гурбан шабинартайгаа басаганай хэбтэһэн таһалгада оробо.

⁴¹Тиигээд басаганай гарһаань баряад: «Талита кум!» – гэбэ (энэнь: «Басаган, бодо!» – гэхэн удхатай).

⁴²Басаган тэрэ дороо бодоод, таһалгаараа ябаба. Тэрэ арбан хоёр наһатай байгаа. Энэ ушарай гэршэ болоһон зон ехэл гайхажа ханаба.

⁴³Гэхэдэ Иисус энээн тухай нэгэшье амитанда бү дуулгагты гэжэ захираа һэн. Тиигээд: «Басаганда эдихэ юумэ үгэгты», – гэжэ хэлээ.

Марк 6

Назарет хотынхин Иисуста үһөөрхэбэ

¹Тэндэһээ Иисус шабинартайгаа хамта түрэнэн хотодоо бусажа ерэбэ.

²Тэрэ суббото болоходо хүн зоние хургахаяа мүргэлэй гэртэ ошобо. Тэрэниие шагнаһан олон зон гайхалдажа: «Яжа эдэ бүхэниие энэмнай бүтээнэ гээшэб? Иимэ гайхамшагта үйлэ хэрэгүүдые бүтээхэ сэсэн ухаан, хүсэ шадал тэрээндэ хаанаһаа заяагдаа гээшэб?

³Үгы, энэмнай дархан бэшэ һэн гү? Мариягай хүбүүниинь, Яковай, Иосиин, Иудын, Симонэй ахань бэшэ һэн гү? Дүү басагадынь энэ хотодо маанадаар ажаһууна бэшэ аал?» – гэлсэбэ. Тиигэжэ тэдэ зон тэрэнэй талаар һэжэглэжэ байгаа.

⁴Харин Иисус тэдэндэ: «Лүндэншэдые нютагынхидһаань, түрэлхидһөө, гэр бүлэһөөнь бусад зон булта хүндэлжэ ябадаг юм», – гэжэ хэлэбэ.



⁵Иимэл ушарһаа Иисус нютагтаа гайхамшагта хэрэгүүдые бүтээхэ аргагүй боложо, үсөөхэн лэ үбшэнтэниие гараараа адислан эдэгээбэ.

⁶Нютагайнгаа зоной тиимэ этигэл хүзэггүй байдалые Иисус гайхаһаар лэ байгаа.

Иисус арбан хоёр элшэнэртээ захяа заабари үгэнэ

Иисус оршон тойрон тосхонуудаар ябажа, зоние хургаба.

⁷Тэрэ арбан хоёр шабинараа дуудаад, ада шүдхэрнүүдые дараха эрхэ засаг олгон, хоёр хоёроорнь иишэ тиишэнь эльгээбэ.

⁸Тиигэхэ зуураа тэдэндээ иимэ захяа үгэбэ: «Замдаа гансал тулга таягтай гаража байгты. Эдэе хоол гү, али туулмаг сүүмхэ гү, али алта мүнгэ абаад ябахын хэрэг үгы.

⁹Сандаали үмдөөд гарагты, гэхэтэй зэргэ хэлгэхэ хубсаһа абаад ябахын хэрэг үгы.

¹⁰Ямар нэгэн гэртэ уригдаһан байбал, хотоһоо гаража ошотороо тэрэл айлдаа байха ёһотойт.

¹¹Хэрбээ ямар нэгэ нютагта таанадые угтажа абаха дурагүй гү, али хэлэһыетнай дуулаха дурагүй байбал, хүлдэтнай халдаһан тооһо хэжэрэн дурагүйлхэнэнөө мэдүүлээд, тэрэ нютагһаа гаража ошогты».

¹²Тиигэхэдэнь элшэнэр замда мордожо, нүгэлөө орхёод, Бурханда хандагты гэжэ хүн бүхэндэ номнобо.

¹³Тэдэнэр ада шүдхэрнүүдые олоор гаргажа, үбшэн зоние олива тоһоор түрхээд эдэгээжэ байгаа.

Уһаар арюудхагша Иоаннай нүгшэхэн тухай

¹⁴Иисус тухай нураг хаа хаанагүй таража, Иродойшые һонорто хүрэбэ. Зарим хүнүүд: «Энэ Уһаар арюудхагша Иоанн амидыраад, иимэ гайхамшагта хэрэгүүдые бүтээнэ», – гэлсэжэ байба.

¹⁵Нүгөө зариман: «Энэ Илия байна», – гэбэ. Үшөө нүгөөдүүлынь: «Эртэ урда үеын лүндэншэдтэл адли лүндэншэн хаш», – гэлсэбэ.



¹⁶Харин Ирод энээн тухай дуулахадаа: «Энэ намда толгойгоо таһа сабшуулһан Иоанн амидыраа», – гэжэ хэлэбэ.

¹⁷⁻¹⁸Ушарынь хэлэбэл, Ирод Филипп дүүгэйнгээ Иродиада һамгатай һууһан байгаа. Тиигэхэдэнь Иоанн: «Ши дүүгэйнгээ һамгатай гэрлэхэ ёһогүйш», – гэжэ Иродтэ хэлээ һэн. Тиимэһээл Ирод Иродиадын һайшаалда хүртэхын тула Иоанны түрмэдэ һуулгаһан байгаа.

¹⁹Тиихэдэ Иродиада Иоаннда ехээр хороо бусалжа, тэрэниие алахая һанаа, гэхэдэ Иродһээ боложо хүсэлөө бээлүүлхэ аргагүй байгаа.

²⁰Иоаннай эрхим һайн, гэгээн хүн байһыень мэдээд, Ирод тэрээнһээ айдаг, тэрэниие хамгаалдаг бэлэй. Иоаннай хэлэһэн юумэнүүдэй һанааень зобоодогшые һаань, Ирод тэрэниие шагнаха дуратай байгаа, шагнадагышые байгаа.

²¹Одоошые Иродиадада таарамжатай саг тудаб. Ирод түрэхэн үдэртөө дашарамдуулан, бүхы түшэмэлнүүд, сэрэгэй дарганар, Галилейн нэрэ хүндэтэй хүнүүдые суглуулаад, ехэ найр хэбэ.

²²Тэндэ Иродиадын басаган хатаржа, Иродтэ, айлшадтань ехээр һайшаагдаба. Тиимэһээ Ирод тэрээндэ: «Дуратай юумээ эри, хүсэхэн лэ юумыешни үгэхэб!» – гэбэ.

²³«Эриһэн лэ юумыешни үгэхэб, хаан оронойнгоо хахадыньшые үгэхэдэ бэлэнби», – гэжэ Ирод тангариглаһан байгаа.

²⁴Басаган эжыдээ ошожо: «Юу эрихэбиб?» – гэжэ һураба. «Уһаар арюудхагша Иоаннай толгой эри», – гэжэ эхэнь харюусаба.

²⁵Басаган һөөргөө хаанда түргэхэн ошожо: «Уһаар арюудхагша Иоаннай толгой табак дээрэ табяад, намда энэ гэхээр үгэхыешни хүсэнэб», – гэбэ.

²⁶Ирод хаан һанаата болобошые, бүхы айлшадай урда үгөө үгэхэн тула басаганай хүсэл дүүргэнгүй байха аргагүй байба.



²⁷Ирод тэрэ дороо харуулайнгаа сэрэгшэдэ түрмэдэ байһан Иоаннай толгой таһа сабшаад, абаад ерэхыень захирба.

²⁸Тэрэ сэрэгшэнь Иоаннай толгойе табаг дээрэ табяад, басаганда асаржа үгэбэ, тэрэниенъ басаган эхэдээ үгэбэ.

²⁹Иоаннай шабинарынъ энээниие дуулаад, бэеыень агы нүхэн хуурсагта абаашажа хүдөөлүүлһэн байгаа.

Иисус табан хилээмээр таба мянган хүниие садхааба

³⁰Элшэнэр Иисустаа бусажа ерээд, юу хэһэнээ, улад зондо юу заһанаа хөөрэбэ.

³¹Ехэ олон зоной ерэжэ ошожол байһан хада Иисус элшэнэртэйгээ эдихэ уухашье сүлөөгүй байгаа. Тиимэһээ тэрэ шабинартаа: «Эзэгүй газарта ошожо, нэгэ бага амарая», – гэжэ дурадхаба.

³²Тиигээд тэдэнэр онгосодоо һуугаад, эзэгүй газар руу тамарба.

³³Тээд олон зон тэдэнэй тамаржа ябахые хараад, хайшаа ошохыень тухайлжа байгаа. Тиимэһээ элдэб хотын зон Иисусай ба шабинарайнь урда гаража нуурай эрьеэр гүйлдэбэ.

³⁴Иисус онгосоһоо буухадаа, тэндэ олон зоной сугларһые хараба, хонишонгүй хонидтол мэтэ байһан тэдэниие хайрлан, олон юумэнүүдтэ һургажа эхилбэ.

³⁵Үдэшэ болоходо шабинарынъ багшадаа ойртоод: «Мүнөө орой болошоо, энэ эзэгүй газар байна.

³⁶Тиимэһээ хажуугаархи тосхон, отогуудаар орожо, эдихэ юумэ худалдажа абахыень эдэ зоноо табиит даа», – гэбэ.

³⁷«Таанад өөһэдөө эдэндэ эдихэ юумэ үгэгты», – гэжэ Иисус харюусаба. «Эдэ зоние эдеэлүүлхын тула хоёр зуун динари мүнгөөр хилээмэ худалдажа абахамнай гээшэ гү?» – гэжэ шабинарынъ гайхаба.

³⁸«Хэды хилээмэтэй байнабта, хараад ерэгты», – гэбэ Иисус. Тэдэнь ошожо хараад: «Табан монсогор хилээмэтэй, хоёр багахан загаһатай байнабди», – гэжэ дуулгаба.

³⁹Тиигэхэдэнь Иисус эдэ зоноо бүлэг бүлэгөөр хубаагаад, зүлгэ ногоон дээрэ нуулгагты гэжэ шабинартаа захирба.

⁴⁰Хүн зон зуу зуугаар, али таби табяар хубааралдан, бүлэгүүд болон нуубад.

⁴¹Тиигээд Иисус үнөөхи табан монсогор хилээмээ, хоёр загаһаяа абаад, тэнгэри өөдэ шэртэн, Бурханда баяр баясхалан хүргэбэ. Хилээмээ хухалан, хүн зондо хүртөөжэ хубаахыень шабинартаа үгэбэ. Удаань хоёр загаһаяа хухалжа, хүн зондо хүртүүлбэ.

⁴²Хүн бүхэн дураараа эдижэ садаа хэн.

⁴³Тиигээд шабинарынь арбан хоёр түрсүүгээр дүүрэн хилээмэнэй, загаһанай үлөөдэһэ суглуулба.

⁴⁴Хамта дээрэ эдеэлхэн зоной тоодо табан мянга шахуу гансал эрэшүүл байлсаа хэн.

Иисус уһан дээгүүр ябана

⁴⁵Тиигэмсээрээ Иисус шабинараа онгосодо нуулгажа, нуурай нүгөө бээдэ оршоһон Бетсаида хото руу өөрөөнь түрүүлэн тамархыень захирба. Харин өөрөө улад зоной таратар үлөө бэлэй.

⁴⁶Зоной тарахада Иисус хада өөдөө зальбархаяа гараба.

⁴⁷Үдэшэ болоходо тэрэ үнөөхи газартаал гансаараа байба, харин шабинарынь онгосоороо далайн тэгэндэ хүрэжэ байгаа.

⁴⁸Урдаһаань үлөөһэн һалхинтай тулалдажа байһан шабинараа харахадаа, Иисус хүниин дүрбэдэхи харуулай үеэр уһан дээгүүр ябаад, шабинартаа ошобо.

⁴⁹Тэрэнэй уһан дээгүүр ябаһыень хараһан шабинарынь сошожо, хии үзэгдэл гэжэ һанаад, айһандаа хашхаралдаба.

⁵⁰Тэрэниие хараад, шабинарынъ бултадаа ухаа алдаба. Харин Иисус тэдээндэ: «Зоригоо бү алдагты. Би Иисус байнаб, бү айгты», – гэбэ.

⁵¹Тиигээд Иисус шабинараингаа онгосодо нууба, халхиншые намдаба. Харин шабинарынъ гайхахын ехээр гайхаба.

⁵²Тэдэнэр хилээмэнтэй бүтээһэн гайхамшагта хэрэгэй үнэн удхые ойлгоогүй, тэдэнэй ухаан бодолынъ балартаад байгаа бшуу.

Иисус Геннисарет хотодо үбшэн зоние эдэгээнэ

⁵³Иисус шабинартайгаа далайе гаталжа, Геннисаредэй газарта хүрэжэ ерээд, онгосоо эрье дээрэ гаргаба.

⁵⁴Онгосоһоо буухатайнъ сасуу тэндэхи улад зон Иисусые таниба.

⁵⁵Тиигээд оршон тойронхи бүхы нютагуудаар гүйжэ, Иисусай хаана байһыень дуулахадаал, тиишэнь үбшэн зоние дэбисхэртэйнъ асаржа байгаа.

⁵⁶Иисусай хаанашые ябахата, хото хүдөөгөөршые ороходо, хүнүүд тэрээндэ үбшэн хүнүүдые асаржа, хубсаһандатнай халташые хүрэхыень зүбшөөгөйт даа гэжэ гуйдаг байгаа. Тиин хубсаһанданъ гараараа хүрөөд абаһан бүхы хүнүүд эдэгэшэдэг бэлэй.

Марк 7

Үбгэ эсэгэнэрэй нургаал

¹Иерусалимһаа хэдэн фарисейнүүд, Хуули заадаг зарим багшанар ерээд, Иисусые тойрон сугларба.

²Иисусай зарим шабинарай гараа гуримай ёһоор угаангүй эдеэлжэ байхые тэдэ обёорбо.

³Фарисейнүүд, бусадшые бүхы еврейнүүд хуушан заншалнуудаа наринаар сахижа, гар угаалгын тусхай ёһололгүйгөөр эдеэ хоолдо хүрэдэггүй байгаа.

⁴Худалдаа наймаанай газарһаа юумэ асараад, өөһэдыгөө угаажа арюудхаагүй һаа, тэдэ эдидэггүй байгаа. Мүн тэдэ аяга шанагаа,



амһарта табагаа, забьяануудаа, һандали һуудалнуудаа оро дэрээ угааха гэхэ мэтын ондоошые заншал гуримуудые сахидаг бэлэй.

⁵Тиимэхээ фарисейнүүд, Хуули заадаг багшанар Иисуста хандан: «Шабинаршни юундэ үбгэ эсэгэнэрэймнай зааһан заншалнуудые сахинагүйб? Тэдэшни яахадаа гараа угаангүйгөөр эдеэлнэб?» – гэбэ.

⁶Иисус харюудань хэлэбэ: «Хоёр нюурта таанад тухай Бурханай хэлэһые Исаяя лүндэншэ үнэн зүбөөр буулгажа бэшээ юм: „Эдэ зон намайе миин лэ үгөөрөө хүндэлөөд, харин зүрхэ сэдхэлдээ нам тухай огто бодоногүй.

⁷Хүнүүдэй зохёоһон ёһо гуримуудта һургажа байхадаа, тэдэ дэмы намда мүргэнэ даа“.

⁸Таанад Бурханай захяа заабаринуудһаа арсаад, хүнэй зааһан ёһо гуримуудые сахибат.

⁹Таанад Бурханай захяа заабаринуудые гурим заншалнуудаараа арга мэхэтэйгээр һэлгэжэ шададаг байнат.

¹⁰„Аба эжы хоёроо хүндэлэ“, „Аба эжы хоёроо муушалһан хүн үхэлдэ хүртэхэ ёһотой“ гэжэ Моисейгээр дамжуулан Бурхан хэлэһэн байгаа.

¹¹Харин таанад эхэ эсэгэдээ туһалха юумэтэй байгаад, „Энэшни Корбан“, ондоогоор хэлэбэл, Бурханда үргөөтэй юм гэхэнь зүб гэжэ зониие һургахадаа,

¹²аба эжыдээ ямаршые туһа бү хүргэгты гэжэ һурганат.

¹³Тиигэжэл таанад Бурханай захяа заабариие өөһэдынгөө тогтооһон ёһо заншалаар һэлгэнэт, тиин үшөөшые олон иимэрхүү юумэнүүдые таанад үйлэдэжэ байдагта».

Ямар юумэнүүд хүниие бузарланаб?

¹⁴Иисус дахин улад зониие өөртөө дуудажа хэлэбэ: «Хүн бүхэн хэлэһиемни шагнажа, ойлгохые хэшээгты!

¹⁵Гаднаһаа досоотнай орожо байһан юумэн таанадые бузарладаггүй юм. Харин досооһоотнай гаража байһан юумэн таанадые бузарладаг.

¹⁶Шэхэтэй юм һаа, анхарагты».

¹⁷Иисусай улад зоние орхёод гэртэ ороходонь, хэлэһэнээ манда тайлбарилжа үгыт гээд шабинарын тэрэниие гуйба.

¹⁸«Мүнөө болотор таанад хэлэһыемни ойлгобогүй гээшэ гүт? Гаднаһаа зосоотнай ороһон ямаршые юумэн үнэндөө таанадые бузарлажа шадахагүй,

¹⁹юундэб гэхэдэ, тэрэ юумэн танай зүрхэндэ ороно бэшэ, харин танай хотондо ороод, һүүлдэнь бэеһэтнай гаргагдадаг ха юм». (Иигэжэ хэлэхэдэ Иисус ямаршые эдэе хоолые эдихэдэ зохихо юм гэжэ батална гээшэ).

²⁰Тиигээд Иисус үргэлжэлүүлбэ: «Досооһоотнай гарадаг юумэн таанадые бузарладаг гээшэ.

²¹Досоотнай, һанаа зүрхэндэтнай нүгэлтэ хүсэлэнгүүд түрэжэ, таанадые ташаяангы ябадалда хүргэдэг, хулгай хүүлэдэг, алаха хюдаха тээшэ,

²²эрэдэе гү, али эхэнэртээ урбаха тээшэ түлхидэг, хомхой сэдхэлтэй, хара һанаатай болгодог, худал хуурмаг, зальхай ябадал, атаа жүтөө түрүүлдэг, хэрүүл ама гаргадаг, бардам зан, тэнэг ааша гаргадаг.

²³Эдэ бүхы нүгэлтэ юумэнүүд досооһоотнай гараад, өөһэдыетнай бузарладаг юм».

Эхэнэрэй хүзэг этигэл тухай

²⁴Иисус Галилейһээ гаража, Тир хотын шадар ерэжэ, нэгэ гэртэ зогсобо. Эндэ ерэхэн тухайгаа хүнүүдтэ мэдүүлхэ дурагүй байбашье, танигдангүй байжа шадабагүй.

²⁵Ада шүдхэртэ барюулһан басаганай эхэнь Иисус тухай дуулаад, тэрээндэ ерэжэ, хүлдэнь унаба.

²⁶Еврей-бэшэ тэрэ эхэнэр Сирийн Финики гэжэ газарһаа гарбалтай байгаа. Басагыемни бариһан ада шүдхэрые гаргажа үгыт даа гэжэ тэрэ эхэнэр Иисусые гуйба.

²⁷Харин Иисус тэрэ эхэнэртэ: «Нэн түрүүн үхибүүдые садхааха хэрэгтэй. Тэдэнэй эдихэ хоол абаад, нохойнуудта хаяхань зохихогүй юм», – гэбэ.

²⁸«Тиимэшьел даа, Дээдын Эзэн, теэд шэрээһээ унаһан үхибүүдэй үлөөдэһые нохойнуудшые эдидэг ха юм», – гэжэ үнөөхи эхэнэрын харюусаба.

²⁹«Зүб даа энэ харюушни. Ши гэртээ хари, басаганайшни досооһоо ада шүдхэр гаража тонилоо», – гэжэ Иисус эхэнэртэ хэлэбэ.

³⁰Гэртээ ерээд, тэрэ эхэнэр басаганайгаа орон дээрээ хэбтэхыень хараба; досоохи ада шүдхэрын гаража ошоһон байба.

Иисус хэлэгүй дүлии хүниие эдэгээбэ

³¹Тирэй шадархи газарһаа гараад, Иисус Сидон хотоор дайраад, Галилей далай тээшэ зүглэбэ. Замдаа тэрэ Декаполис гэжэ нэрэтэй арбан хотын хажуугаар үнгэрбэ.

³²Хэдэн хүн тэрээндэ дүлии, арай шамай дуугардаг хүниие асаржа, дээрэнь гараа табижа адислыт даа гэжэ Иисусые гуйба.

³³Иисус тэрэниие гансаарыень зонһоо зайсуулаад, шэхэнүүдтэнь хургануудаа хэбэ, тиигээд тэдээн дээрээ нёлбоод, хэлэндэнь халта хүрэбэ.

³⁴Тиигээд огторгой өөдэ хаража, ехэтэ һанаа алдаад: «Эффата!» (энэнь «Нээгдыш!» гэхэн удхатай) – гээд үнөөхи хүндөө хэлэбэ.

³⁵Тиигэмсээрнь тэрэ хүн дары дууладаг, ямаршые бэрхэшээлгүй хэлэдэг болошобо.

³⁶Хэһэн юумэн тухаймни хэндэшье бү дуулгаарайгты гэжэ Иисус зондо захирба. Теэд тэрэнэй хорихо тумань, зон бүришье ехээр энэ ушар тухай хэлсэжэ байгаа.

³⁷Дуулаһан зон булта аргагүй ехээр гайхалдажа: «Иисус ямаршье юумые найнаар хэнэ. Дүлии зоние дууладаг болгоно, хэлэгүй зоние дуугардаг болгоно», – гэлсэжэ байгаа.

Марк 8

Иисус дүрбэ мянган хүниие садхааба

¹Тэдэ үдэрнүүдтэ дахин ехэ олон зон Иисусые тойроод сугларба. Тэдэ зоной эдихэ юумэгүй болоходо, Иисус шабинараа дуудажэ хэлэбэ:

²«Би эдэ зоние хайрланаб. Тэдэ намтай гурбан үдэр байлсаа, теэд мүнөө эдихэ юумэгүй болоод байна.

³Тэдэнэй зариманиинь холоһоо ерээ. Тиимэһээ үлэн хоһон гэртэнь табибални, тэдэ замдаа һуларжа ядаржа магадгүй».

⁴«Теэд эзэгүй хоһон энэ газарта эдэ зоние бултыень садхааха хилээмэ хүн хаанаһаа олохоб?» – гэжэ шабинарын урдаһаань хэлэбэ.

⁵«Таанадта хэды шэнээн хилээмэ байнаб?» – гэжэ Иисус һураба. «Долоон жэжэхэн монсогор хилээмэн байна», – гэжэ шабинарын харюусаба.

⁶Иисус улад зоние һуухыень захирба. Тиигээд үнөөхи долоон хилээмээ абаад, Бурханда баяр баясхалан хүргэбэ. Хилээмээ хухалан, хүн зондо хүртөөжэ хубаахыень шабинартаа үгэбэ. Шабинарын хубааба.

⁷Үшөө тэдэ хэдыхэн загаһатай һэн. Иисус тэдэнэй түлөө Бурханда баясхалан хүргөөд, тэрэ загаһа хубаажэ үгэхыень шабинартаа захиба.

⁸⁻⁹Дүн хамтадаа дүрбэн мянган шахуу хүн булта дураараа эдижэ садаа, үшөө тиихэдэ эдээнэй үлөөдэһэн долоон түрсүүгээр дүүрэн суглараа. Иисус хүн зоноо тараагаад,



¹⁰шабинартайгаа хамта онгосодо нуужа, Далмануфын газар нютаг руу таварба.

Тэнгэригээ баталагдаһан гайхамшагта тэмдэг тухай

¹¹Хэдэн фарисейнүүд Иисуста ерэжэ, үгөөр булясалдаба. Тиигээд тэрэниие туршахаяа һэдэжэ, тэнгэригээ баталагдаһан гайхамшагта дүлгэ тэмдэг харуулыш даа гэбэ.

¹²Иисус хүндөөр һанаа алдажа: «Оршон үеын зон яахадаа гайхамшагта дүлгэ тэмдэг харуулхые шаарданаб? Зүб даа, ямаршые тиимэ юумэн тэдэ зондо харуулагдахагүй», – гэжэ хэлээ һэн.

¹³Тиигэмсээрээ тэрэ фарисейнүүдые орхёод, дахин онгосодоо нуугаад, далайн нүгөө эрье руу таварба.

Фарисейнүүдэй ба Иродэй эһээбэри

¹⁴Шабинарынь хилээмэ абахаяа мартажа, онгосодонь тэдэндэ оройдоол гансахан монсогор хилээмэн байгаа.

¹⁵«Һэргэг байгты! Фарисейнүүдэй, Иродэй эһээбэригээ болгоомжолжо ябагты», – гэхэн һэргылэмжэ Иисус шабинартаа үгэбэ.

¹⁶Шабинарынь өөһэд хоорондоо: «Маанадта хилээмэнэй үгы байһан дээрэһээ тиигэжэ хэлээ ёһотой», – гэжэ тухайлба.

¹⁷Юун тухай хэлсэжэ байһыень мэдээд, Иисус тэдэндээ хэлэбэ: «Хилээмэгүй байһан тухайгаа юундэ хэлсэбта? Мүнөө болотор мэдэнэгүй, ойлгоногүй гээшэ гүт? Ухаан бодолтнай тиимэ мунхаг байна гээшэ гү?

¹⁸⁻¹⁹Нюдэтэй байгаад, харанагүй гээшэ гүт? Шэхэтэй аад лэ, дууланагүй гээшэ гүт? Табахан монсогор хилээмэ табан мянган хүндэ хубаажа үгэхэдэмни, хэды түрсүүгээр дүүрэн үлөөдэһэ суглуулһанаа һананагүй аалта?» «Арбан хоёр түрсүүг», – гэжэ шабинарынь харюусаба.



²⁰«Тиигээд долоон хилээмэ дүрбэн мянган хүндэ хубаахадамни, хэды түрсүүгээр дүүрэн үлөөдэһэ суглуулаа һэмта?» – гэжэ Иисус һураба. «Долоон түрсүүг», – гэжэ шабинарынъ харюусаба.

²¹«Теэд юун тухай хэлэһыемни мүнөөшье болотор ойлгоногүй гээшэ гүт?» – гэжэ Иисус дахин һураба.

Бетсаида хотодо Иисус һохор хүниие эмнэбэ

²²Иисусай шабинартайгаа Бетсаида хото ерэхэдэнь, хэдэн хүн тэрээндэ һохор хүниие хүтэлжэ асараад, гараараа адис хүртүүлэн эдэгээхыень гуйба.

²³Иисус тэрэ һохор хүниие гарһаань барижа, тосхонһоо хүтэлэн гаргаба. Тиигээд нюдэндэнь нёлбоод, дээрэнь гараа табин адислаад: «Зай, юумэ харана гүш?» – гэжэ һураба.

²⁴Тэрэнь иишэ тишээ хараад: «Хүнүүдые харанаб, теэд тэдэ тойроод ябаһан мододтол адли үзэгдэнэ», – гэжэ хэлэбэ.

²⁵Иисус дахин нюдэндэнь гараараа хүрэбэ. Тиигэхэтэйнъ сасуу үнөөхи хүн хараатай болобо; нюдэнь эдэгэжэ, тэрэ бүхы юумэ эли тодоор харадаг болоо.

²⁶«Зай, ши гэртээ хари, тосхондо бү ороорой», – гэжэ захин, Иисус тэрэ хүниие ябуулба.

Иисус гээшэмнай хэн бэ?

²⁷Иисус шабинартайгаа Филиппэй Кесари хотын хажуудахи тосхонуудта ошобо. Замдаа Иисус: «Хүнүүд намайе хэн гэжэ һананаб?» – гэжэ шабинарһаа асууба.

²⁸«Зариманиинъ Уһаар арюудхагша Иоанн байнат, нүгөөдүүлэнь Илия гээшэт, үшөө бусадэнь лүндэншэдэй нэгэниинъ байнат гэжэ хэлсэнэ», – гээд шабинарынъ харюусаба.

²⁹«Теэд таанар намайе хэн гэжэ һананабта?» – гээд Иисус һураба. «Та Бурханай табисуурта гээшэт», – гэжэ Пётр харюусаба.

³⁰«Хэн байһан тухаймни хэндэшье бү хэлээрэйт», – гэжэ Иисус шабинартаа захирба.

Иисус зобохо, алуулха тухайгаа хэлэнэ

³¹Иисус өөртэйнэ юу болохо тухай шабинартаа хөөрөжэ эхилбэ: «Хүн түрэлхитэнэй Хүбүүн аргагүй ехээр зобохо, ахамадууд, ахамад санаарта болон Хуули заадаг багшанар тэрээнһээ арсаха. Тэрэниие алаха, теэд гурбадахи үдэртөө тэрэ дахин амидырха».

³²Тиигэжэ Иисус шабинартаа тон эли тодоор хэлэжэ байгаа. Тиимэһээ Пётр тэрэниие хажуу тээшэнь дуудажа абаашаад, тиигэжэ хэлэхээ боли гэбэ.

³³Харин Иисус шабинар тээшээ эрьен хараад, Пётрые зэмэлэн: «Холо боло намһаа, сатана! Шинии һанал бодолнуудшни Бурханһаа үршөөгдэнэ бэшэ, харин хүн шанарһаашни бүрилдэнэ!» – гэбэ.

³⁴Удаань Иисус улад зониие, шабинараа дуудаад хэлэбэ: «Намтай ябалсаха дуратай хүн өөр тухайгаа бодохоёо болёод, үдэр бүхэн хэрээһээ үргэлөөд, хойноһоомни яба.

³⁵Ушарынь хэлэбэл, ами наһаяа абарха һанаатай хүн тэрэнээ алдаха, харин минии түлөө, мүн һайн Мэдээсэлэй түлөө ами наһаяа үгэбэл, тэрэнээ абарха.

³⁶Хэрбээ танай бүхы дэлхэй олзолоод, ами хүнэһээ алдабалтнай, танда ашагтай гү? Үгыл даа!

³⁷Таанад ямаршье юумэ түлөөд, ами хүнэһээ бусаажа шадахагүйлта.

³⁸Хэрбээ забхай, нүгэлтэ энэ дэлхэйн зон дунда байхадаа намһаа, минии һургаалһаа эшэбэлтнай, Хүн түрэлхитэнэй Хүбүүн Эсэгынгээ алдар соонь Бурханай Эльгээмэлнүүдтэй хамта ерэхэдээ, таанадһаа эшэхэл.

Марк 9



¹Эндэ байгшадай зариманиинь хүр хүсэтэй Бурханай хаан түрэ үзөөгүйдөө үхэхэгүй гэжэ таанарта үнэниие хэлэнэб».

Иисусай бодото хүр хүсэн тухай

²Зургаан үдэр болоод, Иисус гансал Пётр, Яков, тэрэнэй дүү Иоанные абажа, үндэр хада дээрэ гараба. Тэндэ Иисус шабинарайнгаа урда эрид хубилба.

³Тэрэнэй хубсаһан харгама сагаан болобо, газар дэлхэй дээрэ ямаршье будаг тиигэжэ сагааруулжа шадахагүйл.

⁴Иисустай хөөрэлдэжэ байһан Моисей Илия хоёр бии болобо.

⁵Тиихэ зуура Пётр Иисуста: «Рабби! Эндэ байхадамнай манда ямар хайн гээшэб. Гурбан майхан бодхоое: нэгыень шамда, нэгыень Моисейдэ, үшөө нэгыень Илияда», – гэбэ.

⁶Пётр юушье хэлэһэнээ мэдэнгүй тиигэжэ хэлээ бшуу, юундэб гэхэдэ, шабинар ехээр айһан хүрдэһэн байгаа.

⁷Тиигэжэ байтарынь үүлэн бии боложо, тэдэниие хушаад, тэндэһэнь: «Энэ минии инаг хайрата Хүбүүмни юм, таанад үгыень дуулажа байгты», – гэхэн абьяан дуулдаба.

⁸Шабинарайнь тойроод харан гэхэдэнь, Иисусаа ондоо хэншье үгы байба.

⁹Хадаһаа буужа ябахадаа Иисус шабинартаа: «Хүн түрэлхитэнэй Хүбүүнэй үхөөд амидыртар энэ үзэһэн хараһанаа хэндэшье бү хэлээрэйт», – гэжэ захирба.

¹⁰Шабинарынэ энэ нюусые хадагалжа ябаа, тээд «үхөөд амидырхань» ямар удхатайб гэжэ бэе бэеһээ һурадаг байгаа.

¹¹«Хуули заадаг багшанар юундэ Бурханай табисуурта Христосой ерэхын урда тээ Илия лүндэншэ ерэхэ ёһотой гэдэг бэ?» – гэжэ шабинарынэ Иисусаа асууба.



¹²Иисус харюусаба: «Үнэхөөрөө Илия түрүүн ерэжэ, бүхы юумэ бэлдэхэ ёһотой. Тиихэдээ юундэ Хүн түрэлхитэнэй Хүбүүн ехээр зобохо, тэрээнһээ арсаха юм гэжэ Нангин Бэшэг соо хэлээтэй байдаг бэ?

¹³Гэхэдэ Илия ерээ юм, тиин Нангин Бэшэг соо хэлэгдэнэй ёһоор хүнүүд дура зоргоороо тэрээнтэй болоо юм гэжэ таанадта хэлэхэ байнаб».

Иисус досоогоо ада шүдхэртэй хүбүүе эдэгээбэ

¹⁴Иисусай гурбан шабинартайгаа хамта бусад шабинартаа ерэхэдэнь, тэдэниенё ехэ олон зон тойроод, Хуули заадаг багшанарай тэдээнтэйнь арсалдажа байхань харагдаба.

¹⁵Иисусые харахадаа улад зон ехээр гайхалдажа, тэрэниие мэндэшэлхэ гэжэ гүйлдэбэ.

¹⁶«Таанад эдэнтэй юун тухай арсалданабта?» – гэжэ Иисус шабинарһаа асууба.

¹⁷Улад зоной дундаһаа нэгэ хүн харюусаба: «Багша, би шамда хүбүүгээ абажа ерээб. Тэрэнииемни ада шүдхэр дараад, хэлэгүй болгоод байна.

¹⁸Ада шүдхэр добтолходоол хүбүүемни газараар мухарюулна, аманһаань хөөһэ бурана, шүдэнь хабирна, бэенё хүшэлдэнэ. Тэрэ ада шүдхэрые намнажа үгыт гээд шабинарыетнай гуйхадамни, тэдэтнай оролдоод шадабагүй».

¹⁹Иисус улад зондо хандан: «Этигэл хүзэггүй зон аа! Үшөө хэды шэнээн таанадтай байхабиб? Үшөө хэды болотор таанадые тэсэжэ байхабиб? Тэрэ хүбүүе намда асарагты!» – гэжэ хэлэбэ.

²⁰Хүбүүе асарба. Иисусые харамсаараа ада шүдхэр хүбүүе таталзуулан халагануулба. Хүбүүнэй аманһаа хөөһэ буран, тэрэ газараар мухариба.

²¹«Үнинэй иимэ болоо һэн гү?» – гэжэ Иисус хүбүүнэй эсэгһээ һураба. Тэрэнь: «Багаһаал тиимэ һэн.

²²Ада шүдхэр хүбүүемни оло дахин галда, уһанда шэдээд, алахаяа забдаа. Маанадые хайрлажа, шадахал хаа, туһалыт даа!» – гэжэ гуйба.

²³«Юундэ „шадахал хаа“ гэбэш? Этигэл хүзэгтэй хаашни, хүсэһэн лэ юумэншни бүтэхэ юм!» – гэжэ Иисус харюусаба.

²⁴Тиигэхэтэйнь сасуу хүбүүнэй эсэгэ: «Би этигэнэб! Бүри ехэ этигэл хүзэг хайрлан туһалыш!» – гэжэ хашхарба.

²⁵Улад зоной үшөө олоор сугларжа байхые харахадаа, Иисус ада шүдхэртэ захирба: «Хэлэгүй, дүлии ада шүдхэр! Би шамда захирнаб: энэ хүбүүнһээ гара, хойшодоо тэрээндэ бү оро!»

²⁶Ада шүдхэр хашхараад, хүбүүе ехээр халагануулан, досооһоонь гараба. Хүбүүн үхэшэһэн шэнги байба, хүнүүдшье: «Тэрэ үхэшөө», – гэлдэбэ.

²⁷Харин Иисус гарһаань баряад, хүл дээрээ бодоходонь туһалба.

²⁸Һүүлдэ Иисусай шабинартайгаа гэртээ ерээд, гансаараа байхадань, тэдэнь: «Яахадаа бидэ тэрэ ада шүдхэр даража шадабагүй гээшэбибди?» – гэжэ асууба.

²⁹«Иимэрхүү ада шүдхэрнүүдые имагтал зальбаралаар даража болохо юм», – гэжэ Иисус харюусаба.

Иисус дахин үхэхэ тухайгаа хэлэнэ

³⁰Иисус шабинартайгаа тэндэһээ гараад, Галилейе үнгэржэ ябаба. Хаана ябаһанаа хүнүүдтэ мэдүүлхэгүй гэжэ тэрэ оролдоо.

³¹Ушарынь юуб гэбэл, тэрэ шабинараа хургажа байгаа. «Хүн түрэлхитэнэй Хүбүүн хүнүүдэй гарта тушаагдахань, тиигээд тэрэ алуулаад, гурбадахи үдэртөө амидырха», – гэжэ хэлэбэ.

³²Гэбэшье шабинарын энэ хэлээшыень ойлгобогүй, тиин нурахаяашье зүрхэлбэгүй.

Эгээн ехэнь хэн гээшэб?



³³Иисус шабинартайгаа гэртээ Капернаум хото ерэбэ. Гэртэ ороод тэрэ: «Хэлэгты даа, замдаа таанад юун тухай арсалдабат?» – гэжэ шабинарһаа һураба.

³⁴Хоорондоо тэдэ хэмнай эгээн ехэб гэжэ арсалдаһан байгаа, тиимэһээ багшынгаа урда шэмээгүй байба.

³⁵Иисус һуугаад, арбан хоёр шабинараа дуудаад: «Хүндэтэй газарта һууха дуратай хүн һүүл хабида байха, бусадай зараса болохо», – гэбэ.

³⁶Тиигээд Иисус нэгэ үхибүүе шабинарайнгаа дунда байлгаад, тэрэниие тэбэрээд хэлэбэ:

³⁷«Минии нэрээр иимэ нэгэ үхибүүе тогтоожо абаһан хүн намайе тогтоожо абаһан болоно. Тиихэдэ намайе тогтоожо абаһан хүн намайе иишэ эльгээһэн Бурханиие тогтоожо абана гээшэ».

Манда эсэргүүсээгүй зон манай талада юм

³⁸«Багша, шинии нэрээр ада шүдхэрнүүдые дарадаг хүниие бидэ хараабди. Тиихэдээ тэрэ хүн маанадаар суг ябалсаагүй, тиимэһэнь бидэ тэрэниие хорёобди», – гэжэ Иоанн хэлэбэ.

³⁹Иисус шабинартаа хэлэбэ: «Тэрэниие хорихо гэжэ бү оролдогты. Минии нэрээр гайхамшагта үйлэ бүтээһэн хүн тэрэ дороо намайе муудхажа шадахагүй.

⁴⁰Танда эсэргүүсээгүй хүн танай талада байна ха юм.

⁴¹Намһаа боложо Христосой шабинар байһан хадатнай таанадта аяга уһа хэжэ үгэһэн хүн өөрынгөө шагнал заабол абаха гэжэ би баталнаб.

⁴²Зүгөөр намда этигэгшэ эдэ багашуулай нэгыеньшье нүгэл хилэнсэдэ түлхиһэн хүн дээрэ аймшагтай хэһээлтэ бууха. Тэрэ хүнэй хүзүүндээ тээрмын шулуу уюулаад, далайн оёорто хаяулбалнь, тэрээндэ өөртэнь дээрэ байха һэн.

⁴³Хэрбээ гарайшни шамайе нүгэлдэ оруулаа һаань, тэрэнээ таһа сабшаад хая. Хоёр гартайгаа залирдаггүй гал тамада орожо

хосоронхаар, ганса гартайгаар мүнхын амидарал амсабалшни шамда дээрэ байха.

⁴⁵Хэрбээ хүлэйшни шамайе нүгэлдэ оруулаа хаань, тэрэнээ таһа сабшаад хая. Хоёр хүлтэйгөө гал тамада орожо хосоронхаар, ганса хүлтэйгөө амиды ябаһан дээрэ.

⁴⁷Хэрбээ нюдэнэйшни шамайе нүгэлдэ оруулаа хаань, тэрэнээ хуга тата. Хоёр нюдэтэйгөө гал тама руу хаяуланхаар, үрөөһэн нюдэтэйгөө Бурханай хаан түрэдэ ороболшни шамда дээрэ.

⁴⁸Гал тама соо нүгэлтэдые эдидэг үтэ хорхойнууд хэзээшье үхэдэггүй, галыньшье залирдаггүй.

⁴⁹Ямаршье тахил яжа дабһаар дабһалуулан арюудхагдадаг бэ, тон тиигэжэл хүн бүхэн галаар туршуулан арюудхагдаха.

⁵⁰Дабһан болбол һайн юумэн гээшэ, теэд амтаяа гээхэдэнь, дахин яжа гашуун болгохобта? Таанад досоогоо дабһатай байгты, хоорондоо эбтэй эетэй ажамидарагты».

Марк 10

Иисус гэрлэхэ ба халаха тухай хурган

¹Иисус тэндэхи газарһаа гараад, Иордан голой нүгөө талада оршодог Иудей можодо ерэбэ. Дахяад лэ ехэ олон зон тэрээндэ ерэжэ, Иисус тэдэниие урдынхидаал адляар хургаба.

²Хэдэн фарисейнүүд тэндэнь ерээд, Иисусые үгэдэнь торгоохо ханаатайгаар: «Хэлыш даа, Хуулиин ёһоор үбгэн һамганһаа халаха эрхэтэй гү?» – гэжэ һураба.

³Урдаһаань Иисус: «Моисей таанадта юун гэжэ захяа һэн бэ?» – гэжэ һураба.

⁴«Халаха тухай гэршэлгэ һамгандаа үгөөд лэ тэрээнһээ халажа болохо гээд Моисей захяа һэн», – гэжэ фарисейнүүд харюусаба.



⁵Тиихэдэнь Иисус хэлэбэ: «Шулуун сэдхэлтэй байһан хадатнай Моисей тиимэ ёһо заншал таанадта тогтоогоо юм.

⁶Тиихэдэ юртэмсэ дэлхэй зохёон бүтээхэдээ, Бурхан нэн түрүүн эрэ эмэ хоёрые бүтээгөө юм.

⁷Тиимэхээл эрэ хүн эхэ эсэгээ орхёод, һамгантайгаа нэгэдэхэ,

⁸тиин тэрэ хоёр ганса бэе болон эблэрхэ гэжэ хэлээ юм. Тиихэлээрээ тэдэ хоёр болбол хоёр бэшэ, харин нэгэ бэе гээшэ.

⁹Тиимэхээ Бурханай нэгэдүүлһэн юумэ хүн хубааха ёһогүй».

¹⁰Һүүлдэнь гэртээ ерээд байхадаа шабинанынь үнөөхи һургаһан юумэн тухайнь һураба.

¹¹«Һамганһаа халаад, ондоо эхэнэртэй һууһан хүн түрүүшынгээ һамганда урбаба гээшэ.

¹²Тон тиигэжэл нүхэрһөө халаад, ондоо эрэтэй һууһан эхэнэр түрүүшынгээ нүхэртэ урбаба гээшэ», – гэжэ Иисус тайлбарилба.

Иисус үхибүүдые адислана

¹³Зарим хүнүүд гараараа хүрэжэ адислахаарнь Иисуста хүүгэдые асарба. Зүгөөр шабинанынь тэдэ үхибүүдые багшадаа ойртуулбагүй.

¹⁴Тиигэхыень ойлгоходоо, Иисус уурлажа: «Үхибүүдые наашань табигты, намда ерэхэдэнь һаалта бү хэгты, ушарынь юуб гэбэл, эдэ үхибүүдтэл адли зон Бурханай хаан түрын мэдэлдэ юм.

¹⁵Эдэ үхибүүд мэтээр Бурханай хаан ороние тогтоон абаагүй хүн тэндэ хэзээшье орожо шадахагүй гэжэ баталан хэлэнэб», – гэбэ.

¹⁶Тиигээд Иисус үхибүүдые тэбэрээд, гараараа адислаба.

Баян хүн

¹⁷Иисусай харгыда ябахада нэгэ хүн тэрээндэ гүйжэ ерээд, үбдэг дээрээ һүгэдэн унажа: «Эрхим багша! Мүнхын амидаралда хүртэхын тула би юу хэхэ ёһотойбиб?» – гэжэ һураба.

¹⁸Иисус харюудань хэлэбэ: «Юундэ намайе эрхим гэбэш? Имагтал Бурхан эрхим гэшэ.

¹⁹Ши захяа заабаринууды мэдэнэ ха юмши. „Бү ала, ханидаа бү урба, хулгай бү хэ, бусад тухай худал юумэ бү хэлэ, хүниие мэхэлжэ, юумыень бү аба. Эхэ эсэгээ хүндэлэ“».

²⁰«Багша аа, эдэ захяа заабаринууды бултыень би эдир наһанһаа сахижа ябадаг хүнби», – гэжэ үнөөхи хүниинь хэлэбэ.

²¹Иисус тэрэ хүниие шэртэжэ, һайшаан хэлэбэ: «Шамда нэгэл юумэн дутана: ошожо зөөри зөөшээ бултыень худалдаад, мүнгыень үгытэйшүүлдэ хубаажа үгэ, тиигээ һаа, тэнгэри дээрэ баялиг зөөритэй болохош. Тиигээд намда ерэжэ, хажуудамни ябаарай».

²²Тиигэжэ хэлэхыень дуулахадаа, үнөөхи хүнэй шарайнь хубилба. Тэрэ уйдхартайгаар саашалба, ушарынь юуб гэхэдэ, тэрэ хүбүүн аргагүй ехэ эд зөөритэй байгаа.

²³Иисус тойрожо хараад: «Баян хүнүүдэй Бурханай хаан орондо орохонь бэрхэтэйл байха даа!» – гэжэ шабинартаа хэлэбэ.

²⁴Эдэ үгэнүүдыень дуулахадаа, шабинарынь сошолдон гайхалдаба. Харин Иисус дабтажа: «Үхибүүдни, Бурханай хаан орондо орохонь бэрхэтэйл байха даа!»

²⁵Баян хүнэй Бурханай хаан орондо орохоһоонь бэлээр зүүнэй хүбөөр тэмээн ороод гарахал», – гэжэ хэлэбэ.

²⁶Тиигэхэдэнь шабинарынь бүришые ехээр гайхалдан: «Тиигэхэдээ хэн абарагдаха аргатайб?» – гэжэ бэе бэһээн һураба.

²⁷Иисус тэдэнээ шэртэн хараад: «Хүнүүд өөһэдыгөө абаржа шадахагүй, харин юушые хэхэ аргатай Бурхан тэдэниие абаржа шадаха юм», – гэжэ хэлэбэ.

²⁸Тиигэхэдэнь Пётр: «Бидэ хамаг юумээ орхёод, шамайе дахаабди, һаныш», – гэбэ.



²⁹«Минии тулада, хайн Мэдээсэлэй аша туhada гэрээ гү, аха дүүнэрээ гү, эгэшэ дүүнэрээ гү, аба эжыгээ гү, намга үхибүүдээ гү, али эдлэжэ байһан газараа орхиһон хүн

³⁰энэ дэлхэйдэ бүришые ехэ юумэндэ хүртэхэ юм гэжэ би баталнаб. Тэдэнэр зуу дахин олон гэрнүүдтэй, аха дүүнэртэй, эгэшэ дүүнэртэй, эжынэртэй, үхибүүдтэй, эдлэхэ газартай байха, хашалга мүрдэлгэнүүдышые өөр дээрээ мэдэрхэ, тиин ерээдүйдэ мүнхын ажамидаралтай болохо.

³¹Зүгөөр мүнөө түрүү зэргэдэ байгшадай олониинь һүүл зэргэдэ орохо, тиихэдэ мүнөө һүүл зэргэдэ байһанай олониинь түрүүлэн гараха».

Иисус үхэхэ тухайгаа гурбадахия хэлэнэ

³²Иисус шабинартайгаа Иерусалим хото руу зорибо. Тэрэ айһан зобоһон шабинарайнгаа урдань алхалба, харин тэдэнэй хойноһоо баһа айшаһан хүн зон һубарилдан ябаба. Нэгэ һабаандаа Иисус арбан хоёр шабинараа хажуу тээшэнь абаашаад, өөртэйнь юу ушарха тухай хөөрөжэ үгэбэ.

³³«Мүнөө бидэ Иерусалим орохомнай. Тэндэ Хүн түрэлхитэнэй Хүбүүниие түрүү санаартанай, Хуули заадаг багшанарай гарта тушааха. Тэдэнэр Хүбүүе гэмнэн, үхэлэй саазада хүртөөхэ гэжэ шиидээд, бусад арадай гарта тушааха.

³⁴Тэдэнь тэрэниие баһаха, нёлбохо, сохихо, хожомынь алаха байна. Зүгөөр Хүбүүн гурбадахи үдэртөө амидырха».

Яков Иоанн хоёрой гуйлта

³⁵Яков Иоанн гэдэг Зэбэдэйн хоёр хүбүүд Иисуста ерэжэ: «Багша аа, бидэ шамайе нэгэ юумэн тухай гуйхамнай», – гэбэ.

³⁶«Юун тухай гуйнабта?», – гэжэ Иисус һураба.

³⁷«Алдарта хаан түрынгөө шэрээдэ һуухадаа, бидэ хоёрой нэгыемнай баруун таладаа, нүгөөдыемнай зүүн таладаа һуулгажа хайрлыш даа», – гэжэ тэдэ Иисусаа гуйба.

³⁸«Таанад юун тухай гуйжа байһанаа үнэхөөрөө ойлгоногүйт. Минии амсаха ёһотой зоболонгой аягаһаа таанад уужа амсажа шадаха аалта? Минии хүртэхэ ёһотой зоболонто уһан арюудхалгада таанад хүртэжэ шадаха аалта?» – гэжэ Иисус хэлэбэ.

³⁹«Шадахабди», – гэжэ Яков Иоанн хоёр харюусаба. «Үнэхөөрөө таанад минии зоболонгой аягаһаа амсахат, минии хүртэхэ уһан арюудхалгада хүртэлсэхэт.

⁴⁰Төөд баруун таладамни, зүүн таладамни һууха хүнүүдые һунгахань минии мэдэлдэ бэшэ. Тэдэ һууринуудта Бурханай табиһан хүнүүд һууха юм», – гэжэ Иисус хэлэбэ.

⁴¹Нүгөө арбан шабинарынь энэ хөөрэлдөө дуулахадаа, Яков Иоанн хоёрто сухалдаба.

⁴²Тиимэһээ Иисус тэдэниие дуудажа хэлэбэ: «Арад зоной захирагшад гэжэ нэрлэгдэдэг хариинхид тойроошо арад зоноо зонхилхо дуратай байдаг, мүн түшэмэд һайдуудыньше албатанаа захирха бүрин засагтай байдаг.

⁴³Харин таанад тэдэндэл адляар бээе абажа бү ябагты. Агууехэ болохо һанаатай хүнтнай бусадайнгаа бултанайнь зараса болохо ёһотой.

⁴⁴Али түрүү зэргэдэ гараха һанаатай хүнтнай бусадайнгаа бултанайнь барлаг болохо ёһотой.

⁴⁵Ушарынь юуб гэхэдэ, Хүн түрэлхитэнэй Хүбүүн хүнүүдые зарахаяа ерээ бэшэ, харин бусад уладта алба хэхээе, мүн үнэтэ ами наһанайнгаа сэнгээр олон хүнүүдые абархаяа ерээ».

Иисус хохор Бартимейе эдэгээбэ

⁴⁶Иисус шабинартайгаа Иерихон хото ерэбэ. Хожом хотоһоо ехэ олон зоноор үдэшэлүүлэн гаража ябахадань, харгын хажууда Тимейн Бартимей гэдэг хохор хүбүүн юумэ гуйраншалжа һууба.



⁴⁷Хажуугаарнь Назаредэй Иисус үнгэрнэ гэжэ дуулахадаа, тэрэ: «Давидай үри надаһан, Иисус! Намайе үршөөжэ хайрлыш даа!» – гэжэ хашхарба.

⁴⁸Олохон зон тэрээндэ дуугүй бай гэжэ зандарба, теэд тэрэнь бүришые шангаар: «Давидай үри надаһан, намайе үршөөн хайрлыш даа!» – гэжэ хашхарба.

⁴⁹Иисус зогсоод: «Дуудагты тэрэниие!» – гэбэ. Тэрэ һохор хүниие хүнүүд дуудан: «Бү ай! Бодо, тэрэ шамайе дуудана», – гэбэд.

⁵⁰Бартимей хүрэн бодохотойгоо зэргэ гадар хубсаһаа тайлажа хаяад, Иисуста ерэбэ.

⁵¹«Шамда юу хэжэ туһалхабиб?» – гэжэ Иисус тэрээнһээ һураба. «Багша, намайе харадаг болгыш даа», – гэжэ Бартимей харюусаба.

⁵²«Яба даа, этигэлшни шамайе элүүр мэндэ болгобо», – гэжэ Иисус хэлэбэ. һохор хүниинь тэрэ дороо харадаг боложо, Иисусай хойноһоо харгыгаар дахан ябаба.

Марк 11

Иисус Иерусалим хотодо оробо

¹Иисус шабинартайгаа Элеон хадын хаяада оршодог Беттагэ ба Бетани тосхонуудта ойртоод, тиишэнь хоёр шабияа эльгээбэ.

²«Шанха урдатнай байһан тосхон ошогты. Тэндэ оромсоороо хүн амитанай оройдоо унаагүй залуу элжэгэнэй уяатай байхые харахат. Тэрэниие уяаһань тайлаад, наашань хүтэлжэ асарагты.

³Хэрбээ таанарһаа: „Юу хэжэ байнабта?“ – гэжэ һураа һаань, „Энэ элжэгэн Эзэндэ хэрэгтэй болоо“, – гэжэ харюусаарайт, тиихэдэтнай тэрэ элжэгэ абажа ябахыетнай дары зүбшөөхэ».

⁴Шабинарынь ошожо, гудамжада нэгэ гэрэй хажууда уяатай залуу элжэгэ олоод, тэрэниие уяаһань тайлаба.



⁵Тэндэ байһан зон: «Таанад юундэ энэ элжэгэ сэргэһээнэ тайланабта?» – гэжэ һураба.

⁶Шабинар Иисусай захиһан ёһоор харюусаба, тиихэдэнь хүнүүд тэдэниие табиба.

⁷Шабинар тэрэ элжэгэ асаржа, нюрган дээрэнь хубсаһаяа дэбдибэ, тиигээд Иисус тэрээниие унаба.

⁸Олон зон Иисусай ябаха харгы дээгүүрнь хубсаһаяа дэбдибэ, зарим зон мүшэрнүүдые отолоод, харгы дээгүүрнь табиба.

⁹Урдань ябаһан, хойноһоонь дахаһан зон булта: «Бурханда алдар соло! Дээдын Эзэнэй нэрээр заларан Ерэгшэ үршөөл хайратай байһай!

¹⁰Манай үбгэ эсэгэ Давид хаанай мандуулһан хаан түрэ алдар солотой байһай! Дээдын тэнгэридэ оршоһон Бурханда алдар соло!» – гэжэ шанга шангаар хашхаралдаба.

¹¹Иерусалимда ороод, Иисус Бурхан хүмэ ошожо, досоонь байһан бүхы юумэ анхаралтайгаар хараба. Тиигээд орой болошоһон дээрэһээ арбан хоёр элшэнэрээрээ хамта тэрэ Бетани руу бусажа ошобо.

Иисус боди модо хараалдаа хүртөөбэ

¹²Хойто үдэрынь Иисусай шабинартайгаа Бетаниһаа гараад ябахадань, тэрэнэй гэдэһэниинь үлдэбэ.

¹³Тэрэ холоһоо набшаһадаар бүрхөөгөөтэй боди модо хараад, тэндэнь эдихээр юумэн олдоно аа гү гэжэ харахаяа ошобо. Теэд модондонь набшаһадһаа бэшэ юушье байбагүй, ушарынь юуб гэбэл, тиигэхэдэ боди модоной үрэ жэмэс үгэхэ саг болоогүй байгаа.

¹⁴Тиимэһээ Иисус тэрэ модондо: «Хойшодоо энэ модонһоо хүн хээээдэшье жэмэс бү эдихэй!» – гэжэ хэлэбэ. Тиигэжэ хэлэхыень тэрэнэй шабинарынь дуулаһан байгаа.

Иисус Бурхан хүмэ ошобо

¹⁵Иисус шабинартайгаа Иерусалим ерэхэдээ Бурхан хүмэ оробо. Тэндэһээ наймаашадые, юумэ худалдажа абагшадые намнажа оробо,

мүнгэ танга холигшодой шэрээнүүдые, гулабхаа худалдагшаддай хандалинуудые хүмэрюулбэ.

¹⁶Тиигээд худалдаа наймаанай ямаршые юумэ Бурхан хүмын дотор хорёогоор абажа ябахые хорибо.

¹⁷«Нангин Бэшэгтэ: „Минии гэр бүхы арадуудай мүргэл зальбаралай гэр гэжэ нэрлэгдэхэ“ гэжэ бэшээтэй байдаг. Харин таанад энэ гэр дээрмэшэдэй шэбээлдэг үүр болгожорхёот», – гэжэ Иисус хэлэбэ.

¹⁸Тиигэжэ хэлэхыень түрүү санаартан, Хуули заадаг багшанар дуулаад, тэрэниие хюдаха арга бэдэрбэ. Юундэб гэбэл, бүхы хүн зон тэрэнэй хургаал гайхан анхаржа байгаа, тиимэһээл тэдэнэр Иисусаа айжа байгаа.

¹⁹Үдэшэ болоходо Иисус шабинартайгаа хотоһоо гаража ошобо.

Боди модонһоо абаһан хэшээл тухай

²⁰Хойто үглөөгүүрынь боди модоной хажуугаар үнгэрхэдөө, шабинарынь тэрэ модоной үндэһөөрөө хүрэтэр хаташоод байхые хараба.

²¹Пётр урдань Иисусай тэрэ модондо юумэ хэлэжэ байһыень ханаад: «Рабби, харыш! Шинии хараалда хүртэһэн модон хаташоод байнал», – гэжэ багшадаа хэлэбэ.

²²Иисус харюудань хэлэбэ: «Бурханда этигэл хүзэгтэй байгты!

²³Хэрбээ Бурханда этигэл хүзэгтэй, зүрхэ сэдхэлдээ ямаршые һэжэг маргалтагүй хаа, уулада хандан: „Эндэһээ хүдэлөөд, далай руу хүрэ“ гээ хаатнай, захирһан бүхэнтнай бүтэхэ гэжэ би баталан хэлэнэб.

²⁴Тиимэһээ Бурханда зальбаржа юумэ гуйхадаа, ямаршые эриһэн юумээ заабол абахаб гэһэн этигэлтэй байгты, тиигэбэл тэрэ юумээ абахат.

²⁵Баһа таанад зальбаржа байхадаа, хэн нэгэндэ гомдолтой хаа, тэрэ хүнөө хүлисэгты. Тиигэбэл тэнгэридэ оршодог Эсэгэтнайшые танай нүгэлые хүлисэхэ».

Иисусай эрхэ засаг тухай асуудал

²⁷Иисус шабинартайгаа дахин Иерусалим орожо ерэбэ. Бурхан хүмөөр ябахадань, тэрээндэ түрүү санаартан, ахамадууд, Хуули заадаг багшанар ойртобо.

²⁸«Ши иимэ юумэ хэхэ ямар эрхэтэйбши? Иимэ эрхэ засаг шамда хэн үгөөб?» – гэжэ һурабад.

²⁹Иисус: «Бишые таанадһаа нэгэ юумэ һурахамни. Хэрбээ харюу үгэбэлтнай, иимэ юумэ хэхэ ямар эрхэтэй байһанаа таанарта хэлэхэб.

³⁰Хэлыг даа, уһаар арюудхаха эрхэ Иоанда Бурхан үгөө юм гү, али хүнүүд гү?» – гэжэ урдаһаань асууба.

³¹Нүгөөдүүлһынь хоорондоо шэбэнэлдэбэ: «Хэрбээ Бурханһаа тиимэ эрхэ үгтөө гэбэлнай, тиигэбэл юундэ Иоанда этигэдэггүй байгаафта гэхэл.

³²Нүгөө талаһаа, хүн зон булта Иоанные лүндэншэн гэжэ тоолодог. Тиимэхээ уһаар арюудхаха эрхэ тэрээндэ юрэ хүнүүд үгөө гэхын аргагүйбди». Тэдэнэр хүн зонһоо айжа байгаа ха юм.

³³Тиимэхээ тэдэнэр Иисуста: «Бидэ мэдэнэгүйбди», – гэжэ харюусаба. Тиихэдэнь Иисус: «Эдэ юумэнүүдые хэхэ эрхэ намда хэнэй үгэһые би баһа хэлэхэгүйб!» – гэжэ тэдэндэ хэлэбэ.

Марк 12

Үзэм тарилгын газарай хүлһэншэд тухай һургаалта үгэнүүд

¹Тиигээд Иисус тэдэндэ иимэ һургаалта үгэнүүдые хөөрэбэ: «Нэгэ хүн үзэмэй сэсэрлиг таряад, тойруулан хүреэлжэ, досоонь үзэмэй шүүһе шахадаг түхээрэлгэ хэхэеэ нүхэ малтаба, башни бариба, тиигээд тэрэнээ үзэмшэдтэ хүлһэлөөд, аянда мордобо.



²Жэмэсэй эдеэшэхэ багта үзэмэй ургасанаа өөрын хуби абажа ерэхээр тэрэ эзэн үзэмшэдтэ зарасаяа эльгээбэ.

³Теэд үзэмшэд зарасыень барижа зада сохёод, һөөргэнь хооһоор бусаагаа һэн.

⁴Тиигэхэдэнь эзэн ондоо зарасаяа ябуулаа; теэд үзэмшэд тэрэнэй тархи хаха сохёод, баһажа баһажа ябуулба ха.

⁵Эзэнэй дахин ондоо зарасаяа эльгээхэдэ, тэрэниень үзэмшэд алажархёо һэн. Сэсэрлигэй эзэн хойно хойноһоонь зарасанараа ябуулжал байгаа; харин үзэмшэд тэдэнэй зарим нэгыень зада сохиһоор, нүгөөдыень алаһаар лэ байгаа.

⁶Һүүлэй һүүлдэ эзэн хүбүүемни тэдэ хүндэлхэ аабза гэжэ һанан, үзэмшэдтэ ори ганса инаг хайрата хүбүүгээ ябуулба.

⁷Теэд үзэмшэд: „Энэ хүбүүн эсэгынгээ эд зөөри залгамжалха. Энэниие алая, тиигэбэл бүхы зөөринь манай болохо“, – гэжэ өөһэд хоорондоо хэлсэбэ.

⁸Тиигээд тэрэ хүбүүень барижа алаад, бэеыень үзэмэй сэсэрлигһээ гаргажа хаяба».

⁹«Зай, тиихэлээрээ үзэмэй сэсэрлигэй эзэн тэдэ үзэмшэдые яаха болоноб?» – гэжэ Иисус һураба. «Эзэн ерээд, тэдэ үзэмшэдые алаха, тиигээд ондоо үзэмшэдтэ сэсэрлигээ даалгаха.

¹⁰⁻¹¹„Хэрэггүй гэжэ барилгашадай голожо хаяһан шулууниинь гэрэй гол шухала тулга шулууниинь болоо: энэниие Дээдын Эзэн бүтээгээ, тиин манда ехэл үзэсхэлэнтэ гоёор харагдана“, – гэжэ Нангин Бэшэг соо бэшээтэй байхые таанар хэзээшье уншаагүй аалта?»

¹²Иисусай хэлэһэн һургаалта үгэнүүдые дуулаад, түрүү санаартан ба фарисейнүүд өөһэд тухайнь хэлэжэ байна гэжэ ойлгобо. Тиимэһээ Иисусые барижа хэһээхээ хүсэбэ, теэд улад зонһоо айжа, тэрэниие хүрэбэгүй.

Алба татабари тухай асуудал

¹³Һүүлдэнь тэдэ тушаалтан Иисусые үгөөрнь торгоожо хардахын тула тэрээндэ хэдэн фарисейнүүдые, Иродэй талын хэдэн хүнтэй ябуулба.

¹⁴Тэдэнь Иисуста ерээд: «Багша аа! Ши үнэн сэхэш, Бурханай бодото замаар ябахые хургадагши, хэнэйшые урда билдагуушалдаггүйш, юуб гэбэл, нюур харадаггүйш гэжэ бидэ мэдэнэбди. Тиимэхээ манда хэлыш, Римэй хаанда алба татабари түлэхэнь зүб гү, али буруу гү?» – гэжэ асууба.

¹⁵Иисус тэдэнэй муу мэхые мэдээд: «Таанар юундэ намайе туршабат? Нэгэ динари намда асаржа харуулагтыл даа», – гэбэ.

¹⁶Нүгөөдүүлэнь нэгэ динари асаржа үгэбэ. «Эндэ хэнэй дүрсэ зураатай, хэнэй нэрэ бэшээтэй байнаб?» – гэжэ Иисус хураба. «Римэй хаанай», – гэжэ тэдэнь харюусаба.

¹⁷«Тиимэхээ хаанай юумэ хаандань, Бурханай юумэ Бурханда үгэгты», – гэжэ Иисус тэдэндэ хэлэбэ. Энээниие дуулахадаа, тэдэ зон Иисусай эсэн ухаанда гайхалдаба.

Үхөөд амидырха тухай асуудал

¹⁸Хүнүүд үхөөд амидырдаггүй гэжэ тоолодог саддукейнүүдэй зариманиинь Иисуста ерээд хэлэбэ:

¹⁹«Багша аа, үхибүүгүй ахынгаа наһанһаа нүгшэхэдэ, тэрэнэй дүүнь бэлбэһэн эхэнэртэйнь хууха ёһотой, тиигээд тэдэнһээ гараһан үхибүүн нүгшэхэн ахынь үхибүүн гэжэ тоологдохо зэргэтэй гэжэ Моисей манда бэшэхэн байдаг.

²⁰Зай, долоон аха дүүнэр байгаа гээ. Тэдэнэй ахань һамга абаад, үхибүүтэй болонгүйгөөр наһа бараба.

²¹Дүүнь ахынгаа һамгантай хуугаад, баһал үхибүүтэй болонгүйгөөр наһа барашаба. Гурбадахиньшые тиимэл табилантай байгаа.



²²Тиигэжэл долоон аха дүүнэр бултадаа үнөөхи эхэнэрые намга болгон абаад лэ, үхибүүтэй болонгүйгөөр хойно хойноһоо наһанһаа нүгшэжэ байгаа. һүүлэй һүүлдэ тэдэнэй намганииньшые наһа бараба.

²³Тээд Бурханай үхэнэн хүнүүдые амидыруулхада тэрэ эхэнэр хэнэйнһеи намган байхаб? һүүлэй һүүлдэ тэрэ долоон аха дүүнэртэй бултантайнһеи һууһан байна ха юм».

²⁴Иисус тэдээндэ хэлэбэ: «Таанад Нангин Бэшэгэй юун гэжэ хургадагые, Бурханай хүр хүсэ мэдэдэггүй тула эндүүржэ байнат.

²⁵Бурханай хүнүүдые амидыруулхада, тэдэ зон Бурханай Эльгээмэлнүүдтэл адли байха, тиин намгашые абахагүй, хадамдашые гарахагүй.

²⁶Зай, саашань үргэлжэлүүлбэл, үхэнэн зоной амидырха тухай таанад Моисейн номдо уншаагүй аалта? Шатажа байһан һөөг бургааһан сооһоо Бурхан Моисейдэ: „Би Абраһамай Бурхан, Исагай Бурхан, Яковай Бурханби“, – гэжэ хэлээ һэн.

²⁷Бурхан болбол үхэнэн хүнүүдэй бэшэ, харин амиды хүнүүдэй Бурхан юм. Тиимэһээ таанад саддукейнэр огто эндүүржэ байнат».

Эгээн шухала захяа заабари

²⁸Иисусай саддукейнэртэй арсалдажа байхада нэгэ Хуули заадаг багша ерэбэ. Тэрэ Иисусай бодомжотой харюу үгэхые дуулаад, тэрээнһээ: «Бүхы захяа заабаринуудай эгээн шухалань алинь бэ?» – гэжэ һураба.

²⁹Иисус харюусаба: «Эгээн шухала захяа заабари иимэ: „Израилиин арад, манай Эзэн Бурхан ори ганса Дээдын Эзэн юм.

³⁰Ши Эзэн Бурхандаа бүхы зүрхэ сэдхэлээрээ, бүхы хүнэһеи һүлдөөрөө, бүхы ухаан бодолоороо, байһан хүсэ шадалаараа дуратай бай“.

³¹Хоёрдохи эгээн шухала захяа заабари иимэ: „Бусад зондо өөртөө адли дуратай бай“. Эдэ хоёрһоо үлэмжэ шухала захяа заабари үгы юм».

³²Хуули заадаг багша Иисуста хэлэбэ: «Багша аа, Бурхан ори ганса юм, тэрээнһээ ондоо Бурхан үгы гэжэ хэлэхэдээ ши тон зүб хэлэнэш.

³³Тиин Эзэн Бурхандаа бүхы зүрхэ сэдьхэлээрээ, бүхы хүнэнһэ хүлдөөрөө, бүхы ухаан бодолоороо, байһан хүсэ шадалаараа дуратай бай; бусад зондо өөртөө адли дуратай бай гэхэдээ ши баһал тон зүб хэлэнэш. Эдэ захяа заабаринууд маанадай үргэхэ аргатай бүхы тахилнуудһаа, бүхы үргэл бэлэгүүдһээ шухала юм».

³⁴Хуули заадаг багшын иигэжэ бодомжотойгоор харюусахада, Иисус тэрээндэ: «Ши Бурханай хаан түрэнһөө холо бэшэ байнаш», – гэбэ. Тиигэхэнһээ хойшо Иисусаа юумэ һурахаяа хэншье зүрхэлбэгүй.

Бурханай табисуурта хэнэй үри һадаһан бэ?

³⁵Бурхан хүмэ соо хүн зоние һургажа байхадаа Иисус һураба: «Бурханай табисуурта болбол Давидай үри һадаһан байха гэжэ Хуули заадаг багшанар юундэ хэлэдэг бэ?

³⁶„Бузар дайсадыешни хүлдэш мүргүүлтэрни баруун таладамни һуугаарай гэжэ Дээдын Эзэн минии Эзэндэ хэлээ“, – гээд Нангин хүлдөөр урмашуулагдаһан Давид айладхаба.

³⁷Тиихэлээрээ, хэрбээ Давид өөрөө Бурханай табисууртыг Эзэмни гэжэ нэрлээ хадаа, яжа Бурханай табисуурта Давидай үри болохоб?» Тэндэ байһан олон зон Иисусые ехэ ханалгатайгаар шагнаба.

Иисус зоние Хуули заадаг багшанарһаа һэргылнэ

Тэндэ байһан олон зон Иисусые ехэ ханалгатайгаар шагнаба.

³⁸Тэдэниие һурган Иисус үргэлжэлүүлбэ: «Хуули заадаг багшанарһаа бээ һэргылжэ ябагты. Тэдэнэр ута суба үмдөөд ябаха, олон зоной дунда мэндэшэлүүлхэ дуратай байдаг.

³⁹Мүн тэдэнэр мүргэлэй гэр соо урдуур һууха, түрэ найрташье эгээн хүндэтэй һуури эзэлхэ дуратай байдаг.

⁴⁰Тэдэнэр бэлбэһэн эхэнэрнүүдэй зөөри нэшхэлгүйгөөр үбэртэлдэг, удаань олоной нюдэн дээрэ удаан зальбардаг юм. Тиимэрхүү зон хатуу хэһээлтэдэ хүртэхэ даа».

Бэлбэһэн эхэнэрэй үргэл

⁴¹Иисус Бурхан хүмын үргэлэй сангай хажууда һуугаад, хүн зоной мүнгэ үргэхыень ажаглан хаража байба. Олон баяшуул ехэ мүнгэ үргэбэ.

⁴²Харин нэгэ үгытэй бэлбэһэн эхэнэр ерэжэ, хоёр жэжэ мүнгэ табиба.

⁴³Иисус шабинараа дуудаад: «Энэ үгытэй бэлбэһэн эхэнэр хэнһээш ехэ үргэл ханда үргэбэ.

⁴⁴Юундэб гэхэдэ, нүгөө зон бултадаа үлүү гараһан юумэеэ үргөө, харин энэ эхэнэр үгытэй ядуу байбашье, хоолойгоо тэжээхэ бии үгы юумэеэ дууһан үргэбэ», – гэжэ хэлээ бэлэй.

Марк 13

Бурхан хүмын хандарха тухай

¹Иисусай Бурхан хүмэһөө гаража ябахата, нэгэ шабинь: «Багша аа, харалши даа, ямар үзэсхэлэнтэ гоё шулуунууд, байшангууд гээшэб!» – гэбэ.

²«Эдэ томо байшангуудые харана гүш? Энэ һууринда ганса шулууншые үлэхэгүй, хуу баран хандаргагдаха», – гэжэ Иисус харюудань хэлэбэ.

³Удаань Иисусай Элеон хада дээрэ, Бурхан хүмын тушаа һуужа байхада тэрээндэ Пётр, Яков, Иоанн ба Андрей дүрбэн ерэжэ:

⁴«Шинии хэлээшэ бүхы юумэн хэзээ болохоб? Тэрэнэй болохын урда ямар дүлгэ тэмдэгүүд харуулагдахаб?» – гэжэ асууба.

⁵«Хэн нэгэнэй мэхэдэ орохоһоо болгоомжолжо байгты.

⁶Юуб гэхэдэ, олон хүнүүд минии нэрэ зүүжэ ерэхэ: „Би Бурханай табисууртаб“, – гэжэ өөһэд тухайгаа гэршэлхэ, тиигэжэ олониетнай мэхэдээ оруулха.



⁷Мүн байлдаанууд тухай, дайн сэрэг тухай нураг дуулабал, бү айгаарайгты. Тиимэрхүү юумэнүүд болохо ёһотой. Зүгөөр энэнь үшөөл эсэс бэшэ байха.

⁸Нэгэ арад нүгөө арадтаа добтолон орохо, хаан оронууд хоорондоо хёморолдон тэмсэхэ; эндэ тэндэ газар хүдэлхэ, үлэсхэлэн зоболон, үхэл тахал тохёолдохо. Зүгөөр эдэ бүхэн бэрхэшээл зоболонгуудай эхиенъ лэ табиха.

⁹Таанад өөһэдөө һэргэг байха ёһотойт. Таанадые зарга шүүбэриин газарта абаашажа тушааха, мүргэлэй гэр соо сохиho. Минии түлөө таанад захирагшадай, хаашуулай урда зогсоод, этигэл хүзэг тухайгаа хэлэхэт.

¹⁰Тиин юумэнэй эсэс болохын урда һайн Мэдээсэл хамаг оршолонгоор бүхы арадуудта номногдохо юм.

¹¹Таанадые барижа тушаахадань, юу хэлэхэ тухайгаа һанаагаа бү зобооройгты. Сагай ерэхэдэ хэрэгтэй зүб үгэнүүд һанаандатнай орохо. Зүгөөр таанад өөрһөө хэлэхэгүйт, харин Нангин һүлдн хайрлаһан үгэнүүдые дабтахат.

¹²Аха дүүнэр, эгэшэ дүүнэр бэе бэеэ тушаажа алуулха, эсэгэнь үхибүүдээ баһал тушаажа алуулха; үхибүүдынъ эхэ эсэгынгээ урдаһаа үһөөрхэн бодоод, тэдэнээ алаха.

¹³Минии түлөө таанадые булта үзэн ядаха; зүгөөр эсэстэнь хүрэтэр тэсэжэ гараһаниинъ абарагдаха.

Бурханда жэрхэдэһэтэй хүн тухай

¹⁴Нэгэтэ таанад тиимэ юумэнэй байха ёһогүй газарта хооһоролго һүйдхэлдэ хүргэдэг „жэрхэдэһэтэй юумэнэй“ байхые үзэхэт. Эдэ мүрнүүдые уншажа байһан хүн бүхэн ушар удхыенъ ойлгохые хэшээг лэ. Тиихэдэ Иудейдэ байһан хүнүүд хада гүбээ руу тэрьедээрэйгты. Уншажа байһан хүн бүхэн энэниие зүбөөр ойлгохые оролдохо ёһотой. Тиихэ үедэ Иудейдэ ажаһуудаг һаа, хада гүбээнүүд өөдэ гүйжэ гара.



¹⁵Гэрэй орой дээрэ байһан зон гэрһээн юумэ абахаяа доошоо бү буугаарайт.

¹⁶Хээрэ талада ябаһан зон хубсаһа хунараа абахаяа гэртээ бү бусаарайт.

¹⁷Тэдэ үдэрнүүдтэ хээлитэй, хүхөөр үхибүүдтэй эхэнэрнүүдтэ ехэл гай зоболон тудаха.

¹⁸Таанарай зугадаха саг үбэлэй хүйтэндэ бү тудай гэжэ Бурхандаа зальбаргты.

¹⁹Газар дэлхэй Бурханай зохёон бүтээхэһээ нааша мүнөөнэй үе саг болотор үзэгдөөгүй, дахинаашье үзэгдэхгүй аймшагтай гай зоболон болохо.

²⁰Хэрбээ Дээдын Эзэн тэдэ аймшагтай үдэрнүүдэй тоо үсөөрүүлээгүй хаа, хэншье абарагдахагүй һэн. Зүгөөр шэлэжэ абаһан хүнүүдэйнгээ аша туһада Дээдын Эзэн тэдэ үдэрнүүдэй тоо үсөөрүүлхэ юм.

²¹Хэрбээ тэрэ сагта: „Бурханай табисуурта Христос эндэ байна“, али „тэндэ байна“ гэжэ таанарта хэн нэгэнэй хэлээ хаа, бү этигээрэйгты.

²²Өөһэдыгөө Бурханай табисуурта гү, али лүндэншэн гэжэ нэрлэһэн олон мэхэшэд бии болохо. Тэдэ аргатайл хаа, Бурханай шэлэжэ абаһан хүнүүдыешье өөрынгөө мэхэдэ оруулхын тула элдэб янзын гайхамшагта тэмдэгүүдые, эди шэди харуулха.

²³Тиимэһээ таанад һэргэг байгты. Болохо бүхы юумые би таанадта эртэнһээ һэргылжэ хэлэбэб.

Хүн түрэлхитэнэй Хүбүүнэй заларан ерэхэ тухай

²⁴Тиигээд зоболонто тэдэ үдэрнүүдэй үнгэрһэн хойно наран балартаха, һарашье гэрэлтэхээ болихо,

²⁵одо мүшэдшье тэнгэриһээ унаха, тэнгэрийн хүсэнүүдшье тэнсүүриез алдаха.

²⁶Тэрэ үедэ үүлэн дундуур Хүн түрэлхитэнэй Хүбүүнэй хүр хүсэтэйгөөр, алдар солотойгоор ерэхэ ябахань хүнүүдтэ үзэгдэхэ.

²⁷Тиигээд тэрэ Бурханай шэлэжэ абаһан зониие суглуулхын тула газар дэлхэйн заха хизаарһаа огторгойн заха хизаар хүрэтэр Эльгээмэлнүүдээ ябуулха.

Боди модон дээрэ харуулагдаһан жэшээ

²⁸Боди модонһоо жэшээ абагты: тэрэнэй халаа мүшэрнүүдэй зөөлэрөөд, набша намаагайнь халбархада, зун ойртобо гэжэ мэдэдэгта.

²⁹Тон тиигэжэл минии түрүүн хэлэһэн юумэнүүдэй болохые үзэхэдөө, саг дүхэжэ байна, бүри ойртоо гэжэ мэдэхэт.

³⁰Мүнөө ажамидаржа байһан хүнүүдэй бултанайнь үхэжэ үрдегүй байхада минии таанадта хэлэһэн бүхэн тохёолдохо гэжэ таанадта баталан хэлэнэб.

³¹Огторгой тэнгэри, газар дэлхэйсье хүнэн халаха, харин минии хэлэһэн үгэнүүд мүнхэ оршохо.

Тэрэ Үдэрэй, тэрэ сагай хэзээ ерэхые хэнсье мэдэхэгүй

³²Тэрэ Үдэрэй, тэрэ сагай болзор хэнсье мэдэхэгүй, тэнгэридэ оршодог Бурханай Эльгээмэлнүүдсье мэдэхэгүй, Хүбүүн өөрөөсье мэдэхэгүй. Гансал Эсэгэ Бурхан тэрэниие мэдэхэ юм.

³³Тиимэхээ хэргэг байгты, юундэб гэбэл, тэрэ үдэрэй, тэрэ сагай хэзээ ерэхые таанад мэдэнэгүй ха юмта.

³⁴Бүхы юумээ зарасанартаа даалгаад, холын замда мордохон хүнтэй энэ байдал сасуулмаар юм. Тэрэ хүн зараса бүхэндөө даабари үгөөд, үүдэнэй харуулшанда хэргэг байхыень захидаг.

³⁵Тиимэхээ хэргэлэн байгты! Таанад гэрэй эзэнэй хэзээ бусажа ерэхыень мэдэнэгүй ха юмта. Тэрэ үдэшэндөөсье, али хүниин тэн багаарсье, али эрэ тахяагай дуугархадасье, али үүр сайлганаарсье, ямарсье сагта ерэжэ магадгүй.

³⁶Харин гэнтэ ерэхэдэнь, таанад унтажэ нажажа бү байгаарайт.

³⁷„хэргэг байгты“ гэжэ таанадта хэлэһэнээ би мүн бултанда хэлэнэб».

Марк 14

Иисусые алаха гэнэн нюуса хэлсээн

¹Хоёр хоноод Паасхын хайндэр, ондоогоор хэлэбэл Эһээгдээгүй хилээмэнэй хайндэр болохо байгаа. Түрүү санаартан, Хуули заадаг багшанар Иисусые мэхэдээ оруулжа бариха, тиигээд алаха арга бэдэрбэ.

²Теэд улад зоной дунда буһалгаанай үүсхэгдэхэгүйн тула хайндэртэ тиимэ юумэ хэхэгүй гэжэ хэлсэбэ.

Иисус Бетанида байна

³Иисусай Бетанида хэлхэ үбшэндэ дайруулһан Симонэй гэртэ хоол барижа байхадань, нэгэ эхэнэр тон үнэтэй домбо соо хайхан хангалтай тоһо барижа оробо. Тэрэ тоһон ехэл үндэр сэнтэй һэн. Эхэнэр домбынгоо амһарынь нээгээд, Иисусай толгой дээрэ тоһоёо адхаба.

⁴Тиихэдэнь зарим айлшад дураа гутажа: «Юу гэешын ехэ тоһо гарзална гээшэб?»

⁵Энэ тоһо бидэ гурбан зуун динарээр худалдаад, мүнгиень үгытэйшүүлдэ хубаажа үгэхэ байгаабди», – гэжэ тэрэ эхэнэрые зэмэлбэ.

⁶Харин Иисус тэдэ зондо хэлэбэ: «Болигты даа! Юундэ энэ эхэнэрые аягүй байдалда оруулнабта? Энэ намда ехэл хайн юумэ хээ гээшэ.

⁷Үгытэй ядуушуул хододоо таанартай байхал, таанад дуратайл сагтаа тэдэндэ туһалха аргатай байхат. Харин би таанартай ходо байхагүйб.

⁸Энэ эхэнэр минии бэеые хүдөөлүүлгэдэ бэлдэн тоһоор түрхихэдөө шадаха зэргээрээл оролдобо гээшэ.

⁹Хайн Мэдээсэлэй бүхы газар дэлхэйгээр хаа хаанагүй номногдоходо, энэ эхэнэрэй хэһэн хэрэг тухай хүнүүд дурсан ханажа байха, хэлэжэ байха гэжэ би таанадта баталнаб».

Иуда ба ахамад санаартан тухай



¹⁰Арбан хоёр шабинарайнь нэгэн болохо Искарриодой Иуда түрүү санаартанда ошожо, Иисусые барихада таанадта туһалхаб гэбэ.

¹¹Түрүү санаартан Иудын хэлэһые ехэ дуратайгаар шагнажа, шамда мүнгэ үгэхэбди гэжэ амалба. Тиимэһээ Иуда Иисусые барижа тушааха таарамжатай ушар бэдэрбэ.

Иисус шабинартайгаа Паасхын хоол барина

¹²Эһээгдээгүй хилээмэнэй һайндэрэй түрүүшын үдэр болобо. Тэрэ үдэр Паасхын хурьга гаргаад байхада, шабинарын Иисусаа: «Паасхын хоол хаана бэлдэхэбибди?» – гэжэ һураба.

¹³Иисус хоёр шабидаа: «Таанад хото ошогты, тэндэ домбо соо уһа абажа ябаһан хүнтэй уулзахат, тэрэниие дахаад ябаарайт.

¹⁴Тэрэ хүнэй ороһон гэртэ ороод, гэрэй эзэндэ: „Багшамнай шамда эльгээгээ. Шабинартаяа хамта Паасхын хоол ямар таһалгада барихабибди?“ – гэхэт.

¹⁵Тэрэтнай танда ехэ уужам, зохидоор түхээрэгдэһэн таһалга дээдэ дабхарта харуулжа үгэхэ. Тэндэл шэрээгээ заһагты», – гэжэ хэлэбэ.

¹⁶Хоёр шабинарын хото орожо, Иисусай хэлэһэн бүхы юумые оложо, Паасхын хоол бэлдэбэ.

¹⁷Үдэшэ болоходо Иисус арбан хоёр шабинартайгаа ерэбэ.

¹⁸Шэрээдэ һуугаад, хоол барижа байха зуураа Иисус: «Намтай хамта эдеэлжэ байһан нэгэнтнай намайе барижа үгэхэнь, би баталан хэлэнэб», – гэбэ.

¹⁹Тиигэхэдэнь шабинарын ханаагаа ехээр зобожо: «Би бэшэ аабзаб?» – гэжэ Иисусаа хойно хойноһоон һуража оробо.

²⁰Иисус: «Намтай хамта нэгэ табагта хилээмээ дүрэжэ эдигшэ та арбан хоёрой нэгэнь юм.

²¹Хүн түрэлхитэнэй Хүбүүн Нангин Бэшэг соо хэлэгдэһэнэй ёһоор үхэхэ. Харин тэрэниие барижа үгэһэн хүн аймшагтай гай зоболон



амсаха: тэрэ хүнэй юрэдөө түрөөгүй хаань, өөртэнь нураггүй дээрэ байха һэн», – гэжэ хэлэбэ.

Дээдын Эзэнэй үдэшин хоол

²²Хоол бариха үедөө Иисус гартаа хилээмэ абаад, Бурханда баяр баясхалан хүргэн, тэрэнээ хухалаад, шабинартаа үгэн: «Энээниие абаад эдигты. Энэ минии махабад бэе гээшэ», – гэжэ хэлэбэ.

²³Тиигээд улаан архитай аяга абаад, Бурханда баяр баясхалан хүргөөд, шабинартаа үгэбэ. Шабинарынь булта тэрэ аягаһаань амсаба.

²⁴«Энэ болбол олоной түлөө адхарха минии шуһан гээшэ, тиин энэ шуһаар Бурхан хүнүүдтэй Шэнэ Хэлсээ батална.

²⁵Бурханай хаан түрэдэ шэнэ дарһа ууха үдэрэй болотор би архи дарһа уухагүйб», – гэжэ Иисус хэлэбэ.

²⁶Тиигээд тэдэнэр магтаал дуу дуулаһаар Элеон хада дээрэ гараба.

Иисус Пётрой өөрөөнь арсаха тухай уридшалан хэлэнэ

²⁷Иисус шабинартаа иигэжэ хэлэбэ: «Энэл хүнндөө таанар бултадаа намһаа арсажа холодохот, ушарынь гэбэл: „Хонишониенё дайража һалгаахадамни, хүрэг хонидынь тарашаха“ гэжэ Нангин Бэшэг соо хэлэгдэнэ.

²⁸Харин амидырһан хойноо би таанадай түрүүндэ Галилейдэ ошоод байхаб».

²⁹«Бултанай шамайе орхёошье хаань, би шамһаа хэзээшье арсахагүйб», – гэжэ Пётр тэрээндэ хэлэбэ.

³⁰«Энэ хүни эрэ тахяагай хоёр дахин дуугархаһаань урда ши намһаа гурба дахин арсахалши даа гэжэ баталан хэлэнэб», – гэжэ Иисус харюусаба.

³¹«Шамтай хамта үхэхэшье болобол, би шамһаа арсахагүйб», – гэжэ Пётр бүришье хатуугаар хэлэбэ. Бусадшье шабинарынь булта баһал тиигэжэ хэлэбэ.

Иисус Гефсимани гэдэг сэсэрлиг соо зальбарна



³²Иисус шабинартайгаа Гефсимани гэдэг сэсэрлигтэ ерээд: «Минии зальбараад ерэтэр таанад эндээ һуужа байгты», – гэжэ шабинартаа хэлэбэ.

³³Тэрэ Пётр, Яков, Иоанн гурбые абажа ошобо. Тэрэ ехэл уйдхар гашуудалтай, ехэл ханаагаа зобоһон юумэн

³⁴шабинартаа: «Минии ами хүнэһэн туйлай ехээр уйдажа, үхэхэндэл адли байнаб. Таанар эндэ намтай хамта хэргэг байгты», – гэбэ.

³⁵⁻³⁶Тиигээд тээ хажуу тээшээ ошожо, үбдэг дээрээ һуугаад, зальбарба: «Аба, Эсэгэмни! Ши ямаршые юумэ хэхэ аргатайш! Энэ аягаһаа амсуулангүй, иимэ ехэ зоболон намһаа зайлуулыш даа. Тиигэбэшые минии хүсэлөөр бэшэ, харин шиниихээр болог».

³⁷Удаань шабинартаа бусажа ерэхэдэнь, тэдэнь унтажа байба. Тэрэ Пётрто: «Симон, ши унтана гүш? Гансаханшые саг соо унтангүй байха аргагүй байна гүш?» – гэбэ.

³⁸Тиигээд бултандань: «Хорхойтуулгада абтахагүйн тула таанад хэргэг байгты, зальбарагты: сэдхэл дорюуншые хаа, бэе махабад ахир нула бшуу», – гэжэ хэлэбэ.

³⁹Иисус дахин хажуу тээшээ ошожо, урданайгаа үгэнүүдые дабтан зальбарба.

⁴⁰Тиигээд шабинартаа ерэхэдэнь, тэдэнь баһал унтажа байгаа. Тэдэнэй нюдэниинь анилдаад нээгдэжэ үгэнгүй, тэдэ юу хэлэхээшье мэдэнгүй байгаа.

⁴¹Иисус гурбадахия ерэхэдээ шабинартаа хэлэбэ: «Таанад үшөөл унтажа, амаржа байна гүт? Зай, болоо! Хүн түрэлхитэнэй Хүбүүнэй нүгэл үйлэдэгшэдэй гарта тушаагдаха сагын ерээ!

⁴²Бодогты, ябаябди! Намаие барижа үгэхэ хүн дүтэлжэ байна».

Иисусые барижа тушааба

⁴³Иисусай үшөө хэлэжэ байхадань, арбан хоёр шабинарайнь нэгэн болохо Иуда бии болобо. Тэрээнтэй хамта түрүү санаартанай, ахаматуудай, Хуули заадаг багшанарай эльгээһэн хэлмэ, шиидам хаднаг бариһан олон зон байба.

⁴⁴Урбагша хамта ябаһан зондоо ямар дохёо тэмдэг үгэхэ тухайгаа хэлсэжэ: «Минии таалан мэндэшэлхэ хүн танда хэрэгтэй хүн гэшэ, тэрэниие барижа, харуул доро абаарайгты», – гэбэ.

⁴⁵Иуда дары Иисуста ойртоод: «Рабби!» – гэбэ. Тиигээд тэрэниие таалаба.

⁴⁶Үнөөхи хүнүүд Иисусые барижа, харуул дооро абаба.

⁴⁷Тэндэ зэргэлээд байгшадай нэгэн хэлмээ гаргаад, ахамад санаартын зарасын шэхые таһа сабшажархёо.

⁴⁸Иисус тэдэ хүнүүдтэ хандан: «Таанар дээрмэшэниие барихаяа гараһандал хэлмэ, шиидам хаднагтайгаар намайе барихаяа ерэбэ гүт?

⁴⁹Тээд үдэр бүхэн таанадые Бурхан хүмэ соо хургахадамни намайе барижа хаадаггүй бэлэйлта. Зүгөөр Нангин Бэшэгэй үгэнүүд хүсэлдэг лэ даа», – гэбэ.

⁵⁰Шабинарын булга Иисусые орхёод, иишэ тишээ зугадаба.

⁵¹Нюсэгэн бээ хушалгаар орёогоод ябаһан тэдэнэй нэгэн Иисусай хойноһоо ябаа. Тэрэ хүбүүе бариха гэхэдэнь,

⁵²тэрэ нэмэрһэн хушалгаа намнагшадайнгаа гарта үлээгөөд, нюсэгөөр тэндэһээ гүйбэ.

Иисус Зүблэлэй гэшүүдэй урда

⁵³Иисусые ахамад санаартында абаашаба. Тэндэнь түрүү санаартан, ахаматууд, Хуули заадаг багшанар булга суглараад байгаа.

⁵⁴Пётр зай баряад ахамад санаартын хорёо хүрэтэр Иисусай хойноһоо гэтэн ерэбэ. Тиигээд хорёо соо орожо, харуулшадтай хамта галай хажууда дулаасажа нууба.

⁵⁵Түрүү санаартан, дээдын Зүблэлэй гэшүүд булта Иисусые үхэлэй саазада хүртөөхэ ханаатай байгаа. Тиимэхээ тэдэнэр Иисусые гэмнэхэ гэршэ баримта бэдэрбэ, тээд юуншые олдобогүй.

⁵⁶Олон худалша гэршэнэрэй хардажа гэршэлхэдэнь, тэдэ гэршэлгэнүүдынь хоорондоо харша байба.

⁵⁷Һүүлдэнь хардахаяа ерэнэн хэдэн гэршэнэр бодоод:

⁵⁸«Маанадай бариһан Бурхан хүмэ бута буулгаад, гурбан үдэр соо ямаршые хүнэй туһагүйгөөр шэнэ хүмэ бодхохоб гэжэ тэрэнэй хэлэһыень дуулаа һэмди», – гэжэ хэлэбэ.

⁵⁹Тээд энэ гэршэлгэньшые баримтагүй байгаа бэлэй.

⁶⁰Ахамад санаарта Зүблэлэй гэшүүдэй урда байгаад: «Ши юундэ харюусанагүйбши? Шамайе зэмэлһэн гэршэлгэнүүдые дууланагүй гүш?» – гэжэ Иисусаа асууба.

⁶¹Харин Иисус ямаршые харюу үгэнгүй, дуугүй байба. Тиихэдэнь ахамад санаарта тэрээндэ дахин хандан: «Ши магтаалта Бурханай Хүбүүн, Бурханай табисуурта гүш?» – гэжэ һураба.

⁶²«Тиимэб. һаяар Хүн түрэлхитэнэй Хүбүүнэй һүр хүсэтэй Бурханай баруун талада һуухыень, тэнгэрийн үүлэнүүд дээгүүр заларан ерэхыень үзэхэт», – гэжэ Иисус тэрээндэ хэлэбэ.

⁶³Тиихэдэнь ахамад санаарта уурлаһандаа хубсаһаяа шуу татажа: «Бидэндэ үшөө ямар гэршэ хэрэгтэйб?

⁶⁴Бурхание доромжолхыень дуулаа бээт! Таанад юун гэжэ һананабта?» – гэжэ Зүблэлэй гэшүүдһээ һураба. «Үхэлэй саазада хүртэхэ ёһотой», – гэжэ булта тэрэниие гэмнэбэ.

⁶⁵Тиигээд зариманиинь Иисусые нёлбожо оробо, нюдыень боогоод, нюдаргаараа шаан: «Шамайе хэн сохёоб, хэлэл даа!» – гэлдэбэ. Удаань харуулшад тэрэнэй хасарые альгадаба.

⁶⁶Пётрой хорёо соо байхадань, ахамад санаартын нэгэ зараса намган тэндэнь ерэжэ,

⁶⁷түүдэгэй хажууда дулаасажа байһан Пётрые анхаралтайгаар хараад: «Ши баһал Назаредэй Иисустай хамта байлсаа һэнши», – гэбэ.

⁶⁸«Шинии юун тухай хэлэжэ байһыешни би ойлгоногуйб», – гээд Пётр мэлзэбэ. Тиигээд хорёогой үүдээр гаража байхадань, эрэ тахяа дуугарба.

⁶⁹Тэрэ зараса эхэнэр Пётрые дахин хараад, тэндэ байһан зондо: «Энэл Назаредэй Иисустай хамта ябагшадай нэгэн байна», – гэжэ дабтаба.

⁷⁰Пётр дахин мэлзэбэ. Нэгэ хэды болоод, тэндэ зогсогшод Пётрто дүтэлжэ: «Ёһоороо ши тэдэнэй нэгэниинь байнаш, юундэб гэхэдэ, ши баһал Галилейһээ байнаш», – гэбэд.

⁷¹Тиигэхэдэнь Пётр: «Тэрэ хүниие би мэдэхэгуйлби», – гээд Бурханиие дурдажа байгаад тангариглаба.

⁷²Тэрэ үедэнь эрэ тахяа хоёрдохийёо дуугарба. «Эрэ тахяагай хоёр дахин дуугархаһаань урда ши намһаа гурба дахин арсахалши даа» гэжэ Иисусай хэлэһэниинь Пётрой ханаанда оробо. Тиимэһээ тэрэ сэдхэл ханаагаараа унажа, бархирба.

Марк 15

Иисус Пиладай урда зогсоно

¹Үүр сайха үеэр түрүү санаартан, ахамадууд, Хуули заадаг багшанар яаралтайгаар Зүблэлэй гэшүүдтэй уулзажа хуралдаба. Тэдэ Иисусые хүлижэ, Пиладта абаашажа тушаагаа.

²«Ши еврейнүүдэй хаан гүш?» – гэжэ Пилат Иисусаа асууба. «Ши тиигэжэ хэлэнэш», – гэжэ Иисус харюусаба.

³Түрүү санаартан Иисуста олон зэмэ тохожо байгаа.

⁴Тиимэһээ Пилат: «Ши харюу үгэхэгүй гээшэ гүш? Шамда эдэнэй иимэ олон зэмэ тохожо байхые дууланагүй гээшэ гүш?» – гэжэ хэлэбэ.

⁵Харин Иисус харюу үгэнгүй Пиладые гайхуулба.

Иисусые үхэлэй саазада хүртүүлбэ

⁶Паасхын хайндэрөөр Пилат хаалтада хуугшадай нэгыень зоной дурадхалаар сүлөөлдэг заншалтай байгаа.

⁷Тэрэ үедэ Барабба гэдэг хүн түрмэдэ хуугаа. Хотодо үймөөнэй болоходо тэрэниие үшөө хэдэн үймүүлэгшэдтэй хамта алуур хүйдхэл гаргаһанайнь түлөө барижа хааһан байгаа.

⁸Улад зон сугларжа, урданайнгаа заншалаар хаалтада хууһан нэгэ хүниие табихыень Пиладһаа гуйба.

⁹«Еврейнүүдэй хааниие танда табихыемни хүсэнэ гүт?» – гэжэ Пилат тэдэнһээ хураба.

¹⁰Иисуста атаархажа байһан дээрэхээ түрүү санаартан тэрэниие барижа асараа гэжэ Пилат хайн ойлгожо байгаа бшуу.

¹¹Тээд түрүү санаартан Бараббые табихыень Пиладһаа гуйгты гэжэ улад зониие идхаба.

¹²«Еврейнүүдэй хаан гэжэ таанадай нэрлэдэг хүниие би яаха болонобиб?» – гэжэ Пилат улад зонһоо асууба.

¹³«Тэрэниие хэрээһэндэ хада!» – гэжэ зон хашхарба.

¹⁴«Ямар гэмтэй юумэ тэрэ хээб?» – гэжэ Пиладай хурахадань, улад зон харюудань: «Тэрэниие хэрээһэндэ хада!» – гэжэ бүри шангаар гааралдан хашхарба.

¹⁵Пилат улад зоной хайшаалда хүртэхээ ханажа, тэдэндэ Бараббые табиба, харин Иисусые сохёод, хэрээһэндэ хадахыень захирба.

Сэрэгшэд Иисусые баһаба

¹⁶Сэрэгшэд Иисусые Пиладай ордоной хэрэмэй хорёодо абаашажа, тиишэнь бүхы бүлэг сэрэгшэдээ дуудаба.

¹⁷Тэдэ Иисуста улаан суба үмдэхүүлбэ, үүргэнээр гүрлөө гүрэжэ, толгойдонь углаба.



¹⁸Тиигээд тэрэниие баһажа: «Еврейнүүдэй хаан мандаха болтогой!» – гэжэ байгаад хашхарба.

¹⁹Тиигээд сэрэгшэд тэрэнэй тархи түрүүень таягаар сохижо, тэрэниие нёлбожо, мүн урдань үбдэг дээрээ унажа байгаад дохибо.

²⁰Тиигэжэ сэрэгшэд Иисусые ханатараа баһаад, удаань үнөөхи улаан субыень тайлаба. Тиигээд өөрын хубсаһа үмдэхүүлээд, хэрээһэндэ хадахаяа абаашаа һэн.

Иисусые хэрээһэндэ хадаба

²¹Харгыдаа тэдэнэр хээрэхээ гэртээ бусажа ябаһан Кириней нютагай Симон гэдэг хүнтэй уулзаба. Сэрэгшэд тэрэниие Иисусай хэрээһэ үргэлөөд ябахыень баалаба. (Симон болбол Александр Руф хоёрой эсэгэ байгаа.)

²²Сэрэгшэд Иисусые «Хохимой» (еврей хэлээр «Голгофо») гэдэг газарта асараа.

²³Тиигээд үбшэнэй мэдэрэл алдуулдаг эмтэй холиһон улаан архи үгэхэдэнь, Иисус уубагүй.

²⁴Удаань сэрэгшэд Иисусые хэрээһэндэ хадаад, жээрэб татажа, хубсаһыень дундаа хубаажа абаа.

²⁵Тэрэниие хэрээһэндэ хадахада үглөөнэй юһэн саг боложо байгаа.

²⁶Юундэ хэрээһэн дээрэ хадуулааб гэжэ тайлбарилһан модон хабтагай дээрэнь: «Еврейнүүдэй хаан» гэжэ бэшээтэй байба.

²⁷Иисустай хамта үшөө хоёр хоротоние саазалба: нэгыень баруун таладань, нүгөөдыень зүүн таладань хэрээһэндэ хадаба.

²⁹Хажуугаарнь үнгэрһэн зон толгойгоо һэжэржэ, Иисусые шоглон: «Зай, ши Бурхан хүмые хандаргаад, гурбан үдэр соо бодхоохоб гээ бэлэйш.

³⁰Ши түрүүн хэрээһэнһээ буужа, өөрыгөө абарыш!» – гэжэ хашхаралдаба.



³¹Тон тиигэжэл Иисусые түрүү санаартан, Хуули заадаг багшанар шоглон, бэе бээдээ: «Бусадые абардаг аад, харин өөрыгөө абаржа шаданагүйл.

³²Хэрбээ Израилиин хаан, Бурханай табисуурта юм наа, хэрээһэнһээ бууг лэ! Тиигэбэл бидэ нюдөөрөө хараад, этигэхэбди», – гэлдэжэ байба. Мүн Иисустай хамта хэрээһэндэ хадуулһан дээрмэшэдшье тэрээниие шоглон баһажа байгаа.

Иисус наһа бараба

³³Хахад үдэрэй баһаа үдэрэй гурбан саг болотор бүхы газар дэлхэй шэб харанхыда хушагдаба.

³⁴Гурбан сагай багаар Иисус: «Элои! Элои! Лама сабахтани?» (Бурхамни, Бурхамни! Юундэ намайе орхибош?) – гэжэ шангаар хашхарба.

³⁵Хажуудань зогсожо байһан зарим зон хэлэһыень дуулаад: «Шагныта, тэрэ Илияе дуудана!» – гэлдэбэ.

³⁶Тэдэнэй нэгэниинь гүйжэ ошоод, бамбагар юумэн дээрэ гашуун архи адхаад, тэрэнээ тулуурай үзүүртэ табяад, Иисуста уухыень үгэхэ зуураа: «Хүлеэгты, Илия тэрээниие хэрээһэнһэнь буулгахаяа ерэгшэ аа гү, харая!» – гэбэ.

³⁷Иисус шанга абяа гаргаад, амья табиба.

³⁸Тиихэдэнь хүмэ соо Хамагай Нангин газарта ороходо үлгөөтэй байһан хүшэгэ дээрэһээ доошоо шууража, хоёр боложо хахарба.

³⁹Иисусай сэхэ урдань зогсожо байһан зуунай дарга тэрэнэй хашхараад, амья табихыень харахадаа: «Энэ хүн үнэхөөрөө Бурханай Хүбүүн байгаа», – гэбэ.

⁴⁰⁻⁴¹Тээ холохоно зогсоод эдэ бүгэдые хэдэн эхэнэрнүүд хаража байгаа. Тэдэ Иисустай хамта Иерусалим ерэһэн юм. Тэдэ үшөө энэ ушарай тохёолдохын урда, Иисусай Галилейдэ байхада тэрэниие дахажа ябадаг, тэрээндэ туһаламжа үзүүлдэг һэн. Тэдэнэй дунда Магдалай

Мария, балшар Яков Иосия хоёрой эхэ Мария ба Саломия гэгшэд байлсаба.

Иисусые хүдөөлүүлбэ

⁴²Тиихэдэ субботын урдахи үдэшэ бэлэй. Тиимэһээ еврейнүүд энэ нангин үдэртэ бэлдэжэ байгаа.

⁴³Армафейн Иосиф гэдэг хүн Пиладта орохоёо зүрхэлжэ, тэрээнһээ Иисусай шарил эрибэ. Иосиф өөрөө дээдын Зүблэлэй ехэ хүндэтэ гэшүүниинь һэн, тиин тэрэ Бурханай хаан түрын мандахые хүлээжэ байгаа.

⁴⁴Иисусай тиимэ түргөөр үхэхэн тухай дуулаад, Пилат гайхаба. Тиигээд зуунай нэгэ даргые дуудаад, Иисус хэзээ үхөөб гэжэ һураба.

⁴⁵Пилат тэрэ даргые шагнаад, Иисусай бэе абахыень Иосифто зүбшөөбэ.

⁴⁶Иосиф нарин улһаар нэхэхэн бүд худалдажа абаа. Удаань Иисусай шарилые хэрээһэн дээрэхээ буулгаад, бүдөөр орёогоод, хабсагайда түнхигдэхэн агы нүхэн соо хадагалаа һэн. Тиигээд агы нүхэнэй амһартые томо шулуугаар хааба.

⁴⁷Иисусай шарилай хаана хадаглагдахые Магдалай Мария, Иосийн эхэ Мария гэгшэд ажаглан хаража байгаа.

Марк 16

Иисус амидырба

¹Субботын үнгэрһэн хойно Магдалай Мария, Саломия, Яковай эхэ Мария гэгшэд Иисусай шарилые түрхихөөр хангалтай зүйлнүүдые худалдажа абаба.

²Тиигээд гарагай нэгэнэй, воскресениин эртэ үглөөгүүр нара гарахын урда тээхэнэ агы нүхэн хуурсагта ошобо.

³Замдаа тэдэнэр: «Агы нүхэ хаһан шулууе хэн бидэндэ хажуу тээшэнь үмхирүүлжэ үгэхэб?» – гэжэ бэе бэеһээ һуража байгаа.



⁴Зүгөөр, ерэжэ харахадань, асари томо тэрэ шулуун хажуу тээшээ болгогдоһон байба.

⁵Тэдэнэр агы соо ороод, үүдэнэй баруун талада суй сагаан хубсаһатай залуу хүнэй нуухые харабад. Эхэнэрнүүдэй айн мэгдэхэдэ,

⁶тэрэ хүн: «Бү айгты! Таанад хэрээһэндэ хадуулһан Назаредэй Иисусые бэдэрнэт гэжэ би мэдэнэб. Тэрэтнай эндэ үгы, тэрэтнай амидыраа. Энэ шарилыень табиһан газар харыт.

⁷Мүнөө шабинартань, илангаяа Пётрто ошожо: „Таанадта хэлэһэнэйнгээ ёһоор, тэрэ таанадһаа түрүүн Галилей ошохо, тэндэ тэрэниие харахат“, – гэжэ дуулгагты».

⁸Эхэнэрнүүд агы сооһоо айхабтар ехээр сошоһон хүрдэһэн юумэд гүйжэ гарабад. Тон ехээр мэгдэһэн дээрэһээ тэдэ хэндэшье юумэ дуулгабагүй.

Иисус Мария Магдалинада ерэбэ

⁹Гарагай нэгэнэй, воскресениин эртэ үглөөгүүр Иисус амидыраад, анха түрүүн Мария Магдалинада ерэбэ. Урдань Иисус тэрэ эхэнэр сооһоо долоон ада шүдхэрые намнажа гаргаһан байгаа.

¹⁰Мария Иисустай хамта ябалсаһан шаналжа, уйлажа байһан хүнүүдтэ ошожо,

¹¹Иисусай амидырһан тухай, өөрөө тэрэниие хараһан тухайгаа хөөрэбэ. Гэбэшье тэдэнь үнэншэбэгүй.

Иисус хоёр шабинартаа ерэбэ

¹²Удаань Иисус ондоо шарай шарайлаад, хотоһоо гараад ябаһан хоёр шабинартаа ерээ.

¹³Тэдэнь бусажа ерээд, ушарһан бүгэдые нүгөө шабинартаа хөөрэбэ, харин тэдэнь этигэбэгүй.

Иисус арбан нэгэн шабинартаа ерэбэ

¹⁴Һүүлдэнь Иисус үдэшын хоол барижа байһан арбан нэгэн шабинартаа ерэбэ. Амидырһан хойнонь хараһан зондо үнэншэжэ үгэнгүй

зүр юутэһэнэйнъ түлөө, этигэлгүй байһанайнъ түлөө шабинараа тэрэ харааба.

¹⁵Тиигээд тэдэндээ иигэжэ хэлэбэ: «Бүхы газар дэлхэйгээр ябажа, хүн бүхэндэ һайн Мэдээсэл номногты.

¹⁶Намда этигэһэн, уһан арюудхалгада хүртэһэн хүн бүхэн абарагдаха. Харин намда этигэхээ арсаһан хүн бүхэн гэмнэгдэхэ.

¹⁷Намда этигэһэн хүн бүхэн гайхамшагта үйлэ хэрэгүүдые бүтээхэ аргатай байха. Минии нэрээр тэдэ ада шүдхэрнүүдые намнажа гаргаха, танигдахагүй хэлэнүүдээр дуугарха.

¹⁸Тэдэ могойнуудые барибашье, хоро уубашье, өөһэдыгөө гэмтээхэгүй. Мүн гараа үбшэн зон дээрэ табяад, тэдэниие эдэгээжэ байха».

Иисус тэнгэридэ дэгдэбэ

¹⁹Эдэ бүгэдые шабинартаа хэлээд, Дээдын Эзэн Иисус тэнгэридэ дэгдэжэ, Бурханай баруун таладань һууба.

²⁰Тиигээд шабинарынъ хаа хаанагүй ябажа, эндэ тэндэ номножо байба. Дээдын Эзэн тэдэндэ хамһалсажа, хэлэһэн үгэнүүдэйнъ үнэн зүб байһые гайхамшагта үйлэ хэрэгүүдээр баталдаг байгаа.



Лука

Лука 1

Юундэ Лука энэ ном бэшэһэн байгаа

¹Эрхим хүндэтэ Феофил! Манай дунда болоһон ушар ябадалнууд тухай туужа олон зон бэшэхэ гэжэ шармайна.

²Эхинһээнъ байлсаһан, болоһон бүгэдые хараһан зоной маанадта хөөрэхые тэдэ нүхэд буулгажа бэшэнэ.

³⁻⁴Бишье баһа болоһон бүгэдые эхинһээнъ нарин нягтаар шудалаад, шамда номногдоһон хургаалай сохом үнэниие мэдэжэ байхыншни тула тохёолдоһон бүгэдые үнэн байдалаарнь хойно хойноһоонь дараалан шамда бэшэжэ дамжуулха гэжэ шиидэбэб.

Уһаар Арюудхагша Иоаннай түрэхэн тухай айладхагдаба

⁵Иудейн орон нютагые Ирод хаанай зонхилжо байхада Захария Елизавета гэжэ нэрэтэй үбгэ һамга хоёр ажаһуугаа: үбгэниинь Авия бүлэгэй санаартан, тиин һамганиинь Аарон гэжэ ахамад санаартанай үри һадаһан мүн байгаа.

⁶Тэдэ хожуулан Бурханай хүсэл бодото дээрэнъ бөөлүүлэн, Хуулиин захяа заабаринуудые жэншэдгүй һайханаар сахидаг һэн.

⁷Елизавета һамганиинь анханай үригүй байжа, тэдэ хоёр үндэр наһа наһалтараа үхибүүгүй байгаа.

⁸⁻⁹Нэгэтэ Захария санаартанай Бурханда алба хэхэ уялгата үдэрэй ерэхэдэ, тэрээндэ жээрэбээр Эзэн Бурханай хүмэ соо орожо, сан табиха ехэ үршөөл тудаб.

¹⁰Сан санзай уталгын тэрэ үедэ үй түмэн зон хүмын хорёо соо мүргэжэ зальбаржа байба.

¹¹Харин хүмэ дотор сан табидог шэрээгэй баруун таладанъ гэнтэ Бурханай Эльгээмэл бии болобо.

¹²Тэрэниие хараад, Захария мэгдэшэбэ, тэрэнэй айдаханиинь хүрэшэбэ.

¹³Харин Бурханай Эльгээмэл иигэбэ: «Захария, бү ай, шинии зальбаралые Бурхан дуулаа, Елизавета һамганшни шамда хүбүү түрэхэ. Хүбүүгээ Иоанн гэжэ нэрлэхэш.

¹⁴Ши ехээр баярлаха, хүхихэш, тиин үшөөшье олон бусад зон хүбүүнэйшни түрэхэндэ баярлаха,

¹⁵юундэб гэхэдэ, хүбүүншни Бурханай нюдэндэ агууехэ хүн байха: архи дарһа амсахагүй, бүри эхынгээ умайда байхадаа Нангин һүлдэ тогтоожо абаха,

¹⁶Израилиин олон зоние өөһэдынь Бурхан болохо Дээдын Эзэндэ һөөргэнь бусаажа хандуулха.

¹⁷Хүбүүншни Дээдын Эзэнэй түрүүндэ Илиядал адли һүр хүсөөр, һүнэхэ һүлдөөр дүүрэн ерэхэ. Тиигэжэ үбгэ эсэгэнэрые үри хүүгэдтэйнэ эблэрүүлхэ, өөрынхээрээ ябадаг хүнүүдые Бурханай эрхэ хүсэл бээлүүлхэ тээшэнь тэгүүлхэ. Иигэжэ арад зоние Дээдын Эзэнтэй уулзуулхада бэлэн болгожо байха».

¹⁸«Би үбгэрөөб, һамгамнишье һаһатай болонхой. Тиимэхэ хэлэхэн үгэнүүдшни хүсэлдэхэ юм гэжэ би яагаад этигэхэ гээшэбиб?» – гэжэ Захария Бурханай Эльгээмэлһээ һураба.

¹⁹«Би болбол Бурханай ойро оршодог Гавриил гээшэб. Энэ һайн мэдээсэл дуулгахыемни Бурхан намайе шамда эльгээгээ юм.

²⁰Сагайнгаа ерэхэдэ хүсэлдэхэ эдэ үгэнүүдтэмни этигээгүй юм хадаа, эдэ бүгэдын тохёолдохо үдэр болотор ши аниргүй, дуугаржа шадахагүй ябахаш», – гэжэ Бурханай Эльгээмэл хэлэбэ.

²¹Тиигэхэ зуурань арад зон Захариягай гарахые хүлеэжэ, һүмэ соо яагаа удаан болоноб гэжэ гайхажа байгаа һэн.

²²Тэрэнэй һүмэхөө гараад, дуугаржа шадахагүй байхыень харахадаа, һүмэ соо хий үзэгдэл хараа байна гэжэ зон ойлгобо. Хэлэгүй болоһон Захария гар хургаараа заажа байгаад зонтой ойлголсобо.

- ²³Албаяа хэжэ дүүргээд, Захария гэртээ хариба.
- ²⁴Уданшьегүй тэрэнэй Елизавета һамганиинь хээлитэй болоод, табан һарын туршада гэрһээн гарабагүй.
- ²⁵«Одоошье Дээдын Эзэн намайе үршөөгөө, хүн зоной хэлэ аманһаа хамгаалаа», – гэжэ тэрэ эхэнэр өөртөө хэлэжэ байба.
- ²⁶Елизаветын зургаадахи һарадаа ябахата, Бурхан Гавриил гэдэг Эльгээмэлээ Галилейн Назарет хотодо ажаһуудаг
- ²⁷Мария басаганда эльгээбэ. Тэрэ басаган Давид хаанай үри һадаһан болохо Иосиф гэжэ хүнтэй хуби заяагаа холбохоо байгаа.
- ²⁸Бурханай Эльгээмэл Марияда ерээд: «Амар мэндэ, аза жаргалтай басаган! Дээдын Эзэн шамтай байна, шамайе буян хэшэгтээ элбэг дэлбэгээр хүртөөбэ!» – гэжэ хэлэбэ.
- ²⁹Иимэ юумэ дуулахадаа, Мария ехээр мэгдэжэ сошобо, юун гэбэ гээшэб гэжэ бодобо.
- ³⁰«Бү ай, Мария, ши Бурханай буян хэшэгтэ хүртэбэш.
- ³¹Ши хүндэ болохош, хүбүү түрэхэш, тэрээндээ Иисус гэжэ нэрэ үгэхэш.
- ³²Тэрэшни агууехэ хүн болохо, Дээдын Бурханай Хүбүүн гэжэ нэрэшэхэ. Эзэн Бурхан хүбүүешни үбгэ эсэгэ Давидтайнь адли хаан болгохо.
- ³³Тиигэжэ тэрэ Израилиин арад зоние хэтын хэтэдэ захирха, тэрэнэй хаан түрэ хэээш хүнэхэгүй», – гэжэ Бурханай Эльгээмэл хэлэбэ.
- ³⁴«Минии хадамда гараагүй байхада яажа тиимэ юумэн болохоб?» – гэжэ Мария асууба.
- ³⁵Бурханай Эльгээмэл харюусаба: «Нангин һүлдэ шам дээрэ бууха, Дээдын Бурханай хүсэн шамайе хушаха. Тиимэһээл түрэхэ нангин үришни Бурханай Хүбүүн гэжэ нэрлэгдэхэ.

³⁶Тиихэдэ шинии түрэл садан Елизавета наһатай болоошые хаа, баһал хүбүүтэй болохо гэжэ байна. Үриггүй гэжэ хэлүүлдэг байһан аад, мүнөө зургаадахи һара дээрээ ябана.

³⁷Бурханай хэжэ шадахагүй юумэн үгы ха юм».

³⁸«Эзэн Бурханай мэдэлдэ ха юмбиб даа. Хэлэһэнтнай бэелхэнь болтогой!» – гэжэ Мария хэлэбэ. Тиигээд Бурханай Эльгээмэл басаганһаа холодобо.

³⁹Удангүй Мария яаралтайгаар харгыда гаража, хадалиг Иудей уласай хото хүрөөд,

⁴⁰Захариягай гэртэ орожо, Елизаветые мэндэшэлбэ.

⁴¹Мариягай мэндээ хэлэхэтэйнь адли Елизаветын хэбэлдэ байһан үхибүүн тэршэлээд абаа һэн ха. Тэрэ дороо Елизавета Нангин һүлдөөр дүүрэбэ,

⁴²тиигээд шангаар хэлэбэ: «Ши бусад эхэнэрнүүдһээ үлүү ехээр Бурханай буян хэшэгтэ хүртэбэш, мүн хэбэл соо хэбтэһэн үришни буян хэшэгтэ хүртэбэ!»

⁴³Минии Дээдын Эзэнэй эжы, иимэ найнаар намда орожо ерэхэндэшни би баяртай байнаб.

⁴⁴Шинии мэндэшэлгэ дуулахатаймни сасуу, хүбүүмни хэбэл соом баясажа тэршэлээл.

⁴⁵Эзэн Бурханай айладхаһан үгэ бэелхэ гэжэ этигэһэн ши амар жаргалтайш!»

⁴⁶Тиихэдэнь Мария иигэжэ үгэлбэ: «Би үнэн сагаан сэдхэлһээ Эзэн Бурханаа алдаршуулан магтанаб,

⁴⁷Бурхан тухай, намайе Абарагша тухай сэдхэн, Эльгэ зүрхэмни урма баяраар халиба.

⁴⁸Ахир жаахан намайе Бурхан хаража, Агуу эбигээл хайрадаа хүртөөбэ. Бүхы угсаата зон энээнһээ хойшо намайе Амар жаргаланта эхэнэр гэжэ нэрлэдэг болохонь гээшэл.

⁴⁹Түгэс хүсэтэ Бурхан туйлай ехэ хэрэг намда бүтээгээл, тэрэнэй алдар нэрэнь арюун нангин лэ!

⁵⁰Өөртэнь бэшэрдэг, этигэдэг зониие Үршөөл хайрадаа тэрэ Үеын үедэ хүртөөжэ байдаг лэ!

⁵¹Тэрэ өөрынгөө гараар агуу хүсэ үзүүлэн, ехэрхүү найзгайнарые харнюулаа.

⁵²Һүр хүсэтэй засаг баригшадые хаан шэрээһэнь буулгаад, номгон даруу зониие дээшэнь үргөө.

⁵³Үлэсхэлэн үгытэйшүүлдэ элбэг дэлбэг юумэ үгөөд, дээрэлхүү баяшуулые гар хоһон ябуулаал.

⁵⁴Үбгэ эсэгэнэртэмнай амалһанаа Тэрэ гүйсэд бээлүүлээл, Израиль зарасадаа аша туһатай байгаал,

⁵⁵манай үдэрнүүд хүрэтэр мартангүй Абраһамда болон тэрэнэй үри һадаһадтань үеын үедэ үршөөл хайраа хайрлажа байгаал!»

⁵⁶Мария гурба һара шахуу Елизаветэтэй хамта байгаад, гэртээ харяа бэлэй.

Уһаар арюудхагша Иоаннай түрэнэн түүхэ

⁵⁷Елизаветын хүнгэрхэ саг ерэжэ, тэрэ хүбүү түрэбэ.

⁵⁸Дээдын Эзэнэй Елизаветэдэ хүртөөһэн эбигээл хайра арьбадхаба гэжэ дуулахадаа, хүршэнэрынь, түрэл саданиинь тэрээнтэй хамта ехэтэ баярлаба.

⁵⁹Түрэхөөр наймадахи үдэртэнь нарай хүбүүнэй бэлгэ отолуулха ёһололдо хүнүүд сугларжа, тэрээндэ Захария гэжэ эсэгынь нэрэ үгэхэ гэлсэбэ.

⁶⁰Тиихэдэнь эхэнь: «Үгы, хүбүүндээ Иоанн гэжэ нэрэ үгэхэбди», – гэбэ.



⁶¹«Түрэл саданайтнай дунда тиимэ нэрэтэй хүн оройдоо үгы ха юм», – гэжэ Елизаветэдэ хэлэбэд.

⁶²Тиигээд хэн гэжэ нэрэ хүбүүндээ үгэхэбши гэжэ эсэгэһээнъ гараараа заажа харуулжа байгаад һурахадань,

⁶³Захария багахан хабтагай асаруулаад, «Хүбүүнэймни нэрэ – Иоанн!» гэжэ бэшэбэ. Хүнүүд булта гайхалсаа һэн.

⁶⁴Тэрэ дары Захариягай аман нээгдэжэ, хэлэниинь табигдажа, тэрэ Бурханиее магтажа оробо.

⁶⁵Энэ ушарһан гайхамшагта үйлэ хэрэг тухай һураг бүхы Иудейн хадалиг улас соогуур таража, оршондонь ажаһуудаг зон булта айн һүрдэбэ.

⁶⁶Дуулаһан хүнүүд энээниие сэдхэл зүрхэндөө бүхөөр хадужа: «Энэ хүбүүн хэн юун болохо хаб?» – гэлдэбэ. Үнэхөөрөөшье Иоаннай хажууда Дээдын Эзэнэй оршожо байһань эли байба.

Захария Дээдын Эзэнэй абарал буулгана

⁶⁷Нарай хүбүүнэй эсэгэ Захария Нангин һүлдөөр дүүрэжэ, иимэ абарал буулгаба:

⁶⁸«Израилиин Бурхан болохо Дээдын Эзэндэ алдар соло дуудаял! Аюул оһолһоо абархаяа Тэрэ арадтаа ерээ.

⁶⁹Зараса Давидайнгаа үри һадаһадһаа Манда һүр хүсэтэй Абарагшые үгөөл.

⁷⁰⁻⁷¹Дайсадһаатнай, таниие үзэн ядагша бүхы зонһоо абархаб гэжэ тэрэ эртэ урдын сагта гэгээн лүндэншэдөөрөө дамжуулан,

⁷²үбгэ эсэгэнэрыетнай найдүүлһан ёһоор таанадые үршөөл хайрада хүртөөхэб, мүн өөрынгөө нангин хэлсээ,

⁷³танай үбгэ эсэгэ Абраһамда үгэһэн тангаригаа дурдан һанахаб,

⁷⁴Дайсадайтнай гарһаа мулталан абархаб гээ. Тиимэхээ бидэ айлтагүйгөөр Эзэндээ алба хэжэ,



⁷⁵Наһан туршадаа арюун һайханаар, боди сэдхэлээр тэрээндэ мүргэл хэжэ ябаха заяатайбди.

⁷⁶Тиин ши, жаахан хүбүүмни, Дээдын Бурханай лүндэншэ гэжэ нэрлэгдэхэш, Дээдын Эзэнэй урдань ябажа, заларха замыень бэлдэхэш.

⁷⁷Нүгэлөө арилгажа абарагдахат гэжэ Бурханай арадта ши айладхахаш.

⁷⁸Бурхамнай гүн ехэ хайраараа огторгойһоо шараһан Гэгээн Наран мэтээр

⁷⁹үхэлэй харанхы һүүдэртэ хушагдаһан маанадые гэрэлтүүлхэ, энхэ тайбанай замаар хүтэлэн, алхамуудыемнай шэглүүлхэ юм».

⁸⁰Хүбүүхэн урган боргожожо, сэдхэл зоригынь хатуужажа байба. Израилиин арадта айладхаха сагайнгаа ерэтэр тэрэ хүбүүн сүл губида байба.

Лука 2

Иисусай түрэнэн түүхэ

¹Тэрэ үедэ Римэй хаан Август гэгшэ орон дайдынгаа бүхы зоной тоо бүридхэхэ гэнэн зарлиг гаргаба һэн ха.

²Тэрэнь Сири уласые Квиринийн зонхилжо байха үедэ хэгдэһэн хүн зоной анха түрүүшын тоо бүридхэл бэлэй.

³Хүн зон булта нэрээ бэшүүлхээс өөһэдынгөө түрэнэн хото ошожо байгаа.

⁴Давидай обогһоо уг гарбалтай Иосиф гэгшэ Галилейн Назарет хотоһоо гаража, Давид хаанай тоонто нютаг болохо Иудейн Вифлеем хото руу мүн лэ нэрээ бэшүүлхээс ошобо.

⁵Тиихэдээ үхибүү түрэхөө байһан, һамганиинь болохо Мариятайгаа хамта ошобо.

⁶Вифлеемдэ ерээд байхадань, Мариягай хүнгэрхэ сагынь ерэжэ,



⁷тэрэ ууган хүбүүгээ түрөө һэн. Тэрэнээ мансылаад, малай эдюур соо абаашажа табиба, юундэб гэхэдэ, зоной буудаг газарта тэдээндэ һуури хүртөөгүй һэн.

Малшад тухай

⁸Тэрэ сагта Вифлеемһээ холо бэшэ талада малшад һүниндөө малаа манажа хонодог һэн ха.

⁹Тэдээндэ гэнтэ Бурханай Эльгээмэл буужа, Эзэн Бурханай алдарай гэрэлэй туяархада, малшад айхын ехээр айн һүрдэбэ.

¹⁰Бурханай Эльгээмэл тэдээндэ хэлэбэ: «Бү айгты! Би бүхы арад зоние ехэтэ баясуулха һайн мэдээсэл таанадта дуулгахаяа ерээб:

¹¹мүнөөдэр Давид хаанай хотодо танай Абарагша түрэбэ, Бурханай табисуурта Дээдын Эзэн мүндэлбэ.

¹²Тэрэниие иимэ дүлгэ тэмдэгээр танихат: мансытай тэрэ хүбүүхэнэй малай эдюур соо хэбтэхые харахат».

¹³⁻¹⁴Гэнтэ дээрэхэ үй түмэн Бурханай Эльгээмэлнүүд буужа: «Дээдын огторгойдо Бурхан алдаршаһай! Бурханай хайра дура татадаг хүн бүхэн Газар дэлхэй дээрэ амгалан тэнюун ажаһууһай!» – гэжэ Бурханда магтаал соло дуудаба.

¹⁵Бурханай Эльгээмэлнүүдэй огторгойдо бусахадань: «Вифлеем хото ошожо, энэ ушарһан бүхэниие хараял, Дээдын Эзэнэй хэлээшыень үзээл!» – гэжэ малшад бэе бээдээ хэлэбэ.

¹⁶Тиигээд тэдэнэр яаралтайгаар хото ошожо, Мария Иосиф хоёрые, мүн малай эдюур соо хэбтэһэн хүбүүхэниие хараба.

¹⁷Иисусые хараад, тэдэ малшад энэ хүбүүн тухай Бурханай Эльгээмэлэй хэлээшые хүн зондо хөөрэбэ.

¹⁸Малшадай хэлэхэн юумэ дуулаһан хүнүүд булта гайхажа байгаа.

¹⁹Тиин Мария эдэ үгэнүүдыень сэдхэл зүрхэндөө бүхөөр хадуужа, һанажа дурдажа ябадаг һэн.



²⁰Малшад Бурханай Эльгээмэлэй дуулгаһые нюдөөрөө хараһанайнгаа, шэхээрээ дуулаһанайнгаа түлөө Бурханаа алдаршуулан, магтан гэртээ харибад.

Хүбүүндэ Иисус гэжэ нэрэ үгэбэ

²¹Хүбүүхэнэй түрэнһөөр найман үдэрэй үнгэрһэн хойно бэлгэ отолуулха ёһололой болоходо, эхын хээлитэй болохын урда тээ Бурханай Эльгээмэлэй айладхаһан ёһоор нарай нялхада Иисус гэжэ нэрэ үгтөө һэн.

Симеон Дээдын Эзэндэ магтаал соло дуудана

²²⁻²⁴Моисейн Хуулида бэшэгдэнэй ёһоор: «Эхын хээлиһээ гараһан түрүүшын хүбүүн бүхэниие Эзэн Бурханда зорюулха ёһотой». Тиихэдээ хоёр түүтэй шубуу гү, али гулабхаагай хоёр дальбараа тахил болгон үргэхэ зэргэтэй. Тиин Моисейн Хуулийн ёһоор арюудхалгын ёһолол хэхэ болзор Мария Иосиф хоёртошье тудабa. Тэдэ хоёр Иисус хүбүүгээ Дээдын Эзэндэ зорюулха гэжэ Иерусалим абажа ерэбэ.

²⁵Боди найхан сэдхэлтэй, Бурханда бэшэрэн хүгэдэдэг, Нангин хүлдэдэ хүртэн Симеон гэжэ хүн Иерусалим хотодо ажаһуугаа. Тэрэ хүн Израилийн абарагдахые хүлээжэ байгаа.

²⁶«Дээдын Эзэн Христосые хараагүйдөө ши үхэхэгүйш!» – гэжэ Нангин хүлдөөр Симеондо элирхэйлэгдэн байгаа.

²⁷Нангин хүлдөөр хүтэлэгдэн, Симеоной Бурхан хүмэ соо ороод байхада, эхэ эсэгэ хоёр Хуулида бэшэгдэн ёһо бүтээхэ гэжэ нарай нялха Иисус хүбүүгээ асарба.

²⁸Симеон тэрэ хүбүүень гар дээрээ абажа, Бурханда баяр баясхалан хүргэбэ:

²⁹«Дээдын Эзэмни, ши амалһанаа дүүргэбэш, богоол намайгаа мүнхэдөө амархыемни мүнөө табижа байнаш.

³⁰Эльгээһэн Абарагшыешни би нюдөөрөө үзэбэб.

³¹Бусад арадуудшые булта тэрэ абаралыешни харахал:



³²Тэрэшни бүхы угсаатаниие гэгээрүүлхэ гэрэл болохол, Израилииншни арадта алдар соло асархал».

³³Иисус тухай Симеоной хэлэһэн эдэ үгэнүүдые дуулахадаа, Иосиф Мария хоёр ехээр гайхаба.

³⁴Симеон тэдэ хоёрые адислаад, Иисусай эхэ Марияда хэлэбэ: «Израильда олониие унагаажа хүнөөхын, мүн олониие хэргээжэ абархын тула Бурхан энэ хүбүүниие шэлэжэ абаа юм. Энэ хүбүүн хэргылһэн хүлдэ тэмдэг болохо. Олон зон энээниие буруушаажа,

³⁵сэдьхэл ханалаа элирхэйлхэ. Мүн шинишье зүрхэ сэдьхэлые уйдхар зоболон хурса жадаар хадхаһандал адляар зобоохо».

³⁶Һүмэ соо Асир обогой Фануил гэдэг хүнэй удам болохо Анна лүндэншэн байгаа. Тэрэ наян дүрбэтэй хүгшэн залуудаа хадамда гарабашье, долоон жэл нүхэртээе һуугаад, һүүлдэнь бэлбэһэн боложо үлөө.

³⁷Мүнөө тэрэ үдэр хүнигүй Бурханда мүргэжэ, масаг сахижа, Бурхан хүмэһөө холододоггүй хэн.

³⁸Энэшье үедэ эндэ ерэжэ, Бурханда магтаал соло дуудажа, Иерусалим хотын эрхэ сүлөөтэй болохые хүлеэжэ найдажа байһан хүн бүхэндэ Иисус нялха тухай хөөрөжэ үгэбэ.

Назарет хото руугаа хариба

³⁹Дээдын Эзэнэй Хуулида тогтоогдоһон бүхы юумые хэжэ дүүргээд, Мария Иосиф хоёр Галилейн Назарет хото гэртээ бусажа ерэбэ.

⁴⁰Хүбүүниинь боргожон бэежэжэ, хүбэлгэн, хурса ухаатай, Бурханай буюн хэшэгтэй үхибүүн ургажа байба.

Иисус хүбүүн Бурхан хүмэ соо

⁴¹Жэл бүри Паасхын һайндэртэ Иисусай аба эжынь Иерусалим хото ошодог байгаа.



⁴²Хүбүүнэйнгээ арбан хоёртойдо тэдэ жэл бүри хайндэртэ ошодог заншалаараа Иерусалим ошобо.

⁴³хайндэрэй дүүрэхэдэ Иисус Иерусалимда үлэбэ, гэбэшье гэртээ бусажа ябаһан түрэлхидынь хүбүүнэйнгээ үлэшэһые ойлгоогүй бэлэй.

⁴⁴Хүбүүмнай суг ябаһан хүнүүдээрээ ябаа юм ааб даа гэжэ һанаад, бүхэли үдэртөө замда ябаһанайнгаа һүүлээр түрэл гарал болон танил хүнүүдэйнгээ дунда тэрэнэйнгээ үгы байхые ойлгожо,

⁴⁵бэдэрхэээ һөөргөө Иерусалим хото бусаа һэн.

⁴⁶Хэдэн хоног бэдэрээд, гурбадахи үдэртөө Иисус хүбүүгээ Бурхан хүмэ соо олобо. Тэрэнь багшанарай дунда һуушанхай, номнолынь шагнажа, өөрөө тэдэнһээ юумэ һуража байгаа.

⁴⁷Өөртэнь табигдаһан асуудалнуудта хурса тодо харюу үгэхыень шагнаад, Бурхан хүмэ соо байгшад булта сэсэн ухаатайень гайхажа байба.

⁴⁸Хүбүүгээ хараад, Иосиф Мария хоёр ехэтэ гайхаба. «Хүбүүмни, юундэ бидэниие иигэжэ зобообош? Эсэгэ бидэ хоёршни шамайгаа үгы болгоод, һанаагаа зобоһон, бэдэрһэн гээшэмнай!» – гэжэ эхэнь хэлэбэ.

⁴⁹«Юундэ намайе бэдэрээ зомта? Намайе Эсэгынгээ гэртэ байха ёһотой гэжэ мэдэхэгүй юм аалта?» – гэжэ хүбүүниинь харюусаба.

⁵⁰Түрэлхидынь хүбүүнэйнгээ хэлэһэн үгэнүүдэй үнэн удха ойлгобогүй.

⁵¹Иисус аба эжытэйгээ Назарет хотодоо бусажа ерээд, үгөөрнь байба. Мария эхэнь тэрэ болоһон ушар мартахагүйгөөр ой ухаандаа хадуун абаа.

⁵²Харин Иисус сэсэн ухаагаараа, энэрхы сэдхэлээрээ Бурхандашые, хүн зондошые һайшаагдан үдэжэ, ехэ боложо байгаа һэн.

Лука 3

Уһаар арьудхагша Иоаннай номнол



¹Тибири хаанай арбан табадахи жэлээ Римэй хаан орон захиржа байхадань, Израилин Иудей мого Понтий Пилат, Галилей мого Ирод, Итурия болон Трахинот орон нютагуудые Иродэй дүү Филипп, Абилини мого Лисаний гэгшэд зонхилжо байгаа.

²Анна болон Кайафа гэгшэд ахамад санаартан байгаа. Тэрэ үедэл Захариягай Иоанн хүбүүнэй сүл губида байхадань, Бурхан тэрээндэ зарлигаа мэдүүлбэ.

³Тиимэхээ Иоанн Иордан голой оршон тойрон газар дайдаар ябажа: «Нүгэл шэбэлнүүдээ хүлисүүлхын тула Бурханда хандан, уһаар арюудхуулагты», – гэжэ айладхаба.

⁴⁻⁶Исайя лүндэншын ном соо Иоанн тухай иигэжэ бэшээтэй байдаг: «Дээдын Эзэнэй ябаха замыень бэлдэгты, алхаха харгыень дардам сэхэ болгогты: жалга бүхэн жэгдэрхэ ёһотой, хада гүбээ бүхэн набтар болохо зэргэтэй, хотирхой нугархай харгы сэхэ болохо, ялхитай болдогтой зүргэ тэгшэ болохо ёһотой! Хүн түрэлхитэн бүгэдэ Бурханай абаралые үзэхэ гэжэ хэн бэ даа сүл губида хашхарба».

⁷Тиин уһаар арюудхуулхаяа ерэхэн олон зондо Иоанн хэлэбэ: «Хорото могойн таһардаһад! Бурханай буулгаха хэхээлтэхээ иигээд хулжахыетнай таанарта хэн заагааб?»

⁸Таанар буянтай хайн хэрэгүүдые бүтээжэ, Бурханда хандаһанаа харуулагты. Үбгэ эсэгэмнай Абраһам юм гэжэ өөһэд тухайгаа бү бодогты, юундэб гэхэдэ, Бурхан энэ хэбтэхэн шулуугааршые Абраһамда үри хүүгэдые бүтээжэ шадаха юм гэжэ танда хэлэхэ байнаб.

⁹Модо үндэхөөрнь таһа сабшаха алма хүхэ бэлэн байна: хайн үрэ жэмэс үгэдэггүй алишые модон таһа сабшагдаад, галда хаягдаха».

¹⁰«Тиихэдээ бидэ юу хэхэ ёһотойбибди?» – гэжэ арад зон Иоанһаа асууба.



¹¹«Хоёр самсатай хүн нэгыень самсагүй хүндэ үгэг, эдихэ, ууха юумэтэй хүн бусадтай хубаалдаг», – гэжэ тэрэ харюусаба.

¹²Алба татабари суглуулагшад уһаар арюудхуулхаяа Иоаннда ерэжэ: «Багша аа! Бидэ юу хэхэ ёһотойбибди?» – гэжэ тэрээнһээ һураба.

¹³«Албатан зонһоо тогтоогдоһонһоо үлүү түлэбэри бү нэхэгты!» – гэжэ Иоанн тэдээндэ хэлэбэ.

¹⁴«Харин бидэ юу хэхэ ёһотой болонобибди?» – гэжэ сэрэгшэд мүн лэ асууба. «Хүн зоной юумэ бү дээрмэдэгты, бү булягты, салин хүлһөөрөөл ажамидарагты!» – гэжэ Иоанн харюусаба.

¹⁵«Энэмнай Христос өөрөө бэшэ аа гү?» – гэжэ зон гайхалдажа, найдан хүлэһээр байба.

¹⁶Тиихэдэнь Иоанн бултанда хандажа хэлэбэ: «Би таанарые уһаар арюудханаб. Харин намтай жэшээлхэгүй дээгүүр хүн иишэ ерэнэ. Би тэрэнэй гуталайнь ооһорыешье тайлаха эрхэгүйб. Тэрэ ерэхэдээ таанадые Нангин һүлдэ гал хоёроор арюудхаха.

¹⁷Тэрэ таряагаа сэбэрлэхээр хүрзээ гартаа адхаад байна: таряагаа суглуулжа өөрынгөө амбаарта хадагалха, харин мэхинэ голоомыень залиршагүй галда шатааха».

¹⁸Иоанн үшөөшье олон арга янзаар һайн Мэдээсэл зондо номножо, ажамидаралаа хубилгахыень идхажа һургажа байба.

¹⁹Ирод хааниие дүүгэйнгээ һамган Иродиадатай һууһанайнь түлөө, мүн олон ондоо нүгэлтэ ябадал хэһэнэйнэ түлөө Иоанн тэрэниие элишэлэн зэмэлһэн байгаа.

²⁰Һүүлэй һүүлдэ Ирод хаан Иоанные түрмэдэ хаажа, бүришье аймшагтай нүгэл үйлэдэбэ.

Иисусые уһаар арюудхаба

²¹Бүхы арад зоной уһаар арюудхуулжа байхада, мүн Иисусые уһаар арюудхуулба. Тэрэнэй Бурханда зальбархада, огторгой нээгдэжэ,



²²гулабхаадал мэтэ Нангин хүлдэ тэрээндэ бууба. «Ши минии хайрата хүбүүмниш, шамаар би таларханаб», – гэхэн абьяан огторгойһоо дуулдаба.

Иисусай элинсэг үбгэ эсэгэнэр

²³Иисус хургаалаа номножо эхилхэдээ гушаадтай ябаа. Хүнүүд Иисусые Иосифой хүбүүн гэжэ ханадаг байба. Иосиф болбол Илиягай хүбүүн байгаа,

²⁴Илия – Матадай, Матат – Левиин, Левий – Мелхиин, Мелхий – Янайын, Янай – Иосифой хүбүүн,

²⁵Иосиф – Мататиасай, Мататиас – Амосой, Амос – Наумай, Наум – Эслиин, Эслий – Нагайын хүбүүн,

²⁶Нагай – Маатай, Маат – Мататиасай, Мататиас – Семейнэй, Семейн – Иосэхэй, Иосэх – Йодын хүбүүн,

²⁷Йода – Иоанамай, Иоанам – Ресайын, Ресай – Зоробабэлэй, Зоробабэл – Шеалтиэлэй, Шеалтиэл – Нириин хүбүүн,

²⁸Нирий – Мэлхийн, Мэлхий – Адиин, Адий – Косамай, Косам – Элмадамай, Элмадам – Эрэй хүбүүн,

²⁹Эр – Йосиин, Йосий – Елизээрэй, Елизээр – Иоримой, Иорим – Матадай, Матат – Левиин хүбүүн,

³⁰Левий – Симеоной, Симеон – Иудын, Иуда – Иосифой, Иосиф – Ионанай, Ионан – Элиакимай хүбүүн байгаа,

³¹Элиаким – Мелейын, Мелей – Менын, Мена – Матадай, Матат – Натанай, Натан – Давидай хүбүүн,

³²Давид – Иесейн, Иесей – Обидой, Обид – Боазай, Боаз – Салмоной, Салмон – Нахшоной хүбүүн,

³³Нахшон – Аминадабай, Аминадаб – Админай, Админ – Арниин, Арни – һэцроной, һэцрон – Перецэй, Перец – Иудын хүбүүн,



³⁴Иуда – Яковай, Яков – Исаагай, Исаак – Абраһамай, Абраһам – Терахай, Терах – Нахорой хүбүүн,

³⁵Нахор – Сэрүгэй, Сэрүг – Рэүгэй, Рэү – Пэлегэй, Пэлег – Эберэй, Эбер – Шелахай хүбүүн,

³⁶Шелах – Кайнанай, Кайнан – Арпакшадай, Арпакшад – Шимэй, Шим – Нойн, Ной – Ламехэй хүбүүн,

³⁷Ламех – Метушлайын, Метушлай – Енохой, Енох – Иарэдэй, Иарэт – Маалалэлэй, Маалалэл – Кенанай хүбүүн,

³⁸Кенан – Эношой, Энош – Шэтэй, Шэт – Адамай, Адам болбол Бурханай хүбүүн байгаа.

Лука 4

Иисусые хорхойтуулан туршана

¹Иисус Иордан мүрэнһөө Нангин хүлдөөр дүүрэн бусажа, хүлдэ тэрэниие сүл губи руу хүтэлжэ абаашаба.

²Тэндэ Иисусые дүшэн хоногой туршада шолмос хорхойтуулан туршаба. Тэдэ бүхы үдэрнүүдтэ Иисус юушье эдингүй ябаа, һүүлдэнь гэдэһэниинь аргагүй ехээр үлдөө һэн.

³«Ши Бурханай Хүбүүн юм һаа, хилээмэн боло гэжэ энэ шулуунда захирал даа», – гэжэ шолмос Иисуста хэлэбэ.

⁴«Хүн гээшэ ганса хилээмээр амидардаггүй гэжэ Нангин Бэшэг соо хэлэгдэнэ», – гэжэ Иисус шолмосто харюусаба.

⁵Шолмос тэрэниие үндэр дээрэ гаргажа, юртэмсын бүхы хаан оронудые саг зуура харуулба.

⁶«Эдэ хаан түрэнүүдэй хамаг эрхэ засагы, хамаг эрдэни баялигы би шамда үгэхэб. Эдэ бүгэдэ минии гарта үгтэнхэй, тиин би дуратайл хүндөө тэрэниие үгэхэ эрхэтэйб.



⁷Хэрбээ хүлдэм унажа мүргөө хаашни, эдэ бүгэдэ шинии болохо», – гэжэ шолмос хэлэбэ.

⁸«Эзэн Бурхандаа шүтэжэ, гансал тэрээндээ алба хэжэ бай! – гэжэ Нангин Бэшэг соо бэшээтэй байдаг», – гэжэ Иисус харюусаба.

⁹Һүүлэй һүүлдэ шолмос Иисусые Иерусалим хото абаашажа, Бурхан хүмын орой дээрэ байлгаад: «Хэрбээ ши үнэхөөрөө Бурханай Хүбүүн юм хаа, эндэһээ доошоо хүрэ!

¹⁰„Шамайе аршалан хамгаалхые Бурхан өөрынгөө Эльгээмэлнүүдтэ захиралта үгэхэ“ гэжэ,

¹¹мүн „Шулуунда бүдэржэ унахагүйншни тулада тэдэ Эльгээмэлнүүд шамайе гар дээрээ үргөөд ябаха“ гэжэ Нангин Бэшэг соо бэшээтэй ха юм», – гэжэ шолмос хэлэбэ.

¹²Иисус харюудань: «Бурханшни болохо Дээдын Эзэнээ бү турша гэжэ Нангин Бэшэг соо хэлээтэй байдаг», – гэжэ шолмосто хэлэбэ.

¹³Элдэб янзаар туршан хорхойтуулжа ядаад, шолмос Иисусые халта зуура орхижо ошобо.

Иисус ажалдаа оробо

¹⁴Һүүлдэнь Нангин Һүлдэн хүсөөр дүүрэхэн Иисус Галилейдээ бусажа ерэбэ. Тэрээн тухай мэдээсэл бүхы орон нютагаарнь хаа хаанагүй тараба.

¹⁵Иисус мүргэлэй гэртэ хүн зондо хургаалаа номножо, бүгэдэ зоной магтаалда хүртэжэ байгаа.

Назаредэй хүн зон Иисусые буруушааба

¹⁶Иисус үдэжэ хүмүүжэхэн Назарет хотоёо бусажа, заншалта ёһоороо субботодо мүргэлэй гэртэ орожо, Нангин Бэшэг сооһоо хэхэг уншахаяа зоной урда зогсобо.

¹⁷Тэрээндэ Исаяя лүндэншын ном үгтэбэ. Иисус тэрэ ном нээжэ уншаба:



¹⁸«Дээдын Эзэнэй Нангин хүлдэ зосоомни оршобо, үгытэй ядуушуулда хайн мэдээсэл номнохыемни Дээдын Эзэн намайе шэлэжэ абаба. Хаалтада байһан, олзологдоһон хүнүүдтэ эрхэ сүлөө айладхахыемни, хохор зоние хараатай болгохыемни, хашуулан дарлуулһан зоние сүлөөдэ табихыемни Дээдын Эзэн эльгээгээ юм.

¹⁹Арад зондоо үршөөлөө хайрлаха сагынь ерээ гэжэ баһа дуулгахаар намайе эльгээгээ юм».

²⁰Иисус номоо хаажа, мүргэлэй гэрэй нэгэ тухалагшада бусаажа үгөөд, хууба. Мүргэлэй гэр соо байһан хүнүүд булта тэрээн тээшэ хараһаар байгаа.

²¹«Энэ номһоо минии уншаһан, таанадай дуулаһан зүйл бүхэн мүнөөдэр бээлжэ байна», – гэжэ Иисус тэдээндэ хэлэбэ.

²²Бүгэдэ зон Иисус тухай хэлсэбэ, уран хайхан үгэнүүдтэнь гайхалсан: «Энэмнай Иосифой хүбүүн бэшэ аал?» – гэлдэбэ.

²³Иисус тэдээндэ хэлэбэ: «Эмшэн, түрүүн өөрыгөө хайнаар аргалжа эдэгээ гэдэг үгэ таанад намда хэлэхэ ханаатайт гэжэ мэдэнэб. Капернаум хотодо гайхамшагта үйлэ хэрэг бүтээһэн тухаймни таанад дуулаат. Тиимэл гайхамшаг хэрэг мүнөө эндээ, түрэхэн нютагтаа бүтээ гэхэтнай гээбы.

²⁴Таанадта үнэн зүрхэнһөө хэлэхэ байнаб: ямаршые лүндэншые түрэхэн нютагтань тоодоггүй юм!

²⁵Таанадта нэгэ иимэ ушар хөөрэхүү: лүндэншэ Илиягай ажамидарха үедэ Израильда олон бэлбэхэн эхэнэрнүүд байгаа, тиихэдэ гурбан жэл хахад хура бороо оронгүй, ехэ ган боложо, хүнүүд хаа хаанагүй айхабтар ехэ үлэсхэлэндэ нэрбэгдэхэн юм.

²⁶Теэд тэдэнэй нэгэндэшые Илия эльгээгдээгүй, харин гансал Сидон нютагай Сарепта хотын бэлбэхэн эхэнэртэл тэрэ эльгээгдээ бшуу.

²⁷Елисей лүндэншын ажамидарха үедэ Израильда хэлхэ бузар үбшэнтэн олон байгаа, теэд тэдэнэй нэгэнэйншье арюудхагдан эдэгээгүй байхада, Сири уласай Нееман лэ гансаараа эдэгэһэн байгаа».

²⁸Мүргэлэй гэр соо байһан зон Иисусай иимэ юумэ хэлэһые дуулахадаа, уур хилэнсэдэ абтажа,

²⁹байрһаан хүрэн бодоод, Иисусые хотоһоо шэрэжэ гаргаад, хадын орой дээрэ асарба. Назарет хото тэрэ хада дээрэ бодхоогдоһон байгаа. Тиигээд зон Иисусые хада дээрэһээ түлхижэ унагаахаяа забдаба,

³⁰харин Иисус тэдэнэй дундуур хаха эсхэн гаража, өөрынгөө харгыгаар ябашаба.

Ада шүдхэртэ барюулһан хүн

³¹Тиигээд тэрэ Галилей можын Капернаум хото ошожо, суббото бүхэндэ тэндэхи зоние хургадаг болобо.

³²Хүнүүд тэрэнэй номнол шагнахадаа, ехээр гайхадаг һэн, юундэб гэхэдэ, хургаалынь хүнэй зүрхэ сэдхэл аргагүй татажа байгаа бшуу.

³³Мүргэлэй гэр соо ада шүдхэртэ барюулһан нэгэ хүн байжа:

³⁴«Һэ-ээ! Назаредэй Иисус, ши бидэниие яаха гээбши? Ши маниие үгы хэхэе ерээ гүш? Би шамайе мэдэхэб: ши Бурханай нангин Хүбүүнши!» – гэжэ шангаар хашхарба.

³⁵«Абья аниргүй болоод, энэ хүнһөө гара!» – гэжэ Иисус ада шүдхэртэ захирба. Ада шүдхэр тэрэ хүниие зоной дунда унагаагаад, халташ гэмтээнгүй, бөөһөөнь гаража арилба.

³⁶Тэндэ байгшад булта ехээр гайхалдажа, бэе бээдээ: «Энэмнай ямархан хургаал гээшэб? Яаһан ехэ эрхэ засагтай, шэдитэ хүсэтэй хүн гээшэб? Ада шүдхэрые гара гэхэдэнь, тэрэнь гаража ябашабал!» – гэлсэбэ.

³⁷Тиигээд лэ Иисус тухай нураг оршон тойронхи нютагуудаар дэлгэрэн тараба.

Иисус олон зоние эдэгээбэ

³⁸Мүргэлэй гэрһээ гараад, Иисус Симонэй гэртэ оробо. Тэндэ Симонэй хадам эхэ халууржа байгаа. Тэрэниие аргалжа эдэгээхыень Иисусые гуйба ха.

³⁹Иисус тэрэ үбшэн эхэнэртэ дүтэлжэ, халуунда бэеһэнь гара гэжэ захирба. Халууниинь бууража, эхэнэр дары бодоод, айлшадаа хүндэлжэ ороо һэн.

⁴⁰Наранай орохо багта элдэб үбшэндэ нэрбэгдэһэн бүхы зоболонтодые түрэлхидынь Иисуста асараа һэн. Иисус үбшэн хүн бүхэнэй дээрэнь гараа табяад лэ эдэгээжэ байгаа.

⁴¹Олон хүнүүдэй досооһоо ада шүдхэрнүүд гарахадаа, хашха хуугай табилдан: «Ши Бурханай хүбүүнши», – гэлдэбэ. Ада шүдхэрнүүд тэрэнэй Бурханай табисуурта байһые мэдээ бшуу. Харин Иисус энээн тухай хэлэхыень тэдэниие хорижо байгаа.

⁴²Хойто үдэрын Иисус гэрһээ гаража, нэгэ эзэгүй газарта ошобо. Хүн зон тэрэниие бэдэржэ олоод, өөһэдһөөн табиха дурагүй хажуудаа барижа байлгаба.

⁴³«Би ондоошые хотонуудаар ябажа, Бурханай хаан түрэ тухай хайн мэдээсэл дэлгэрүүлхэ ёһотой хүм. Бурхан намайе энэ хэрэгээр лэ эльгээгээ ха юм!» – гэжэ Иисус тэдээндэ хэлэбэ.

⁴⁴Тиигээд Иисус Иудей можын мүргэлэй гэрнүүдээр ябажа, хургаалаа номнобо.

Лука 5

Иисус түрүүшынгээ шабинарые шэлэжэ абана

¹Нэгэтэ хүн зон олоороо Иисусые тойроод, шахасалдан, Бурханай үгэ номнохыень шагнаба. Иисус тиихэдэ Геннисарет далайн эрьедэ зогсожо байгаа.

²Далайн эрьедэ хоёр онгосын байхые Иисус хараба. Загаһашад эрье дээрэ гаража, гүльмэеэ угаажа заһана.



³Тэдэ хоёр онгосын нэгэниинь Симонэй байгаа. Иисус тэрэ онгосодо хуужа: «Эрьһээ нэгэ бага холо болоё», – гэжэ Симондэ хэлэбэ. Тиигээд онгосоһоо арад зониие хургаба.

⁴Иисус хэлэжэ дүүргэһэн хойноо: «Гүнзэгы газарта ошожо, загаһа баридаг губшуураа хаягты», – гэжэ Симондэ хэлэбэ.

⁵«Багша аа, бидэ бүхэли хүнндөө загаһашалаад, юушые баряагүйбди. Теэд танай хэлээ хада губшуураа хаяһуул даа», – гэжэ Симон харюусаба.

⁶Загаһашад губшуураа хаяжа, аргагүй ехэ загаһа бариба. Дааж ядаһан губшуурынь таһаржа хахаржа байба.

⁷Тиигээд тэдэнэр нүгөө онгосынхидоо даллан, ерэжэ туһалхыень дуудаба. Тэдэнь ерэжэ, хоёр онгосоёо загаһаар дүүргэбэ. Тиихэдэнь онгосонуудынь уһанда шэнгэхэһээ нааша болоо бэлэй.

⁸Иимэ олзотой болоһон Симон Пётр Иисусай урда үбдэглэн хэхэрэн хүгэдэжэ: «Дээдын Эзэн аа, намайе орхижо ошогты! Би нүгэлтэй хүнби», – гэжэ хэлэбэ.

⁹Иимэ ехэ загаһа бариһандаа Симон болон тэрээнтэй ябаһан бүхы хүнүүд,

¹⁰мүн тэрэшэлэн Зэбэдэйн хүбүүд, Симонэй нүхэд Яков Иоанн хоёр гайхажа хүрдэжэ байбад. «Бү ай, ши энээнһээ хойшо загаһа барихын орондо хүнүүдые намда хандуулдаг болохош», – гэжэ Иисус Симондэ хэлэбэ.

¹¹Онгосоёо эрье дээрэ гаргаад, загаһашад бүхы юумээ тэндээ орхижо, Иисусай хойноһоо ябаба.

Иисус үбшэн хүниие эдэгээнэ

¹²Иисусай нэгэ хотодо ошоод байхадань, арһанай халдабарита үбшэнтэй хүн ерэбэ. Иисусые хараһаар, урдань газар мүргэн унажа: «Дээдын Эзэн, аа! Хэрбээ ши хүсэбэл, намайе арюудхан эдэгээжэ шадахаш», – гэжэ гуйба.



¹³Иисус тэрээндэ гараараа халта хүрэжэ: «Эдэгээхэ хүсэлтэйб, арюун больш даа», – гэбэ. Тэрэ дороо арһанай халдабарита үбшэниинь эдэгэшэбэ.

¹⁴«Энээн тухай хэндэшье юумэ бү дуулгаарай. Зүгөөр санаартанда ошожо, бээ үзүүлээрэй, тиигээд эдэгэһэнээ бултанда гэршэлхын тула ши Моисейн зарлигай ёһоор үргэл хээрэй», – гэжэ Иисус хэлэбэ.

¹⁵Тиибэшье Иисус тухай мэдээсэл бүри холуур таража, арад зон бүри олоороо тэрэниие шагнахаяа, үбшэнөө аргалуулхаяа ерэжэл, ерэжэл байба.

¹⁶Харин Иисус өөрөө үе үе болоод лэ эзэгүй газарта ошожо, Бурханда мүргэдэг бэлэй.

Иисус саа үбшэнтэниие эдэгээнэ

¹⁷Нэгэтэ Галилей болон Иудей можын бүхы нютагуудһаа, Иерусалим хотоһоо ерэхэн фарисейнүүдэй болон Хуули заадаг багшанарай суглараад һуухада, Иисус хүнүүдые һургажа байба. Бурханһаа үгтэхэн шэдитэ хүсөөр Иисус ямаршье үбшэн эдэгээжэ шадаха байгаа.

¹⁸Энэ үедэ саа үбшэндэ дайруулһан нэгэ хүниие шэрдэгтэйнь тэлээд абажа ерэбэ. Үбшэнтэниие гэртэ оруулжа, Иисусай урда табиha гэбэ.

¹⁹Тээд хара мянган зоной дундуур оруулха аргагүй байжа, гэрэй орой дээрэ гаража, хушалтыень задалаад, гараһан нүхөөр үбшэнтэнөө шэрдэгтэйнь доошонь буулгажа, Иисусай урда табиha.

²⁰Тэдэнэй аргагүй ехэ этигэлтэй байһыень хаража: «Нүгэлнүүдшни хүлисэгдэбэ, нүхэрни», – гэжэ Иисус тэрэ хүндэ хэлээ бэлэй.

²¹Хуули заадаг багшанар болон фарисейнүүд хоорондоо зүбшэжэ: «Энэмнай хэн гээшэб? Бурханиие доромжолжо байнал. Ганса Бурханһаа ондоо хэн хүнэй нүгэл хүлисэдэг юм?» – гэлдэбэ.

²²Иисус тэдэнэй юун тухай бодожо байхые мэдээд: «Юундэ тиигэжэ сэдхэлдээ бодобот?



²³ „Нүгэлнүүдшни хүлисэгдэбэ“ гэхэдэ бэлэн хилбар гү, али „Бодоод яба!“ гэхэдэ гү?

²⁴ Хүн түрэлхитэнэй Хүбүүнэй газар дэлхэй дээрэ нүгэл шэбэлнүүдые хүлисэхэ эрхэтэй байһые таанар мүнөө мэдэхэт», – гэжэ Иисус хэлэбэ. Тиигээд саа үбшэнтэй хүндэ хандан: «Бодоод, дэбисхэрээ абаад, гэртээ хари», – гэбэ.

²⁵ Тэрэнь хүнүүдэй хараһаар байтар бодоод, хэбтэһэн шэрдэгээ абажа, Бурхание магтан зальбарһаар гэртээ хариба.

²⁶ Хүн зон булга гайхажа сошожо, Бурханаа алдаршуулан: «Гайхалтай юумэ энэ үдэр үзэбэбди даа!» – гэжэ айн хүрдэн үгэлбэд.

Иисус Левийе шэлэжэ абана

²⁷ Энээнэй һүүлээр Иисус газашаа гарахадаа, алба татааша Левий гэгшын татабари суглуулдаг газартаа һуухыень хараад: «Хойноһоомни яба», – гэбэ.

²⁸ Тэрэнь бодожо, бүхы юумээ орхёод, Иисусай хойноһоо ябаба.

²⁹ Левий Иисусые гэртээ урижа, ехэ һайнаар хүндэлбэ. Тэндэнь Иисустай хамта алба татаашадшые, мүн бусадшые олон хүнүүд һуулсаа.

³⁰ «Юундэ таанад алба татаашадтай, нүгэл хэгшэдтэй хамта эдеэлжэ, ундалжа һуунабта?» – гэжэ фарисейнүүд болон Хуули заадаг багшанар Иисусай шабинарта хандажа, гэмэр-гутар гэлдэбэ.

³¹ «Элүүр уладта эмшэн хэрэггүй, харин үбшэн хүнүүдтэ хэрэгтэй юм.

³² Бурханда хандахыень би үнэн сэдхэлтэниие бэшэ, харин нүгэл хэгшэдые дуудахаяа ерээ хүнби!» – гэжэ Иисус тэдээндэ харюусаба.

Масаг сахиха тухай асуудал

³³ «Иоаннайшые, фарисейнүүдэйшые шабинар үргэлжэ масаг сахижа, Бурхандаа мүргэжэ байдаг лэ, харин шинии шабинар эдихэ, уухыел

мэдэнэл», – гэжэ фарисейнүүд ба Хуули заадаг багшанар Иисуста хэлэбэ.

³⁴Тиихэдэнь Иисус тэдээндэ харюусаба: «Таанар түрэ хурим дээрэ найрлажа байһан айлшадые хүрьгэн хүбүүнэй байха сагта масаг сахигты гэжэ баадхаха аалта?

³⁵Зүгөөр хүрьгэн хүбүүниие тэдэнһээ абаад ябаха үдэрэй ерэхэдэнь, тэдэ айлшад масаглахал».

³⁶Иисус тэдээндэ иимэ хургаалта үгэнүүдые хэлэбэ: «Хэншые хуушан хубсаһанда шэнэ бүдөөр халааһа табидаггүй бшуу. Тиигэхэ болоо һаа, шэнэ хубсаһаа хахалжа хаяад, хуушандааш тааруулжа шадахагүйл.

³⁷Һая нэрэһэн архияа хуушан туламда хэдэггүйл, хээ һаань, тэрэ архинь эһээд, хуушан туламаа хахалжа, архиньшые, туламыньшые хэндээшые хэрэггүй болохол.

³⁸Шэнэ архиие шэнэ хүхүүртэл юулэхэ ёһотой.

³⁹Хуушан архи уужа үзэһэн хүн шэнэ архи амталха дурагүй байдаг, юундэб гэхэдэ, „хуушан архинь дээрэ“ гэдэг ха юм».

Лука 6

Субботын тухай асуудал

¹Нэгэ субботодо Иисус шабинартаяа таряалангай газараар үнгэржэ ябаа. Шабинарынь хоолос таһалжа, альган дээрээ үйрүүлээд, орооһыень эдибэ.

²«Субботодо хэжэ болохогүй юумэ юундэ хэнэбта?» – гэжэ фарисейнүүдэй зариманиинь хэлэбэ.

³Иисус тэдэндэ иигэжэ харюусаа һэн: «Давид хаанай хамта ябалсагшадтайгаа үлэсхэлэн ябахадаа юу хэһэн тухайнь таанар уншаагүй аалта?



⁴Давид хаан Бурханай гэртэ ороод, үргэлэй хилээмэ абажа эдеэд, суг ябаһан хүнүүдтээ үгэһэн байна. Харин санаартанһаа ондоо хэншые тэрэ хилээмэ эдихэ эрхэгүй байгаа».

⁵Саашань Иисус: «Хүн түрэлхитэнэй Хүбүүн субботыншые Эзэн мүн», – гэжэ нэмэбэ.

Гар хатанхай хүн тухай

⁶Иисус баһа нэгэ субботодо мүргэлэй гэртэ орожо, хургаалаа номнобо. Тэндэ баруун гараа хатанхай нэгэ хүн байгаа.

⁷Субботодо хатаһан гартай хүниие эмшэлэгшэ аа гү гэжэ Иисусые зэмэлхэ ханаатай Хуули заадаг багшанар болон фарисейнүүд тэрэниие гэтэн ажаглажа байбад.

⁸Иисус тэдэнэй хара ханаае мэдэжэ, хатаһан гартай хүндэ хандан: «Бодоод, эндэ хүнүүдэй урда гаража зогсо!» – гэжэ хэлэбэ. Тэрэнь бодоод, зоной урда зогсобо.

⁹Иисус үнөөхи Хуули заадаг багшанарта болон фарисейнүүдтэ хандажа: «Субботодо бидэ хайн юумэ хэхэ гү, али муу юумэ үйлэдэхэ ёһотой гүбди? Хүнэй ами абарха гү, али хүнөөхэ ёһотой гүбди? Таанад юун гэхэ байнат?» – гэжэ асууба.

¹⁰Тиигээд Иисус тэдэниие бултыень шэртэн хаража, гараа хатанхай хүндэ: «Гараа харбай!» – гэбэ. Тэрэнэйнь гараа харбайхада, гарынь эдэгэшэһэн байба.

¹¹Тиихэдэ Хуули заадаг багшанар ба фарисейнүүд галзууралдан, энэ Иисусые яахамнайб гэжэ хоорондоо зүбшэбэ.

Иисус арбан хоёр элшэнэрээ шэлэжэ абаа

¹²Тухайлбал, тэрэл үедэ Иисус хадын оройдо гаража, бүхэли хүниндөө Бурхандаа мүргэбэ.

¹³Үглөөгүүрынь Иисус шабинараа дуудажа, тэдэнэйнгээ дундаһаа арбан хоёрыень шэлэжэ, элшэнэрээр томилбо.

¹⁴Тэдэнь хэд бэ гэхэдэ, Симон (Иисус тэрэниие Пётр гэжэ нэрлээ), Андрей (Симон ба Андрей хоёр аха дүүнэр байгаа), Яков, Иоанн, Филипп, Варфоломей,

¹⁵Матвей, Фома, Алфейн Яков хүбүүн, зелотуудай бүлгэмэй гэшүүн Симон,

¹⁶Яковай Иуда хүбүүн, мүн хожомынь урбаһан Иуда Искариот гэгшэд болоно.

Иисус хургана, номноно, эмшэлнэ

¹⁷Иисус шабинартайгаа хамта хада дээрэһээ буужа, тэгшэ талада тогтобо. Тэндэнь олон шабинарынь, мүн бүхы Иудей можоһоо, Иерусалимһаа, далайн эрьедэ оршодог Тир, Сидон хотонуудһаа тоогүй олон зон сугларба.

¹⁸Тэдэ зон Иисусай номнол шагнахаяа, үбшэнһөө аргалуулхаяа ерээ. Мүн ада шүдхэрнүүдтэ баригдаһан хүнүүдшье ерэжэ эмшэлүүлэн эдэгэбэ.

¹⁹Тэдэ зон Иисуста гараараа халта хүрэхые оролдоно, юундэб гэхэдэ, тэрээнһээ шэдитэ хүсэн сасаржа, хүн бүхэниие эдэгээжэ байгаа бшуу.

Баяр жаргал ба уйдхар гашуудалнууд

²⁰Иисус шабинар тээшээ хараад, иигэжэ хэлэбэ: «Бурханай һүлдые угаа хүсэгшэд, жаргалтайт, Бурханай хаан түрэ танай ха юм.

²¹Мүнөө үлэсхэлэн байгшад, жаргалтайт, Таанад элбэг дэлбэг эдихэ юумэтэй байхат. Мүнөө уйлаашад жаргалтайт, Таанад баярладаг хүхидэг болохот.

²²Хүн түрэлхитэнэй Хүбүүнһээ боложо таанадые хүнүүдэй үзэн ядажа, доромжолоошье һаань, мүргэлэй гэрһээ намнаашье һаань, үнэн нэрыетнай гутаагаашье һаань, таанад жаргалтайт.

²³Мүнөө таанарые үзэн ядагшадай үбгэ эсэгэнэрыньшье урдань лүндэншэдтэ баһал иимэ муугаар хандадаг байһан юм. Тиимэһээ таанадые тиигэжэ доромжолжо, дарамталжа байбалнь, ехэл баясагты,

хүхижэ хүрэжэ байгты! Таанад тэнгэридэ агууехэ шагналда хүртэхэ бшуут!

²⁴Зүгөөр, таанар баяшуул, гашуудал зоболон үзэхэт, Таанад жаргалаа хүсэд эдлэжэ бараа ха юмта.

²⁵Мүнөө дуран соогоо садхалан байгаашад, Таанар үлэн хооһон ябажа, гашуудал зоболон үзэхэт. Мүнөө энеэлдэжэ ханяалдажа байгаашад, Уйлаха бархирха сагтнай ерэжэ, зобохот.

²⁶Таанадые бүхы хүнүүдэй аргагүй ехээр магтажа байбалнь, таанар уй гашуудал үзэхэт! Таанадые магтаашадай эсэгэнэрынь хуурмаг лүндэншэдые баһал тиигэжэ магтадаг байгаа бшуу.

Дайсадаа хайрлажа байха тухай

²⁷Намае шагнажа байгшад, таанадта иигэжэ хэлэнэб: дайсадтаа дуратай байгты, таниие үзэн ядагшадта һайниие хэгты,

²⁸таниие хараалай муухайгаар хараагшадые юрөөгты, таниие доромжологшодой түлөө зальбарагты.

²⁹Нэгэ хасарыетнай альгадаһан хүндэ нүгөө хасараа табижа үгэгты, дэгэлыетнай буляжа абаһан хүндэ самсаяа тайлажа үгэгты.

³⁰Танһаа юумэ эриһэн хүндэ хэрэгтэйень үгэгты, юумыетнай абаа һаань, һөөргэнь бү нэхэгты.

³¹Бусад хүнүүд танда ямараар хандаһай гэжэ һананабта, тон тэрээндэл адляар таанад өөһэдөө хүнүүдтэ хандагты.

³²Таанадта хайра дуратай зонииел хайрлажа байбалтнай, Бурхан таниие магтаха аал? Нүгэлтэншье өөһэдыень энхэрэн талархадаг хүнүүдтэ дуратай байдаг ха юм.

³³Тандал һайниие хэһэн хүнүүдтэ һайниие хэдэг һаатнай, Бурхан тэрэнэйтнай түлөө танда талархаха аал? Нүгэлтэншье өөһэдтэнь һайн хүнүүдтэ һайнаар хандадаг ха юм!

³⁴Бусаажа үгэхэ гэжэ найдаһан хүндөөл юумэ урьһалдаг һаатнай, Бурхан тэрэнэйтнай түлөө танда талархаха аал? Нүгэлтэншые бэе бээдээ юумэ зээлеэр үгэлсэхэдөө, һөөргэнь тэрэнээ бүхэлеэр бусаажа абахаар үгэдэг ха юм.

³⁵Харин таанад дайсадаа энхэрэгты, һайниие хэгты, харюудань юушые хүлеэнгүй урьһаар үгэгты. Тэрэнэйнгээ түлөө агууехэ шагналда хүртэхэт, Дээдын Бурханай үхибүүд байхат. Ашые харюулдаггүй, муу һанаатай хүнүүдтэшые Бурхан энэрхы һайн байдаг бшуу.

³⁶Эсэгынтнай танаа энхэржэ хайрлажа ябадагтал адляар таанадшые бусад зониие энхэржэ хайрлажа ябагты.

Бусад зониие шүүбэрилэн зэмэлхэ тухай

³⁷Бусад зониие бү шүүбэрилэн зэмэлэгты, тиигэбэл Бурхан таанадые шүүбэрилэн зэмэлхэгүй. Бусадые бү муушалагты, тиихэдээ өөһэдөө муушалуулхагүйт. Бусадые хүлисэжэ байгты, тиихэдэтнай Бурхан таанадые хүлисэхэ.

³⁸Бусад зондо юумэ үгэдэг байбалтнай, Бурханшые таанадта үгэжэ байха. Үгэһэн юумэнтнай элбэг дэлбэгээр, хэмжээнһээ үлүүгээр, обогор болоод, хормойдотнай дүүрэн бусажа ерэхэ. Хүндэ ямар хэмжээгээр юумэ үгэнэт, тиимэл хэмжээгээр Бурхан өөһэдтэтнай үгэхэ».

³⁹Иисус тэдээндээ иимэ һургаалта үгэнүүдые хэлэбэ: «Һохор хүн һохор хүниие хүтэлэн ябажа шадаха аал? Хоюулаа нүхэ руу унаха бэшэ гү?

⁴⁰Шабинь багшаһаа үлүү байхагүй, харин эрдэмдэ һурахадаал, багшынгаа зэргэ боложо шадаха.

⁴¹Нүхэрэйнгөө нюдэндэ байһан гэшүүһэ хараад, өөрынгөө нюдэндэ байһан модо юундэ обёорногүйбши?

⁴²Өөрынгөө нюдэндэ байһан модо харахагүй аад лэ: „Байза, би шинии нюдэндэ ороод байһан гэшүүһэ гаргаһууб“, – гэжэ яажа хэлэхэ болонош? Хоёр нюуртан! Түрүүшээр өөрынгөө нюдэнэй модо гарга, тиигээ һаа, нүхэрэйнгөө нюдэнэй гэшүүһэ яажа гаргахые мэдэхэлши.



Модон болон тэрэнэй үрэ жэмэс тухай

⁴³Һайн модондо муу үрэ жэмэс ургадаггүй, харин муу модонһоо Һайн үрэ жэмэс гарадаггүй.

⁴⁴Модоной шанарынь үрэ жэмэсээрнь мэдэгдэдэг! Үүргэнэ модондо үзэм жэмэс ургадаггүй, үрмэдэһэ һөөгһөө үзэм жэмэс гарадаггүй.

⁴⁵Һайн хүн сэдхэлэйнгээ үнэтэ баялиг сооһоо Һайниенъ гаргадаг, харин хара Һанаатай хүн харата дорой сэдхэлэйнгээ суглуулбаринаа мууень гаргадаг. Зүрхэ сэдхэлдэ байһан юумэн хэлэнэй үзүүртэ гарадаг ха юм.

Хоёр барилгашан тухай

⁴⁶Минии зааһанай ёһоор Һайн юумэ үйлэдэхэгүй аад, юунэйхиие Дээдын Эзэн, Дээдын Эзэн гэжэ намайе нэрлэнэбта?

⁴⁷Намда ерэжэ, һургаалыемни шагнаһан, тэрэниием бэлүүлһэн хүн хэндэ адлиб гэжэ таанадта хэлэжэ үгэһүү.

⁴⁸Жэшээнъ, нэгэ хүн газар гүнзэгыгөөр малтажа, гэрэйнгээ һуури шулуун дээрэ табиба гэе. Ехэ үер боложо, тэрэ гэртэнь уһан эбхэрэн ерэбэшье, һууриһаанъ хүдэлгэхэгүй, юундэб гэхэдэ, тэрэ гэр Һайнаар баригдаһан байна. Һургаалыемни шагнажа, бэлүүлжэ байһан хүн тиимэ гэр баригшада адли.

⁴⁹Харин һургаалыем шагнаад, тэрэниие дүүргэдэггүй хүн гэрээ шулуун һууриггүйгөөр газар дээрэ бариһан хүндэл адли. Уһанай эбхэрэн ерэхэдэ, тэрэ гэрынъ дары бутаржа, эбдэржэ Һалаха».

Лука 7

¹Эдэ бүгэдые хүн зондо хэлэһэн хойноо Иисус Капернаум хото ошобо.

²Тэрэ хотодо зуунай нэгэ даргын эгээн шухала хэрэгтэй зарасанъ хүндөөр үбшэлөөд, үхэхөө хэбтэбэ ха.

³Тэрэ дарга Иисус тухай дуулахадаа, «Манайда ерэжэ, зарасыемни абарыт даа» гэхэн гуйлтатайгаар тэрээндэ еврейнүүдэй ахамадуудые эльгээгээ һэн.

⁴Ахамадууд Иисуста ерэжэ: «Энэ хүмнай туһа хүргэмөөр хайн хүн юм.

⁵Энэ хүн арад зондомнай дуратай юм, манда өөрөө мүргэлэй гэр барижа үгөө юм», – гэжэ ехэтэ гуйба.

⁶Тиимэхээ Иисус тэдээнтэй ошолсобо. Гэртэнь дүтэлжэ ябахадань, зуунай дарга урдаһаань нүхэдөө эльгээжэ: «Эзэн, бээе бү зобоогты даа. Би таниие гэртээ оруулхаар бэшэ ахир дорой амитанби.

⁷Тиимэхээ би өөрөө танда ошохоёо зүрхэлөөгүйб. Гансал зарлигаа буулгажа хайрлыта, тиибэлтнай зарасамни эдэгэшэхэл.

⁸Ушарынь хэлэбэл, бишье баһал дээрээ ноёдтой, мүн мэдэлдээ сэрэгшэдтэй хүнби. Тэдэнэйнгээ нэгэндэнь: „Ошо“ гэхэдэм ошодог, нүгөөдэдэнь: „Ерэ“ гэхэдэм ерэдэг, зарасадаа: „Тэрээниие хэ“ гэхэдэм хэдэг юм».

⁹Иисус энээниие дуулаад, ехээр гайхаба. Тиигээд дахажа ябаһан олон зон тээшэ эрьежэ: «Би израильшуудайшье дунда иимэ хүзэг этигэлтэй хүниие үзөөгүйб», – гэбэ.

¹⁰Даргын эльгээһэн хүнүүдэй һөөргөө бусажа ошоходонь, зараса эдэгэшоод байгаа һэн.

Иисус бэлбэһэн эхэнэрэй хүбүүе бодхооно

¹¹Удангүй Иисус Наин хото ошоо һэн. Тэрээниие шабинарыннь, мүн хүн зон олоороо дахажа ябаа.

¹²Хотын хаалгада хүрэхэдэнь, олон зон наһа бараһан хүниие хүдөөлүүлжэ ябаба. Тэрэнь бэлбэһэн эхын ори ганса хүбүүн байгаа.

¹³Иисус эхыень харахадаа, аргагүй ехээр хайрлажа: «Бү уйла», – гэжэ хэлэбэ.

¹⁴Тиигээд хажуудань ошожо, тэлүүрэйнь ойро хүрэбэ. Тэлэжэ ябаһан хүнүүд зогсоодхибо. Иисус наһа бараһан хүндэ: «Залуу хүбүүн, бодо!» – гэжэ хэлэбэ.

¹⁵Наһа барагшань тэлүүр дээрээ һуугаад, юумэ хэлэжэ эхилээ һэн. Иисус тэрэ хүбүүе эхэдэнь абаашажа үгэбэ.

¹⁶Хүн зон бүгэдэ айн хүрдэбэ, Бурхание алдаршуулан магтаба: «Агууехэ лүндэншэ манай дунда мүндэлбэл, арад зондоо туһалхаяа Бурхан морилжо ерэбэл», – гэлдэбэ.

¹⁷Иисус тухай энэ мэдээсэл бүхы Иудей уласаар, оршон тойронхи газар нютагуудаар тараба.

Уһаар арюудхагша Иоанн тухай

¹⁸Энэ ушар тухай Иоаннда шабинанынь дуулгаба.

¹⁹Иоанн хоёр шабияа дуудажа: «Ерэхэ ёһотойнь ши гээшэ гүш, али бидэ ондоо хүлээхэ ёһотой гүбди гээд һуража ерэгты», – гэжэ тэдэнэ Иисуста эльгээбэ.

²⁰Тэдэнь Иисуста ерээд: «Бурханһаа заларжа ерэхэ ёһотойнь та гээшэ гүт, али бидэ ондоо хүлээхэ гүбди гээд мэдэжэ ерэхыемнай Уһаар арюудхагша Иоанн танда эльгээгээ», – гэжэ хэлэбэ.

²¹Эгээл энэ үедэ Иисус олон хүнүүдые үбшэ хабшанһаань эдэгээбэ, ада шүдхэрнүүдһэнь сүлөөлбэ, олон һохор хүниие хараатай болгобо.

²²Иисус Иоаннай шабинарта хандажа: «Һохор хүнүүдэй дахин харадаг болоһые, дохолон хүнүүдэй ябадаг болоһые, арһанай халдабарита үбшэнтэй хүнүүдэй арюудхагдаһые, дүлии хүнүүдэй һонор болоһые, үхэхэн хүнүүдэй үндын бодоһые, үгытэй хүнүүдэй Бурханай хаан түрэ тухай номнол дуулаһые, хараһанаа, мүн дуулаһанаа Иоаннда ошожо хэлэгты.

²³Нам тушаа һэжэг түрөөгүй хүн жаргалтай юм», – гэжэ хэлэбэ.

²⁴Иоаннай шабинарай ябаһан хойно Иисус арад зондоо Иоанн тухай хэлэжэ оробо: «Иоаннда сүл губи руу ошоходоо, ямархан юумэ харахаяа найдаабта? Һалхинда найгалзажа байһан хулһа харахаяа гү?

²⁵Таанар юу үзэхээ тиишэ ошообта? Зөөлэн хубсаһа үмдөөд ябаһан хүниие гү? Теэд ялагар салагар, үзэсхэлэн һайханаар хубсалһан хүнүүд хаанай ордонуудтал ажаһуудаг ха юм.

²⁶Таанар юу үзэхээ тиишэ ошообта? Лүндэншые гү? Тиимэ даа, тиихэдэ таанад лүндэншэһөө дээгүүр хүниие хараалта гэжэ таанарта хэлэнэб.

²⁷Нангин Бэшэг соо: „Шинии ябаха харгы бэлдэхыень би түрүүндэшни өөрынгөө Эльгээмэлые ябуулнаб“, – гэжэ Бурхан Иоанн тухай хэлэнэ.

²⁸Иоаннһаа агууехэ хүн эхын умайһаа түрөөгүй юм. Зүгөөр Бурханай хаан орондо байгшадай эгээлэй багань Иоаннһаа ехэ юм».

²⁹Иоаннай һургаһан ёһоор уһаар арюудхуулһан бүхы зон, тэрэнэй тоодо алба татаашадшые, Иисусай хэлээшые шагнаад, Бурханиие алдаршуулба.

³⁰Харин Иоаннай һургаһанай ёһоор уһаар арюудхуулхаһаа арсаһан фарисейнүүд болон Хуули заадаг багшанар Бурханай айладхаһан зарлигые дуулаха дурагүй байба.

³¹Иисус үргэлжэлүүлэн хэлэбэ: «Зай, энэ оршон үеын зониие хэд юудтэй жэшэлтэйб, юрэдөө эдэнэр хэдтэй адли гээшэб?

³²Эдэнэр газар һууһан үхибүүдэй: „Бидэнэй жэмбүүрээр наадахада, таанар хатараагүйт. Бидэнэй гунигтай дуу дуулахада, таанар уйлаагүйт“, – гэжэ бэе бээдээ хэлэһэндэл адли юм.

³³Иоаннай ерэхэдээ, хилээмэ эдидэггүй, архи уудаггүй байхадань, таанар тэрэниие „ада шүдхэртэ барюулһан хүн“ гэбэт.

³⁴Хүн түрэлхитэнэй Хүбүүнэй ерээд, юумэ эдидэг, дарһа болгодог байхадань, таанар „Харыт, энэмнай эдимэр, архиншан, алба татаашадай, нүгэл хэгшэдэй нүхэрынь байнал“ гэбэт.

³⁵Тиигэбэшье Бурханай сэсэн мэргэниинь үри хүүгэдээрнь баталагдадаг юм».

Симон гэдэг фарисейн гэртэ

³⁶Нэгэ фарисей Иисусые үдын хоолдо гэртээ уриба. Иисус гэртэнь орожо, хоол барихаяа һууба.

³⁷Хотын зоной дунда нүгэлтэй гэжэ суурхаһан нэгэ эхэнэр Иисусые фарисейндэ хоол барина гэжэ дуулаад, шабар домбо соо һайхан хангалтай тоһо абажа ерээ.

³⁸Тиигээд Иисусай ара талада хүлдэнь һуугаад, уйлажа байгаад, нүдэнэйнгөө нулимсаар хүлыень угааба, толгойнгоо үһөөр аршан, таалан, һайхан хангалтай тоһо хүлдэнь түрхибэ.

³⁹Гэртээ Иисусые уриһан фарисей иигэжэ байһыень хараад: «Энэ хүн үнэхөөрөө лүндэншэ байгаа һаа, хүлыень ямар эхэнэрэй хүрэжэ байһые мэдэхэл һэн даа; нүгэлтэй эхэнэр байна гэжэ тухайлхал һэн даа», – гэжэ зосоогоо бодобо.

⁴⁰Тээд Иисус тэрээндэ: «Симон, би шамда нэгэ юумэ хөөрэхүү», – гэбэ. «Хөөрыш даа, багша», – гэжэ Симон харюусаба.

⁴¹«Нэгэ хүн хоёр хүндэ мүнгэ урьһалаа һэн ха: нэгэндэнь – табан зуун динари, нүгөөдэдэнь – табин динари.

⁴²Тэдэ хоёрой үриее бусааха аргагүй байһыень ойлгоод, мүнгэ урьһалагша хоюулыень хүлисөө һэн. Үрииень хүлисэгшэдэ тэдэ хоёрой алиниинь үлүү ехээр энхэрхэ байнаб?» – гэжэ Иисус һураба.

⁴³«Ехэ үритэй байжа хүлисүүлһэн хүниинь ааб даа гэжэ һананаб», – гэжэ Симон харюусаба. «Зүб хэлэнэш», – гэжэ Иисус хэлэбэ.



⁴⁴Тиигээд эхэнэр тээшэ эрьелдэн, Симондэ хэлэбэ: «Энэ эхэнэрые харана гүш? Танайда ороходом, ши хүл угааха уһа үгөөгүйш, харин энэ эхэнэр нюдэнэйнгөө нулимсаар хүлыем угаагаад, үһөөрөө аршаа.

⁴⁵Ши намайе таалаагүйш, харин энэ эхэнэр танайда орохоһоом хойшо хүлыем таһалгаряагүй таалажа байгаа.

⁴⁶Ши толгойем оливай тоһооршые түрхеэгүйш, харин энэ эхэнэр үнэтэй хангалтай ургамалай тоһоор хүлыем түрхээ.

⁴⁷Энэ эхэнэрэй хэһэн олон нүгэлынь хүлисэгдөө. Тиимэһээл энэ намайе иимэ ехээр энхэржэ хайрлажа байна. Зүгөөр багаар хүлисүүлэгшэд бираггүйхэн энхэрэл хайра үзүүлдэг юм».

⁴⁸Тиигээд Иисус эхэнэртэ: «Нүгэлшни хүлисэгдэбэ», – гэжэ хэлэбэ.

⁴⁹Бэшэ айлшадынь доро дороо: «Нүгэл хүлисэжэ байдаг энэ хүмнай хэн гээшэб?» – гэжэ бодобо.

⁵⁰«Этигэлшни шамайе абарба, амгалан мэндэ ябыш даа», – гэжэ Иисус үнөөхи эхэнэртэ хэлэбэ.

Лука 8

Иисуста туһалдаг эхэнэрнүүд тухай

¹Удаань Иисус хото турануудаар, хүдөө нютагуудаар ябажа, Бурханай хаан түрэ тухай һайн мэдээсэл номнобо. Тэрээнтэй хамта арбан хоёр шабинарынь ябалсаа.

²Мүн Иисусаар үбшэн зоболонгоо эдэгээлгүүлһэн, ада шүдхэрнүүдээ намнуулһан хэдэн эхэнэрнүүд тэрээнтэй ябалсаа гэбэл: бөөһөөн долоон ада шүдхэр гаргуулһан Мария Магдалина,

³Ирод хаанай түшэмэл Хуза гэгшын Иоанна һамган, Сусанна болон бусад олон хүнүүд ябалсаба. Тэдэ эхэнэрнүүд Иисусые, шабинарыень тэдхэжэ байгаа.

⁴Нэгэтэ хото бүхэнһөө хүн зоной олоороо суглархада Иисус иимэ һургаалта үгэнүүдые хэлэбэ:

⁵«Нэгэ таряшан таряа тарихаяа гараба. Үрэхэеэ сасахадань, зариманиинь харгын хажууда унажа гэшхүүлбэ, шубууд тэдэниинь тоншобо гэхэ.

⁶Зарим үрэхэниинь шулуутай газар унажа, бултайгааш хаа, шииг нойтогүйдэжэ, гандашаба.

⁷Бэшэ зарим үрэхэниинь үүргэнын дундуур унажа, тэндэнь ехээр ургаһан буртаг үбһэндэ даруулшаба.

⁸Зарим үрэхэниинь үрэжэлтэй газарта унажа бултайгаад, хайн ургаса үгэбэ: тариһан үрэхэнһөөнь зуу дахин ехэ ургаса гараба». Түгэсхэлдэнь Иисус: «Шэхэтэй юм хаа, анхарагты», – гэхэн үгэнүүдээр хөөрөөгөө дуусхаба.

Һургаалта үгэнүүдэй зорилго

⁹«Энэ һургаалта үгэнүүдтнай ямар удхатай юм?» – гэжэ шабинанын Иисусаа һурабад.

¹⁰«Бурханай хаан түрэ тухай гүн нюусанууд таанадтал тайлбариллагдана, харин бусад хүнүүдтэ һургаалта үгэнүүдээр лэ хэлэгдэнэ. Тиимэхээ тэдэнэр хаража, шагнажа байһан мүртөө үнэн удхыень ойлгодоггүй.

Иисус таряшан тухай һургаалта үгэнүүдые тайлбарилна

¹¹Эдэ һургаалта үгэнүүдэй удха иимэ: үрэхэн гээшэнь Бурханай үгэ мүн.

¹²Харгын хажууда унаһан үрэхэн гээшэнь – Бурханай номнол үгэнүүдые шагнагшад мүн, теэд удаань шолмос ерэжэ, ойлгоһон юумыень сэдхэлһэнь ходелжо абаашана, тиихэдэнь тэдэ хүнүүд этигэхээ болижо, абарагдахагүй болоно.

¹³Шулуутай газарта унаһан үрэхэн гээшэнь – номнол үгэнүүдые шагнаад, тэрэниие ойлгожо баярлабашье, тэрэ үгын сэдхэлдэнь гүнзэги үндэхлөөгүй ушарһаа тиимэ хүнүүд саг зуура һүзэглэбэшье, хатуу бэрхэ сагай ерэхэдэ һүзэглэхээ болишодог.

¹⁴Үүргэнэ соо унаһан үрэхэн гээшэнь – номнол үгэнүүдые шагнабашье, урдынхидаал адли хубиингаа хэрэгтэ дашуурһаар, эд зөөрийн барлаг болоһоор, бээе жаргуулха шуналда абтаһаар ямаршые аша үрэ асарангүй халагшад тухай хэлэгдэнэ.

¹⁵Үрэхэлтэй газарта унаһан үрэхэн гээшэнь – номнол үгэнүүдые шагнажа, сэдхэлдээ бүхөөр хадагалжа, тэсэбэритэй ябажа, аша үрэ асарагшад тухай хэлэгдэнэ.

Гэрэл туяа тухай

¹⁶Зула аһаагаад, хэншые тэрэнэ амһартаар бүглэдэггүй, орон дороо табидаггүй, харин ороһон хүнэй гэрэлыень харахын тула табюур дээрэ табидаг ха юм.

¹⁷Эгээл тэрээн шэнги элидэ гараагүй далда юумэн байхагүй, мэдээжэ болоогүй нюуса байхагүй.

¹⁸Таанар анхаралтайгаар шагнагты! Ушарынь юуб гэбэл, юумэтэй байһан хүндэ нэмэгдэжэ үгтэхэ. Юумэгүй байһан хүнһөө өөртэнь бии гэжэ һанаһан һүүлшын юумэнииньшые абтаха».

Иисусай эжы, аха дүүнэр тухай

¹⁹Эжынь, дүүнэрынь Иисуста ерэбэ. Хара мянган зоной байһан дээрэхээ өөртэнь ойртожо шадабагүй.

²⁰«Эжышни, дүүнэршни шамтай уулзахаяа ерээд, газара байна», – гэжэ хүнүүд Иисуста дуулгаба.

²¹«Бурханай үгэ шагнажа, тэрэ үгөөр ябагшад хадаа эжымни, аха дүүнэрни гээшэ», – гэжэ Иисус харюусаба.

Иисус далайн шуурга номгоруулна

²²Нэгэтэ Иисус шабинартаяа онгосодо һууба. «Далайн нүгөө эрьедэ гараябди», – гэжэ тэрэ хэлээ. Тиигээд тэдэнэр эрьехээ холодобо.

²³Онгосоор тамарха зуураа Иисус унташаба. Гэнтэ ехэ шанга халхин буужа, онгосо руунь уһан орожо, шэнгэхэ аюул тохёолдоо һэн ха.

²⁴Шабинарын Иисусыг хэрэгжэ: «Багша! Багша! Уһанда шэнгэжэ хосорхоёо байналди!» – гэбэд. Иисус хэрэгд, дошхорһон һалхине, долгитоһон уһыг хорибо. Тиихэдэнь далай аалин номгон болошобо.

²⁵«Таанарай этигэлтнай яашоо гээшэб?» – гэжэ Иисус шабинарһаа һураба. Тэдэнь ехээр гайхаһан, һүрдэһэн амитад: «Энэ һалхи, уһанда захиралта үгэжэ, мэдэлдээ оруулдагнай Хэн гээшэб?» – гэжэ хоорондоо хэлсэбэ.

Иисус ада шүдхэрнүүдтэ барюулһан хүниие эдэгэбэ

²⁶Тэдэнэр онгосоороо Галилей далайн нүгөө эрьедэ оршодог Гераса хотын тушаа тамаржа ерэбэ.

²⁷Иисусай онгосоһоо буужа эрье дээрэ гарахада, досоогоо ада шүдхэрнүүдтэй хотын нэгэ хүн дайралдаба. Тэрэ хүн үнинэй хубсаһа хунар үмдэхээ, гэртэ байхаяа болёод, агы соохи үхээрийн газарта байрладаг һэн ха.

²⁸Иисусыг хараһаар тэрэ хүн хашха хуугай табяад, хүлдэнь унажа: «Иисус, Дээдын Бурханай Хүбүүн, би танда ямар хамаатай хүнбиб? Намайе бү зобоогыт даа, ехэтэ гуйнаб!» – гэжэ ори дуу табиба.

²⁹Юундэ тиигэб гэхэдэ, Иисус тэрэ хүн сооһоо үтэр гара гэжэ ада шүдхэртэ захираа бшуу. Тэрэ хүнэй досоонь ада шүдхэр оло дахин шэгэжэ ородог байгаа бшуу. Хүнүүд тэрэ зоболонтыг хүлээдшье, гэнжэдэ һуулгаадшье, харууһалаадшье ядалсаа һэн. Досоонь ороһон ада шүдхэр гэнжыень таһа татаад, тэрэниие эзэгүй хоһон газарта намнажа абаашадаг байгаа.

³⁰«Нэрэшни хэн бэ?» – гэжэ Иисус тэрээнһээ һураба. «Үй түмэн», – гэжэ тэрэ харюусаба. Юундэб гэхэдэ, тоогүй олон ада шүдхэрнүүд тэрэ хүнэй досоонь орожо, шэгэшоод байгаа бшуу.

³¹«Маниие тамын оёоргүй нүхэ руу оро гэжэ бү баалыт даа», – гэжэ ада шүдхэрнүүд Иисусыг гуйжа оробо.



³²Ехэ хүрэг гахай хадада бэлшэжэ ябаа. «Тэдэ гахайнуудта шэгэжэ орохыемнай зүбшөөгыт даа», – гэжэ ада шүдхэрнүүд Иисусые гуйба. Иисус зүбшөөгөө хэн.

³³Хүнэй бэеһээ гараад, ада шүдхэрнүүд гахайнууд руу оробо. Гахайн хүрэг гүйлдэжэ, эгсэ эрье дээрэһээ далай руу хүрэжэ, уһанда шэнгэшэбэ.

³⁴Гахай адуулагшад тиимэ юумэ хараад, тэндэһээ гүйлдэжэ, хото хүдөөгөөр үзэһэн ушар тухайгаа хөөрэбэ.

³⁵Юунэй болоһые харахаяа хүн зон ерэхэдээ, ада шүдхэрөө гаргуулжа, элүүр ухаантай, эдэгэһэн хүнэй хубсаһа хунараа үмдэнхэй, Иисусай хүлдэ һуужа байхые хараад, айн хүрдэбэ.

³⁶Досоогоо ада шүдхэртэй хүнэй яжа эдэгэхые хараһан хүнүүд ерэһэн зонтой һониноороо хубаалсаба.

³⁷Тэнсэлгүйгөөр айн хүрдэһэн Герасын бүхы зон Иисусые нютагһаань гаража ябахые гуйба. Иисус онгосодоо һуужа, Галилейдээ бусаба.

³⁸Досооһоо ада шүдхэрнүүдээ гаргуулһан үнөөхи хүниинь суг ябалсахаар зүбшөөл гуйба. Теэд Иисус тэрэниие абангүй:

³⁹«Гэртээ хари, Бурханай хэды ехэ юумэ бүтээһэн тухай хүн зондо хөөрэ», – гэжэ хэлэбэ. Тэрэ хүн Иисуста аргалуулһан тухайгаа бүхы хотоор ябажа хөөрэбэ.

Амяа табижа байһан басаган ба үбшэн эхэнэр тухай

⁴⁰Иисусай бусажа ерэхэдэнь, үнинэй хүлээжэ байһан арад зон тэрэниие баяртайгаар угтаба.

⁴¹Нэгэ Иаир гэжэ нэрэтэй мүргэлэй гэрэй даргань Иисуста ерээ хэн. Тэрэ хүн Иисусай хүлдэ унан мүргэжэ: «Манайда морилжо хайрлыт даа», – гэжэ гуйба.

⁴²Юундэ тиигээб гэхэдэ, тэрэнэй арбан хоёртойхон ори ганса басаганиинь ехээр үбшэлөөд, үхэхэ туйлдаа хүрэн байгаа. Иисусай тэрэ айлда ошожо ябахата, тэрэниие тойроод хүн зон олошорбо.

⁴³Нэгэ эхэнэр арбан хоёр жэлдэ шуһа гоожоод тогтодоггүй ушарһаа ехээр зобожо байгаа. Эмшэдтэ аргалуулжа, хамаг зөөри зөөшээ бараашье һаа, тэрэ эдэгээгүй ябаа.

⁴⁴Тэрэ эхэнэр Иисусай араһаа ерэжэ, хубсаһандань гараараа халта хүрэбэ ха. Тэрэ дороол шуһаниинь тогтошобо.

⁴⁵«Хэн намайе хүрөөб?» – гэжэ Иисус һураба. Тэндэ байһан хүнүүдэй бил хүрөөгүйб гэжэ булта хэлэхэдэнь, Иисустай суг ябаһан Пётр болон бусад шабинанын: «Таниие тойроод байһан зон эндэ тэндэһээтнай түринэл. „Хэн намайе хүрөөб“ гэжэ юундэ асуугаа юмта?» – гэбэ.

⁴⁶«Үгы даа, нэгэл хүн намайе хүрөө. Бэһээмни элшэ хүсэнэй гарахые мэдэрээб», – гэжэ Иисус хэлэбэ.

⁴⁷Ньюжа шадахагүйгөө ойлгоһон тэрэ эхэнэр Иисусай ойро шэшэрэн ерэжэ, хүлдэнь унаад, Иисуста юундэ хүрэнөө, хайшан гэжэ тэрэ дороо эдэгэнээ бүхы зондо дуулгаба.

⁴⁸«Басаган, этигэлшни шамайе абараа. Амгалан тайбан ябаарай», – гэжэ Иисус хэлэбэ.

⁴⁹Иисусай иигэжэ хэлэжэ байхата, мүргэлэй гэрэй даргада нэгэ хүн ерэжэ: «Басаганшни наһа барашабал даа. Багшые үшөө зобоогоод яахабши даа», – гэбэ ха.

⁵⁰Харин ерэнэн хүнэй хэлэһые дуулаһан Иисус: «Бү ай. Этигээд лэ бай, басаганшни элүүр мэндэ байха», – гэжэ Иаирта хэлэбэ.

⁵¹Тэрэ айлда ерэжэ, сугтаа ябаһан хүнүүдһээ гансал Пётр, Иоанн, Яков болон тэрэ басаганай эхэ эсэгэ хоёрто орохыень зүбшөөгөөд, ондоо нэгэшье хүниие оруулбагүй.

⁵²Хүн зон булта басагые алдаһандаа шаналжа, үбсүүгээ альгадан уйлалдажа байгаа. «Бү бархиралдагты. Энэ басаган наһа бараа бэшэ, миин лэ унтажа байна», – гэжэ Иисус хэлэбэ.

⁵³Басагые үхэшөө гэжэ мэдэжэ байһан зон Иисусые наада барин энеэлдэбэ.

⁵⁴Иисус үнөөхи басагые гарһаань баряад: «Басаган, бодо даа!» – гэжэ шангаар хэлэбэ.

⁵⁵Басаган амидыржа, тэрэ дороо бодобо. Басагаяа эдеэлүүлхыень Иисус захиба.

⁵⁶Басаганай аба эжы хоёр гайхахын ехээр гайхаа һэн. Зүгөөр энэ болоһон ушар тухай хэндэшье бү хэлэгты гэжэ Иисус тэдэндэ захиба.

Лука 9

Арбан хоёр элшэнэртээ захяа заабари үгэнэ

¹Иисус арбан хоёр шабияа дуудажа, бүхы ада шүдхэрнүүдые даран гаргаха, үбшэнүүдые аргалха хүсэ шадабари, эрхэ засаг тэдэндээ олгобо.

²Удаань Бурханай хаан түрэ тухай номнохыень, үбшэнтэниие эдэгээхыень тэдэнээ эльгээбэ.

³«Харгыдаа тулга таягшые, туулмаг сүүмхэшье, эдихэ юумэшье, мүнгэшье, һэлгэхэ хубсаһашые, бүри юушые бү абагты.

⁴Шэнэ газар ерээд, ямар айлда буунабта, тэрэ нютагһаа гаража ошотороо тэрэл айлдаа байгты.

⁵Харин таанадые хүн зоной хүлээжэ абахагүй байбалнь, хотоһоонь гарахадаа, хүлдэтнай халдаһан тооһо һэжэрэн дурагүйлхэһэнөө мэдүүлээрэйгты», – гээд Иисус захиба.

⁶Тиин шабинанынь хүдөө нютагуудаар ябажа, һайн Мэдээсэл номнобо, ябаһан газартаал үбшэнтэниие эдэгээбэ.

Иродэй мэгдэһэн сошоһон тухай



⁷Боложо байһан эдэ ушарнууд тухай дуулаад, Ирод хаан ехэл сошожо мэгдэбэ, юундэб гэхэдэ, нэгэ зариман Иоанн үхэхэнөө амидыраа гэжэ хэлсээ.

⁸Нүгөө зариман Илия ерээ гэлдээ, баһа бусад зониинь эртэ урдын лүндэншэдэй нэгэн амидыраа гэжэ хэлсээ.

⁹«Би Иоаннай тархи таһалуулаа бэлэйлби. Теэд хүн зоной анхарал иигэжэ татажа байһан энэ хэн гээшэб?» – гэжэ Ирод хэлээд, Иисустай уулзахаяа һанаа һэн ха.

Иисус таба мянган хүниие эдеэлүүлжэ садхааба

¹⁰Элшэнэр Иисуста бусажа ерээд, юу хэхэн тухайгаа хөөрэбэ. Иисус тэдэнээ дахуулжа, бусадһаа холодон, Бетсаида гэжэ хото ошобо.

¹¹Теэд арад зон хайшаа ошоһыень мэдээд, хойноһоонь дахабад. Иисус тэдэниие найнаар угтажа, Бурханай хаан түрэ тухай айладхаба, бэе муутайшуулые аргалжа эдэгээбэ.

¹²Нара орохо дүхэжэ байхада арбан хоёр шабинарынь Иисуста ерэжэ: «Бидэ мүнөө эзэгүй сүл газарта байнабди, дахажа ябаһан эдэ олон зоноо хажуугаархи тосхон, хүдөө нютаг руу эльгээгты, тэндэ хонохо, эдеэлхэ газараа олог лэ», – гэбэд.

¹³«Таанад өөһэдөө эдэ зондо эдихэ юумэ үгэгты», – гэжэ Иисус шабинартаа хэлэбэ. «Бидэ оройдоол табан мөнсогор хилээмэтэй, хоёр заһаһатай байнабди. Эдэ зондо эдихэ юумэ худалдажа абаагүй һаа, бултандань хүртэхэгүйл», – гэжэ тэдэнь харюусаба.

¹⁴Табан мянга шахуу ганса эрэшүүл тэндэ ябалсаа бшуу. «Эдэ зониие таби-табин хүнөөр бүлэглүүлэн һуулгагты!» – гэжэ Иисус шабинартаа хэлэбэ.

¹⁵Тэдэнь бүхы зониие бүлэг бүлэгөөрнь таһалжа һуулгаба.

¹⁶Иисус тэрэ табан монсогор хилээмэ, хоёр загаһа абаад, тэнгэри өөдэ шэртэн, Бурханда баяр баясхалан хүргөөд, хилээмэ загаһаяа хухалаад лэ, зондо хубаахыень шабинартаа дамжуулба.

¹⁷Хүнүүд булта эдеэлжэ садаа. Үлөөдэһыень суглуулхадань, арбан хоёр түрсүүг болоо һэн.

Иисус гээшэмнай хэн бэ?

¹⁸Нэгэтэ Иисусай гансаараа Бурханда зальбаржа байхада, тэрээндэ шабинарынь ерэбэ. «Намае арад зон хэн гэжэ һанана хаб?» – гэжэ Иисус тэдэнһээ һураба.

¹⁹«Зариман таниие Уһаар арюудхагша Иоанн гэлсэнэ, нүгөө зариман Илия гэлсэнэ, харин бусадын эртэ урдын лүндэншэдэй нэгэниинь амидыраа гэжэ һанана», – гээд шабинарынь харюусаба.

²⁰«Таанар намайе хэн гэжэ һананабта?» – гэжэ Иисус һураба. «Бурханай табисуурташ гэжэ һананабди», – гэжэ Пётр харюусаба.

Иисус зобохо, үхэхэ тухайгаа хэлэнэ

²¹«Энээн тухай хэндэшье ама бү гарагты», – гэжэ Иисус шабинартаа хатуугаар захиба.

²²Тиигээд үшөө хэлэбэ: «Хүн түрэлхитэнэй Хүбүүн аргагүй ехээр зобохо, ахамадууд, ахамад санаарта болон Хуули заадаг багшанар тэрээнһээ арсаха. Тэрэениие алаха, теэд гурбадахи үдэртөө тэрэ дахин амидырха».

²³Тиигээд Иисус бүхы хүнүүдтэ хандажа хэлэбэ: «Намтай ябалсаха дуратай хүн өөр тухайгаа бодохоёо болёод, үдэр бүхэн хэрээһеэ үргэлөөд, хойноһоомни яба.

²⁴Ушарынь хэлэбэл, ами наһаяа абарха һанаатай хүн тэрэнээ алдаха, харин минии түлөө ами наһаяа үгэбэл, тэрэнээ абарха.

²⁵Хүн бүхы дэлхэйе олзолоод, харин ами бэеэ хүнөөһэн гү, али гэмтээһэн байбал, ямар ашаг олзотой байхаб даа?

²⁶Намнаа, минии хургаалһаа эшэбэлтнай, би, Хүн түрэлхитэнэй Хүбүүн хожом өөрынгөө, Эсэгынгээ, мүн Бурханай Эльгээмэлнүүдэй алдар нэрэ нэрлүүлэн, энэ дэлхэйдэ ерэхэдээ, таанадһаа өөрөөшье эшэхэб.

²⁷Эндэ байгшадай зариман Бурханай хаан түрэ үзөөгүйдөө үхэхэгүй гэжэ таанадта үнэн зүрхэнһөө хэлэхэ байнаб!»

Иисусай бодото алдар

²⁸Иигэжэ хэлэһэнэйнгээ һүүлээр найма хоноод, Иисус Пётр, Иоанн, Яков гурбые абаад, Бурхандаа зальбархаяа хадын оройдо гараба.

²⁹Мүргэжэ байхадань, Иисусай шэг шарай гэнтэ хубилжа, хубсаһаниинь ялалзан, саб сагаан болошобо.

³⁰Гэнтэ Иисустай хөөрэлдэжэ байһан хоёр хүн харагдаба. Тэдэ Моисей Илия хоёр байгаа.

³¹Тэнгэрийн алдараар толорон бии болоһон тэдэ хоёр Иерусалим хотодо Иисусай нүгшэлэй ямар удхатай байха тухай хэлээ.

³²Пётр болон нүгөө хоёрынь бүхөөр унтаж байһанаа гэнтэ һэрин гэхэдээ, Иисусай хүр жабхаланта байдалые, мүн хажуудань хоёр хүнэй зогсохые хараба.

³³Тэдэ хоёрой Иисустай хахасажа байхада: «Багша! Эндэ байхадамнай манда ямар һайн гээшэб! Гурбан майхан бодхоое, нэгыень шамда, нэгыень Моисейдэ, үшөө нэгыень Илияда», – гэжэ Пётр юун гэжэ байһанаа өөрөөш мэдэнгүй дуугаржархиба.

³⁴Тиигэжэ Пётрой хэлэһээр байтарынь үүлэн буужа, тэдэниие һүүдэрээрээ хушаба. Үүлэндэ хушагдахадаа, тэдэнэр айжа абаба.

³⁵«Энэ минии шэлэжэ абаһан Хүбүүн юм! Тэрэнэй үгөөр ябагты!» – гэжэ абьяан үүлэн сооһоо хэлэбэ.

³⁶Тэрэ абяанай дуулдахаяа болиходо харахадань, Иисус гансаараа байба. Пётр, Иоанн, Яков гурбан тийхэдэ хараһан үзэһэнөө нюужа, хэндэшье хэлэбэгүй.

Иисус ада шүдхэртэ барюулһан хүбүүе эдэгээбэ

³⁷Үглөөдэрынь Иисусай гурбан шабитаяа хадаһаа буухада, тэдэниие ехэ олон зон угтажа байгаа.

³⁸Зоной дундаһаа гэнтэ нэгэ хүн Иисуста хандажа хашхарба: «Багша аа, минии хүбүүе үзэжэ үгыт даа, би таниие ехэтэ гуйнаб. Энэ ори ганса хүбүүмни юумэл!

³⁹Ада шүдхэрэй добтолходо, энэ хүбүүмни гэнтэ хашхаран хуугайлна, шүрбэһэниинь таталдажа, амаараа хөөһэ бурана, шадал тэнхээн барагдажа, ехээр ядарһанайнь лэ һүүлээр тэрэ ада шүдхэр тэрэниие орхижо ошоно.

⁴⁰Ада шүдхэрые гаргажа үгыт гэжэ шабинарыетнай гуйһамни, шэгэһэн ада шүдхэрые тэдэ даража шадаагүй».

⁴¹«Этигэл хүзэггүй, забхай ябадалтай зон аа! Үшөө хэды шэнээн таанадтай байхабиб? Үшөө хэды болотор таанадые тэсэжэ байхабиб? Хүбүүгээ абаад ерэ!» – гэжэ Иисус тэрээндэ хэлэбэ.

⁴²Хүбүүнэй дүтэлжэ ябахата, шэгэһэн ада шүдхэр тэрэниие газарта унагаагаад, шүрбэһыень таталдуулжа оробо. Харин Иисус ада шүдхэрые хорижо, хүбүүе эдэгээгээд, эсэгэдэнь тушааба.

⁴³Бурханай агууехэ хүсэ шадалые хараһан бүгэдэ зон гайхалдаа һэн.

Иисус дахин үхэхэ тухайгаа хэлэнэ

Иисусай бүтээһэн шэдитэ үйлэ хэрэгүүдтэ хүн зоной гайхан ханажа байхада:

⁴⁴«Хэлэхэ юумыемни бүхөөр хадуужа абагты: Хүн түрэлхитэнэй Хүбүүн хүнүүдэй гарта тушаагдахань», – гэжэ Иисус шабинартаа хэлэбэ.

⁴⁵Тeэд шабинaрын хэлэһэн үгэнүүдэйнь удха ойлгобогүй, юундэб гэхэдэ, үнэн удха тэдэнһээ далдалаатай байгаа бшуу. Тиигээдшье тайлбарилан багшаһаа һурахаяа зүрхэлбэгүй.

Хэн агууехэб?

⁴⁶Тиигэжэ байтараа, хэмнай агууехэб гэжэ шабинaрын доро дороо бодобо.

⁴⁷Тэдэнэйнгээ һанал бодол мэдэһэн Иисус нэгэ үхибүүе абажа, хажуудаа байлгаад,

⁴⁸тэдээндээ хэлэбэ: «Минии нэрээр энэ үхибүүе тогтоожо абаһан хүн намайе тогтоожо абаһан болоно, намайе тогтоожо абаһан хүн намайе иишэ эльгээһэн Бурхание тогтоожо абаһан болоно. Юундэб гэхэдэ, таанадай эгээн даруу номгонтнай эгээл агууехэтнай гээшэ».

Иисусай талада, мүн тэрээндэ эсэргүү талада байһан зон тухай

⁴⁹«Багша аа, шинии нэрээр ада шүдхэрнүүдые дарадаг хүниие бидэ хараабди. Тин маанадаар суг ябалсаагүй юм хадань бидэ тэрэниие хорёобди», – гэжэ Иоанн хэлэбэ.

⁵⁰«Хорихо гэжэ бү оролдогты! Танда эсэргүүсээгүй хүн танай талада байна», – гэжэ Иисус Иоаннда болон бусад шабинaртаа хэлэбэ.

Самаряан тосхойхин Иисусые угтажа абахаяа һэдэбэ

⁵¹Тэнгэридэ абтаха сагайнгаа ойртожо байхада Иисус Иерусалим хото ошохо гэжэ хатуугаар шиидэбэ.

⁵²Түрүүлэн тэрэ хэдэн түлөөлэгшэдөө хэрэгтэй бүхы юумэ бэлдэжэ байхаарнь самаряан тосхон эльгээбэ.

⁵³Тeэд Иисусай Иерусалим хото ошожо байһые мэдэһэн тосхойхид тэрэниие угтажа абахаяа һэдээ бэлэй.

⁵⁴Тиихэдэнь Яков Иоанн хоёр шабинaрын: «Эзэн аа, тэнгэриһээ гал буулгажа, эдэ зоние бултыень шатаахамнай гү?» – гэжэ багшаһаа һураба.

⁵⁵Тиихэдэнь Иисус эрьен хаража, тэдэниие хорибо.



⁵⁶Тиигээд тэдэ ондоо тосхон ошоо бэлэй.

Иисусые дахаха дуратай байһан гурбан хүн тухай

⁵⁷Замда ябахадань нэгэ хүн Иисуста: «Танай хаанашье ошоо хаа, би һалангүй дахаад ябахаб», – гэжэ хэлэбэ.

⁵⁸«Араата үнэгэн орохо нүхэтэй, тэнгэрийн шубуун хонохо уургайтай юм, харин Хүн түрэлхитэнэй Хүбүүн толгойгоо табижа амарха газаргүйл», – гэжэ Иисус тэрээндэ хэлэбэ.

⁵⁹Үшөө нэгэ хүндэ Иисус: «Намайе дахажа яба», – гэбэ. «Дээдын Эзэн, аа! Түрүүшээр гэртээ харижа, эсэгээ хүдөөлүүлээд ерэхыемни табиш даа», – гэжэ тэрэнь урдаһаань хэлэбэ.

⁶⁰«Үхэхэн хүнүүд өөһэдөө үхөөшэдөө хүдөөлүүлэг лэ. Харин ши ябажа, Бурханай хаан түрэ тухай номно», – гэжэ Иисус тэрээндэ хэлэбэ.

⁶¹«Эзэн аа, би таниие дахахал байнаб. Теэд түрүүн гэр бүлынхидтээ баяраа хэлсээд ерэхыемни зүбшөөгыт», – гэжэ баһа нэгэ хүн хэлэбэ.

⁶²«Газар хахалхаяа анзаһа бариһан аад, гэдэргээ хаража сухариһан хүн Бурханай хаан түрэдэ хэрэггүй», – гэжэ Иисус тэрээндэ хэлэбэ.

Лука 10

Иисус далан хоёр хүниие шэлэжэ даалгабаритай ябуулна

¹Тэрэнэйнгээ һүүлээр Иисус үшөө далан хоёр хүниие шэлэжэ абаад, өөрынгөө ошохо гэнэн хото хүдөө руу хоёр хоёроор эльгээхэдээ, иигэжэ захиба:

²«Ургаса ехэ байна, теэд тэрэниие суглуулха хүнүүдын үсөөн лэ. Тиимэһээ ургасаяа суглуулха хүдэлмэрилэгшэдые ябуулхыень Ургасын Эзэндэ зальбарагты.

³Ябагты даа! Һүрэг шононууд руу хурьгадые тууһан мэтэл таанадые эльгээнэб.

⁴Мүнгэншье, туламшье, гуталшье бү абажа ябагты, харгыдаа хүниие мэндэшэлжэ сагаа бү гээгты.



⁵Ямаршые айлда ороходоо, түрүүнэй түрүүндэ: „Танай гэр бүлынхид амгалан тайбан һуухатнай болтогой!“ – гэжэ юрөөгөөрэйгты.

⁶Хэрбээ тэндэ амгалан тайбаниие хүсэдэг хүнүүдэй ажамидардаг юм хаань, танай юрөөһэн амгалан тайбантнай тэдэн дээрэ тогтохо; харин амгалан тайбаниие хүсэдэггүй зоной байбалнь, тэрэтнай таанартаа бусаха.

⁷Бууһан айлдаал хоножо, үгэһэн юумыень эдижэ, уужа байгты: хүдэлмэрилэгшэ ажалайнгаа түлөөһэ абаха эрхэтэй бшуу. Айлнуудые һэлгэжэ бү гүйгты.

⁸Тиигээд али нэгэн хотодо ороходотнай, хүн зоной таанадые угтажа абабал, үгэһэн юумыень эдигты.

⁹Тэндэхи үбшэнтэниие эдэгээгты, тиигээд: „Бурханай хаан түрэ эндэтнай мэнэ гэхээр тогтохо“, – гэжэ хүн зондо хэлэжэ ябагты.

¹⁰Али нэгэн хотодо ороходотнай, тэндэхи зоной таанадые угтажа абаха дурагүй байбалнь, гудамжада гараад:

¹¹„Таанадые һэргылэн, хүлдэмнай халдаһан хотынтнай тооһышье гүбижэ таанадта орхинобди. Зүгөөр Бурханай хаан түрэ оршон тогтохо дүтэлөө гэжэ мэдэгты!“ – гээрэйгты.

¹²Зарга шүүбэриин болохо Үдэр таниие угтажа абаагүй хотынхид Содом хотынхидһоо бүри үлүү аймшагтай хэһээлтэдэ хүртэхэ. Зүгөөр Содом хотынхидые ямар аймшагтайгаар хэһээхэб гэжэ бодоод үзэгты.

Этигэл хүзэггүй хото тухай

¹³Хоразин хотынхид, таанад уй гашуудал үзэхэт! Бетсаида хотынхид, таанад уй гашуудал үзэхэт! Хэрбээ танай хотонуудта бүтээһэн гайхамшагта хэрэгүүдээ Тир Сидон хотонуудта үзүүлһэн байбални, тэдэ хотын зон үни гэхээр Бурханда хандаха һэн. Тэдэнэр хахархай хубсаһа үмдэжэ, тархи дээрээ үнэхэ адхажа нүгэлнүүдээ гэмшэхэнээ баталха бэлэй.

¹⁴Тиин Зарга шүүбэрийн болохо Үдэр Бурхан Тир, Сидон хотынхидтэ таанадта ороходоо бүри үршөөл хайратайгаар хандахал.

¹⁵Капернаум хотынхид, таанад огторгойдо алдаршаха ханаатай байна гүт? Таанад тамын оёорто унахат!

¹⁶Түлөөлэгшэдни, таанадые шагнажа байһан хүнүүд намайешье шагнана, таанадые буруушааһан хүнүүд намайешье буруушаана. Харин намайе буруушааһан хүнүүд намайе иишэ эльгээһэн Бурханиее буруушаана гэшэ», – гэжэ хэлэбэ.

Далан хоёр түлөөлэгшэдэй бусажа ерэнэн тухай

¹⁷Далан хоёр түлөөлэгшэдын хото хүдөөгөөр ябаһанаа ехэ баяртай бусажа ерээд: «Эзэн аа, танай нэрэһээ захирхадамнай ада шүдхэрнүүдшые үгыемнай дуулана», – гэжэ хэлэбэд.

¹⁸Тиихэдэнь Иисус тэдэндээ хэлэбэ: «Тэнгэриһээ Сатанагай сахилгаан мэтээр доошоо унаһые би хараһан байнаб.

¹⁹Шагнагты даа, могой болон хорото абаахайнуудые, мүн хамаг дайсадай хүсые дараха засаг таанадта барюулааб. Тиимэһээ таанадта ямаршые хүсэн хоро хэжэ шадахагүй.

²⁰Таанад ада шүдхэрнүүдые мэдэлдээ оруулһандаа бэшэ, харин нэрээ тэнгэридэ бэшүүлһэндээ баярлагты!»

Иисус Эсэгэдээ баяр баясхалан хүргэнэ

²¹Энэ үедэ Нангин һүлдын Иисусые баяраар дүүргэхэдэ, тэрэ: «Газар тэнгэрийн Дээдын Эзэн, Эсэгэмни! Сэсэн мэргэн, эрдэм номтой зонһоо далдалан нюуһан юумээ эгээлэй юрын зондо нээжэ элирүүлһэнэйшни түлөө шамда баяр баясхалан хүргэнэб. Зүб даа, Эсэгэмни, ши иимэл юумэнэй болохые хүсэжэ байгаа ха юмши.

²²Бүхы юумые Эсэгэмни намда үгөө. Эсэгэһээ ондоо хэншые Хүбүүе мэдэхгүй, мүн Хүбүүнһээ, баһа Хүбүүнэй дуулгаһан хүнүүдһээ ондоо хэншые Эсэгы мэдэхгүй», – гэжэ айладхаба.

²³Тиигээд Иисус шабинартаа аминдань хандан хэлэбэ: «Таанадай хаража байһан юумые хараһан хүн аза жаргалтай.

²⁴Олон лүндэншэд, хаашуул таанадай хаража байһан юумые харахые ехээр хүсэбэшье, хараагүй, таанадай дуулажа байһан юумые дуулаха дуратай байгаад, дуулажа шадаагүй гэжэ таанадта хэлэхэ байнаб».

Энэрхы сэдхэлтэй самарян хүн

²⁵Нэгэ Хуули заадаг багша һууриһаа бодожо, Иисусые туршаха хүсэлтэйгөөр: «Багша аа, мүнхэ амидаралтай байхын тула би юу хэхэ ёһотойбиб?» – гэжэ асууба.

²⁶«Хуули соо юун гэжэ бэшээтэй байдаг бэ? Тэрэниие яжа ойлгодогбта?» – гэжэ Иисус урдаһаань һураба.

²⁷«„Дээдын Эзэн Бурхандаа бүхы зүрхэ сэдхэлээрээ, бүхы хүнэнэ һүлдөөрөө, бүхы хүсэ шадалаараа, бүхы ухаан бодолоороо дуратай бай“, баһа „Дүтын хүндөө өөртөөл адли дуратай бай“ гэжэ тэндэ бэшээтэй байдаг», – гэжэ тэрэнь харюусаба.

²⁸«Ши зүб харюусабаш. Эдэ заабаринуудые дүүргэжэ ябаа һаа, ши мүнхэ амидаралтай байхаш», – гэжэ Иисус тэрээндэ хэлэбэ.

²⁹Харин Хуули заадаг багша бэеэ сагааруулхые оролдон: «Дүтымни хүн хэн болоноб?» – гэжэ Иисусаа һураба.

³⁰Иисус тэрэ дороо харюусаба: «Нэгэ хүн Иерусалимһаа Иерихон хото руу ошожо ябаба ха. Харгыдаа тэрэ дээрмэшэдтэ баригдашаба гэхэ. Дээрмэшэд байһан юумыень буляжа абаад, зада сохёод, арай амиды голтой юумые орхёод зугадаба.

³¹Тушаан боложо нэгэ санаартан тэрэ харгыгаар ябаа. Гэбэшье тэрэниие хараад, хажуугаарнь гарашаба.

³²Баһа нэгэ левит хүн тэрэ газартань ерэжэ, хэбтэһэн хүниие хараад, хажуугаарнь гарашаба.

³³Мүн тэрэл харгыгаар ябаһан нэгэ самаряан хүн гэмтэгшые хараад, хажуудань ерээд, аргагүй ехээр хайрлаба.

³⁴Шархыень улаан архяр угаагаад, тоһо түрхин уяба, элжэгэндээ һуулгажа, зоной буудаг газарта абаашаад, тэрэ хүнөө харууһалжа хонобо.

³⁵Хойто үдэрынь айлшадай буудаг газарай эзэндэ хоёр динари мүнгэ үгөөд, „Энэ хүниие харууһалжа байгаарай, үлүү гаргаша гаргаа һааш, бусаха замдаа түлэхэб“, – гэбэ.

³⁶Тиигээд Иисус нүгөө Хуули заадаг багшаһаа: «Юун гэжэ һананаш, эдэ гурбанай хэниинь дээрмэшэдтэ сохюулһан хүндэ эгээн ойро дүтэ болоноб?» – гэжэ һураба.

³⁷«Хайрлажа, амиинь абарһан хүн», – гэжэ нүгөөдынь харюусаба. «Шишье тиимэ юумэ хэжэ ябаарай!» – гэжэ Иисус тэрээндэ хэлэбэ.

Марфа Мария хоёр тухай

³⁸Замда ябажа байхадаа Иисус шабинартаяа нэгэ тосхондо хүрэбэ. Марфа гэжэ нэрэтэй нэгэ эхэнэр тэрэниие гэртээ оруулжа хүндэлөө.

³⁹Тэрэ эхэнэрэй Мария дүүнь Дээдын Эзэнэй хүлдэнь һуугаад, хэлэһэн үгыень шагнаба.

⁴⁰Харин Марфа айлшанаа хүндэлхэ гэжэ туха сүлөөгүй хүдэлнэ. Тиигээд Иисуста дүтэлжэ: «Эзэн аа, энэ минии дүүгэй хамаг ажалаа нам дээрэ хаяад байхыень харанагүй гээшэ гүт? Эгэшэдээ туһала гэжэ дүүдэм хэлыт», – гэбэ.

⁴¹«Марфа, нүхэрни, ши дан олон юумэндэ һанаагаа табижа, хаанааш хүрэнэгүйш.

⁴²Харин нэгэл юумэндэ гол һанаагаа табижа хэрэгтэй. Мария дүүшни дэмбэрэлтэ һайхан хэрэг шэлэнхэй, тэрэниинь хэншье болюулжа шадахагүй», – гэжэ Иисус айладхаба.

Лука 11



Хайшан гээд зальбархаб?

¹Нэгэтэ хаанашьеб Иисусай зальбаржа дүүргэһэнэй һүүлээр: «Эзэн аа, Иоаннай шабинараа хургаһан шэнгээр Бурханда яжа зальбархые манда заажа хайрлыт», – гэжэ шабинарайнь нэгэн гуйба.

²Иисус шабинартаа хэлэбэ: «Бурхандаа иигэжэ мүргэгты: Эсэгэмнай! Нангин нэрэшни алдаршахань болтогой. Хаан түрэшни мандахань болтогой,

³Ажамидаралаймнай хоол Үдэр бүхэндэ мандаа үгэжэ байгаарайт.

⁴Манда мууе хэһэн алибаа хүниие Манай хүлисэдэгтэл адляр Бидэнэйшые нүгэл хилэнсые хүлисыт даа. Горидолго хорхойтуулгада маниие бү оруулыт даа!»

⁵Иисус тэдээндээ хэлэбэ: «Танай нэгэн хани нүхэртэй байгаа һэн гэлэй. Һүнийн тэндэ та нүхэртөө ошожо: „Ханимни, намдаа гурбан монсогор хилээмэ зээлеэр үгыш,

⁶харгыдаа ябаһан нэгэ нүхэрэйнгөө орожо ерэхэдэ, табиха юумэгүй байбаб“, – гэбэт гэлэй.

⁷Тиихэдэтнай нүхэртнай үүдэнэйнгээ саанаһаа: „Хүндэ хашаргаан бү гарга: үүдэмни бүхөөр шэбхэдээтэй, үхибүүдни намтаяа унтаридаа оронхой; бодожо шамда хилээмэ үгэхэ аргамгүй“, – гэжэ танда харюусаба гэлэй.

⁸Тиигээд тэрэ нүхэртнай һэшхэлээрээ боложо, хилээмэ үгөөгүйшые һаа, эрээд халахагүйдэтнай бодожо, эрешыетнай дууһан үгэхэ баатай болохо гэжэ таанадта хэлэхэ байнаб.

⁹Тиимэһээ эригты, тиихэдэтнай танда үгэхэл; бэдэрэгты, тиихэдээ олохот; үүдэ тоншогыт, тиихэдэтнай танда нээхэ.

¹⁰Юундэб гэбэл, эриһэн алишые хүн абадаг, бэдэрһэн хүн олодог, тоншоһон хүндэ үүдэ нээжэ үгэдэг.

11Хүбүүнэйнгээ загаһа эрихэдэнь, могой барюулха эсэгэ таанарай дунда байха аал?

12Үгышые хаа, хүбүүнэйнгээ үндэгэ эрихэдэ, тэрээндээ хорото абаахай үгэхэ эсэгэ байха аал?

13Хэрбээ нүгэл шэбэлтэй таанадай үхибүүдтээ һайн юумэ үгэжэ шададаг байхадатнай, Огторгойн Эсэгэ гуйһан хүн бүхэндэ Нангин Һүлдээ бүришые дуратайгаар үршөөхэл!»

Иисус ба Веельзевул

14Иисус нэгэ хүндэ шэгэһэн хэлэгүй ада шүдхэрые бэеһэнь зайлуулба. Ада шүдхэрэй гарахада, нүгөө хүниинь дуугардаг болошобо. Тэндэ байһан зон ехэтэ гайхалсаба:

15«Иисус Веельзевулай, ада шүдхэрнүүдэй ноёной хүсөөр лэ ада шүдхэрнүүдые дарана», – гэжэ тэдэнэй зариман хэлэбэ.

16Нүгөөдэ зариманиинь Иисусые туршажа, Бурханай заяаһан хүн байһанаа тэнгэриһээ баталагдаһан гайхамшагта дүлгэ тэмдэг харуулыш даа гэбэ.

17Тэдэнэй бодол тааһан Иисус хэлэбэ: «Хэдэн бүлэг боложо хубааралдаад, хоорондоо хёморолдоһон алишые хаан орон хооһорон, бутаран халаха. Тиин нэгэ гэр бүлын гэшүүдынь эбээ таһаран хэрэлдэбэл, тэрэ гэр бүлэ халаха, һарниха болоно.

18Хэрбээ Сатана дотороо хоёр ханаатай болоо хаа, тэрэнэй хаан орониинь яагаад бүтэн байха бэлэй? Харин таанад шүдхэрнүүдэй Веельзевул ноёной хүсөөр ада шүдхэрнүүдые хүнэй бэеһээ зайлуулна гэжэ нам тухай хэлсэнэт.

19Хэрбээ Веельзевул ноёной хүсөөр ада шүдхэрнүүдые хүнэй бэеһээ зайлуулдаг һаамни, танай шабинар хэнээр айлгажа, ада шүдхэрнүүдые зайлуулдаг бэ? Зүб, тэдэ шабинартнай буруу байдалыетнай баталнал!

20Хэрбээ Бурханай хүсөөр ада шүдхэрнүүдые дарадаг һаамни, тэрэ Бурханай хаан түрын эндэтнай тогтоод байһые баталха.

²¹Хэрбээ нэгэ хүсэтэй хүнэй буу зэбсэг барижа, ордон гэрээ хамгаалаа хаань, зөөри зөөшэнь бүтэн байха.

²²Бүри хүсэтэй хүн тэрээндэ довтолжо ороод, тэрэниие диилээ хаа, бүхы найдалынь болохо буу зэбсэгыень буляаха, зөөрииень олзолхо байна.

²³Минии тала баряагүй хүн намда эсэргүү гээшэ. Намтай хамта ургаса суглуулаагүй хүн тэрэ ургасые үрижэ халгаана гээшэ.

Ада шүдхэрэй бусалган тухай

²⁴Хүнэй бэеһээ гараһан ада шүдхэр уһагүй сүл губьяар тэнэжэ, амар заяа бэдэрээд, олохогүйдөө: „Байһан гэртээ бусахам ха даа“, – гэдэг.

²⁵Бусажа ерэхэдэнь, хуушан гэрэйнь бог хамагдаһан, сэбэрлэгдэһэн байдаг.

²⁶Тиигээд тэрэ ада шүдхэр ябажа, өөрһөөн һураггүй хоротой долоон ада шүдхэр абаад, һөөргөө тэндэ шэгэн орожо байрладаг. Тиигэхэдэнь тэрэ хүниинь урдынхидаа ороходоо бүри ехээр тамаа үзэдэг», – гэжэ Иисус хэлэбэ.

Үнэн бодото жаргал тухай

²⁷Иимэ юумэ хэлэжэ байхадань, зоной дундаһаа нэгэ эхэнэр: «Хэбэл соогоо таниие абажа ябаһан, хүхөөрөө тэжээһэн эхэ жаргалтай!» – гэжэ хоолойгоо шангадхан дуугарба.

²⁸«Бурханай үгэ шагнаад, тэрэниие наринаар сахидаг хүнүүд үлүү ехэ жаргалтай!» – гэжэ Иисус харюудань хэлэбэ.

Бурханай харуулһан дүлгэ тэмдэг

²⁹Тиигээд зоной улам олоор сугларжа эхилхэдэ, Иисус иигэжэ айладхаба: «Оршон үеын зон муу мэхэтэйшүүл байна. Тэдэнэр Бурханһаа дүлгэ тэмдэг харуула гэнэ. Теэд Иона лүндэншэтэй ушарһан гайхамшагта дүлгэ тэмдэгһээ ондоо дүлгэ тэмдэг тэдэндэ үгтэхэгүй.

30Иона лүндэншын Ниневит хотынхидтэ дүлгэ тэмдэг болоһондол адляар Хүн түрэлхитэнэй Хүбүүн энэ үеынхидтэ дүлгэ тэмдэг болохо юм.

31Зарга шүүбэриин болохо Үдэр Урда зүгэй хатан энэ үеын хүнүүдтэй хамта бодожо, тэдэниие буруушааха. Тэрэ хатан Соломон хаанай сэсэн үгые шагнахаяа газарай мухарһаа ерэхэн байгаа бшуу. Теэд мүнөө эндэ Соломонһоо бүри шухала нэгэн байна.

32Зарга Шүүбэри болохо Үдэр Ниневит хотынхид тус үеынхидтэй бодожо, тэдэниие буруушааха. Ионын номнол шагнаад, тэдэнэр нүгэлһөөн зайлажа, Бурханда хандаһан байгаа бшуу. Теэд эндэ байгаашань Ионоһоо агуухэ юм!

Бэеын гэрэл туяа тухай

33Зула аһаагаад, хэншье тэрэнээ далда газар табидаггүй, али амһартаар хабхалдаггүй, харин ороһон хүнэй гэрэлыень харахын тула үндэр табюур дээрэ табидаг ха юм!

34Нюдэн болбол бэеын гэрэл дэн юм. Нюдэнэйшни арюун гэрэлтэй байгаа һаа, бүхы бэешни гэрэлтэй гэгээн байха; харин нюдэнэйшни бүрхэг һаа, бүхы бэешни хабхартан байха.

35Тиимэхээ досоохи гэрэл туяагаа балартуулхагүй гэжэ оролдо!

36Хэрбээ бүхы бэешни һаруултаад, тэрээн соошни нэгэшье харлаһан газарай үгы һаань, хамаг бэешни зулын ялагар гэрэлээр гэрэлтүүлэгдэхэн шэнги, зосоо газаагүй гэрэлтэн толорхол».

Иисус фарисейнүүдые ба Хуули заадаг багшанарые гэмнэнэ

37Иисусай хэлэжэ дүүргэхэдэ нэгэ фарисей хоол барихые тэрэниие уриба. Иисус гэртэнь орожо һууба.

38Хоол барихынгаа урда тээ гараа угаахагүйдэнь фарисей ехээр гайхаба.

³⁹Тиихэдэнь Иисус тэрээндэ иигэжэ хэлээ: «Фарисейнүүд, таанар аяга, табагай газаахиень аршажа арилгадагта, харин досоогоо таанад эд хүрэнгэдэ шуналтай, нүгэлтэй байнат.

⁴⁰Тэнэг мунхаг амирад! Юумэнэй газар тала бүтээхэн Бурхан дотор талыеньше бүтээгээ бэшэ гү?

⁴¹Зүгөөр аяга табар соогоо байһан юумэнһээ үгытэйшүүлтэй хубаалсажа үгэлсэжэ байбал, таанадые газар досоогүй арюун сэбэр болоо гэжэ Бурхан тоолохо һэн!

⁴²Фарисейнүүд, таанад гашуудал үзэхэт! Ургуулһан хангалта ургамалай, мүн огородойнгоо эдээнэй арбанайнь нэгэл хубиие Бурханда үргэдэгта, харин тэрээнтэй зэргэ хүнүүдые хууранат, Бурханда дурагүй байнат. Тиихэдэ таанад бусад зондо үнэн зүбөөр хандаха, мүн арбанайнгаа нэгэ хубиие Бурхандаа үгэжэл байха ёһотойт.

⁴³Фарисейнүүд, таанад гашуудал үзэхэт! Мүргэлэй гэртэ урдуур һууха дуратайт, олон зоной дунда мэндэшлүүлхэ дуратайт.

⁴⁴Таанад гашуудал үзэхэт! Таанад ямарше тэмдэггүй хүүр мэтэт, хүнүүд гэшхэнээнэш мэдэнгүй дээгүүртнай ябадаг!»

⁴⁵«Багша аа, иигэжэ хэлэхэдээ, та маниеше доромжоллот!» – гэжэ Хуули заадаг багшанарай нэгэн Иисуста хэлэбэ.

⁴⁶Харин Иисус: «Хуули заадаг багшанар, таанадые гашуудал үзэхэт. Хүнүүдтэ даашагүй ашаа үргэлүүлээд, тэрэ ашаагаа зөөхэдэнь хүндэ туһалха гэжэ хургаарааше хүдэлгэдэггүйт!

⁴⁷Таанад гашуудал үзэхэт! Таанад үбгэ эсэгэнэрэйнгээ алаһан лүндэншэдтэ үзэсхэлэнтэ гоё субаргануудые баринат.

⁴⁸Тиигэхэдээ таанад үбгэ эсэгэнэрэйнгээ харата хэрэг зүбшөөһөнөө харуулнат, үгы һаа, тэдэнэйнгээ алаһан лүндэншэдтэ субаргануудые барихагүй байгаат.



⁴⁹Бүхы юумые уридшалан мэдэдэг Бурхан танай нүгэлтэ хэрэгүүд тухай: „Лүндэншэдые болон мэдээсэгшэдые тэдээндэ эльгээхэб, зүгөөр тэдэнэймни заримыень алаха, заримыень намнаха“, – гэжэ хэлэһэн байгаа.

⁵⁰Тиин дэлхэйн анха бии болохоһоо хойшо бүхы лүндэншэдэй адхарһан шуһан энэ оршон үеын угсаатанһаа нэхэгдэхэ:

⁵¹Авелиин шуһанһаа эхилээд, үргэлэй шэрээ ба Нангин Газарай хоорондо хүнөөгдэһэн Захариягай шуһан хүрэтэр нэхэгдэхэ. Тиимэ даа, бүхы тэрэ адхарһан шуһанай түлөө энэ үеын зон хэлээлтэдэ орохо!

⁵²Хуули заадаг багшанар, таанад гашуудал үзэхэт! Таанад эрдэм ухаанай ордондо орохо үүдэнэй түлхюур абаһан аад, тэндэ өөһэдөөшье ороогүйт, орохо гэхэн хүнүүдтэшье хаалта хээт», – гэжэ зэмэлбэ.

⁵³Иисусай тэрэ гэрһээ гаража ошоходонь, Хуули заадаг багшанар болон фарисейнүүд Иисусые ехэ шэрүүнээр шүүмжэлжэ оробо, тэрэ саһаа хойшо олон табан юумэ һуража,

⁵⁴буруу юумэ хэлүүлжэ бариха арга мэхэ бэдэрдэг болобо.

Лука 12

Һэргылэмжэ

¹Тоолошогүй олон зоной сугларжа, бэе бэеэ дарахаһаа нааша шахасалдаха үедэнь Иисус түрүүн шабинартаа хэлэжэ эхилбэ: «Нюур сахидаг фарисейнүүдэй эһээбэриһэнь болгоомжолжо ябагты. Тэдэ һургаалаараа зоной толгой эрьюулдэг юм.

²Эли болохогүй ямаршье далда юумэн байдаггүй, мэдээжэ болохогүй нюуса юумэн байдаггүй.

³Тиимэхээ танай харанхыда хэлэһэн юумэнтнай гэрэлтэй гэгээтэйдэ дуулдахал, хаалгатай таһалгада шэбэнэн хэлэһэн үгэтнай гэрэй оройһоо ханхинахал.

Хэнһээ айха хэрэгтэйб



⁴Хани нүхэд аа, хүнэй бэе хүнөөгөөд, ондоо юумэ хэжэ шадахагүй хүнүүдһээ бү айгты.

⁵Зүгөөр хэнһээ айжа байхыетнай таанадтаа заажа үгэхүү: хүнэй ами хүнөөгөөд, хүнэһыень гал тамада хаяха эрхэ засагтай Бурханһаал айгты. Үнэхөөрөө, гансал Бурханһаа айжа байха ёһотойт!

⁶Табан борбилоое хоёрхон лэ зоосоор худалдадаг бэшэ аал? Тиихэдэ тэдэнэй нэгыеньшье Бурхан анхаралгүй орхидоггүй.

⁷Зүгөөр танай толгойнтнай үһэншье хүрэтэрөө тоолоотой бшуу. Тиимэхээ бү айгты: таанад олон борбилоонуудһаа үнэтэйт.

Христосые шүтэхэ ба буруушааха тухай

⁸Улад зоной урда минии мэдэлдэ байнаб гэжэ айладхаһан хүнүүдые Хүн түрэлхитэнэй Хүбүүн Бурханай Эльгээмэлнүүдэй урда баһал намайе дахагша гэжэ нэрлэхэл.

⁹Харин зоной дунда намайе буруушааһан хүнүүдые Хүн түрэлхитэнэй Хүбүүн Бурханай Эльгээмэлнүүдэй дунда баһа буруушаахал.

¹⁰Хүн түрэлхитэнэй Хүбүүн тухай муугаар хэлэхэн хүн бүхэн хүлисэгдэхэ. Харин Нангин хүлдые муудхаһан хүнэй нүгэл хүлисэгдэхгүй.

¹¹Таанадые мүргэлэй гэртэ гү, али засаг баригшадай гү, али ноёдой урда мүшхэхөөр асарбалынь, яажа бэеэ үмөөрхэ, юун гэжэ хэлэхэ тухайгаа һанаагаа огто бү зобогты.

¹²Тэрэ сагтаа Нангин хүлдэ юу хэлэхыетнай танда заажа үгэхэ».

Тэнэг баян хүн тухай

¹³«Багша аа, эсэгынгээ орхиһон зөөри дүүтэеэ хубаалда гэжэ ахадам хэлэжэ үгыт», – гэжэ зоной дундаһаа нэгэн гуйба.

¹⁴«Нүхэр аа, та хоёрой зарга шиидхэхэ, зөөри зөөшыетнай хубааха эрхэ намда хэн үгөө юм бэ?» – гэжэ Иисус тэрээндэ харюусаад, бултанда хандан:



¹⁵«Алибаа юумэндэ шунахааа өөһэдыгөө һэргылжэ, болгоомжолжо ябагты. Хүнэй жэнхэни ами наһан эд зөөриһөө дулдыдадаг бэшэ, тиихэдэ хэды шэнээн баян бардам байһантнай ямаршые хамаагүй юм».

¹⁶Иисус иимэ ушар хөөрэбэ: «Нэгэ баянай газар дээрэ аргагүй һайн ургаса ургаба.

¹⁷„Яаха болоо гээшэбиб, ургасаяа хадагалха газар үгылби“, – гэжэ тэрэ досоогоо бодобо.

¹⁸„Ай, юу хэхэеэ мэдэнэб: хуушан амбаарнуудаа задалжа хаяад, орондонь шэнэ томонуудые барижа, бүхы таряагаа хуряжа, тэндээ адхахаб, мүн бусадшые эд зөөриее хадагалхаб.

¹⁹Зай, тиигээд өөртөө: ‘Азатай хүн байнаб! Олон жэл соо өөрыгөө хангаха эд зөөритэйб. Мүнөө юундэш ханаагаа зобонгуй, эдижэ, уужа, хүхижэ, сэнгэжэ байхаб’, – гэжэ хэлэхэб”.

²⁰Харин Бурхан тэрээндэ: „Тэнэг амитан! Энэ хүниндөөл амиешни хороохоёо байна, тиихэдэнь суглуулһан зөөришни хэндэ хүртэхэб?“ – гэжэ хэлэбэ».

²¹Хөөрөөнэйнгөө түгэсхэлдэ Иисус: «Эрдэни баялиг Бурханай урда бэшэ, харин өөрынгөө үбэртэ суглуулдаг хүн болгон иимэ хойшолонтой», – гэжэ хэлэбэ.

Бурханда найдагты

²²Иисус шабинараа иигэжэ һургаба: «Амиды ябахын тула юу эдихэ, бээдээ юу үмдэхэ тухай ханаагаа огто бү зобоогты.

²³Амимнай эдее хоолһоо шухала юм. Бээмнай хубсаһа хунарһаа шухала юм.

²⁴Хирээнүүдые хараад үзэгты: тэдэ таряа тарыдаггүй, хададаггүй, хадагалха газаршыегүй, амбааршыегүй, гэбэшье тэдэниие Бурхан тэжээдэг. Таанад шубуудта ороходоо үнэтэй сэнтэйлта!

25Таанадай хэнтнай шадалаараа оролдоод, тохоногойшые шэнээн ургажа шадахаб?

26Тээд иимэ эгэл юумэ бүтээхэ аргагүй аад, ондоо юумэнүүдтэ яагаад ханаагаа табихатнайб?

27Хээрэдэ сэсэгүүдэй ургахые хараад үзэгты: тэдэ ажал хэдэггүй, утаһа ээрэжэ өөртөө хубсаһа оёдоггүй. Алдар суутай Соломоншые аргагүй ехэ эд баялигтай байһаншые хаа, эдэ сэсэгүүд шэнги тиимэ гоёор хубсалдаггүй һэн гэжэ би танда хэлэнэб.

28Мүнөөдэр эндэ ургажа байгаад, үглөөдэрынъ, магад, галда шатаагдажашые болохо хээрэ ургаһан алишые ногоо Бурхан үзэсхэлэнтэ гоёор шэмэглэдэг юм. Харин таанадые Бурхан тэрэ ногоонһоо хураггүй ехээр анхараа бэээ, этигэл багатан!

29Тиимэхээ таанад эдихэ, ууха юумэндээ ханалаа бүрин бү табигты.

30Энэ дэлхэйн зон лэ иимэ юумэнүүдээр ханал бодолоо бүрин эзэлүүлдэг юм. Таанад тиимэ зониие бү хажаагты. Эдэ бүгэдэ юумэнэй таанадта хэрэгтэй байһые Эсэгэтнай һайн мэдэдэг юм.

31Тиимэхээ таанад анха түрүүн Бурханай хаан түрэ тухай бодожо байгты, тиихэдэтнай хэрэгтэй бусад юумэнүүдые Бурхан таанадта үгэхэл.

Тэнгэри дээрэхи эрдэни баялиг тухай

32Шабинарни, багахан хүрэг таанар, бү айгты! Эсэгэтнай танда Бурханай хаан орониие дуратайгаар үршөөхэ бшуу.

33Байһан юумээ худалдажа, мүнгынь бадар болгон үгытэйшүүлдэ хубаагты! Үмхирхэгүй дараанаа, барагдашагүй баялигаа тэнгэридэ хадагалагты, тэндэ хулгайшаншые ойронь хүрэхэгүй, хибэн хорхойшые химэлхэгүй.

34Тиигэхэдэ баялигайтнай байһан газарта зүрхэ сэдхэлтнайшые оршохо бшуу.

Этигэлтэй ба этигэлгүй зарасанар тухай



- ³⁵Хубсалаад, зулаа бадараагаад, хододоо бэлэн байхатнай болтогой.
- ³⁶Тиигэбэл таанад түрэ хуримһаа бусажа ерэхэ эзэнээ хүлээжэ байһан зарасанар мэтэ бэлэн байхат. Тэдэнэр эзэнэйнгээ ерээд, үүдэ тоншохотойнь адли дороо нээгээдхидэг.
- ³⁷Эзэнэйнгээ ерэхэдэ, һэргэлэн байһан зарасанар жаргалтай! Үнэн зүрхэнһөө таанадтаа хэлэнэб: эзэниинь дэгэлээ тайлаад, зарасанараа шэрээдэ һуулгажа, өөрөө тэдэнээ хүндэлхэ.
- ³⁸Эзэнэйнгээ хахад һүнишье, үүр сайхашье багаар ерэхэдэнь, хүл дээрээ бэлэн байһан зарасанар жаргалтай!
- ³⁹Хэрбээ гэрэй эзэн хулгайшанай хэдыдэ орожо ерэхые мэдэжэ байбал, һэргэлэн байжа, хулгайшаниие гэртээ шургуулан оруулхагүй һэн бээ гэжэ таанар һайн мэдэнэт.
- ⁴⁰Таанадшье бэлэн байха ёһотойт, юундэб гэхэдэ, Хүн түрэлхитэнэй Хүбүүн хүлээгээгүй сагтатнай хүрэжэ ерэхэ юм».
- ⁴¹«Эзэн аа, энэ һургаалта үгэнүүдээ гансал манда хөөрэнэ гүт, али бүгэдэндэ гү?» – гэжэ Пётр һураба.
- ⁴²«Тиигэхэдээ этигэл найдабаритай, ухаантай зарасань хэн бэ? Гэрэйнгээ эрхилэгшээр табяад, бусад зарасанараа даалгажа, эдее хоол сагтань үгэжэ байхаар гэрэй эзэн хэниие томилхо гээшэб?
- ⁴³Эзэнэйнгээ бусажа ерэхэдэ, үүргээ һайнаар дүүргэжэ байһан зараса аза жаргалтай даа!
- ⁴⁴Тиимэ зарасаа эзэн гэр буусынгаа эрхилэгшээр табиха гэжэ танда баталан хэлэхэ байнаб.
- ⁴⁵Хэрбээ тэрэ зараса: „Эзэмни һаяар ерэхэгүй“, – гэжэ бодоод, зараса хүбүүд, басагадаа сохижо наншажа, эдижэ, уужа, архидажа байгаа һаа,
- ⁴⁶тэрэ зарасын хүлээгээгүй үдэртэ, һанаагүй сагта эзэниинь орожо ерээд, тэрэнээ зада сохёод, этигэлгүй зонтой хамта хэһээхэ байна.

⁴⁷Эзэнэйнгээ юу хүсэжэ байһые мэдэжэ байгаад, тэрэниень дүүргээгүй, бэлэн бэшэ байһан зараса ехээр сохюулжа хэһээгдэхэ.

⁴⁸Харин үүргэ уялгаа мэдээгүй дээрэһээ буруу юумэ хэһэн барлаг багаар сохюулжа. Бурхан хэндэ ехэ үршөөл хайратай байнаб, тэрэ хүнһөө һайн алба хэһые хүлэжэ байна, харин хэндэ үлүү ехээр үршөөлөө хайрланаб, тэрээнһээ бүришые үлүү һайн алба хэһые хүлэжэ байна.

Энхэ тайбан бэшэ, харин эб таһаралга асараа

⁴⁹Би газар дэлхэйдэ гал асарааб, тэрэмни бадарһай гэжэ ехэ хүсэнэб!

⁵⁰Үхэлдэ шунгуулаад гараха ёһотой хүм, тэрэнэйнгээ бээлүүлэгдэхые би хүлэжэ ядан, ехэтэ зобоноб!

⁵¹Намаёе газар дэлхэйдэ энхэ тайбан асараа гэжэ таанад һанана гүт? Үгы даа! Би зоной эбынь таһалхаяа ерээб!

⁵²Энээнһээ хойшо нэгэ гэртэ байдаг табан хүн хоёр бүлэг боложо таһараад, гурбаниинь хоёройнгоо урдаһаа, хоёрынь гурбанайнгаа урдаһаа орохо.

⁵³Эсэгэнь хүбүүнэйнгээ урдаһаа, хүбүүниинь эсэгынгээ урдаһаа; эхэнь басаганайнгаа урдаһаа, басаганиинь эхынгээ урдаһаа; хадам эхэнь бэриингээ урдаһаа, бэринь хадам эхынгээ урдаһаа эсэргүүсэхэ».

Саг мэдэхэ тухай

⁵⁴Иисус арад зондо хэлэбэ: «Баруун тээһээ үүлэнэй гарахада: „Бороо орохонь“, – гэжэ таанад хэлэдэгта. Теэд, нээрээшые, бороо ородог.

⁵⁵Урдаһаа һалхинай үлээхэдэ: „Ааяма халуун болохонь“, – гэдэгта. Нээрээшые, ехэ халуун болодог.

⁵⁶Хоёр нюуртан аа! Таанад газар тэнгэри хоёрой шарай танижа, саг агаарыень уридшалан хэлэдэг аад, яахадаа энэ оршон сагай дүлгэ тэмдэгүүдые мэдэнэгүйбта?

⁵⁷Ямар үнэн зүб юумэ хэхэ ёһотой байһанаа яахадаа өөһэдөө ойлгоногүйбта?

⁵⁸Хүнэй шамайе ямаршьеб юумэнэй түлөө гэмнээд, зарга шүүгшэдэ абаашажа байбал, тэрэ асуудалаа харгыдаа шийдхэжэ хаахые оролдо. Тиигээгүй хааш, тэрэшни шамайе зарга шүүгшэдэ шэрэжэ абаашаха; харин зарга шүүгшэ шамайе түрмын харуулшанда тушааха, харин харуулшан шамайе түрмэдэ нуулгаха.

⁵⁹Һүүлшынгээ хашарһа мүнгэ хүрэтэр үгөөгүй һаа, ши тэндэһээ гарахагүйш гэжэ мэдэжэ бай».

Лука 13

Нүгэлөө орхижо, Бурхандаа дахин хандагты

¹Эгээл тэрэ үедэ хүнүүд Иисуста мэдээсэл асарба. Галилейн хэдэн хүнэй Бурхан хүмэ соо үргэл хэжэ байхадань, Пилат тэдэ хүнүүдэй ами хорообо гэжэ ерэхэн зон Иисуста дуулгаба.

²Тиихэдэнь Иисус тэдээндэ хэлэбэ: «Тэдэ галилейнхид бүхы можынгоо зонһоо эгээл ехэ нүгэлтэй байһан дээрэхээ хохидоо гэжэ һанана гүт?

³Тиимэ бэшэ даа! Харин таанад Бурханда хандан, эрид хубилаагүй һаа, бултадаа тэдээн шэнгээр хосорхот гэжэ мэдэгты!

⁴Үгышье һаа, унаһан Силоамай аранга самхагта даруулжа үхэхэн арбан найман хүниие Иерусалимай бүхы зонһоо үлүү ехэ нүгэлтэй байгаа гэжэ һанана аалта?

⁵Тиимэ бэшэ даа! Теэд хэрбээ таанад Бурханда хандан, эрид хубилаагүй һаа, булта эгээл тиигэжэ хосорхот!»

Жэмэсгүй боди модон тухай һургаалта үгэ

⁶Тиигээд Иисус иимэ һургаалта үгэнүүдые хөөрөбэ: «Нэгэ хүн үзэмэй сэсэрлиг соогоо боди модо тариһан байгаа. Жэмэс түүхээ ерэхэдэнь, тэрэ модониинь хоһон байба ха.



⁷„Гурбан жэл соо энэ модонһоо жэмэс хүлеэгээб, теэд жэмэс урганагүйл. Энэ модо тайража хая, юунэйхиие газар муудхажа байха юм“, – гэжэ үзэмшэндөө хэлэбэ.

⁸Тэрэнь: „Эзэмни, энээнээ үшөө нэгэ жэл байлгагты, би һайса эдлүүрилхэб, үтэгжүүлхэб.

⁹Магад, ерэхэ жэл үрэ жэмэс үгэхэ аалам? Үгөөгүй һаань, тайража хаяна бэээт!“ – гэжэ хэлэбэ».

Иисус субботын үдэр үбшэн эхэнэрые эдэгээбэ

¹⁰Иисус субботодо мүргэлэй гэр соо арад зоние хургажа байба.

¹¹Тэндэ арбан найман жэл соо ада шүдхэртэ барюулагдаһан, үбшэлжэ, тэнхээ тамиргүй болонхой, бэээ сэхэлжэ шадахаяа болитороо һоришоһон нэгэ эхэнэр байба.

¹²Иисус тэрэниие хараһаар дуудажа: «Ши, эхэнэр, эдэгэжэ элүүр болобош!» – гэбэ,

¹³тиигээд гараараа бээдэнь хүрөөдхибэ. Тиихэтэйнь сасуу тэрэ эхэнэр бэээ сэхэлжэ, Бурханда магтаал соло дуудаба.

¹⁴Тиихэдэнь мүргэлэй гэрэй ахалагша субботодо үбшэнтэниие аргалба гэжэ Иисуста дураа гутан: «Ажал хэрэг хэхэ зургаан үдэр бии ха юм. Аргалуулхаяа тэрэл үдэрнүүдтэ ерэхэ байгты, субботодо бэшэ», – гэжэ зондо хэлэбэ.

¹⁵Харин Дээдын Эзэн тэрээндэ иигэжэ харюусаба: «Хоёр нюуртан! Хүн бүхэнтнай субботодо сараа гү, али элжэгээ уяһаань тайлажа, уһалхаяа абаашадаг бэшэ гү?

¹⁶Сатанада баригдажа, арбан найман жэлдэ иитэрээ зобоһон Абраһамай удам энэ басагые субботодо үбшэнэй һабарһаа сүлөөлхэ ёһотой бэшэ гү?»



¹⁷Иисусай иигэжэ хэлэхэдэ, тэрэниие буруушаагшад эшэн аягүйрхэбэ, харин бусад зон барандаа баярлан, Иисусай хайн хайхан хэрэгүүдые магтан алдаршуулба.

Горчицын үрэнэн, мүн эһээбэри тухай хургаалта үгэ

¹⁸Тиигээд Иисус иигэбэ: «Бурханай хаан түрэ юунтэй адлиб, тэрэниие ямар юумэнтэй сасуулхаар бэ?

¹⁹Тэрэ хаан түрэ хадаа нэгэ хүнэй горчицын үрэнэ абажа, сэсэрлиг соогоо һуулгаһанда адли юм. Тэрэ үрэнэниинь ургажа, үндэр томо модон болоод, мүшэр бүхэндэнь тэнгэрийн шубууд уургайгаа түхээрээ.

²⁰Бурханай хаан түрые үшөө юунтэй сасуулалтайб?

²¹Бурханай хаан түрые эһээбэритэй сасуулжа болохо: нэгэ эхэнэр багахан эһээбэри абажа, гурбан хэмжүүрэй гурилтай худхажа эһэтэрынэ эдхэбэ».

Уйтахан үүдэн тухай

²²Иисус Иерусалим ошохо замдаа хото хүдөөгөөр ябажа, хүн зоной дунда хургаалаа номнобо.

²³Нэгэ хүн Иисуста хандажа: «Эзэн аа, абарагдаха хүнүүд үсөөн гэдэг үнэн гү?» – гэжэ асууба. Иисус тэрээндэ иигэжэ харюусаба:

²⁴«Бурханай хаан түрэдэ орохо хаалга уйтахан юм. Тэрээгээр орохоор зүдхэгты. Олохон хүн орохо гэжэ оролдоошые һаа, орожо шадахагүй бшуу.

²⁵Гэрэй эзэнэй бодожо үүдээ хаахадань, таанад газар тээнэ зогсон, үүдыень тоншожо: „Эзэн! Эзэн! Манда үүдээ нээгыш“, – гэжэ хэлэхэт. „Хаанахи зомта, би таанадые танинагүйб“, – гэжэ тэрэ танда харюусаха.

²⁶Тиихэдэнь таанад: „Тантай хамта бидэ эдеэлжэ, ундалжа байгаалди, та манай гудамжануудта хургаалаа номнодог бэлэйлта“, – гэжэ хэлэжэ эхилхэт.



²⁷ „Таанадые мэдэнэгүйб, хаанаһаа ерээ зомта. Намһаа холо бологты, таанад булта харата юумэ үйлэдэдэг уладта!“ – гэжэ тэрэ таанадта харюусаха.

²⁸Абраһам, Исаак, Яков болон бусад бүхы лүндэншэдэй Бурханай хаан орондо байхыень харахадаа, мүн өөһэдыетнай тиишэнь оруулангүй намнахада, таанад уйлаха бархиралдаха, шүдөө хабиралдахат.

²⁹Тиин дэлхэйн дүрбэн зүг, найман хизаарһаа хүнүүд ерэжэ, Бурханай хаан орондохи найрай шэрээдэ һууха.

³⁰Тиигэхэдэ мүнөө адагай захада байһан хүнүүд түрүү зэргэдэ гараха, мүнөө түрүү байһан хүнүүд адаг һүүлшын болохо», – гэжэ Иисус хэлэбэ.

Иисус Иерусалим хотынхидые хайрлана

³¹Энэ үедэ хэдэн фарисейнүүд Иисуста дүтэлжэ: «Энэ дороо эндэһээ гаража ошогты, таниие Ирод алахаяа түлэблэжэ байна бшуу», – гэжэ дуулгаба.

³²Тиихэдэнь Иисус иигэбэ: «Таанад ошожо: „Мүнөөдэр үглөөдэр хоёр би ада шүдхэрнүүдые үбшэнтэнэй бэеһээ зайлуулжа, эдэгээхэ ёһотойб, тиигээд нүгөөдэрынэ ажалаа дүүргэхэб гэнэ“, – гэжэ тэрэ мэхэшэ үнэгэндэ хэлэгты.

³³Зүгөөр би мүнөөдэршье, үглөөдэршье, нүгөөдэршье харгы замдаа ябахаб. Лүндэншэниие Иерусалимһаа ондоо тээ алаха ёһогүй юм даа.

³⁴Ай Иерусалим, Иерусалим, шинии хүнүүд лүндэншэдые аладаг, шамда эльгээһэн Бурханай мэдээсэгшэдые шулуудадаг! Даража дэгжээһэн дальбараануудаа дали дороо суглуулдаг шубуундал адляар шинии үри хүүгэдые суглуулха гэжэ би хэды тэгүүлээ зүдхөө гээшэбиб. Теэд ши намайе зүбшөөгөөгүйш.

³⁵Тиимэһээ хоһон хүмэшни мүнөө шамдаа үлөө. „Дээдын Эзэнэй нэрээр заларан Ерэгшэ үршөөл буянтай!“ – гэжэ хэлэтэрээ намайе дахин харахагүйш гэжэ шамда хэлэнэб».

Лука 14

Иисус үбшэнтэниие эдэгээбэ

¹Субботодо фарисейнүүдэй хүндэтэй нэгэ даргында хоол барихаяа Иисусай ерэхэдэ, фарисейнүүд хойноһоонь ажаглан хаража һуубад.

²Нэгэ хабанташаһан хүл гартай хүн орожо, урдань зогсобо.

³Хуули заадаг багшанарта болон фарисейнүүдтэ Иисус хандажа: «Манай Хуулийн ёһоор субботодо хүниие аргалжа болохо бэлэй гү, али үгы гү?» – гэжэ һураба.

⁴Тэдэнэр абья гарабагүй. Иисус үбшэнтэниие гараараа хүрөөд, эдэгээжэрхибэ.

⁵«Субботодо таанадай хэн нэгэнэйтнай хүбүүнэй гү, алишье сарай худаг руу унашоо һаань, субботошье һаань, тэрэ дороо татажа гаргаха бэшэ аалта?» – гэжэ Иисус тэдээндэ хэлэбэ.

⁶Тэдэнь тороод, юуншье гэжэ хэлэжэ шадабагүй.

Даруу номгон байха, айлшадые угтажа абаха тухай

⁷Уряалаар ерэнэн хүнүүдэй дээгүүр һуурида һуухыень хараад, Иисус иимэ һургаалта үгэ хөөрэбэ:

⁸«Шамайе хэн нэгэнэй түрэ найрта урихада, дан дээгүүр гаража бү һуу, юундэб гэхэдэ, уряалаар ерэнэн хүнүүдэй дунда шамһаа хүндэтэй хүн байжа болохо.

⁹Тиигээд шамайе болон тэрэ хүниие уриһан гэрэй эзэн ерээд: „Энэ һуурида тэрэниие һуулгыш даа“, – гэхэдээ болохо. Тиихэдэнь ши аягүйрхэхөөр адагай захын һуурида ошожо һуухаш.

¹⁰Уряалаар ошоходоо, эгээн һүүлшын һуурида һуудаг байгаарай. Тиихэдэшни шамайе уриһан эзэн хараад: „Хани нүхэрни, дээшээ гаража һуу“, – гэжэ урихадань, найрай зоной дунда ехэ хүндэтэй хүн гэжэ мэдэгдэхэш.

11 Ушарынъ юуб гэхэдэ, өөрыгөө дээгүүр абхуулһан хүн доошоо халиха, харин даруу доогуур хүн өөдөө үргэгдэхэ бшуу».

12 Гэртээ уриһан фарисейдэ Иисус иигэжэ хэлэбэ: «Үдын гү, али үдэшин хоол бэлдээд, хани нүхэдөө, аха дүүнэрээ, түрэл саданараа, баян хүршэнэрөө бү ури. Юуб гэхэдэ, тэдэшни хожомынъ шамайгаа урижа, харюу үгэхэ болоно.

13 Зүгөөр найрай шэрээ татахадаа, үгытэйшүүлые, үбшэн үлбэр, һохор дохолон хүнүүдые ури.

14 Тэдэ ядуу зон ашыеш харюулжа шадахагүй. Гэбэшье Бурхан шамда буюн хэшэгээ хайрлаха, тиигээд захяа заабариинь дүүргэжэ ябадаг хүнүүдээ амидыруулхадаа, шамайе шагналда хүртөөхэл».

Найрай шэрээ тухай нургаалта үгэ

15 Сугтаа хоол барижа байһан нэгэ хүн Иисусай хөөрөжэ байһые дуулаад: «Бурханай хаан орондо хоол бариха хүнүүд амар жаргалтай!» – гэжэ хэлэбэ.

16 Иисус тэрээндэ хэлэбэ: «Нэгэ хүн аргагүй томо найрай шэрээ заһаад, олон айлшадые уриба ха.

17 Шэрээдэ һууха сагай ерэхэдэ, уриһан айлшадтаа барлагаа эльгээжэ, „Хоол бэлэн болоо, морилжо хайрлагты“, – гэжэ захюулба гэхэ.

18 Урилгатай хүнүүдынъ булта хоорондоо хэлсэһэн юумэндэл, ерэхэ аргагүй байһандаа хүлисэл гуйжа: „Би газар худалдажа абаад, тэрэнээ ошожо хараагүйдэм аргагүй. Намайе хүлисэхыетнай гуйнаб“, – гэжэ нэгэниинь захюулба.

19 „Би табан паара сар худалдажа абаад, тэдэнээ ажаллуулжа туршахам, намайе хүлисэжэ хайрла“, – гэжэ нүгөөдэхинь захюулба.

20 „Би һаял һамга абааб, тиимэхээ ошожо шадахагүй байнаб“, – гэжэ гурбадахинь захюулба.

21 Барлагынъ ерэхэдээ, айлшадай ерэхэ аргагүй байһан тухай эзэндээ дуулгаба. Тиихэдэнь сухалаа хүрэхэн эзэн: „Түргэхэн хотын гудамжада

гараад, үгытэйшүүлэе, эрэмдэг үбшэнтэниие, хохор дохолон зониие дуудаж асара“, – гэжэ барлагтаа хэлэбэ.

²²„Эзэмни, хэлэһэн ёһоортнай хамаг юумэ хэбэб, теэд үшөөшье олон нуури сүлөө байна“, – гэжэ барлагын хэлэбэ.

²³„Ши хотоһоо гараад, харгыгаар ябаһан, хото хорёондоо байһан хүнүүдые аргадажа, гэрэймни дүүрэтэр зониие абажа ерэ.

²⁴Урялтай байһан хүнүүдэй хэнииньшье манайда хоол барихагүй!“ – гэжэ эзэниинь барлагтаа хэлэбэ».

Иисусай шаби болохын үнэ түлөөһэ

²⁵Иисустай хамта олон хүн ябаа һэн. Иисус тэдэ зондо хандажа, иигэжэ хэлэбэ:

²⁶«Намда ерэхэн хүнүүд эхэ эсэгэхээ, намга үхибүүдхээ, аха дүүнэрхээ, ами наһанһаа үлүү ехээр лэ намда дуратай һаа, шабинарни болохо аргатай.

²⁷Хэрээһээ үргэлөөд, намтай ябалсаагүй хүн минии шаби боложо шадахагүй.

²⁸Жэшэнь, таанадай хэн нэгэн үндэр гэр бариха һанаатай байбал, түрүүн нуугаад, хэды шэнээн гаргаша гаргахаб гэжэ тооложо үзөөд, барилгаяа дүүргэжэ шадаха үгы байһанаа бодогты.

²⁹Тиигээгүй һаа, нуурииень табяад, башниая саашань барижа дүүргэхэ шадалгүй байхыетнай хүн зон хараад:

³⁰„Шимнай барилга эхилээд, дүүргэжэ шадахагүй хүн байбалши“, – гэжэ энеэдэ наадан болгохо бшуу.

³¹Үгышье һаа, нэгэ хаан нүгөөдэ хаанда дайгаар орохынгоо урда тээ арбан мянган сэрэгтэйгээ добтолоо һаа, хори мянган сэрэгтэй дайсаниие диилэхэ гүб гэжэ уридшалан нуужа һайн бодохо бэшэ гү?

³²Хэрбээ диилэжэ шадахагүйгөө ойлгоо һаа, нүгөөдэдөө өөрынгөө элшэн һайдуудые эльгээжэ, эб найрамдал тухай гуйха болоно бшуу.



³³Энэ мэтээр таанадай хэнтнайш бии байһан хамаг юумэнһээ арсаагүй һаа, минии шаби боложо шадахагүй.

Хэрэггүй дабһан тухай

³⁴Дабһан болбол һайн юумэн гээшэ, зүгөөр дабһанай амтаяа гээгээ һаань, яжа дахин амтыень оруулха болоноб?

³⁵Тиимэ дабһан хэндэшье хэрэггүйл, угайдхадаа тэрээгээр газараашье үтэгжүүлхэгүйлши. Тэрэниие миил хаяжархихал! Шэхэтэй юм һаа, анхаран шагныта!»

Лука 15

Үгы болоһон хонин тухай

¹Нэгэтэ Иисусай һургаалыень шагнахаяа алба татаашад болон нүгэлтэн олоороо ерэбэ.

²«Иисус нүгэлтэнтэй нүхэрлэжэ, тэдэнээр хамта эдеэлжэ байнал», – гэжэ фарисейнүүд болон Хуули заадаг багшанар шоо үзэбэд.

³Тиимэхээ Иисус тэдэндэ нэгэ иимэ һургаалта үгэ хөөрөжэ үгэбэ:

⁴«Зуун хонитой аад, нэгэнэйнь үгы болошоходо, таанадай хэнтнай ерэн юһэн хониео хээрэ орхёод, үгы болоһон ганса хониео бэдэржэ ошохогүйб?

⁵Тэрээнээ олоходоо, тон ехээр баярлажа, ара нюргандаа үргэлөөд гэртээ асархалта.

⁶Тиин хани нүхэдөө, хүршэнэрөө суглуулаад: „Намтай хамта баярлагты. Би үгы болоһон хониео оложо асарбаб!“ – гэжэ хэлэхэлта.

⁷Тэрээн шэнги нүгэл хээгүй ерэ юһэн сэхэ сэбэр ябадалтан тушаа бэшэ, харин нүгэл хэгшэ нэгэ хүнэй Бурханда хандан, эрид хубилхые харахадаа, тэнгэридэ баяр баясхалан болохол гэжэ таанарта үнэниие хэлэнэб.

Үгы болоһон мүнгэн тухай



⁸Үгышые хаа, арбан сагаан мүнгэтэй нэгэ эхэнэр ганса сагаан мүнгээ үгы болгожорхёо хаа, дэнгээ носоожо, гэрээ хамажа, ехэл нарибшалан бэдэржэ олодог бэшэ аал?

⁹Мүнгээ олоһон эхэнэр хани басагадаа, хүршэ эхэнэрнүүдээ суглуулжа: „Намтай баярлалсагты, би үгы болоһон мүнгээ олооб“, – гэжэ хэлэхэл.

¹⁰Эгээл энээн шэнги нэгэшые хүнэй Бурханда хандабал, Бурханай Эльгээмэлнүүд баярлаха юм».

Төөриһэн хүбүүн тухай

¹¹Иисус саашань хэлэбэ: «Хоёр хүбүүтэй нэгэ хүн байгаа һэн ха.

¹²„Аба, минии хубита зөөри намда үгыш“, – гэжэ бага хүбүүниинь эсэгэдээ хэлэбэ гэлэй. Эсэгэнь гэр буусаяа хүбүүдтээ хубааба.

¹³Нэгэ хэды хоноод, бага хүбүүниинь хубита зөөриее абаад, холын газарта ошоожо, ехээр һэбхиржэ, зөөриее үрижэрхибэ.

¹⁴Зөөригүй болоод байхадань, тэрэ хари газартань ехэ үлэсхэлэн зуд боложо, үнөөхи хүбүүн ядарба.

¹⁵Тиигээд тэрэ ороной нэгэ хүнэйдэ ажалда ороходонь, гэрэй эзэн тэрэниие гахайгаа адуулуулхаар хээрэ тала руу эльгээгээ бэлэй.

¹⁶Гахайн эдее эдилсэжэ, гэдэһээ дүүргэхэ дуратай байхадань, тиимэшые эдее тэрээндэ хүн үгэдэггүй бэлэй.

¹⁷Хүбүүн ухаа орожо, досоогоо бодобо: „Түрэхэн эсэгымни хэды олон зарасанарай элбэг дэлбэг эдее хоолтой байхадань, би эндэ туража үхэхее байнаб.

¹⁸Эсэгэдээ ошоод: ‘Абамни, би Бурханай, мүн танайнгаа урда нүгэл үргэлбэб.

¹⁹Танай хүбүүн гэжэ нэрлэгдэхээр бэшэ муу амитанби. Зарасаяа зараһандаал намайе зарагты’, – гээд хэлэхэб“.



²⁰Тиигэхээр тэрэ хүбүүн удангүй эсэгэдээ бусажа ерэбэ. Эсэгэнь хүбүүгээ холоһоо хараад хайрлажа, урдаһаань гүйжэ ошоод, тэбэрин таалаба.

²¹„Абамни, би Бурханай, мүн танайгаа урда нүгэл үргэлбэб. Хүбүүнтнай гэжэ тоологдохо эрхэгүйб“, – гэжэ хүбүүнийнь хэлэбэ.

²²Эсэгэнь барлагуудтаа: «Түргэхэн эгээ һайн хубсаһа асараад, хүбүүндэм үмдэхүүлэгты, хургандань үнэтэ шулуутай бэһелиг зүүлэгты, хүлдэнь гутал үмдэхүүлэгты.

²³Тиигээд шахамал буруу асаржа гаргагты, найрлаха хүхихэбди.

²⁴Энэ хүбүүмни үхэшэһэн аад, амидыраа ха юм, үгы болошоһон аад, олдоо ха юм“, – гэбэ. Тиигээд лэ хүбүүнэйнгээ бусажа ерэһые тэмдэглэн, хүхижэ сэнгэжэ эхилбэ.

²⁵Тэрэ үедэ ехэ хүбүүнийнь хээрэ ажал хэжэ байгаа. Гэртээ бусажа ерэхэдээ, хүгжэм хатарай хүнхинэжэ байһые дуулаба.

²⁶Тиигээд нэгэ зарасаяа дуудажэ: „Энэмнай юун боложо байнаб?“ – гэжэ һураба.

²⁷„Дүү хүбүүншни бусажа ерээ, тиимэхээ эсэгэшни хүбүүнэйнгээ амиды мэндэ ерэхэндэ баярлан, шахамал буруугаа гаргаа“, – гэжэ зарасань харюусаба.

²⁸Ахань сухалаа хүрэжэ, гэртээ оробогүй. Эсэгэнь гаража, тэрэнээ аргадаба.

²⁹Ехэ хүбүүнийнь эсэгэдээ иигэбэ: „Би хэды олон жэл шамда барлаг шэнги ажал хээ гээшэбиб, захяа заабариһааш нэгэтэш гаража үзөөгүйб. Ши адагай захын эшэгэшье гаргажа, хани нүхэдөөрни найрлуулаагүйш.

³⁰Харин энэ хүбүүнэйнгээ янхан һамгадаар орёолдожо, үгэхэн зөөриеш үрээд ерэхэдэнь, ши шахамал буруугаа гаргажа угтааш“.

³¹Тиихэдэнь эсэгэнь ехэ хүбүүндээ: „Хүбүүмни, ши ходо намтаяа эндээ байна ха юмши, минии бүхы зөөри шинии ха юм.

³²Харин дүү хүбүүншни үхэхэн аад лэ, амидыржа, үгы болоһон аад лэ, олдожо ерээ бшуу. Тиимэхээ бидэ баярлаха, сэнгэхэ ёһотой ха юмбди“, – гэжэ хэлэбэ».

Лука 16

Һэшхэлгүй эрхилэгшэ тухай

¹Өөрынгөө шабинарта Иисус иимэ юумэ хөөрэбэ: «Нэгэ баян хүн гэрэй хэрэг эрхилэгшэтэй байгаа һэн ха. Зөөриешни ехээр үрижэ байна гэжэ тэрэ эзэндэ эрхилэгшэ тухайнь хүнүүд дуулгаба гэхэ.

²Гэрэй эзэн эрхилэгшээ дуудаад: „Шам тухай юун гэнэб? Эрхилжэ байһан ажал хэрэг тухайгаа бүрин тоосоо хэ, саашадаа шамайе эрхилэгшын тушаалһааши халаахаб“, – гэбэ.

³Тэрэ эрхилэгшэ өөртөө: „Яахамни гээшэб? Эзэмни ажалһаамни халааха гэжэ байнал. Хүрзөөр газар малтаха аргамгүй, гуйраншалхам эшхэбтэр.

⁴Зай, юу хэхээ би мэдэнэб! Ажалһаа халагдаһан хойноо гэртээ дууджа ажаллуулха нүхэдтэй яажа болохоёо мэдэнэб“, – гэбэ.

⁵Тиигээд эзэндэнь үритэй хүнүүдые ганса гансаарнь дуудаад: „Минии эзэндэ ши хэдые үритэйбши?“ – гэжэ түрүүшынхиһэнь һураба.

⁶„Зуун торхо ургамалай тоһо“, – гэжэ тэрэнь харюусаба. „Энэ үри тухай саарһаяа абаад, табиие үритэйб гэжэ шэнээр бэшэ“, – гэжэ эрхилэгшэ хэлэбэ.

⁷Нүгөө үритэй хүндэ хандажа: „Ши хэдые үритэйбши?“ – гэбэ. „Мянган мэшээг шэниисэ“, – гэжэ тэрэнь харюусаба. „Тэрэ саарһаяа абаад, найман зууе үритэйб гэжэ шэнээр бэшэ“, – гэжэ эрхилэгшэ хэлэбэ.



⁸Һүүлэй һүүлдэ эзэниинь һэшхэлгүй эрхилэгшээ арга мэхэтэй ябадал гаргабаш гэжэ магтаба. Юундэб гэхэдэ, энэ оршолонгой зон гэрэл туяагай зондо ороходоо арга хурга ехэтэй байдаг бшуу.

⁹Харин таанадта, шабинарни, би хэлэхэ байнаб: энэ дэлхэйдэхи зөөри баялигаараа өөһэдтөө нүхэдые оложо байгты. Тиигэбэл хооһорон наһа барахадатнай, таанадые диваажанай орондо угтажа абаха.

¹⁰Багахан юумэндэ үнэн сэхэ хүн, ехэшье юумэндэ үнэн сэхэ байдаг, харин багахан юумэндэ мэхэ гаргаһан хүн ехэшье юумэндэ мэхэшэн зандаа байдаг.

¹¹Тиимэһээ хэрбээ таанадай энэ дэлхэйн эд зөөриие эрхилхэдээ үнэн сэхэ бэшэ байбалтнай, хэн танда бодото баялигы даалгахаб даа?

¹²Тиин хэрбээ хүнэй юумэндэ үнэн сэхэ хандажа шадаагүй һаатнай, хэн танда өөрынхийетнай даалгажа үгэхэб даа?

¹³Ямаршье зараса хоёр эзэндэ зарагдажа шадахагүй: нэгэн гэбэл, таанад нэгэ эзэндэ дурагүй, нүгөөдэдөө дуратай байхалта; али үгышье һаа, нэгэ эзэндэ дуратайгаар, нүгөөдэдөө дурагүйгөөр ажаллаха бшуут. Таанад Бурханда болон эд зөөридэ нэгэ зэргэ алба хэжэ шадахагүйлта!»

Баян байнхаар Бурханай захяа заабари дүүргэжэ байхань бүри шухала юм

¹⁴Энэ хэлээшыень фарисейнүүд дуулаба. Тэдэ алта мүнгэндэ ехэл дуратай хадаа Иисусые наада бариба.

¹⁵Иисус тэдэндэ хэлэбэ: «Таанад зоной урда Бурханай захяа заабари дүүргэдэг хэбэр үзүүлдэгта, харин Бурхан танай досоохиие нэбтэ хаража байна. Хүнүүдэй ехэ шухала гэжэ тоолодог юумэнүүд Бурханай урда юуншье бэшэ ха юм.

¹⁶Уһаар арюудхагша Иоаннай ерэтэр Моисейн Хуули болон лүндэншэдэй номууд хүсэн түгэлдэр байгаа, гэбэшье мүнөө Бурханай



хаан түрэ тухай мэдээсэлэй айладхагдаһанһаа хойшо, хүн бүхэн тишэ орохо гэжэ нилээд хүсэ шармай гаргана.

¹⁷Газар тэнгэри хоёр амархан хүнэхэ, харин Хуулиин гансаханшые зүйл хосорхогүй.

¹⁸Һамганһаа халаад, ондоо эхэнэртэй һууһан хүн түрүүшынгээ һамганда урбаба гээшэ. Мүн үбгэнһөө халаһан эхэнэрээр һамга хэһэн хүн баһал түрүүшынгээ нүхэртэ урбаба гээшэ.

Лазарь болон баян хүн тухай

¹⁹Нэгэ баян хүн байгаа гэхэ. Магнал торгон хубсаһа үмдэдэг, мүн үдэр бүхэндэ ялагар тологор найр зугаа хэдэг байгаа.

²⁰Яра түүхэйдэ барюулшанхай Лазарь гэжэ нэгэ ядуу гуйраншые баянай хаалгынъ хажууда асардаг бэлэй.

²¹Тэрэ гуйранша баянай эдеэнэй үлөөдэһөөр хоолойгоо тэжээхэ дуратай байгаа. Нохойнуудшые ерэжэ, тэрэнэй яра шархые долёодог һэн.

²²Тииһээр байтар тэрэ үгытэй баарһан үхэбэ гэхэ. Бурханай Эльгээмэлнүүд тэрэниие тэнгэридэ абаашажа, Абраһамай хажууда һуулгаба ха. Мүнөөхи баяншые наһанһаа нүгшэжэ, тэрэниие хүдөөлүүлээ һэн.

²³Тэрэ баян тамын оёорто хаягдаад зобожо байхадаа, дээшээ хаража, Абраһамые, мүн хажуудань Лазариие холоһоо анхарба.

²⁴„Ай, Абраһам, үбгэ эсэгэмни, намайе үршөөн хайрлажа, Лазариие намда эльгээгьт; хурганайнгаа үзүүртэ уһа дүрэжэ, халуун галда хайруулан тулижа байһан минии хэлые норгог лэ. Би энэ гал соо аргагүй ехээр тулижа байнаб“, – гэжэ тамада һууһан баяниинь бии шадалаараа хашхарба.

²⁵„Хүүгэмни, наһан соогоо хамаг баяр жаргал эдлэһэнээ, харин Лазариин хара муу байдал үзэһыень һаныш. Мүнөө тэрэшни эндэ амаруулагдаба, харин ши зоболон эдлэжэ байнаш.

²⁶Гэбэ яабашье эндэһээ шамда ошохо гэгшэдэй хүрэхын аргагүй, тэндэһээ манда ерэхэ гэгшэдэй ерэхын аргагүй оёоргүй гүнзэгы ганга жалга хоорондомнай байна“, – гэжэ Абраһам хэлэбэ.

²⁷Тиихэдэнь тамын амитан: „Тиигэбэл Абраһам, үбгэ эсэгэмни, та Лазарие абындамни эльгээжэ хайрлыг даа.

²⁸Тэндэмни табан дүүмни үлэхэн юм: тэдэнииемни нам шэнги тамын газарта орохогүйень һэргылэг лэ“, – гэбэ.

²⁹Тиихэдэнь: „Дүүнэртэшни Моисейн болон лүндэншэдэй һэргылэмжэ бии ха юм: тэдэнэйнгээ хэлэһые дүүнэршни дуулажа байг лэ“, – гэжэ Абраһам хэлэбэ.

³⁰„Угы даа, Абраһам, үбгэ эсэгэмни, наһанһаа нүгшэхэн хүнэй дүүнэртэм ошоо һаань, тэдэнэр Бурхандаа хандан, хубилха байгаа“, – гэжэ тамада байгша баяниинь хэлэбэ.

³¹„Моисейн болон лүндэншэдэй заабарие анхардаггүй юм һаа, нүгшэхэн хүнэй амидыржа ошоошье һаань, тэдэшни үнэншэхэ этигэхэгүй байна даа“, – гэжэ Абраһам тэрээндэ хэлэбэ».

Лука 17

Нүгэл хилэнсэг тухай

¹Иисус шабинартаа хэлэбэ: «Хүнэй хорхойтожо, нүгэл хэхэ юумэн олон байдаг. Зүгөөр нүгэл хүүлэгшэ уй гашуудал үзэхэ!

²Эдэ багашуулай нэгыеньшье нүгэл хилэнсэдэ түлхихэн хүндэ хүзүүндээ тээрмын шулуу уюулаад, далайн оёорто хаюулбалнь, өөртэнь дээрэ байха һэн.

³Тиимэхээ өөрыгөө анхаржа байгты! Хэрбээ аха дүүнэрэйшни нэгэн шамда муу юумэ хээ һаань, тэрээнээ буруушаа; хэрбээ зэмээ мэдэрээ һаань, хүлисэ.

⁴Үдэртөө долоо дахин шамда муу юумэ хээд, долоо дахин ерэхэ: „Зэмэтэйб, хүлисэ“, – гээ һаань, тэрээнээ хүлисэ».

Этигэл хүзэг тухай

⁵«Эзэн аа, манай этигэл хүзэгийг ехэ болгожо үгыт даа!» – гэжэ Иисусай элшэнэр хэлэбэ.

⁶Иисус харюусаба: «Хэрбээ таанад горчицын жэжэхэн үрэнэнэй шэнээхэншые этигэлтэй байгаад, боди модондо хандажа: „Үндэһөөрөө газарһаа хугаржа, далай соо хуурижан урга!“ – гээ хаатнай, тэрэ модон үгыетнай дуулаха.

Зарасын дүүргэхэ үүргэ тухай

⁷Жэшээн, газар хахалдаг гү, али мал адуулдаг барлагтай байгаад, тэрэнэйнгээ хээрэнээ ерэхэдэ: „Наашаа хуужа үтэр хоол бари!“ – гэжэ таанарай хэн нэгэнтнай хэлэхэ аал?

⁸Үгыл даа! Тиихынгээ орондо: „Намда эдээ хоол бэлдэ. Эдээлжэ байхадамни, захиралтануудыемни дүүргэхэдэ бэлэн бай. Намайе эдээлүүлһэнэй удаа өөрөө эдихэ уухаш!“ – гэжэ барлагтаа хэлэхэ бэшэ гүт?

⁹Тиигээд бүхы заабаринуудые дүүргэнэйнгөө түлөө тэрэ барлаг баяр баясхалангай үгэнүүдые дуулаха аал?

¹⁰Тэрээн шэнги таанадшые Бурханай заабари дүүргээд: „Бидэ миил барлагууд гээшэбди, хэхэл ёһотой юумээ хээбди“, – гэжэ хэлэхэ ёһотойт!»

Иисус арбан хүниие эдэгэбэ

¹¹Иерусалим хото ошожо ябахадаа, Иисус Самари Галилей хоёрой хилэ зубшан ябаба.

¹²Нэгэ тосхондо ороходонь, хэлхэ бузар үбшэндэ дайруулһан арбан хүн Иисустай уулзаба. Тээ холохон байгаад:

¹³«Иисус багша аа! Маниие абаржа хайрлыт даа!» – гэжэ шангаар хашхаралдаба.

¹⁴Тэдэниие хараад: «Таанад ошожо, санаартанда элүүр мэндээ үзүүлэгты!» – гэжэ Иисус хэлэбэ. Тэдэнь замдаа ябатараа эдэгэшэбэ.



¹⁵Нэгэнийн эдэгэнэнэ гэнтэ мэдээд, шанга гэгшээр Бурханай нэрэ алдаршуулан, һөөргөө бусаба.

¹⁶Тиигээд Иисусай хүлдэ мүргэн унажа, баяр баясхалан хүргэбэ. Тэрэ самаряан хүн байгаа.

¹⁷«Арбан хүн эдэгээ бэшэ гүт? Бэшэ юһэншни хаанаб?

¹⁸Бурханда магтаал соло дуудахаяа энэ самаряанһаа ондоо нэгэшье хүн бусажа ерээгүй гэшэ гү?» – гэжэ Иисус хураба.

¹⁹Тиигээд нүгөө эдэгэнэн хүндөө: «Хүл дээрээ бодожо, гэртээ хари! Этигэлшни шамайе абараа!» – гэжэ Иисус хэлэбэ.

Бурханай хаан түрэ ойро байна

²⁰«Бурханай хаан орон хэзээ манда морилхоб?» – гэжэ фарисейнүүдэй асуухада, Иисус иигэжэ харюусаба: «Бурханай хаан орон эли харагдаһаар ерэхгүй.

²¹„Эндэ байна, тэндэ байна“, – гэжэ хүнүүд хэлэхэгүй. Юундэб гэхэдэ, Бурханай хаан түрэ зосоотнай оршоно бшуу».

²²Иисус шабинартаа хэлэбэ: «Хүн түрэлхитэнэй Хүбүүнэй нэгэшье үдэрые хараһайб гэжэ хүсэхэ саг мэнэ гэхээр ерэхэ, теэд харахагүйт.

²³„Тэндэ байна, эндэ байна“, – гэжэ зарим зоной хэлэхэдэнь, таанад бү ошооройгты, бү бэдэрээрэйгты.

²⁴Хүн түрэлхитэнэй Хүбүүн ерэхэдэ, тэнгэрийн нэгэ хизаарһаа нүгөө хизаар хүрэтэр ялагас гэнэн сахилгаан шэнгээр гэрэлтэн үзэгдэхэ бшуу.

²⁵Теэд түрүүн тэрэ ехэл зоболон амсаха, оршон үеын зон тэрээнһээ арсаха.

²⁶Хүн түрэлхитэнэй Хүбүүнэй заларан ерэхэ тэрэ үдэрнүүдтэ Ной гэгшын үедэ болоһонтой адли гай гасалан ушарха:

²⁷Нойн томо корабльда орожо һууха үдэр хүрэтэр хүнүүд эдеэлжэ, уужа, һамга абажа, хадамда гаража байгаа. Харин тиигэжэ байтар галаб эрьежэ, уһан аюул болоод, амитай юумэн хуу хосороо һэн.

²⁸Эгээл тиимэ юумэн баһа Лот гэгшын үедэ болоо агша һэн: хүнүүд эдеэлжэ, ундалжа, юумэ худалдан абажа, наймаа хэжэ, таряа, жэмэс тарижа, гэр бараагаа барижа байгаа,

²⁹тиихэдэ Лот гэгшын Содом хотоһоо гараһан үдэр тэнгэриһээ хүхэр бороо орожо, гал дүлэн боложо, хамаг амитай юумые шатаагаа бэлэй.

³⁰Хүн түрэлхитэнэй Хүбүүнэй газарта бууха үдэр эгээл тиимэ юумэн болохо!

³¹Тэрэ үдэр гэрэй орой дээрэ байһан хүн хогшол зөөриез абарха гэжэ гэртээ орохо ёһогүй; мүн хээрэ талада ябаһан хүн һөөргөө гэртээ бусаха ёһогүй.

³²Лотой һамгые һанагты!

³³Ами наһаяа абарха гэжэ оролдоһон хүн ами наһаяа алдаха, ами наһаяа үргэһэн хүн тэрэнээ тэхэрюулэн абарха.

³⁴Тэрэ үдэр нэгэ орон дээрэ унтаһан хоёр хүнэй нэгыень абарха, нүгөөдыень орхихо.

³⁵Таряа татажа байһан хоёр эхэнэрэй нэгыень абарха, нүгөөдыень орхихо».

³⁷«Багша аа! Иимэ юумэн хаана болохоб?» – гэжэ шабинарын Иисусаа һураба. «Үхэһэн бэеын хэбтэһэн газарта бүргэд шубууд сугларха», – гэжэ Иисус харюусаба.

Лука 18

Бэлбэһэн эхэнэр болон зарга шиидхэгшэ тухай һургаалта үгэ

¹Һанаа үнөөндөө дарагдаһанай хэрэггүй, саг үргэлжэ Бурхандаа зальбаржа ябаха ёһотой гэжэ ойлгуулхын тула Иисус иимэ һургаалта үгэ шабинартаа хөөрэбэ:

²«Нэгэ хотодо зарга шиидхэгшэ ажаһуугаа һэн ха. Тэрэ Бурханһашье айдаггүй, хүнүүдһэшье эшэдэг гайхадаггүй бэлэй.



³Тус хотын нэгэ бэлбэһэн эхэнэр тэрэ заргашада ерэжэ: „Намда туһалыт, заргыемни зүбөөр шиидхэжэ үгыт!“ – гэдэг гэлэй.

⁴Заргаша туһалха дурагүй байжа, нилээд удаан саг үнгэргэбэ. „Би Бурханһааш айдаггүйб, хүнһөөшье эшэдэг гайхадаггүйб.

⁵Зүгөөр намайе энэ эхэнэрэй ходол хашараажа байхагүйнь тула туһалха болоо хаб. Тиигээгүй хаамни, энэшни бүри голдомни орохол!“ – гэжэ һүүлэй һүүлдэ бодобо.

⁶Хуурмаг заргашын хэлээшые хаража бодожо үзыт.

⁷Тэрэнэй тиигэжэ байхадань, Бурхан шэлэжэ абаһан зонойгоо үдэр хүнигүй туһаламжа гуйхадань, бүришье һайнаар харгалзаха хамгаалха бэшэ гү? Тэдэндээ анхаралаа табиха бэшэ гү?

⁸Бурхан тэдэнэй хэрэгүүдые үнэн зүб руунь түргөөр шиидхэн туһалха гэжэ танда хэлэнэб. Теэд Хүн түрэлхитэнэй Хүбүүнэй ерэхэдэ, газар дээрэ тиимэ хүзэгтэй хүн байха гү?»

Фарисей ба алба татааша тухай хургаалта үгэ

⁹Өөһэд тухайгаа Бурханай эрхэ мэдэлые дүүргэнэбди гэжэ тоолоод, бусадые доромжолдог зарим хүнүүдтэ Иисус иимэ хургаалта үгэ хөөрэбэ:

¹⁰«Хоёр хүн мүргэхээ Бурхан хүмэдэ оробо ха. Нэгэниинь фарисей, нүгөөдэхинь алба татааша байгаа.

¹¹Фарисейнь аман соогоо иигэжэ зальбарба: „Бурхан, шамда ехэ баяр баясхалан хүргэнэб! Би болбол эд зөөридэ шуналтай, хуурмаг, забхай зальхай бусад зондо адли бэшэб, мүн тээ тэндэ зогсоһон алба татаашадашье адли бэшэб.

¹²Долоон хоногтоо хоёр дахин масагладагби, олзынгоо арбанай нэгэ хубиине шамдаа үргэдэгби“.



¹³Харин тээ холохоно зогсоһон алба татаашань нюдээ тэнгэри өөдө шэглүүлхээшье зүрхэлбэгүй, харин үбсүүгээ шаажа байгаад: „Бурхан, нүгэлтэ намайе үршөөн хайрлыг!“ – гэжэ зальбарба.

¹⁴Алба татааша фарисей хоёрой гэртээ харихадань, Бурхан тэдэ хоёрһоо алба татаашыень үнэн сэдхэлтэнэй тоодо оруулаа гэжэ танда хэлэхэ байнаб. Өөрыгөө дээгүүр абхуулдаг хүн доошолуулагдаха, харин өөрыгөө доошонь дарадаг зантай хүн үргэгдэхэ бшуу».

Иисус үхибүүдые адистаа хүртөөнэ

¹⁵Хүнүүд үхибүүдээ адиста хүртүүлхээ Иисуста асарба. Шабинарын тэдэниие хараад, багшадаа ойртуулбагүй.

¹⁶Харин Иисус үхибүүдые өөртөө дуудаж, шабинартаа хэлэбэ: «Үхибүүдые наашань табигты, намда ерэхэдэнь һаалта бү хэгты. Иимэшүүл Бурханай хаан ороной амитад гээшэ.

¹⁷Эдэ үхибүүд мэтээр Бурханай хаан ороние тогтоон абаагүй хүн тэндэ хээээшье орожо шадахагүй юм гэжэ баталан хэлэнэб».

Баян, мүн үнэтэй сэнтэй хүн

¹⁸«Эрхим багша! Мүнхын амидаралда хүртэхын тула би юу хэхэ ёһотойбиб?» – гэжэ нэгэ дарга Иисусаа һураба.

¹⁹Иисус тэрээндэ хэлэбэ: «Юундэ намайе эрхим гэбэш? Имагтал Бурхан эрхим гээшэ.

²⁰„Ханидаа бү урба, бү ала, хулгай бү хэ, бусад тухай худал юумэ бү хэлэ, эхэ эсэгээ хүндэлэ“ гэнэн Бурханай захяа заабаринуудые мэдэхэ ха юмши», – гэбэ.

²¹«Эдэ захяа заабаринуудые бултыень би эдир наһанһаа сахижа ябадаг хүнби», – гэжэ нүгөөдэхинь харюусаба.

²²Энэ харюуень дуулаад, Иисус тэрээндэ хэлэбэ: «Үшөөл нэгэ юумэн шамда дутана: зөөри зөөшээ бултыень худалдаад, мүнгыень үгытэйшүүлдэ хубаажа үгэ, тиигээ һаа, тэнгэри дээрэ баялиг зөөритэй болохош. Тиигээд намда ерэжэ, хажуудамни ябаарай».



²³Иисусай хэлэһые дуулаад, нүгөөдэхинь ехэ ханаата болобо, юундэб гэхэдэ, ехэ баян хүн байгаа бшуу.

²⁴Тэрэнэй гашуудал ойлгоод, Иисус хэлэбэ: «Баян хүнүүдэй Бурханай хаан орондо орохонь бэрхэтэйл байха даа.

²⁵Баян хүнэй Бурханай хаан орондо орохоһоонь бэлээр зүүнэй хүбөөр тэмээн ороод гарахал».

²⁶«Тиигэхэдээ хэн абарагдаха аргатайб?» – гэжэ шагнажа байгшад Иисусаа асууба.

²⁷«Хүнэй хэжэ шадахагүй юумэ Бурхан хэжэ шададаг», – гэжэ Иисус харюусаба.

²⁸«Харин бидэ яхабибди? Бидэ хамаг юумээе орхёод, шамайе дахаабди», – гэжэ Пётр хэлэбэ.

²⁹«Тиимэ даа, Бурханай хаан орондо орохын тула гэр бараагаа, аба эжыгээ, аха дүүнэрээ гү, эгэшэ дүүнэрээ гү, хамга үхибүүдээ гү орхиһон хүн бүхэн

³⁰энэ наһандаа хэдэ дахин ехэ юумэндэ хүртэхэ, ерээдүйн үедэ мүнхэ наһа наһалха гэжэ үнэниие хэлэнэб», – гэжэ Иисус харюусаба.

Иисус үхэхэ тухайгаа гурбадахияа хэлэнэ

³¹Арбан хоёр ойрын шабинараа хажуу тээшэнь абаашаад, Иисус иигэжэ хэлэбэ: «Мүнөө бидэ Иерусалим орохоннай. Эндэ Хүн түрэлхитэнэй Хүбүүн тухай лүндэншэдэй бэшэһэн бүхы хэрэгүүд бээлхэ.

³²Хүн түрэлхитэнэй Хүбүүниие хариин зоной гарта тушааха, тэдэнь тэрэниие баһаха, доромжолхо, нёлбохо,

³³үшөө сохихо, хожомын алаха байна. Зүгөөр Хүбүүн гурбадахи үдэртөө амидырха».

³⁴Шабинанын хэлээшыень оройдоо ойлгобогүй. Угынь удха орёо далда байжа, юуншые тухай багшынгаа хэлэһыень ойлгожо шадабагүй.

Иисус нохор гуйраншые эдэгээбэ



³⁵Иисусай Иерихондо дүтэлхэдэнь, харгын хажууда нэгэ хохор хүн гуйраншалжа нууба.

³⁶Хажуугаарнь хүнүүдэй ябахые дуулаад: «Энэ юун зон бэ?» – гэжэ нураба.

³⁷«Назаредэй Иисус ябана», – гэжэ тэрээндэ дуулгаба.

³⁸Тиихэдэнь хохор хүн: «Давидай үри надаһан Иисус, намайе үршөөжэ хайрлыш!» – гэжэ хашхарба.

³⁹Иисусай урда ябаһан хүнүүд абяагүй боло гэжэ тэрэ хохорые зандарба, теэд тэрэнь: «Давидай үри надаһан Иисус, намайе үршөөжэ хайрлыш!» – гэжэ бүри шангаар хашхарба.

⁴⁰Тиихэдэнь Иисус тогтожо: «Тэрэниие намда асарагты!» – гэбэ. Тэрэ хохорой Иисусай ойро ерэхэдэнь:

⁴¹«Шамда юу хэжэ туһалхабиб?» – гэжэ Иисус асууба. «Ай, эзэн! Намайе харадаг болгыш даа!» – гэжэ тэрэ гуйгаа хаш.

⁴²«Хара даа! Этигэлшни шамайе элүүр мэндэ болгобо», – гэжэ Иисус тэрээндэ хэлэбэ.

⁴³хохор хүниинь тэрэ дороо харадаг боложо, Бурханиие алдаршуулан, Иисусай хойноһоо ябалсаба. хохор хүнэй хараатай болохые хараһан бүхы хүн зон Бурханиие магтан алдаршуулба.

Лука 19

Иисус Закхей хоёр

¹Иисус Иерихон хото ороод, гудамжаар ябаа.

²Тэрэ хотодо алба татагшадай дарга Закхей гэжэ ехэ баян хүн байгаа һэн ха.

³Тэрэ Иисусые хэн юм ааб гэжэ харахаяа ехэтэ хүсэжэ, набтар бээтэй байһан дээрэһээ хүн зоной араһаа яашье хаража ядаба.



⁴Закхей баян гүйдэлөөр зоной урда ороод, халаархуу модондо абиржа гараба. Иисус энэ харгыгаар лэ хажуугаарнь гараха байгаа.

⁵Иисус хажуугаарнь үнгэрхэдөө, өөдөө хаража: «Закхей, модонһоо түргөөр буу! Би мүнөө танайда орохо ёһотойб», – гэбэ.

⁶Закхей тэрэ дороо модонһоо буужа, ехэл баяртайгаар Иисусые гэртээ оруулжа хүндэлбэ.

⁷Тиихэдэнь хүн зон булта: «Иисус нүгэлтэй хүнэйдэ орожо айлшалхань гээшэ гү?» – гэжэ дураа гутаба.

⁸«Эзэн аа! Би хахад зөөриее үгытэйшүүлдэ хубаажа үгэхэм. Хэрбээ зарим хүнүүдһээ татари буруу нэхэжэ абаһан байгаа хаа, тэрэнээ дүрбэ нугалан бусаахаб», – гэжэ Закхей Иисусай урда зогсон хэлэбэ.

⁹«Шишье Абраһамай жэнхэни үри һадаһан байнаш. Мүнөөдэр шинии гэр бүлэ абарагдаба.

¹⁰Хүн түрэлхитэнэй Хүбүүн хосорһон хүнүүдые бэдэржэ абархын тула ерээ юм», – гэжэ Иисус тэрээндэ хэлэбэ.

Арбан зараса тухай нургаалта үгэ

¹¹Хүн зоной хэлэһыень шагнажа байхада Иисус үшөө нэгэ нургаалта үгэ хөөрэбэ. Тэрэ Иерусалимда дүтэ ерэшэнхэй байгаа, тиимэһээ хүнүүд Бурханай хаан түрэ һаядаа оршохо гэжэ һанажа байгаа һэн.

¹²Иисус хөөрэбэ: «Нэгэ дээгүүр уг изагууртан хаан шэрээ эзэлхэ эрхэдэ хүртэжэ ерэхын тулада холын орон худар мордобо ха.

¹³Ябаха дээрээ арбан барлагуудаа дуудаад, хүн бүхэндэнь мүнгэ үгэжэ: „Минии бусажа ерэтэр энэение мүнгэнэй эрьесэдэ оруулжа байгаарайгты“, – гээ һэн.

¹⁴Харин албата зонинь тэрэение үзэн ядадаг ушарһаа: „Энэ хүниие дээрээ хаан болгожо табиха дурагүйбди“, – гэжэ хэлэһыень элшэн сайдые хойноһоонь эльгээбэ гэхэ.

¹⁵Хаан шэрээ эзэлхэ эрхэтэй болоһон хаан бусажа ерэнээр мүнгэ үгэнэн барлагуудаа дуудаж, хэн хэды шэнээн олзо олооб гэжэ һонирхобо.

¹⁶Түрүүшынь барлаг ерэжэ: „Эзэмни, үгэнэн мүнгыешни арба дахин ехэ болгооб“, – гэжэ хэлэбэ.

¹⁷„Һайнаар ашаглабаш, бэрхэ барлаг байнаш. Багахан юумэндэ үнэн сэхэ байһанайш түлөө шамайе арбан хотын захирагшаар табинаб“, – гэжэ эзэн хаан хэлэбэ.

¹⁸Хоёрдохи барлагынь ерэжэ: „Эзэмни, үгэнэн мүнгыешни таба дахин ехэ болгооб“, – гэбэ.

¹⁹„Ши табан хото зонхилжо байхаш“, – гэжэ эзэниинь хэлэбэ.

²⁰Удаадахи барлагынь ерэжэ: „Эзэмни, шинии үгэнэн энэ мүнгэ бүдтэ орёогоод, наринаар хадагалжа байгааб.

²¹Шэрүүн хүн хадашни шамһаа айгааб. Ши өөрын бэшэ юумэ абадаг, өөрөө таряагүй ургаса хададаг ха юмши“, – гэжэ хэлэбэ.

²²Эзэниинь тэрэндэ хэлэбэ: „Хара мэхэтэй барлаг, хэлэнэн үгыншни ёһоор шамайе хэнээхэб! Өөрын бэшэ юумэ абадаг, өөрөө таряагүй ургаса хададаг шэрүүн хүн гэжэ намайе мэдэжэ байгааш.

²³Үгэнэн мүнгыем юундэ эрьесэдэ оруулаагүйбши? Тиигэбэл би бусажа ерэхэдээ мүнгээ түрсэтэйгөөр абаха бэлэйб“.

²⁴Тиигээд хажуудань байһан зондо хандажа: „Энээнһээ мүнгыень абаад, арба дахин ехэ болгоһон хүндэ үгэгты“, – гэбэ.

²⁵„Эзэмнай, теэд тэрэтнай ехэ мүнгэтэйл“, – гэжэ тэдэн хэлэбэ.

²⁶„Юумэтэй хүндэ үшөө ехэ юумэн үгтэхэ. Юумэгүй байһан хүнһөө һүүлшын юумэниинь абтаха гэжэ танда хэлэнэб.

²⁷Намайе хаан болгохо дурагүй байһан дайсадыемни асаржа, хараһаар байтарни хюдажа алагты“, – гэжэ эзэн хэлэбэ».

Иисус Иерусалим хото ороно

²⁸Һургаалта үгэнүүдээ хөөрөөд, Иисус саашаа, Иерусалим тээшэ ябаба.



²⁹Элеон хадын хаяада оршодог Беттагэ ба Бетани тосхонуудта дүтэлөөд, тэрэ хоёр шабияа түрүүлэн эльгээжэ:

³⁰«Урдамнай байгааша тосхон ошоод, тэрэнэй захада хүн амитанай оройдоо унаагүй нэгэ элжэгэнэй уяатай байхые харахат. Тэрэниие уяаһаань тайлаад, наашань хүтэлжэ асарагты.

³¹Хэрбээ хэн нэгэнэй: „Юундэ уяаһаань тайланабта?“ – гэжэ һураа һаань: „Энэ элжэгэн Эзэндэ хэрэгтэй болоо“, – гэжэ хэлээрэйгты», – гэжэ Иисус захиба.

³²Шабинарынь ошоод, багшынгаа хэлэһэнэй ёһоор тэрэ элжэгэ олобо.

³³Тэрэниие сэргэһэнь тайлажа байхадань: «Таанад юундэ энэ элжэгэ сэргэһэнь тайланабта?» – гэжэ эзэниинь һураба ха.

³⁴«Манай эзэндэ хэрэгтэй болоо», – гэжэ шабинарынь харюусаба.

³⁵Тиигээд тэрэ элжэгэ Иисуста асаржа, нюрган дээрэнь хубсаһаяа дэбдээд, багшаяа унуулба.

³⁶Иисусай элжэгэ унаад ябахада, хүн зон ябаха харгы дээрэнь хубсаһаяа дэбдибэ.

³⁷Иисусай Элеон хадаһаа бууха замдаа ябахадань, олон тоото шабинарынь булта харуулһан, үзэһэн гайхалтай хэрэгүүдэй түлөө Бурхан багшадаа магтаал соло дуудаба:

³⁸«Дээдын Эзэнэй нэрээр заларан ерэһэн Хаан үршөөл хайратай байһай! Тэнгэридэ амгалан байдал оршоһой, Бурханай алдаршахань болтогой!» – гэжэ шанга шангаар хашхаралдаба.

³⁹«Багша аа, эдэ шабинартаа абяагүй болохыень захирьт!» – гэжэ зоной дундаһаа фарисейнүүдэй зариман Иисуста хандаба.

⁴⁰«Шабинараймни абяагүй болоо һаа, харгы дээрэхи шулуунууд хашхаралдаха», – гэжэ Иисус тэдээндэ харюусаба.

Иисус Иерусалим хотын зон тухай шанална



⁴¹Иисус Иерусалим хотодо ойртожо, хотын харагдахада, хүн зониень хайрлаһандаа бархиржа:

⁴²«Хотын зон, амгалан байдалда юун хүргэхэб гэжэ энэ үдэр ойлгодог хайт! Теэд тэрэтнай мүнөө танай нюдэнһөө далда байна даа.

⁴³Хожом нэгэтэ дайсадтнай добтолжо, хотыетнай тала талаһаань бүһэлэн, газар хүреэгээр хүреэлхэ,

⁴⁴тиигээд өөһэдыетнай, үри хүүгэдыетнай хюдажа, хотыетнай хандаргажа, үнэһэн тоборог болгохо. Юундэб гэхэдэ, Бурханай шамайе абарха гэжэ ерэхэн саг мэдээгүй бшууш», – гэжэ хэлэбэ.

Иисус хүмэ соо

⁴⁵Һүмэдэ орожо, Иисус тэндэ хонжоо наймаа хэгшэдые, юумэ худалдажа абагшэдые намнажа гаргахадаа:

⁴⁶«Нангин Бэшэг соо Бурхан: „Минии гэр мүргэл зальбаралай газар байха ёһотой“, – гэжэ хэлэнэ. Харин таанад энэ гэрые дээрмэшэдэй шэбээлдэг үүр болгожорхёот!» – гэжэ зэмэлбэ.

⁴⁷Иисус үдэр бүри Бурхан хүмэдэ ерэхэ, хургаалаа номнодог байгаа. Түрүү санаартан, Хуули заадаг багшанар, ахамадууд хамтаржа, Иисусые алаха гэлсээ.

⁴⁸Теэд бүхы арад зоной нэгэшье үгыень алдангүй Иисусай хургаалые шагнадаг байхада, тэдэнэр яажаш ядаба.

Лука 20

Иисусай эрхэ засаг тухай асуудал

¹Нэгэтэ Бурхан хүмэ соо арад зондо хургаалаа номножо, хайн Мэдээсэл айладхажа байхадань, түрүү санаартан, Хуули заадаг багшанар, ахамадууд ерэхэ:

²«Хэлэлши даа, ши иимэ юумэ хэхэ ямар эрхэтэйбши? Иимэ эрхэ засаг шамда хэн үгөөб?» – гэжэ Иисусчаа хураба ха.

³«Бишье таанадһаа нэгэ юумэ хурахамни. Хэлэжэ үгэгты даа,

⁴Уһаар арьудхаха эрхэ Иоанда Бурхан үгөө юм гү, али хүнүүд гү?» – гэжэ Иисус урдаһаань асууба.

⁵Тэдэнэр хоорондоо зүбшэжэ оробо: «Зай, юун гэжэ хэлэхэбибди? Хэрбээ Бурханһаа тиимэ эрхэ үгтөө гэбэлнай, тиигэбэл яахадаа Иоанда этигэдэггүй байгаабта гэхэл.

⁶Хүнүүд үгөө гээ һаамнай, Иоанные лүндэншэ гэжэ этигэдэг бүхы энэ арад зон маниие шулуугаар шэдэжэ алаха».

⁷Тиигээд лэ тэдэнэр: «Уһаар арьудхаха эрхэ Иоанда хэнэй үгэһые бидэ мэдэнэгүйбди», – гэжэ харюусаба.

⁸Тиихэдэнь Иисус: «Эдэ юумэнүүдые хэхэ эрхэ намда хэнэй үгэһые би баһа хэлэхэгүйб!» – гэжэ тэдэндэ хэлэбэ.

Үзэмэй сэсэрлиг хүлһэлһэн үзэмшэд тухай хургаалта үгэ

⁹Тиигээд Иисус иимэ хургаалта үгэ арад зондо хөөрэбэ: «Нэгэ хүн үзэмэй сэсэрлиг таряад, үзэмшэдтэ хүлһөөр орхижо, ондоо орон нютаг руу удаанаар ябаа һэн ха.

¹⁰Жэмэсэй эдеэшэхэ багта үзэмэй ургасаһаа өөрынь хуби абажа ерэхээр тэрэ хүн үзэмшэдтэ барлагаа эльгээбэ. Теэд үзэмшэд барлагыень зада сохёод, һөөргэнь хооһоор бусааба.

¹¹Сэсэрлигэй эзэн хоёрдохи барлагаа үзэмшэдтэ эльгээбэ. Теэд тэдэнь барлагыень баһа сохижо, баһажа доромжолжо байгаад, юушье үгэнгүй табяа һэн.

¹²Эзэн гурбадахи барлагаа үзэмшэдтэ эльгээбэ, үзэмшэд тэрэниеннь шулга нюлга сохёод, һөөргэнь намнажархиба.

¹³Үзэмэй сэсэрлигэй эзэн бодолгото болоод: „Яаха болоо гээшэбиб? Хайрата хүбүүгээ эльгээхэ юм байна. Хүбүүемни тэдэ хүндэлхэ бэээ“, – гэжэ шиидэбэ.



¹⁴Тээд үзэмшэд хүбүүень хараад, өөһэд хоорондоо зүбшэжэ оробо. „Энэ хүбүүн эсэгынгээ эд зөөри залгамжалха. Энээниие алая, тиигэбэл бүхы зөөринь манай болохо“, – гэлсэбэ.

¹⁵Тиигээд тэдэнэр хүбүүень үзэмэй сэсэрлигһээ гаргажа алажархиба. Тиихэдэнь үзэмэй сэсэрлигэй эзэн тэдэ үзэмшэдые яаха болоноб?

¹⁶Эзэн ерээд, тэдэ үзэмшэдые алаха, тиигээд ондоо үзэмшэдтэ сэсэрлигээ даалгаха». Хэлэхыень шагнаһан хүнүүд: «Үгы даа, тиимэ юумэн болохогүй!» – гэлдэбэ.

¹⁷Иисус тэндэ байгшадые хараад, иигэбэ: «Нангин Бэшэг соо: „Хэрэггүй гэжэ барилгашадай голожо хаяһан шулууниинь гэрэй гол шухала тулга шулууниинь болоо“ гэхэн үгэнүүд ямар удхатайб?

¹⁸Тэрэ шулууе мүргэжэ унаһан хүн хаха бута унаха, тэрэ шулуун хүнэй дээрэ унаа һаа, тэрэниие низа дараха».

Алба татабари түлэхэ тухай асуудал

¹⁹Хуули заадаг багшанар ба ахамад санаартан Иисус мание хадхажа, энэ һургаалта үгэ хөөрэбэ гэжэ ойлгоод, тэрэ дороо тэрэниие барижа абаха гэхэн аад, улад зонһоо айба.

²⁰Иисусай хойноһоо тагнуул табижа, үнэн сэдхэлтэд мэтээр бээ харуулжа, Иисусые үгэ алдуулан гэнэдхээжэ баряад, Римэй захирагшын эрхэ засагта тэрэниие тушааха зорилготойгоор өөһэдынгөө хэдэн хүнүүдые тэдэ эльгээбэ.

²¹Тэдэнь билдагуушалан: «Багша аа! Ши бодото үнэниие хэлэдэгши, нюур харадаггүйш, Бурханай бодото замаар ябахые һургадагши гэжэ бидэ мэдэнэбди.

²²Бидэ Римэй хаанда алба татабари түлэхэ ёһотой гүбди, али үгы гү?» – гэжэ асуубад.

²³Иисус тэдэнэй муу мэхые мэдээд:

²⁴«Намда динари мүнгэ харуулагты, тэрээн дээрэ хэнэй дүрэ зураатай, хэнэй нэрэ бэшээтэй байнаб?» – гэжэ һураба. «Римэй хаанай», – гэжэ тэдэнь харюусаба.

²⁵«Тиигээ һаа, хаанай юумые хаандань, Бурханай юумые Бурханда үгэгты», – гэжэ Иисус хэлэбэ.

²⁶Арад зоной урда буруу юумэ хэлүүлэн барижа ядан тэдэ тагнуулшад аниргүй болобо, үшөө өөһэдынь асуудалда тиимэ сэсэн хурса харюу үгэхэдэнь ехээр гайхалдаба.

Үхөөд амидырха тухай асуудал

²⁷Хүнүүд үхөөд амидырдаггүй гэжэ тоолодог саддукейнүүдэй зариманиинь Иисуста ерэжэ, иигэжэ хэлэбэ:

²⁸«Багша аа, үхибүүгүй ахынгаа наһанһаа нүгшэхэдэ, тэрэнэй дүүнь бэлбэһэн эхэнэртэйнь һууха ёһотой, тиигээд тэдэнһээ гараһан үхибүүн нүгшэһэн ахынь үхибүүн гэжэ тоологдохо зэргэтэй гэжэ Моисей манда бэшэһэн байдаг.

²⁹Зай, долоон аха дүүнэр байгаа гээ. Тэдэнэй ахань һамга абаад, үхибүүтэй болонгүй үхэшэбэ ха.

³⁰Хоёрдохинь ахынгаа һамгатай һуугаад, үхибүүтэй болонгүй морилбо.

³¹Гурбадахи дүүнь, мүн бэшэ дүүнэрынь һубарин тэрэ һамгыень абаад, баһа үхибүүтэй болонгүй үхэшэбэд.

³²Һүүлэй һүүлдэ тэдэнэй һамганииньшье наһа бараа.

³³Теэд Бурханай үхэхэн хүнүүдые амидыруулхада тэрэ эхэнэр хэнэйнь һамган байхаб? Тэрэ эхэнэр долоон аха дүүнэрэй һамган байгаа бшуу».

³⁴Иисус тэдээндэ хэлэбэ: «Энэ оршон үеын зон һамга абана, хадамда гарана.

³⁵Харин Бурханай амидыруулгада хүртэхэ заяатайшуул һамгашье абахагүй, хадамдашье гарахагүй юм.

³⁶Тэдэнэр Бурханай Эльгээмэлнүүдтэл адли болоод, хэзээшье үхэхэгүй мүнхэ байха, юундэб гэбэл, тэдэнэр үхөөд амидырха бшуу.

³⁷Тиин Моисейшье шатажа байһан һөөг модон тухай туужа соогоо үхэхэн хүнүүдэй амидырха тухай батална. Ушарынь юуб гэбэл, Моисей Дээдын Эзэниие Абраһамай Бурхан, Исаагай Бурхан, мүн Яковай Бурхан гэжэ нэрлэнэ ха юм.

³⁸Бурхан болбол үхэхэн хүнүүдэй бэшэ, харин амиды хүнүүдэй Бурхан мүн, юундэб гэхэдэ, тэрээндэ бүгэдөөрөө амиды юм».

³⁹Иисусай иигэжэ хэлэхэдэ, Хуули заадаг зарим багшанар: «Багша аа, ши ехэ һайнаар хэлэжэ үгэбэш!» – гэбэ.

⁴⁰Тиин саашань тэрээнһээ юумэ һурахаяа хэншье зүрхэлбэгүй.

Бурханай табисуурта тухай асуудал

⁴¹Иисус тэдэндэ хэлэбэ: «Бурханай табисууртые Давид хаанай үри һадаһан гэжэ юундэ хэлсэдэг гээшэб?

⁴²⁻⁴³Давид хаан өөрөө Магтаал дуунуудайнгаа ном соо: „Дээдын Эзэн минии Эзэндэ хандажа: Бузар дайсадыешни асаржа, Хүлдэш мүргүүлтэрни, Баруун таладамни һуугаарай!“ – гэжэ бэшэнэ.

⁴⁴Зай, Давид хаан Бурханай табисууртые Эзэмни гэжэ нэрлэнэ. Тиихэдэнь тэрэ яагаад Давидай үри болохоб?» – гэжэ Иисус асууба.

Иисус Хуули заадаг багшанарһаа нэргылжэ байна

⁴⁵Бүхы арад зоной шагнажа байхадань, Иисус шабинартаа захиба:

⁴⁶«Хуули заадаг багшанарһаа бээ нэргылжэ ябаарайгты! Тэдэнэр ута суба үмдөөд ябаха, олон зоной дунда мэндэшэлүүлхэ дуратай, мүргэлэй гэртэ урдуур һууха, түрэ найрташье эгээн хүндэтэй һуури эзэлхэ дуратай байдаг.

⁴⁷Тэдэнэр бэлбэхэн эхэнэрнүүдэй гэр хоһолдог, хүнэй харахада ехэ удаан мүргөөшэ болодог. Бурхан тэдэ Хуули заадаг багшанарые бүри аймшагтайгаар хэхээхэ юм».

Лука 21

Бэлбэһэн эхэнэрэй үргэл

¹Иисус тойрожо харахадаа, зарим баяшуулай үргэлнүүдээ Бурхан хүмын үргэлэй санда табижа байхые хараба.

²Нэгэ бэлбэһэн ядуу эхэнэрэй хоёр жэжэ мүнгэ тэндэ табихые хараад,

³Иисус хэлэбэ: «Энэ үгытэй ядуу бэлбэһэн эхэнэр хэнһээш ехэ үргэл үргэбэ.

⁴Бусад зоной үлүү гараһан юумээ асаржа санда табихадань, энэ эхэнэр үгытэй ядуу байбашье, хоолойгоо тэжээхэ бии үгы юумээ дууһан үргэбэ».

Һүмын хандаргагдаха тухай

⁵Гоё найхан үнэтэ шулуугаар, үргэлэй юумээр шэмэглэгдэһэн Бурхан хүмэ тухай зарим хүнүүдэй хөөрэлдэхэдэ:

⁶«Эндэ үзэжэ байһан юумэнһээтнай хожом нэгэтэ ганса шулууншые үлэхэгүй, хуу баран хандаргагдаха», – гэжэ Иисус хэлэбэ.

Зоболон гашуудал, хашан мүрдэлгэ тухай

⁷«Багша аа, тиимэ юумэн хэзээ болохо юм? Тэрэнэй болохын урда ямар дүлгэ тэмдэгүүд харуулагдахаб?» – гэжэ Иисусаа асуубад.

⁸Иисус хэлэбэ: «Һэргэлэн байгты, хүнэй мэхэдэ бү орогты. Юуб гэхэдэ, олон хүнүүд минии нэрые зүүжэ ерэхэ: „Би Бурханай табисууртаб“, – гэжэ өөһэд тухайгаа гэршэлхэ, „Зарга шүүбэриин саг ойртобо“, – гэжэ минии нэрэһээ хэлэхэ. Тэдэнэй үгэдэ бү этигэгты!

⁹Дайн тухай гү, али буһалгаан тухай дуулахадаа бү айгаарайгты: тиимэрхүү юумэнүүд эхиндэнь болохо ёһотой, зүгөөр тэрэ дары юумэнэй эсэс болохогүй».

¹⁰Иисус саашань үргэлжэлүүлбэ: «Нэгэ арад нүгөө арадтаа добтолон орохо, хаан оронүүд хоорондоо хёморолдон тэмсэхэ.

¹¹Аймшагтайгаар газар хүдэлхэ, зарим газарта үхэл тахал, үлэсхэлэн зоболон дэлгэрхэ. Нүртэй үзэгдэлнүүд, муу ёрото тэмдэгүүд тэнгэридэ үзэгдэхэ.

¹²Зүгөөр, эдэ бүхы юумэнүүдэй болохын урда тээ таанадые намтай холбоотой байһанайтнай түлөө барижа хааха, хашан мүрдэхэ. Таанадые мүргэлэй гэртэ гэмнэхэ, түрмэ шорондо хааха. Таанадые хаашуулда болон зонхилогшодто абаашажа мүшхүүлхэ.

¹³Харин энэтнай таанадай һайн Мэдээсэл айладхахынтнай тушаан болохо.

¹⁴Тиигээд өөһэдыгөө хамгаалжа юу хэлэхэ тухай эртэнһээ ханаагаа бү зобогты.

¹⁵Юу хэлэхые мэдэхэ ухаа би таанадта үршөөхэб. Танай хэлэһэн юумые нэгэшье дайсантнай буруушаажа гү, али һөөргэдэжэ шадахагүй.

¹⁶Тэрэ үедэ аба эжытнай, аха дүүнэртнай, түрэл һаданартнай, хани нүхэдтнай таанадта урбаха. Заримантнай алуулха.

¹⁷Минии түлөө таанадые булта үзэн ядаха.

¹⁸Гэбэшье тархиинтнай нэгэшье үһэн унахагүй.

¹⁹Намда үнэн сэхэ байһанайнгаа ашаар таанад абарагдахат.

Иерусалим һандаргагдаха

²⁰Иерусалимай хариин сэрэгүүдээр хүреэлээтэй байхые харахадаа, һандаржа халаха сагынъ ерээ гэжэ мэдээрэйгты.

²¹Тиихэдэ Иудейдэ байһан хүнүүд хада гүбээ рүү тэрьедээрэйгты. Хотодо байгшад бултадаа тэндэһээ зугадажа гараарайгты. Хүдөө тосхонуудта байһан хүнүүд тэрэ хотодо бү орооройгты.

²²Юундэб гэхэдэ, Нангин Бэшэг соо хэлэгдэһэн ёһоор тэрэ „Хэһээлтын үдэрнүүд“ байха юм.

²³Тэдэ үдэрнүүдтэ хээлитэй, хүхөөр үхибүүдтэй эхэнэрнүүдтэ ехэл гай зоболон тудаха. Газар дэлхэй дээрэ хаа-хаанагүй хүнүүд гайтайгаар зобохо, аймшагтай хэһээлтэдэ орохо бшуу.

²⁴Зарим зон хэлмээр таһа сабшуулха, нүгөө зариманиинь хариин гүрэнүүдтэ богоол болон абаашагдаха. Бусад арадуудай захирха үе сагай дүүрэтэр хариин зон Иерусалим хотые гэшхэжэ дэбһэжэ байха.

Хүн түрэлхитэнэй Хүбүүнэй заларан ерэхэ тухай

²⁵Тиихэдэ нара һаратай, одо мүшэдтэй ойлгогдохогүй юумэнүүд болохо, газар дэлхэй дээрэхи хүн зон эжэ эхиеэ алдаха, уһан далай оёороороо долгилжо, аймшагтай үер халиха.

²⁶Тиигээд галаб эрьехэнь гэжэ айһан зон ухаа мэдээгээ алдаха, юундэб гэхэдэ, тэнгэрийн хүсэнүүдшые тэнсүүриее алдаха бшуу.

²⁷Эгээл тэрэ үедэ үүлэ дамжан Хүн түрэлхитэнэй Хүбүүнэй агуу хүсэтэйгөөр, алдар солотойгоор газарта буужа ябахань харагдаха.

²⁸Эдэ бүгэдэ юумэнүүдэй бээлжэ эхилхэдэ таанад хүл дээрээ бодожо, толгойгоо үргөөрэйгты, юундэб гэхэдэ, абарагдаха сагтнай ерэбэ гээшэ».

Боди модонһоо абтаһан үльгэр жэшээ

²⁹Удаань Иисус тэдэндэ иимэ һургаалта үгэ хөөрөбэ: «Таанад боди модон болон ондоо олон мододые абаад үзэгты.

³⁰Модоной набша намаагайнь һалбархада, зунай саг дүтэлбэ гэжэ мэдэдэгта.

³¹Тон тиигэжэл минии түрүүн хэлэһэн юумэнүүдэй болохые үзэхэдөө, Бурханай хаан түрын мандахань бүри ойртоо гэжэ мэдэхэт.

³²Мүнөө ажамидаржа байһан хүнүүдэй бултанайнь үхэжэ үрдеэгүй байхада минии таанадта хэлэһэн бүхэн тохёолдохо гэжэ таанадта баталан хэлэнэб.

³³Огторгой тэнгэри, газар дэлхэйшье хүнэн халаха, харин минии хэлэһэн үгэнүүд мүнхэ оршохо.

Һэргэлэн байгты

³⁴Хүлээгээгүй байтартнай занга мэтээр тэрэ сагай гэнтэ дээрэтнай буужа таанадые барихагүйн тула архи далгада шунангүй, хубиингаа хэрэгтэ дашуурангүй, бээ эртэнһээ бэлдэжэ байгаарайгты.

³⁵Ушарынь юуб гэбэл, газар дэлхэй дээрэ ажамидарһан хүн амитанда бултандань тэрэ саг гэтэн гэнтэ ерэхэ бшуу.

³⁶Тэрэ сагта тохёолдохо хамаг аюул дабажа гарахын тула, Хүн түрэлхитэнэй Хүбүүнэй урда таатай зохистой байхын тула үргэлжэ зальбаржа, һэргэг хёрхо байгты!»

³⁷Иисус үдэртөө Бурхан хүмэ соо хургаалаа номнодог, һүүлээрнь Элеон хадада гаража, хүни үнгэргэдэг байгаа.

³⁸Тиигээд эртэ үглөөнһөө хамаг зон хургаалыень шагнахаяа Бурхан хүмэ соо суглардаг байгаа.

Лука 22

Иисусые алаха гэнэн нюуса хэлсээн

¹Эһээбэригүй Хилээмэнэй һайндэр, ондоогоор хэлэбэл Паасхын һайндэр дүтэлжэ байгаа.

²Түрүү санаартан, Хуули заадаг багшанар арад зонһоо айжа байһан дээрэһээ Иисусые нюусаар алаха арга бэдэржэ байба.

Иуда Иисусые барижа үгэхөөр болоно

³Арбан хоёр шабинарайнь нэгэн Искариот гэгдэдэг Иудын досоо Сатана ороһон байгаа.

⁴Тиимэһээ тэрэ Иисусые хайшан гэжэ барижа үгэхэ тухайгаа түрүү санаартан болон харуулай дарганартай зүбшэхээ ошобо ха.

⁵Тэдэнь ерэхэндэнь ехээр баярлажа, Иудада мүнгэ үгэхэ болобо.



⁶Тиигээд тэрэ Иисусые хүнэй үгэдэ барижа үгэхэб гэжэ үгээе үгөөд, аятай саг дайралдуулхые оролдоно.

Шабинар хайндэрэй шэрээ заһана

⁷Эһээгдээгүй хилээмэнэй хайндэр боложо, Бурхан хүмэдэ Паасхын хурьга гаргаба.

⁸«Ошожо, хамта эдихэ Паасхын хоол бэлдэгты», – гэхэн даабаритайгаар Иисус Пётр Иоанн хоёр шабияа эльгээбэ.

⁹«Хоол хаана бэлдэхэбибди?» – гэжэ тэдэнһе һураба.

¹⁰Иисус иигэбэ: «Иерусалим хото ороходотнай, домбо соо уһа абажа ябаһан хүн дайралдаха, тэрэниие дахаад ябаарайт. Тэрэ хүнэй ороһон гэртэ ороод:

¹¹„Багшамнай шамда эльгээгээ. Шабинартаяа хамта Паасхын хоол ямар таһалгада барихабибди?“ – гэжэ гэрэй эзэнһээ асуугаарайгты.

¹²Тэрэтнай танда ехэ уужам, зохидоор түхээрэгдэһэн таһалга дээдэ дабхарта харуулжа үгэхэ. Тэндэл шэрээгээ заһагты».

¹³Хоёр шабинь ошожо, Иисусай хэлэһэн бүхы юумые оложо, Паасхын хоол бэлдэбэ.

Дээдын Эзэнэй Үдэшын хоол

¹⁴хайндэрлэхэ саг ерэжэ, Иисус арбан хоёр элшэнэртэйгээ хоол барихаяа һууба.

¹⁵Иисус шабинартаа хэлэбэ: «Ехэ зоболондо орохынгоо урда тээ Паасхын энэ хоол таанартаяа барихые би тон ехээр хүсэхэн байнаб.

¹⁶Юуб гэхэдэ, Бурханай хаан ороной оршотор би Паасхын хоол дахин барихагүйб гэжэ хэлэхэ байнаб».

¹⁷Иисус аяга абажа, Бурханда баяр баясхалан хүргөөд: «Таанад энээниие хубаагаад уужархигты.

¹⁸Энээнһээ хойшо Бурханай хаан ороной оршотор архи дарһа уухагүйб гэжэ таанадтаа хэлэхэ байнаб».



¹⁹Иисус зүгээр хилээмэ абаад, Бурханда баяр баясхалан хүргөөд, хилээмээ хухалжа, шабинартаа хубаагаад: «Энэтнай танай тулада үргэл болохо бэе махабадни гээшэ. Намае дурсан энээние эдижэ байгаарайгты», – гэжэ хэлэбэ.

²⁰Хоол бариһанайнгаа һүүлдэ Иисус дарһатай аяга абаад хэлэбэ: «Энэ болбол танай түлөө адхарха минии шуһаар баталагдаһан Шэнэ Хэлсээнэй аяга гээшэ.

²¹Намае барижа үгэхэ хүн энэ шэрээдэ намтай хамта һууна.

²²Хүн түрэлхитэнэй Хүбүүн уридшалан заяагдаһан ёһоор ами наһаа үгэхэнь, зүгөөр тэрэниие барижа үгэхэн хүн аймшагтай гай зоболон амсаха».

²³Шабинарынь: «Хэмнай багшадаа урбахань гээшэб?» – гэжэ бэе бэеһээ һуража эхилбэ.

Хэмнай агууехэб гэнэн зүрилдөөн

²⁴Тэдэнэр эгээн агууехэмнай хэн бэ гэжэ хоорондоо арсалдажа оробо.

²⁵Иисус хэлэбэ: «Бусад арадуудай хаашуул албатанаа зонхилжо байдаг, һүр хүсэтэй засаглагшад өөһэдыгөө улад зоной нүхэр гэжэ нэрлэдэг.

²⁶Харин таанад тэдэниие бү һажаагты: таанадай агууехэтнай эгэл юрын хүн байха ёһотой; хүтэлэгшэтнай зарасада адли байха ёһотой.

²⁷Хүнүүд хэниие дээгүүр гэжэ тоолодог бэ, хоол барижа байһан хүниие гү, али тэрээндэ заруулжа байһан хүниие гү? Хоол барижа байһан хүниие шухала гэжэ бододог бээ даа! Харин би танай дунда зарасада мэтэ байнаб.

²⁸Таанад булта минии зоболон амсахада намтай байһан хүнүүд болонот.

²⁹Хаандал адли захирха эрхэ Эсэгымни намда үгэхэндэл адли бишье таанадта хаандал адли захиржа байха эрхэ үгэнэб.

³⁰Таанад хаан орондомни шэрээдэмни нуугаад, намтай эдижэ, уужа байхат. Таанад хаан шэрээдэ нуугаад, Израилиин арбан хоёр угсаатаниие шүүбэрилхэт».

Иисус Симон-Пётрой арсаха тухай уридшалан хэлэнэ

³¹Тиигээд Иисус хэлэбэ: «Симон аа, Симон, шагна даа намайе! Таряшанай орооно һагшан мэхинэнэһээ илгадагтал адляар шолмос хүн бүхэниетнай туршажа шалгаха эрхэ өөртөө шаардаба.

³²Гэбэшье, Симон, этигэл хүзэгэйншни буурахагүйн тула би зальбарааб. Тиигээд ши намдаа бусажа ерэхэдээ, аха дүүнэрээ зоригжуулан батадхаарай!»

³³«Эзэмни, би тантай хамта түрмэдэшье орохоор, ами бэеэшье үгэхөөр бэлэнби!» – гэжэ Пётр Иисуста харюусаба.

³⁴«Пётр, шамда хэлэнэб, энэ үдэр эрэ тахяагай дуугархаһаань урда ши намһаа гурба дахин арсахалши даа», – гэжэ Иисус хэлэбэ.

Туулмаг, сумаа, хэлмэ тухай

³⁵«Таанадые туулмаг сумаагүйгөөр, гуталгүйгөөр хүн зондо номнохыетнай эльгээхэдэмни, юумээр дуталдаа һэн гүт?» – гэжэ Иисус шабинарһаа нураба. «Юугээршье дуталдаагүй һэмди!» – гэжэ тэдэнь харюусаба.

³⁶«Харин мүнөө туулмагтай хүн туулмагаа, сумаатай хүн сумаагаа абагты. Хубсаһа хунараа худалдаад, хэлмэ худалдажа абагты.

³⁷Юундэб гэхэдэ, Нангин Бэшэг соо: „Хүнүүд тэрэниие зэмэтэн гэжэ тоолобо“, – гэжэ нам тухай бэшэгдэһэн үгэ бэлхэнь гэжэ танда хэлэнэб», – гээд Иисус хэлэбэ.

³⁸«Эзэн, эндээ хоёр хэлмэтэй байнабди», – гэжэ шабинарынь хэлэбэ. «Тэрэтнай болохо», – гэжэ Иисус харюусаба.

Иисус Элеон хада дээрэ зальбарна

³⁹Иисус хотоһоо гаража, заншалта ёһоороо Элеон хадада гараба. Шабинарыньшье хамта ябалсаа.



⁴⁰Хада дээрэ гараад: «Хорхойтуулгада абтахагүйн тула зальбарагты!» – гэжэ Иисус шабинартаа хэлэбэ.

⁴¹Тиигээд Иисус шэдэһэн шулуунай хүрэхэ зайда тэдэнһээ холодожо, үбдэглэн нуугаад, Бурхандаа мүргэбэ:

⁴²«Эсэгэ Бурхамни, хэрбээ хүсэбэл, энэ аягаһаа амсуулангүй, иимэ ехэ зоболон намһаа зайлуулыш даа! Гэбэшье энэ минии мэдэхэ хэрэг бэшэ, өөрыншни эрхэ хүсэлөөр болог лэ».

⁴³Тэнгэриһээ Бурханай Эльгээмэл ерэжэ, зоригынь үргэбэ.

⁴⁴Иисус дабашагүй гашуудалда абтажа, улам ехээр зальбарба; хүлһэниинь шуһанай дуһал мэтээр газарта унан байба.

⁴⁵Мүргэлөө дүүргээд, хүл дээрээ бодожо, шабинартаа бусажа ерэхэдэнь, тэдэнь ехээр уйдаһандаа унташанхай байгаа.

⁴⁶«Юундэ унтанабта? Бодогты! Хорхойтуулгада абтахагүйн тула зальбарагты!» – гэбэ.

Иисусые бариба

⁴⁷Иисусай иигэжэ хэлэжэ байтарнь, арбан хоёр шабинарайнь нэгэн болохо Иудын хүтэлбэри доро хүн зон ерэбэ. Иудын Иисусые таалаха гэжэ дүтэлхэдэнь,

⁴⁸Иисус тэрээнһээ: «Иуда аа! Ши Хүн түрэлхитэнэй Хүбүүниие таалан барижа үгэнэ аалши?» – гэжэ нураба.

⁴⁹Хажуудань байһан шабинарынь юунэй болохоо байһые ойлгоод: «Эзэн аа! Эдээниие хэлмээрээ сабшахамнай гү?» – гэжэ асууба.

⁵⁰Нэгэ шабинь довтолон, ахамад санаартын зарасын баруун шэхые хэлмээрээ таһа сабшажархиба.

⁵¹«Болигты, хүрөө!» – гэжэ Иисус хэлээд, зарасын шэхые гараараа хүрөөд эдэгээбэ.

⁵²Ойронь ерэнэн түрүү санаартанда, Бурхан хүмын харуулай дарганарта, ахамадуудта хандажа, Иисус иигэжэ хэлэбэ: «Таанар

дээрмэшэниие барихаяа гарһандал хэлмэ, шиидам һаднагтайгаар намайе барихаяа ерэбэ гүт?

⁵³Тээд үдэр бүхэн таанадтай хамта Бурхан хүмэ соо байхадамни намайе бариха гэжэ забдаагүй һэнта. Харин мүнөө харанхы хара хүсэнэй эзэрхэхэдэ, танай саг ерээ гэшэ».

Пётр Иисусаа арсаба

⁵⁴Иисусые барижа, ахамад санаартын гэртэ абаашаба. Пётр зай баряад хойноһоонь гэтэн ябаа.

⁵⁵Гэрэй хашаа соо ехэ түүдэг аһаажа, зарасанарай тойроод һуухадань, Пётр тэдэнэй дунда һуулсаба.

⁵⁶Нэгэ зараса эхэнэр галай хажууда һууһан Пётрые анхаралтайгаар хараад, хайнаар шэртэһэнэйнгээ удаа: «Энэ хүн баһа Иисустай суг ябадаг һэмнай», – гэжэ хэлэбэ.

⁵⁷Пётр буруушаажа: «Эхэнэр аа, би тэрэниие мэдэхэшьегүйб!» – гэжэ хэлэбэ.

⁵⁸Удангүй ондоо нэгэ хүн Пётрые хараад: «Ши тэдэнэй нэгэн ха юмши», – гэжэ хэлэбэ. Тиихэдэнь: «Эрэ хүн аа, би тэдэнэй нэгэн бэшэб!» – гэжэ Пётр мэлзэбэ.

⁵⁹Нэгэ сагай үнгэрһэн хойно ондоо нэгэ хүн: «Нээрээшье, энэ хүн тэрэнтэй ябаа һэн. Тиигээдшье Галилейн хүн байна», – гэжэ һалан һандангүй хэлэжэ оробо.

⁶⁰«Эрэ хүн аа, юун тухай хэлэнэш? Би шамайе ойлгоногүйб!» – гэжэ Пётр хэлэбэ. Иигэжэ хэлэхэтэйнь адли эрэ тахья донгодобо.

⁶¹Дээдын Эзэн эрьежэ, Пётр тээшэ хараад абаба. Тиихэдэнь: «Эрэ тахягай дуугархаһаань урда ши намһаа гурба дахин арсаһалши даа», – гэжэ хэлэһыень Пётр һанаандаа оруулаадхиба.

⁶²Тиигээд тэндэһээ гараад, гунигтайгаар уйлаба.

Иисусые наада бариба, сохибо



⁶³Иисусые харууһалжа байһан хүнүүд тэрэниие наада бариба, тиигээд сохибо.

⁶⁴Тэрэнэй нюдыень боогоод, нюурыень альгадан: «Шамайе хэн сохёоб, хэлэл даа!» – гэлдэбэ.

⁶⁵Гэхэ мэтээр Иисусые тэдэнэр нилээд удаан наадалба, шоолобо, доромжолбо.

Иисусые Зүблэлэй гэшүүд мүшхэнэ

⁶⁶Тиигээд үдэр болоходо ахамадууд, түрүү санаартан, Хуули заадаг багшанар сугларжа, зүблөө хэбэ. Тэрэ Зүблэлэй гэшүүдтэ Иисусые асарба.

⁶⁷«Манда хэлэ даа, ши Бурханай табисуурта гүш?» – гэжэ тэдэ һурабад. «Танда хэлээшье һаам, таанад этигэхэгүйт.

⁶⁸Юумэ һураашье һаам, таанад харюусахагүйт.

⁶⁹Зүгөөр энэ саһаа хойшо Хүн түрэлхитэнэй Хүбүүн һүр жабхаланта Бурханай баруун талын хүндэтэ һуурида һууха», – гэжэ Иисус харюусаба.

⁷⁰«Тиихэдээ ши Бурханай Хүбүүн болоно гүш?» – гэжэ булта асууба. «Хэн байһыемни таанад өөһэдөө хэлэнэт», – гэжэ Иисус тэдээндэ харюусаба.

⁷¹«Манда үшөө ямар гэршэлгэ хэрэгтэй юм? Бидэ өөһэдөө хэлэһыень булта дуулаабди», – гэжэ тэдэнэр хэлэбэ.

Лука 23

Иисус Пиладай урда

¹Зүблэлэй гэшүүд булта бодожо, Иисусые Пиладта абаашаад:

²«Энэ хүн арад зонииемнай үймүүлнэ, худхуулна: Римэй хаанда алба татабари түлэхые хорино, өөрыгөө Бурханай табисууртаб гэжэ нэрлэнэ», – гэжэ тэрэниие зэмэлжэ эхилбэ.

³«Ши еврейнүүдэй хаан гүш?» – гэжэ Пилат Иисусаа нураба. «Ши тиигэжэ хэлэнэш», – гэжэ Иисус тэрээндэ харюусаба.

⁴«Энэ хүниие зэмэлхээр ямаршые баримта олоногүйб», – гэжэ Пилат түрүү санаартанда ба арад зондо хэлэбэ.

⁵«Энэтнай хүн зониие үймүүлхэ, хүлгөөхэ үгэ Галилейһээ эхилээд, эндэ хүрэтэр бүхы Иудей соогуур тараажа ябана бшуу», – гэжэ тэдэнь үсэдөөр хэлэбэ.

Иисус Иродэй урда

⁶Иигэжэ хэлэхыень шагнаад: «Энэ хүнтнай Галилейн юм гү?» – гэжэ Пилат нураба.

⁷Иисусые Иродэй захирдаг можоһоо ерэнэн хүн байна гэжэ мэдэхэдээ, Ирод хаандань эльгээбэ. Эгээл тэрэ үедэ Ирод өөрөө Иерусалим ерээд байгаа.

⁸Иисусые харахадаа, Ирод ехэтэ баярлаба, юундэб гэхэдэ, урдань тэрээн тухай дуулаһан, тэрэниие хараһайб гэжэ үнинэй хүсэдэг һэн. Ямар нэгэн гайхамшагша хэрэг бүтээхыень үзэхэ гэжэ найдадаг байгаа.

⁹Ирод тэрээнһээ олон юумэ асууба, теэд Иисус тэрээндэ харюу үгэбэгүй.

¹⁰Хажуудань байһан түрүү санаартан ба Хуули заадаг багшанар Иисусые хатуугаар зэмэлжэл байба.

¹¹Ирод сэрэгшэдтээ хамта Иисусые баһан доромжолоод, хаанай хубсаһа үмдэхүүлжэ, Пиладта һөөргэнь эльгээбэ.

¹²Энээнэй урда тээ хоорондоо дайсан харша байһан Ирод Пилат хоёр тэрэ үдэрһөө ехэ хани нүхэд болоо бэлэй.

Иисусые үхэлэй саазада хүртөөбэ

¹³Пилат түрүү санаартаниие, ноёдые, арад зониие дуудажэ хэлэбэ:

¹⁴«Израилиин зониие үймүүлжэ ябана гэжэ зэмэлэн, таанад энэ хүниие намда асарбат. Харин би танай хараһаар байтар мүрдэлгэ хэхэдээ, танай тохонон тиимэ зэмэтэй байһыень тодоруулбагүйб.

¹⁵Тиихэдэ Ирод хааншье зэмыень олонгүй, энээниие намда эльгээгээ. Энэ хүн саазада хүртэхөөр ямаршье муу юумэ хээгүй.

¹⁶Тиимэ хадань, энэ хүниие хэхээгээд, табихаб», – гэжэ Пилат хэлэбэ.

¹⁷Пилат Паасхын һайндэрэй хүндэлэлдэ түрмэдэ байһан нэгэ хүниие арад зоной эрилтээр сүлөөлхэ ёһотой байгаа.

¹⁸Тээд бүхы зон: «Энээниие саазалагты, харин Бараббые манда табигты!» – гэжэ хашхаралдаба.

¹⁹Иерусалим хотодо буһалгаан үүсхээд, хүнүүдые алаһанайнь түлөө Бараббые шорондо хаһан байгаа.

²⁰Иисусые табиха хүсэлэнтэй Пилат дахяад зондо хандажа, үгэ хэлэбэ.

²¹«Тэрээниие хэрээһэндэ хада, хэрээһэндэ хада!» – гэжэ тэдэнь хашхаралдаба.

²²«Ямар гэмтэй юумэ тэрэ хээб? Саазада хүртэхөөр гэмтэй байһыень би тодоруулаагүйлби. Тиимэхээ энээниие хэхээгээд лэ табихаб», – гэжэ Пилат гурбадахия тэдээндэ хэлэбэ.

²³Гэбэшье тэндэ байһан зон Иисусые хэрээһэндэ хадажа алаха ёһотой гэхэн эрилтэ табижа, шангаар хашхаралдаба. Саашадаа тэдэнэй хашхаралдаан улам шангадажа байгаа.

²⁴Тиимэхээ Пилат тэдэнэй эрилтые дүүргэхэ гэжэ шиидэбэ.

²⁵Буһалгаа татажа, хүнүүдые алаһанай түлөө түрмэдэ һуужа байһан Барабба гэгшые Пилат зоной шаардаһан ёһоор табиба, харин Иисусые тэдэ зоной хүсэхэн ёһоор саазада хүртөөхэ болобо.

Иисусые хэрээһэндэ хадаба



²⁶Иисусые сэрэгшэдэй абаад ябахадань, замдань Кириней нютагай Симон гэжэ хүн хээрэ ажаллаад бусажа ябаа. Тэрээндэ хэрээһэ үргэлүүлээд, Иисусай хойноһоо ябуулба.

²⁷Иисусай хойноһоо тоолошогүй олон хүн зон дахажа, эхэнэрнүүдынь тэрээниие хайрлаһандаа үбсүүгээ шаан уйлалдаба.

²⁸Иисус тэдээн тээшэ эрьен, иигэжэ хэлэбэ: «Иерусалим хотын эхэнэрнүүд, намайе хайрлажа бү уйлалдагты; өөһэдыгөө хайрлажа, үхибүүдээ хайрлажа бархиралдагты.

²⁹„Хэбэлдээ үри бүрилдүүлээгүй, үхибүү түрөөгүй, хүхөө хүхүүлжэ үзөөгүй эхэнэрнүүд амар жаргалтай!“ – гэжэ саг ойртожо байна.

³⁰Тиимэ сагай ерэхэдэ: „Дээрэһээмнай уныт“ гэжэ хада уулануудта, „Маниие хоргодуулыт“ гэжэ толгой гүбээнүүдтэ хүнүүд хандаха.

³¹Зэмэгүй хүнтэй тиимэ юумэнэй боложо байхада зэмэтэй хүнтэй юун болохоб гэжэ һананат?»

³²Иисустай хамта үшөө хоёр хүниие – хоёр гэмтэниие саазалхаяа абаашаа.

³³«Хохимой» гэдэг газарта ерээд, тэрэниие хэрээһэндэ хадаба, харин нүгөө гэмтэдэй нэгыень баруун таладань, нүгөөдыень зүүн таладань хэрээһэндэ хадажархиба.

³⁴«Эсэгэ Бурхамни, эдэниие хүлисэ, юундэб гэхэдэ, эдэ юуш хэжэ байһанаа өөһэдөө мэдэнгүй», – гэжэ Иисус зальбарба. Харин саазалагшад жээрэб татажа, хубсаһыень дундаа хубаажа абаба.

³⁵Арад зоной хаража байтар еврейнүүдэй ноёд: «Бурханай табисуурта юм һаа, бусадые абарһандаал адли өөрыгөө абарыш!» – гэжэ доромжолон хэлэбэ.

³⁶Сэрэгшэдшые элдэбээр баһажа, хямдахан гашуун архи үгэхэ зуураа:

³⁷«Хэрбээ ши еврейнүүдэй хаан юм һаа, өөрыгөө абарыш!» – гэлдэбэ.

³⁸Иисусай дээрэнь «Энэ еврейнүүдэй хаан» гэжэ грек, рим, еврей хэлэнүүдээр бэшэгдэһэн хабтагай үлгөөтэй байгаа һэн.

³⁹«Ши Бурханай табисуурта бэшэ аалши? Өөрыгөөшье, манииешье абарыш!» – гэжэ хэрээһэндэ хадуулһан гэмтэнэй нэгэн Иисусые шоглон баһаба.

⁴⁰Харин нүгөөдэхинь тэрэ нүхэрөө зэмэлэн: «Өөрөө саазалуулжа байһан аад, иигэжэ дуугархаяа Бурханһаа айнагүй аалши?

⁴¹Ехэ гэм хэһэн маниие зүб иигэжэ хэһээжэ байна, харин энэ Иисус ямаршые муу юумэ хээгүй», – гэбэ.

⁴²Тиигээд Иисуста хандажа: «Иисус аа, ши Хаан шэрээдээ һуухадаа намайе һанажа байгаарай», – гэжэ тэрэ хэлэбэ.

⁴³«Мүнөөдэр ши намтай диваажан орондо ошолсохош гэжэ шамда үнэниие хэлэнэб!» – гэжэ Иисус тэрээндэ харюусаба.

Иисус ами табиба

⁴⁴Хахад үдэр боложо байгаа. Гэнтэ бүхы газар дэлхэй дээрэ үдын гурбан саг болотор шэб харанхы болошобо:

⁴⁵наран хиртэшэбэ. Тиигээд Бурхан һүмэдэ хоёр хүшэгийн нэгэниинь тэг дундуураа шуу хахарба.

⁴⁶«Эсэгэмни, шинии мэдэлдэ һүнэнһөө ябуулнаб!» – гэжэ Иисус шанга гэгшээр үгэлбэ. Тиигээд тэрэ ами табиба.

⁴⁷Эдэ бүгэдые хараһан зуунай дарга Бурханиие алдаршуулан магтаад: «Энэ хүн үнэхөөрөө үнэн сэдхэлтэн байгаал даа», – гэбэ.

⁴⁸Аймшагтай үзэсхэлэн һонирхон харахаяа эндэ сугларһан бүхы хүн зон болоһон бүгэдые хаража сошолдон, үбсүүгээ шаажа уйлалдаһаар гэр гэртээ тарабад.

⁴⁹Иисусые таниха мэдэхэ зон, Галилейһээ тэрэниие дахажа ерэхэн эхэнэрнүүд тээ холохоно зогсоод, хуу хаража байгаа һэн.

Иисусые хүдөөлүүлбэ



50-51Тэндэ баһа Иудей можын Аримафей хотын Иосиф гэдэг хүн байба. Тэрэ үнэн сэхэ, сагаан сэдхэлтэй хүн Бурханай хаан ороной мандахые ехэл хүлээжэ байгаа. Тэрэ баһа Зүблэлэй гэшүүн аад, Зүблэлэй гаргаһан шиидхэбэриие, үйлэдэһэн хара хэрэгые яашье зүбшөөжэ шадахагүй байба.

52Тэрэ Пиладта орожо, Иисусай бэе үгэхыень гуйба.

53Тиигээд хэрээһэнһээ Иисусай шарилые буулгажа, бүдөөр орёогоод, хабсагайда түнхигдэһэн, урдань хэнэйшые хэбтээгүй агы нүхэндэ абаашажа хадаглаа һэн.

54Тэрэ үдэр болбол субботын бэлэдхэл үдэр, пятница байгаа.

55Галилейһээ Иисустай ерэлсэһэн эхэнэрнүүд Иосифой мүрөөр ошожо, түнхинэгдэһэн агы нүхэ, Иисусай шарилай тэндэ хадаглагдахые хараба.

56Тиигээд тэдэнэр гэртээ харижа, элдэб янзын хангалтай ургамалай тоһо бэлдэбэ. Теэд субботодо тэдэнэр Хуулийн зааһан ёһоор амарба.

Лука 24

Иисусай амидыралга тухай

1Гарагай нэгэнэй, воскресениин эртэ үглөөгүүр тэдэ эхэнэрнүүд бэлдэһэн хангалтай тоһоёо абаад, агы нүхэн хуурсагта ошобо.

2Агы нүхэнэй амһарые бүтүүлһэн үхэр шулуун хажуу тээшээ болгогдоһон байба.

3Ороходонь, Эзэн Иисусай шарил байбагүй.

4Эхэнэрнүүдэй гайхалдажа, юуш гэжэ бодохо ойлгохоёо болёод байтар, ялалзама сагаан хубсаһатай хоёр хүн бии болобо.

5Эхэнэрнүүдэй айн хүрдэжэ, уруугаа харан зогсоходо, тэдэ хоёр хэлэбэ: «Амиды хүниие юундэ үхэхэнүүдэй дунда бэдэрээбта?

⁶Тэрэтнай эндэ үгы, тэрэтнай амидыраа. Бүри Галилейдэ байхадаа таанадта юун гэжэ хэлэһыень ханагты.

⁷„Хүн түрэлхитэнэй Хүбүүн нүгэлтэ хүнүүдэй гарта тушаагдаад, хэрээһэндэ хадуулха, тиигээд гурбадахи үдэртөө амидырха“, – гэжэ тэрэ хэлээ һэмнай».

⁸Тиигэхэдэнь эхэнэрнүүд Иисусай хэлэһэн үгые ханаандаа оруулба.

⁹⁻¹⁰Магдалай Мария, Иоаннай, мүн Яковай эхэ Мария болон бусад хэдэн эхэнэрнүүд агы нүхэн хуурсагта ошоһон хүнүүд байгаа. Тэдэнэр агыһаа бусаһаар үзэһэн хараһан юумээ Иисусай арбан нэгэн дүтын шабинартань, мүн бусад олон хүн зондо дуулгаба.

¹¹Һамгад дэмы юумэ шашана гээд, элшэнэр этигэбэгүй.

¹²Зүгөөр Пётр һууриһаа бодоод, агы нүхэн тээшэ гүйжэ ошобо. Тонгойжо харахадань, орёһон бүдын лэ байба. Ямар һонин юумэн болооб гэжэ гайхаһаар тэрэ гэртээ бусаба.

Иисус хоёр шабинартаа харагдаба

¹³Тэрэл үдэр Иисусай хоёр шабинарынь Иерусалим хотоһоо арбан хоёр модоной зайтай Эммаус тосхон ошобо.

¹⁴Тэдэ хоёр болоһон ушарнууд тухай бодожо, хоорондоо хөөрэлдэжэ ябаа.

¹⁵Иигэжэ дуугаралсажа, зүбшэжэ ябахадань, Иисус өөрөө хажуудань ерэжэ, тэдэнтэй хамта ябалсаба.

¹⁶Зүгөөр тэдэ шабинарай нюдэниинь бүрэглөөд, тэдэ тэрэниие танибагүй.

¹⁷«Энэ юун тухай замдаа хөөрэлдэжэ ябанабта?» – гэжэ Иисус тэдээнһээ һураба. Уй гашуудалда дарагдаад ябаһан тэдэ хоёрын зогсобо.

¹⁸«Эдэ үдэрнүүдтэ Иерусалим хотодо болоһон ушарнууд тухай шил гансаараа дуулаагүй ябана гүш?» – гэжэ тэдэ хоёрой Клеопа гэдэгынь Иисусаа һураба.

¹⁹«Ямар ушарнууд юм?» – гэжэ харгынь хани урдаһаань асууба. Тиихэдэнь тэдэнэр иигэжэ хөөрэбэ: «Эдэ бүхы ушарнууд Назарет хотын Иисустай тохёолдоо. Бүтээһэн үйлэ хэрэгүүдээрээ, айладхаһан юумэнүүдээрээ тэрэ Бурханда болон хүн зондо таатай, хүр хүсэтэй лүндэншэ байһанаа харуулаа.

²⁰Тиигээд манай түрүү санаартан, ноёд дарганар тэрэниие барижа, үхэлэй саазада хүртөөжэ, хэрээһэндэ хадаа юм.

²¹Харин тэрэ хүн Израилиин арад түмэниие Римэй хаанай дарлалтаһаа сүлөөлхэ гэжэ бидэ найдадаг байгаабди. Тиин тэрэ бүгэдын болоһоор гурбадахи үдэр ябажа байна.

²²Манай хэдэн эхэнэрнүүд бидэниие ехэтэ гайхуулба: үглөөгүүр эртэ хүдөөлүүлһэн агыдань ошожо харахадань,

²³Иисусай шарил агы нүхэн хуурсагтаа байбагүй. Тэндэ Бурханай хоёр Эльгээмэлын эхэнэрнүүдтэ үзэгдэжэ, „Иисус амиды!“ – гэжэ хэлэһэн байгаа.

²⁴Бидэнэй зариманай шулуун хуурсагтань ошожо харахада, эхэнэрнүүдэй хэлээшэ үнэн байба. Харин өөрыень хараагүйбди».

²⁵«Лүндэншэдэй уридшалан айладхаһан бүхы юумэндэ этигэхэ талаар мохоо модохир, тэнэг амитад аа!

²⁶Алдаршахынгаа урда тээ Бурханай табисуурта иимэ зоболон үзэхэ ёһотой гэжэ мэдээгүй аалта?» – гэжэ Иисус тэдээндэ хэлэбэ.

²⁷Тиигээд Моисейһээ эхилээд, бүхы лүндэншэдэй өөр тухайнь Нангин Бэшэг соо хэлэһэн зүйлнүүдые тэдэ хоёрто тайлбарилжа үгэбэ.

²⁸Тэдэнэр зорихон тосхондоо хүрэжэ ерэбэ. Иисусай саашаа ябаха гэхэн хэбэр үзүүлхэдэнь,

²⁹нүгөө хоёрынь: «Орой боложо, нара орохоёо байна ха юм, бидэнтэй үлэ», – гэжэ Иисусые аргадаба. Тиин Иисус тэдэнээр үлэжэ, айлда оролсобо.

³⁰Тэдэнтэй хамта эдеэлхэээ нуухадаа, Иисус хилээмэ гартаа абажа зальбараад, хухалжа нүгөө хоёртоо үгэбэ.

³¹Бүрэглэһэн нюдэниинь һаял нээгдэжэ, тэдэ хоёр багшайа таниба. Тэрэ дороо Иисус харагдахаяа болишоо һэн.

³²«Харгыдамнай багшын дуугаржа ябахата, Нангин Бэшэг соо хэлэгдэһые нээн тайлбарилхадань, зүрхэ сэдхэлнай хүлгөө бэшэ һэн гү?» – гэжэ тэдэнэр бэе бээдээ хэлэбэ.

³³Тэрэ бэээрээ тэдэнэр бодожо, Иерусалим хотоёо бусаба. Тиигээд арбан нэгэн элшэнэрэй, мүн бусадшые хамта ябалсагшадай суглараад байхадань тэдэнэр орожо ерэбэ.

³⁴«Дээдын Эзэн үнэхөөрөө амидыраад, Симондэ үзэгдээ», – гэжэ бүлэг зон орожо ерэхэн хоёрто хөөрэбэ.

³⁵Ээлжээндээ тэдэ хоёр харгыда ябахадань юунэй болоһон тухай, хилээмэ хухалжа үгэхэдэнь лэ Иисусые таниһан тухайгаа хөөрэбэ.

Иисус шабинартаа ерэбэ

³⁶Иигэжэ хөөрөжэ байхадань, Иисус өөрөө хажуудань бии боложо: «Амгалан тайбаниие таанадта айладханаб!» – гэжэ хэлэбэ.

³⁷Хии үзэгдэл харанабди гэжэ бодоһон шабинарынь ехээр сошожо, айн һүрдэбэ.

³⁸«Юундэ маргаба сошобот? Сэдхэл зүрхэндэтнай юундэ һэжэг уурхайлбаб?

³⁹Энэ гарым, хүлым харыт. Би өөрөөлби. Намайе баряад үзэгты, бодото бэээрээ байхыем харыт: хии үзэгдэл һаа, бэе махабадгүй, яһагүй байха һэм», – гэжэ хэлэбэ.

⁴⁰Тиигээд Иисус тэдээндээ гар хүлөө харуулба.

⁴¹Шабинарайнгаа ехээр баярлажа, үшөөл этигэжэ ядан, гайхалсажа байхата: «Эндэтнай ямар нэгэ эдихэ юумэн байна гү?» – гэжэ Иисус һураа.

⁴²Шабинарын тэрээндээ нэгэ хэршэмэг сонгоһон загаһа үгөө.

⁴³Тэрээниен абаад, Иисус хараһаар байтарнь эдижэрхибэ.

⁴⁴Һүүлээрнь Иисус тэдэндэ хэлэбэ: «Нам тухай Моисейн Хуули соо, лүндэншэдэй номууд соо, Бурханай магтаалнууд соо бэшэгдэһэн бүхы юумэн бээлхэ гэжэ би таанадтаяа байхадаа хэлээ һэнби. Тиимэл юумэн болоо».

⁴⁵Тиигээд Иисус Нангин Бэшэгэй удха ойлгожо абаха ухаа тэдэндээ үршөөгөө бэлэй.

⁴⁶«Бурханай табисуурта алуулха, тиигээд гурбадахи үдэртөө дахин амидырха.

⁴⁷Тиигээд нүгэлөө хүлисүүлхынь тула бүхы арадуудта Бурханда хандагты гэһэн мэдээсэл тэрэнэй нэрээр номногдохо ёһотой. Таанад Иерусалимнаа эхилээд,

⁴⁸тэрэ болоһон бүхы хэрэгүүд тухай айладхаха ёһотойт.

⁴⁹Эсэгынгээ таанадта үгэхэб гэжэ найдуулһые би мүнөө дамжуулан таанадта үгэнэб. Харин таанад Иерусалим хотодоол байгаад, дээрэһээ үршөөгдэхэ ехэ хүсэ шадалда хүртэтэрөө хүлеэгты», – гэжэ Иисус тэдэндэ айладхаба.

Иисус тэнгэридээ дэгдэн бусаба

⁵⁰Тиигээд Иисус шабинараа хотоһоо гаргажа, Бетани хүрэтэр абаашаад, гараа үргэжэ, тэдэнээ адислаба.

⁵¹Тиигэжэ буян хэшэгтээ хүртөөһэнэйнһь һүүлдэ Иисусые тэнгэри өөдэ дэгдүүлэн абаа.

⁵²Тэрэнэй һүүлдэ шабинарын Иисуста дохижо мүргөөд, хизааргүй ехэ баяртайнууд Иерусалим хотоёо бусаба.

⁵³Тиигээд тэдэ саг үргэлжэ Бурхандаа баяр баясхалан хүргэн һүмэ соо байдаг бэлэй.



Иоанн

Иоанн 1

Үгэ хадаа хүн боложо түрөө

¹Анханһаа нааша – юртэмсэ дэлхэйн зохёон бүтээгдэхэнээ түрүүн – Үгэ бии байһан юм. Тэрэ болбол Бурхантай хамта байгаа. Тэрэ хадаа Бурхан мүн байгаа.

²Үгэ болбол анханһаа нааша Бурхантай хамта байһан юм.

³⁻⁴Бүхы юумэн Үгөөр лэ бүтээгдэһэн байна, нэгэшье бүтээгдэһэн юумэн тэрээнгүйгөөр бүтээгүй байгаа. Тэрэ өөрөө бүхы амидаралай эхин мүн. Амидарал гээшэ бүхы хүнүүдые гэрэлтүүлдэг Гэрэл туяа мүн.

⁵Гэрэл туяа болбол шэг харанхы соогуур сасаран гэрэлтэдэг, тиин шэг харанхы Гэрэл туяае хүнөөжэ шадахагүй юм.

⁶Иоанн гэжэ нэрэтэй хүниие Бурхан эльгээһэн байна.

⁷Гэрэл туяагай ерэхэ тухай гэршэлхээ Иоанн ерээ. Тэрэнэй гэршэлэлгын ашаар бүхы хүнүүд гэрэл туяада этигэхэ ёһотой байгаа.

⁸Иоанн өөрөө Гэрэл туяа бэшэ һэн. Тэрэ Гэрэл туяагай гэршэнь һэн.

⁹Бүхы хүнүүдые гэрэлтүүлдэг жэнхэни Гэрэл туяа юртэмсэ дэлхэйдэ ерэдэг бэлэй.

¹⁰Тэрэ хадаа юртэмсэ дэлхэй соо байгаа, юртэмсэ дэлхэй тэрээгээр зохёон бүтээгдэһэншье һаа, тэрэниие дэлхэйнхид танибагүй.

¹¹Гэрэл туяагай өөһэдынхидтөө ерэхэдэнь, өөһэдынхинь тэрэнээ угтан абаагүй.

¹²Теэд Гэрэл туяае угтан абагшадта, тэрээнэй алдар нэрэдэ этигэгшэдтэ Бурханай үхибүүд болохо эрхэ тэрэ үршөөгөө.

¹³Тэдэ хүнэй хүсэл дуранһаа, эрын хүсэлэнһөө бүрилдөөгүй, харин Бурханһаа түрөө.

¹⁴Үгэ хадаа хүн боложо түрөөд, бидэнэй дунда амидаржа байгаа. Эсэгэ Бурханай ори ганса Хүбүүнийнь үршөөл хайрын ба үнэн зүйлэй бээлэл байжа, бидэндэ хүр шадалаа харуулаа.

¹⁵Тэрээниие гэршэлэн Иоанн: «Минии хойноһоо ябагша намһаа нилээдгүй шухала, ушарынь гэхэдэ, намһаа урда байгаа юм гэжэ хэлэхэдээ, би энэ хүн тухай хэлээ һэм», – гэжэ айладхаа.

¹⁶Тэрэ өөрынгөө хизааргүй ехэ, урданайхиһаа үлүү ехэ буян хэшэгтэ маниие хүртүүлээ.

¹⁷Бурхан Моисейгээр дамжуулан Хуули үгөө, харин Иисус Христосоор дамжан, үршөөл хайра, үнэн зүйл үгтөө.

¹⁸Бурхание хэншье, хээээдэшье хараагүй юм. Бурхантай нэгэн хамта, Эсэгэдээ ойро дүтэ ори ганса хүбүүнийнь лэ Бурхание юртэмсэ дэлхэйдэ харуулаа.

Уһаар арюудхагша Иоаннай гэршэлһэн тухай

¹⁹«Ши хэн гээшэбши?» гэжэ Иоанһаа һураад ерэхыень еврейнүүдэй ахаматууд Иерусалимһаа санаартание болон левидүүдые эльгээбэ.

²⁰Тиихэдэнь Иоанн: – Би Бурханай табисуурта бэшэб, – гэжэ гэршэлэн сэхэ харюусаба.

²¹– Тиихэдээ ши хэн гээшэбши? Илия гүш? – гэжэ тэдэнь һураба. – Бэшэб. – Ерэхэ ёһотой тэрэ лүндэншэ гүш? – Бэшэб.

²²– Тиихэдээ ши хэн болонобши? Шинии хэн байһые мэдээд ерэхыемнай эльгээһэн хүнүүдтэ бидэ харюу үгэхэ ёһотойбди. Ши өөр тухайгаа хэн байнаб гэжэ бодонош?

²³– Минии тухай лүндэншэ Исаяя иигэжэ бэшээ һэн: «Дээдын Эзэндэ сэхэ зам гаргажа үгэгты гэжэ хэн бэ даа сүл губида хашхарба».

²⁴Эдэ һурагшалааша хүнүүдые фарисейнүүд эльгээһэн байгаа.

²⁵– Ши Бурханай табисуурта бэшэ, Илия бэшэ, тэрэ лүндэншэ бэшэ аад, юундэ хүнүүдые уһаар арюудханабши? – гэжэ тэдэ һурана.



²⁶– Би уһаар лэ арюудханаб. Теэд хэн гээшэб гэжэ таанарай мэдэхэгүй хүн танай дунда бии.

²⁷Минии хойноһоо Заларан ерэгшын гуталайнь оһорыешье тайлаха эрхэгүйб, – гэжэ Иоанн харюусаба.

²⁸Энэ бүхы ушар Иордан мүрэнэй саада бээдэ оршодог Бетани тосхондо болоо һэн. Тэндэ Иоанн хүнүүдые уһаар арюудхадаг байгаа.

²⁹Хойто үдэрын урдаһаань Иисусай ерэжэ ябахые хараад, Иоанн иигэжэ хэлэбэ: – Энэл хадаа Бурханда үргэгдэхэ Хурьган мүн. Энэл хадаа газар дэлхэйн бүхы хүнүүдэй хэһэн нүгэл хилэнсые өөр дээрээ даажа абаха юм!

³⁰«Минии хойноһоо ябагша болбол намһаа нилээдгүй шухала, ушарын гэхэдэ, намһаа урда байгаа юм», – гэжэ минии хэлэһэн хүн – энэ гээшэ.

³¹Бурханай табисуурта хэнэй байһые би өөрөөшье мэдэхэгүй байгааб, теэд тэрээниие бүхы израильшуудта танюулхын тула би хүн зониие уһаар арюудхахаяа ерээб.

³²Эдэ үгэнүүдээ Иоанн иигэжэ гэршэлэн хэлэбэ: – Гулабхаагай дүрсэтэйгөөр тэнгэриһээ Нангин һүлдэн тэрэнэй дээрэ буун тогтохые би хараа һэм.

³³Би тэрэ хүниие мэдэхэгүй байгааб, теэд Бурхан уһаар лэ арюудхахыемни намайе эльгээхэдээ иигэжэ хэлэһэн юм: «Нангин һүлдэ хэнэй дээрэ буужа тогтохые харанаш, тэрэл хадаа хүнүүдые Нангин һүлдөөр арюудхаха».

³⁴Би эдэ бүгэдые хараа һэм, тиин энэ хүн Бурханай Хүбүүн мүн гэжэ би гэршэлнэб.

Иисусай түрүүшын шабинар тухай

³⁵Хойто үдэрын Иоанн баһал тэрэ һууридаа хоёр шабинартаяа хамта ерээд байба.



³⁶Хажуугаарнь Иисусай гаража ябахые хараад, Иоанн: – Харагты, энэл хадаа Бурханда үргэгдэхэ Хурьган мүн! – гэжэ хэлэбэ.

³⁷Иоаннай хоёр шабинар тэдэ үгэнүүдыень дуулаад, Иисусай хойноһоо ошобо.

³⁸Иисус эрьежэ, хойноһоонь тэдэнэй дахажа ябахые хараад: – Таанарта юун хэрэгтэйб? – гэжэ һураба. – Рабби аа (еврей хэлэн дээрэ «багша» гэхэн удхатай), ши хаана байдагбши? – гэжэ тэдэнь урдаһаань асууба.

³⁹– Намтай ябалсагты, өөһэдөө харахат, – гэжэ Иисус хэлэбэ. Энэнь үдэрэй дүрбэн саг багаар һэн. Тиин тэдэнь Иисустай хамта ошолсожо, хаана байдагыень хараба, тиигээд бүхэли тэрэ үдэртөө Иисусайда байба.

⁴⁰Иоаннай хэлэхые дуулаад, Иисусай хойноһоо ябалсаһан хоёрой нэгэниинь Симон Петрой дүү Андрей байгаа.

⁴¹Андрей өөрынгөө аха Симоние бэдэржэ олоод: – Бидэ Бурханай табисууртые олообди, – гэбэ («Бурханай табисуурта» – грек хэлэн дээрэ «Христос»).

⁴²Андрей Симоние Иисуста асаржа харуулба. Иисус тэрэниие анхаралтайгаар шэртэн хараад: – Ши Иоаннай хүбүүн Симон байнаш. Теэд шамайе Кефа гэжэ нэрлэдэг болохо («шулуун» гэхэн удхатай, грек хэлэн дээрэ болбол «Петр»), – гэбэ.

⁴³Хойто үдэрынь Иисус Галилейн орон нютаг ошохо гэжэ шиидэбэ. Харгыдаа тэрэ Филипптэй ушараад: – Минии хойноһоо яба! – гэбэ.

⁴⁴Филипп болбол Андрей Петр хоёрой ажаһуудаг Бетсаида гэжэ хотын хүн байгаа.

⁴⁵Филипп гээшэнь Натанаилые бэдэржэ олоод, тэрээндэ: – Моисейн Хуули дотор, мүн лүндэншэдэй бэшэгүүд соо дурдагдаһан хүниие олообди. Энэ хадаа Назарет хотын Иосифой хүбүүн Иисус гээшэ, – гэбэ.

- ⁴⁶– Назареднээ гэнэ гүш? Теэд Назарет сооһоо ямар нэгэн хайн юумэн гараха аал? – гэжэ Натанаил буруушаан хэлэбэ. – Ошоёбди, ши өөрөө харахаш, – гэжэ Филипп тэрээндэ хэлэбэ.
- ⁴⁷Урдаһаань Натанаилай ерэжэ ябахые Иисус хараад: – Хуурмаг мэхэгүй, жэнхэни Израилиин хүн байна, – гэбэ.
- ⁴⁸– Ши намайе хаанаһаа мэдэнэбши? – гэжэ Натанаил асууба. – Филиппэй шамайе дуудахаһаань урда боди модоной хүүдэртэ хуухыешни би хараа һэм, – гэжэ Иисус харюусаба.
- ⁴⁹– Рабби аа! Ши ёһоороол Бурханай Хүбүүн, Израилиин Хаан байнаш! – гэжэ Натанаил дуугарба.
- ⁵⁰– Шамайе боди модоной хүүдэртэ хуухыешни хараа һэм гэхэдэмнил намда этигэбэш. Бай даа, энээнһээ бүришые ехэ юумэ үзэхэш, – гэбэ Иисус.
- ⁵¹Тиин үргэлжэлүүлэн: – Тэнгэрийн яжа нээгдэхые, Хүн түрэлхитэнэй Хүбүүндэ Бурханай Эльгээмэлнүүдэй буухые, тэндэһээ дээшээ тэнгэри өөдэ дэгдэжэ байхые харахат гээд таанарта үнэниие хэлэнэб.

Иоанн 2

Канада болоһон түрэ найр тухай

- ¹Хоёр хоногой удаа Галилей можын Кана хотодо түрэ найр болобо. Тэндэ Иисусай эжынь байлсаа.
- ²Мүн Иисусшые шабинартаяа түрэдэ уригдаһан байна.
- ³Үзэмэй архиин дууһахада, Иисусай эжынь хүбүүндээ: – Эдэмнай архигүй болоод байнал, – гэбэ.
- ⁴– Эндэ минии хэрэг юуб даа? Сагни үшөө ерээгүй ха юм, – гэжэ Иисус эжыдээ харюусаба.
- ⁵– Энээнэйл хэхэ гэхэн юумэ хэгты, – гэжэ эхэнь зарасанарта хэлэбэ.



⁶Тэндэнь еврейнүүдэй арюудхалай заншал сахилгада хэрэглэгдэдэг зургаан томо уһанай шулуун тогоонууд табяатай байгаа. Тогоон бүридэнь наян литрһээ зуун хорин литр хүрэтэр багтадаг һэн.

⁷– Тогоонуудаа уһаар дүүргэгты, – гэжэ Иисус хэлэбэ. Зарасанарынь тогоонууды уһаар дүүргэбэ.

⁸– Зай, энээнһээ удхаад, түрэ найрые хүтэлэгшэдэ абаашагты, – гэжэ Иисус хэлэбэ. Тэдэнь абаашаба.

⁹Хүтэлэгшэнь үзэмэй архи болошоһон уһанһаа амсаад үзэбэ. Иимэ үзэмэй архи хаанаһаа бии болооб гэжэ тэрэ хүн мэдээгүй, гансал уһа удхаһан зарасанар лэ энээн тухай мэдэжэ байгаа. Найрай хүтэлэгшэнь хурьгэн хүбүүе дуудаад,

¹⁰тэрээндэ: – Хүн бүхэн түрүүшээр һайн архияа аягалаад, айлшадайнгаа һогтоходо муушаг архи табидаг бшуу. Харин ши һайн архияа мүнөө болотор хадагалаад байбаш, – гэбэ.

¹¹Иигэжэ Иисус Галилей можын Кана хотодо гайхамшаг үзэгдэлнүүдэйнгээ эхи табиба. Иигэжэ Иисус өөрынгөө алдарые харуулһан, тиин шабинанынь тэрээндэ этигэһэн юм.

¹²Энэ ушарай удаа Иисус эжытээ, аха дүүнэртээ, шабинартаяа хамта Капернаум ошоо. Тэндэ хэдэн үдэр байгаа һэн.

Бурхан хүмэ арюудхаһан тухай

¹³Еврейнүүдэй Паасхын һайндэрэй болохонь ойртожо байхада, Иисус Иерусалим ошобо.

¹⁴Бурхан хүмын хорёодо наймаашадай сар, хони, гулабхаа гэхэ мэтые худалдажа байхыень, нүгөөдэ зариманайнь мүнгэ танга андалдажа байхыень тэрэ хараба.

¹⁵Аргамжаар ута ташуур минаа хээд, Иисус тэдэ наймаашадые хони малтайнь хамта бултыень Бурхан хүмын хорёоһоо намнажа гаргаба, мүнгэ холигшодой шэрээнүүдые хүмэрюулхэдэнь, тэдэнэй мүнгэ алтань иишэ тишээ бутаран унаба.

¹⁶Гулабхаа наймаалагшадта Иисус: – Эдэнээ эндэхээ абаашагты! Минии Эсэгын Гэр наймаанай газар бү болгогты! – гэбэ.

¹⁷Нангин Бэшэг соо: «Шинии Гэртэ дуратай байһамни намайе дүлэн мэтээр бадарааха!» – гэжэ бэшээтэй байһые Иисусай шабинар ханаба.

¹⁸Теэд энэ үедэнь еврейнүүдэй ахамадууд оросолдон: – Иимэ юумэ хэхэ эрхэтэй байһанаа гэршэлэн, ши ямар гайхамшаг үзэгдэлнүүдые харуулхабши? – гэжэ асууба.

¹⁹– Энэ хүмэ хандаргагты, тиигээд би энээниие гурбан үдэр соо дахин бодхоохоб, – гэжэ Иисус еврейнүүдэй ахамадуудта хэлэбэ.

²⁰– Энэ Бурхан хүмэ дүшэн зургаан жэлэй туршада баряа юм, харин ши гурбан үдэр соо барихаб гэнэ гүш?! – гэжэ еврейнүүдэй ахамадууд хэлэбэ.

²¹Хүмэ тухай хэлэхэдээ, Иисус өөрынгөө бэе тухай хэлэһэн байгаа бшуу.

²²Иисусай амидырһан хойно тэрэнэй хурагшад эдэ үгэнүүдыеень ханаад, эдэ үгэнүүдтэнь болон Нангин Бэшэг соо баһа энэ ушар тухай бэшээтэй байһанда этигэбэ.

Иисус бүхы хүнүүдые мэдэдэг байгаа

²³Паасхын һайндэрэй үедэ Иерусалимда Иисусай үзүүлһэн гайхамшаг үзэгдэлнүүдые олон хүнүүд хараад, тэрээндэ этигэһэн юм.

²⁴Теэд Иисус хэндэшье найдадаггүй һэн, ушарынь хадаа, тэрэ болбол бүхы хүнүүдые мэдэдэг байгаа.

²⁵Иисуста ондоо хүнүүдэй хэлэһэнээр хүн тухай тухайлха хэрэггүй бэлэй, юундэб гэбэл, хүнэй сэдхэл бодол тэрэ өөрөө мэдэдэг һэн.

Иоанн 3

Иисуста Никодим ерэбэ

¹Еврейнүүдэй ахамадай нэгэн болохо Никодим гэжэ фарисей хүн байгаа ха.



- ²Тэрэ нэгэ хүни Иисуста ерээд: – Рабби, ши хадаа Бурханай эльгээһэн багша гээшэш гэжэ бидэ мэдэнэбди. Хэрбээ Бурханай үршөөгөөгүй хаа, ши иимэ гайхамшагта үзэгдэлнүүдые харуулжа шадахагүй һэнши, – гэжэ хэлээ һэн.
- ³– Дахин түрэхэн лэ хүн Бурханай хаан ороние үзэхэ гэжэ би шамда үнэниие хэлэнэб! – гэжэ Иисус тэрээндэ харюусаба.
- ⁴– Наһаяа хүсэхэн хүн яагаад дахин түрэхэ юм? Тиимэ хүн эхын умайда дахин орожо, хоёрдохийо түрэхэгүй бшуу.
- ⁵– Би шамда үнэниие хэлэнэб: уһанһаа, һүлдэхөө түрэхэн хүн лэ Бурханай хаан орондо орожо шадаха!
- ⁶Хүнэй бэеһээ түрэхэн юумэн бэе махабад мүн, имагтал һүлдэхөө һүлдэ түрэдэг юм.
- ⁷«Таанар дахин дээрэхэ түрэхэ ёһотойт», – гэжэ минии хэлэхэдэ бү гайхаарайт.
- ⁸Һалхин дуратайл газартаа һалхилдаг. Һалхинай һалхилхые мэдэбэшье, хэзээ, хайшаа үлеэхыень таанар мэдэдэггүйт, Нангин һүлдэхөө түрөөшэд энээндэл адли юм.
- ⁹– Тиимэ юумэ байжа болохо аал? – гэжэ Никодим һураба.
- ¹⁰– Ши Израилиин багша аад, энээниие мэдэнэгүй аалши? – гэжэ Иисус харюудань хэлэбэ. –
- ¹¹Бидэ өөһэдынгөө мэдэхэ, хараһан үзэхэн юумэн тухайгаал гэршэлнэбди гэжэ үнэн зүбые хэлэнэб, харин таанар бидэнэй гэршэ баримта буруушаанат.
- ¹²Газар дэлхэй дээрэхи юумэн тухай минии хэлэхэдэ намда этигэхэгүй аад, тэнгэрийн юумэн тухай хэлэхэдэмни яагаад таанар этигэхэбта даа?
- ¹³Тэнгэриһээ буужа ерэхэн Хүн түрэлхитэнэй Хүбүүнһээ ондоо хэншье Тэнгэридэ гаража үзөөгүй ха юм.



14-15 Моисей сүл губяар ябахандаа зэдээр бүтээһэн могой өөдэнь үргөө бэлэй. Тэрээндэл адляар, тэрээндэ этигэһэн бүхы хүнүүдэй хэтэ мүнхэдөө амидархын тула Хүн түрэлхитэнэй Хүбүүн өөдөө дэгдэгдэхэ юм.

16 Бурхан газар дэлхэйн хүнүүдтэ тон ехээр дурлажа, тэдэнэй хосоронгүй, хэтэ мүнхэдөө амидархын тула өөрынгөө ори ганса Хүбүүе үргэл болгожо үгөө бшуу.

17 Юундэб гэбэл, Бурхан газар дэлхэйнхидые зэмэлхын тула бэшэ, харин тэдэниие абархын тула Хүбүүгээ газарта эльгээгээ ха юм.

18 Тэрэ Хүбүүндэнь этигэдэг хүн гэмнүүлхэгүй, харин этигэдэггүй хүн мүнөөшье гэмнүүлээд байна, юундэб гэбэл, тиимэ хүн Бурханай ганса Хүбүүндэ этигээгүй бшуу.

19 Гэмнэлгын удхань иимэ: газар дэлхэйдэ Гэрэл туяагай ерэхэдэнь, хүнүүд шэг харанхы байдалда Гэрэл туяаһаа үлүү ехээр дурлаа, ушарынь гэхэдэ, хүнүүдэй үйлэ хэрэг муу муухай ха юм.

20 Муу юумэ хэдэг хүн гэрэл туяа үзэн ядадаг, муу муухай үйлэ хэрэгни элирэн мэдэгдэхэ гэжэ айгаад, гэрэл туяада ошодоггүй юм.

21 Харин үнэн сэхээр ажаһуудаг хүн гэрэл туяа тээшэ эрмэлзэнэ, юундэб гэхэдэ, тэрэнэй үйлэ хэрэгынь Бурханай урда хэгдэнэ гэжэ элирнэ бшуу.

Иисус ба Уһаар арюудхагша Иоанн тухай

22 Удаань Иисус шабинартаяа хамта Иудей ошожо, тэндэ хэдэн сагай үргэлжэдэ хүнүүдые уһаар арюудхан байба.

23 Харин Иоанн тэрэ үедэ Салимай хажуудахи Энон голой уһаар арюудхажа байгаа. Тэрэ газарта уһан ехэ элбэг байһан юм. Хүнүүд Иоаннда ерэхэ, уһаар арюудхуулдаг һэн.

24 Энэнь Иоаннай түрмэдэ хаагдахын урдахана болоһон ушар.

25 Нэгэтэ Иоаннай шабинар еврейнүүдэй арюудхалгын заншал тухай асуудалаар нэгэ еврейтэй арсалдаба.

²⁶Тэдэ Иоаннда ерээд: – Рабби аа, Иордан голой саада бээдэ байхадаа, нэгэ хүн тухай хэлэхэнээ һанана гүт? Тэрэтнай баһал уһаар арюудханал, хүнүүд тэрээндэ барандаа ошожо байнал! – гэбэд.

²⁷– Тэнгэрийн үршөөгөөгүй юумэ хэншые абажа шадахагүй, – гэжэ Иоанн харюусаба. –

²⁸«Би Бурханай табисуурта бэшэб, би миин лэ тэрээнһээ урда эльгээгдэхэн байнаб», – гэжэ минии хэлээшые таанар өөһэдөөшые баталха байхат.

²⁹Хадамда гараха басага гэртээ асарһан хүн тэрэ басаганай нүхэрынъ гээшэ. Гэрлэхэ хүнэй хажууда зогсожо байһан дүтынъ нүхэр хүбүүнийнъ тэрэнэй хэлээшые шагнан баясадаг. Тиин намдашые тиимэ ехэ баяр баясхалан тудaa.

³⁰Гэрлэхэ хүбүүнэй алдаршаха саг ерээ. Харин минии саг дүүрэжэ байна.

³¹Дээдын тэнгэриһээ ерэгшэ газарайхидһаа бултанһаанъ дээгүүр байна. Газар дэлхэйн хүн газар дэлхэйһээ байжа, газарайхяар лэ хэлэдэг юм. Харин дээдын тэнгэриһээ ерэхэн хүн бултанһаа дээгүүр юм.

³²Тэрэ хүн нюдөөрөө хараһанаа, шэхээрээ дуулаһанаа өөрөө гэршэлэн хэлэнэ, теэд тэрэнэй гэршэ баримтада хэншые этигэнэгүй.

³³Тэрээндэ этигэхэн хүн Бурханай үнэн зүб байдагыень гэршэлнэ.

³⁴Бурханай эльгээхэн хүн Бурханай үгэ номноно, юундэб гэбэл, Бурхан тэрээндэ Нангин һүлдэ хизааргүй ехээр үршөөнэ.

³⁵Эсэгэ Бурхан болбол Хүбүүндээ дуратай байжа, бүхы юумэ тэрээнэйгээ мэдэлдэ үгөө.

³⁶Бурханай Хүбүүндэ этигэдэг хүн хэтэ мүнхын ажаמידаралда хүртэбэ, харин энэ Хүбүүниие буруушааһан хүн хэтын амидарал үзэхэгүй, теэдшые Бурханай уур сухал хододоо хүргэжэ байха.

Иоанн 4

Иисус ба самарян эхэнэр хоёр тухай

¹⁻³Иисус Иоаннаашье олон шабинартай боложо, Иоаннаашье олон хүнүүдые уһаар арюудхана гэжэ фарисейнүүд дуулаба. (Үнэхөөрөө Иисус өөрөө хэниешье уһаар арюудхадаггүй, харин тэрэнэй шабинарынь арюудхадаг байгаа.) Иисус энээниие мэдээд, Иудейһээ гаража, һөөргөө Галилейдэ ошобо.

⁴Тэрэнэй харгы Самариин газар дайдаар ошоһон байна.

⁵Тиин Сихар гэжэ нэрэтэй самарян хотодо Иисус хүрэжэ ерэбэ. Тэрэ хотонь Иосиф гэжэ хүбүүндээ Яковай үгэһэн хубита газарһаа холо бэшэ оршодог һэн.

⁶Тэндэнь Яковай худаг байдаг һэн ха. Иисус харгыдаа эсээд, тэрэ худагай хажууда ерэжэ, амархаяа һууба. Тиихэдэ хахад үдэр боложо байгаа.

⁷Худагһаа уһа удхажаяа самарян эхэнэр ерэбэ. – Намда уһа уулгажа хайрлыт, – гэжэ Иисус тэрэ эхэнэртэ хандаба.

⁸(Тэрэ үедэ Иисусай шабинар эдихэ юумэ худалдажа абахаяа хото ошоһон байгаа.)

⁹– Иихэдээ хайшаа юм гээшэб? Ши еврей хүн аад, самарян эхэнэрһээ уһа эринэ гүш? – гэжэ тэрэнь Иисуста гайхан хэлэбэ. (Ушарынь гэхэдэ, еврейнүүд самарянуудтай нэгэ амһартаһаа юумэ уудаг эдидэггүй һэн.)

¹⁰– Бурханай юу үршөөдэгы, шамһаа уһа эриһэн хүнэй хэн байһые мэдэжэ байгаа һаа, ши өөрөө тэрэниие гуйха бэлэйш, тиихэдэшни тэрэ хүн шамда амидаралта уһа үгэхэ һэн, – гэжэ Иисус харюусаба.

¹¹– Эзэмни аа, энэ худаг гүнзэгыл, харин ши уһа удхаха хүнэггүйлши. Тиигээд амидаралта уһа хаанаһаа олохобши?

¹²Манай үбгэ эсэгэ Яковай манда орхихон энэ худагһаа тэрэ өөрөөшье, тэрэнэй хүбүүдынъшье, мал адууһаниинъшье уудаг һэн лэ. Ши Яковһаа дээгүүр хүн гүш?

¹³– Энэ уһа ууһан хүн дахин ундаа хүрэхэ.

¹⁴Харин минии үгэхэ уһа ууһан хүн хэзээдэшье ундаа хүрэхэгүй юм. Минии үгэхэ уһан тэрэ хүнэй досоо булаг болон дэлгэржэ, мүнхын амидарал олгохо юм.

¹⁵– Эзэмни аа, намда тиимэ уһа үгыш даа, тиигээ һаашни, би ундаа хүрэхээ болижо, иишэ уһанда ерэхээ болихолби.

¹⁶– Ошожо, үбгээ наашань дуудаад ерэ, – гэжэ Иисус хэлэбэ.

¹⁷– Би нүхэргүйб, – гэжэ тэрэ эхэнэр харюусаба. – Нүхэргүйб гэжэ ши зүб хэлээш.

¹⁸Ши таба дахин хадамда гарааш, мүнөө шамтай һуугша хүн үбгэншни бэшэ. Ши үнэн зүбөө хэлээш, – гэбэ Иисус.

¹⁹Тиихэдэнь эхэнэр хүниинь: – Эзэмни аа, шинии лүндэншэ байһые би ойлгожо байнаб, – гэжэ Иисуста хэлэбэ. –

²⁰Манай үбгэ эсэгэнэр энэ хада дээрэ гаража Бурханда мүргэдэг һэн, тиихэдэ таанар гансал Иерусалимда Бурханда мүргэхэ газар бии гэнэлта.

²¹– Эхэнэр аа, намда этигэлши: Эсэгэ Бурхандаа таанар энэ хада дээрэшье гаража, Иерусалимдашье ошожо мүргэхэгүй байха тиимэ саг ерэжэ байна.

²²Хэндэ хүзэглэн мүргэдэгөө таанар мэдэнэгүйт, харин бидэ хэндэ хүзэглэн мүргэжэ байдагаа мэдэнэбди: юртэмсэ дэлхэйн абаралга еврейнүүдһээ ерэхэ юм.

²³Бурханай хүлдын үнэн зүбэй хургаһан ёһоор Эсэгэ Бурханда үнэн зүбөөр хүгэдэн мүргэхэ саг ерэжэ байна, ерээдшье байна! Энэнь үнэн

бодото хүгэдэлгэ мүн. Эсэгэ Бурхан өөрыень иигэжэл хүндэлхые хүсэнэ.

²⁴Бурхан болбол хүлдэ мүн; тиин Бурхание үнэн дээрээ хүндэлхэнь Бурханай хүлдын үнэн зүбэй хургаһан ёһоор тэрээндэ хүгэдэн мүргэхэ болоно.

²⁵– Бурханай табисуурта (ондоогоор хэлэбэл Христос) ерэхэ, тиигээд бүгэдые манда ойлгуулха гэжэ мэдэнэб, – гэжэ эхэнэр хэлэбэ.

²⁶– Тэрэшни биб, шамтай мүнөө хөөрэлдэжэ байнаб, – гэжэ Иисус харюусаба.

²⁷Энэ үедэ тэрэнэй шабинар бусажа ерэбэ. Самаряан эхэнэртэй Иисусай хөөрэлдэжэ байхада ехээр гайхалдабашье, юундэ хөөрэлдэһэн тухайнь нэгэнииньшые асуубагүй.

²⁸Тэрэ эхэнэрынь домбоёо хаяжа, хото хүрэжэ, хүнүүдтэ:

²⁹– Наһаараа хэһэн бүхы юумэнүүд тухаймни намда хэлэжэ үгэһэн хүниие таанар ошожо харагты. Магад, тэрэ Бурханай табисуурта аалам? – гэжэ дуулгаба.

³⁰Тэдэ хүнүүд городһоо гаража, Иисуста ошобо.

³¹Энэ үедэ шабинарынь: – Рабби аа, эдеэлэ! – гэжэ гуйба.

³²– Эдихэ юумэн намда бии, тэрээн тухаймни таанад мэдэнэгүйт, – гэжэ Иисус харюусаба.

³³– Магад, энээндэмнай хэн нэгэн эдихэ юумэ асараа гү даа? – гэжэ шабинарынь өөһэд хоорондоо хөөрэлдэбэ.

³⁴– Намайе эльгээһэн Бурханай хүсэл дурыень бээлүүлэн, намда даалгаһан ажал хэрэгыень түгэсхэхэ гээшэ – минии эдее хоол мүн, – гэжэ Иисус тэдэндэ хэлэбэ. –

³⁵«Үшөө дүрбэн һараһаа таряа хуряаха саг ерэхэ» гэжэ таанар хэлэдэг бэшэ гүт? Харин мүнөө нюдөө нээгээд, таряалангай газар тээшэ

харагты даа: талха таряан эдеэшэжэ, хадаха хуряахаар бэлэн болоод, халюуран сайран байна лэ.

³⁶Таряа хадагша өөрынгөө түлөөһэ абадаг, мүнхэ амидаралай тула ургаса хуряадаг юм, тиин таряа таригшашье, таряа хадагшашье адли баясадаг байна.

³⁷«Нэгэниинь тарیداг, нүгөөдэнь хададаг» гэхэн оньһон үгэ мүнөө баталагдаба гээшэ.

³⁸Таанарай урдань ажаллаагүй, бусадай хэһэн ажалай үрэ дүндэ хүртэхынтнай тула талха таряа хадахыетнай би эльгээнэб.

³⁹«Тэрэ хүн наһаараа хэһэн бүхы юумэнүүд тухаймни намда хэлэжэ үгөө» гэхэн эхэнэрэй ашаар энэ хотын олон тоото самаряан зон Иисуста этигэбэ.

⁴⁰Самаряанууд Иисуста ерэжэ, манайда улыт даа гэжэ гуйба. Тиихэдэнь Иисус тэдэнэйдэ хоёр үдэрөөр үлэбэ.

⁴¹Самаряануудтай хөөрэлдэхэдэнь, Иисуста бүри олон хүн этигэбэ.

⁴²– Бидэ шинии хэлэһэнээр тухайлна бэшэбди, харин энэ хүнэй хэлэһые өөһэдөө шагнаад байхадаа, энэ хүн үнэхөөрөөл дэлхэйн зоние Абарагша байна гэжэ одоол мэдээбди, – гэжэ тэрэ эхэнэртэ самаряанууд хэлэбэд.

Түшэмэлэй хүбүүе абарба

⁴³Хоёр хоноод, Иисус тэндэһээ Галилей ошобо.

⁴⁴«Лүндэншые түрэхэн нютагтань хүндэлдэггүй юм», – гэжэ Иисус өөрөө хэлээ һэн.

⁴⁵Теэд Галилейдэ ерэхэдэнь, тэрэниие галилейнхин баяртайгаар угтаба: юундэб гэбэл, тэндэхин Иерусалимда болоһон найрта хабаадалсажа, тэндэ Иисусай бүтээһэн бүхы гайхамшаг хэрэгүүдые хараһан байгаа.

⁴⁶Тиин Иисус Галилейн Канада дахин ерэбэ. Түрүүн энэ нуурида юрын уһа үзэмэй архи болгоо һэн. Капернаумда ажаһуудаг нэгэ түшэмэлэй хүбүүниинь ехээр үбдэжэ байгаа.

⁴⁷Иисус Иудейһээ Галилейдэ бусаа гэжэ дуулаһаар тэрэ түшэмэл Иисуста хүрэжэ: «Капернаумда ерэжэ, үхэхээ байһан хүбүүем аргалыт даа», – гэжэ гуйба.

⁴⁸– Гайхамшаг дүлгэ тэмдэгүүдые болон хэрэгүүдые үзөө хараагүй һаа, хэнтнайшье этигэхэгүйл! – гэжэ Иисус тэрээндэ харюусаба.

⁴⁹– Эзэмни! Хүбүүнэймни наһа барашоодүйдэ Капернаум ошоёл даа! – гэбэ түшэмэлынь.

⁵⁰– Гэртээ хари, хүбүүншни амиды мэндэ ябаха, – гэбэ Иисус. Тиихэдэнь тэрэ хүн Иисусай хэлэһэн үгэнүүдтэ этигэжэ, харгы замдаа мордобо.

⁵¹Бүри харгыдаа ябахадань, түшэмэлые зарасанарынь угтажа, хүбүүншни элүүр мэндэ байна гэжэ дуулгаба.

⁵²– Хүбүүнэймни бэень хэды сагта бараг болооб? – гэжэ тэрэ асууба. – Үсэгэлдэр, үдэрэй нэгэ сагта халууниинь буураа, – гэжэ тэдэ харюусаба.

⁵³«Хүбүүншни амиды мэндэ ябаха», – гэжэ Иисусай хэлэһэн эгээл тэрэ сагта хүбүүмни һайн болоо гэжэ эсэгэнь ойлгоо. Тиигэжэ түшэмэл өөрөөшье, тэрэнэй гэртэхиньшье Иисуста этигэбэ.

⁵⁴Энэнь Иудейһээ Галилейдэ ерэхэдээ Иисусай харуулһан хоёрдохи гайхамшаг хэрэг мүн.

Иоанн 5

Хониной сөөрэмэй хажууда эдэгээбэ

¹Удаань еврейнүүдэй һайндэр болобо. Иисус Иерусалим ошоо бэлэй.

²⁻³Еврей хэлээр Бетзата гэжэ нэрэтэй томо сөөрэм бии һэн, тэрэнь Иерусалимдахи Хониной хаалгын хажууда байгаа. Тэрэ сөөрэмэй хажууда табан һарабшанууд доро олон үбшэн зон хэбтээ. Тэдэнь һохор,

дохолон, саа үбшэнтэн бэлэй. [Тэдэ хүнүүд уһанай салгидахые хүлээжэ байгаа.

⁴Юундэб гэхэдэ, Бурханай Эльгээмэл заримдаа эндэ буужа, сөөрэмэй уһа салгидуулдаг байгаа, тиихэдэнь сөөрэмдэ түрүүн орожо абанан хүнэй ямаршые үбшэн эдэгэшэдэг байгаа.]

⁵Гушан найман жэл соо үбдэжэ байһан нэгэ хүн тэдэнэй дунда бии һэн.

⁶Иисус тэрэ хүнэй хэбтэхые харахадаа, иимэ удаан үбдэжэ байһыень мэдээд: – Ши элүүр мэндэ болохоёо һанана гүш? – гэжэ асууба.

⁷Үбшэн хүниинь: – Эзэмни, уһанай салгидахада нэгэшые хүн намайе сөөрэмдэ шунгуулхагүйл. Уһанда орохоёо ошомсоорни, намһаа урда ондоо хүн орошонол, – гэжэ харюусаба.

⁸– Ши бодо, дэбдихэрээ абаад яба, – гэжэ Иисус тэрээндэ хэлэбэ.

⁹Үбшэн хүниинь тэрэ дороо элүүр боложо, дэбдихэрээ абаад ябаба. Тиихэдэ субботын, еврейнүүдэй амаралтын үдэр һэн.

¹⁰Еврейнүүдэй ахаматууд аргалуулһан хүндэ хандан: – Мүнөөдэр суббото. Ши дэбдихэрээ абажа ябаха ёһогүйш! – гэбэд.

¹¹– Намайе эдэгээһэн хүн «дэбдихэрээ абаад яба» гээ һэн, – гэжэ тэрэнь харюусаба.

¹²– «Дэбисхэрээ абаад яба» гээд шамда хэлэһэн хүн хэн гээшэб? – гэжэ тэдэнь һураба.

¹³Тээд аргалуулһан хүниинь тэрэниие мэдэхэгүй байгаа, юундэб гэбэл, Иисус тэндэ байһан олон зоной дундуур далда орожо ошоһон байгаа.

¹⁴Хожомынь Иисус тэрэ хүниие Бурхан хүмэ соо олоод: – Зай, одоо ши элүүр мэндэ болобош. Саашадаа бүри муу юумэн болохогүйн тула ондоо нүгэл бү хэ, – гэбэ.

¹⁵Тиихэдэнь тэрэ хүн ахаматуудта һөөргөө ошожо, намайе Иисус эдэгээгээ гэжэ дуулгаба.

¹⁶Иимэ юумэ субботодо хэһэнэйн түлөө еврейнүүдэй ахамадууд Иисусые мүрдэжэ захалба.

¹⁷Тээд Иисус тэдэндэ: – Минии Эсэгэ хододоо ажаллажа байдаг юм, бишье баһал ажалланаб, – гэжэ харюусаба.

¹⁸Тиихэдэнь еврейнүүдэй ахамадууд Иисусые алаха гэжэ бүри ехээр оролдобо: хорюултай байһан субботын үдэр ажаллахаһаа гадна, Бурхание Эсэгэмни гэхэдээ, өөрыгөө Бурхантай зэргэсүүлбэ гэлдэбэ.

Иисус болбол Бурханай үршөөһэн эрхэтэй юм

¹⁹Тээд Иисус тэдэндэ харюусаба: – Би таанарта үнэниие хэлэнэб: Хүбүүниинь өөрынгөө дураар юушье хэжэ шадахагүй. Эсэгэнь хайшан гээд хэнэб, тэрэниинь хараад лэ Хүбүүниинь хэдэг. Эсэгэнь юу хэнэб, тиимэл юумэ Хүбүүниинь хэдэг.

²⁰Юундэб гэбэл, Эсэгэнь Хүбүүндээ дуратай байдаг дээрэһээ өөрынгөө хэдэг бүхы юумэ хүбүүндээ харуулдаг юм. Эсэгэнь тэрэндэ бүришье ехэ гайхамшаг дүлгэ тэмдэг харуулха байна, таанар бултадаа үшөөл гайхахат.

²¹Эсэгэнь үхэһэн хүнүүдые амидыруулдаг, тиин Хүбүүнииньшье дуратайл хүнүүдээ амидыруулдаг байна.

²²⁻²³Эсэгэнь хэниешье шүүбэрилдэггүй. Эсэгэнь хүндэлдэгтэл адляар Хүбүүень бултанай хүндэлжэ байхын тула зарга шүүбэри хэхэ бүхы эрхээ тэрэ Хүбүүндээ дамжуулан үгөө. Хүбүүе хүндэлөөгүй һаа, тэрэниие эльгээһэн Эсэгэньшье баһал хүндэлнэгүй гээшэ.

²⁴Би таанарта үнэниие хэлэнэб: минии үгэ дуулаһан хүн, намайе эльгээгшэ Эсэгэдэ этигэдэг хүн хэтэ мүнхэдөө амиды мэндэ ябаха. Тиимэ хүн гэмнүүлхэгүй – тиимэ хүн үхэлһөө абарагдан, амидырба гээшэ.

²⁵Би таанарта үнэниие хэлэнэб: Бурханай Хүбүүнэй хэлэһые наһа бараһан хүнүүдэй дуулаад, амидырха саг ерэжэ байна, мүнөө ерээдшье байна.

²⁶Эсэгэнь мүнхэдөө амидаралгын шанартай юм, тиин Хүбүүгээшье тэрэнь иимэ шанартай болгоһон байна.

²⁷Зарга шүүбэри хэхэ эрхэ засагые Эсэгэнь Хүбүүндээ үгөө һэн, ушарынь гэбэл, Хүбүүниинь Хүн түрэлхитэнэй Хүбүүн мүн.

²⁸Таанар энээндэ бү гайхаарайт. Юундэб гэбэл, үхэхэн хүнүүд бултадаа дахин амидыраад, Хүбүүнэй дууень дуулажа,

²⁹үхээриингээ газарһаа гараха – хайн юумэ хэхэн хүнүүд амиды мэндэ ябаха, муу юумэ хэхэн хүнүүд гэмнүүлхэ.

³⁰Би өөрынгөө дура зоргоор юушье хэжэ шадахагүйб. Эсэгынгээл хэлээшээр шүүбэрилнэб, тиин минии зарга шүүбэри – үнэн зүб юм, ушарынь гэбэл, би өөрынгөө дураар юумэ хэнэ бэшэб, харин намайе эльгээгшэ Эсэгын дура хүсэлөөр болоноб.

Иисус тухай гэршэнүүд

³¹Хэрбээ өөр тухайгаа өөрөө хэлээ һаамни, минии гэршэнүүд үнэн зүб бэшэ байха һэн.

³²Зүгөөр намайе гэршэлдэг нэгэ гэршэ бии юм. Нам тухай тэрэнэй гэршэлэн хэлэдэг бүхы үгэнүүд үнэн зүб юм гэжэ би мэдэнэб.

³³Таанар өөһэдынгөө хүнүүдые Иоаннда эльгээгээ һэнта, тиин тэрэ хүн үнэн зүб гэршэ баримта үгөө һэн.

³⁴Тээд хүнүүдые өөрынгөө гэршэ болгохо гэжэ оролдоһоноймни хэрэг намда үгы, харин таанарайл абарагдахын түлөө тэдэниие гэршэ болгон баринаб.

³⁵Иоанн болбол ялагар һаруул дэн мэтэ байгаа. Тэрэнэй гэрэл туяагай хажууда таанар ойр зуура баясаха хүсэлэнтэй байгаат.

³⁶Харин Иоаннайхиһаашье ехэ нам тухай гэршэ бии юм. Эсэгэһээмни үгтэхэн гайхамшаг хэрэгүүдые бүтээһэмни намайе Эсэгэмни эльгээгээ юм гэжэ гэршэлнэ!



³⁷Намайе эльгээһэн Эсэгэ тиигэжэ нам тухай өөрөө гэршэлнэ гэшэ. Эсэгымни үгэ хэлэхые таанар хэзээдэшые дуулаа шагнаагүйт, өөрыень таанар хэзээдэшые хаража үзөөгүйт.

³⁸Тэрэнэй хэлэһэн үгые таанар зүрхэ сэдхэлдээ хадуужа ябанагүйт, юундэб гэбэл, тэрэнэй эльгээһэн нэгэндэ таанар этигэнэгүйт.

³⁹Мүнхын амидарал олохобди гэжэ этигэн, таанар Нангин Бэшэгые оролдосотойгоор шудалнат. Теэд Нангин Бэшэгтэшые нам тухай гэршэлэн хэлэгдэнэ!

⁴⁰Тиибэшые намда ерэжэ, мүнхын амидаралда хүртэхэ дурагүй байналта.

⁴¹Хүнүүдэй магтаал намда хэрэггүй.

⁴²Би таанарые һайса мэдэжэ байнаб: таанар Бурханда дуратай бэшэт!

⁴³Би өөрынгөө Эсэгын дура хүсэлөөр ерээб – теэд таанар намайе хүлеэжэ абанагүйт. Харин нэрэ хүндэдэ дуратай ондоо хүнэй өөрынгөө хүсэлөөр ерэхэдэнь, таанар тэрэниие хүлээн абахат!

⁴⁴Таанар бэе бээдээ магтуулхаяа ехээр хүсэнэт, харин Бурханай магтаалда хүртэхэ гэжэ оролдоногүйт! Таанартал адли хүнүүд намда этигэхэ аал?

⁴⁵Эсэгынгээ урда таанарые зэмэлхээ ерээ гэжэ намайе бү һанагты. Таанарые Моисей зэмэлхэ, харин таанар Моисейдэ найдадаг ха юмта.

⁴⁶Хэрбээ таанар Моисейн үгэдэ үнэншөө һаа, минишые үгэдэ үнэншэхэ ёһотой байгаалта, юундэб гэбэл, нам тухай Моисей бэшээ юм.

⁴⁷Теэд Моисейн бэшэһэн үгэнүүдтэ үнэншөөгүй аад, таанар минии хэлэһэн үгэдэ этигэхэ аалта?

Иоанн 6

Иисус хүн зониие гайхамшаг аргаар садхааба



- ¹Энээнэй һүүлдэ Иисус Галилейн гэхэ гү, али Тибериадай нуурай нүгөө эрьедэ гараба.
- ²Хойноһоонь олон зон дахалдаба, юундэб гэхэдэ, үбшэн хүнүүдые гайхамшаг аргаар Иисусай эмнэн эдэгээхые үзэһэн хараһан байна бшуу.
- ³Иисус шабинартаяа хамта хада дээрэ гаража һууба.
- ⁴Еврейнүүдэй Паасхын һайндэр болохонь ойртожо байгаа.
- ⁵Иисус урдаһаань олон зоной ерэжэ ябахые хараад, Филипптэ хандан: – Эдэ зониие эдеэлүүлхэ хилээмэ хаанаһаа худалдажа абахамнай гээшэб? – гэжэ хэлэбэ.
- ⁶Иисус юу хэхээ мэдэжэ байгаад, Филиппые туршан тиигэжэ хэлээ бшуу.
- ⁷– Хоёр зуун динари мүнгөөр хилээмэ худалдажа абаад, зүһэм зүһэмөөршье хубаагаа һаа, бултанда хүртэхэгүйл, – гэжэ Филипп харюусаба.
- ⁸Шабинарайнь нэгэн, Симон Петрой дүү Андрей:
- ⁹– Эндэ байһан нэгэ хүбүүндэ таба монсогор ешмээн хилээмэн, хатаһан хоёр загаһа бии. Теэд иимэ олон хүн зондо энэнь яажа хүртэхэб даа? – гэжэ хэлэбэ.
- ¹⁰– Хүн зониие һуулгагты, – гэжэ Иисус захирба. Тэрэ газартань үдхэн ногоон ургажа байгаа. Тэндэнь табан мянга шахуу ганса эрэшүүл һуубад.
- ¹¹Иисус хилээмыень абаад, Бурханда баясхалан хүргэн, тэндэ һуугшадта хубаан үгэбэ. Мүн загаһыень баһал хүн бүхэндэ дураарнь хубаажа үгэбэ.
- ¹²Хүнүүдэй эдеэлжэ садахадань, Иисус: – Үлөөшэ хилээмээ бултыень суглуулагты, юушье бү орхигты, – гэжэ шабинартаа хэлэбэ.



13 Таба монсогор ешмээн хилээмэнһээнһэнь үлэһэн зүһэмүүдые арбан хоёр түрсүүг дүүрэтэр шабинарынһы суглуулба.

14 Иисусай хэһэн иимэ гайхамшаг хэрэгүүдые хараад: – Энэмнай газар дэлхэйн зондо заларжа ерэхэ ушартай байһан ёһоороол тэрэ лүндэншэ юм байна! – гэжэ хүнүүд хэлсэбэ.

15 Эдэ хүнүүд намайе барижа, баалалтаар хаан болгожо табихаяа байна гэжэ ойлгоод, Иисус гансаараа дахин хада дээрэ гараба.

Иисусай уһан дээгүүр ябаһан тухай

16 Үдэшэ болоходо Иисусай шабинарынһы нуурай эрьедэ ошобо.

17 Тиин онгосодо һуугаад, нуурай нүгөө бээдэ оршодог Капернаум хото тамаран ошобо. Харанхы болобошые, Иисус үшөө ерээдүй байгаа.

18 Тэрэ үедэ шанга һалхин боложо, нуур ехээр долгилбо.

19 Нуурай эрьехээ таба-зургаан модо газарта онгосоороо тамаржа ошоод, шабинарынһы Иисусайнгаа нуурай уһан дээгүүр алхалан, онгосодонь дүтэлжэ ябахые хараба. Тэдэн ехээр айжа мэгдэбэ.

20 – Энэ би байнаб, бү айгты! – гэбэ Иисус.

21 Шабинарынһы Иисусые онгосодоо һуулгаха һанаатай байба, теэд онгосонь тэрэ дороо зорихон эрьедээ хүрэхэ ерэшэбэ.

Иисус – Амидаралай хилээмэн мүн

22 Нүгөөдэ үдэрынһы нуурай саана үлэһэн хүнүүд үсэгэлдэр тэндэнь гансахан лэ онгосо байгаа бэлэй гэжэ һанаба. Теэд Иисус һурагшадтайгаа хамта тэрэ онгосодо һуугаагүй, харин һурагшадынһы амяараа тамаран ошоо һэн гэжэ тэдэ зон баһал мэдэжэ байгаа.

23 Тиихэдэ Тибериадаһаа хүн зон хэдэн онгосонуудта һуугаад, Дээдын Эзэнэй Бурханда баясхалан хүргэһэнэй һүүлдэ олошоруулагдаһан хилээмэ зоной эдиһэн газарта тамаран ерэбэ.



²⁴Тээд тэндэнь Иисусшые, шабинарыньшые байбагүй, тиимэһээ тэндэ байһан зон онгосонуудта һуугаад, Иисусые бэдэржэ, Капернаум руу тамаран ошобо.

²⁵Нуурай нүгөө эрьедэ тэдэнэр тамаран ерэжэ, Иисусые олоод: – Багша аа, ши хэзээ иишэ ерэшэһэн байбаш? – гэжэ асууба.

²⁶Иисус тэдэндэ иигэжэ харюусаба: – Таанар гайхамшаг дүлгэ тэмдэгүүдые үзэһэн хараһанһаа бэшэ, харин хилээмэ эдижэ садаһан дээрэһээл намайе бэдэрнэт гэжэ таанадта үнэн зүбые хэлэнэб.

²⁷Тээд таанар саг зуурын эдеэндэ һаналаа бү табигты, харин мүнхын амидарал олгодог эдеэндэ һаналаа табигты. Тиимэ амидаралые таанарта Хүн түрэлхитэнэй Хүбүүн үгэхэ, юундэб гэбэл, Бурхан Эсэгэмнай тэрээндэ эрхэ засагаа үршөөгөө юм.

²⁸– Бурханай заабари бээлүүлхын тула бидэ юу хэхэ ёһотой гээшэбди? – гэжэ тэдэнь асууба.

²⁹– Бурханай эльгээһэн хүндэ таанар этигэгты, тиихэдээл Бурханай хэрэгые бүтээһэн болохот, – гэжэ Иисус харюусаба.

³⁰– Тээд ямар дүлгэ тэмдэгыешни хараад, бидэ шамда этигэхэ болонобди? Ши юу хэхэбши? – гэжэ тэдэ асууба. –

³¹Манай үбгэ эсэгэнэр сүл губида ябахадаа, ман эдидэг байгаа. «Тэнгэриһээ тэдэндэ хилээмэн үгтэһэн юм», – гэжэ Нангин Бэшэг соо бэшэгдэнхэй.

³²Тиихэдэнь Иисус: – Би таанарта үнэн зүбые хэлэнэб: Бурханай хилээмэ таанарта Моисей үгөөгүй, тиимэ ёһотой хилээмэ минии Эсэгэ Бурхан таанарта үгэдэг юм.

³³Юундэб гэбэл, Бурханай хилээмэн хадаа Тэнгэриһээ буужа ерээд, энэ дэлхэйн зондо ажамидарал үгэгшэ мүн, – гэжэ харюусаба.

³⁴– Эзэн аа, бидэндэ тиимэ хилээмэ хододоо үгэжэ байгыш! – гэжэ тэдэнь хэлэбэ.

35– Би өөрөө ажамидаралай хилээмэн гээшэб. Намда ерэдэг хүн хэзээдэшые үлэн хооһон байхагүй, намда этигэдэг хүн хэзээдэшые ундаа хүрэхэгүй.

36Теед энээниие өөһэдөө үзэһэн хараһаншые һаа, этигэнэгүйт гэжэ таанарта хэлээ һэм.

37Минии Эсэгийн намда үгэһэн хүн бүхэн намда ерэхэ. Тиин намда ерэһэн хүниие би намнажа үлдэхэгүйб.

38Юундэб гэхэдэ, өөрынгөө дураар юумэ хэхээ би тэнгэриһээ буужа ерээ бэшэб, харин намайе эльгээһэн Эсэгийн дура хүсэлые бээлүүлхээ ерээб.

39Тиин намайе эльгээһэн Эсэгийн дура хүсэлынъ иимэ юм: тэрэнэй намда үгэһэн хүнүүдэй нэгыеньшые хосороонгүйгөөр, һүүлшын Үдэртэ бүгэдые амидыруулха гээшэ.

40Юундэб гэбэл, минии Эсэгийн дура хүсэлынъ иимэ юм: Бурханай Хүбүүе харадаг үзэдэг, тэрээндэ этигэдэг хүн бүхэн мүнхэ наһатай болохо. Тиин һүүлшын Үдэр би тэдэниие амидыруулхаб.

41«Би тэнгэриһээ буужа ерэһэн хилээмэн гээшэб», – гэжэ Иисусай хэлэхэдэнь, тэндэ сугларагшадай дунда гэмэрэлдээн болобо.

42– Энэмнай Иосифой хүбүүн Иисус ха юм? Тиимэ бэшэ аал? Бидэ тэрэнэй эсэгыеньшые, эхыеньшые мэдэхэбди. Теед «Би тэнгэриһээ буужа ерээб», – гэжэ энэ юундэ хэлэжэ байнаб? – гэлдэбэ тэдэнь.

43– Таанар бү гэмэрэлдэгты.

44Минии Эсэгэмни хэниие намда ерүүлнэб, тэрэл хүн намда ерэжэ шадаха. Иимэ хүниие һүүлшын Үдэртэ би амидыруулхаб.

45«Бүхы хүнүүдые Бурхан һургаха», – гэжэ лүндэншэд бэшэһэн байна. Эсэгийн үгэ дуулажа, тэрэнэй һургаал ойлгожо абаһан хүн намда ерэхэ.

46Теед Эсэгы хэншые хараагүй юм. Тэрэниие Бурханһаа ерэгшэл гансаараа хараа юм.



⁴⁷Таанарта үнэн зүбые хэлэнэб: намда этигэдэг хүн мүнхэ наһанда хүртөөд байна.

⁴⁸Би ажамидаралай хилээмэн гээшэб.

⁴⁹Таанарай үбгэ эсэгэнэр сүл губида ябахатаа, ман эдибэшье, үхэхэн байна.

⁵⁰Харин тэнгэриһээ буужа ерэхэн хилээмэхээ эдихэн хүн хэзээдэшье үхэдэггүй.

⁵¹Би тэнгэриһээ буужа ерэхэн амиды хилээмэн гээшэб. Энэ хилээмые эдихэн хүн мүнхэ наһатай болохо. Тэрэ хүндэ минии үгэхэ хилээмэн хадаа минии бээмни гээшэ, тиин энэ бээе бүхы дэлхэйн ажамидаралай түлөө би үгэнэб.

⁵²Тиихэдэнь еврейнүүдэй хоорондо гани халуун арсалдаан болобо: – Энэ хүн хайшан гээд өөрынгөө бээе манда эдюулхэнь гээшэб?!

⁵³Иисус харюусаба: – Хүн түрэлхитэнэй Хүбүүнэйл бэе эдидэг хаа, тэрэнэйл шуһа уудаг хаа, амидаралгын шанартай байхат гэжэ таанарта үнэн зүбые хэлэнэб.

⁵⁴Минии бэе эдидэг, минии шуһа уудаг хүн мүнхэ наһатай болобо гээшэ – тиин тэрэ хүниие би һүүлшын Үдэртэ амидыруулхаб.

⁵⁵Минии бэе хадаа ёһотой эдеэн гээшэ, минии шуһа хадаа ёһотой унда гээшэ.

⁵⁶Минии бэе эдидэг хүн, минии шуһа уудаг хүн минии досоомни байна, би баһал тэрэнэй досоонь байнаб.

⁵⁷Намае эльгээһэн Эсэгэмни мүнхэдөө амидаралгын шанартай юм. Тэрэ минии амидаралай эхин болоно. Энээндэл адли, би намае эдидэг хүнэй амидаралай эхин байхаб.

⁵⁸Тэнгэриһээ бууһан хилээмэн – энэ байна. Үбгэ эсэгэнэрэйтнай эдеэд үхэхэн хилээмэн иимэ бэшэ һэн. Харин энэ хилээмэ эдидэг хүн мүнхэ наһатай байна.

⁵⁹Капернаумай мургэлэй гэр соо хургаалаа номноходоо, Иисус тиигэжэ хэлэдэг һэн.

Зарим шабинарынъ Иисусые орхёод арилба

⁶⁰Эдэ үгэнүүдые шагнаһан олон шабинарынъ: – Энэнь жэгтэй һонин хургаал байнал! Шагнахыншье аргагүйл! – гэлсэбэ.

⁶¹Тэрэнэй үгэнүүд шабинарайнь дура гутааба гэжэ мэдээд, Иисус тэдэндээ иигэжэ хэлэбэ: – Эдэ үгэнүүдни таанад соо һэжэг түрүүлнэ гү?

⁶²Теэд Хүн түрэлхитэнэй Хүбүүнэй түрүүшээр байһан орондоо дэгдэн бусахые харахадаа, юун гэхэбта?

⁶³Ажамидарал гансал һүлдэһөө эхи абадаг, харин хүнэй бэе эндэ юушье хэжэ шадахагүй. Таанадта минии хэлэһэн үгэнүүд хадаа һүлдэ, Ажамидарал гээшэ.

⁶⁴Теэд заримантнай намда этигэнэгүйл. Хэн тэрээндэ этигэнэгүйб, хэн тэрээниие барижа үгэхэб гэжэ Иисус анханһаа мэдээд байгаа.

⁶⁵Иисус саашань үргэлжэлүүлэн хэлэбэ: – Эсэгимни үршөөлгүйгөөр хэншье намда ерэжэ шадахагүй байна гэжэ би таанадта хэлээ һэнби.

⁶⁶Энээнһээ хойшо Иисусай олон шабинарынъ тэрэниие орхёод, саашадаа тэрээнтэй ябалсаагүй.

⁶⁷Өөрынгөө арбан хоёр шабиһаа Иисус һураба: – Магад, таанаршье намайе орхихо һанаатай бэшэ гүт?

⁶⁸– Дээдын Эзэн аа, бидэ ондоо хэндэ ошохомнай гээшэб? Шамдал мүнхэ һаһа олгодог үгэнүүд байна ха юм.

⁶⁹Ши Бурханай Нангин Хүбүүнши гэжэ бидэ этигэнэбди, мэдэжэ байнабди, – гэжэ Симон Петр харюусаба.

⁷⁰– Би өөрөөл Арбан хоёр таанадые шэлэжэ абаа бэшэ һэн гүб! Теэд таанадай нэгэн шолмос байна! – гэжэ Иисус харюусаба.



⁷¹Иигэжэ Симон Искариодой хүбүүн Иуда тухай Иисус хэлэһэн байна. Тэрэ Арбан хоёрой нэгэниинь байһан аад, һүүлээрнь Иисусые барижа үгэхэ.

Иоанн 7

Иисус ба тэрэнэй аха дүүнэр

¹Удаань Иисус Галилейгээр ябаба. Иудейдэ ошохогүй гэжэ тэрэ шиидэбэ, юундэб гэхэдэ, Иудейн ахамадууд тэрэниие алаха ханаатай байгаа.

²Еврейнүүдэй Отог урса табилгын һайндэр гэжэ найр болохоёо байба.

³Аха дүүнэрын Иисуста хэлэбэ: – Ши эндэхээ гараад, Иудей ошо! Шинии бүтээдэг гайхамшаг хэрэгүүдые тэндэ ажаһуудаг хурагшадшни хараг лэ.

⁴Өөрынгөө үйлэ хэрэгы нюусаар хэдэг хүн алдар сууда гарахагүй бшуу. Харин шинии тиимэ гайхамшаг үйлэ хэрэгүүд тухайшни бүхы дэлхэйн зон мэдэг лэ!

⁵Иисусай аха дүүнэрыншье тэрээндээ этигэдэггүй байгаа бшуу.

⁶Иисус аха дүүнэртээ иигэжэ харюусаба: – Минии саг үшөөл ерээдүй байна. Таанарта ямаршье саг таараха ха юм.

⁷Дэлхэйн хүнүүд таанарта дурагүйлхэхэгүй, харин намда тэдэ дурагүйлхэдэг, тэдэ хүнүүдэй үйлэ хэрэгэйн ёро муутай байһые би гэршэлэн харуулна ха юмбиб.

⁸Таанар һайндэртээ ошогты. Би тэрэ найрта ошохогүйб, минии саг үшөө ерээдүй байна.

⁹Иисус тиигэжэ хэлээд, Галилейдээ үлэбэ.

Иисус найр дээрэ

¹⁰Аха дүүнэрэйнгээ тэрэ һайндэртэ ябаһанай хойно Иисус баһа тишээ бээ мэдүүлэнгүй ошобо.



- ¹¹Еврейнүүдэй ахамадууд найрай үедэ Иисусые бэдэрбэ. Тэрэ хүн хаана байнаб гэжэ тэдэнэр нурагшалба.
- ¹²Иисус тухай ехэ арсалдаан улад зоной дунда болоо. Зарим нэгэниинь: «Энэ найн хүн юм», – гэлдэбэ. Нүгөө зариманиинь: «Үгы, энэ хүн улад зоние мэхэлнэ», – гэжэ буруушааба.
- ¹³Теэд засагаархидһаа айжа, Иисус тухай сэхэ руунь хэншые хэлээгүй.
- ¹⁴Найндэрэй хахад сагынь үнгэршэхэдэ Иисус Бурхан хүмэ соо бии боложо, нургаалаа номнобо.
- ¹⁵Еврейнүүдэй ахамадууд гайхалсан: – Энэ хүн хаанашые нураагүй аад, иимэ ехэ юумэ хаанаһаа мэдэнэ гээшэб? – гэлсэбэ.
- ¹⁶Иисус харюусаба: – Энэ – минии бэшэ, харин намайе эльгээһэн Бурханай нургаал юм.
- ¹⁷Тэрэнэй дура хүсэл дүүргэхэ ханаатай хүн һаа, энэ Бурханай нургаал гээшэ гү, али би өөрһөөн хэлэжэ байна гүб гэжэ мэдэдэг болохо.
- ¹⁸Өөрһөөн хэлэһэн хүн өөрыгөө магтуулхаяа оролдоно, харин намайе эльгээһэн Бурхание алдаршуулхаяа оролдогшо үнэн зүбые хэлэнэ, тэрэнэй зүрхэ сэдхэлдэ худал юумэн байхагүй.
- ¹⁹Моисей таанарта Бурханай хуули үгөө бэшэ һэн аал? Теэд таанарай хэнтнайшые тэрэ Хуули сахинагүйл! Юундэ таанар намайе алахаяа һананабта?
- ²⁰– Ши досоогоо ада шүдхэртэй байнаш! Хэн шамайе алахаяа байгаа юм? – гэжэ хүн зон харюусаба.
- ²¹Иисус харюудань иигэжэ хэлэбэ: – Би нэгэл гайхамшаг хэрэг хэбэб, тиихэдэмни таанар бултадаа ехээр гайхабалта.
- ²²Бишыхан хүбүүдэйнгээ бэлгэ отолуулха ёһо заншал таанарта Моисей захяа һэн (үнэндөө Мойсейһээ урда, үбгэ эсэгэнэр тиигэжэ захиһан юм), тиигээд таанар субботодошые отолуулна ха юмта.



²³Моисейн Хуули эбдэхэгүй гэжэ хүниие субботодо отолуулжа байхадаа, субботодо хүнэй бэеые сүм эдэгээхэдэмни таанар намда яахадаа ехээр сухалдана гээшэбта?

²⁴Таанар гадаада талыень обёороод лэ, халирхайгаар бү шиидхэгты, харин үнэн зүб шиидхэбэри гаргагты!

²⁵Иерусалим хотодо байгшадай зариманиинь иигэжэ хэлэбэ: – Энэл хүниие засаг баригшад алахаяа һанана бэшэ аал?

²⁶Теэд харыта, энэ хүн һургаалаа нюунгүй сэхэ номножо байнал. Хэншые тэрэниие хориногүйл.. Энэ хүн үнэхөөрөө Бурханай табисуурта байна гэжэ, магад, засагаархиншые ойлгоо гээшэ хаяа?

²⁷Теэд энэ хүн хаанаһааб гэжэ бидэ мэдэнэбди. Харин Бурханай табисууртын ерэхэдэ, тэрэ хаанаһааб гэжэ хэншые мэдэхэгүйл.

²⁸Тиэхэдэнь Иисус һургаалаа Бурхан хүмэ дотор номножо байгаад: – Таанар намайе мэдэнэ гүт? Минии хаанаһаа ерэхэн тухай баһа мэдэнэ гүт? Би өөрһөөн ерээ бэшэб. Намайе эльгээгшэдэ этигэжэ болохо юм, зүгөөр таанар тэрэниие мэдэхэгүйт.

²⁹Харин би тэрэниие мэдэхэб, ушарынь нэрлэбэл, би тэрээнһээ ерээб, намайе тэрэ эльгээгээ юм, – гэжэ шангаар дуугарба.

³⁰Тиигэжэ хэлэхэдэнь Иисусые засагаархин барижа хаахаяа һанаба, теэд хэншые тэрээнэй ойро хүрэхэгүй, юундэб гэхэдэ, тэрэнэй сагын үшөө ерээдүй байгаа.

³¹Теэд олон юрын зон тэрээндэ этигэхэн байна. «Бурханай табисуурта ерэхэдээ, энэ хүнһөө үлүү ехэ дүлгэ тэмдэг харуулжа шадаха аал?» – гэжэ тэдэ зон хэлсэхэн байна.

³²Иисус тухай арад зоной дунда арсалдаанай боложо байхые фарисейнүүд дуулаба. Тиин түрүү санаартан ба фарисейнүүд тэрэниие барижа хаагты гэжэ һүмын харуулшадые эльгээбэ.

³³Иисус тэрэ үедэ: – Үшөө нэгэ заа таанартай суг байлсахамни, тиигээд намайе эльгээһэн Эсэгэдээ ошохомни.

³⁴Таанар намайе бэдэрхэт, теэд олохогүйт; минии байха газарта таанар ерэжэ шадахагүйт, – гэжэ хэлэбэ.

³⁵Тиихэдэнь еврейнүүд өөһэд дундаа хөөрэлдэбэ: – Үгы, бидэнэй тэрэниие олохогүй ямар газарта энэмнай ошохоёо түхээрбэ гээшэб? Али грегүүдэй дунда тарашоод байһан манай улад зондо ошожо, грегүүдые хургахаяа ханаба гээшэ гү?

³⁶«Таанар намайе бэдэрхэт, теэд олохогүйт», «Минии байха газарта таанар ошожо шадахагүйт» гэхэдээ, ямар удхатайгаар тэрэ хэлэбэ гээшэб?

Амидаралта уһан. Иисус тухай арсалдаан

³⁷Иисус һайндэрэй һүүлшын эгээл ехэ үдэрынь хүн зондо иигэжэ шангаар айладхаба: – Ангаһан хүн намда ерээд, ундаа харяаг!

³⁸Намда этигэдэг хүн тухай Нангин Бэшэг соо «Тэрэнэй зүрхэнһөө амидаралта урадхал уһан урдаха» гэжэ бэшэгдэнхэй.

³⁹Иисус тиигэжэ хэлэхэдээ, Нангин һүлдэ тухай хэлэбэ гээшэ: Иисуста этигэһэн хүнүүд хожомынь Нангин һүлдэтэй болохо ёһотой байһан юм. Тэрэ үедэ Нангин һүлдэ үшөөл үгтөөдүй байгаа, юундэб гэхэдэ, Иисус үшөөл алдар солодо хүртөөгүй байгаа.

⁴⁰Сугларһан зоной зариман Иисусай үгэнүүдые шагнаад: – Энэмнай хүн зондо заларжа ерэхэ ёһотой тэрэ лүндэншэ байнал! – гэлсэбэ.

⁴¹Нүгөөдэ зариманиинь: – Энэмнай Бурханай табисуурта байнал! – гэлсэбэ. – Теэд Бурханай табисуурта Галилейһээ ерэхэ аал? – гэжэ бэшэ зариманиинь буруушааба. –

⁴²Бурханай табисуурта болбол Давидай үри һадаһан мүн, Давидай түрэнһэн Вифлеем хотоһоо ерэхэ ёһотой гэжэ Нангин Бэшэг соо хэлээтэй ха юм.

⁴³Тиин улад зон Иисус тухай арсалдан, тэдэнэй ханалнуудынь тудалдаба.

⁴⁴Зариманиинь Иисусые барижа тушаахаяашье ханаба, теэд тэрээндэ хэншые гар хүрэбэгүй.

⁴⁵Бурхан хүмын харуулшад түрүү санаартанда, фарисейнүүдтэ бусажа ерэбэ. Тэдэнь: – Юундэ таанар тэрээниие нашань асараагүйбта? – гэжэ һураба.

⁴⁶– Энэ хүндэ адляр нэгэшые хүн хээээдэшые хэлээгүйл! – гэжэ харуулшад харюусаба.

⁴⁷– Тэрэ хүн иихэдээ таанарыешье мэхэлбэ гээшэ гү? – гэжэ фарисейнүүд харуулшадһаа асууба. –

⁴⁸Теэд ахаматуудай дундаһаа гү, али фарисейнүүдэй дундаһаа нэгэшые хүн тэрээндэ этигээ аал?

⁴⁹Хуули мэдэдэггүй харанхы мунхаг зон лэ тэрэ хүндэ этигэбэ гээшэ, тэдэ зон Бурханай хараалда хүртөө!

⁵⁰Теэд нэгэтэ Иисустай ерэжэ уулзаһан тэдэнэй нэгэн Никодим бэшэндээ иигэжэ хэлэбэ:

⁵¹– Хүниие гэмнэхэ гээ һаа, түрүүн тэрэ хүнэй хэлэһые шагнангүйгөөр, зэмыень тодоруулангүйгөөр шийдхэбэри гаргахые манай Хуули зүбшөөдэг юм гү?

⁵²– Зай, ши тиихэдээ баһал Галилейһээ хаяаш? Ши өөрөө Нангин Бэшэг шудала, тиибэл Галилейһээ нэгэшые лүндэншэ гарахагүй юм гэжэ ши өөрөө мэдэхэш, – гэжэ тэдэнь харюусаба.

Иисус ба эрэдээ урбаһан эхэнэр

[

⁵³Удаань бултадаа гэр гэртээ хариба.

Иоанн 8



- ¹Иисус Элеон хада дээрэ гараһан байна.
- ²Эртэ үглөөгүүр Иисусай дахин Бурхан хүмэдэ ерэхэдэ, бүхы зон тэрээндэ ерэбэ. Тиин Иисус хуугаад, хүнүүдтэ номнол зааба.
- ³Тиихэ үедэнь Хуули заадаг багшанар ба фарисейнүүд өөрынгөө эрэдэ урбаһан нэгэ эхэнэрые Иисуста асарба. Тэрэ эхэнэрые зоной урда байлгаад,
- ⁴Иисуста хандан: – Багша аа, энэ эхэнэрые эрэдээ урбажа байхадань, бидэ балшыса баряабди, – гэбэд. –
- ⁵Иимэшүүлэе шулуугаар шэдэжэ хэһээхэ ёһотой гэжэ Моисей өөрынгөө Хуули дотор захяа һэн. Харин ши юу гэжэ хэлэхэ байнабши?
- ⁶Хуули заадаг багшанар ба фарисейнүүд юундэ тиигэжэ асуугааб гэбэл, Иисусые туршан үгэ алдуулаад, хожомынь гэмнэхээ һанаһан байгаа бшуу. Теэд Иисус доошоо тонгойгоод, хургаараа юушьеб газар дээрэ бэшэжэ байба.
- ⁷Тэдэнь юумэ асуугаад һалабагүй, тиихэдэнь Иисус толгойгоо үргөөд, тэдэндэ хандажа: – Таанарай хэнтнай нүгэл хэзээдэшье хээгүйб, тэрэ хүнтнай энэ эхэнэрые түрүүн шулуудаг лэ! – гэбэ.
- ⁸Тиигээд Иисус дахин уруугаа хараад, газар дээрэ юумэ бэшэһэнэ үргэлжэлүүлбэ.
- ⁹Иисусай тиигэжэ хэлэхыень дуулаад, тэндэ сугларһан зон хойно хойноһоо һубарилдан тараба, эгээн ехэ һаһатайшуулынь түрүүн гаража ошоо. Удаань Иисус эхэнэртэй хоюулан лэ үлэбэ.
- ¹⁰Иисус толгойгоо өөдэнь үргөөд, эхэнэрһээ: – Эхэнэр аа, бэшэ зон хаана гээшэб? Шамайе хэншье зэмэлээгүй гү? – гэжэ асууба.
- ¹¹– Хэншье зэмэлээгүй даа, эзэн аа, – гэжэ тэрэ эхэнэр харюусаба. – Баһа бишье шамайе зэмэлнэгүйб. Яба, дахин нүгэл бү хэ, – гэбэ Иисус.]

Иисус болбол дэлхэе гэрэлтүүлэгшэ Гэрэл туяа мүн



¹²Иисус дахин тэдэнтэй хөөрэлдэбэ: – Би дэлхэе гэрэлтүүлэгшэ Гэрэл туяа гээшэб. Минии хойноһоо дахадан хүн харанхы соогуур төөрижэ ябахгүй, харин амидарал олгодог гэрэл туяатай болохо.

¹³– Ши өөр тухайгаа өөрөө гэршэлэн хэлэнэш. Тиимэхээ шинии гэршэлгэ үнэн зүб бэшэ, – гэжэ фарисейнүүд хэлэбэ.

¹⁴Иисус харюусаба: – Хэрбээ өөр тухайгаа минии өөрөөшье хэлээ хаамни, минии үгэнүүдтэ этигэхэдэ болохо юм, юундэб гэбэл, би хаанаһаа ерэнэнээ, хайшаа ошохо байһанаа мэдэнэб, харин таанар минии хаанаһаа ерэһые, хайшаа ошохыемни мэдэнэгүйт.

¹⁵Таанар хүнүүдтэл адли шүүбэрилнэт, харин би хэниешье шүүбэрилнэгүйб.

¹⁶Теэд хүниие шүүбэрилбэлни, минии зарга шүүбэри үнэн зүб байха һэн, юундэб гэхэдэ, би гансаараа шүүбэрилнэ бэшэб, намайе эльгээһэн Эсэгэмни намтай хамта байна.

¹⁷Тиин хоёр хүнэй гэршэлгэ үнэн зүб юм гээд таанарай Хуули дотор бэшээтэй.

¹⁸Бидэ болбол хоёр гэршэбди: намайе эльгээһэн Эсэгэ бидэ хоёр минии тухай гэршэлнэбди.

¹⁹– Теэд шинии эсэгэ хаана гээшэб? – гэжэ тэдэ һураба. – Таанар намайешье, минии Эсэгыешье мэдэхгүйт. Хэрбээ таанар намайе мэдээ һаа, минии Эсэгыешье мэдэхэ һэнта, – гэжэ Иисус харюусаба.

²⁰Бурхан хүмэдэ мүнгэ алта үргэдэг газарай хажууда зогсон номножо байхадаа, Иисус тиигэжэ хэлээ һэн. Тиин хэншье тэрэниие барижа тушаагаагүй, ушарынь нэрлэбэл, тэрэнэй сагын үшөө ерээдүй байгаа.

«Минии ошохо газарта таанар ошожо шадахагүйт»

²¹Иисус баһа иигэжэ хэлээ: – Би һаяар ябахамни. Таанар намайе бэдэрхэт, теэд нүгэлтэйгөө үхэхэт. Минии ошохо газарта таанар ошожо шадахагүйт.

²²– «Минии ошохо газарта таанар ошожо шадахагүйт» гээшэнь ямар удхатайб? Али энэмнай бээ хорложо үхэхээ һанаба гү? – гэжэ еврейнүүдэй ахамадууд хөөрэлдэбэ.

²³– Таанар доодо дэлхэйн ха юмта, харин би дээрэһээ ерээб. Таанар энэ дэлхэйн хүнүүдта, би энэ дэлхэйн бэшэлби.

²⁴«Таанар нүгэлнүүдтэйгөө үхэхэт!» гэжэ би таанарта хэлээб. «Би» байһандамни үнэншөөгүй һаа, бултадаа нүгэлтэйгөө үхэхэт! – гэжэ Иисус харюусаба.

²⁵– Тиихэдээ ши хэн гээшэбши? – гэжэ тэдэ асууба. – Би хододоо өөрыгөө хэн гээд нэрлэдэг һэнбиб, тэрэл гээшэб, – гэжэ Иисус харюусаба. –

²⁶Таанар тухай хэлэхэ, таанарые гэршэлэн зэмэлхэ олон юумэн намда бии, теэд намайе эльгээһэн Эсэгэһээ дуулаһанаал энэ дэлхэйнхидтэ хэлэнэб, харин намайе эльгээгшэ үнэн зүб юм.

²⁷Эсэгэ тухайгаа тэрэ хэлэнэ гэжэ ахамадууд ойлгобогүй.

²⁸Иисус үргэлжэлүүлэн: – Хүн түрэлхитэнэй Хүбүүниие таанарай дээшэнь дэгдүүлхэдэ, минии «Би» байһые, минии өөрынгөө дураар юушые хэдэггүй байһые, Эсэгынгээл һургаһан ёһоор хэлэдэг байһые таанар ойлгохот.

²⁹Намайе эльгээгшэ ходо намтай, тэрэ намайе гансаарыемни орхёогүй, юундэб гэбэл, би тэрэнэйнгээл дура хүсэлые бэлүүлнэб, – гэбэ.

³⁰Иисусай иигэжэ хэлэхэдэ, тэрээндэ олон зон этигэбэ.

Бурханай үхибүүд гү, али шолмосой үхибүүд гү?

³¹Удаань Иисус тэрээндэ этигэһэн еврейнүүдтэ иигэжэ хэлэбэ: – Хэрбээ таанар минии һургаалай ёһоор ябаа һаа, үнэхөөрөөл минии шабинар болохот.

³²Тиихэдээ таанар үнэн зүйлые ойлгохот, үнэн зүйл таанарые сүлөөлхэ.



33– Бидэнэр Абраһамай үри һадаһад гээшэбди, хэзээдэшье хэнэйшье барлагууд байгаагүйбди! «Таанар эрхэ сүлөөтэй болохот» гэхэдээ ши ямар юумэн тухай хэлэнэбши? – гэжэ тэдэнь һураба.

34Иисус тэдэндэ иигэжэ харюусаба: – Би таанарта үнэн зүбые хэлэнэб: нүгэл хэгшэ хүн бүхэн нүгэлэй барлагынь мүн.

35Барлаг болбол гэр бүлэ соо үни байдаггүй, харин хүбүүниинь хододоо гэр бүлэдөө үлэдэг.

36Таанарта Хүбүүнэй эрхэ сүлөө үгөөл һаа, таанар үнэхөөрөөл сүлөөтэй хүнүүд болохот.

37Таанар Абраһамай үри һадаһад гээшэт гэжэ би мэдэнэб, теэд таанар намайе алаха һанаатайт, юундэб гэхэдэ, минии үгэнүүд таанарай зүрхэ сэдхэлдэ байра олоногүй бшуу.

38Би өөрынгөө Эсэгүндэ юу хараһан үзэһэн тухайгаа таанарта хэлэнэб, харин таанар өөрынгөө эсэгүһээ дуулаһан юумэеэ хэнэт.

39– Манай үбгэ эсэгэ Абраһам юм! – гэжэ тэдэ харюусаба. Иисус тэдэндэ хэлэбэ: – Үнэхөөрөө Абраһамай үри һадаһан байгаа һаа, таанар Абраһамдал адли хэрэгүүдые бүтээхэ һэнта.

40Харин таанар намайе алахаяа һананалта, Бурханһаа дуулаһан үнэн зүйл таанарта хэлэһэн хүниие алахаяа һананалта! Теэд Абраһам иимэ юумэ хэдэг байгаа гү?!

41Үгы даа, таанар өөрынгөөл эсэгүдэ адли юумэ хэнэт! – Бидэ нүгэл хилэнсэдэ түрөө бэшэбди! Манай ори ганса эсэгэ – Бурхан юм! – гэлсэбэ тэдэ.

42Иисус тэдэндэ харюусаба: – Хэрбээ Бурхан таанарай эсэгэ байгаа һаа, таанар намда дуратай байха һэнта, юундэб гэбэл, би Бурханһаа иишээ ерээб, Бурхандаа ошожо ябанаб. Би өөрһөөн ерээгүйлби – намайе Бурхан эльгээгээл!

⁴³Таанар юундэ минии хэлэһэн үгые ойлгоногүй гээшэбта? Таанар минии хэлэһэн үгэ дуулаха шадалгүй байналта!

⁴⁴Таанарай эсэгэ – шолмос юм, тиин таанар эсэгынгээ бүхы дура хүсэлыел бэелүүлхэ хүсэлэнтэйт. Теэд танай эсэгэ анханһаа нааша хүнүүдые аладаг байһан лэ, тэрэтнай үнэн зүйлые үзэжэ ядадаг байгаал, ушарынь хэлэбэл, тэрээндэтнай үнэн зүйл гэжэ байхагүйл. Худал юумэ хэлэхэдээ, тэрэтнай өөрынгөө түрэлхи хэлэн дээрэ дуугардаг һэн, юундэб гэбэл, тэрэтнай өөрөөшье худалша, худал юумэ үүдхэгшэ байһан юм.

⁴⁵Харин үнэн зүб юумэ минии хэлэхэдэ, таанар намда этигэнэгүйт.

⁴⁶Нүгэл хээ гэжэ намайе таанарай хэнтнай гэршэлэн харуулжа шадахаб? Таанарта үнэн зүб юумэ минии хэлэхэдэ, таанар юундэ намда этигэнэгүйбта?

⁴⁷Бурханай мэдэлдэ байгша болбол Бурханай хэлэһэн үгэнүүдые дуулана. Таанар намайе дууланагүйт, юундэб гэхэдэ, таанар Бурханай мэдэлдэ бэшэт.

Иисус ба Абраһам тухай

⁴⁸Еврейнүүд Иисуста иимэ харюу үгэбэ: – Шамайе ада шүдхэртэ барюулһан самаряан хүн гэжэ бидэ зүб хэлсэдэг байнабди.

⁴⁹– Би ада шүдхэртэ барюулаагүйб: би өөрынгөө эсэгые хүндэлнэб, харин таанар минии нэрэ гутаажа байнат.

⁵⁰Би өөртөө алдар соло бэдэрнэ бэшэб, теэд намда алдар соло бэдэрэгшэ ондоо нэгэн бии юм, тэрэл шиидхэнэ.

⁵¹Таанарта үнэн сэхэ хэлэнэб: минии хургаалаар ябадаг хүнүүд хэзээдэшье үхэхэгүй!

⁵²– Ши ада шүдхэртэ барюулһан хүн байнаш гэжэ одоол бидэ лаб мэдэбэбди, – гэлдэбэ, – Абраһам наһа баранхай, мүн баһа лүндэншэдшье нүгшэнхэй. Харин ши «минии хургаалаар ябадаг хүнүүд хэзээдэшье үхэхэгүй» гэнэш.

53Наһа бараһан манай үбгэ эсэгэ Абраһамһаа ши ехэ гээшэ гүш? Али наһаяа дүүрэхэн лүндэншэдһөө ехэ гээшэ гүш? Ши хэнби гэжэ өөр тухайгаа һананабши?

54– Хэрбээ би өөрөө өөрыгөө алдаршуулжа байгаа һаа, минии алдар нэрэ юуншье бэшэ. Теэд намайе минии Эсэгэ алдаршуулна – таанар тэрэниие өөһэдымнай Бурхан гэжэ нэрлэнэт!

55Теэд таанар минии Эсэгы мэдэнэгүйт, харин би тэрэниие мэдэнэб. Хэрбээ би тэрэниие мэдэхэгүйб гээ һаа, би таанартайл адли худалша болохо һэм. Теэд би тэрэниие мэдэхэб, тэрэнэй хэлэдэг үгэнүүдые бээлүүлнэб.

56Танай үбгэ эсэгэ Абраһам минии заларжа ерэхэ үдэрые харахаб гэжэ һанахадаа баярладаг бэлэй, тиин ерэхэн үдэрыемни хараад, баяртай золтой байгаа һэн!

57– Ши табиншье наһа хүрөөгүй аад, Абраһамые хараһан болоно гүш?! – гэжэ еврейнүүд жэгшэбэ.

58– Таанарта үнэн зүбые хэлэнэб: би Абраһамай үшөө түрөөдүүдэ байгааб, байнашьеб, – гэжэ Иисус харюусаба.

59Тиихэдэнь еврейнүүд Иисусые шулуудажа алаха гэжэ шулуунуудые бариба. Теэд Иисус тэдэнһээ зайлажа, Бурхан һүмэхөө гаража ошобо.

Иоанн 9

Түрэхэхөө һохор хүниие Иисус эдэгээбэ

1Энэ ушарай дараа Иисус ябажа ябатараа түрэхэхөө һохор хүниие хараба.

2– Багша аа, энэ хүн яахадаа һохор түрөө гээшэб? Хэниинь нүгэл хэхэн байгааб: энэ өөрөө гү, али энээнэй эхэ эсэгэнь гү? – гэжэ тэрэнэй шабинарынь һураба.

- ³– Энэ хүн өөрөөшье, эхэ эсэгэньше нүгэл хээгүй, – гэжэ Иисус харюусаба. Тиин үргэлжэлүүлэн: – Тэрээнэй аргалуулһан ябадалаар Бурханай хаба хүсэ элирхэйлэгдэхын тула тэрэ хохор байгаа.
- ⁴Үдэр байһан дээрэнъ бидэ намайе эльгээһэн Эсэгын хэрэгүүдые бүтээхэ ёһотойбди. Мэнэ гэхээр хүни болохоёо байна, тиихэдэ хэншье юумэ хэжэ шадахагүй.
- ⁵Дэлхэй дээрэ байха сагтаа би энэ дэлхэйн гэрэл туяань гээшэб.
- ⁶Иигэжэ хэлээд, Иисус газарта нёлбобо. Нёлбоһоо шоройтой худхан шабар бүтээжэ, тэрэ шабараараа хохор хүнэй нюдые шабаба.
- ⁷– Иигээд Шилоах сөөрэмдэ ошожо нюураа угаа, – гэжэ Иисус тэрэ хохор хүндэ хэлэбэ (Шилоах гэжэ үгэ «Эльгээгдэһэн» гэхэн удхатай). Хохор хүниинь тэндэ ошожо, нюураа угаагаад, юумэ харадаг болошоод ерэбэ.
- ⁸Хүршэнэрынъ, тиихэдэ юумэ ходо бадарлажа һуухыень харадаг зон: – Энэл хүн юумэ бадаржа һуудаг бэшэ һэн гү? – гэлсэбэ.
- ⁹– Тиимэл даа, энэ хүн лэ даа, – гэжэ нүгөө зариманиинь харюусаба. – Бэшэ, энэмнай миин лэ тэрээндэ адли хүн байна, – гэжэ үшөө нүгөөдүүлһынъ буруушааба. – Үнэхөөрөө энэ би байнаб, – гэжэ тэрэ хүниинь өөрөө хэлэбэ.
- ¹⁰– Теэд ши яагаад харадаг болоо гээшэбши? – гэжэ тэдэ хүнүүд урдаһаань һураба.
- ¹¹– Иисус гэжэ нэрэтэй нэгэ хүн шабар худхажа, тэрэ шабараараа нюдыемни шабаад, «Шилоахда ошожо нюураа угаа» гээ. Би тиихэдэнь тэндэ ошожо нюураа угаагаад, юумэ харадаг болооб, – гэжэ тэрэ хүниинь харюусаба.
- ¹²– Тэрэ хүн хаанаб? – гэжэ тэдэнь асууба. – Би мэдэнэгүйб, – гэжэ аргалуулһан хүниинь харюусадаг һэн.
- ¹³Урдань хохор байһан тэрэ хүниие фарисейнүүдтэ асарба.

14 Иисус амаралтын субботын үдэр шоройгоор шабар худхаж, тэрэ шабараараа хохор хүниие аргалһан байгаа.

15 Хайшан гээд юумэ харадаг болоош гэжэ фарисейнүүд тэрээнһээ баһа асуужа оробо. – Тэрэ хүн нюдыемни шабараар шабаа, би нюураа угаагаад, мүнөө юумэ харанаб, – гэжэ аргалуулһан хүниинь харюусаба.

16– Энэ хүн Бурханһаа заяагдаһан байха ёһогүй, юундэб гэбэл, субботые тооногүй, – гэжэ зарим фарисейнүүд мэдүүлбэ. – Теэд нүгэлтэн һаа, энэ хүн иимэ гайхамшаг хэрэгүүдые бүтээхэ һэн гү? – гэжэ нүгөө зариманиинь буруушааба. Тиин фарисейнүүд өөһэд хоорондоо арсалдан хубааралдаба.

17 Аргалуулһан хүнһөө тэдэ дахин һураба: – Тэрэ хүн шамайе юумэ харадаг болгоо гэнэш. Тэрээнэй тухай ши өөрөө юун гэжэ һананабши? – Лүндэншэ гэжэ һананаб, – гээд тэрэнь харюусаба.

18 Еврейнүүдэй ахамадууд хохор хүн байһанаа юумэ харадаг болоо гэжэ юрэдөө этигэбэгүй. Тиигээд юумэ харадаг болоһон хүнэй эхэ эсэгы тэдэ ерүүлбэ.

19 Тиин тэдэнһээ: – Энэ танай хүбүүн гү? Энэтнай хохор түрөө һэн гэнэт. Теэд мүнөө хүбүүнтнай хайшан гээд юумэ харадаг болоо юм? – гэжэ асууба.

20-21– Энэ манай хүбүүн байна гэжэ бидэ мэдэнэбди, энэмнай хохор түрэхэн юм. Теэд хайшан гээд харадаг болооб, хэн энээниемнай хараатай болгооб гэжэ бидэ мэдэнэгүйбди. Өөрһөөнь һурагты. Хүбүүмнай наһаяа хүсөө, өөрөө хэлэжэ шадаха, – гэжэ эхэ эсэгэ хоёрынь харюусаба.

22 Хүбүүнэй түрэлхидынь юундэ тиигэжэ харюусааб гэбэл, еврейнүүдэй ахамадуудһаа айгаа. Ушарынь хэлэбэл, Иисусые Бурханай табисуурта гэжэ тоолодог хүн бүхэниие мүргэлэй гэртэ оруулхагүй гһэн шиидхэбэри тэдэ ахамадууд гаргаад байгаа бшуу.

23Тиимэһээ: «Хүбүүмнай наһаа хүсөө, өөрһөөнь һурагты», – гэжэ түрэлхидынь хэлэһэн байна.

24Тиин һохор түрэһэн хүниие хоёрдохийёо дуудажа асараад: – Үнэн сэхэ руунь хэлэхэб гэжэ ши Бурханда тангаригаа үгэ! Тэрэшни нүгэлтэн юм гэжэ бидэ мэдэнэбди, – гэжэ еврейнүүдэй ахамадууд тэрээндэ хэлэбэ.

25– Нүгэлтэн юм гү, али үгы гү – би мэдэнэгүйб. Харин би һохор байһанаа мүнөө харадаг болооб гэжэл мэдэнэб, – гээд тэрэнь харюусаба.

26– Тэрэ хүн шамда юу хээб? Хайшан гээд шамайе харадаг болгооб, – гэжэ дахин тэдэ һураба.

27– Би таанарта хэлээ һэнби, теэд таанар шагнаагүйлта. Яагаад дахин намаар хэлүүлхээе һананабта? Магад, тэрэ хүнэй шабинанынь болохо һанаатай байна гүт? – гэжэ тэрэнь харюусаба.

28– Ши тэрэнэй шабинь гээшэш! Харин бидэ Моисейн шабинар гээшэбди! – гэжэ еврейнүүдэй ахамадууд бадашаба.

29– Бурхан болбол Моисейтэй хөөрэлдэдэг байһан юм гэжэ бидэ мэдэнэбди. Харин энэ хүн хаанаһаа бии болооб гэжэ мэдэнэгүйбди.

30– Ямар жэгтэй юм гээшэб! Тэрэнэй хаанаһаа ерэһые таанар мэдэнэгүйлта, харин тэрэ хүн намайе юумэ харадаг болгоол, – гэжэ аргалуулһан хүниинь харюусан, саашань үргэлжэлүүлбэ: –

31Теэд Бурхан нүгэлтэнэй хэлэһые дууладаггүй, харин Бурханиие хүндэлдэг, дура хүсэлыень бэлүүлдэг хүнүүдые дууладаг гэжэ бидэ мэдэнэбди.

32Һохор түрэһэн хүниие харадаг болгоо гэжэ эртэ урданһаашье нааша дуулдаагүй юм байна.

33Хэрбээ тэрэ хүн Бурханһаа заяагдаагүй һаа, иимэ юумэ хэжэ шадахагүй һэн!

³⁴Тиихэдэнь еврейнүүдэй ахамадууд: – Ши түрэхынгөө нүгэлтэй аад, маанадые хургаха ханаатай гүш, – гэжэ тэрэ хүниие хараагаад, мүргэлэй гэрһээ намнажархиба.

³⁵Аргалуулһан хүниие намнаба гэжэ дуулаад, Иисус тэрэниие бэдэржэ олоод: – Ши Хүн түрэлхитэнэй Хүбүүндэ этигэнэ гүш? – гэжэ асууба.

³⁶– Эзэн аа, этигэхым тула тэрэ хүмнай хэн гээшэб гэжэ намда хэлыш даа, – гээд аргалуулһан хүниинь харюусаба.

³⁷– Ши тэрэниие харааш. Тэрэ хүн мүнөө шамтай хөөрэлдэжэ байна, – гэбэ Иисус.

³⁸– Дээдын Эзэн аа, этигэнэб! – гэжэ тэрэнь харюусан, Иисусай урда үбдэглэн унаба.

³⁹– Зарга сүүд хэхээ би энэ дэлхэйдэ ерээб. Тиихэдээ юумэ харадаггүй хүнүүд харадаг болохо, юумэ харадаг хүнүүд хохор болохо, – гэжэ Иисус хэлэбэ.

⁴⁰Иисусай хажууда байһан фарисейнүүд: – Теэд ши бидэниие баһа хохор гэжэ тоолоногүй бээш? – гэжэ тэрээнһээ асууба.

⁴¹– Үнэхөөрөө хохор байгаа хаа, таанар зэмэгүй байха хэнта. Теэд таанар юумэ харанабди гэнэт. Иимэ ушарһаа таанар зэмэтэй зандаа үлэнэт, – гэжэ Иисус харюусаба.

Иоанн 10

Иисус шударгуу һайн адуулагша

¹– Хониной хорёодо үүдээрнь оронгүй, ондоо тээгүүр шурган ородог хүн хадаа хулгайшан, дээрмэшэн гээшэ гэжэ үнэниие таанарта хэлэнэб.

²Үүдээрнь ородог хүн хонин хүрэгэй адуулагшань мүн.

³Харуулшан тэрээндэ хониной байрын үүдэ нээжэ үгэдэг. Хонидынь тэрэнэйнгээ дууень дууладаг, адуулагшань хонидоо нэрэ нэрээрнь дуудаад, газашань гаргадаг.



⁴Хонидоо бултыень байраһаань гаргаад, хонишон хонидойгоо урда ябадаг, харин хонидынь хонишоноо дуугаарнь танижа, хойноһоонь дахадаг.

⁵Ондоо хүнэй хойноһоо хонидынь дахахагүй, тэрэ хүнһөө зугадажа арилшадаг байна, юундэб гэхэдэ, ондоо хүнэй дууниинь танигданагүй бшуу.

⁶Иимэ хургаалта үгэнүүдые Иисус фарисейнүүдэй урдаһаа хэлэбэ, теэд тэдэнь ойлгобогүй.

⁷Иисус үргэлжэлүүлбэ: – Таанарта үнэн зүбые хэлэнэб: хонидой байрын үүдэ гээшэнь би болоноб.

⁸Намһаа түрүүн ерээшэд бултадаа хулгайшад, дээрмэшэд байгаа. Теэд хонид тэдэнэй үгэ дуулаагүй.

⁹Үүдэ гээшэнь би болоноб. Хэн энэ үүдээр ороноб, тэрэ хүн абарагдаха. Тэрэ хүн үүдээр орожо, һүүлдэ газашаа гараад, өөрынгөө бэлшээри олохо.

¹⁰Харин хулгайшан гансал хулуухаяа, алахаяа, һандаргаха хюдахаяа ерэдэг. Харин би хүнүүдэй амидаржа һуухын тула, тэрээнһээ гадна, хүнүүдэй юрын амидаралһаа үлүү амидарал эдлэхын тула эндэ ерээб.

¹¹Би шударгуу һайн адуулагша гээшэб, шударгуу һайн адуулагшань хонидоо абархын тула ами наһаяа үгэдэг юм.

¹²Харин хүлһэншэн хадаа хони адуулагша бэшэ, тэдэ хонид ондоо хүнэй ха юм. Тиимэһээ хүлһэншэн хонидтонь орохоёо ябаһан шонын дүтэлжэ байхые харахадаа, хонидоо орхёод, гүйжэ арилшадаг. Тиихэдэнь шоно хонидыень бариха, энээнһээ боложо хонидойнь хүрэг иишэ тиишээ гүйлдэжэ тараха.

¹³Тэрэ хүн хони адуулагша бэшэ, харин хүлһэншэн гээшэ, тиимэһээ хонидто һанаагаа зобоногүй.

¹⁴Би хадаа шударгуу хайн адуулагша гээшэб. Би өөрынгөө хонидые мэдэдэгби, минии хонидшые намайгаа мэдэдэг.

¹⁵Эсэгэмни намайгаа мэдэдэгтэл адли, бишые Эсэгээ мэдэдэгби. Би өөрынгөө хонидой түлөө ами наһаяа үгэнэб.

¹⁶Энэ хорёо соохи хонидһоо гадна, мүн ондоошые хонид намда бии. Тэдэниие би баһа иишэнь асарха ёһотойб. Тэдэ хонид минии үгэ дуулаха, тиихэдээ нэгэл хүрэг хонид байха, нэгэл хонишон байха!

¹⁷Дахин амидырхынгаа тула би ами наһаяа үгэхэб, тиимэхээ Эсэгэмни намда дуратай юм.

¹⁸Минии ами наһые хэншые хороохогүй, харин би өөрөө ами наһаяа үгэхэб. Би ами наһаяа үгэхэ эрхэтэйб, би ами наһаяа һөөргэнь абаха эрхэтэйб. Юундэб гэхэдэ, Эсэгэмни намда тиигэжэ захиһан юм.

¹⁹Иигэжэ хэлэхэдэнь, еврейнүүд хоорондоо дахин асатаба.

²⁰– Энэтнай досоогоо ада шүдхэртэй болоод, дэмыржэ байна. Таанар энэниие юундэ шагнаабта? – гэжэ олониинь хэлэбэ.

²¹– Энэ досоогоо ада шүдхэртэй хүнэй үгэнүүд бэшэ. Ада шүдхэр һохор хүнүүдые харадаг болгожо шадаха һэн аал? – гээд нүгөөдүүлынь буруушааба.

«Эсэгэ бидэ хоёр – нэгэмди»

²²Үбэлэй саг байгаа. Бурхан хүмые Шэнэлэлгын һайндэр Иерусалимда тэмдэглэжэ байба.

²³Бурхан хүмын хорёодо Соломоной бахананууд гэгдэдэг хушалтатай газарта Иисус сэнгэжэ ябаа.

²⁴Тэрэниие тойроод еврейнүүд сугларжа: – Ши хэды болотор бидэнэй тэсэбэри туршажа байха һанаатайбши? Хэрбээ ши Бурханай табисуурта юм һаа, манда сэхэ хэлыш, – гэлдэбэ.

²⁵– Би таанарта хэлээ һэм, теэд таанар намда этигэнэгүйлта. Өөрынгөө Эсэгийн нэрэхээ минии бээлүүлдэг хэрэгүүд – минии гэршэ болоно.



²⁶Тээд таанар намда этигэнэгүйт, юундэб гэбэл, таанар минии хонид бэшэлта.

²⁷Минии хонид минии үгэ дууладаг, бишье тэдэнээ мэдэхэб, тэдэмни минии хойноһоо дахажа ябана.

²⁸Би тэдэндэ мүнхэ наһа үгэнэб, тэдэ хэзээшье хосорхогүй, тэдэниие намһаа хэншье буляжа абахагүй.

²⁹Тэдэниие намда үгэһэн Эсэгэмни бултанһаа холо дээгүүр юм. Минии хонидые Эсэгэһэмни хэншье буляжа шадахагүй.

³⁰Эсэгэ бидэ хоёр – нэгэн хамтабди.

³¹Тиихэдэнь еврейнүүд Иисусые алаха гэжэ дахин шулуунуудые бариба.

³²– Эсэгынгээ хүсөөр би таанарта ехэ олон һайн юумэнүүдые харуулааб. Тэдэ юумэнүүдэймни алинайнь түлөө намайе шулуудажа алаха һанаатай байнат? – гэжэ Иисус һураба.

³³– Бидэ шамайе һайн юумэ хэһэнэйшни түлөө бэшэ, харин Бурханиие доромжолһонойш түлөө шулуудажа алахаяа һананабди! Ши юрын хүн аад, өөрыгөө бурханби гэжэ айладханаш.

³⁴Иисус харюусаба: – «Таанар бурхад гэшэт гэжэ би хэлээб», – гээд танай Хуули соо бэшээтэй бэшэ гү?

³⁵Хэдүүдтэ Бурхан өөрынгөө үгэ хэлээб, тэдые Хуулитнай бурханууд гэжэ нэрлэнэ, тиихэдэ Нангин Бэшэг соо худал юумэн байха ёһогүй юм.

³⁶Харин намайе Эсэгэмни өөртөө зорюулан, энэ дэлхэйдэ эльгээһэн юм. Тиимэһээ «би Бурханай Хүбүүнби» гэхэдэмни, «ши Бурханиие доромжолнош» гэжэ таанар намда юундэ хэлэхэ болобот?!

³⁷Эсэгынгээ хэрэг би бүтээнэгүй гэшэ гүб? Юундэ таанар намда этигэнэгүйбта?

³⁸Эсэгынгээ хэрэгүүдые бээлүүлжэ байха үедөө хэлэһэн үгэнүүдтэмни таанад этигээгүй һаа, минии бүтээдэг хэрэгүүдтэ этигэгты! Тиихэдээ

Эсэгэмни минии зосоо байна, би Эсэгынгээ зосоо байнаб гэжэ таанар мэдэхэт, мэдэжэшье байхат.

³⁹Еврейнүүд Иисусые дахин барихаяа хэдэбэ, зүгөөр Иисус тэдэндэ баригдабагүй.

⁴⁰Тиигээд Иисус Иорданай нүгөө эрьедэ ошоо. Урдань тэрэ газарта Иоанн хүн зоние уһаар арюудхаһан байна. Тэндэ Иисус ойро зуура үлэбэ.

⁴¹Тэрээндэ олон зон ерэнэн байна. «Иоанн нэгэшье гайхамшаг хэрэг бүтээгээгүй һэн, теэд Иисус тухай хэлэнэн бүхэниинь зүб байна», – гэлсэбэ.

⁴²Тэндэ ерэнэн олон хүнүүд Иисуста этигэбэ.

Иоанн 11

Лазарь нүгшэбэ

¹Мария Марфа эгэшэ дүүнэртээ Бетани тосхондо суг һуудаг Лазарь гэжэ нэрэтэй нэгэ хүн үбдэбэ.

²Мария Дээдын Эзэнэй хүлдэ һайхан үнэртэй ургамалай шүүһэ түрхээд, толгойнгоо үһөөр хүлыень аршаһан эхэнэр мүн. Мариягай Лазарь гэжэ дүү хүбүүниинь үбдэнэн байгаа.

³Эгэшэ дүү хоёрынь: «Дээдын Эзэн аа, шинии дуратай хүншни үбдөөд байна» гэжэ Иисуста дуулгаба.

⁴Тиигэжэ дуулаад: – Энэ үбшэн Лазарие үхүүлхын тула бэшэ, харин Бурхание алдар суутай болгохын тула, тиин Бурханай Хүбүүе алдаршуулхын тула болоо, – гэжэ Иисус хэлэбэ.

⁵Марфа, Мария, Лазарь гурбанда Иисус дуратай байгаа.

⁶Теэд Лазариин үбдэжэ байһан тухай дуулабашье, Иисус аяар хоёр үдэрэй туршада байһан газарһаа хүдэлбэгүй.

⁷Удаань Иисус шабинартаа: – Гэдэргээ Иудейдээ бусая, – гэбэ.

⁸– Багша аа, хаяхан Иудейн зон шамайе шулуудажа алахаяа ханаа хэн лэ, харин ши тиихэдэнь дахин тиишэ ошохо гэбэ гүш? – гэжэ шабинанынь тэрээнһээ асууба.

⁹Иисус тэдэндээ иигэжэ хэлэбэ: – Нэгэ үдэр соо арбан хоёр час бээ? Үдэр ябаһан хүн бүдэржэ унахагүй – энэ дэлхэйн харуул байһые харана бшуу.

¹⁰Харин хүни ябаһан хүн бүдэржэ торожо унаха, юундэб гэбэл, дэлхэй гэрэлгүй болоод байна бшуу. –

¹¹Тиигэжэ хэлээд, Иисус үргэлжэлүүлбэ: – Манай нүхэр Лазарь унтаж байна. Би тэрэниие хэрээхээ ошохомни.

¹²– Дээдын Эзэн аа! Хэрбээ Лазариин унтаж байбалнь, тэрэнэй бэень хайн болохо хаяа, – гэжэ Иисуста шабинанынь хэлэбэ.

¹³Лазарь унтаж байна гэхэдээ, наһа бараа гэхэн удхатайгаар Иисус хэлээ, харин тиихэдэнь шабинанынь тэрэ юрэ миин лэ нойрсожо байна гэжэ ханаа бшуу.

¹⁴Тиихэдэнь шабинартаа хандан: – Лазарь наһа бараа, – гэжэ Иисус сэхэ хэлээ. –

¹⁵Тээд тэндэ байлсаагүйдөө таанарай түлөө баярланаб, юундэб гэбэл, таанар намда этигэхэт. Зай, Лазарьта ошоёбди!

¹⁶Эхир гэжэ ара нэрэтэй Фома хүбүүн: – Хамта ошолсоёбди, хамта үхэнэ бээбди! – гэжэ бэшэ шабинартаа хэлэбэ.

Иисус Лазариие амидыруулба

¹⁷Лазарь аяар дүрбэн үдэрэй саада тээ нүгшөөд, агы нүхэндэ хэбтэнэ гэжэ Иисус Бетанида ерээд мэдэбэ.

¹⁸Бетани гээшэнь Иерусалимнаа холо бэшэ, гурбан модо шахуу газарта байгаа.

¹⁹Дүүгэйнгээ наһа барахада уйдан гашуудажа байһан Марфа Мария хоёрой ханаа захиаяа олон еврейнүүд тэдээнэйдэ ошобо.



²⁰Иисусай ерэжэ ябаһан тухай дууламсаараа, Марфа тэрэниие угтахаяа урдаһаань гараа. Мариянь гэртээ үлэбэ.

²¹⁻²²– Дээдын Эзэн аа! Хэрбээ шинии эндэ байгаа һаа, ахамни наһа барахагүй бэлэй! Теэд шинии гуйһан бүхы юумые Бурхан мүнөөшье шамда үгэхэ гэжэ би мэдэнэб, – гэжэ Иисуста Марфа хэлэбэ.

²³– Шинии ахашни дахин амидырха, – гэжэ Марфада Иисус хэлэбэ.

²⁴– Амидыралгын үедэ, һүүлшын Үдэртэ ахамни бодохо юм гэжэ би мэдэнэб, – гээд Марфа харюусаба.

²⁵– Би хадаа Амидыралга гээшэб, Ами наһан гээшэб. Намда этигэдэг хүн үхөөшье һаа, амиды болохо.

²⁶Намда этигэлтэй амидарһан ямаршье хүн хэзээдэшье үхэхэгүй. Ши энээндэ этигэнэ гүш?

²⁷– Этигэнэб даа, Дээдын эзэн! Ши Бурханай табисуурташ, энэ дэлхэйдэ ерэхэ ёһотой Бурханай Хүбүүнши гэжэ би этигэнэб.

²⁸Тиигэжэ хэлээд, Марфа Мария эгэшэдээ ошожо һэмээхэнээр: – Багша эндэ ерээд байна, тэрэ шамайе ерэ гэнэ, – гэбэ.

²⁹Эгэшэнь түргэн бодожо, Иисуста ошобо.

³⁰Иисус тиихэдэ тосхондо үшөө хүрөөгүй, Марфын угтаһан газарта зогсожо байгаа.

³¹Гэртэнь Мариягай һанаа заһажа байһан еврейнүүд эхэнэрэй түргэхэн бодожо, газашаа гарахые обёорон, энэмнай дүүгэйнгээ хүдөөлүүлһэн агы нүхэнэй хажууда уйлахаяа ошобо гэжэ һанаад, хойноһоонь ошолсобо.

³²Мария Иисусай байһан газарта ерэхэдээ, тэрэниие хараад, хүлдэнь һүгэдэн унажа: – Дээдын Эзэн аа! Хэрбээ шинии эндэ байгаа һаа, дүүмни наһа барахагүй бэлэй! – гэбэ.

³³Мариягай, мүн Мариятай хамта ерэлсэһэн еврейнүүдэй уйлажа байхые хараад, Иисус айхабтар ехээр гашуудан гуниглаба.

34– Таанар тэрэниие хаана хүдөөлүүлээбта? – гэбэ. – Дээдын Эзэн аа, ошоёл даа, бидэ харуулаябди, – гэжэ тэдэниинь харюусаба.

35Иисус уйлашаба.

36– Харыт, Иисус тэрээндэ ямар ехэ дуратай байгаа гээшэб! – гэлдэбэ еврейнүүд.

37Тэдэнэй зариманиинь бэе бээдээ: – Нохор хүниие Иисус харадаг болгоо нэн. Лазариешье амиды мэндэ байлгажа шадахагүй байгаа аал? – гэбэ.

38Иисус бүри ехээр сэдхэлээ хүдэлгэн, агы нүхэндэ дүтэлбэ. Тэрэнь орохо газартаа шулуугаар бүглөөтэй агы нүхэн байгаа.

39– Шулууень эндэхээ абагты! – гэбэ Иисус. – Дээдын Эзэн аа! Үнэр орошоод байна ёхотой. Аяар дүрбэн үдэр эндэ хүдөөлүүлээтэй байнал, – гэжэ наһа барагшын эгэшэ Марфа хэлэбэ.

40– «Хэрбээ шүтэжэ ябаа наа, Бурханай алдар солые үзэхэш», – гээд шамда би хэлээ бэшэ нэн аалби? – гэжэ Иисус Марфада харюусаба.

41Шулууень зайлуулба. Иисус Тэнгэри өөдэ хараад: – Эсэгэ аа, намайе дуулаһандашни баясхалан хүргэнэб.

42Ши намайе хододоо дуулажа байдагши гэжэ би мэдэнэб, теэд намайе ши эльгээгээш гэжэ эндэ зогсогшо хүнүүдэй этигэхынь тула би тиигэжэ хэлээб! – гэжэ

43Иисус хэлээд: – Лазарь, тэндэхээ гаража ерэ! – гэжэ шангаар захиран дуугарба.

44Наһа бараһан хүниинь агы нүхэн сооһоо гаража ерэбэ. Хүдөөлүүлхэдээ орёодог бүдөөр хүл гарнуудынь орёогдонхой, нюурынь баһал бүдөөр боолгоотой байгаа бэлэй. – Боолтыень тайлагты, хаадгүй ябаад ошог! – гэжэ тэдээндэ Иисус хэлэбэ.

Фарисейнүүд Иисусые алаха гэжэ нюусаар хэлсэбэ



⁴⁵Марияда ерэнэн еврейнүүдэй олониинь Иисусай юу бүтээһыень хараад, тэрээндэ этигэбэ.

⁴⁶Гэбэшье зариманиинь фарисейнүүдтэ ошожо, Иисусай юу хэнэн тухайнь дуулгаба.

⁴⁷Түрүү санаартан ба фарисейнүүд Дээдын Зүблэл зарлаба. – Зай, яахамнай гээшэб? Энэ хүн олон янзын дүлгэ тэмдэгүүдые харуулна.

⁴⁸Иимэ юумэ саашадаашье харуулха арга тэрээндэ олгоо хаамнай, бултадаа тэрээндэ этигэдэг болохонь. Тиихэдэнь Римэйхин ерээд, Бурхан хүмьемнай, бүхы зониемнай үгы хэхэ байна, – гэжэ тэдэ хэлсэбэ.

⁴⁹Энэ жэлдэ ахамад санаарта байһан Кайафа:

⁵⁰– Таанар юушье ойлгоногүйт! Хэрбээ бүхы еврей зоной түлөө гансал хүнэй үхөө хаа, таанарта дээрэ байха гэжэ өөһэдөө ойлгоногүй гээшэ гүт? – гэжэ тэдэндэ хэлэбэ.

⁵¹Кайафа өөрһөөн тиигэжэ хэлээ бэшэ, харин энэ жэлдэ ахамад санаарта байхадаа уридшалан мэдээд: Иисус хүн зоной түлөө үхэхэ гээ бэлэй.

⁵²Гансашье еврей зоной түлөө бэшэ, харин газар дэлхэй дээгүүр эндэ тэндэ бутаран тарашаһан Бурханай бүхы үхибүүдые суглуулан нэгэдхэхын түлөө үхэхэ юм.

⁵³Тиин тэрэ үдэрһөө хойшо ахамад санаарта ба фарисейнүүд Иисусые яажа алахамнай ааб гэжэ бододог болобо.

⁵⁴Тиимэ ушарһаа Иисус еврейнүүдэй дунда өөрыгөө мэдүүлэнгүйгөөр ябадаг болоо. Сүл губиин хажууда байһан Эфраим гэжэ хотодо ошожо, шабинартайгаа хамта байба.

⁵⁵Еврейнүүдэй Паасха болохонь ойртожо байгаа. һайндэрэй урдахана арюудхуулдаг заншалаа сахижа, орон нютагайнь олон зон Иерусалим ерэбэ.

⁵⁶Бурхан хүмэ дотор суглархан тэдэ хүнүүд Иисусые бэдэрэн, өөһэд дундаа: «Таанар юун гэжэ бодонобта? найндэртэ тэрэ ерэхэгүйнь гээшэ ха?» – гэжэ хөөрэлдэбэ.

⁵⁷Түрүү санаартан болон фарисейнүүд: «Иисусые барижа хаахымнай тула, тэрэнэй хаана байһые мэдэһэн хүн бүхэн бидэндэ дуулгаха ёһотой», – гэхэн захиралта гаргаба.

Иоанн 12

Мария Иисусые найхан үнэртэй ургамалай тоһоор түрхибэ

¹Паасхын болохоһоо зургаан хоног урда Иисус Бетанида ерэбэ. Лазариин һууһан эгээл тэрэ нютагта Иисус анхан ерэжэ, Лазариие үхөөд байхадань амидыруулаа бэлэй.

²Тэндэхин Иисусые хүндэлхээе эдее хоол бэлдээд, угтамжа хэбэ. Марфа эдее хоол асарна, харин Лазарь Иисустай болон бусад айлшадтай хамта хоол барина.

³Тэрэ үедэ Мария тон үнэртэй, найхан хангалтай нард ургамалай тоһо домбо соо асараад, тэрэнээ Иисусай хүл дээрэ адхаба. Удаань, Иисусые угаа ехээр хүндэлдэг байһанаа гэршэлэн, хүлыень толгойнгоо үһөөр аршаба. Тоһоной найхан үнэр бүхы гэрээр хангалтаба.

⁴Тиихэдэнь Иисусай шабинарай нэгэниинь – Иуда Искариот (удаань Иисусые барижа үгэһэн урбагша):

⁵– Энэ тоһыень гурбан зуун динаряар худалдаад, юундэ үгытэйшүүлдэ мүнгыень хубаажа үгөөгүй гээшэб? – гэжэ хэлэбэ.

⁶(Иуда үгытэйшүүлдэ һанаагаа зобоод тиигэжэ хэлээгүй, харин тэрэ хүн өөрөө хулгайшан байгаа: тэрээндэ даалгагдаһан хамтын мүнгэнһөө олон ушарта өөрынгөө хэрэглэмжэдэ гаргашалдаг байгаа.)

⁷– Марие бү һаатуулагты! Намайе хүдөөлүүлхэ үдэртэ зорюулан энэ тоһо Мария хадагалжа байгаа, – гэжэ Иисус харюусаба. –

⁸Үгытэй ядуушуул хододоо таанартай байхал, харин би таанартай ходо байхагүйб.

⁹Тэрэ үедэ еврейнүүд Иисусай тэндэ байһые мэдээд олоороо сугларба. Гансашье Иисусые харахаяа бэшэ, харин тэрэнэй амидыруулһан Лазарие харахаяа тэдэ ерээ бшуу.

¹⁰Тиихэдэл түрүү санаартан Лазариешье алаха гэжэ шиидэһэн байгаа.

¹¹Юундэб гэбэл, Лазарие амидыруулһандань олон еврейнүүд Иисуста ерэдэг, тэрээндэ шүтэдэг болоо ха юм. Иисус Иерусалим ерэбэ.

¹²Хойто үдэрын Паасхын найрта хабаадалсагша зон Иисусай Иерусалимда дүтэлжэ ябаһан тухай дуулаад байба.

¹³Тэдэ зон пальма модоной мүшэрнүүдые баряад, Иисусые угтахаяа гараба. Тэдэ иигэжэ хашхаралдаа: Бурханда алдар соло! Дээдын Эзэнэй нэрээр заларан ерэхэн Израилиин Хаан үреэл магтаалда хүртэхэй!

¹⁴Иисус бэдэржэ олдоһон залуу элжэгэ дээрэ һууба ха. Иигэжэ Нангин Бэшэг соо бэшээтэй байһан мүрнүүд бодото дээрээ бээлбэ:

¹⁵«Сионой басаган, ши бү ай! Харьш! Тээ тэрэ шинии Хаан залуу элжэгэ унаад, шамда дүтэлжэ ябана!»

¹⁶Түрүүшээр энээн тухай шабинарын юушье ойлгобогүй. Харин Иисусай алдар соло элирхэдэнь лэ, Иисус тухай лүндэншэдэй уридшалан хэлээшээр болобо ха юм гэжэ тэдэнь ойлгоо һэн.

¹⁷Үхэхэн Лазарие агы нүхэнһөөнь дуудан Иисусай амидыруулхада байһан хүнүүд энэ ушар тухай хөөрэхөөр лэ байгаа.

¹⁸Тиимэхээ гайхамшаг хэрэг бүтээһэн хүн энэ байна гэжэ мэдэхэдээ, олон зон Иисусые угтахаяа гараа.

¹⁹Зүгөөр фарисейнүүд өөһэд дундаа хөөрэлдэбэ: – Харана гүт, бидэнэй хэхэн юумэнүүд үрэ дүнгүй байна. Хүн зон бултадаа тэрэнэй хойноһоо дахажа ябанал!

Иисус нүгшэхэ тухайгаа хэлэнэ



- ²⁰Бурханда мүргэхээ найрта ерэн зоной дунда грегүүдшье бии хэн.
- ²¹Тэдэнэр Галилейн Бетсаидаһаа гараһан Филиппдэ ошожо: – Манай эзэн аа, бидэнэр Иисустай уулзаха һанаатай байнабди, – гэжэ гуйба.
- ²²Филипп энээн тухай Андрейдэ ошожо дуулгаба, тиигээд Андрей Филипп хоёр хоюулаа Иисуста ошожо хэлэбэ.
- ²³Иисус харюусаба: – Хүн түрэлхитэнэй Хүбүүнэй алдар соло элирхэ саг ерэбэ!
- ²⁴Таанарта үнэниие хэлэнэб: шэниисын орооһон газарта унаад хосороогүй һаа, миин лэ гансахан орооһон зандаа үлэхэ, харин тэрэ орооһон хосорходоо, ехэ ургаса асарха юм.
- ²⁵Ами һаһаяа гамнадаг хүн ами һаһаяа алдана, харин энэ дэлхэйдэ байхадаа ами һаһаяа хайрлан гамнадаггүй хүн мүнхэ һаһатай болохо.
- ²⁶Намда алба хэдэг хүн минии хойноһоо дахаад ябаг! Минии байһан лэ газарта минии зараса байлсаха. Намда алба хэдэг хүниие минии Эсэгэ хүндэлхэ юм.
- ²⁷Мүнөө сэдхэл һанаамни ехээр зобожо байна! Юушье гэжэ хэлэхэбиб даа? «Эсэгэ аа! Намайе энэ зоболонто саһаа абарыш даа!» – гэхэ гүб? Теэд би энэл зоболонто сагай түлөө ерээ ха юмбиб!
- ²⁸Эсэгэ аа, өөрынгөө нэрые алдаршуула! Тиигэхэдэнь тэнгэриһээ: – Би алдаршуулааб, бүришье ехээр алдаршуулхаб! – гэхэн абяан дулдаба.
- ²⁹Тэндэ байһан зон энэ дууе дуулаба. Нэгэ зарим хүнүүдын тэнгэри дуугараа гэлсээ, нүгөөдүүлынь – Бурханай Эльгээмэл Иисуста юумэ хэлэбэ гэлсээ хэн.
- ³⁰Иисус тэдээндэ иигэжэ харюусаба: – Энэ дуун минии тула бэшэ, харин таанарай тула тэнгэриһээ дулдаба гэшэ!
- ³¹Иигээд энэ дэлхэйе шүүбэрилхэ саг тулажа ерээ, мүнөө энэ дэлхэйн Ноёниинь һегүй намнуулха!

³²Зүгөөр би газарһаа дээшээ дэгдээгдэхэдээ бүхы зоние өөртөө хабаадуулхаб!

³³Иисус иигэжэ хэлэхэдээ, ямар үхэлөөр үхэхэ байһанаа мэдүүлбэ гээшэ.

³⁴Арад зон тэрээндэ: – Бурханай табисуурта хэтэ мүнхэдөө амиды ябаха гэжэ Хуули соо бэшээтэй байна гэжэ бидэ дуулаа һәмди. Харин ши юундэ Хүн түрэлхитэнэй Хүбүүн дээшээ дэгдээгдэхэ гэжэ хэлэхэ болобош? Тиигээд тэрэ Хүн түрэлхитэнэй Хүбүүншни хэн юм? – гэбэ.

³⁵Иисус тэдээндэ: – Гэрэл туяагай таанартай хамта байха саг бага үлөө. Шэг балай харанхы таанадые хушаагүйдэ, гэрэл туяагай байһан дээрэнһе ябажа ябыт даа. Юундэб гэхэдэ, харанхы соогуур ябадаг хүн хайшаашье ошохоёо мэдэдэггүй.

³⁶Харин мүнөө дээрээ таанарта гэрэл туяагай толоржо байхадань, гэрэл туяада этигэгты – тиигэбэл гэрэл туяагай хүбүүдынһе болохот! – гэбэ. Эдэ үгэнүүдээ хэлээд, Иисус тэдэнһээ зайлажа далда оробо.

Еврейнүүд этигэбэгүй

³⁷Тиимэ олон дүлгэ тэмдэгүүдые хүн зондо Иисусай харуулбашье, тэдэнэр Иисуста этигэбэгүй.

³⁸Иигэжэ Исаяя лүндэншын: «Эзэн Бурхан аа, бидэнэй хэлэһэн үгэнүүдтэ хэн этигээ юм? Эзэн Бурханай эршэ хүсэ хэндэ нээгдэн элирүүлэгдээ юм?» – гэжэ хэлэһэн үгэнүүд хүсэлдээ бшуу.

³⁹Ондоо газарта Исаяя юундэ тэдэ этигэжэ шадахагүйб гэжэ тайлбарилһан байгаа:

⁴⁰«Бурхан тэдэ хүнүүдые һохор болгоо, ухааень балартуулаа. Тиимэһээ тэдэ нюдөөрөө юумэ харанагүй, ухаагаараа юумэ ойлгоногүй. Тиигээгүй һаа намда тэдэ хандаха һэн, би тэдэниие аргалжа эдэгээхэ һэм».

⁴¹Исаяя юундэ тиигэжэ хэлээб гэбэл, Иисусай хүсэ шадалые үзэһэн хараһан байгаа, тэрэ Иисус тухай хэлээ.

⁴²Ахамадуудайшые дунда Иисуста этигэһэн хүн үсөөн бэшэ һэн, харин энээн тухайгаа тэдэ сэхэ хэлэхээе фарисейнүүдһээ түбэгшөөдэг, мүргэлэй гэрһээ намнуулхабди гэжэ айдаг байгаа.

⁴³Хүнүүдэй магтаалда хүртэхэнь Бурханай найшаалда хүртэхэһөө дээрэ гэжэ тэдэ ханаһан байна.

Этигэхэ болон буруушааха тухай

⁴⁴Иисус шангаар дуугарба: – Намда этигэдэг хүн намда этигэнэ бэшэ, харин намайе эльгээгшэдэ этигэнэ.

⁴⁵Намайе харадаг хүн намайе харана бэшэ, харин намайе эльгээһэн Эсэгые харана.

⁴⁶Би Гэрэл туяа гээшэб, тиин намда этигэдэг хүн бүхэн шэг балай харанхы соо үлэшэхэгүйн тула би энэ дэлхэйдэ ерээб.

⁴⁷Минии хэлэһэн үгэнүүдые шагнаад, тэдэнииемни сахидаггүй хүниие би шүүбэрилхэгүйб: би энэ дэлхэие шүүбэрилхээе бэшэ, харин абархаяа ерээб.

⁴⁸Намайе буруушааһан, минии үгэ дуулаха дурагүй хүндэ заргаша бии, тэрэ хүниие минии хэлэһэн үгэ һүүлшын Үдэртэ буруушаан гэмнэхэ юм!

⁴⁹Ушарынь хэлэхэдэ, би өөрһөө хэлэнэгүйб, намайе эльгээһэн Эсэгэ юу хэлэхэб, яагаад номнохоб гэхэн захяа намда үгөө юм.

⁵⁰Тэрэ захяань мүнхэ наһа олгохо юм гэжэ би мэдэнэб. Тиимэһээ минии хэлэһэн бүхы юумэн Эсэгымни хэлэ гэжэ захиһан лэ юумэн гээшэ.

Иоанн 13

Иисус шабинарайгаа хүл угааба

¹Иимэ ушар Паасхын һайндэрэй урдахана болоо һэн. Энэ дэлхэие орхёод, Эсэгэдээ бусаха сагни ерэбэ гэжэ Иисус мэдэжэ байгаа. Энэ дэлхэйдэ үлэхэ шабинартаа тэрэ аргагүй дуратай һэн. Мүнөө тэрэнээ Иисус тон элеэр харуулба.

- ²Үдэшэлэн тэрэ шабинартайгаа хамта хоол барихаяа байба. Симон Искарриодой Иуда гэжэ хүбүүндэ шолмос Иисуста урбаха гэхэн ханал бодол идхан түрүүлбэ.
- ³Эсэгэмни бүхы юумэ намда үгөө, би Бурханһаа ерээб, мүнөө иигээд Бурхандаа бусахамни гэжэ Иисус мэдэжэ байгаа.
- ⁴Иисус шэрээгэй саанаһаа бодожо, гадар хубсаһаа тайлаад, аршуул абажа бэхэлбэ.
- ⁵Удаань хүнэг соо уһа хээд, шабинарайгаа хүл угаажа, бэхэлһэн аршуулаараа хүлыень аршажа эхилбэ.
- ⁶Симон Петрто Иисус ошобо. – Дээдын Эзэн аа! Ши минии хүл угаахаяа ханаба гүш? – гэбэ Петрынь.
- ⁷– Минии юу хэжэ байһые ши ойлгоногүйш. Һүүлдэ ойлгохош, – гэжэ Иисус харюусаба.
- ⁸– Минии хүл угаахашни гээшэ гү? Яабашье угаалгахагүйб! – Хэрбээ шамайе угаагаагүй һаамни, ши хойшодоо минии бэшэш.
- ⁹– Дээдын Эзэн аа! Тиигээ һаа, хүлыемни угаахаһаа гадна, мүн гарыемни, толгой тархиеймни угаагыш! – гэжэ Петр хэлэбэ.
- ¹⁰– Угаагдаһан хүнэй хүлыень лэ угааха ёһотой юм – тэрэ хүн арюун сэбэр байна ха юм. Мүн таанаршые арюун сэбэр хүнүүд гээшэт, зүгөөр бултадаа арюун сэбэр бэшэт, – гэжэ Иисус харюусаба.
- ¹¹Өөрыень хэн барижа үгэхэб гэжэ Иисус мэдэжэ байгаа, тиимэхээ: «Бултадаа арюун сэбэр бэшэт», – гэжэ тэрэ хэлээ.
- ¹²Шабинарайгаа хүл угааһанай удаа хубсаһаа үмдөөд, тохоногоороо дэрэ тулан һуужа, тэрэ иигэжэ хэлэбэ: – Минии таанарта юу хэхэн тухай мэдэнэ гүт?
- ¹³Таанар намайе багша, Дээдын Эзэн гэжэ нэрлэнэт, энэ зүб – би үнэндөө тиимэб.

¹⁴Тиин Дээдын Эзэн, багша байһан аад, би таанарай хүл угаагааб, тиимэһээ таанаршые бэе бэеынгээ хүл угааха ёһотойт.

¹⁵Намдал адли юумэ хэжэ байхынтнай тула би таанарта жэшээ харуулба гээшэб.

¹⁶Би таанарта үнэн зүбые хэлэнэб: зараса өөрынгөө эзэнһээ ехэ бэшэ, эльгээмэл эльгээгшэһээ ехэ бэшэ юм.

¹⁷Мэдэжэ абаһан энэ юумээ бээлүүлээ һаа, таанар аза жаргалтай байхат.

Иисуста урбаха хүн тухай

¹⁸Бултанайтнай тухай би хэлэнэгүйб: хэдыетнай шэлэжэ абаһанаа би мэдэнэб. Теэд: «Намтай суг хамта хилээмэ эдижэ байһан хүн минии урдаһаа эсэргүүсэбэ» гэхэн Нангин Бэшэгэй үгэнүүд бодото дээрээ хүсэлдэг лэ даа.

¹⁹Би таанарта энээн тухай энэ үйлэ хэрэгэй болохоһоо урда хэлэжэ байнаб. Тиин иимэ юумэнэй болоходонь, намайе «Би» байна гэжэ таанар этигэхэт.

²⁰Би таанарта үнэн зүбые хэлэнэб: минии эльгээһэн хүниие угтажа абаһан хүн намайе угтажа абана гээшэ, намайе угтажа абаһан хүн намайе эльгээһэн Эсэгые угтажа абана гээшэ.

²¹Тиигэжэ хэлээд, Иисус ехэ һанаагаа зобобо. – Таанарай нэгэнтнай намайе барижа үгэхэнь, би үнэхөөрөө баталан хэлэнэб, – гэжэ Иисус хэлэбэ.

²²Хэн тухаймнай хэлэнэ гээшэб гэжэ ойлгожо ядан, шабинарынь урда урдаһаа харалсаба.

²³Иисустай зэргэлээд тэрэнэй дуратай шабинь толгойгоо сээжэдэнь налаад һуугаа.

²⁴Энэ хэн тухай хэлэнэб гэжэ Иисусаа һурахыень Симон Петр тэрэ шабидань дохёо тэмдэг үгэбэ.

²⁵Тиин шабинь Иисуста хандан: – Дээдын Эзэн аа, тэрэ урбагша хэн гээшэб? – гэжэ асууба.

²⁶– Табаг соо хилээмэ дэбтээгээд, нэгэндэтнай үгэхэб, тэрэтнай намда урбаха, – гэжэ Иисус харюусаба. Тиигээд Иисус зүһэм хилээмэ табаг соо дэбтээгээд, Симон Искаримодой Иуда хүбүүндэ үгэбэ.

²⁷Хилээмэ абахатай сасуунь Иудын досоо Сатана ороодхибо. – Хэхэ гэжэ һанаһан юумэеэ үтэр хэ, – гээд Иудада Иисус хэлэбэ.

²⁸Юундэ Иисусай тиигэжэ хэлэһыень шэрээдэ һуугшадай хэнииньшье ойлгобогүй.

²⁹Хамтын мүнгэ Иудын барижа байһан тула «һайндэртэ хэрэгтэй юумэ бидэндэ худалдажа аба» гэжэ тэрээндэ Иисус хэлээ гээшэ ха, али үгышье һаа, үгытэй ядуу зондо юумэ абажа үгэхыень Иудада захяа ха гэжэ зариманиинь бодобо.

³⁰Иуда хилээмэеэ абаад, тэрэ дороо газашаа гараба. һүни болоод байгаа.

Шэнэ захяа заабари

³¹Иудын газар гараһан хойно Иисус хэлэбэ: – Одоол мүнөө Хүн түрэлхитэнэй Хүбүүнэй алдаршаха саг ерэбэ, Хүн түрэлхитэнэй Хүбүүнэй алдар солонь Бурханай алдар соло гээшэ.

³²Хүн түрэлхитэнэй Хүбүүнэй алдар солонь Бурханай алдар солые элирүүлбэл, Бурханшье өөрөө Хүн түрэлхитэнэй Хүбүүниие алдаршуулха. Бурхан энээниие мэнэ гэхээр бүтээхэ.

³³Үхибүүдни, таанартай суг хамта байха сагни бага үлөө. Таанар намайе бэдэрхэт, теэд еврейнүүдэй ахамдуудта хэлэхэндэл адляар, би таанарташье мүнөө хэлэхэмни: «Минии ошохо газарта таанар ерэжэ шадахагүйт».

³⁴Би таанарта шэнэ захяа заабари үгэнэб: бэе бээдээ дуратай байгты. Би таанарта дуратай байгааб, тэрээндэл адляар таанаршье бэе бээдээ дуратай байгты.



³⁵Хэрбээ таанарай бэе бээдээ дуратай байгаа хаа, таанарые минии шабинар гэжэ хүн зон барандаа мэдэхэ.

Петрой арсаха тухай Иисус уридшалан хэлэбэ

³⁶– Дээдын Эзэн аа, ши хайшаа ошохошни гээшэб? – гэжэ Симон Петр Иисучаа нураба. – Мүнөө дээрээ ши минии хойноһоо ябажа шадахагүйш, теэд хожомшог хойноһоомни ерэхэш, – гэжэ Иисус харюусаба.

³⁷– Дээдын Эзэн аа! Би мүнөө шинии хойноһоо яахадаа ошожо шадахагүй хүнбиб? Шинии түлөө үхэхэшье болобол, би бэлэн байналби!

³⁸– Минии түлөө үхэхэб гэнэ гүш? Эрэ тахяагай дуугархаһаань урда ши намһаа гурба дахин арсахалши гэжэ баталан хэлэнэб! – гэжэ Иисус харюусаба.

Иоанн 14

Иисус болбол Эсэгэ Бурханда ошохо харгы зам мүн

¹– Таанар һанаагаа бү зобогты! Бурханда шүтэжэ байгаад, мүн намда шүтэгты!

²Минии Эсэгийн гэртэ байха таһалганууд олон юм. Тиимэ бэшэ һаань, би таанарта хэлэхэ һэм. Би таанарай байха байра бэлдэхээ ошохомни.

³Би ошожо, таанарта байра бэлдэхэб; минии байдаг газарта таанарайшье намтай суг байлсахын тула би һөөргөө бусажа ерээд, таанарые абаашахаб.

⁴Минии хайшаа ошохо зам таанар мэдэнэт, – гэжэ Иисус хэлэбэ.

⁵– Дээдын Эзэн аа, шинии хайшаа ошохыешни бидэ мэдэнэгүйлди. Ошохо замыешни бидэ яажа мэдэхэбибди? – гэжэ Фома буруушаан хэлэбэ.

⁶– Би болбол Харгы зам гээшэб, Үнэн зүйл, Ажамидарал гээшэб. Намаар ошоогүй хүн Эсэгэдэ хүрэхэ шадахагүй.



⁷Таанар намайе мэдэхэ хаа, Эсэгыемнишые мэдэнэт. Энээнһээ хойшодоо таанар тэрэниие мэдэдэг болобот, нюдөөрөөшые хараба гээшэт! – гэжэ Иисус харюусаба.

⁸– Дээдын Эзэн аа! Эсэгээ бидэндэ харуулыш, ондоо юушые манда хэрэггүй, – гэжэ Филипп хэлэбэ.

⁹– Филипп, ши намайе мэдэнэгүй гүш? Би таанартай хамта иимэ удаан саг соо байгаалби! Намайе хараһан хүн Эсэгыемнишые хараба гээшэ. Харин ши юундэ «Эсэгээ бидэндэ харуулыш» гэнэбши?

¹⁰Би Эсэгэ соогоо байнаб, Эсэгэмни минии досоо байдаг гэжэ ши этигэнэгүй гүш? Теэд таанарта хэлэдэг үгэнүүдээ би өөрһөө хэлэнэгүйб, тэрэ минии досоо оршодог Эсэгэмни ажаллана гээшэ.

¹¹Би Эсэгынгээ досоо байнаб, Эсэгэмни минии досоо байна гэхэдэмни этигэгты. Хэрбээ эдэ үгэнүүдтэмни этигээгүй хаа, бүтээдэг хэрэгүүдыемни хараад этигэгты.

¹²Би таанарта үнэниие хэлэнэб: намда этигэдэг хүн минии хэдэг лэ хэрэгүүдые бүтээхэ, бүришые ехэ юумэ хэжэ шадаха, юундэб гэбэл, би Эсэгэдээ ошохомни.

¹³Минии нэрэ дурдажа, юу гуйхабта, би бүгэдыень бүтээхэб, тиигэжэ Хүбүүнэйнгээ ашаар Эсэгэнь алдаршаха юм.

¹⁴Хэрбээ Минии нэрэ дурдажа, намайе гуйгаа хаатнай, би бултыень бүтээхэб.

Нангин хүлдын эльгээгдэхэ тухай

¹⁵Хэрбээ таанар намда дуратай хаа, минии захяа заабариие дүүргэхэт.

¹⁶Тиихэдэ би Эсэгээ гуйхаб, тэрэм таанарта ондоо Туһалагшые үгэхэ, тэрэ Туһалагша хододоо таанартай хамта байха.

¹⁷Тэрэ Туһалагша болбол Үнэн зүйлэй хүлдэ мүн, тэрэ хүлдые дэлхэйн зон абажа шадахагүй, юундэб гэбэл, тэрэниие харанагүй, мэдэнэгүй

бшуу. Харин таанар тэрэниие мэдэнэт, тэрэтнай таанартай мүнөө байна, ерээдүйдэшье таанарай досоо байха.

¹⁸Би таанадые үншэн үрөөһэнөөр үлөөхэгүйб, би таанадта ерэхэб.

¹⁹Үшөө нэгэ хэды болоод, дэлхэй намайе харахагүй, харин таанар намайе хаража үзэжэ байхат: би амиды байнаб, тиимэхээ таанаршье баһа амиды байхат.

²⁰Би өөрынгөө Эсэгэ соо байнаб, таанар минии досоо байнат, би таанарай досоо байнаб – энээн тухай таанар тэрэ үдэр мэдэхэт.

²¹Минии захиһан захяа заабариие хэн дүүргэнэб, тэрэ намда дуратай гээшэ. Хэн намда дуратайб, тэрээндэ минии Эсэгэшье дуратай байха. Баһа бишье тэрэ хүндэ дуратай байхаб, би өөрыгөө тэрээндэ үзүүлхэб.

²²Тиихэдэнь Иуда (Искарот бэшэ) хэлэбэ: – Дээдын Эзэн аа! Юундэ ши бүхы дэлхэйдэ бэшэ, харин гансал бидэндэ өөрыгөө үзүүлхээ һананабши?

²³Иисус харюусаба: – Намда дуратай хүн минии һургадаг ёһоор ябаха, тиихэдэнь минии Эсэгэ тэрээндэ дуратай байха. Бидэ Эсэгэтээ хамта тэрэ хүндэ ерэхэ, тэрээнтэй байхабди.

²⁴Намда дурагүй хүн минии үгөөр ябахагүй. Харин таанарай дууладаг үгэнүүд минии хэлэһэн үгэнүүд бэшэ, харин намайе эльгээһэн Эсэгийн үгэнүүд гээшэ.

²⁵Таанартай суг хамта байһан дээрээл энэ бүгэдые таанарта хэлэбэб.

²⁶Минии аша туһада Эсэгэмни таанарта Туһалагшые, Нангин һүлдые эльгээхэ. Тэрэ Нангин һүлдэ таанарые али бүхы юумэндэ һургаха, минии хэлэһэн юумэнүүдые бүгэдыень һануулха.

²⁷Би таанарые амгалан тайбанда орхёод ябахамни, би өөрынгөө амгалан тайбаниие таанарта үгэнэб. Минии үгэхэ энхэ тайбан энэ дэлхэйн хүн зоной энхэ тайбанда адли бэшэ. Таанар һанаа сэдхэлээ бү зобогты! Бү айгты!

²⁸«Би таанарһаа холодон ошохомни, теэд дахин таанарта бусахаб» гэхыемни дуулаа һэнта. Хэрбээ таанар намда дуратай байгаа һаа, минии Эсэгэдээ ошохо байһанда баярлаха һэнта, юундэб гэбэл, минии Эсэгэ намһаа нилээд дээгүүр юм.

²⁹Эдэ бүхы юумэнэй тохёолдоходо, таанарай намда этигэхын тула энээн тухай би уридшалан хэлэнэб!

³⁰Би таанартай ииһээр ондоо хөөрэлдэхэгүйб, ушарынь нэрлэбэл, энэ дэлхэйн Ноёниинь ойртожо байна. Би энэ дэлхэйн Ноёной мэдэлдэ бэшэб.

³¹Теэд Эсэгэдээ минии дуратай байһые дэлхэйн зон мэдэхэ ёһотой. Тиимэ ушарһаал би Эсэгынгээ захиһан бүхы юумые дүүргэнэб. Зай, бодогты, мүнөө эндэһээ ябахамнай!

Иоанн 15

Иисус үзэмэй модоной ёһотой эшэ һалаа гээшэ

¹– Би үзэмэй модоной бодото эшэ һалаа гээшэб, харин Эсэгэмни үзэмшэн юм, – гэжэ Иисус хэлээ. –

²Үзэм жэмэс үгэдэггүй алишье мүшэрыемни Эсэгэмни отолжо хаяад, ехэ ургаса гарахын тула үрэжэл һайтай мүшэрнүүдыемни сэбэрлэн үлээдэг юм.

³Таанарта минии дуулгаһан һургаал үгын ашаар таанар сэбэр болобот.

⁴Би таанарай досоо байнаб, тэрээндэл адляар таанар минии досоо байгты. Мүшэр өөрөө үрэ жэмэс асаржа шададаггүй, үрэжэл үгэхын тула мүшэр эшэ һалаагай хубинь байха ёһотой. Тэрээндэл адляар таанар минии досоо байгаагүй һаа, үрэ жэмэс асаржа шадахагүйт.

⁵Би – эшэ һалааб, таанар – мүшэрнүүдни гээшэт. Хэн нэгэнэй минии досоо оршобол, би баһа тэрэнэй досоо оршохоб, тиихэдээ тэрэ хүн тон ехэ үрэжэлтэй байха. Намгүйгөөр таанар юушье хэжэ шадахагүйт.

⁶Минии досоо оршодоггүй хүн үзэмэй сэсэрлиг сооһоо хаягдажа хаташаһан мүшэрнүүд шэнги байха. Тиимэ мүшэрнүүд суглуулагдан, гал руу хаягдан, галдагдаха.

⁷Хэрбээ таанадай минии досоо оршожо, минии үгэнүүдэй таанарай досоо оршобол, юушье эрибэлтнай, эриһэн юумыетнай Бурхан таанарта үгэхэ.

⁸Минии Эсэгын алдаршахын тула таанар ехэ ургаса асархат, минии шабинар болохот.

⁹Эсэгэмни намда дуратай байдагтал адляар, бишье таанарта дуратайб. Хайра дуран соомни оршожо байгты!

¹⁰Таанарта захиһан минии захяа заабариие сахин дүүргэжэ байбал, хайра дуран соомни оршожо байхат. Тон тиигэжэл бишье Эсэгынгээ захяа заабариие сахин дүүргэжэ, Эсэгынгээ хайра дуран соо оршожо байдагби.

¹¹Минии баяр жаргалые хубаалсахынтнай тула, энэ баяр жаргалай бүрин түгэс байхын тула би эдэ бүгэдые таанадта хэлэнэб.

¹²Таанарта минии дуратай байһандал адляар, таанар бэе бээдээ дуратай байгты гэхэн захяа заабари энэ байна.

¹³Хани нүхэдэйнгөө түлөө ами наһаяа үгэхэхөө үлүү ехэ дуран дэлхэй дээрэ байхагүй.

¹⁴Таанарта захиһан минии захяа заабари сахин дүүргээ һаатнай, таанар минии хани нүхэд болонот.

¹⁵Саашадаа таанадые минии зарасанар гэжэ нэрлэхэгүйб, зараса гээшэ эзэнэйгээ юу хэдэгы мэдэнэгүй бшуу. Би таанарые хани нүхэдни гэжэ нэрлэнэб: Эсэгэхэ мэдэжэ абаһан бүхы юумээ би таанарта дуулгабаб.

¹⁶Таанар намайе шэлэжэ абаагүйт, харин би таанадые шэлэжэ абааб, таанадые хүнүүдтэ ошожо, саг үргэлжын үрэхэл асархыетнай би



заяагааб. Тиин минии нэрэһээ таанарай эриһэн хүсэһэн бүхы юумыетнай Эсэгэмни үгэхэ.

¹⁷Бэе бээдээ дуратай байгты гэжэ би таанарта захиаб.

Дэлхэйн зоной зэбүүрхэхэ тухай

¹⁸Хэрбээ дэлхэйн зоной таанарта зэбүүрхэн дурагүйтэдэг байгаа хаань, намдашье урид дурагүйтэдэг байгаа гэжэ мэдэжэ байгты.

¹⁹Хэрбээ таанар энэ дэлхэйн зонтой адли байгаа хаатнай, энэ дэлхэйн хүнүүд таанарые өөһэдынхимнай гэжэ тоолоод, таанарта дуратай байха һэн. Теэд таанар энэ зонуудаар нэгэн бэшэт, юундэб гэбэл, би таанарые шэлэжэ абахадаа энэ дэлхэйн зонуудһаа илгааб, тиимэһээл таанадые дэлхэйн зон үзэн ядана.

²⁰«Зараса болбол өөрынгөө эзэнһээ ехэ бэшэ юм» гэжэ хэлэһыемни һанана гүт? Намайе харшалһан байгаа, тиин таанарыешье харшалха. Минии үгэ дуулаһан байгаа, тиин таанарайшье үгэ дуулаха.

²¹Эдэ намһаа боложо таанарые намнажа үлдэхэ, юундэб гэбэл, намайе хэн эльгээгээб гэжэ тэдэ мэдэнэгүй.

²²Хэрбээ энэ зондо минии ерэжэ, тэдэнтэй хөөрэлдөөгүй һаа, тэдэ нүгэл хилэнсэгүй байха һэн, харин мүнөө тэдэнэр нүгэлнүүдэйнгөө түлөө хүлисэл гуйжа шадахагүй.

²³Намда зэбүүрхэн дурагүйтэгшэ минии Эсэгыешье үзэн ядана гээшэ.

²⁴Хэрбээ ондоо хүнэй урда хээгүй гайхамшаг хэрэгүүдые тэдэндэ харуулаагүй һаамни, тэдэ зэмэгүй байха һэн. Теэд мүнөө тэдэнэр гайхамшаг хэрэгүүдыемни өөһэдөө хараһан үзэһэн аад, намдашье, минии Эсэгэдэшье зэбүүрхэн дурагүйтэдэг болоо.

²⁵Иимэл байха ёһотой юм һэн даа. «Шалтагаангүйгөөр намда зэбүүрхэнэ» гэжэ тэдэнэй Хуули соо бэшээтэй байһан юумэниинь бүтэбэ гээшэ.



²⁶Минии эльгээһэн Туһалагша Эсэгэһээмни ерэхэдээ, минии тухай гэршэлхэ. Тэрэ болбол Эсэгэһээмни эхи абаһан үнэн зүбые хэлэдэг хүлдэ болоно.

²⁷Мүн таанаршые минии гэршэ болохот, ушарынь хэлэбэл, эгээл эхинһээ намтай суг байгаа ха юмта.

Иоанн 16

¹Этигэлээ гээхэгүйнтнай тула эдэ бүгэдые таанарта хэлэнэб.

²Таанадые мүргэлэй гэрһээ намнаха; энээнһээ гадна, таанарые алаха хюдахадаа Бурханда алба хэнэбди гэжэ һанадаг – тиимэ саг ерэхэ.

³Тиимэ юумэ яахадаа хэхэб гэбэл, Эсэгыешье, намайешье тэдэнэр мэдэнэгүй бшуу.

⁴Тэдэнэй эзэрхэхэ сагай орожо ерэхэдэ, энээн тухай минии хэлээшые ханахынтнай тула эдэ бүгэдые би хэлээб. Би түрүүн энээн тухай таанарта хэлээгүй һэм, юундэб гэбэл, таанадаар хамта байгааб.

Нангин хүлдэ тухай

⁵Мүнөө би намайе эльгээгшэдэ ошохомни. Теэд «ши хайшаа ошохошниб?» гэжэ таанарай хэнтнайшые намһаа һуранагүй.

⁶Гэбэшье, минии хэлэһэн үгэнүүд таанадай зүрхэ сэдхэлдэ ехэ уйдхар гашуудал түрүүлбэ.

⁷Теэд би таанарта үнэниие хэлэнэб: минии Эсэгэдээ ошоо һаамни, таанадта дээрэ байха. Хэрбээ минии ошоогүй һаа, Туһалагшатнай таанадта ерэхэгүй, харин би ошожо, Туһалагшые таанадта эльгээхэб.

⁸Нүгэл шэбэл, үнэн зүб, зарга шүүбэри гэдэг юун бэ гэжэ дэлхэйн зондо тэрэ Туһалагша ерэхэдээ харуулха.

⁹Харуулха нүгэл шэбэлынь юун бэ гэбэл – дэлхэйн зон намда этигэнэгүй.

¹⁰Харуулха үнэн зүбынь минии талада юм, ушарынь хэлэбэл, би һөөргөө Эсэгэдээ бусахамни, тиин таанар намайе ондоо харахагүйт.

¹¹Харуулха зарга шүүбэринь юун бэ гэбэл – энэ дэлхэйн Ноён гэмнүүлээд байна.

¹²Би таанадта үшөө олон юумэ хэлэхэ һэм, теэд таанар мүнөөдөө ойлгохогүйт.

¹³Үнэн зүйлэй Нангин һүлдэ таанарта ерэхэдээ, үнэн зүйлые дууһыень таанарта ойлгуулха. Нангин һүлдэ өөрһөө хэлэхэгүй, зүбхэн лэ өөрөө дуулаһан юумэеэ дамжуулан хэлэхэ, ерээдүй сагта юун болохоб гэжэ таанарта дуулгаха байна.

¹⁴Нангин һүлдэ намайе алдаршуулха, тэрэнэй дуулгаһан юумэн таанадта намһаа дамжан ошохо.

¹⁵Эсэгэдэмни байһан бүгэдэ үнэн зүйл минии юм. Тиимэ ушарһаал, Нангин һүлдын дуулгаһан юумэн таанадта намһаа дамжан ошохо юм гэжэ хэлээб.

Зоболон жаргал тухай

¹⁶Һаяар иигээд таанар намайе ондоо харахагүйт, тиибэшье нэгэ хэды болоод, намайе дахин харахат.

¹⁷Тиихэдэнь зарим шабинарынь өөһэд дундаа хөөрэлдэбэ: – Энэмнай ямар удхатайгаар хэлэнэ гээшэб? «Һаяар иигээд таанар намайе ондоо харахагүйт, тиибэшье нэгэ хэды болоод, намайе дахин харахат», – гэнэл. «Ушарынь гэхэдэ, би һөөргөө Эсэгэдээ бусахамни», – гэжэ баһа хэлэнэл.

¹⁸«Һаяар иигээд» гэхэдээ юун гэнэб? Тэрэнэй юун тухай хэлэжэ байһые бидэ ойлгоногуйлди.

¹⁹Шабинарынь юу һурахаяа һанааб гэжэ урид мэдээд, Иисус иигэжэ хэлэбэ: – «Һаяар иигээд таанар намайе ондоо харахагүйт, тиибэшье нэгэ хэды болоод, намайе дахин харахат гэхэдээ энэмнай ямар удхатайгаар хэлэнэб?» – гэжэ таанар бэе бэеһээ асуунат.

²⁰Таанарта үнэн зүбые хэлэнэб: таанар уйлахат, гашуудахат, харин дэлхэйн зон баярлаха хүхихэ. Таанар уйдхар гашуудалда абтахат, теэд удаань баярлахат.

²¹Эхэнэр хүн үхибүүгээ түрэхэ сагай ерэхэдэ, үбдэдэг зободог, теэд үхибүүгээ түрөөд байхадаа, дэлхэйдэ хүн түрэбэ гэжэ баярлахадаа, үбдэһэн зобоһоноо мартадаг.

²²Тэрээндэл адляр мүнөө таанадшые уйдажа байнат, харин дахин таанараа харахадамни зүрхэ сэдхэлтнай баяр баясхалангаар дүүрэхэ, тиин тэрэ баясхалангыетнай хэншые бууруулжа шадахагүй.

²³Тэрэ үдэр таанар намһаа юушые асуухагүйт. Таанадта үнэн зүбые хэлэнэб: минии нэрэ дурдан таанарай эриһэн бүхы юумые Эсэгэмни таанадта үгэхэ.

²⁴Минии нэрэ дурдажа, таанар юушые үшөө эрээгүйт. Эригты – абахат, тиин таанар баяр баясхалангаар дүүрэхэт!

²⁵Энээн тухай би хургаалта үгэнүүдээр таанадта хэлээб, теэд өөрынгөө Эсэгэ тухай хургаалта үгэнүүдээр бэшэ, харин сэхэ хэлэхэ сагни ерэжэ байна.

²⁶Тэрэ үдэр минии нэрэ дурдажа, Эсэгыемни гуйхат. Таанарай тула би Эсэгээ гуйхаб гэнэгүйб.

²⁷Эсэгэмни өөрөө таанарта дуратай юм, юундэб гэбэл, таанар намда дуратай байнат, намайе Бурханһаа ерээ гэжэ этигэнэт.

²⁸Би энэ дэлхэйдэ Эсэгэһээ ерээб, мүнөө энэ дэлхэие орхёод, Эсэгэдээ бусахамни.

²⁹– Одоо мүнөө ши хургаалта үгэнүүдээр бэшэ, харин сэхэ хэлэнэш, – гэжэ шабинарынь Иисуста хэлэбэ. –

³⁰Ши бүхы юумэ мэдэнэш, шамһаа асуухаһаашые урда мэдэнэш гэжэ бидэ ойлгободди. Тиимэһээ ши Бурханһаа ерээш гэжэ бидэ этигэнэбди.

³¹– Одоо этигэбэ гүт?

³²Шагнагты даа, намайе гансаарым орхёод гэр гэртээ гүйлдэн тараха сагтнай ерэжэ байна. Теэд би гансаараа бэшэб, минии Эсэгэ намтай суг хамта юм.

³³Минии досоо амгалан тайбан олохынтнай тула эдэ бүгэдые би таанарта хэлээб. Энэ дэлхэйдэ гашуудал зоболонтой ушархат, теэд сүхэршэгүй зоригтой байгты: би энэ дэлхэе илааб! – гэжэ Иисус харюусаба.

Иоанн 17

Иисус Бурханда зальбарна

¹Эдэ үгэнүүдэйнгээ һүүлээр Иисус тэнгэри өөдэ хараад, иигэжэ хэлэбэ: – Эсэгэ аа! Сагни ерэбэ. Хүбүүнэйшни шиниингээ нэрэ алдаршуулхын тула ши Хүбүүгээ алдаршуула.

²Бүхы хүнүүдые зонхилхо эрхэ засаг Хүбүүндээ олгоһон хадаш Хүбүүншни өөртэнь даалгаһан бүхы хүнүүдтэш хэтэ мүнхын амидарал олгохо.

³Хэтэ мүнхын амидарал гээшэ ори ганса үнэн бодото Бурхан бологшо шамайгаа, мүн шинии эльгээһэн Иисус Христосые мэдэхэ гһэн удхатай.

⁴Намда даалгаһан ажал хэрэгыешни бэелүүлэн, би шамайе газар дээрэ суурхуулан нэрлүүлээб.

⁵Эсэгэмни аа, юртэмсэ дэлхэйн үшөө бии болоодүйдэ, шамтайгаа суг байхадаа суурхаһан минии алдар солоор намайгаа мүнөө өөртыгөө хамта суурхуула.

⁶Дэлхэйн зонһоо илгажа намда үгэһэн хүнүүдтэ би шинии нэрэ нээбэб. Эдэ шинии хүнүүд гээшэ, эдэниие ши намда үгөөш. Эдэ хүнүүд шинии үгын ёһоор ажаһууна.

⁷Намда шинии үгэһэн бүхы юумэн шинии юм гэжэ одоол тэдэ ойлгоо.



⁸Намда шинии дамжуулан үгэһэн үгэнүүдые би тэдэндэ дамжуулбаб, тэдэнэр эдэ үгэнүүдыешни хүлээн абаа, тийн намайе шамһаа ерээ гэжэ тэдэ үнэхөөрөө ойлгоо, намайе ши эльгээгээш гэжэ этигээ.

⁹Эдэнэй тула би зальбаран гуйнаб, бүхы дэлхэйн тула зальбаран гуйнагуйб, харин намда шинии үгэгшэдэй тула зальбаран гуйнаб, юундэб гэбэл, тэдэнэр шинии мэдэлдэ байдаг юм.

¹⁰Ушарынь гэбэл, намда байһан бүгэдэ шинии юм, шамда байһан бүхэн минии юм. Тэдэнэй ашаар би алдаршабаб.

¹¹Би дэлхэйдэ саашадаа байхаяа болёоб, шамдаа бусажа ерэхэмни, харин эдэмни дэлхэйдэ үлэхэнь. Гэгээн нангин Эсэгэмни аа! Өөрыншни нэрэ солын тулада, намда шинии үгэһэн эдэ хүнүүдые, ши бидэ хоёртол нэгэн адли байхынь тула абаран үлөөгыш даа.

¹²Эдэнтэй сугтаа байхадаа, шинии намда үгэһэн нэрэ солын ашаар би өөрөө эдэниие хамгаалан хаража ябааб. Би тэдэниие хамгаалааб: хэнииньшые хосороогуй, харин хосорхо ёһотой байһан нэгэниинь лэ халаа, юундэб гэхэдэ, иигэжэ Нангин Бэшэг соо бэшээтэй үгэнүүд хүсэлдэн бэелүүлэгдэбэ гээшэ.

¹³Мүнөө би шамдаа бусахамни. Теэд минии баяр баясхалангые эдэнэймни намтай хубаалдан баясахын тула, газар дэлхэйдэ байһан дээрээ эдэ бүгэдые хэлэнэб.

¹⁴Шинии Үгые би шабинартаа дамжуулааб, тиихэдэмни дэлхэйн хүн зон тэдэндэ зэбүүрхэн дурагуйлхөө, тэдэнэр намдал адли энэ дэлхэйн зоноор нэгэн бэшэ ха юм.

¹⁵Тэдэниие энэ дэлхэйһээ абахыешни би гуйнагуйб. Тэдэниие аюулта хоротонһоо абархыешни гуйнаб.

¹⁶Тэдэнэр, намда адли, энэ дэлхэйн зоноор нэгэн бэшэ ха юм.

¹⁷Эдэниие үнэн зүйлэй аша хүсөөр өөрынгөө болго, үнэн зүйл гээшэ – шинии Үгэ мүн.

¹⁸Намайе дэлхэйн хүн зондо шинии эльгээһэндэл адли, би тэдэниие баһал энэ дэлхэйн зондо эльгээгээб.

¹⁹Эдэниие үнэн зүйлэй хүсөөр шинии болгохын тула, би өөрыгөө шамда зорюулааб.

²⁰Теэд гансал эдэнэй тула шамайе гуйна бэшэб, мүн минии тухай эдэнэймни хэлэһэн үгын ашаар намда этигэгшэдэйшье тула гуйнаб.

²¹Эдэнэр бултадаа нэгэн хамта байг лэ, ши минии досоо байнаш, би шинии досоо байнаб, тэрээндэл адли, тэдэнэр бидэнэй досоо байг лэ. Тиихэдээ намайе ши эльгээгээш гэжэ дэлхэйн зон этигэхэ.

²²Ши бидэ хоёртол адляар, тэдэнэй нэгэн хамта байхын тула, намда шинии үгэһэн алдар солые би тэдэндэ үгөөб.

²³Тэдэнэй сүм бүрин нэгэн хамта байхын тула би тэдэнэй досоо байнаб, ши минии досоо байнаш. Ши намайе эльгээгээш гэжэ, ши намда дуратай байдагтал адляар, эдэндэ дуратайш гэжэ дэлхэйн зон мэдэг лэ.

²⁴Эсэгэмни аа! Шинии үгэһэн хүнүүдэй намтай хамта минии ошохо газарта байхыень хүсэнэб. Юртэмсэ дэлхэйн бии болохоһоо урда ши намда дуратай байжа намда олгоһон алдар солыеш тэдэнэр хараг үзэг лэ.

²⁵Үнэн сэхэ Эсэгэмни аа! Дэлхэйн зон шамайе мэдэнэгүй. Теэд би шамайе мэдэнэб, намайе ши эльгээгээш гэжэ тэдэмнишье мэдэнэ.

²⁶Намда шинии дурладагтал адли дуран тэдэнэй досоо байхын тула, мүн тэдэнэй досоо минии байхын тула би тэдэндэ шинии нэрые нээгээб, нээжэшье үгэхэб.

Иоанн 18

Иисусые барижа хааба

¹Иигэжэ хэлэһэнэйнгээ һүүлээр Иисус шабинартаяа хамта Кедрон голой саада бээдэ байһан сэсэрлиг тээшэ шэглэн зорибо. Тэдэ бүгэдөөрөө сэсэрлиг руу ошобо.

²Урбагша Иуда энэ газарые мэдэхэ байгаа – Иисус шабинартаяа хамта тэндэ ходо суглардаг хэн.

³Иуда Римэй бүлэг сэрэгшэдые, мүн түрүү санаартанай, фарисейнүүдэй эльгээһэн Бурхан хүмын харуулшадые абаад, баһа эсэрлиг руу ерэбэ; тэдэнэр бултадаа буу зэбсэг, гэрэл фонарь, гал түүдэгүүдые гартаа барижа ябаа.

⁴Иисус өөртэйнэ ямар юумэ тохёолдохые уридшалан мэдэжэ байһанһаа, урдаһаань гаража: – Таанар хэниие бэдэрнэбта? – гэжэ һураба.

⁵– Назаредэй Иисусые бэдэрнэбди, – гэжэ тэдэнэ харюусаба. – Энэ би байнаб, – гэбэ Иисус. Иуда урбагша баһал тэдэнтэй хамта байлсаа.

⁶«Энэ би байнаб» гэжэ Иисусай хэлэмсээр, тэдэнэ гэдэргээ сухарин, газарта унашабад.

⁷– Таанар хэниие бэдэрнэбта? – гэжэ Иисус дахин тэдэнһээ асууба. – Назаредэй Иисусые бэдэрнэбди, – гэжэ тэдэнэ харюусаба.

⁸– Энэ би байнаб гэжэ таанарта хэлээ хамнайб. Хэрбээ таанарта би хэрэгтэй һаа, эдэ хүнүүдые табигты, – гэбэ Иисус.

⁹Тэрэ юундэ тиигэжэ хэлээб гэбэл: «Намда шинии үгэһэн хүнүүдэй нэгэнииньшые хосороогүй», – гэжэ Иисусай хэлэһэн үгэнүүд хүсэлдэн бээлүүлэгдэхэ ёһотой байгаа.

¹⁰Һэлмэтэй байһан Симон Петр һэлмээ гаргаһан бэээрээ ахамад санаартын зарасын баруун шэхые таһа сабшаба. Тэрэ зарасань Малх гэжэ нэрэтэй байгаа.

¹¹– Һэлмээ хуйдань хэ! Иимэ хуби заяа Эсэгэмни намда үгөө юм. Энээнһээ би арсаха аалби? – гэжэ Петрто Иисус хэлэбэ.

Ахамад санаарта мүшхэбэ. Петр Иисусаа арсаба

¹²Тиихэдэнь Римэй сэрэгшэд даргатаяа хамта, мүн ахамад санаартын болон фарисейнүүдэй эльгээхэн Бурхан хүмын харуулшад Иисусые барижа хүлибэ.

¹³Тэрээние түрүүн тэрэ жэлдэ ахамад санаарта байһан Кайафа гэгшын хадам эсэгэнь болохо Аннада абаашаба.

¹⁴Бүхы еврей зоной орондо гансал хүн хосороо һаа дээрэ байха гэжэ еврейнүүдэй ахамаддуудта зүбшэл үгэхэн хүниинь эгээл тэрэ Кайафа гэгшэ байгаа.

¹⁵Иисусай хойноһоо Симон Петр, баһа нэгэ шабинь дахажа ябаа. Тэрэ шабинь ахамад санаартатай танил байһан дээрэхэ ахамад санаартын буусада Иисустай хамта оробо.

¹⁶Харин Петр бартаагай саана үлэбэ. Удаань ахамад санаартатай танил шабинь газар гаража, бартаагай үүдэ һахидаг зараса эхэнэртэй хөөрэлдөөд, Петрые хорёо соо оруулба.

¹⁷– Ши энэ хүнэй шабинь хаяаш? – гэжэ зараса эхэнэрынь Петрто хэлэбэ. – Бэшэб даа, – гэжэ Петр харюусаа.

¹⁸Газар хүйтэн байгаа. Зарасанар болон Бурхан хүмын харуулшад гал түүдэг носоогоод, хажуудань дулаасажа һуугаа. Мүн Петршые тэдэнэй хажууда зогсоод, дулаасажа байгаа.

¹⁹Тэрэ үедэнь ахамад санаарта Иисусай шабинар тухай, тэрэнэй хургаал номнол тухай Иисусаа асуулта абажа байба.

²⁰– Би бүгэдэ зоной урда сэхэ хэлэдэг хэнби. Би мүргэлэй гэрнүүд соо ба Бурхан хүмэ соо хододоо хургаалаа номногшо хэм. Тэндэ бүхы еврейнүүд ерэдэг хэн, – гэжэ Иисус харюусаба. – Ньюса юумэ би огто хэлээгүйб.

²¹Юундэ таанар намайе мүрдэжэ мүшхэжэ байна гээшэбта? Юу хэлэхэн тухаймни минии шагнагшадһаа һурьт, юун гэжэ хэлэхемни тэдэ мэдэхэл.

²²Иигэжэ хэлэхэдэнь, Иисусай хажууда зогсожо байһан харуулшадай нэгэниинь тэрэнэй нюурыень альгадаад: – Ахамад санаартын урдаһаа юундэ иигэжэ дуугарнабши! – гэжэ зандаран хэлэбэ.

²³– Хэрбээ али-нэгэн буруу юумэ минии хэлээ һаа, ямар юумэниинь бурууб гэжэ намда хэлыш. Хэрбээ үнэн зүб юумэ хэлээ һаамни, ши намайе юундэ сохинобши, – гэбэ Иисус.

²⁴Тиихэдэнь Анна Иисусые хүлээтэй зандань ахамад санаарта Кайафада эльгээбэ.

²⁵Симон Петр газаа дулаасажа байба. – Ши баһа Иисусай шабинь хаяаш? – гэжэ тэрээндэ хэлэбэд. – Бэшэб, – гэжэ Петр харюусаба.

²⁶– Сэсэрлиг соо шамайе Иисустай хамта байхыешни би хараа бэшэ һэн аалби? – гэжэ ахамад санаартын зарасанарай нэгэн асууба. Тэрэ зарасын түрэл болохо хүнэй шэхэ Петр хэлмээрээ таһа сабшаһан байгаа.

²⁷– Би шабинь бэшэб, – гэжэ Петр баһа мэлзэбэ. Тиигэмсээрнь эрэ тахьяа дуугарба.

Иисус Пиладай урда зогсобо

²⁸Эртэ үглөөгүүр еврейнүүд Иисусые удамаршын ордондо Кайафаһаа асарба. Бээ бузарлахагүйн тула тэдэ римэй засаглагшын ордондо оробогүй, тэндэнь ороо һаа, тэдэндэ Паасхын зоог барижа болохогүй байгаа.

²⁹Тиимэхээ удамарша Пилат тэдэнтэй уулзахаяа гараба. – Энэ хүниие таанар юун гэжэ зэмэлнэбта? – гээд тэрэ асууба.

³⁰– Хэрбээ гэм хээгүй һаань, бидэ энээниие шамда асархагүй һэмди, – гээд тэдэнь харюусаба.

³¹– Энээнээ өөһэдөө абаашаад, өөһэдынгөө хуулиин ёһоор шүүбэрилэгты, – гэбэ Пилат. – Римэй засагаархин хүниие саазалха эрхэ бидэндэ олгоногүй ха юм, – гэжэ тэдэнь арсаба.



³²Иигэжэ ямар үхэлөөр үхэхэ тухайгаа Иисусай хэлэһэн үгэнүүд хүсэлдэн бэелүүлэгдэбэ.

³³Пилат ордондоо дахин ороод, Иисусые дуудажэ: – Ши еврейнүүдэй хаан гүш? – гэжэ асууба.

³⁴– Нам тухай ши өөрөө тиигэжэ һанаһанаа хэлэнэ гүш, али ондоо хүнүүд шамда тиигэжэ хэлээ гү? – гээд Иисус һураба.

³⁵– Би еврей аалби? Шинии өөрыншни нютагаархин, түрүү санаартан шамайе намда асаржа тушаагаа. Ямар тиимэ муу юумэ ши хээбши? – гэбэ Пилат.

³⁶Иисус харюусаба: – Минии хаан түрэ энэ дэлхэй дээрэхи засаг түрэдэл адли бэшэ юм. Хэрбээ минии хаан түрэ энэ дэлхэй дээрэхи засаг түрэдэл адли байгаа һаа, минии албатан намайе еврейнүүдэй ахамадуудай гарта оруулхагүй гэжэ оролдохо һэн. Минии мэдэлэй хаан түрэ энэ дэлхэй дээрэхи засаг түрэдэл адли бэшэ юм.

³⁷– Тиихэдээ ши ябашье һаа, хаан болоно хаяаш? – гэжэ Пилат асууба. – Ши өөрөө намайе хаан гэнэш. Би үнэн зүйлые гэршэлхын тула түрэхэн, дэлхэйдэ ерэхэн байнаб. Үнэн зүйлые баримталагшад бултадаа минии хэлэһые дуулана, – гэбэ Иисус.

³⁸– Үнэн зүйл гэжэ юун бэ? – гээд Пилат асууба.

Иисусые саазалха шиидхэбэри гаргабад

Пилат дахин еврейнүүдтэй уулзахаяа гаража: – Би энэ хүндэ зэмэ тохохо ямаршые баримта олоногүйб, – гэбэ. –

³⁹Паасхынтнай үедэ би нэгэ хүниетнай таанарта саазаһаа сүлөөлжэ үгэдэгби – танайда тиимэ заншал бии ха юм. Еврейнүүдэй хааниие танда табихыемни хүсэнэ гүт?

⁴⁰– Угы! Тэрээниие бэшэ! Бараббые бидэндэ таби! – гээд тэдэн хашхаралдаба. Харин Барабба гэдэгынь үймүүлэгшэ байгаа.

Иоанн 19



- ¹Тиихэдэнь Пилат Иисусые ташуурдагты гэжэ захирба.
- ²Сэрэгшэдынь үүргэнээр гүрлөө гүрэжэ, толгой дээрэнь табиба, тэрээндэ улаан суба үмдэхүүлбэ.
- ³Иисуста дүтэлжэ ерээд: – «Еврейнүүдэй хаан» мандаха болтогой! – гэлдэн, Иисусай нюур хасарые альгадана.
- ⁴Пилат дахин гаража, еврейнүүдтэ хандан: – Тэрэниие таанадта харуулхамни. Таанар мэдэжэ байгты: би энэ хүндэ зэмэ тохохо ямаршые баримта олоногүйб, – гэбэ.
- ⁵Тиихэдэнь Иисус ордон сооһоо гаража ерэбэ, хадхууртай үбһэн гүрлөө толгой дээрэнь табигданхай, улаан суба үмэдхүүлэнхэй байба. – Тэрэ хүн энэл даа! – гэбэ Пилат.
- ⁶Теэд түрүү санаартан, харуулшад Иисусые хараад: – Тэрэниие хэрээһэндэ хада, хэрээһэндэ хада! – гэжэ хашхаралдаба. – Өөһэдөө барижа, энээнээ хэрээһэндэ хадагты! Би энэниие зэмэлхэ юумэ олоногүйб, – гэжэ тэдэндэ Пилат хэлэбэ.
- ⁷– Манай Хуулиин ёһоор энэ хүн үхэхэ ёһотой, юундэб гэхэдэ, өөрыгөө Бурханай Хүбүүн гэжэ айладхана, – гэжэ еврейнүүд харюусаба.
- ⁸Пилат энэниие дуулаад, бүри ехээр айшаба.
- ⁹Дахин ордондоо ороод: – Ши хаанаһаабши? – гэжэ Иисусаа һураба. Теэд Иисус харюусабагүй.
- ¹⁰Тиихэдэнь Пилат: – Намтай хөөрэлдэхэ дурагүй байна гүш? Би шамайе табюулхашые эрхэтэйб, саазалуулхашые эрхэтэйб – энэниие мэдэнэгүй гээшэ гүш? – гэбэ.
- ¹¹– Хэрбээ дээрэһээ тиимэ эрхэ шамда үгтөөгүй һаа, ши намайе мэдэлдээ абажа заяандаашые шадахагүй һэнши. Тиимэһээ намайе шамда тушааһан хүнэй нүгэлынь бүришые ехэ юм.
- ¹²Тиигэжэ хэлэхэдэнь, Пилат Иисусые хаалтаһаа сүлөөлхэ гэжэ оролдоһон байна. Теэд еврейнүүд: – Хэрбээ ши энэниие табяа һаа,

Римэй хаанай нүхэр бэшэш! Өөрыгөө хаан гээшэб гэдэг хүн хадаа императорай урдаһаа эсэргүүсэн тэмсэнэ гээшэ! – гэжэ хашхаралдаба.

¹³Пилат энээниенъ дуулаад, Иисусые ордон сооһоо гаргаһан бэеэрээ, заргашын һуудаг креслэдэ һууба. Энэнъ «Шулуугаар дэбдигдэһэн газар» (еврей хэлээр «Габбата») гэжэ нэрэтэй.

¹⁴Энэ ушар Паасхын һайндэрэй урдахана, зургаан гарагай хахаддэрэй багаар болоо. – Харагты даа, энэ таанарай хаан гээшэ! – гэжэ Пилат еврейнүүдтэ хандан хэлэбэ.

¹⁵– Үгы болог! Тонилог саашаа! Энээниие саазала! – гэжэ тэдэнъ хашхаралдаба. – Таанарай хааниие би саазалхамни гээшэ гү? – гэжэ Пилат асууба. – Римэй хаанһаа бэшэ ондоо хаан маанадта байхагүй! – гэжэ түрүү санаартан харюусаба.

¹⁶Тиихэдэнъ лэ Иисусые хэрээһэндэ хадажа саазалхыенъ Пилат зүбшөөһэн байна. Тиихэдэнъ тэдэ Иисусые туужа абаашаба.

Иисусые хэрээһэндэ хадажа саазалба

Тиихэдэнъ тэдэ Иисусые туужа абаашаба.

¹⁷«Хохимой» (еврей хэлээр «Голгофо») гэжэ нэрэтэй газар хүрэтэр Иисус хэрээһеэ бэе дээрээ үргэлөөд ябаха ёһотой байгаа.

¹⁸Тэндэ Иисусые хэрээһэндэ хадаад, һүүлдэ хэрээһыенъ бодхообо. Тэрээнтэй хамта үшөө хоёр хүниие: нэгыенъ баруун тээнъ, нүгөөдыенъ зүүн тээнъ, Иисусые дунданъ хэрээһэн дээрэ үргэбэ.

¹⁹Хабтагай модо бэлдээд, хэрээһэн дээрэнъ хадаха гэжэ Пилат захирба. Тэрэ хабтагай дээрэнъ: «Назаредэй Иисус, еврейнүүдэй хаан» гэжэ бэшээтэй байгаа.

²⁰Тэрэниие олон еврейнүүд уншаа һэн. Юундэб гэбэл, Иисусай саазалуулһан газарынь городһоо холо бэшэ һэн, тэрэнъ еврей, лата, грек хэлэнүүдээр бэшээтэй байгаа.

²¹Еврейнүүдэй түрүү санаартан Пиладта иигэжэ хэлэһэн байнад: – «Еврейнүүдэй хаан» гэжэ бү бэшэ! «Энэ хүн өөрыгөө еврейнүүдэй хаан гэдэг һэн» гэжэ бэшэ.

²²– Юун гэжэ бэшээбиб, тэрээгээрээл байг, – гэжэ Пилат харюусаба.

²³Сэрэгшэд Иисусые хэрээһэндэ хадажа саазалаад, тэрэнэй субые абажа, сэрэгшэдэй тоогоор – дүрбэн хэһэг болгожо, өөһэд хоорондоо хубааба. Зүйдэлгүйгөөр нэхэгдэһэн субыень баһа абаба.

²⁴– Энээниень бү шуулая, жээрэб хаяябди, хэндэмнай туданаб, тэрэ хүн абаха, – гэжэ өөһэд дундаа хэлсэбэ. Иигэжэ Нангин Бэшэг соо: «Минии хубсаһые хоорондоо хубаагаад абаа, минии хубсаһа тухай жээрэб хаяа» гэжэ бэшээтэй үгэнүүд хүсэлдэн бэлүүлэгдээ. Сэрэгшэд иимэл юумэ хэһэн байгаа.

²⁵Иисусай хэрээһэнэй хажууда тэрэнэй эжы, нагаса эжынь, Клопасай һамган Мария, мүн Магдалай Мария гэгшэд зогсожо байгаа һэн.

²⁶Иисус эжыгээ, эжынгээ хажууда зогсожо байһан өөрынгөө дуратай шабиие хараад, эжыдээ: – Эжымни, энэ болбол шинии хүбүүн гээшэ, – гэжэ хэлэбэ.

²⁷Удаань шабидаа: – Энэ болбол шинии эжы гээшэ, – гэбэ. Тиһэнэһын хойно тэрэ шабинь Иисусай эжые гэртээ асаржа байлгаа.

Иисус нүгшэбэ

²⁸Болохо юумэн боложо дүүрэхын заха үзэгдэхые Иисус ойлгожо, Нангин Бэшэг соо бэшэгдэһэн мүнүүдые хүсэлдүүлэн: – Ундам хүрэнэ! – гэбэ.

²⁹Тэндэ дүүрэн домбо соо гашуун архи байба. Сэрэгшэд бамбагар юумэн дээрэ тэрэ архиһаа адхаад, тэрэнээ иссоп ургамалай мүшэр дээрэ табяад, Иисусай уралда ойртуулба.

³⁰Иисус тэрэ улаан архиинь амсаад: – Бүтэбэ даа! – гэжэ хэлэбэ. Тиин тархья тонгойлгон, ами табиба.

³¹Тиихэдэ пятница, субботодо бэлдэхэ үдэр байгаа. Саазалуулхан хүнүүдэй бэеы субботын үдэр үлгөөтэй зандань байлгахагүй гэжэ еврейнүүдэй ахамадууд оролдоо. Теэдшые тэрэ субботодо Паасхын ехэ хайндэр тудаа. Иимэ ушарһаа, саазалуулагшадай шэлбыень хуха сохёод, бэеыень хэрээһэнһэнь абхуулыт гэжэ еврейнүүдэй ахамадууд Пиладые гуйба.

³²Сэрэгшэд ерэжэ, Исустай хамта саазалуулхан нэгэ хүнэйн шэлбые хухалба, удаань хоёрдохи хүнэйхиен шухалба.

³³Тиигээд Исусай хажууда ерээд харахадань, тэрэ үхэшэһэн байба, тиимэхэ шэлбыень хухалбагүй.

³⁴Гэбэшые нэгэ сэрэгшэнь тэрэнэй хүбээе жадаараа сүмэ хадхаба. Тиигэмсээрнь тэндэһэнь шуһан ба уһан гоожобо.

³⁵Таанарайшые үнэншэхын тула бараниие өөрынгөө нюдөөр хараһан хүн энээн тухай хөөрөө бэлэй. Тэрэ хүнэй гэршэлэн харуулһаниинь үнэн зүб юм, үнэн зүб юумэ хэлэнэб гэжэ тэрэ хүн мэдэнэ.

³⁶Тэрэнэй гансаханшые яһаниинь хухархагүй гэхэн Нангин Бэшэгэй үгэнүүд хүсэлдэн бээлүүлэгдэбэ.

³⁷Сүм хадхаһан хүнөө тэдэ хараха гэжэ Нангин Бэшэгэй баһа ондоо тээ хэлэгдэнэ.

Иисусые хүдөөлүүлһэн тухай

³⁸Энээнэй һүүлдэ Аримафейн Иосиф гэдэг хүн ерэжэ, Исусай бэеые абаашаха зүбшөөл Пиладһаа гуйба (Иосиф еврейнүүдэй засагаархинһаа айжа байһан дээрэхэ Исусай нюуса шабинь байгаа). Пилат тэрээндэ зүбшөөлөө үгэбэ. Иосиф Исусай бэеые абаашаба.

³⁹Нэгэтэ хүни Исуста ерэхэн Никодим мүнөө баһа ерэлсэбэ. Никодим зуугаад һүүнтэ хайхан үнэртэй смирна ба алой ургамалнуудай шүүһэ асарба.

⁴⁰Тэдэ хоёр Исусай шарилые хайхан хангалтай шүүһэндэ дэбтээһэн бүдөөр орёобо (еврейнүүд тиигэжэ хүдөөлүүлдэг заншалтай байгаа).



⁴¹Иисусай саазалуулхан нууриһаа холо бэшэ сэсэрлиг бии һэн, тэндэнь урдань хэнэйшье хэбтээгүй шэнэ агы нүхэн түхээрэгдээд байгаа.

⁴²Субботын урдахи үдэр һэн тула, мүн шэнэ агы нүхэн дүтэхэн байһан дээрһээ, Иисусые тэрэ агы нүхэндэ хадаглаба.

Иоанн 20

Хооһон агы нүхэн

¹Гарагай нэгэнэй, воскресениин эртэ үглөөгүүр, газар харанхы байхада, Магдалай Мария агы нүхэндэ дүтэлэн ерэхэдээ, тэрэнэй амһарыень хаагаад байһан шулуунайнь хажуу тээшээ болгогдоод байхые обёорон хараба.

²Магдалай Мария Симон Петрто, мүн Иисусай дуратай байһан нүгөөдэ шабидань гүйжэ ошоод: – Дээдын Эзэнэй шарилые агы нүхэнһөөнь абаашаһан байна, хайшань абаашаһыень бидэ мэдэнэгүйбди, – гэжэ тэдэндэ дуулгаба.

³Петр ба нүгөөдэ шаби хоёрын агы нүхэн тээшэ ошобо.

⁴Хоюулаа гүйбэшье, нүгөөдэ шабинь Петrhoо хурдан байһан дээрһээ, агы нүхэнэй хажууда түрүүн гүйжэ ерээ.

⁵Тонгойгоод харахадань, тэндэ Иисусые хүдөөлүүлхэдээ орёһон бүдын лэ байба. Теэд агы нүхэ руу тэрэ оробогүй.

⁶Хойноһоонь Симон Петр гүйжэ ерээд, агы соонь ороходоо, бүдын хэбтэхые хараба.

⁷Мүн толгойень бооһон бүд тэндэ байба. Теэд толгойень бооһон бүд бэеыень орёһон бүдтэй хамта бэшэ, харин байһан байрадаа монсогойлоотой, амяараа хэбтээ.

⁸Агы нүхэндэ түрүүн гүйжэ ерэхэн нүгөөдэ шабинь баһа тэндэ ороод, тиимэ юумэ харахадаа, этигэбэ.

⁹Теэд Иисус үхөөд амидырха гэжэ Нангин Бэшэг соо бэшээтэй байһан зүйлые тэдэ шабинарын үшөөл ойлгоногүй байгаа.

10Тэдэ гэртээ бусаба.

Магдалай Мария Иисусые хараба

11Мария агы нүхэнэй хажууда зогсоод уйлажа байба. Уйлажа байгаад, агы нүхэ руу тонгойжо харахадаа,

12иимэ юумэ обёорбо: Иисусай бэеын хэбтэһэн газарта Бурханай хоёр эльгээмэл сагаан хубсаһа үмдэнхэй һуужа һууба – нэгэниинь толгой таладань, нүгөөдэнь – хүлзүүр таладань һууба.

13– Эхэнэр аа, ши юундэ уйлажа байнабши? – гэжэ тэдэ хоёрын асууба. – Багшымни шарилые агы нүхэн сооһоонь абаашаһан байна, хайшань абаашаһыень би мэдэнэгүйлби, – гэжэ Мария харюусаба.

14Тиигэжэ хэлээд, гэдэргээ эрьежэ харахадань, урдань Иисус зогсожо байба. Теэд Мария тэрэниие танибагүй.

15– Эхэнэр аа, ши юундэ уйлажа байнабши? Хэниие бэдэрнэбши? – гэбэ Иисус. Энэнь саад таригша байна гэжэ һанаад, Мария тэрээндэ: – Эзэмни аа, хэрбээ тэрэнэй шарилые ши абаашаа һаа, хаана орхёобши – хэлыш, би тэрэниен абаашахамни, – гэбэ.

16– Мария! – гэбэ Иисус. Мария гэдэргээ эрьен хараад: – Раббуни! – гэжэ еврей хэлэн дээрэ хашхараад абаба (энэнь «багша» гэхэн удхатай үгэ).

17– Намайе бү бари! – гэжэ Иисус тэрээндэ хэлэбэ. – Би Эсэгэдээ үшөө бусаагүй байнаб. Минии аха дүүнэртэ ошоод, «Би өөрынгөө, мүн таанарай Эсэгэдэ, өөрынгөө, мүн таанарай Бурханда бусанаб», – гэжэ хэлэ.

18Магдалай Мария шабинартань ерээд: – Би Дээдын Эзэниие харааб! – гэбэ. Тиигээд Иисусай хэлэһэн үгэнүүдые тэдэндэ дамжуулан дуулгаба.

Шабинарынь амидырһан Иисустай уулзаба

19Тэрэл үдэрэйнгөө үдэшэ, ондоогоор хэлэхэдэ, гарагай нэгэнэй үдэшэ шабинарынь суглараад, еврейнүүдэй ахамадуудһаа айжа, үүдээ шэбхэдээд һууба. Тэрэ үдэнь Иисус орожо, тэдэнэй дунда зогсоод: – Амгалан тайбаниие таанадта айладханаб! – гэбэ.

²⁰Тиигээд тэдээндээ гараа, хүбээгээ харуулба. Шабинарын Дээдын Эзэнээ хараад, ехэ баярлаба.

²¹– Таанарта амгалан тайбан! – гэжэ Иисус дабтан мэндэшэлбэ. – Намайе Эсэгэмни эльгээгээ, баһа бишье таанараа эльгээнэб.

²²Тиигэжэ хэлэмсээрээ, Иисус тэдэн тээшээ үлеэгээд: – Нангин хүлдые тогтоон абагты!

²³Хэнэй нүгэлые хүлисээнэбта, тэрэнэй нүгэлынь хүлисэгдэхэ, хэнэйхиенень хүлисээнэгүйбта, тэрэнэй нүгэлынь хүлисэгдэхэгүй, – гэжэ хэлэбэ.

Фома Иисусые хараба

²⁴Иисусай ерэхэдэ, арбан хоёр шабиинь нэгэн Фома (далда нэрэн – Эхир) тэдэнтэй байлсаагүй хэн.

²⁵– Дээдын Эзэниие бидэ хараабди! – гэжэ Фомада бэшэ шабинарын хэлэбэ. – Тэрэнэй гарта хадааһаар хадаһанай шарха хараадүйдөө, тэрэ шарха руунь хургаяа хэжэ үзөөдүйдөө, хүбээгэйнь шархые гараараа барижа үзөөдүйдөө, би этигэхэгүйб! – гэжэ Фома харюусаба.

²⁶Долоо хоноод, Иисусай шабинарын дахин сугларба, мүнөө тэдэнтэй хамта Фомашье байлсаа. Үүдэн хаалтатай байгаа. Иисус орожо ерээд, тэдэнэй урда зогсон: – Таанарта амгалан тайбан! – гэбэ.

²⁷Удаань Фомада хандажа: – Хургаяа үгэ! Энэ минии гарые барижа үзэ. Гараа харбайгаад, хүбээгэйм шарха руу хэ! Юумэндэ һэжэг түрэхее боли, этигэжэ яба! – гэбэ.

²⁸– Дээдын Эзэмни, Бурхамни! – гэжэ Фома хашхараад абаба.

²⁹– Ши намайе харахадаал этигэбэш. Теэд намайе хараагүй аад, этигэһэн хүнүүд жаргалтай! – гэжэ Иисус тэрээндэ хэлэбэ.

³⁰Мүн баһа ондоошье Иисусай бүтээһэн олон тоото гайхамшаг дүлгэ тэмдэгүүдые тэрэнэй шабинарын хараһан байна. Энээн тухай энэ ном соо бэшэгдэбэгүй.

³¹Тeэд Иисус болбол Бурханай табисуурта, Бурханай Хүбүүн гэжэ таанарай этигэхын түлөө, Иисуста этигэдэгэйнгээ ашаар амиды ябахынтнай түлөө энэ бүхы юумэн бэшэгдэбэ гээшэ.

Иоанн 21

Долоон шабинанынь Иисустай уулзаба

¹Энээнэй удаа Тибериада нуурай хажууда байһан шабинартаа Иисус дахин өөрыгөө үзүүлбэ. Энэ ушар иигээд болоһон байна.

²Симон Петр, Эхир гэжэ ара нэрэтэй Фома, Галилейн Канаһаа гарбалтай Натанаил, Зэбэдэйн хүбүүд, Иисусай ондоо хоёр шабинар бултадаа сугларба.

³– Би загаһа барихаяа ошохомни, – гэжэ Симон Петр тэдэндэ хэлээ. – Бидэшье шамтай ошолсохомнай, – гэжэ бэшэниинь хэлэбэ. Тэдэнэр онгосодо һуугаад, нуураар тamarба, теэд тэрэ хүни нэгэшье загаһа барибагүй.

⁴Үүр сайжа эхилхэдэ Иисус нуурай эрьедэ зогсожо байба. Теэд шабинанынь Иисусые танибагүй.

⁵– Хүбүүд, загаһа бариба гүт? – гэжэ Иисус тэдэнһээ асууба. – Баряагүйбди, – гэжэ тэдэнь харюусаба.

⁶– Губшуураа онгосынгоо баруун тээнъ хаягты, тиигээ һаа, барихат, – гэбэ Иисус. Тэдэнь гүльмее хаяба, тиихэдэнь гүльмэ соонь татажа гаргахын аргагүй олон загаһа орошоод байба.

⁷– Энэ Дээдын Эзэн байна! – гэжэ Иисусай дуратай шабинь Петрто хэлэбэ. Энэ Дээдын Эзэн байна гэжэ дуулахадаа, Симон Петр гадар хубсаһаа үмдөөд, уһа руу хүрэбэ. Энээнэй түрүүн Симон Петр загаһа барихаяа гадар хубсаһаа тайлаад байгаа.

⁸Нүгөөдэ шабинанынь загаһатай гүльмее хойноһоо шэрээд, онгосоороо эрье тээшэ тamarба. Нуурайнь эрье холо бэшэ һэн – зуугаад тухай метртэ байгаа.

⁹Уһанай эрьедэ гарахадаа, носожо байһан улаан сог, дээрэнь загаһа, хажуудань хилээмэ байхые шабинарынь хараба.

¹⁰– Мүнөө барихан загаһанһаа үшөө нэгэ хэдые асарагты, – гэжэ Иисус тэдэндэ хэлэбэ.

¹¹Симон Петр уһанай эрьедэ гараад, гүльмээ татажа гаргаба, тэндэнь зуун табин гурбан томо гэгшын загаһа дүүрэн ороод байба. Тиимэ олон загаһа ороод байбашье, гүльмэнь таһарбагүй.

¹²– Үглөөнэй хоол барихаяа һуугты, – гэбэ Иисус. Ши хэн гээшэбши гэжэ тэрээнһээ асуухаяа шабинарай хэнииньшые зүрхэлбэгүй. Энэмнай Дээдын Эзэн байна гэжэ тэдэнь мэдээ ха юм.

¹³Иисус хажуудань ерэжэ, хилээмэ абаад, тэдэндээ хубааба, мүн загаһа хубаажа үгэбэ.

¹⁴Амидырһанайнгаа һүүлдэ шабинартаа Иисусай гурбадахия өөрыгөө үзүүлхэдэнь, тиимэ ушар болоо һэн.

Иисус Петр хоёр

¹⁵Тэдэнэй эдеэлһэн хойно Иисус Симон Петрто хандан: – Иоаннай хүбүүн Симон, ши намда эдэнһээ бүри ехээр дуратай гүш? – гэжэ асууба. – Тиимэ даа, Дээдын Эзэн, шамда минии дуратайе ши мэдэнэ ха юмши, – гэжэ Петр харюусаба. – Минии хурьгадые харууһалжа бай, – гэбэ Иисус.

¹⁶Тэрээнһээ хоёрдохийё: – Иоаннай хүбүүн Симон, ши намда дуратай гүш? – гэжэ һураба. – Тиимэ даа, Дээдын Эзэн, шамда минии дуратайе ши мэдэнэ ха юмши, – гэжэ Петр харюусаба. – Минии хонидые харууһалжа бай.

¹⁷Иисус тэрээнһээ гурбадахия: – Иоаннай хүбүүн Симон, ши намда дуратай гүш? – гэжэ һураба. Намда дуратай гүш гэжэ Иисусай гурбадахия һурахадань, Петрой досоо уйдхартай байба. – Дээдын Эзэн, ши бултыень мэдэжэ байналши. Шамда минии дуратайе ши

мэдэнэ ха юмши, – гэжэ Иисуста Петр харюусаба. Иисус тэрээндэ: – Минии хонидые харууһалжа бай.

¹⁸Шамда үнэн зүбые хэлэнэб: залуу ябахадаа бүһээе ши өөрөө бүһэлөөд, дуратай тээшээ ошодог байгааш. Харин үтэлхэдэшни гарыешни уяд, шинии ошохо дурагүй байһан газарта шамайе хүтэлөөд абаашаха, – гэжэ хэлэбэ.

¹⁹Иигээд хэлэхэдээ, Петр ямар үхэлөөр үхэжэ Бурханиие алдаршуулхаб гэжэ Иисус ойлгуулһан байгаа. Тиигээд: – Минии хойноһоо дахаад яба! – гэжэ Петрто хэлэбэ.

Иисус ба тэрэнэй дуратай шабинь

²⁰Петрой гэдэргээ эрьеэд харахадань, Иисусай дуратай шаби Петрой арада ябаба. һүүлшын үдэшэ хоол барижа байха үедэ эгээл тэрэ шабинь Иисусай сээжэдэ толгойгоо налаад һуужа байһанаа: «Дээдын Эзэн аа! Шамайе хэн барижа үгэхээе байнаб?» – гэжэ һураа бэлэй.

²¹Петр тэрэ шабиинь хараад, Иисусаа: – Дээдын Эзэн аа, энэмнай яахань гээшэб? – гэжэ һураба.

²²– һөөргөө бусажа ерэтэрни энэ шабиингаа амиды байхые хүсөөшье һаамни, шамда ямар хэрэг байнаб? Ши минии хойноһоо дахаад яба! – гэжэ Иисус хэлэбэ.

²³Тиимэл ушарһаа тэрэ шабинь үхэхэгүй гэхэн һураг бэшэнүүдэинь дунда тараба. Теэд үхэхэгүй гэжэ Иисус хэлээгүй, харин: «һөөргөө бусажа ерэтэрни энэ шабиингаа амиды байхые минии хүсөөшье һаамни, шамда ямар хэрэг байнаб?» – гэжэ хэлээ һэн.

²⁴Тэрэл шабинь энээн тухай хөөрэхэн, эдэ бүгэдые бэшэхэн байна. Тэрэ шабиинь энэ гэршэ баримта үнэн зүб юм гэжэ бидэ мэдэнэбди.

²⁵Иисус үшөөшье олон хэрэгүүдые бүтээхэн байна. Хэрбээ эдэ бүгэдыень тодорхойгоор бэшээ һаа, тиимэ олон номууд бүхы дэлхэйдэшье багтахагүй һэн гэжэ һананаб.

Элшэнэрэй бүтээхэн хэрэгүүд

Элшэнэрэй бүтээхэн хэрэгүүд 1

¹⁻²Хүндэтэ Феофил! Иисусай хэрэгүүдээ бүтээжэ эхилхэн сагһаа тэнгэри өөдэ дэгдэхэ саг хүрэтэрөө юу хэжэ, юундэ хүнүүдые хургажа байһан тухайнь би түрүүшынгээ ном соо бэшээ һэнби. Тэнгэри өөдэ дэгдэхынгээ урда тээ Иисус Нангин һүлдын хүсөөр шэлэжэ абһан элшэнэртээ захяа үгэһэн юм.

³Хэрээһэндэ хадагдажа зоболон эдлэһэнэйнгээ удаа дүшэн хоногой туршада тэрэ өөрынгөө амиды байһые баталан, элшэнэртээ оло дахин ерэдэг бэлэй. Элшэнэрын тэрэниие харадаг, тиихэдэ Иисус тэдэндээ Бурханай хаан орон тухай хөөрэдэг байгаа.

⁴Нэгэтэ элшэнэрээрээ хамта байхадаа, Иисус тэдэнэртээ: – Иерусалимдаа байгты. Минии түрүүн хэлэһэнээр таанадта Эсэгымни үгэхэб гэжэ найдуулһан юумые хүлеэжэ байгты.

⁵Иоанн уһаар арюудхадаг байгаа, харин таанад Нангин һүлдөөр мэнэ гэһээр арюудхадаг болохот, – гэжэ захяа һэн.

Иисусай дэгдэһэн тухай

⁶Элшэнэр суглараад байхадаа, Иисуста хандан: – Дээдын Эзэн, ши тиихэдээ Израилиин хаан ороние сүлөөлжэ, захирха эрхыень бусаахашни гү? – гэбэ.

⁷– Таанарта Эсэгийн эрхэ мэдэлээр тогтоогдоһон саг болзорой ерэхые мэдэхэ хэрэггүй.

⁸Гэбэшье Нангин һүлдын танай дээрэ буухада, таанад хүсэтэй боложо, Иерусалимай, бүхы Иудейн болон Самариин нютагуудһаа эхилээд, газарай заха хизаар хүрэтэр минии гэршэнүүд болохот, – гэжэ тэрэнь харюусаба.

⁹Эдэ үгэнүүдээ хэлэһээр Иисус элшэнэрэйнгээ хаража байтар тэнгэри өөдэ дэгдэжэ захалба, тииһээр үүлэндэ халхалуулба.

¹⁰Тэрэнэй дэгдэхые хаража, тэнгэри өөдэ шэртэжэ байһан элшэнэрэй хажууда сагаан хубсаһатай хоёр хүн гэнтэ бии болобо.

¹¹– Галилейнхид! Юугээ тэнгэри өөдэ шэртэн зогсоо хүмта? Тэнгэри өөдэ таанаднаа үргэгдэжэ абтаһан Иисус танай хараһаар байтар тэнгэридэ дэгдэхэндээл тон адляар бусажа ерэхэ, – гэжэ тэдэ хоёр хэлэбэ.

Матвийе һунгаһан тухай

¹²Тиигээд тэдэ элшэнэр хотоһоо нэгэ модоной газарта оршодог Элеон хадаһаа буужа, Иерусалимдаа бусаба.

¹³Гэртээ ерэжэ, өөһэдынгөө байрладаг дээдэ дабхарай таһалгада тэдэ ошобод. Тэдэ элшэнэрэй нэрэнүүдынь Пётр, Иоанн, Яков, Андрей, Филипп, Фома, Варфоломей, Матвей, Алфейн хүбүүн Яков, Симон Зелот, Яковай хүбүүн Иуда болоно.

¹⁴Тэдэнэр Иисусай эхэ Мариятай, тэрэнэй аха дүүнэртэй болон бусад эхэнэрнүүдтэй хамта сугларжа, һанал сэдхэлээрээ нэгэдэн, ходо зальбардаг байгаа.

¹⁵Хэдэн хоногой удаа зуун хорёод хүзэглэгшэдэй суглараад байхада Пётр өөдөө бодожо хэлэбэ:

¹⁶– Аха дүүнэрни, аа! Иудын хуби заяан тухай Нангин һүлдн Давидаар уридшалан хэлүүлһэн Нангин Бэшэгэй мүннүүд үнэн дээрээ бэлхэ ёһотой байгаа. Иисусые бэдэрһэн зондо Иуда байһан газарыень заажа үгөө.

¹⁷Иуда бидэнтэй хамта Бурханда алба хэхээр һунгагдаһан хадаа бидэнэй нэгэн байһан юм.

¹⁸(Тэрэ хүн өөрынгөө хара хэрэгээр олоһон мүнгөөрөө газар худалдажа абаа. Тиигээд тэндээ толгойгоо сохин унажа, ехээр гэмтээ: гүзээниинь хахаржа, бүхы гэдэхэ доторынь гарашаба.



¹⁹Энээн тухай бүхы Иерусалимай хүн зон дуулажа, тэрэ газарые өөрынгөө хэлэн дээрэ «Акелдама» гэжэ нэрлээ һэн, тэрэнь «Шуһата газар» гэхэн удхатай үгэ байгаа.)

²⁰Энээн тухай «Бурханай дуунуудай ном» соо: «Тэрэнэй гэр байра хоһорхонь болтогой, тэндэ хэншые байрлахагүйнь болтогой», – гэжэ бэшэгдэнхэй. Үшөө ондоо газарта: «Тэрэнэй орондо ондоо хүн алба хэхэнь болтогой», – гэжэ бэшээтэй байдаг.

²¹⁻²²Тиимэхээ Иудые ондоо хүн хэлгэхэ ёһотой. Тэрэ хүн Иоаннай уһаар арюудхаханаа эхилээд, Иисусай тэнгэри өөдэ дэгдэхэн саг хүрэтэр үргэлжэ маанадтай хамта Дээдын Эзэн Иисусые дахажа ябаһан хүнүүдэй нэгэн, тэрэнэй амидыралгын гэршэнэрэй нэгэн байха ёһотой.

²³Юст гэжэ ара нэрэтэй Иосиф (тэрэниие баһа Баршабба гэжэ нэрлэдэг һэн) ба Матвий хоёрые һунгаха гэхэн дурадхал оробо.

²⁴⁻²⁵– Дээдын Эзэн, аа! Ши хүнүүдэй һанал бодолые мэдэнэш. Тиимэхээ байха ёһотой газартаа ошохо гэжэ алба хэхээ болиһон Иудын орондо алба хэжэ, элшэн болохыень эдэ хоёрой хэниие шэлэжэ абаһанаа бидэндэ харуулыш, – гэжэ суглараашад зальбарба.

²⁶Жээрэб татахадань, Матвийда тудaa. Тиин Матвий арбан нэгэн элшэнэрээр хамтаран, арбан хоёрдохи элшэн болобо.

Элшэнэрэй бүтээһэн хэрэгүүд 2

Нангин хүлдэн бууһан тухай

¹Тэдэнэр булта нэгэ газарта Табидахи үдэрэй һайндэртэ сугларба.

²Гэнтэ шанга һалхин бууһандал мэтэ ехэ шууяан тэнгэриһээ дуулдаад, элшэнэрэй байһан гэрые тэрэ шууяан дүүргэбэ.

³Элшэнэр галай дүлэн мэтэ юумэнэй сасаржа байхые хараһан байна. Тэдэ дүлэнүүд хубааралдан, хүн бүхэнэйн дээрэ тогтошобо.

⁴Тиин тэдэнэр булта Нангин хүлдөөр дүүрэн, хүлдэн хүсөөр элдэб хэлэнүүд дээрэ дуугаралдаба.

⁵Тэрэ үедэ Иерусалим хотодо дэлхэйн элдэб орон нютагуудһаа Бурханда шүтэдэг еврейнүүд ерээд байгаа.

⁶Тэдэ булта шууяа дуулаад, олоороо сугларжа, нютагайнгаа хэлэн дээрэ тэдэнэй дуугархые дуулахадаа сошолдобод.

⁷– Энэ дуугаржа байһан хүнүүд булта Галилейнхид бэшэ аал? – гэжэ тэдэ гайхан ханан байжа бэе бэеһээ һурабад, –

⁸Тиихэдээ манай түрэл нютагуудай аялга дээрэ дуугаржа байхыень бидэ яагаад дуулана гээшэбибди? Бидэнэй дунда

⁹Парфиин, Мидиин, Эламай, Месопотамиин, Иудейн, Каппадокиин, Понтын, Асиин,

¹⁰Фригиин, Памфилиин, Египедэй болон Киреней хотын хажуудахи Ливиин оршон тойронхи нютагуудһаа, Римһээ уг гарбалтай

¹¹еврейнүүд болон бусад арадай дундаһаа еврейнүүдэй шажанда оруулагдаһан зон, кридүүд болон арабууд бии. Тиигээд Бурханай агууехэ хэрэгүүд тухай нютагаймнай хэлэнүүд дээрэ тэдэ хүнүүдэй дуугаржа байхые дууланабди!

¹²Гайхалаа баран: – Энэ юун болоно гээшэб? – гэжэ ором дүрэмыень оложо ядаһан тэдэнэр бэе бэеһээ һуража байбад.

¹³Харин нүгөөдүүлһынь тэдэниие наада барин: – Ай, эдэ һогтоо байна! – гэлдэбэ.

¹⁴Тиигээд Пётр нүгөө арбан нэгэн элшэнэртэйгээ хамта бодожо, сугларааша зондо хандан, шангаар айладхаба: – Иудейнүүд, аа! Иерусалимынхид, аа! Хэлэһыемни шагнагты даа.

¹⁵Эдэ хүнүүдые һогтуу гэжэ дэмы һананат. Мүнөө үглөөнэй юһэн лэ саг боложо байна.

¹⁶Эндэ боложо байһан бүхы юумэн тухай Иоиль лүндэншэн уридшалан иигэжэ хэлээ һэн:

¹⁷«Иимэл юумэн һүүлшын үдэрнүүдтэ болохо гэжэ Бурхан хэлэнэ: Һүлдөөрөө хүн бүхэниие нэбтэрүүлхэб, Хүбүүд, басагадтнай лүндэн буулгажа эхилхэ, Залуушуултнай үзэгдэл үзэжэ захалха, Үбгэд хүгшэдтнай зүүдэ зүүдэлхэ.

¹⁸Өөрынгөө зарасанарые, эрэшүүлые, эхэнэрнүүдые Тэрэ үдэр би Һүлдөөрөө нэбтэрүүлхэб, Тиин тэдэ лүндэн буулгаха.

¹⁹Дээдэхи огторгойдо юрэ бусын үзэгдэлнүүдые, Доодохи газар түбидэ гайхамшагта тэмдэгүүдые: Шуһа, гал дүлэ, бөөн хара утаа үзүүлхэб.

²⁰Дээдын Эзэнэй агууехэ алдарта үдэрэй ерэхын урда тээ наран балартаха, һара шуһан улаан болохо.

²¹Дээдын Эзэнэй нэрэ дурдаһан хүн бүхэн абарагдаха».

²²Израилиин зон, намайе шагнагты! Бурхан Назаредэй Иисусаар агууехэ хэрэгүүдые, гайхамшагта үзэгдэлнүүдые ба тэмдэгүүдые бүтээлгэн, тэрэниие эльгээһэн тухайгаа таанадта гэршэлһэн байна. Эдэ бүхэн танай дунда ушараа. Тиимэһээ таанад өөһэдөө энээн тухай мэдэнэт.

²³Бурханай үни баталһан түсэбэй ёһоор танай гарта үгтэһэн Иисусые таанад хуули эбдэгшэдэй гараар хэрээһэндэ хадажа алаат.

²⁴Гэбэшье Бурхан тэрэниие үхэлэй зоболонһоо аршалан амидыруулаа, юундэб гэхэдэ, үхэл тэрэниие һабартаа барижа шадахагүй байгаа бшуу.

²⁵Давид тэрээн тухай иигэжэ хэлэнэ: «Би Дээдын Эзэниие үргэлжэ урдаа харагша һэнби: Минии айжа һүрдэхэгүйн тула Тэрэ баруун таладамни байдаг.

²⁶⁻²⁷Тиимэһээ зүрхэ сэдхэлни баяраар халья, Хэлэ амамини дорюун болоо, Махабад бэемни хүсэл найдалаар дүүрээд байна, Юундэб гэхэдэ, ши хүнэһэ һүлдыемни үхэлэй орондо орхихогүйш, Өөрынгөө шударгы Зарасые агы нүхэндэ гутаажа үмхирүүлхэгүйш.

²⁸Ажамидарха зам ши намда харуулааш, Өөрынгөө хажууда байлгажа, Ши баяр баясхаланда намайгаа хүртөөхэш».

²⁹Аха дүүнэрни! Таанадта сэхэ хэлэхүүб: манай үбгэ эсэгэ Давид наһа бараад хүдөөлүүлэнхэй, тэрэнэй хүдөөлүүлһэн агы нүхэн мүнөө болотор хэбээрээ байдаг.

³⁰Давидай хаан шэрээдэ үри һадаһыень һуулгахаб гэжэ Бурханай үгһэн тангаригые Давид лүндэншэ байһан дээрэхээ мэдэжэ байгаа.

³¹Тиимэхээ Бурханай юу хэхые мэдэжэ байгаад, Бурханай табисууртын амидырха тухай тэрэ иигэжэ хэлээ: Бурхан хүнэхэ һүлдыень үхэлэй орондо орхёогүй, Тэрэнэй махабад бэе агы нүхэндэ гутажа үмхирөөгүй.

³²Бурхан Иисусые амидыруулаа, тиин бидэ булта энэ ушарай гэршэнэр болонобди.

³³Иисус Эсэгынгээ баруун талада дэгдүүлэн, найдуулһан Нангин һүлдэдэнь хүртэбэ, тиигээд тэрэ һүлдөөрөө бидэниие нэбтэрүүлээ. Мүнөө таанад энээниие харанат, дууланат.

³⁴⁻³⁵Давид өөрөө тэнгэри өөдэ дэгдээгүйшые һаа, иигэжэ дуулгаа: «Хүлэйшни ула доро дайсадыешни оруултарни Минии баруун талада һуу гэжэ Дээдын Эзэн минии Эзэндэ хэлээ».

³⁶Тиимэ ушарһаа таанадай саазалһан Иисусые Бурхан өөрөө Дээдын Эзэн болон Бурханай табисуурта болгожо табяа. Израилиин бүхы зон, энээниие хадуужа абагты.

³⁷Иимэ юумэ дуулаһан хүнүүд зүрхээе доһолгон: – Аха дүүнэр аа, бидэ яаха болоо гээшэбибди? – гэжэ Пётроо, мүн бусадшые элшэнэрхээ һураба.

³⁸– Нүгэл хэхээе болигты. Нүгэлыетнай Бурханай хүлисэхын тула хүн бүхэнтнай Иисус Христосой нэрэ алдараар уһаар арюудхуулаг. Тиихэдээ таанад Бурханай үршөөһэн Нангин һүлдэдэ хүртэхэт.

³⁹Таниие, танай хүүгэдые болон Дээдын Эзэнэй, манай Бурханай өөртөө уряалһан, холууршые байһан хүн бүхэниие, Бурхан найдуулһан байгаа, – гэжэ Пётр тэдээндэ харюусаба.

⁴⁰Мүн ондоошые олон үгэнүүдээр Пётр тэдэниие һэргылэн идхаба: – Энэ забхай ябадалтан дээрэ бууха Бурханай хэһээлтэһээ яажа бээ абархаяа бодогты.

⁴¹Пётрой үгэдэ этигэһэн хүнүүд уһан арюудхалгада хүртэжэ, гурбан мянга тухай хүнөөр хүзэглэгшэдэй тоо нэмэгдэбэ.

⁴²Тэдэ зон элшэнэрэй һургаал шагнадаг, бэе бээтэйгээ һайнаар харилсадаг, хамта хоол баридаг, зальбардаг бэлэй.

Һүзэглэгшэдэй амидарал

⁴³Элшэнэр олон гайхамшагта хэрэгүүдые болон дүлгэ тэмдэгүүдые харуулжа байгаа. Тиимэһээ хүн бүхэн ехэтэ һүрдэжэ байгаа.

⁴⁴Һүзэглэгшэд байһан юумээрээ хоорондоо хубаалдадаг, бэе бээдээ һайнаар хандадаг һэн.

⁴⁵Тэдэнэр зөөри зөөшээ худалдажа, хүн бүхэндэ хэрэглэхэ зэргээрнь юумэ хубаажа үгэдэг болоо.

⁴⁶Тэдэнэр үдэр бүри һанал нэгэдэн Бурхан һүмэдэ сугларжа, гэр бүхэндэ хамта хоол баридаг, баяр баясхалангаар дүүрэн, сэдхэл һанаа тэнюун эдээ хоолоо барижа,

⁴⁷Бурханаа алдаршуулан, бүхы арад зондо һайшаагдажа байгаа. Тиин Дээдын Эзэн абарагдаһан зоной тоо үдэрһөө үдэртэ олошоруулжа байгаа.

Элшэнэрэй бүтээһэн хэрэгүүд 3

Дохолон хүниие эдэгээбэ

¹Нэгэтэ үдын гурбан сагта мүргэлэй болохоёо байхада Пётр Иоанн хоёр Бурхан һүмэ руу ошожо ябаа.



²Бурхан хүмын «Үзэсхэлэнтэ» гэгдэдэг хаалгын хажууда түрэхэһөөн дохолон хүниие үдэр бүри асаржа нуулгадаг байгаа. Тэрэ хүн Бурхан хүмэ руу ерэхэн зонһоо юумэ гуйраншалдаг һэн.

³Хүмэ руу орохоёо байһан Пётр Иоанн хоёрые хараһаар тэрэ дохолон хүн тэдээнһээ баһа юумэ гуйба.

⁴Үнөөхи хоёрын тэрэниие шэртэжэ: – Наашаа хара! – гэжэ тэрэндэ Пётр хэлэбэ.

⁵Үнөөхи гуйраншань юумэ үгэхэнь гэжэ горидон, тэдээн тээшэ хараба.

⁶Харин Пётр тэрэндэ: – Алта мүнгэн намда үгы, гэбэшье намда байгаа юумээ би шамда үгэхэб. Бодоод яба гэжэ Назаредэй Иисус Христосой нэрэ алдараар захирнаб! – гээд хэлэбэ.

⁷Пётр тэрэниие баруун гарһаань баряад, өөдөө бодоходонь туһалба. Тиэхэдэ үнөөхи дохолон хүнэй хүлдэ хүсэ шадал орожо, тэрэ хүл дээрээ нуга харайн бодоод, ябажа эхилбэ.

⁸Тиигээд тэрэ дэбхэрэн собхорон байжа, Бурханиие алдаршуулан, Бурхан хүмэ руу Пётр Иоанн хоёртой хамта ябаад оробо.

⁹Тэрэ хүнэй хүлөөрөө ябажа, Бурханиие алдаршуулжа байхые бүхы зон хараа бэлэй.

¹⁰Бурхан хүмын «Үзэсхэлэнтэ» хаалгын хажууда нуудаг гуйранша энэ мүн байна гэжэ танихадаа, тэрээнтэй юунэй ушарһые ойлгоходоо, тэдэ зон ехэ гайхажа байба.

Пётр Бурхан хүмэ соо үгэ хэлэнэ

¹¹Тэрэ хүнэй Пётр Иоанн хоёрһоо һалан һандангүй ябахада, ехээр гайхалдаһан зон Соломоной бахананууд гэгдэдэг газарта гүйлдэжэ ерээд, тэдэнэрые тойрошобо.

¹²Пётр тэдэниие обёороод хэлэбэ: – Израильшууд! Энээниие хараад яатараа гайхабат? Өөһэдынгөө хүсэ шадалаар, хүзэгөөрөө энэ хүниие



бидэнэй ябадаг болгоһон мэтэ таанад юундэ бидэниие иитэрээ шэртэнэбта?

¹³Абраһам, Исаак, Яковай Бурхан, манай үбгэ эсэгэнэрэй Бурхан өөрынгөө зараса Иисусые алдаршуулаа. Таанад Иисуста урбаһан байнат, тэрэниие Пиладай сүлөөлэн табиха гэхэдэнь, таанад арсаһан байнат.

¹⁴Бурханай хүнһөө, үнэн сэдхэлтэнһээ арсажа, харин алууршые табиит гэжэ таанад гуйһан байгаат.

¹⁵Таанадай Амидарал бүтээгшые алабашье, Бурхан тэрэниие амидыруулаа юм. Бидэ тэдэ үйлэ хэрэгүүдэй гэршэнэр гэшэбди.

¹⁶Таанадай һайн мэдэхэ, таниха дохолон хүниие Иисусай нэрэ алдарай хүсэн эдэгээгээ. Иимэ гайхалтай юумэн Иисусай нэрэ алдарты этигэһэнһээ болобо. Энэ хүн Иисуста этигэжэ, таанадай хараһаар байтар аргалагдаба.

¹⁷Гэбэшье, аха дүүнэрни, таанадай, танай захирагшадай үйлэдэһэн юумые мэдэхэгүй байһан дээрэһээл тэрэ буруу ябадал хээт гэжэ би мэдэнэб.

¹⁸Бурханай табисуурта зоболон эдлэхэ гэжэ Бурханай лүндэншэдэй үнинэй уридшалан хэлэһэниинь бүтэбэ даа.

¹⁹Нүгэл шэбэлээ Бурханаар хүлисүүлхэ гэбэл, таанад нүгэл хэхээ болижо, Бурханда хандагты.

²⁰Тиигээ һаа, Дээдын Эзэн таанадта Нангин һулдын хүсэ шадал олгохо. Дээдын Эзэн таанадта заяагдаһан Бурханай табисуурта – Иисусые эльгээхэ.

²¹Гэгээн лүндэншэдөөрөө үни гэхэдэ дамжуулан найдүүлһан ёһоороо Бурханай бүхы юумые шэнэлүүлтэр Христос тэнгэридэ оршожо байха ёһотой.

²²«Намайе эльгээһэндэл адляар Дээдын Эзэн Бурхантнай өөһэдынтнай дундаһаа таанадта Лүндэншые эльгээхэ. Таанад тэрэнэй хэлэһэн үгэ бүхэниие дуулаха ёһотойт.

²³Тэрэ Лүндэншын үгэ дуулаагүй хүн арад зонһоо тусгаарлагдан хүнөөгдэхэ», – гэжэ Моисей хэлээ һэн.

²⁴Самуил, мүн тэрэнэй удаадахи олон лүндэншэд энэ үдэрнүүд тухай уридшалан айладхаһан юм.

²⁵Таанад лүндэншэдэй үри хадаһад мүн гээшэт, тиин танай үбгэ эсэгэнэрэй Бурхантай баталһан хэлсээндэ таанад баһа хабаатай болонот. «Шинии үри хадаһаар дамжан бүхы дэлхэйн арад зон үршөөл хайрада хүртэхэ», – гэжэ Бурхан Абраһамда хэлэһэн байна.

²⁶Хүн бүхэниетнай муу муухай хэрэгүүдһээ зайсуулжа, үршөөл хайрадаа хүртөөхын тула Бурхан зарасаяа амидыруулаад, тэрэнээ анха түрүүн таанадта эльгээгээ юм.

Элшэнэрэй бүтээһэн хэрэгүүд 4

Пётр Иоанн хоёр Зүблэлэй гэшүүдэй урда

¹Пётр Иоанн хоёрой иигэжэ хүн зонтой хөөрэлдэжэ байтар, тэдээндэ санаартан, Бурхан хүмын харуулай дарга, үшөө саддукейнэр хүрэжэ ерэбэд.

²Тэдэ элшэнэрэй хүн зониие һургажа, Иисусай жэшээ дээрэ үхэһэн хүнүүдэй амидырха тухай айладхажа байхада, ехэ дураа гутаба.

³Орой болошоод байһан хадань, тэдэ Пётр Иоанн хоёрые баряад, үглөө болотор түрмэдэ хаагаа.

⁴Тиигээшые һаань, элшэнэрые шагнаһан хүнүүдэй олониинь тэдээндэ этигэжэ, хүзэглэгшэдэй тоо ниитэдээ табан мянга шахуу хүн болобо.

⁵Хойто үдэрынь иудейнүүдэй захирагшад, ахамадууд болон Хуули заадаг багшанар Иерусалимда сугларба.



⁶Тэндэ ахамад санаарта Анна, Кайафа, Иоанн, Александр мүн олон тоото түрүү санаартанай түрэлхид байлсаба.

⁷Тэдэнэр Пётр Иоанн хоёрые урдаа байлгажа: – Ямар хүсэ шадалаар, хэнэй нэрэ алдараар энэ хэрэг үйлэдэбэт? – гэжэ һураба.

⁸Тиихэдэнь Пётр Нангин һүлдөөр дүүрээд, тэдээндэ иигэжэ хэлэбэ: – Захирагшад, ахаматууд, аа!

⁹Үбшэн хүндэ һайн юумэ хэнэнэймнай түлөө, тэрэниие яжа аргалһан тухаймнай мүнөөдэр эндэ мүшхэбэ гүт?

¹⁰Назаредэй Иисус Христосой нэрэ алдараар энэ хүн мүнөө элүүр мэндэ болоод, урдатнай зогсожо байна гэжэ таанад булта, бүхы Израилиин хүн зон мэдэжэ байгты. Таанар Иисус Христосые хэрээһэндэ хадаһан байгаат, харин Бурхан тэрэниие амидыруулаа һэн.

¹¹Тэрэ болбол – «таанадай, барилгашадай голоһон шулууниинь аад, байрын түшэг тулгууринь болоо».

¹²Ондоо нэгэшье хүн таниие абархагүй, бидэниие абаржа шадаха ондоо хүниие энэ дэлхэйдэ Бурхан үгөөгүй юм.

¹³Зоригтой дорюун Пётр Иоанн хоёрые эрдэм номгүй юрын хүнүүд байна гэжэ ойлгоходоо, Зүблэлэй гэшүүд түрүүн ехээр гайхалсажа, һүүлээрнь Иисустай ябаһан хүнүүд байна гэжэ ажаглан тэмдэглэбэд.

¹⁴Тэрэ хоёрой хажууда аргалһан хүниинь хараад, тэдэнэр хэлэхэ юумэеэ олобогүй.

¹⁵Зүблэлэй гэшүүд элшэнэрые эндэхээ гарагты гэжэ захиран, хоорондоо зүблөө зарлаба.

¹⁶– Эдэ хүнүүдые бидэ яаха гээшэбибди? Иимэ гайхамшагта хэрэг эдэнэр бүтээгөө гэжэ бүхы Иерусалимай хүн зон ойлгоо, тиимэхээ бидэ бүтээһэн хэрэгыень буруушаажа яашье шадахагүйбди.

¹⁷Гэбэшье арад зоной дунда энэ бүхэн саашадаа тарахагүйн тула, Иисус тухай хүнүүдтэ дахин юумэ бү хэлэгты гэжэ тэдээндэ захирая, – гэлдэбэ.

¹⁸Тэдэнэр Пётр Иоанн хоёрые дахин дуудаж асараад, Иисусай нэрэ алдараар юумэ бү хэлэгты, нургаал бү номногты гэжэ элшэнэртэ захирба.

¹⁹Гэбэшье Пётр Иоанн хоёр: – Таанадай үгэ Бурханай үгэһөө үлүү найнаар дуулажа байгаа наа, бидэ Бурханай урда зүб юумэ хэхэ гүбди? Өөһэдөө бодоод үзэгты даа.

²⁰Бидэ хараһан дуулаһан юумэн тухайгаа хөөрэнгүй байжа шадахагүйбди, – гэжэ харюусаба.

²¹Занаһан заһанайнгаа удаа зүблөө зарлагшад элшэнэрые табиба. Болоһон үйлэ хэрэгэй түлөө бүхы зоной Бурхание алдаршуулжа байхадань, элшэнэрые хэхээжэ шадахагүй байһанаа Зүблэлэй гэшүүд ойлгоо.

²²Гайхамшаг аргаар эдэгэһэн тэрэ хүн дүшэ гаран наһатай болоод байгаа бшуу.

Һүзэглэгшэдэй зальбарһан тухай

²³Сүлөөдэ гараад, Пётр Иоанн хоёр өөһэдынхидтөө ерэжэ, түрүү санаартанай болон ахамадуудай хэлэһые хөөрөжэ үгэбэд.

²⁴Хэлэһыень дуулахадаа, тэдэ булта шангаар Бурханда хандан зальбарба: «Дээдэ огторгой, газар дэлхэй, уһан далай мүн досоонь оршодог хамаг юумые Бүтээгшэ, Дээдын Эзэмнай,

²⁵Ши, Нангин Һүлдын ашаар, зарасаараа, манай үбгэ эсэгэ Давидаар дамжуулан хэлээш: Яагаад бусад арадууд үһөөрхөөб, Яагаад хүн зон дэмы юумэ һанаашалааб?

²⁶Газарай хаашуул, засаглагшад хоорондоо үгэсэлдэн хэлсэжэ, Дээдын Эзэнэй болон Бурханай табисууртын урдаһаа эсэргүүсэн бодобо.



²⁷Нээрээшье Ирод ба Понтий Пилат хоёр Израилиин арад зонтой болон бусад арадуудтай энэ хотодо үгэсэлдэн, шинии табисуурта, нангин Зарасын урдаһаа эбээ нэгэдхэбэ.

²⁸Шинии эрхэ засагаар, шинии хүсэлөөр урдань шиидэгдэһэн юумые тэдэнэр бээлүүлхээе хамтарба.

²⁹Дээдын Эзэн, эдэнэй заналта дуулаад, Үгыешни айлтагүйгөөр номнохо арга мүнөө зарасанартаа олгыш даа.

³⁰Шинии нангин зараса Иисусай нэрэ алдараар хүнүүдые аршалан эдэгээжэ, гайхамшаг хэрэгүүдые болон тэмдэгүүдые үзүүлхымнай тула хүр хүсөө харуулыш даа».

³¹Иигэжэ зальбарһанайнь һүүлдэ сугларһан байрадань газар хүдэлжэ, тэдэнэр булта Нангин һүлдөөр дүүрээд, Бурханай Үгэ айлтагүйгөөр номножо оробо.

Һүзэглэгшэд зөөрээрөө хубаалсана

³²Һүзэглэгшэд булта нэгэ һанал бодолтой байгаа. Тэдэнэй хэнииньшье хубита зөөри зөөшээе минии гэдэггүй һэн, харин байһан бүхы юумээе бэе бээтэйгээ хубаалсажа байдаг һэн.

³³Дээдын Эзэн Иисусай амидырһан тухай элшэнэрын улам эршэтэйгээр гэршэлжэ байба, тиин Бурхан тэдэниие үршөөл хайрадаа элбэг дэлбэгээр хүртөөжэ байба.

³⁴⁻³⁵Тэдэнэй дунда юумээр дуталдаһан хүнүүд үгы һэн. Гэр байратай, газартай зон зөөри зөөшээе худалдажа, ороһон олзоёо элшэнэртэ асаржа үгэдэг һэн. Тиин элшэнэр тэрэ мүнгыень юумээр дуталдаһан хүнүүдтэ хубаажа үгэдэг бэлэй.

³⁶Жэшээлхэдэ, элшэнэрэй дунда Варнава гэһэн алдартай («һанаа амаруулагша» гэжэ оршуулагдана), Кипрһээ уг гарбалтай Иосиф гэдэг левит хүн,

³⁷өөрынгөө таряалан газарые худалдаад, мүнгыень элшэнэртэ асаржа үгөө һэн.

Элшэнэрэй бүтээхэн хэрэгүүд 5

Анания Сапфира хоёр

- ¹Анания гэжэ нэрэтэй нэгэ хүн Сапфира хамгатаяа хоюулан таряалан газараа худалдаад,
- ²хоорондоо зүбшэжэ, олзынгоо нэгэ хубиень өөртөө орхёод, үлэһыень элшэнэртэ асаржа үгэбэ.
- ³Пётр: – Анания, таряалан газараа худалдаад, олоһон олзынгоо хубиёе юундэ нюужа, Нангин һүлдэдэ худалаар хэлээбши? – гэбэ. – Иихэдэе яатараа Сатана шинии зүрхые эзэлээ юм?
- ⁴Худалдахыншни урда тээ тэрэ таряалан газар шинии байгаа бэшэ гү? Тэрэ газараа худалдаһанайшые һүүлдэ мүнгэниинь баһа шинии мэдэлдэ байгаа бэшэ гү? Тиигэһэн хойно яагаад иимэ юумэ хэхэ гэһэн бодол өөрынгөө сэдхэлдэ түрүүлбэш? Ши хүнүүдтэ худал юумэ хэлээ бэшэ, харин Бурханда худал юумэ хэлээ гээшэш.
- ⁵Эдэ үгэнүүдые дуулахадаа Анания амья табин унаба. Болоһон ушар тухай дуулаһан хүнүүд бултадаа аргагүй ехээр айн хүрдэбэ.
- ⁶Һүзэглэгшэдэй залуушуул ерэжэ, тэрэ үхэхэн хүниёе бүдөөр орёогоод, газашань гаргажа хүдөөлүүлбэ.
- ⁷Юунэйшыё болоһыё мэдээгүй тэрэ хүнэй хамганиинь гурбан шахуу сагай үнгэрһэн хойно орожо ерээ.
- ⁸Тиин Пётр тэрээнһээ: – Хэлыш даа, таанад таряалан газараа тэды мүнгөөр худалдаа гүт? – гэжэ һураба. – Тиимэ, тэды мүнгөөр, – гэжэ тэрэ эхэнэр харюусаба.
- ⁹– Дээдын Эзэнэй һүлдыё та хоёр яагаад туршаха гэбэт? Нүхэрыешни хүдөөлүүлһэн хүнүүд үүдэндэ дүтэлнэ, тэдэ шамайешыё абажа гаргаха, – гэжэ Пётр тэрэ эхэнэртэ хэлэбэ.



¹⁰Тэрэ эхэнэрын удангүй хүлдэнь унажа, амья табиба. Газааһаа ороһон залуу хүзэглэгшэд тэрэнэй наһа бараһые хараад, гэрһээ гаргаад, нүхэрэйн хажууда хүдөөлүүлбэ.

¹¹Хүзэглэгшэдэй бүлгэмэйхин бултадаа, мүн энээн тухай дуулаһан бүхы хүнүүд аргагүй ехээр айн хүрдэбэ.

Гайхамшагта үзэгдэлнүүд ба дүлгэ тэмдэгүүд

¹²Элшэнэрэй гараар хүн зоной дунда олон гайхамшагта үзэгдэлнүүд болон дүлгэ тэмдэгүүд бүтээгдэдэг байгаа. Хүзэглэгшэд булта Соломоной бахананууд гэгдэг хушалтатай газарта һаналаа нэгэдүүлэн суглардаг һэн.

¹³Бусад зон тэдэнээр нэгэдэхээ зүрхэлдэггүй байбашье, хүзэглэгшэдые ехэтэ хүндэлдэг һэн.

¹⁴Бүри олон эхэнэрнүүд, эрэшүүл Дээдын Эзэндэ этигэжэ, хүзэглэгшэдэй тоо олошоржол байба ха.

¹⁵Үнгэржэ ябаһан Пётрой һүүдэрэйншье үбшэн хүн дээрэ тудахынь тула үбшэнтэниие дэбисхэртэйнъе газашань гаргажа табидаг байгаа.

¹⁶Иерусалимай оршон тойронхи хотонуудһаа хүн зон олоороо үбшэн хүнүүдые, ада шүдхэртэ барюулһан зониие хүтэлжэ асардаг бэлэй. Тиин тэдэнь булта аргалуулан эдэгэшэдэг байгаа.

Элшэнэрэй зоболон

¹⁷Тиихэдэнь ахамад санаарта, мүн тэрээндэ хамаатай саддукей бүлэгэй хүнүүд хоро шараяа бусалаад,

¹⁸элшэнэрые барижа, хотын түрмэдэ хааба.

¹⁹Гэбэшье Дээдын Эзэнэй Эльгээмэл хүнндөө түрмын үүдэ нээжэ, элшэнэрые гаргаа бэлэй. Тиихэдээ тэрэ Эльгээмэл:

²⁰– Ябагты, Бурхан хүмэ соо орожо, шэнэ Амидарал тухай бултыень хүн зондо хөөрөжэ үгэгты, – гэжэ хэлэбэ.

²¹Элшэнэр тэрэнэй үгэ дуулажа, эртэ үглөөгүүр хүмэ соо ороод, хүн зоние хурган номнобо. Ахамад санаарта өөрынгөө хүнүүдтэй ерээд, Зүблэлэй гэшүүдые болон Израилин зоной бүхы ахамадуудые суглуулаад, элшэнэрые түрмэхөө абаад ерэхыень хүнүүдые эльгээбэ ха.

²²Теэд албатан түрмэдэ ороод, хэниешье олобогүй. Бусажа ерээд, тэдэ:

²³– Бидэнэй ошоходо түрмын үүдэн бүхөөр шэбхэгдээтэй, хаалгын хажууда харуул табигданхай байгаа. Гэбэшье хаалга нээжэ ороходомнай досоонь хэншье үгы байгаа, – гэжэ мэдүүлбэ.

²⁴Эдэ үгэнүүдые дуулаһан Бурхан хүмын харуулай дарга болон түрүү санаартад юун болоһые ойлгожо ядан, гайхалдан гэлылдэбэд.

²⁵Тэрэ үедэ хэншьеб орожо: – Шагныт ээ, таанадай түрмэдэ хааһан хүнүүд мүнөө Бурхан хүмэ дотор хүн зоние хурган номножо байна, – гэбэ.

²⁶Тиихэдэнь Бурхан хүмын харуулай дарга албатанаараа суг ошожо, арад зондо шулуудуулхаһаа айжа байгаад, хүсэ шадал хэрэглэнгүйгөөр элшэнэрые абажа ерэбэ.

²⁷Тэдэ элшэнэрые Зүблэлэй гэшүүдэй урда асаржа байлгаба. Ахамад санаарта тэдэнһээ:

²⁸– Иисусай нэрэ алдараар хурган номнохыетнай бидэ хорёо бэшэ хэн гүбди? Харин таанад өөһэдынгөө хургаалые бүхы Иерусалимаар номноод, үшөө Иисусай адхарһан шуһые манһаа нэхэхэ ханаатай байна гүт? – гэжэ һураба.

²⁹– Бидэ анха түрүүн хүнүүдэй бэшэ, харин Бурханай үгэ дуулаха ёһотойбди!

³⁰Таанадай модон хэрээһэндэ хадажа саазалһан Иисусые манай үбгэ эсэгэнэрэй Бурхан амидыруулаа юм.



³¹Израилиин хүн зоной нүгэл хэхээ болижо, нүгэлөө хүлисүүлхын тула Бурхан тэрэниие өөрынгөө баруун талада Ударидагша болон Абарагша болгон нуулгаа.

³²Бидэнэр өөһэдөөшье, Нангин хүлдэшье эдэ бүхэнэй гэршэнэрбди. Бурхан үгыень дууладаг хүн бүхэндэ Нангин хүлдые үгэдэг юм, – гэжэ Пётр болон бусад элшэнэр харюусаба.

³³Зүблэлэй гэшүүд хэлэһыень дуулахадаа хиирэн гааража, элшэнэрые алаха гэбэ.

³⁴Тиихэдэ хүн зоной дунда ехэ хүндэтэй Хуули заадаг багша, Гамалиил гэжэ нэрэтэй фарисей хүн, Зүблэлэй гэшүүдэй урда зогсобо. Тэрэ элшэнэрые ойро зуура гаргахыень захирба,

³⁵тиигээд Зүблэлэй гэшүүдтэ хандаба: – Израильшууд! Эдэ хүнүүдтэй юу хэхэ байһанаа түрүүн хайн бодожо үзэгты.

³⁶Һаяар Февда гэжэ нэрэтэй нэгэ хүн тодороод, өөрыгөө агууехэ хүнби гэжэ нэрлэхэдэнь, тэрэниие дүрбэн зуугаад хүн дахаа бэлэй. Гэбэшье тэрэнэй алуулхада, дахалдагшадынь булта зугадан таража, юуншье үлөөгүй һэн.

³⁷Һүүлдэнь, хүн зоной тоо бүридхэжэ байха үедэ, Галилейн Иуда бии боложо, өөрынгөө хойноһоо нилээд олон хүниие дахуулаа бэлэй. Тэрэнэй алуулхада, дахалдагшадынь булта таража хосороо һэн.

³⁸Тиимэһээ мүнөө би эдэ уладые орхигты гэжэ хэлэхэ байнаб! Эдэниие табигты! Хэрбээ тэдэнэй зорилго, үйлэ хэрэгынь хүнһөө эхитэй юм болбол, тэрэнь хосорон халаха.

³⁹Хэрбээ энэ зорилго, үйлэ хэрэгынь Бурханһаа байбал, таанад эдэ хүнүүдые зогсоожо шадахагүйт, харин Бурханай урдаһаа эсэргүүсэн тэмсэгшэд болохот! Зүблэлэй гэшүүд тэрэнэй үгые дуулаба.

⁴⁰Тиигээд элшэнэрые дуудажа оруулаад, ташуурдаад, Иисусай нэрэ алдараар номнохыень хорёод табиба.



⁴¹Иисусай нэрэ алдарай түлөө иигэжэ доромжолуулан зобохонь зохистой гэжэ тоолоһон элшэнэр баяртайгаар Зүблэлэй суглаанһаа гаража ошобод.

⁴²Үдэр бүхэн Бурхан хүмэдэ гү, али айлуудаар ябажа тэдэнэр Иисус Христос тухай һайн Мэдээсэлые номнодог байгаа.

Элшэнэрэй бүтээһэн хэрэгүүд 6

Долоон туһалагшад

¹Шабинарай тоо олошорон нэмэгдэхэ тэрэ үдэрнүүдтэ грек хэлэтэй еврейнүүд нютагайнгаа еврейнүүдтэ гэмэрэлдэбэ, юундэб гэхэдэ, үдэр бүхэн хубаагадаг эдэе хоол тэдэнэй бэлбэһэн эхэнэрнүүдтэ хүртэдэггүй байгаа.

²Тиихэдэ арбан хоёр элшэнэр бүхы шабинараа суглуулжа хэлэбэ: – Бурханай үгэ номнохоёо мартажа, эдэе хоолой, алта мүнгэнэй асуудалнуудые шиидхэжэ байбалнай зохихогүй юм.

³Аха дүүнэр, Нангин хүлдөөр дүүрэхэн, сэсэн ухаатай долоон эрэшүүлые өөһэдынгөө дундаһаа шэлэжэ абагты. Тиихэдэтнай бидэ энэ хэрэгые тэдэндэ даалгахабди,

⁴харин өөһэдөө Бурханай үгэ номножо, зальбаран амидаржа байхабди.

⁵Энэ дурадхалые бүхы хүзэглэгшэд дэмжэжэ, этигэлтэй, Нангин хүлдөөр дүүрэхэн Стефан, Филипп, Прохор, Никанор, Тимон, Пармение, ондоо яһатануудай дундаһаа хүзэглэхэн Антиохой Николае шэлэжэ абабад.

⁶Тиигээд тэдэниие элшэнэрэй урда байлгахадань, элшэнэр зальбаржа, тэдэниие гараараа адислаба.

⁷Бурханай үгэ хаа хаанагүй дэлгэрэн таража, Иерусалимда шабинарай тоо ехэ олошоржо байгаа. Тиихэдэ санаартанай дундаһаашье олон хүн этигэжэ байгаа бэлэй.

Стефание бариба



⁸Бурханай үршөөл, хүсэ шадалда хүртэһэн Стефан арад зоной дунда гайхамшагта үзэгдэлнүүдые, дүлгэ тэмдэгүүдые бүтээжэ байгаа.

⁹«Сүлөөлэгшэд» гэгдэдэг мүргэлэй гэрэй Киреней, Александрийһаа уг гарбалтай хүнүүд, баһа Килики, Асиһаа уг гарбалтай хүнүүд Стефантай арсалдажа оробод.

¹⁰Гэбэшье Нангин һүлдын болон сэсэн ухаанай хүсөөр Стефанай хэлэжэ байһан юумые буруушааха тэдэ аргагүй байгаа.

¹¹«Моисейе, Бурхание доромжолһон үгэнүүдые Стефанай хэлэжэ байхые дуулаа һэмди», – гэжэ хэлэхыень хэдэн хүнүүдые тэдэ доохонуур тухирба.

¹²Тиигэжэ тэдэ ахамадууд, Хуули заадаг багшанар олон хүнүүдые тэрээндэ эсэргүү һанаатай болгобо. һүүлдэ тэдэ Стефанда довтолжо, тэрэниие баряад, Зүблэлэй гэшүүдтэ асарба.

¹³Тиигээд худал хуурмаг гэршэнэрые гаргажа: – Энэ хүн манай гэгээн һүмэ, Хуулиие үргэлжэ муудхажа байдаг.

¹⁴Назаредэй Иисус манай һүмэ һандаргажа, Моисейн бидэндэ дамжуулжа үгэһэн бүхы ёһо гурим хубилгаха гэжэ байхыень бидэ өөһэдөө дуулаа һэмди, – гэжэ хэлүүлбэ.

¹⁵Зүблэлэй гэшүүдэй анхаралтайгаар Стефаниие шэртэхэдэнь, тэрэнэй шарай Бурханай Эльгээмэлэй шарайдал адляар үзэгдэбэ.

Элшэнэрэй бүтээһэн хэрэгүүд 7

Стефанай Зүблэлэй гэшүүдтэ хэлэһэн үгэ

1– Энэ үнэхөөрөө тиимэ гү? – гэжэ ахамад санаарта Стефанһаа һураба.

2– Аха дүүнэрни, үбгэ эсэгэнэрни, намайе шагнагты! Манай үбгэн эсэгэ Абраһамай Харан хото нүүхын урда тээ, Месопотамида байхадань, алдарта Бурхан тэрээндэ ерэжэ,



³«Энэ орон нютагаа, түрэлхидөө орхижо, минии зааһан газар нютаг ошо» гэжэ хэлээ һэн.

⁴Тиихэдэнь тэрэ Халдейн орон нютагһаа гаража, Харанда нютагжаа. Эсэгынь наһа бараһан хойно Бурхан тэрэниие таанадай мүнөө ажаһуудаг газар дайда руу нүүлгэһэн байна.

⁵Гэбэшье тэрэ газар нютаг, тэрэ газар нютагай алхамшье газар эзэмдэжэ байхаарнь Бурхан Абраһамда үгөөгүй юм. Гэхэтэй сасуу тэрэ газар үгэхэб, удаань тэрэнэй, үри хадаһадайнь мэдэлдэ тэрэ газар орохо гэжэ Бурхан найддуулһан байгаа. Абраһамай үхибүүдгүй байха үедэ Бурхан тэрэниие тиигэжэ найддуулһан байна.

⁶«Шинии үри хадаһад хариин газарта нүүхэ, тэдэниие барлагууд болгоод, дүрбэн зуугаад жэлэй туршада дарлажа байха.

⁷Гэбэшье тэдэниие дарлажа байһан яһатаниие би хэһээхэб», – гэжэ Бурхан хэлээ юм. «һүүлдэ тэрэ газарһаа гараад, энэ газарта ерээд, намда мүргэжэ байха», – гэжэ Бурхан баһа хэлээ юм.

⁸Абраһамтай хэлсэһэнэй баталан, Бурхан бэлгээ отолуулха заншал тогтообо. Абраһам Исаак хүбүүтэй болоходоо, наймадахи үдэртэнь тэрэнэйнгээ бэлгэ отолуулаа, Исаак Яковай бэлгэ отолуулаа, тиин Яков манай арбан хоёр үбгэ эсэгэнэрые отолуулһан байна.

⁹Үбгэ эсэгэнэрнай Иосифто атаархажа, тэрэниие барлаг болгон Египедтэ худалдаһан байгаа. Гэбэшье Бурхан тэрэниие орхёогүй,

¹⁰ямаршье гай аюулһаа абардаг байгаа. Тиигээд тэрэндэ сэсэн ухаа үршөөжэ, Египедэй хаанда һайшаалгаа. Тиимэһээ хаан Иосифые Египедэй болон бүхы хаанай ордоной эрхилэгшээр табяа һэн.

¹¹Тэрэ үедэ Египет, Ханаан оронуудта ехэ гай зоболон асарһан үлэн хоһон байдал тохёолдобо. Манай үбгэ эсэгэнэртэшье эдихэ юумэ олдыхоёо болёод байгаа.

¹²Египедтэ талха таряа байна гэжэ дуулахадаа, Яков манай үбгэ эсэгэнэрые тиишэнь түрүүшынхиеэ эльгээгээ һэн.

¹³Хоёрдохиёо ерэхэдэнь, Иосиф аха дүүнэртээ өөр тухайгаа сэхыень хэлээ, фараоншые тэрэнэй гэр бүлэ тухай мэдээ.

¹⁴Тиигээд Иосиф Яков эсэгээ, далан табан хүнһөө бүридэһэн гэр бүлээ уриһан захяа эльгээбэ.

¹⁵Урилга абаһан Яков Египет руу нүүгээ һэн. Тэндэ тэрэ өөрөөшые, манай үбгэ эсэгэнэршые наһа бараһан байна.

¹⁶Тэдэнэй шарилые Абраһамай мүнгөөр Емморой хүбүүдһээ Сихемдэ худалдажа абаһан агы нүхэн соо хүдөөлүүлээ бэлэй.

¹⁷Бурханай Абраһамда найдуулһан үгын хүсэлдэхэ сагай ойртожо байхада, манай яһатан Египедтэ тэнжэжэ, хүн зонойнь тоо олошоржо байгаа.

¹⁸Тиимэ байдал Иосифые мэдэхэгүй ондоо хаанай Египедэй хаан шэрээдэ һуутар үргэлжэлжэ байгаа.

¹⁹Тэрэ хаан манай арад зониие мэхэлдэг, шэрүүнээр дарладаг, үбгэ эсэгэнэрыемнай нарай үхибүүдээ гэрһээн гаргажа хаяхыень бааладаг һэн, тиин хаягдаһан үхибүүд үхэжэ хосордог һэн.

²⁰Тэрэ үедэ сэбэр гоё Моисей хүбүүн түрөө һэн. Гурбан һара хүрэтэрнь тэрэниие эсэгынь гэртэ тэнжүүлээ.

²¹Моисейе гэрһээн гаргажа орхиходонь, тэрэниие фараоной басаган үргэжэ абаад, өөрынгөө хүбүүндэл хүмүүжүүлээ.

²²Моисей Египедэй эрдэм ухааниие бүгэдыень шудалжа, уран һайханаар үгэ хэлэдэг, шадамар бэрхэ ажалша хүн болоо һэн.

²³Моисей дүшэ хүрөөд байхадаа, аха дүүнэрээ, Израилиин хүбүүдые харахаяа һанаба.

²⁴Нэгэтэ египет хүнэй еврей хүниие доромжолон сохижо байхые хараад, тэрэ оролсожо, египет хүниие хэһээн алаба.

²⁵Бурхан тэрэнэй гараар еврейнүүдтэ абарал үгэнэ гэжэ аха дүүнэрынь ойлгохо бээ гээд Моисей найдаһан байгаа. Зүгөөр тэдэнь ойлгобогүй.

²⁶Хойто үдэрынь хоёр еврейнүүдэй өөһэд хоорондоо хэрэлдэжэ байхые тэрэ хараад, тэдэниие эбтэй болгохо ханаатайгаар: «Үгы, шагныт, таанад аха дүүнэр ха юмта! Юундэ бэе бээдээ муугаар хандана гээшэбта?», – гэбэ.

²⁷Гэбэшье нэгэ шуһанайнгаа хүниие сохижо байһан нүгөөдэн хэрүүлхэн, Моисеие түлхээд: «Хэн шамайе манай дээрэ ноён болгоо юм, зарга шиидхэгшээр табяа юм?

²⁸Үсэгэлдэр египет хүниие алаһандаал адли намайе алахаяа ханаа гүш?» – гэжэ хэлэбэ.

²⁹Моисей хэлэһыень дуулахадаа орон нютагһаа зугадажа, Мидидэ нютагжаба. Тэндээ хоёр хүбүүтэй болоо һэн.

³⁰Дүшэн жэлэй үнгэрһэн хойно Синай хадын хаяада оршодог губида шатажа байһан үүргэнын гал соо Бурханай Эльгээмэл Моисейдэ ерэбэ.

³¹Иимэ юумэ хараад, Моисей ехээр гайхан, лаб харахаяа тэрээндэ дүтэлхэдэнь, Дээдын Эзэнэй абяан дуулдаба:

³²«Би шинии үбгэ эсэгэнэрэй, Абраһамай, Исаагай, Яковай Бурханби». Моисей айн шэшэржэ, тэрээн тээшэ харахаяашье зүрхэлбэгүй.

³³Дээдын Эзэн тэрээндэ: «Шинии зогсожо байһан газар арюун нангин газар гээшэ. Тиимэһээ ши гуталаа тайла.

³⁴Арад зонойнгоо Египедтэ ехээр тулижа зобожо байхые би харааб, тэдэнэй гэнэн ёолохые дуулааб, тиимэһээ тэдэниие аршалан сүлөөлхын тула газар дэлхэйдэ буужа ерээб. Мүнөө ши яба, би шамайе Египет эльгээнэб», – гэжэ хэлэбэ.

³⁵«Хэн шамайе манай дээрэ ноён болгоо юм, зарга шиидхэгшээр табяа юм?» гэжэ еврейнүүдтэ буруушаалгаһан эгээл тэрэ Моисеие Бурхан ударидагшаар болон абарагшаар томилон эльгээгээ юм. Шатажа

байхан үүргэнын галда бии болоһон Бурханай Эльгээмэлэй гараар Бурхан тиимэ юумэ хээ.

³⁶Египедэй газар нютагаар, Улаан далайн шадар, мүн сүл губьяар дүшэн жэлэй туршада ябахадаа, тэрэ гайхамшагта хэрэгүүдые бүтээн, юрэ бусын дүлгэ тэмдэгүүдые харуулан, хүн зоние Египедһээ гаргаа бэлэй.

³⁷Эгээл тэрэ Моисей израильшуудта: «Бурхан намайе эльгээһэндээл адляар таанадай аха дүүнэрэй дундаһаа таанадта Лүндэншые шэлэн эльгээхэ», – гэжэ хэлээ бэлэй.

³⁸Эгээл тэрэ Моисей израилиин арад зонтой сүл губида хамта байжа, өөртэйн болон манай үбгэ эсэгэнэртэй Синай хада дээрэ хөөрэлдэһэн Бурханай Эльгээмэлтэй уулзажа, амиды үгэнүүдые хүлээн абаад, бидэндэ дамжуулан үгөө бэлэй.

³⁹Гэбэшье манай үбгэ эсэгэнэр тэрэнэй үгэ дуулаха дурагүй байгаа. Тэдэнэр Моисейе буруушаажа, Египет руугаа бусахые хүсэжэ байгаа.

⁴⁰«Бидэниие дахуулжа ябаха бурхадые бүтээжэ үгыш даа. Бидэниие Египедһээ гаргаһан Моисейтэй юунэй тохёолдоһые бидэ мэдэнэгүйбди», – гэжэ тэдэнэр Аарондо хэлэбэд.

⁴¹Тиигээд тэдэнэр бухын дүрсэтэй онгон хээд, тэрээндээ үргэл үргэжэ, гараараа бүтээһэн юумээ хүндэлэн, найр зугаа найрлаба.

⁴²Тиихэдэнь Бурхан тэдэниие буруу хаража, лүндэншэдэй номууд соо бэшэгдэһэн ёһоор огторгойн одо мүшэдтэ мүргэхэдэнь һаалта хээгүй: «Израилиин арад зон! Дүшэн жэлэй туршада сүл губида байхадаа, Таанад амитадые гаргаад, намда үргэл тахижа байгаа гүт?

⁴³Молохой Майханиие болон Рефан-одон бурханиие Бээдээ абажа ябаа бэшэ гүт? Тэдэтнай таанадай мүргэжэ байһан онгонууд бэшэ гү? Тиимэһээ би таанадые Вавилонһоо сааша сүлэн ябуулхаб».



⁴⁴Сүл губида ябаһан манай үбгэ эсэгэнэр Гэршэлгын майхантай байгаа. Тэрэ майханиие Бурханай хэ гэхэдэ, Моисей харуулһан маягаарнь хэһэн байна.

⁴⁵Навинай Иисусай хүтэлбэри доро манай үбгэ эсэгэнэр энэ майханиие Бурханай намнажа гаргаһан ондоо үндэһэ яһатанай газар дайдада асараа бэлэй. Энэ майхан Давид хаанай үдэрнүүд хүрэтэр тэрэл газартаа байгаа.

⁴⁶Бурхан Давидта дуратай һэн. Давид Яковай Бурханда мүргэлэй гэр бариха зүбшөөл Бурханһаа һураба.

⁴⁷Гэбэшье тэрэ Бурханай гэр Соломон баряа юм.

⁴⁸Теэд хүнүүдэй бариһан гэртэ Дээдын Бурхан ажаһуудаггүй. Лүндэншэ энээн тухай иигэжэ хэлэнэ:

⁴⁹«Огторгой тэнгэри – минии хаан шэрээ, Газар дайда – хүлэймни гэшхэхэ түшэг тулгуури мүн, Ямар гэр таанад намда барихабта, Минии амарха газар хаана байнаб гэжэ Дээдын Эзэн һураба.

⁵⁰Эдэ бүгэдые би өөрөө бүтээгээ бэшэ гүб?»

⁵¹Бурханай һургаал дуулаха дурагүй, мэдэлдэнь байдаггүй зүрюу зон! Таанад өөһэдынгөө үбгэ эсэгэнэртэл адли Нангин һүлдэдэ ходо эсэргүүсэнэт.

⁵²Танай үбгэ эсэгэнэртнай лүндэншэдэй хэниие хашан мүрдөөгүйб? Үнэн сэдхэлтэнэй ерэхэ тухай урда айладхаһан хүнүүдые тэдэ алаа, харин таанад мүнөө тэрэ Үнэн сэдхэлтэндэ урбажа, тэрэниие алабат.

⁵³Бурханай Эльгээмэлнүүдээр дамжуулан таанадта үгтэһэн Хуули абаһан аад, тэрэнииеень сахибагүйт.

Стефаниие шулуудана

⁵⁴Эдэ бүхэниие дуулахадаа Зүблэлэй гэшүүд хоро шараяа бусалжа, шүдөө хабиралдан байбад.



⁵⁵Харин Нангин хүлдөөр дүүрэн Стефан огторгой өөдэ шэртэхэдээ, Бурханай алдар, Бурханай баруун талада Иисусай байхыень хараба.

⁵⁶– Харагты! Огторгой нээгдэбэ. Бурханай баруун талада Хүн түрэлхитэнэй Хүбүүнэй зогсожо байхые би мүнөө харанаб! – гэжэ Стефан хэлэбэ.

⁵⁷Оог хашхараа табин, шэхээ бүтүүлжэ, тэдэ булта Стефанда добтолбо,

⁵⁸тэрэниие хотоһоо гаргаад, шулуудаба. Гэршэнэр өөһэдынгөө субые тайлаад, Саул гэжэ нэрэтэй хүбүүнэй хүлдэнь орхибо.

⁵⁹Стефаниие шулуугаар шэдэжэ байхадань: – Дээдын Эзэн Иисус, хүлдыемни абыш даа! – гэжэ тэрэ гуйба.

⁶⁰Тэрэ үбдэг дээрээ нэхэрэн нуугаад: – Дээдын Эзэн, эдэнэй энэ нүгэлыень хүлисыш даа, – гэжэ шангаар хашхарба. Иигэжэ хэлээд, Стефан наһа бараа.

Элшэнэрэй бүтээһэн хэрэгүүд 8

¹Стефаниие алаһан хэрэг Саулда ехэ найшаагдаба.

Саул хүзэглэгшэдэй бүлгэмые хашан мүрдэнэ

Энэ үдэрһөө хойшо Иерусалимда хүзэглэгшэдые ехэтэ хашан мүрдэжэ захалба. Тиимэһээ элшэнэр лэ хотодо үлөөд, бусад хүзэглэгшэд булта Иудейн ба Самариин нютагуудаар тараба.

²Бурханда хүзэглэдэг зарим зон Стефаниие хүдөөлүүлхэдээ шаналан уйлажа байба.

³Харин Саул хүзэглэгшэдэй бүлгэмые хандаргажа, гэрһээ гэртэ сүмэрэн орожо, эрэшүүл, эхэнэрнүүдые шэрэн гаргажа, түрмэ шорондо хаадаг байгаа.

Филипп Самариин нютагта номноно

⁴Тэрэедэһэн хүнүүд бүхы ороноор таража, хайн Мэдээсэл номножо байба.

- ⁵Филипп Самариин нэгэ хото ороод, тэндэ Бурханай табисуурта тухай номнобо.
- ⁶Суглархан олон зон Филиппэй хэлэһэн үгэнүүдые анхаралтайгаар шагнажа, бүтээһэн гайхамшагта үйлэ хэрэгүүдые нь хаража байба.
- ⁷Олон ада шүдхэрнүүдын оог хашхараа табин гаража, олон саа үбшэнтэн болон дохолон хүнүүд эдэгэһэн байна.
- ⁸Тиимэхээ тэрэ хотодо ехэ баяр тудaa.
- ⁹Тэрэ хотодо эльбэ шэдиес харуулжа, бүхы самариин хүн зоние гайхуулдаг Симон гэжэ нэрэтэй хүн ажаһуугаа. Тэрэ өөрыгөө агууехэб гэдэг,
- ¹⁰тиин зон ехэ багагүй тэрэниие анхаран, «энэмнай Агууехэ гэгдэдэг Бурханай хүсэн», – гэжэ хөөрэлдэгшэ һэн.
- ¹¹Симон олон жэлэй туршада эльбэ шэдеэрээ зоние тон ехээр гайхуулжа байһан тула тэрэниие хүнүүд анхаралтайгаар шагнадаг һэн.
- ¹²Гэбэшье тэдэ хүнүүд Бурханай хаан орон болон Иисус Христосой нэрэ алдар тухай айладхаһан Филипптэ этигээд, эхэнэрнүүдтэйгээ, эрэшүүлтэйгээ булта уһаар арюудхуулһан байна.
- ¹³Симоншье өөрөө этигээд, уһаар арюудхуулһан байгаа. Филиппэй хойноһоо тэрэ хаа хаанагүй дахажа, тэрэнэй бүтээжэ байһан гайхамшагта үйлэ хэрэгүүдые нь, дүлгэ тэмдэгүүдые нь харахадаа ехэтэ гайхадаг һэн.
- ¹⁴Самариин хүн зон Бурханай үгэ угтан абаа гэжэ Иерусалимда байһан элшэнэр дуулахадаа, Пётр Иоанн хоёрые тэдээндэ эльгээбэ.
- ¹⁵Тэдэ хоёр Самари хүрэжэ ерээд, Нангин һүлдэ эдэ зондо үгтэһэй гэжэ тэдэнэй түлөө зальбарба.
- ¹⁶Юуб гэхэдэ, тэдэнэй хэндэшье үшөө Нангин һүлдэ үгтөөгүй, тэдэ зон Дээдын Эзэн Иисусай нэрэ алдараар миин лэ уһаар арюудхуулһан байгаа.



¹⁷Пётр Иоанн хоёрой тэдэниие гараараа адислахадань, тэдэнь Нангин хүлдые тогтоон абаба.

¹⁸Элшэнэрэй гараараа хүрэхэдэнь, Нангин хүлдын үгтэжэ байхые Симон харахадаа, элшэнэртэ мүнгэ асаржа:

¹⁹– Минии гараараа хүрэхэн хүн бүхэн Нангин хүлдые тогтоон абажа байхын тула намда баһа иимэ хүсэ шэди олгожо хайрлыт даа, – гэжэ гуйба.

²⁰– Ши мүнгатэйгөө суг хосоро! Бурханай үршөөһэн бэлэгые мүнгөөр худалдаад абахаяа һанаа гүш? – гэбэ Пётр. –

²¹Манай хэрэгтэ ши хубишье, эрхэшье үгыш, юундэб гэхэдэ, шинии зүрхэ сэдхэлшни Бурханай урда сэбэр бэшэ бшуу.

²²Иимэ нүгэл хэхээе болижо, энэ һанал бодолыешни хүлисэхыень Дээдын Эзэниие гуй.

²³Атаа жүтөөндэ, нүгэл шэбэлдэ баригданхай байхыешни би харанаб.

²⁴Тиихэдэ Симон: – Хэлэхэн бүхы юумэншни намтай ушархагүйн тула ши минии түлөө Дээдын Эзэндэ зальбарыш даа, – гэжэ Пётрые гуйба.

²⁵Һургаал номнолоо гэршэлэлгэнүүдээрээ баталан, Дээдын Эзэнэй үгые айладхан, элшэнэр Иерусалимаа бусаба. Замдаа тэдэ Самариин олохон тосхон нютагуудаар ябажа, хүн зондо һайн Мэдээсэл дуулгаба.

Филипп болон эфиоп түшэмэл

²⁶Бурханай Эльгээмэл Филипптэ: – Бодоод, урагшаа яба. Иерусалимһаа Гааза ошоһон эзэгүй харгы дээрэ гара, – гэбэ.

²⁷Филипп түхээрээд гараба. Энэ үедэ эфиопой кандагай (али хатанай) түшэмэл, хатанай бүхы баялиг зөөриие сахигша, ордондо албалагша эфиоп хүнтэй тэрэ ушарба. Энэ хүн Иерусалимда мүргэл хээд,

²⁸мүнөө ута тэргэ дээрээ һуугаад, лүндэншэ Исайягай бэшэһые уншан, гэртээ бусажа ябаа.

²⁹Нангин хүлдэ Филипптэ: – Тэргэдэ дүтэлөөд, хажуудань яба, – гэжэ хэлэбэ.

³⁰Тиигээд Филипп тэргэ тээшэ гүйжэ ошоод, тэндэ һууһан хүнэй лүндэншэ Исайягай ном уншажа байхыень дуулаба. – Уншажа байһан юумээ ши ойлгоно гүш? – гэжэ Филипп тэрээнһээ һураба.

³¹– Нэгэшье хүнэй намда тайлбарилжа үгэнгүй байхада, би хаанаһаа ойлгохобиб? – гэжэ тэрэнь харюусаба. Тиигээд Филиппы тэргэ дээрэ гаража, зэргэлээд һуухыень тэрэ эфиоп уриба.

³²Тэрэнэй уншажа байһан номой хэхэг иимэ: «Гаргахаяа хүтэлжэ ябаһан хониндол тэрэниие дахуулжа ябаа, Хайшалжа байһан хүнэй урда дуугүй хурьган шэнги тэрэ абяагүй байгаа.

³³Зүб зарга сүүд хэхэ эрхэ олгонгүй Тэрэниие доромжолбо. Теэд тэрэнэй үри ашанар тухай хэн хэлэхэ юм? Газар дэлхэй дээрэ тэрэнэй ами наһан таһалуулагдаһан байна ха юм».

³⁴– Хэлыш даа намда, энэ хэн тухай лүндэншэ хэлэнэ гээшэб, өөр тухайгаа гү, али ондоо хүн тухай гү? – гэжэ түшэмэл Филиппһээ һураба.

³⁵Филипп Нангин Бэшэгэй энэ хэхэгы түүрүүн тайлбарилаад, һүүлдэнь Иисус тухай һайн Мэдээсэл бултыень тэрээндэ дуулгаба.

³⁶Замаа үргэлжэлүүлһээр тэдэнэр уһатай газарта хүрэхэ ерэбэд. – Энэ уһан байнал. Уһаар арюудхуулхадамни намда юун һаалта болоноб? – гэбэ түшэмэл.

³⁷– Хэрбээ үнэн зүрхэнһөө этигэбэлшни, уһаар арюудхажа болохо, – гэжэ Филипп хэлэбэ. – Бурханай Хүбүүн Христос бии юм гэжэ этигэнэб, – гээд нүгөөдын харюусаба.

³⁸Түшэмэл тэндэ зогсоод, Филипптэй хоюулан уһанда оробо, тиигээд Филипп тэрэниие уһаар арюудхаба.

³⁹Тэдэ хоёрой уһанһаа гарахадань, Дээдын Эзэнэй һүлдэ түшэмэл дээрэ тогтобо, харин Филиппые Бурханай Эльгээмэл дээшэнь дэгдээбэ. Түшэмэл тэрэниие ондоо хараагүй, гэбэшье ехэ баяртай юумэн замаа саашань үргэлжэлүүлбэ.

⁴⁰Харин Филипп Азотдо бии боложо, оршон тойронхи нютагуудаар ябажа, һайн Мэдээсэл бүхы хотонуудаар номнон, Кесари хүрэжэ ерэбэ.

Элшэнэрэй бүтээһэн хэрэгүүд 9

Дээдын Эзэн Саулда хандаба

¹Саул урдынхидаал адляар Дээдын Эзэнэй шабинарые алахаб гэжэ занһаар байба. Тэрэ ахамад санаартада ерэжэ,

²Дамаскын мүргэлэй гэрнүүдтэ бэшэг бэшэжэ үгэхыень гуйба. Тэрэ бэшэгэй ёһоор Дээдын Эзэнэй зам баримталагша, эхэнэрнүүд, эрэшүүлые барижа, Иерусалим туужа абаашаха эрхэ Саулда үгтэжэ байгаа.

³Дамаскда дүтэлжэ ябахадань, гэнтэ Саулые тэнгэриһээ туяа гэрэлтүүлбэ.

⁴Газарта унаад, тэрэ: – Саул, Саул, юундэ ши намайе хашан мүрдэнэбши? – гэхэн абяа дуулаба.

⁵– Эзэмни, ши хэн гээшэбши? – гэжэ Саул һураба. – Шамда хашуулан мүрдүүлэгшэ Иисус гээшэлби даа, – гэжэ Дээдын Эзэн харюусаба. – Мүнөө бодоод, хото ошо, тэндэ юу хэхэ тухайшни шамда хэлэгдэхэ.

⁶– Дээдын Эзэн аа, иигэхэдээ би яаха болонобиб? – гэжэ ехээр айн һүрдэһэн Саул хэлэбэ. – Мүнөө бодоод хото ошо, юу хэхэ тухайшни тэндэ шамда хэлэгдэхэ, – гэжэ Дээдын Эзэн харюусаба.

⁷Саулай замайнь нүхэд абяа аниргүй болоод зогсобо, тэдэнэр абяа дуулаһаншье һаа, хэниешье харабагүй.

⁸Саулай бодожо нюдөө нээхэдэнь, нюдэниинь юумэ харахаяа болишоод байба. Тэрэниие гарһаань хүтэлөөд, Дамаск хото асарба.



⁹Тэрэ гурбан хоногой туршада юушье харангуй, юумэ эдингүй, уунгүй байба.

¹⁰Дамаск хотодо Анания гэжэ нэрэтэй шаби байгаа. Дээдын Эзэн тэрээндэ үзэгдэжэ: – Анания! – гээд дуудаба. – Би энэ байнаб, Дээдын Эзэн! – гээд Анания харюусаба.

¹¹– Бодоод, Сэхэ гэжэ гудамжа бэдэржэ ошо. Тэндэ Иудын гэртэ Саул гэжэ нэрэтэй Тарс хотын хүниие бэдэржэ олоорой. Мүнөө тэрэ зальбаржа байна,

¹²Анания гэжэ нэрэтэй хүн гэртэнь ороод, тэрэниие хараатай болгохын тула гараа дээрэнь табиба гэнэн үзэгдэл хараба, – гээд Дээдын Эзэн тэрээндэ хэлэбэ.

¹³– Дээдын Эзэн, аа! Шамда хүзэглэдэг Иерусалимынхидта энэ хүн хэды ехэ хоро хүргөөб гэжэ би мэдэнэб. Энэ хүн тухай би олон хүнүүдхээ дуулаа хэнби.

¹⁴Мүнөөшье тэрэ шинии нэрэ алдарта хүзэглэгшэдые барижа хааха эрхэ түрүү санаартадһаа абаад иишэ ерээ, – гэжэ Анания харюусаба.

¹⁵Гэбэшье Дээдын Эзэн Ананияда: – Ошо! Би тэрэниие намда алба хүүлэхэ гэжэ шэлэжэ абааб. Тэрэ минии нэрэ алдар тухай бүхы арадуудта, хаашуулда, Израилиин хүн зондо дуулгаха.

¹⁶Минии түлөө аргагүй ехэ зоболон эдлэхыень би өөрөө тэрээндэ харуулхаб, – гэжэ хэлэбэ.

¹⁷Анания тэрэ гэртэ ороод, Саулай дээрэ гараа табин хэлэбэ: – Саул дүүмни, харгыда ябахадшани шамда үзэгдэнэн Дээдын Эзэн Иисус шамайе дахин хараатай болгожо, Нангин хүлдөөр дүүргэхын тула намайе иишэнь эльгээгээ.

¹⁸Тэрэ дороо Саулай нюдэнһөө ямар нэгэн хашарһандал мэтэ юумэн унажа, тэрэ дахин хараатай болобо. Тиигээд уһаар арюудхуулаад,

¹⁹эдеэлээд, тэнхээ тамир оробо.

Саул Дамаскда номноно



Саул шабинартай хамта хэдэн үдэр Дамаскда байхадаа

²⁰Иисус болбол Бурханай Хүбүүн гэжэ мүргэлэй гэрнүүдтэ номножо захалба.

²¹Тэрэниие шагнаһан зон булта ехээр гайхалдан: – Үгы, энэ хүмнай Иисусай нэрэ алдарта хүзэглэгшэ зоние гайтайгаар хашан мүрдэдэг бэшэ һэн гү? Тэдэниие баряад, түрүү санаартадта туужа абаашахаяа иишээ ерээ бэшэ һэн гү? – гэжэ хоорондоо хэлсэбэд.

²²Гэбэшье Иисус гээшэмнай Бурханай табисуурта гэжэ Саул улам эршэтэйгээр баталан гэршэлжэ, Дамаскда ажаһуудаг еврейнүүдые мухардуулдаг һэн.

²³Хэдэн үдэрэй үнгэрһэн хойно еврейнүүд тэрэниие алаха гэжэ шиидэбэ,

²⁴харин Саул тэдэнэй нюуса хэлсээн тухай мэдэбэ. Тэрэниие алаха гэхэн еврейнүүд үдэр хүнигүй хотын үүдэнэй хажууда тэрэниие гэтэн хахижа байгаа.

²⁵Харин шабинар хүниндөө Саулые түрсүүг соо һуулгаад, ханада хэгдэһэн нүхөөр газашань буулгаа бэлэй.

Саул Иерусалим ерэбэ

²⁶Иерусалим ерээд, Саул шабинартай ниилэхээ һанаа, харин тэдэнь Саул үнэн дээрээ шаби байна гэжэ этигэжэ ядан, тэрээнһээ айжа байгаа.

²⁷Гэбэшье тэрэниие Варнава дэмжэжэ, элшэнэртэ асараад, Саулай харгыдаа Дээдын Эзэниие хараһан, Дээдын Эзэнэй тэрээнтэй хөөрэлдэһэн, тиихэдэ ямар зоригтойгоор Саул Дамаск хотодо Иисусай нэрэ алдарые номноһон тухайнь хөөрөжэ үгэбэ.

²⁸Тиигэжэ Саул шабинартай хамтараад, Иерусалимаар ябажа, Дээдын Эзэн тухай айлтаггүйгөөр номнодог болобо.

²⁹Нэгэтэ тэрэ грек хэлэтэй еврейнүүдтэй хөөрэлдэхэдөө үгөө ойлголсобогүй. Тиимэһээ тэдэнь Саулые алаха гэжэ шиидэбэ.



³⁰Энээн тухай мэдэһэн шабинар тэрэниие Кесари абаашаад, тэндэһээ Тарс ябуулба.

³¹Тэрэ үедэ бүхы Иудейн, Галилейн, Самариин нютагуудай хүзэглэгшэдэй бүлгэмүүдтэ энхэ тайбан мандажа, Нангин хүлдын аша хүсөөр тэдэ бэхижэжэ, олошоржо, Дээдын Эзэнэй урда хүгэдэжэ байгаа.

Пётр Лидда болон Иоппи хотонуудта

³²Пётр бүхы хото нютагуудаар ябаад, Лиддада ажаһуудаг Бурханай хүнүүдтэ хүрэжэ ерэбэ.

³³Тэндэ саа үбшэн хүрөөд, найман жэлэй туршада хэбтэриин болоод байһан Эней гэжэ хүнтэй Пётр уулзаба.

³⁴– Эней, шамайе Иисус Христос аргална. Өөдөө бодоод, дэбдихэрээ хумижархи, – гэжэ Пётр тэрэ хүндэ хэлэбэ. Үбшэн хүниинь тэрэ дороо бодобо.

³⁵Энэ бүхэниие хараһан Лидда ба Шарон хотонуудай зон Дээдын Эзэндэ этигэбэ ха.

³⁶Иоппи хотодо Тавита гэжэ нэрэтэй нэгэ шаби басаган ажаһуугаа. (Тавита гээшэнь «газель» гэхэн удхатай, буряадаар «зээрэн»). Тэрэ басаган хүнүүдтэ һайе хэдэг, ядарһан дуталдаһан зондо туһалдаг байгаа.

³⁷Тэдэ үдэрнүүдтэ Тавита үбдэжэ, наһа бараа. Тэрэнэй бэеые угаажа, дээдэ дабхарай таһалгада табиба.

³⁸Тэрэ үедэ Пётр элшэн Лиддада ерээд байгаа. Лидда хотын Иоппиһоо холо бэшэ хадань хүзэглэгшэд түргэхэн манда хүрэжэ ерыт даа гэхэн гуйлтатайгаар хоёр хүниие Пётрто эльгээбэ.

³⁹Пётр дары тэдэнтэй ошолсобо. Тэрэнэй ерэхэтэй сасуу дээдэ дабхарай таһалгада хүргэбэ. Тэндэ сугларһан бэлбэһэн эхэнэрнүүд Пётрые тойрожо, уйлан улилдаһаар тэрээндэ Газель басаганай амиды ябахандаа нэхэжэ оёһон олон суба болон элдэб янзын хубсаһануудые харуулба.

⁴⁰Пётр тэдэниие бултыень таһалгаһаа гаргаад, үбдэг дээрээ һуугаад зальбарба, тиигээд наһа бараһан басаган тээшэ хараад: – Тавита, бодо, – гэбэ. Тэрэнь нюдөө нээжэ, Пётрые хараһаар бодобо.

⁴¹Пётр тэрээндэ гараа үгэжэ, бодоходонь туһалан, Бурханай хүнүүдые болон бэлбэһэн эхэнэрнүүдые дуудажа, амиды Тавитае тэдэндэ харуулба.

⁴²Энэ ушар тухай Иоппиин зон булта дуулаад, Дээдын Эзэндэ олоороо хүзэглэбэ.

⁴³Пётр үшөө нилээн Иоппидо Симон гэжэ арһа элдэгшэ хүнэйдэ байрлаба.

Элшэнэрэй бүтээһэн хэрэгүүд 10

Пётр Корнелий хоёр

¹Кесарида Корнелий гэжэ нэрэтэй Италийн сэрэгэй зуунай дарга байгаа.

²Тэрэ гэр бүлөөрөө Бурханда хүзэглэдэг, тэрээнһээ айн хүгэдэдэг, ядажа тулижа ябаһан зондо үргэл бадар ехээр асардаг, Бурханда үргэлжэ зальбардаг һэн.

³Нэгэтэ үдын гурбан саг багаар тэрэ хүн үзэгдэл хараһан байна. Тэрээндэ Бурханай Эльгээмэл орожо: – Корнелий, – гэжэ дуудахыень тэрэ элеэр дуулаба.

⁴Корнелий тэрэниие айһан юумэн шэртэжэ: – Юун болооб даа, Эзэмни? – гэжэ асууба. – Шинии зальбарал болон хэһэн буяншни Бурханда хүрөө. Тэрэ шамайе һанажа байна, – гээд Бурханай Эльгээмэл Корнелидэ хэлэбэ. –

⁵Мүнөө дээрээ хүнүүдые Иоппи эльгээ, Пётр гэжэ нэрэтэй Симониие дуудуула.

⁶Тэрэ мүнөө арһа элдэгшэ Симонэйдэ далайн хажуудахи гэртэ байна.

- ⁷Тэрээнтэй хөөрэлдэһэн Бурханай Эльгээмэлэй ябаһан хойно Корнелий хоёр зарасаяа, үнэн сэдхэлтэ сэрэгэй нэгэ тухалагшаяа дуудаж,
⁸ушарһан бүхэниие тэдээндэ хөөржэ үгөөд, Иоппи хото эльгээбэ.
⁹Үглөөдэрын, үдэ багта тэдэнэрэй хотодо ойртожо байхада, Пётр Бурханда зальбархаяа гэрэй орой дээрэ гараад байба.
¹⁰Тэрэ ехээр үлдэжэ, эдеэлхэ дураниинь хүрэбэ. Эдее хоолой бэлдэгдэжэ байхада, Пётр үзэгдэл хараба:
¹¹огторгойн нээгдэхые, тэндэһээ газарта дүрбэн үзүүрһэнь баряад буулгагдажа байһан бүд хараба.
¹²Бүд дээрэ элдэб янзын дүрбэн хүлтэй амиадые, газар дэлхэйн мүлхигшэдые, тэнгэрийн шубуудые хараба.
¹³Абяан гаража: – Бодо, Пётр. Дуратай юумэ гаргаад эди, – гэжэ Пётрто хэлэбэ.
¹⁴– Үгы даа, ябашье эдихэгүйб, Дээдын Эзэн. Би сэбэр бэшэ, бузар юумэндэ нэгэшье ама хүрөөгүй һэнби, – гэжэ Пётр харюусаба.
¹⁵Абяан хоёрдохиео гаража: – Бурханай сэбэрлэһэн юумые бузар бү гэ, – гэжэ Пётрто хэлэбэ.
¹⁶Энэнь гурба дахин дабтагдаба, тиигээд бүднь огторгой өөдэ татагдан абтаба.
¹⁷Хараһан үзэгдэлэйнгөө удхыень Пётрой тайлбарилжа ядан, гайхан һуухадань, Корнелиин эльгээһэн хүнүүд Симонэй гэрые оложо, үүдэнэйн хажууда зогсобо.
¹⁸Пётр гэжэ нэрлэгдэдэг Симон эндэ байрлана гү гэжэ тэдэ шангаар һурабад.
¹⁹Хараһан үзэгдэл тухайгаа Пётрой бодомжолжо байхада, Нангин хүлдэ тэрээндэ: – Симон, гурбан хүн шамайе бэдэржэ байна, харана гүш?

- ²⁰Тэдэниие би өөрөө шамда эльгээгээ хүнби. Тиимэһээ энэ бэеэрээ доошоо буужа, татагалзангүй тэдэнтэй яба, – гэжэ хэлэбэ.
- ²¹Пётр доошоо буугаад, ерэнэн уладһаа: – Бэдэрһэн хүнтнай би гээшэб. Ямар хэрэгээр таанад иишэ ерээбта? – гэжэ һураба.
- ²²– Бидэниие зуунай дарга Корнелий эльгээгээ. Тэрэ үнэн сэдхэлтэн, Бурханда хүзэглэдэг хүн, тэрэниие бүхы еврей зон ехээр хүндэлдэг юм. Хэлэһэн юумыешни Корнелиин шагнахын тула Бурханай Эльгээмэл тэрэниие шамда эльгээжэ, шамайе гэртээ дуудажа асархыень захираа, – гэжэ тэдэ хүнүүд харюусаба.
- ²³Пётр тэдэниие гэртэ урижа айлшалуулба. Хойто үдэрын Пётр түхээрээд, тэдэнтэй хамта харгы замда мордобо. Тэдэнтэй хэдэн хүзэглэгшэд Иоппиһоо нүхэр болон ошолсобод.
- ²⁴Хойто үдэрын тэдэнэр Кесари хото хүрэжэ ерэбэ. Корнелий бүхы түрэлхидөө, хани нүхэдөө суглуулаад, тэдэниие хүлеэжэ байгаа.
- ²⁵Пётрой орохотой сасуу Корнелий тэрэниие угтан, хүлдэнь мүргэн унаба.
- ²⁶– Бодыш даа, – гэжэ тэрэниие Пётр бодхообо. – Бишни юрын хүн гээшэб.
- ²⁷Пётр Корнелитэй хөөрэлдэһөөр гэртэнь орожо, тэндэнь сугларһан олон зоние хараба.
- ²⁸– Манай Хуулиин ёһоор еврей хүн ондоо яһатанаар харилсаха, гэртэнь орохо ёһогүй гэжэ таанад һайн мэдэнэ ёһотойт. Теэд Бурхан намда ямаршые хүниие сэбэр бэшэ, бузар гэжэ хэлэжэ болохогүй байһые харуулба.
- ²⁹Тиимэһээ хойноһоомни эльгээхэдэнтэй, би арсангүй ерээб. Ямар хэрэгээр таанад хойноһоомни эльгээгээбта гэжэ би мүнөө һураха һанаатайб, – гэжэ Пётр тэдэндэ хандан хэлэбэ.

30– Гурбан үдэрэй урда тээ эгээл энэ сагта, үдын гурбан сагай багаар би гэртээ Бурханда зальбаржа байгаа һэнби. Гэнтэ ялалзаһан хубсаһатай хүн урдамни зогсоод:

31«Корнелий, шинии зальбарал болон хэһэн буяншни Бурханда хүрөө. Тэрэ шамайе һанажа мэдэжэ байна.

32Хүнүүдые Иоппи эльгээ, Пётр гэжэ нэрэтэй Симониие дуудуула. Тэрэ мүнөө арһа элдэгшэ Симонэйдэ далайн хажуудахи гэртэ байна», – гэжэ хэлэбэ.

33Тиигээд би тэрэ дороо хойноһоошни эльгээгээ һэнби. Шинии ерһэншни ехэ һайн гээшэ. Мүнөө бидэ булта Бурханай урда зогсожо, Дээдын Эзэнэй шамда хэлэ гэжэ захирһан бүхэниие шамһаа дуулахаяа эндэ суглараабди.

Пётрой хэлэһэн үгэ

34– Бурхан яһа илгадаггүй гэжэ би одоол үнэн дээрээ ойлгооб, – гээд Пётр хэлэбэ. –

35Бурхан тэрээндэ һүгэдэгшэ, үнэн сэхээр амидарагша ямаршые яһатанай хүниие угтан абадаг.

36Иисус Христосоор дамжуулан, амгалан байдал тухай һургаал номнолые Бурхан бүхы Израилиин хүн зондо айладхаһан байна. Иисус Христос хүн бүхэнэй Дээдын Эзэн гээшэ.

37Иоаннай уһаар арюудхуулагты гэжэ хүн зониие уряалһанһаа хойшо Галилейһээ эхилэн, бүхы Иудей соогуур юунэй болоһые таанад өөһэдөө һайн мэдэнэт.

38Бурхан Назаредэй Иисусые Нангин һүлдөөр болон хүсэ шадалаар дүүргэхэдэнь, тэрэ хаа хаанагүй ябажа, буянтай юумэ хэжэ, шолмосто баригдаһан хүн бүхэниие эдэгээжэ байһыень таанад баһа мэдэнэт. Юундэб гэхэдэ, Бурхан тэрээнтэй хамта байгаа.

³⁹Бидэ Иудейн орон нютагта болон Иерусалимда Иисусай бүтээһэн бүхы хэрэгүүдэйн гэршэнэрбди. Тэрэниие модон хэрээһэндэ хадажа саазалаа һэн.

⁴⁰Гэбэшье Бурхан тэрэниие гурбадахи үдэртэнь амидыруулаа, хүнүүдтэ үзэгдэхэ арга тэрээндэ олгоо бэлэй.

⁴¹Харин бүхы хүн зондо бэшэ, ганса Бурханай шэлэжэ абаһан гэршэнэртэ, бидэндэ өөрыгөө тэрэ үзүүлээ юм. Тэрэнэй амидырһан хойно бидэ тэрээнтэй суг эдижэ уужа ябаа һэмди.

⁴²Үхэхэн ба амиды хүнүүдэй Зарга шүүгшэ, Бурханай табисуурта гэжэ тэрээн тухай гэршэлхыемнай, хүн зондо һайн Мэдээсэл номнохыемнай тэрэ бидэндэ захяа бэлэй.

⁴³Тэрээндэ этигэһэн хүн бүхэндэ тэрэнэй нэрэ алдарай хүсөөр нүгэлын гүлсэгдэхэ гэжэ бүхы лүндэншэд гэршэлнэ.

Бусад арадууд Нангин хүлдые тогтоон абана

⁴⁴Пётрой үшөө хэлэжэ байха үедэ һургаал шагнажа байһан хүн бүхэндэ Нангин хүлдэ бууба.

⁴⁵Тиимэхээ Пётртой ерэхэн еврей хүзэглэгшэд Нангин хүлдын бусад зондо үгтэхэндэ ехэ гайхалдаба.

⁴⁶Элдэб янзын хэлэнүүд дээрэ Бурхание магтахые тэдэ дуулаба ха юм.

⁴⁷– Эдэ хүнүүд бидэндэл адляар Нангин хүлдые тогтоон абаа. Тиимэхээ мүнөө эдэнэй уһаар арюудхуулхада юун һаалта болохо юм? – гэжэ Пётр хэлэбэ.

⁴⁸Иисус Христосой нэрэ алдараар уһаар арюудхуулхыень Пётр тэдэндэ захирба. Тиигээд тэдэ хүзэглэгшэд Пётрые тэдэнтэй хамта хэдэн үдэр байлсахыень гуйба.

Элшэнэрэй бүтээһэн хэрэгүүд 11

Иерусалимай хүзэглэгшэдэй бүлгэмдэ Пётрой хэлэхэн үгэ



- ¹Бусад арадууд Бурханай үгые баһа мэдэбэ гэжэ Иудейн орон нютагуудаар эндэ тэндэ байһан элшэнэр болон хүзэглэгшэд дуулаба.
- ²Тиимэхээ Пётрой Иерусалим ерэхэдэнь, еврей хүзэглэгшэд тэрэниие зэмэлэн:
- ³– Ши бэлгээ отолуулаагүй хүнүүдэй гэртэ оробош, тэрээнһээ гадна тэдэнтэй эдее хоол барибаш, – гэжэ хэлэбэ.
- ⁴Пётр тохёолдоһон ушарые тэдэндэ эхинһээн ойлгуулан хөөрэбэ:
- ⁵– Иоппи хотодо Бурханда зальбаржа байхадаа би зальбаралдаа бүрин абтан, үзэгдэл хараа һэнби. Дүрбэн үзүүрһээн баряад огторгойһоо доошоо буулгагдажа байһан ехэ бүд мэтэ юумые би харааб. Тэрэ бүд зогсожо байһан газартамни бууба.
- ⁶Шагаажа, досоонь юун байнаб гэжэ харахадамни, тэндэ элдэб янзын амитад, зэрлиг ангууд, мүлхигшэд, тэнгэрийн шубууд байба.
- ⁷Удаань: «Бодо, Пётр. Дуратай юумээ гаргаад эди», – гэжэ намда хандажа хэлэһые дуулааб.
- ⁸«Үгы даа, ябашье эдихэгүйб, Дээдын Эзэн. Би нэгэтэшье сэбэр бэшэ, бузар юумэндэ ама хүрөөгүй һэнби», – гэжэ би харюусабаб.
- ⁹Огторгойһоо абяан хоёрдохийё гаража: «Бурханай сэбэрлэһэн юумые бузар бү гэ», – гэбэ.
- ¹⁰Энэнь гурба дахин дабтагдаад, тиигээд тэрэ бүд огторгой өөдэ татагдан абтаа һэн.
- ¹¹Эгээл тэрэ сагта айлшалжа байһан гэрэймни урда хойноһоомни Кесариһаа эльгээгдэһэн гурбан хүн зогсожо байба.
- ¹²Таталдангүй тэдэнтэй ошо гэжэ намда Нангин һүлдэ хэлээ. Намтай энэ зургаан хүзэглэгшэд баһа ошолсоо юм, бидэ сугтаа тэрэ хүнэй гэртэ ороо һэмди.

¹³Тэрэ хүн бидэндэ Бурханай Эльгээмэлые гэртээ харахан тухайгаа, мүн тэрэнэй: «Иоппи хото хүнүүдые эльгээжэ, Пётр гэжэ нэрэтэй Симониие дуудажа асара.

¹⁴Тэрэ шамайе, гэрынхидыешни абарха мэдээсэл шамда хөөрөжэ үгэхэ», – гэһыень хэлэбэ.

¹⁵Минии хөөрөжэ эхилхэтэй сасуу бидэндэ урдань буудагтал тон адляар тэдээндэ Нангин хүлдэ буугаа хэн.

¹⁶Тиихэдэ би «Иоанн уһаар арюудхаа, харин таанад Нангин хүлдөөр арюудхагдахат», – гэжэ Дээдын Эзэнэй хэлэһые ханаандаа оруулааб.

¹⁷Дээдын Эзэн Иисус Христосто этигэхэдэмнай бидэндэ үгтэһэн бэлэгтэл тон адли бэлэгые Бурхан тэдэндэ үгөө. Тиихэдэ Бурханда хаалта хэхэ би хэн гээшэбиб?

¹⁸Эдэ үгэнүүдые дуулахадаа еврей хүзэглэгшэд Пётрые буруушаахаяа болижо: – Тиихэдэ Бурхан бусад арадуудташые нүгэл хэхээ болихо арга олгожо, Амидарал үгэбэ гээшэ ха! – гэжэ хэлэн, Бурхание алдаршуулба.

Антиох хотын хүзэглэгшэдэй бүлгэм

¹⁹Стефанай наһа бараһан саһаа хойшо хашалга мүрдэлгэнүүдһээ зугадаһан хүзэглэгшэд Финики, Кипр, Антиох ерэжэ, хургаалаа гансал еврейнүүдтэ номножо байба.

²⁰Тэдэнэй дунда Кипрһээ, Киренейһээ уг гарбалтай хүнүүд байһан тула тэдэнэр Антиох ошожо, Дээдын Эзэн Иисус тухай һайн Мэдээсэлые грегүүдтэшые номнобо.

²¹Дээдын Эзэн тэдэнээр байлсажа, ехэ олон зон тэрээндэ хүзэглэн хандаба.

²²Энээн тухай һураг Иерусалимай хүзэглэгшэдэй бүлгэм дуулаад, тэрэ хото руу Варнавые эльгээбэ.

²³Варнава Антиох хүрэжэ ерэхэдээ, Бурханай үршөөл хайраар бүтээгдэһэн юумэнүүдые өөрөө хаража, ехэтэ баярлаба. Тиигээд бүхы

зүрхэ сэдхэлээрээ Дээдын Эзэндэ үнэн сэхэ байхыень тэрэ хүн зоние уряалаа.

²⁴Варнава Нангин хүлдөөр болон этигэлээр дүүрэхэн хайн хүн байгаа, тиимэхээ Дээдын Эзэндэ үшөө олон зон хүзэглэбэ.

²⁵Варнава Саулые бэдэрхээ Тарс ошожо, тэрэниие олоод,

²⁶Антиох абажа ерэбэ. Тэдэнэр бүтэн жэл соо хүзэглэгшэдэй бүлгэмтэй байжа, хоюулан ехэ олон зоние хургагша хэн. Тиихэдэ Антиохдо шабинарые анха түрүүшынхиеэ «христос шажантан» гэжэ нэрлэдэг болобо.

²⁷Тэдэ үдэрнүүдтэ Иерусалимһаа Антиохдо хэдэн лүндэншэд ерээ.

²⁸Агав гэжэ нэрэтэй тэдэнэй нэгэн бодожо, бүхы газар дэлхэйдэ ехэ үлэсхэлэн болохо гэжэ Нангин хүлдын ашаар уридшалан хэлэбэ. (Тиимэ үлэсхэлэн Клавдий хаанай захирха үедэ болоо хэн).

²⁹Тиихэдэ шабинар Иудейдэ ажаһуудаг аха дүүнэртээ шадаха зэргээрээ туһалха, тэдэндээ юумэ эльгээхэ гэжэ шиидэбэ.

³⁰Тэдэ шиидэхэнээ хүсэлдүүлэн, Варнава Саул хоёроор бүлгэмэй хүтэлэгшэдтэ өөһэдынгөө мүнгэн туһаламжа дамжуулба.

Элшэнэрэй бүтээхэн хэрэгүүд 12

Яковые алаба. Пётрые түрмэдэ хааба

¹Эгээл тэрэ үедэ Ирод хаан хүзэглэгшэдэй бүлгэмэй зарим хүнүүдые хашан мүрдэжэ захалба.

²Хаан Иоаннай аха Яковай тархиенё сабшагты гэжэ захирба.

³Энэнь еврейнүүдтэ найшаагдаба гэжэ мэдэхэдээ, баһа Пётрые барижа хааба. Энэ ушар Эһээлтэгүй Хилээмэнэй хайндэртэ тохёолдоһон байна.

⁴Ирод Пётрые түрмэдэ хаагаад, дүрбэ дүрбэн сэрэгшэдһээ бүридэхэн дүрбэн халаанай харуулаар тэрэниие харууһалуулба. Тиигээд Паасхын

һайндэрэй үнгэрхэтэй сасуу тэрэниие улад зоной урда шүүбэрилхэ гэжэ шиидэбэ.

⁵Пётрые түрмэдэ барижа байхадань, хүзэглэгшэдэй бүлгэм тэрэнэй түлөө үргэлжэ Бурханда зальбаржа байгаа.

Пётрые түрмэнөө гаргаба

⁶Иродэй Пётрые улад зоной урда шүүбэрилхэ гэнэн үдэрэй урда хүни Пётр хоёр сэрэгшэдэй хоорондо дабхар гэнжээр хүлээтэй унтажа байгаа һэн. Тиихэдэ түрмын үүдэнэй хажууда үшөө харуул табигданхай байба.

⁷Гэнтэ Дээдын Эзэнэй Эльгээмэл бии боложо, Пётрой байһан газарта гэрэл туяа сасарба. Эльгээмэл Пётрые түлхин һэрээжэ: – Түргөөр бодо! – гэжэ хэлэбэ. Тиихэдэ Пётрой гарһаа гэнжэнүүдынь мултаран унаба.

⁸– Бүһеэ бүһэлэ, гуталаа үмдэ, – гэжэ Эльгээмэл хэлэбэ. Пётр үгынь дуулажа, хэлэһыень дүүргэбэ. – Субаа нэмэрээд, хойноһоомни яба, – гэжэ Эльгээмэл баһа хэлэбэ.

⁹Бурханай Эльгээмэлэй хэжэ байгаашань үнэхөөрөө юм гү, али үгы гү гэжэ ойлгожо ядан, хии үзэгдэл хаража байна хаб гэжэ бодон, Пётр хойноһоонь гаража ябаба.

¹⁰Тэдэнэр хоёр харуулай хажуугаар үнгэржэ, хото ошоһон түмэр үүдэндэ хүрэжэ ерэбэ. Үүдэн урдань өөрөө нээгдэбэ. Тэдэнэр үүдээр гараад, саашаа ябаба. Нэгэ гудамжа үнгэрһэнэй һүүлээр Дээдын Эзэнэй Эльгээмэл гэнтэ харагдахаяа болишоо.

¹¹Пётр мэдээ ороходоо: – Дээдын Эзэн өөрынгөө Эльгээмэлые эльгээн, намайе Иродэй гарһаа мултаруулба, еврей зоной хүлээжэ байһан саазаһаа аршалба. Энэниенъ би мүнөөл һайн ойлгобоб, – гэжэ өөртөө хэлэбэ.

¹²Пётр энэниие ойлгоходоо, Марк гэдэг Иоаннай эхэ Мариягай гэртэ хүрэжэ ерэбэ. Тэндэ олон хүн суглараад, Бурханда зальбаржа байба.

¹³Пётрой үүдэ тоншоходо, Рода гэжэ нэрэтэй зараса эхэнэр үүдэндэ ойртоо.

¹⁴Пётрой дуу танихадаа тэрэ эхэнэр тон ехээр баярлажа, үүдээшье нээхээе мартаад, Пётр үүдэндэ зогсоно гэжэ дуулгахаяа гүйжэ ошобо.

¹⁵– Ай, ухааншни муудаа ха, – гэжэ бусад зон Родада хэлэбэ. Гэбээшье тэрэ эхэнэрэй өөрынхөөрөөл болоод халахагүйдэнь, тэдэ: – Пётрой Эльгээмэл байгаа ёһотой, – гэжэ буруушаабад.

¹⁶Харин Пётр халангүй үүдэ тоншожо байгаа. Үүдэ нээхэдэ гэртэ байһан хүнүүд Пётрые харахадаа угаа ехээр гайхалдаба.

¹⁷Шэмээгүй бологты гэжэ Пётр гараараа харуулаад, Дээдын Эзэнэй яжа тэрэниие түрмэхөө гаргаһан тухай хөөрөжэ үгэбэ. – Яковта, аха дүүнэртэ энээн тухай дуулгагты, – гэжэ Пётр хэлээд, тэдэниие орхёод, ондоо тээшээ ошобо.

¹⁸Пётртой юун ушарааб гэхэн хүл хөөрсэгэнөөн үүр сайхада сэрэгшэдэй дунда болобо.

¹⁹Иродшье Пётрые бэдэрүүлээд олобогүй. Тэрэ харуулшадые һайса мүшхэжэ саазалхыень захираад, өөрөө Иудейһээ Кесари ошожо, тэндээ үлэбэ.

Иродэй үхэл тухай

²⁰Ирод хаан Тир, Сидон хотынхидтэ тон ехээр сухалдажа байба. Тиимэхээ тэдэнь өөһэд хоорондоо хэлсэжэ, хаанай ордоной захирагша Бластые бэе тээшээ татаад, тэрээнтэй сугтаа хаанда ошожо, эб найрамдал тогтоохо тухай гуйба. Юундэб гэхэдэ, Тир, Сидон хотынхид Иродэй газарһаа эдэе хоолоор хангагдадаг бэлэй.

²¹Хүнүүдтэй уулзахаар тогтоогдоһон үдэр Ирод хаан субаа нэмэржэ, хаан шэрээдээ һуугаад, зоной урда юумэ хэлэжэ оробо.

²²– Энэмнай хүн хэлэнэ бэшэ, Бурхан хэлэнэ! – гэжэ улад зон шангаар хашхаралдаба.



²³Бурханай алдар соло дуудангүй байһанайнь түлөө Дээдын Эзэнэй Эльгээмэл Иродые гэнтын үбшэнгөөр дайража, Ирод хаан үтэ хорхойдо барюулан үхэбэ.

²⁴Тиихэдэ Бурханай Мэдээсэл хаа хаанагүй таража байгаа.

²⁵Варнава Саул хоёр даалгагдаһан хэрэгүүдээ бүтээжэ, Марк гэдэг Иоанные абаад, һөөргөө Иерусалим ерэбэ.

Элшэнэрэй бүтээһэн хэрэгүүд 13

Варнава Саул хоёрые һайн Мэдээсэл номнохыень эльгээбэ

¹Антиохой хүзэглэгшэдэй бүлгэмдэ Варнава, Нигер гэхэн ара нэрэтэй Симеон, Киреней хотын Лукий, Саул, бага байхадаа хаанай хүбүүн Иродтэй хүмүүжүүлэгдэһэн Менахем гэхэн лүндэншэд, багшанар байгаа һэн.

²Нэгэтэ тэдэнэй Дээдын Эзэндэ алба хэжэ, масаглажа байхада Нангин һүлдэ тэдэндэ: – Ямар үүргэ хэрэг даалган Варнава Саул хоёрые дуудаа һэнби, тэрэ хэрэгыемни бүтээхыень тэдэ хоёрые намда табигты, – гэжэ хэлэбэ.

³Масаглажа, мүргэл зальбаралаа дүүргэһэн хойноо тэдэ зон үнөөхи хоёрые гараараа адислан табиба.

Кипр аралда

⁴Нангин һүлдын нүлөөгөөр харгы замдаа гараһан Варнава Саул хоёр Селевки хүрэжэ ерээд, тэндэһээ Кипр аралда тамаран ошобо.

⁵Саламин хүрэжэ ерээд, тэдэнэр мүргэлэй гэрнүүдтэ Бурханай Үгэ номнобо. Тиихэдэ тэдэнтэй Иоанн ябалсажа, тэдэндэ туһалжа байгаа.

⁶Бүхы Кипр аралые гаталан, тэдэ Пафос хото хүрэжэ ерэбэд. Тэндэ Бар-Иисус гэжэ нэрэтэй эльбэшэ, хуурмаг лүндэншэ еврей хүнтэй уулзаба.

⁷Бар-Иисус аралые захирагша Сергей Павел гэдэг эрдэм ухаа ехэтэй хүнэй нүхэрынэ байгаа. Сергей Павел гээшэнь Бурханай һургаал үгэ дуулаха дуратай байжа, Варнава Саул хоёрые өөртөө дуудаа һэн.

⁸Тeэд Элим гэжэ (энэнь тэрэнэй грек нэрэ) эльбэшэн захирагшын этигэхэдэ һаалта хэжэ, шабинарта эсэргүүсэбэ.

⁹Саул (ондоогоор Павел) Нангин һүлдөөр дүүрэн, Элим тээшэ анхаралтайгаар шэртэн хараад:

¹⁰– Ши, худал хуурмагай бээлэл, шолмосой хүбүүн, али бүхы үнэн юумэнэй дайсан! Дээдын Эзэнэй арюун сэхэ замые саашадаашье хазагайруулжа ябахаб гэжэ һанана гүш?

¹¹Мүнөө Дээдын Эзэнэй гар шам дээрэ зогсоо. Ши һохор боложо, хэдэн сагай туршада наранай туяа харахагүйш, – гэжэ хэлэбэ. Тэрэ дороо Элимые боро хараан бүрхөөн хушажа, хүтэлжэ ябаха хүниие бэдэрэн, тэрэ иишэ тиишээ тэмтэрбэ.

¹²Ушарһан бүхэниие хараһан захирагша ехээр гайхан, Дээдын Эзэн тухай һургаалда этигээ һэн.

Писидиин Антиохдо

¹³Павел замайнгаа нүхэдтэй Пафосһаа тамаржа гараад, Памфилийн нютагай Пергэ хото хүрэжэ ерэбэ. Тэндэ Иоанн тэдэниие орхёод, Иерусалимаа бусажа ошоо һэн.

¹⁴Харин үлэһэн нүхэдынь Пергэһээ Писидиин Антиох зорижо ерээд, субботын үдэр мүргэлэй гэртэ орожо һуубад.

¹⁵Хуулийн, лүндэншэдэй номһоо хэһэгүүдые уншаһанай хойно мүргэлэй гэрэй ахамдууд: – Аха дүүнэр, хүн зониие урмашуулхаар юумэн танда байгаа һаа, хэлыт даа, – гэжэ айлшадта хандаба.

¹⁶Павел өөдөө бодожо, шэмээгүй бологты гэжэ гараараа харуулаад: – Израильшууд, Бурхание хүндэлэгшэд, шагныт даа!

¹⁷Израилиин арад зоной Бурхан манай үбгэ эсэгэнэрые шэлэжэ абаад, хариин газарта, Египедтэ ажаһуухадань, тэдэниие агууехэ үндэһэн болгоо һэн. Тиигээд хүсэн түгэлдэр гараараа Бурхан тэдэниие Египедһээ гаргажа,

- ¹⁸дүшэн жэлэй туршада сүл губида тэдэнтэй тэсэжэ байгаа бэлэй.
- ¹⁹Ханаанай газар нютагта долоон үндэхэтэниие тэрэ хүнөөгөөд, газарыень манай үбгэ эсэгэнэртэ эзэлжэ байхаарнь үгөө һэн.
- ²⁰Иигэжэ дүрбэн зуун табин жэл үнгэрөө. Тэрэнэй удаа Бурхан тэдэндэ заргашадые үгөө һэн. Тэдэ заргашад лүндэншэ Самуилай үе саг хүрэтэр байгаа.
- ²¹Һүүлдэ хааниие манда үгыш гэжэ израильшуудай гуйхадань, Бурхан тэдэндэ Вениаминай угсаатанай Кисэй Саул хүбүүе үгэбэ, тиин тэрэнь дүшэн жэлэй туршада хаан шэрээдэ һууба.
- ²²Тэрэниие тушаалһаань халажа, Бурхан Давидые израильшуудай хаан болгожо табяа хаш. Тиин тэрээн тухай Бурхан: «Би Иесейн Давид хүбүүе шэлэжэ абааб, тэрэ минии һанаа сэдхэлдэ тааруу байна, тэрэ захиралтануудыемни бултыень дүүргэхэ», – гэжэ хэлээ юм.
- ²³Бурхан найдуулһан ёһоороо Давидай үри һадаһан болохо Абарагша Иисусые Израильда эльгээгээ.
- ²⁴Тэрэнэй заларан ерэхые Иоанн уридшалан айладхажа, нүгэл үйлэдэхее болёод, уһаар арюудхахыень бүхы Израилиин хүн зониие уряалаа бэлэй.
- ²⁵Үүргее дүүргэжэ байхадаа Иоанн: «Намаие хэн гэжэ һананабта? Би таанадай хүлөөһэн хүн бэшэлби. Таанадай хүлөөһэн хүн минии хойноһоо заларжа ябана, тиин би тэрэнэй гуталайнь ооһорыешье тайлаха эрхэгүйб!» – гэжэ хэлээ һэн.
- ²⁶Аха дүүнэрни! Абраһамай үри һадаһад, Бурханиие хүндэлэгшэд, абаралга тухай энэ мэдээсэл бидэндэ эльгээгдэһэн байна.
- ²⁷Иерусалимда ажаһуугшад ба захирагшад Христосые таяагүй, тэрэниие гэмнээд, суббото бүхэндэ уншадаг лүндэншэдэй ном соо бэшэгдэһые бүтээгээ гээшэ.

²⁸Тэрэниие саазалха нэгэшье баримта олонгүй, тэдэ зон Иисусые саазала гэжэ Пиладые баалаа.

²⁹Тиигэжэ тэдэнэр Иисус тухай Нангин Бэшэгтэ бэшээтэй байһан бүгэдые бээлүүлбэ. Тэдэнэр Иисусые хэрээһэнһээ буулгажа, агы нүхэндэ хүдөөлүүлээ һэн.

³⁰Гэбэшье Бурхан тэрэниие амидыруулаа.

³¹Галилейһээ Иерусалим хүрэтэр тэрээнтэй хамта ерэлсэһэн хүнүүдтэ олон үдэрэй туршада тэрэ үзэгдөө, тиимэһээ тэдэнь мүнөө улад зондо Иисус тухай баталан гэршэлнэ.

³²Харин бидэ манай үбгэ эсэгэнэртэ үгтэһэн үгэ бүтэбэл даа гэжэ һайн Мэдээсэлые айладхажа байнабди.

³³Бурхан Иисусые амидыруулхадаа, бидэндэ, тэдэнэй үри хүүгэдтэ найдуулһанаа бүтээгөө гээшэ. Энээн тухай «Бурханай дуунай номой» хоёрдохи дуун соо иигэжэ бэшэгдэнхэй юм: «Ши минии хүбүүнши, Мүнөөдэр би эсэгэшни болооб».

³⁴Бурханай тэрэниие амидыруулһан, гутаан үмхирүүлээгүй тухай: «Давидта үгэһэн нангин бата үгэнүүдээ би таанадай дунда бээлүүлхэб», – гэжэ бэшээтэй байдаг юм.

³⁵Тиимэһээ Нангин Бэшэгэй ондоо газарта: «Ши өөрынгөө шударга Зарасые агы нүхэндэ гутаажа үмхирүүлхэгүйш», – гэжэ хэлэгдэнэ.

³⁶Давид бүхы наһаараа Бурханай уг зорилгые бүтээжэ, һүүлдэ наһа барахадаа үбгэ эсэгэнэртэйгээ суг хүдөөлүүлэгдэһэн байгаа, бэень эсэстээ гутажа үмхирөө юм.

³⁷Харин Бурханай амидыруулһан хүн гутажа үмхирхэгүй юм.

³⁸⁻³⁹Тиимэһээ, аха дүүнэрни, Иисусаар дамжуулан, Бурхан таанадта нүгэл хүлисэхэ тухай айладхаа гэжэ мэдэжэ абагты. Моисейн Хуули сахяадшье хүлисүүлхэ аргагүй нүгэлнүүдые Иисуста этигэдэг хүн бүхэндэ Иисусай хүсөөр тэрэ нүгэлнүүдынь хүлисэгдэбэ гээшэ.

⁴⁰Лүндэншэдэй иигэжэ хэлэһэн үгэнүүд таанадтай тохёолдохогүйн тула таанад хэргэг байгты:

⁴¹«Харагты даа, шоглон гасаалагшад, гайхалдагты, хосорогты! Таанадта хүнэй дуулгаашье хаа, танай үнэншэхөөр бэшэ Агууехэ үйлэ хэрэг танай эдэ үдэрнүүдтэ би бүтээжэ байнаб».

⁴²Павел Варнава хоёрой мүргэлэй гэрһээ гаража байхада, мүнөө хөөрэхэн юумэе ерэхэ субботодо үргэлжэлүүлэн хэлэхыень хүнүүд тэдэниие уриба.

⁴³Сугларһан зоной таража эхилхэдэ, еврейнүүд болон еврейнүүдэй шажанда этигэһэн олон хүнүүд Павел Варнава хоёрые дахан ябаба, харин тэдэ хоёрынь саашадаашье Бурханай үршөөл хайрада амидархыень тэдэ зониие идхажа байба.

⁴⁴Нүгөө субботодо бүхы хотын зон тооной Дээдын Эзэнэй Мэдээсэл шагнахаяа сугларба.

⁴⁵Еврейнүүд иимэ олон зониие харахадаа, ехээр атаархажа, Павелые муудхан, тэрээнтэй арсалдаба.

⁴⁶Павел Варнава хоёр зоригтойгоор иигэжэ хэлэбэ: – Бидэ Бурханай үгэ анха түрүүн таанадта асарха ёһотой байгаабди. Харин энэ үгы таанадай буруушаажа, мүнхын амидаралда хүртэхөөр бэшэбди гэжэ өөһэд тухайгаа ханаа юм хаатнай, бидэ мүнөө бусад арадуудта ошохомнай.

⁴⁷Дээдын Эзэн бидэндэ: «Газар дэлхэйн заха хизаар хүрэтэр абаралга асархыншни тула Би шамайе бусад арадуудай гэрэл туяа болгон табяаб», – гэжэ захяа һэн.

⁴⁸Хэлэхыень дуулахадаа бусад арадууд ехээр баярлажа, Дээдын Эзэнэй үгы алдаршуулба, тиигээд мүнхэ ажамидархаар шэлэгдэхэн хүнүүд булта хүзэглэбэ ха.

⁴⁹Бурханай үгэ энэ орон нютагаар хаа хаанагүй дэлгэрэн тараа.



⁵⁰Гэбэшье еврейнүүд хотын түрүү хүнүүдые болон Бурханда хүзэглэһэн хүндэтэ эхэнэрнүүдые Павел Варнава хоёрто эсэргүү ханаатай болгобо. Тэдэ хоёрые хашан мүрдэжэ, тэрэ нютагһаа намнаба.

⁵¹Тиихэдэнь Павел Варнава хоёр хүлдөө халдаһан тооһо гүбижэ, Икони хото ошоо һэн.

⁵²Тэрэ үедэ Антиохдо байһан шабинар баяраар халин, Нангин хүлдөөр дүүрээд байба.

Элшэнэрэй бүтээһэн хэрэгүүд 14

Икони хотодо

¹Павел Варнава хоёрой Иконидо мүргэлэй гэртэ орожо, этигэл түрүүлмээр хөөрэхэдэнь, еврейнүүд болон бусад арадууд олоороо этигэбэ.

²Харин этигээгүй еврейнүүд еврей-бэшэнүүдэй ханаа бодолыень хамааруулжа, хүзэглэһэн аха дүүнэрэйнгээ урдаһаа тухирба.

³Гэбэшье Павел Варнава хоёр нилээд удаан саг соо тэндэ байгаад, Дээдын Эзэн тухай зоригтойгоор номнобо, харин Дээдын Эзэн өөрынгөө талаһаа Бурханай үршөөл хайра тухай номнолыень баталан, тэдэндэ гайхамшагта хэрэгүүдые болон дүлгэ тэмдэгүүдые үзүүлхэ арга олгожо байба.

⁴Хотынхидой ханаа бодолынь хубааржа: зарим нэгэниинь еврейнүүдые, нүгөө зариманиинь элшэнэрые дэмжэжэ байгаа.

⁵Бусад арадууд, еврейнүүд хотын захирагшадтай хэлсэжэ, тэдэниие шулуудаха ханаатай байна гэжэ элшэнэр дуулахадаа,

⁶Ликаони руу тэрьедэжэ, Листра ба Дербэ хотонуудта, мүн оршон тойронхи нютагуудта

⁷һайн Мэдээсэлые тунхаглаба.

Павел Варнава хоёр Листра ба Дербэ хотонуудта



⁸Листрада түрэхынгөө хүл муутай, хүлөөрөө нэгэшье ябаагүй, һуумгай хүн ажаһуугаа.

⁹Нэгэтэ тэрэнэй Павелай номнол шагнажа һуухадань, Павел тэрэниие анхаралтайгаар шэртэжэ, эдэгэхээр ехэ этигэлтэй байхыень хараад:

¹⁰– Хүл дээрээ бодо! – гэжэ шангаар ооглобо. Үнөөхинь хүл дээрээ хүрэн бодоод ябашаба.

¹¹Павелай юу бүтээһые харахадаа улад зон өөһэдынгөө ликаон хэлэн дээрэ: – Хүнэй бэе бээлжэ маанадта бурхад бууба, – гэжэ хүхирэлдэбэд.

¹²Тэдэ зон Варнавые Зевс гэжэ, Павелые ехээр юумэ хэлэдэг байһанайнь түлөө Гермес гэжэ нэрлэбэд.

¹³Хотоһоо холо бэшэ Зевсын хүмэ оршодог байгаа. Зевсын санаарта хүн зоноор хамта бухануудые, баглаа сэсэгүүдые тэдэндэ үргэл болгон бариха ханаатай байгаа.

¹⁴Варнава Павел хоёр энээн тухай дуулахадаа, хубсаһа хунараа шуу татажа, хүн зондо гүйжэ ошоод, хорин хашхаралдабад:

¹⁵– Хүнүүд, юу хэжэ байгаа юмта? Бидэ таанадтал адли юрын хүнүүд гээшэбди! Таанадай онгонуудһаа зайсажа, тэнгэри огторгой, газар дэлхэй, уһа далай болон тэдээн соо байдаг бүхы юумые бүтээһэн Амиды Бурханда һүгэдэн хандахынтнай тула бидэ таанадта һайн Мэдээсэл асараа гээшэбди.

¹⁶Бүхы үндэһэ яһатанда өөһэдынгөө харгы замаар ябахыень Бурхан урдань буруушаадаггүй байгаа.

¹⁷Тэрэ үедэ Бурхан һайн һайхан үйлэ хэрэгүүдые бүтээн, өөр тухайгаа гэршэлжэ, тэнгэриһээ хура бороо, үрэжэлтэ сагай уларил хайрлажа, эдэе хоолоор хангажа, зүрхэ сэдхэлыетнай баяр баясхалангаар дүүргэдэг һэн.

¹⁸Павел Варнава хоёр иигэжэ хэлэжэ байгаад, үргэл үргэхээе байһан зониие арай гэжэ зогсообо.



¹⁹Һүүлдэ Антиох, Икони хотонуудһаа еврейнүүд ерэжэ, хотынхидые элшэнэрэй урдаһаа эсэргүүсүүлбэ. Тиигээд тэдэнэр Павелые шулуудажэ, тэрэниие үхөө гэжэ һанаад, хотоһоо шэрэжэ гаргаад хаяба.

²⁰Павелые тойрон шабинарайнь зогсоходо, тэрэнь бодожо, хото руу оробо. Хойто үдэрын тэрэ Варнаватай суг Дербэ хото ошобо.

Сирийн Антиох бусажа ерэнэн тухай

²¹Тэдэ Дербэдэ һайн Мэдээсэл номножо, олон хүниие Дээдын Эзэндэ хандуулба. Һүүлдэнь Листра, Икони, Писидийн Антиох хотонуудаа эрьежэ,

²²ябаһан газараа шабинарые урмашуулан, зоригжуулан, этигэлээ алдангүй, харин бэхижүүлжэ байхыень уряалба. Бурханай хаан орондо орохынгоо урда тээ таанад аргагүй ехэ зоболон дабахат гэжэ тэдэ хэлэбэ.

²³Павел Варнава хоёр һүзэглэгшэдэй бүлгэм бүхэндэ хүтэлэгшэдые томилжо, масаглаад, зальбараад, этигэһэн Дээдын Эзэндэнь тэдэ һүзэглэгшэдые даалгаба.

²⁴Тэдэнэр Писидийн можоор ябажа, Памфилийн можо хүрэжэ ерэбэд.

²⁵Тиигээд Бурханай Үгэ Пергэдэ номноод, удаань Аттали хото зорибо.

²⁶Мүнөө тэдэ Атталиһаа Антиох руу бусажа тамарба. Түрүүн Антиохдо байхадань, Бурханай үршөөл хайра ажалаа ябуулхадань байха болтогой гэжэ зальбаран, Павел Варнава хоёрые ябуулаа бэлэй. Мүнөө тэдэнэр үнөөхи ажалаа бүтээгөөд, бусажа ерэбэд.

²⁷Антиохдо ерээд, бүхы һүзэглэгшэдые суглуулжа, Бурхан тэдэнээр юу бүтээлгэһыень болон тэрэнэй бусад арадуудта этигэлэй үүдэ нээжэ үгэһыень тэдэнэр хөөрөжэ үгэбэ.

²⁸Тиигээд тэдэнэр шабинартай хамта нилээд удаан байлсаба.

Элшэнэрэй бүтээһэн хэрэгүүд 15

Иерусалимда болоһон суглаан



¹Иудейһээ Антиохдо хэдэн хүн ерээд, «Моисейн захиһан ёһоор бэлгээ отолуулаагүй һаа, таанад абарагдахагүйт», – гэжэ хүзэглэгшэдые һургаба.

²Энэ асуудалай талаар Павел Варнава хоёр тэдэнтэй нилээд заргалдаба, арсалдаба. Тиймэһээ энэ асуудалые элшэнэртэй ба бүлгэмэй хүтэлэгшэдтэй зүбшөөд ерэхыень Павел Варнава хоёрые хэдэн хүзэглэгшэдтэй хамта Иерусалим эльгээхэ гэжэ шийдэбэ.

³Антиохой хүзэглэгшэдэй бүлгэмэй эльгээһэн зон Финикиин ба Самариин нютагуудаар ябахадаа, бусад арадуудай Бурханда яаж хандаһан тухай хөөрөжэ байба, тийхэдэнь бүхы хүзэглэгшэд угаа ехээр баярлажа байба.

⁴Иерусалимда ерэхэдэнь, тэдэниие хүзэглэгшэдэй бүлгэм, элшэнэр, бүлгэмэй хүтэлэгшэд уриба. Хүрэжэ ерэхэн зон Бурханай тэдэнээр бүтээлгэһэн бүгэдые хөөрөжэ үгөө.

⁵Иисуста этигэһэн фарисейнүүдэй дундаһаа хэдэн хүн үгэ хэлэхэдээ: – Еврей-бэшэнүүд бэлгээ баһа отолуулха ёһотой, Моисейн Хуули сахихыень тэдэниие уялгаха хэрэгтэй, – гэжэ баадхабад.

⁶Элшэнэр, бүлгэмэй хүтэлэгшэд энэ асуудалаар зүбшэн хэлсэхэ гэжэ сугларба.

⁷Арсалдаан гараһаар нилээд удаан саг үнгэрһэнэй хойно Пётр бодожо: – Аха дүүнэрни! – гэбэ. – Бусад арадуудай дунда һайн Мэдээсэл номнон этигэл түрүүлхымни тула Бурхан үни гэхээр намайе таанадай дундаһаа шэлэжэ абаа һэн гэжэ таанад һайн мэдэнэт.

⁸Хүнүүдэй һанал бодол мэдэдэг Бурхан бидэндэ үгэхэндөөл адляар тэдэндэ Нангин һүлдэ үгэхэдөө, өөрынгөө үршөөл хайра баһа бусад арадуудта үршөөбэ гээшэ.

⁹Бурхан маанадай болон бусад арадуудай хоорондо ямаршые илгаа гарганагүй, юундэб гэхэдэ, тэдэнэй зүрхэ сэдхэл этигэлээр арюудхагдаа гээшэ.

¹⁰Тиигээд үбгэ эсэгэнэртэмнайшые, маанадташые даагдахагүй хүндэ ашаае шабинарай хүзүүндэ тээхээ оролдон, Бурхание мүнөө юундэ туршаа юмта.

¹¹Бидэ гансал Дээдын Эзэн Иисусай үршөөл хайраар абарагдаабди гэжэ этигэнэбди, тиин тэдэшые баһа Иисусай үршөөл хайраар абарагдаа.

¹²Сугларһан зон абяагүй болоод, ямар гайхамшагта дүлгэ тэмдэгүүдые, үйлэ хэрэгүүдые Бурхан Павел Варнава хоёрой гараар бусад арадуудай дунда бүтээгөө юм гэжэ тэдэ хоёрой хөөрэһые шагнаба.

¹³Тэдэнэй хөөрөжэ дүүргэхэдэ, Яков хэлэжэ эхилбэ: – Аха дүүнэрни, намайе шагныт!

¹⁴Бурханай өөрынгөө нэрэ алдараар анха түрүүшынхиеэ бусад арадуудай дундаһаа хүнүүдые шэлэжэ абаһан тухай Симеон бидэндэ хөөрөжэ үгөө.

¹⁵Лүндэншэдэйшые үгэнүүд эдэ бүхэниие тобшолно:

¹⁶«Тэрэнэй һүүлдэ би бусажа ерээд, Давидай унаһан майханиие дахин бодхоохоб. һандаран халаад байһан тэрэниие бодхоожо, Дахин шэнээр һэргээхэб.

¹⁷⁻¹⁸Тиихэдэ минии хүнүүд болохоор Дуудуулһан бусад яһатан Болон ондоошые улад зон Дээдын Эзэниие бэдэрхэ. Эртэ урда саһаа энээн тухай дуулгаһан Дээдын Эзэн иигэжэ хэлэнэ».

¹⁹Тиимэхээ Бурханда хандажа байһан еврей-бэшэ хүниие бидэ хорихо зобоохо ёһогүйбди гэжэ тоолоноб.

²⁰Харин онгонуудта үргэжэ бузарлагдаһан эдээ хоол барихыень, забхайрхыень, боожо алаһан амитадай мяха, шуһа амсахыень хорихон бэшэг бэшэжэ, тэдээндэ эльгээхэ ёһотойбди.

²¹Юундэб гэхэдэ, Моисейн Хуули эртэ урда саһаа хото бүхэндэ номногдожо, мүргэлэй гэрнүүдтэ суббото бүхэндэ уншагдана ха юм.

Бусад арадуудай дундаһаа хүзэглэһэн зондо эльгээгдэһэн бэшэг

²²Тиигээд элшэнэр, бүлгэмэй хүтэлэгшэд хүзэглэгшэдтэйгөө хамта хэдэн хүниие өөһэдынгөө дундаһаа шэлэжэ абаад, Павел Варнава хоёртой Антиох руу эльгээхэ гэжэ шиидэбэ. Тэдэ хүзэглэгшэдэй дундаһаа нэрэ хүндэтэй Баршабба гэжэ ара нэрэтэй Иудые, мүн Силые шэлэжэ абаад,

²³тэдэнэй дамжуулха ёһотой иимэ бэшэг бэшэбэд: «Элшэнэр, Иерусалимай бүлгэмэй хүтэлэгшэд болон бүхы хүзэглэгшэд Антиох, Сири, Киликидэ ажаһуудаг бусад арадуудай дундаһаа Христосто хүзэглэһэн зониие амаршална.

²⁴Зарим хүзэглэгшэднай манһаа абаагүй захиралтаар һанал бодолыетнай һамааруулна, таанадые зобооно гэжэ бидэ дуулаабди.

²⁵⁻²⁶Тиимэхээ манай Дээдын Эзэн Иисус Христосто алба хэжэ өөрынгөө ами наһые хайрладаггүй, манда ехэ һайшаагадаг Варнава Павел хоёртой хэдэн хүнүүдые шэлэжэ эльгээхэ гэжэ бидэ зүбшэбэбди.

²⁷Иуда Сила хоёрые эдэ бүгэдые таанадта тайлбарилжа үгэхыень эльгээнэбди.

²⁸⁻²⁹Онгонуудта үргэжэ бузарлагдаһан эдээ хоол, боожо алагдаһан амитадай шуһа, мяха амсангүй, забхайрангүй байгаарайгты. Энээнһээ гадна ондоо захиралта таанадта үгэхэгүй гэжэ Нангин хүлдэ болон бидэнэр шиидэбэбди. Дээрэ дурдагдаһан юумэнүүдые сахижа байбал, бүхы юумэн һайн байха. Баяртай!»

³⁰Антиох хүрэжэ ерээд, эльгээгдэһэн хүнүүдынь хүзэглэгшэдэй бүлгэм суглуулаад, үнөөхи бэшэгээ дамжуулжа үгэбэ.



³¹Энэ урмашуулхан бэшэг уншаад, зон угаа ехээр баярлаа.

³²Иуда Сила хоёр лүндэншэд байһан туладаа үгэ хэлэжэ, хүзэглэгшэдые зоригжуулан урмашуулба.

³³Тиигээд тэдэ хоёр хэдэн сагай турша соо Антиохдо байба, хүүлдэнь хүзэглэгшэ аха дүүнэрынь тэдэниие үрээгөөд, элшэнэртэ һөөргэнь ябуулба.

³⁵Павел Варнава хоёр Антиохдо үлэбэ. Тэдэ бусад олон хүзэглэгшэдөөр хамта улад зоние һургажа, Дээдын Эзэнэй һайн Мэдээсэл номножо байбад.

Павел Варнава хоёр хахасабад

³⁶Нэгэ хэды болоод Павел Варнавада: – Дээдын Эзэнэй Үгэ ямар хотонуудта номноо һэмди, тэдэ хотонуудаар ябаад, тэндэ ажаһууһан аха дүүнэрээ эрьсээд, хэрэгүүдынь ямархан бэ гэжэ харая, – гһэн дурадхал оруулба.

³⁷Варнава болбол Марк гэжэ нэрэтэй Иоанне абажа ябалсаха һанаатай байгаа.

³⁸Гэбэшье Памфилида тэдэниие хаяжа, хэрэгыень бүтээлсэхээ арсаһан Маркые Павел абажа ябаха дурагуй байгаа.

³⁹Энээн дээрһээ Павел Варнава хоёр зүрилдөөд хахасабад. Варнава Маркые дахуулаад, Кипр арал руу тамаран ошобо.

⁴⁰Харин Павел Силые замай нүхэр болгон ябаба. Аха дүүнэрынь тэдэниие Дээдын Эзэнэй үршөөл хайрада даалгажа табяа һэн.

⁴¹Тэдэ Сириин, Киликиин хотонуудаар аха дүүнэрээ батадхан ябабад.

Элшэнэрэй бүтээһэн хэрэгүүд 16

Тимофей Павел Саул хоёртой нэгэдэбэ

¹Павел Дербэ ошоод, удаань Листра хүрэжэ ерэбэ. Тэндэ Дээдын Эзэндэ хүзэглэдэг еврей эхэтэй, грек эсэгэтэй Тимофей гэжэ нэгэ шаби ажаһуугаа.



²Тэрээн тухай Листра Икони хотонуудта ажаһуудаг хүзэглэгшэд найнаар хэлэдэг хэн.

³Павел тэрэниие дахуулжа ябаха ханаатай байгаа. Тимофейн эсэгэн грек хүн гэжэ мэдэдэг байһан энэ нютагай еврейнүүдһээ боложо хүбүүнэй бэлгэ отолуулһан байгаа.

⁴Павел Тимофей хоёр нэгэ хотоһоо нүгөө хото орожо, Иерусалимдахи элшэнэрэй, мүн бүлгэмэй хүтэлэгшэдэй тогтоһон ёһо гуримые сахижа байхыень хүн зоние уряалба.

⁵Хүзэглэгшэ аха дүүнэрэй этигэл бүри бэхижэжэ, үдэрһөө үдэртэ хүзэглэгшэдэй тоо олошоржол байба.

Павелай хараһан үзэгдэл

⁶Нангин хүлдэ Асида Бурханай үгэ бү номногты гэхэн тула тэдэ бүхы Фригийн болон Галадай можонуудаар ябаба ха.

⁷Тэдэнэй Мисси можын хилэдэ хүрэжэ ерээд, Бетини орохоёо байхадань, Иисусай хүлдэ тишээ орохыень зүбшөөбэгүй.

⁸Тиимэхээ тэдэ Миссиие үнгэржэ, Троада хото хүрэжэ ерээбд.

⁹Македониин эрэ хүн урдань зогсожо: «Македони ерэжэ, манда туһалыш даа!» – гэхэн үзэгдэл Павел тэрэ хүниндөө хараба.

¹⁰Энэ үзэгдэлэй хүүлдэ Бурхан бидэниие һайн Мэдээсэл номнохыемнай дуудаба гэжэ тобшолон, тэрэ бэеэрээ Македони ошохоёо түхээрбэбди.

Лидия Иисус Христосто хүзэглэбэ

¹¹Иигэжэ бидэ Троадаһаа тамаржа гараад, сэхэ Самофраки аралда, хойто үдэрынь Неаполь портдо хүрэжэ ерээбди.

¹²Тэндэхээ Македониин нэгэ аймагай түб хотодо, римэй колониин Филипп хото хүрэжэ ерээбди. Энэ хотодо бидэ хэдэн үдэр хоноо һэмди.



¹³Бидэ субботодо хотын үүдээр гадагшаа гаража, еврейнүүдэй зальбардаг газарай нуури бэдэрэн, голой эрье зубшажа ябаа хэмди. Тэндэ бидэ сугларһан эхэнэрнүүдээр нуужа хөөрэлдэбди.

¹⁴Тэдэ эхэнэрнүүдэй дунда Тиатир хотын Лидия гэжэ нэрэтэй, улаан бүд наймаалдаг Бурханда хүзэглэдэг эхэнэр бидэниие шагнажа байгаа. Дээдын Эзэн Павелай хэлэжэ байһан үгэнүүдые энэ эхэнэрэй дуулажа абахын тула оюун ухаань нээбэ.

¹⁵Тэрэ эхэнэр гэр бүлөөрөө уһаар арюудхуулба, һүүлдэ бидэниие гэртээ уриба. «Дээдын Эзэндэ этигэл дүүрэн байна гэжэ таанад үнэн дээрээ нам тухай бодожо байгаа һаа, минии гэртэ ерэжэ байрлагты», – гэжэ тэрэ хэлээд, бидэниие үгэдөө оруулба.

Павел Сила хоёр түрмэ соо

¹⁶Нэгэтэ мүргэлэй газар ошожо ябаханда бидэ ерээдүйе уридшалан хэлэдэг хүлдэдэ барюулһан зараса эхэнэртэй уулзаабди. Тэрэ эхэнэр хүнэй саашадахи хуби заяа хэлэжэ үгөөд, өөрынгөө эзэдтэ ехэхэн мүнгэ асардаг байгаа.

¹⁷Тэрэ эхэнэр Павелые болон маанадые дахажа: – Эдэ зон Дээдын Бурханай зарасанар гээшэ. Эдэ таанадта абаралгын харгы зам тухай айладхана, – гэжэ ооглон хүхирдэг бэлэй.

¹⁸Тэрэ эхэнэр олон үдэрэй үргэлжэдэ иимэ маягаар хүхиржэ байгаа. һүүлэй һүүлдэ Павел тэсэжэ ядаад, гэдэргээ хаража, тэрэ хүлдэдэ хандан: – Иисус Христосой нэрээр энэ эхэнэрһээ гара гэжэ шамда захирнаб, – гэбэ. Тэрэ хүлдэнь дары гаража талиигаа бэлэй.

¹⁹Харин мүнгэ олохо найдабарияа гээһэн тэрэ зараса эхэнэрэй эзэд Павел Сила хоёрые барижа, хотын талмай тээшэ захирагшадта абаашаба ха.

²⁰Захирагшадта тэдэниие асараад: – Эдэ еврейнүүд манай хото үймүүлнэ,



²¹римэй эрхэтэн маанадай сахиха ёһогүй, гүйсэдхэхэ аргагүй ёһо заншалнуудые айладхан, сахигты гэжэ баадхана, – гэжэ хэлэбэ.

²²Тиимэхээ сугларһан олон зон баһа Сила Павел хоёрой урдаһаа үһөөрхэн бодобо. Захирагшад тэдэ хоёрой хубсаһа хуулан хаяжа, модоор тэдэниие хэһээгты гэжэ захирба.

²³Тэдэниие зада сохёод, түрмэдэ хаагаад, найнаар хахижа байхыень түрмын харуулшада захирбад.

²⁴Иимэ захиралта абаһан харуулшан тэдэ хоёрые доторхи түрмэдэ оруулжа, хүлнүүдыень хулуудада һуулгаба.

²⁵Һүниин тэн багаар Павел Сила хоёрой Бурханда зальбаржа, Бурханиие алдаршуулһан дуунуудые дуулажа байхадань, хаалтада байһан бусад зон тэдэниие шагнажа байгаа.

²⁶Гэнтэ газар ехээр хүдэлжэ, түрмын гэр иишэ тиишээ найгалзан хэлбэлзэбэ. Тэрэ дороо түрмын бүхы үүдэнүүд нээгдэжэ, хаалтада байһан зоной гэнжэнүүдынь мултаран унаба.

²⁷Түрмын харуулшан һэрижэ, нээлтэтэй түрмын үүдэнүүдые харахадаа, хаалтын зон тэрьедэбэ гэжэ һанаад, бэеэ хорлохо һанаатайгаар һэлмээ гаргаба.

²⁸– Бэеэ бү хорло! Бидэ булта эндэ байна ха юмбибди, – гэжэ Павел шангаар хашхарба.

²⁹Харуулшан гал асархые гуйгаад, түрмэдэ гүйжэ ороод, шэшэрһэн юумэн Павел Сила хоёрой хүлдэ дохин унажа:

³⁰– Эзэдни, абарагдахын тула би юу хэхэ ёһотой гээшэбиб? – гэжэ тэдэ хоёрые гаргаха зуураа һураба.

³¹– Дээдын Эзэн Иисуста этигэ, тиигэбэл ши өөрөө, шинии гэр бүлэ абарагдаха, – гэжэ тэдэ харюусаба.

³²Үнөөхи харуулшанда, тэрэнэй гэр бүлэдэ Павел Сила хоёр Дээдын Эзэнэй үгэ номнобо.



³³Орой хүни харуулшан тэдэниие түрмэхөө гаргажа, шархануудыень угаагаад, гэр бүлөөрөө уһаар арюудхуулба.

³⁴Тэрэ харуулшан Павел Сила хоёрые гэртээ асаржа, урдань хоол табиба. Бурханда хүзэглэхэндөө бүхы гэр бүлөөрөө баяртай байбад.

³⁵Хойто үдэрынь римэй захирагшад тэрэ хүнүүдые таби гэхэн захиралтатайгаар сэрэгшэдээ эльгээбэ.

³⁶Харуулшан захиралтыень Павелда дамжуулба: – Захирагшад таанадые табиха гэхэн захиралта үгэбэ. Мүнөө эндэхээ гаража ошоходотнай болохо.

³⁷– Римэй эрхэтэн маанадые зарга шүүбэриггүй зоной урда модоор хэхээжэ, түрмэдэ хаяһан аад, мүнөө нюусаар намнаха ханаатай байна гү? Үгы даа! Өһөдөө ерэжэ, бидэниие эндэхээ гаргаг! – гэжэ Павел харуулшанда хэлэбэ.

³⁸Сэрэгшэд Павелай хэлэхые захирагшадта дамжуулба. Тэдэнь Павел Сила хоёрой римэй эрхэтэн байһыень мэдэхэдээ, айжа хүрдэбэ.

³⁹Захирагшад ерэжэ хүлисэл гуйгаад, түрмэхөө гаргаад, хотоһоо гаража ошохыень гуйба.

⁴⁰Павел Сила хоёр түрмэхөө гараад, Лидиягайда ошобо. Тэндэ аха дүүнэртэйгөө уулзажа, тэдэнээ урмашуулаад, хотоһоо гаража ошобод.

Элшэнэрэй бүтээһэн хэрэгүүд 17

Павел Сила хоёр Фессалоники хотодо

¹Павел Сила хоёр Амфиполь, Аполлони хотонуудаар дайраад, Фессалоники хото хүрэхэ ерэбэ. Тэндэ мүргэлэй гэр бии һэн.

²Павел урдынгаа заншалаар тиишэ орожо, гурбан субботын туршада Нангин Бэшэгһээ жэшээнүүдые дурдан,

³Бурханай табисууртын ехэ зоболон дабажа, һүүлдэнь амидырха ёһотой байһан тухай тэдэ зоние хургаба. «Минии таанадта хөөрөжэ

байгаа Иисус эгээл тэрэ Бурханай заяаһан Абарагша юм», – гэжэ тэрэ хэлэбэ.

⁴Мүргэлэй гэртэ байһан хүнүүдэй зариманиинь этигэжэ, Павел Сила хоёртой нэгэдэбэ. Тэдэнһээ гадна ори ганса Бурханиие хүндэлдэг олон тоото грегүүд, нэрэ хүндэтэй эхэнэрнүүд Дээдын Эзэндэ хүзэглөө бэлэй.

⁵Гэбэшье еврейнүүд атаархан зэбүүрхэжэ, гудамжын үгытэй зоной дундаһаа хэдэн хара һанаатай хүнүүдые шэлэжэ, олон зоние суглуулаад, хотынхидой дунда худхалая хуймаа гаргаба. Тэдэ зон Павел Сила хоёрые олоод, зоной урда шиидхэхын тула Ясоной гэртэ сүмэрэн оробо.

⁶Тэдэ хоёрые оложо ядахадаа, тэдэнэр Ясониие, баһа хэдэн хүзэглэгшэдые хотын захирагшадта шэрэжэ абаашаад: – Эдэ оршолон дэлхэйе үймүүлһэн зон гээшэ, мүнөө манай хотодо ерээд байна, – гэжэ хашхаралдаба.

⁷– Ясон тэдэниие гэртээ байрлуулаа. Ондоо хүниие, Иисусые хаан гэжэ нэрлэхэдээ, тэдэнэр римэй хаанай зарлигые буруушаана.

⁸Эдэ бүхэниие дуулахадаа хотын захирагшадшье, хүн зоншье айн хүрдэбэ.

⁹Ясоной, бусад хүзэглэгшэдэй барюулга орхиходонь лэ тэдэниие табиһан байгаа.

Павел Сила хоёр Бери хотодо

¹⁰Һүни болохотой сасуу хүзэглэгшэд Павел Сила хоёрые Бери хото руу ябуулба. Хото хүрэжэ ерээд, тэдэ хоёр мүргэлэй гэртэ ошобо.

¹¹Энэ хотын зон Фессалоникиинхидтэ ороходоо Бурханай үгэ үлүү ехээр шагнаха дуратай байжа, номнол анхаралтайгаар хүлеэн абаад, Павел Сила хоёрой хэлэһэниинь үнэн гү гэжэ мэдэхын тула Нангин Бэшэгые үдэр бүхэн шудалжа байба.

¹²Тиигэжэ тэдэ зоной олониинь этигээ бэлэй. Тэдэнэй дунда олон нэрэ хүндэтэ грек эхэнэрнүүд, эрэшүүл байгаа һэн.

¹³Гэбэшье Фессалоникидэ ажаһуудаг еврейнүүд Бурханай үгэ Бери хотодошье Павел номноно гэжэ дуулахадаа, баһа тиишэ ошожо, хүн зониие үймүүлэн хүлгөөбэ.

¹⁴Һүзэглэгшэд дары Павелые далай хүргэжэ ошобо, харин Сила Тимофей хоёрынь Беридэ үлэбэ.

¹⁵Павелые үдэшэһэн хүнүүд тэрэниие Афины хото хүргөөд, Сила Тимофей хоёр аргатай байбал түргөөр ерэг гэхэн Павелай захиралта абамсаараа һөөргөө бусаба.

Павел Афины хотодо

¹⁶Павел тэрэ хоёроо Афины хотодо хүлээжэ байхадаа, хотоор дүүрэн бодхоогдоһон онгонуудые хаража гашуудаба.

¹⁷Тэрэ мүргэлэй гэртэ еврейнүүдтэй болон бусад арадуудай дундаһаа Бурханда хүзэглэһэн зонтой, мүн талмай дээрэ уулзаһан хүн бүхэнтэй үдэр бүри хөөрэлдэдэг байгаа һэн.

¹⁸Эпикур болон стоик һургаалай философууд тэрээнтэй уулзажа: – Энэ хоһон үгэтэй хүн юу хэлэхэ һанаатай байнаб? – гэжэ нэгэ зариманиинь хэлсэжэ байба. – Үгы, энэшни хариин бурхадууд тухай номноно ха, – гэжэ нүгөөдүүлэнь хэлэжэ байба. Юундэ тиигэжэ хэлсээб гэхэдэ, Павел Иисус тухай, тэрэнэй амидыралга тухай номноһон байгаа.

¹⁹Философууд Павелые Ареопаг хүтэлжэ абаашаад: – Шинии номножо байһан шэнэ һургаалые маанадта шагнажа болохо гү? – гэжэ һурабад.

–

²⁰Ши нэгэл жэгтэй һонин юумэ бидэндэ дуулгажа байнаш. Тиимэхэ энэшни юун ааб гэжэ бидэ мэдэхэ һанаатайбди.

²¹Афины хотынхид, тэндэ ажаһуугша хариин зон шэнэ үзэлнүүдые шагнан, тэдэниие зүбшэн хэлсэхээр лэ сүлөө сагаа үнгэргэдэг байгаа.

²²Павел Ареопагай дунда зогсожо: – Афинынхин, таанарай аргагүй хүзэгтэй зон байхые би ажаглажа байнаб.

²³Юундэб гэхэдэ, танай мүргэл шүтөөнүүдые хаража байхадаа, «мэдэгдээгүй Бурханда» гэжэ бэшээтэй үргэлэй шэрээ би оложо харааб. Танай мэдээгүй аад, шүтэжэ мүргэжэ байгаа эгээл тэрэ Бурхан тухай би танда номножо байнаб.

²⁴Юртэмсэ дэлхэйе, тэрээн дээрэ оршодог хамаг юумэ бүтээһэн Бурхан газар тэнгэрийн Эзэн юм, гараар бодхоогдоһон хүмэдэ амидардаггүй юм.

²⁵Хүнэй ямаршые туһаламжа Бурханда хэрэггүй. Тэрэ өөрөө амитай бүхы юумэндэ ами наһа, амисхал, бүгэдые үгэнэ гээшэ.

²⁶Бүхы дэлхэйгээр нютагжахын тула амидарха саг болзорыень болон байрлаха хилэ хизаарыень тогтоон, ори ганса хүнһөө бүхы хүн түрэлхитэниие тэрэ бүтээгөө юм.

²⁷Бурхан хүн бүхэнһөөмнай холо бэшэ гэжэ мэдэрэн, тэрэниие бэдэржэ олохын тула эдэ бүгэдые зохёогоо юм.

²⁸«Бидэнэр Бурханай ашаар амидаржа, хүдэлжэ, ажаһуужа байнабди». Танай шүлэгшэдэй зариманиинь баһал: «Бидэ тэрэнэй угсаатан гээшэбди», – гэжэ хэлээ бэлэй.

²⁹Хэрбээ бидэ Бурханай угсаатан юм наа, Бурхан гээшэмнай хүнэй ханаашалгаар алтаар гү, али мүнгөөр гү, али шулуугаар дүрсэлһэн уран бүтээлэй юумэн гэжэ бодохо ёһогүйбди.

³⁰Бурханиие мэдээгүй сагта Бурхан эдэ бүгэдые хүнүүдтэ хүлисэдэг байгаа. Харин мүнөө хаа хаанагүй ажаһуудаг хүн зониие нүгэл үйлэдэхээ болихыень Бурхан захирна,

³¹юундэб гэхэдэ, Бурхан юртэмсэ дэлхэйе үнэн зүб зарга шиидхэбэрээр шүүхэ үдэрөө тогтоогоо, тиин Зарга шүүгшээ тэрэ томилон табяа.

Тэрэниие Бурхан амидыруулжа, бүхы хүнүүдтэ гэршэ баримта болгон үгөө ха юм.

³²Үхэхэн хүнүүдые амидыруулһан тухай дуулахадаа, нэгэ зарим зон ташаганаса энеэлдэбэ, нүгөө зариманиинь: – Бидэ шамайе үшөө дахин шагнуужамди, – гэлдэбэ.

³³Тиихэдэнь Павел тэдэниие орхижо ошоо.

³⁴Гэбэшье хэдэн хүн Дээдын Эзэндэ этигэжэ, Павелай шабинар болобо. Тэдэнэй дунда Ареопагай гэшүүн Дионисий, Дамарида гэжэ нэрэтэй эхэнэр болон бусадшье зон байгаа бэлэй.

Элшэнэрэй бүтээһэн хэрэгүүд 18

Павел Коринф хотодо

¹Эдэ бүхэнэй һүүлдэ Павел Афиныһаа Коринф хото хүрэжэ ерэбэ.

²Тэндэ Павел Понтоо уг гарбалтай Аквила гэдэг еврейтэй, тэрэнэй Прискилла һамгатай уулзаа бэлэй. Клавдий хаанай бүхы еврейнүүдтэ Рим хотые орхижо ошохыень захирһан хада тэдэ һаял Италиһаа ерэнэн байба. Павел тэдэнэйдэ айлшалба.

³Тиигээд нэгэ ажал урлалгатай байһан тула Павел тэдэнээр суг хүдэлбэ. Тэдэнэр майхануудые хэдэг байгаа.

⁴Павел еврейнүүдыешье, грегүүдыешье этигүүлхэеэ оролдон, суббото бүхэн мүргэлэй гэртэ номнодог бэлэй.

⁵Сила Тимофей хоёрой Македониһоо ерэхэдэнь, Павел һайн Мэдээсэл номноходо өөрыгөө бүрин зорюулжа, Иисус гээшэмнай Бурханай табисуурта гэжэ еврейнүүдтэ баталан гэршэлжэ байгаа.

⁶Теэд тэдэ зоной арсалдажа, хэрүүл татахадань, Павел өөрынгөө хубсаһа гүбезд: – Бурханай абаралгаһаа арсажа байһандаа таанад өөһэдөө зэмэтэйт. Би зэмэгүйб, тиин мүнөө бусад арадуудта ошохомни, – гэжэ хэлэбэ.



⁷Тэдэ зониие орхижо, Павел Бурханда хүзэглэдэг Титий Юст гэдэг хүнэй гэртэ ошобо. Энэ хүнэй гэрынь мүргэлэй гэрэй хажууда байдаг һэн.

⁸Крисп гэжэ нэрэтэй мүргэлэй гэрэй дарга бүхы гэр бүлөөрөө баһа Дээдын Эзэндэ этигэһэн байгаа. Тиин номнол дуулаһан олон коринфууд баһал этигэжэ уһаар арюудхуулһан байгаа.

⁹Нэгэтэ хүни Павел Дээдын Эзэниие үзэгдэлдөө хараба. Дээдын Эзэн: – Бү ай, саг үргэлжэ номножо бай.

¹⁰Би шамтай байнаб, хэншье шамда хоро хүргэхэгүй, юундэб гэхэдэ, энэ хотодо минии хүнүүд олон бии, – гэжэ хэлэбэ.

¹¹Тиимэһээ Павел тэндэ жэл хахад соо Бурханай үгэ номножо байба.

¹²Ахайя можын захирагшаар Галлиониие табихада, еврейнүүд хоорондоо үгэсөөд, Павелай урдаһаа бодожо, тэрэниие сүүдлэхээ шэрэжэ асарба.

¹³– Энэ хүн манай хуулида хэлэгдээгүй ёһоор Бурханда мүргэгты гэжэ хүнүүдые үгэдөө оруулжа байна, – гэлдэбэ тэдэ.

¹⁴Павелай амаа нээжэ үрдеэгүй байтар, Галлион еврейнүүдтэ хандажа: – Ай, еврейнүүд, хэрбээ ямар нэгэн гэмтэ ябадал гү, али муу үйлэ тухай хэлэбэлтнай, би таанадые шагнаха байгаа.

¹⁵Харин үгэнүүдһээ, нэрэ алдарһаа боложо, өөһэдынгөө хуулиин асуудалнуудаар арсалдаа юм бол, өөһэдөө шиидхэгты. Энэ асуудалаар танай заргаша байха аргамгүй, – гэбэ.

¹⁶Тиигэжэ хэлээд, Галлион заргын газарһаа тэдэ еврейнүүдые намнажархиба.

¹⁷Харин тэдэнь мүргэлэй гэрэй дарга Сосфендэ добтолон орожо, зарга шиидхэдэг газарай урда тээ тэрэниие зада наншаба. Гэбэшье Галлион эдэ бүгэдые ойндоо абаагүй.

Павел Антиох хото бусажа ерэбэ



¹⁸Павел үшөө олон үдэр тэндэ байгаад, удаань аха дүүнэртэйгөө хахасан, Прискилла Акила хоёрые абаад, Сирийн орон нютаг тамаран ошобо. Хэзээ нэгэтэ үгэһэн дашаа тангаригайнь болзор дүүрэжэ, Павел Кенхрейдэ үһеэ абхуулаа.

¹⁹Эфес хото тамаржа ерэхэдээ, Павел нүхэдөө орхёод, мүргэлэй гэртэ ошожо, еврейнүүдтэй хөөрэлдэбэ.

²⁰Тэрэниие үлыт даа гэжэ еврейнүүдэй гуйхадань, тэрэ зүбшөөбэгүй. –

²¹Ойртожо байгаа найндэрые би заатагүй Иерусалимда үнгэргэхэ ёһотойб. Хэрбээ Бурханай хүсэбэл, би таанадта дахин бусажа ерэхэб, – гэжэ хэлээд, тэдэнтэй хахасан, Эфесхээ тамаран ошобо.

²²Тэрэ Кесари хүрэжэ ерээд, тэндэһээ Иерусалим зорёо бэлэй. Тэндэ хүзэглэгшэ зонтой уулзаад, Антиох ошоо хэн.

²³Хэдэн саг Антиохдо байһанайнгаа һүүлдэ Павел замдаа мордожо, бүхы Галадай болон Фригийн нютагуудаар ябажа, шабинарай этигэлые батадхан бэхижүүлбэ.

Аполлос гэдэг хүн Эфес ба Коринф хотонуудта

²⁴Александриһаа уг гарбалтай Аполлос гэдэг еврей хүн Эфес хотодо бии болоо хаш. Тэрэ ехэ уран хэлэтэй, Нангин Бэшэг найн мэдэдэг хэн.

²⁵Аполлос Дээдын Эзэн тухай хургаалые дуулаһан байгаа. Гансал Иоаннай уһан арюудхалга мэдэжэ байһаншые мүртөө ехэ оролдосотойгоор, үнэн зүбөөр Иисус тухай хургадаг хэн.

²⁶Тэрэ хүн мүргэлэй гэртэ зоригтойгоор номножо эхилбэ. Прискилла Аквила хоёр тэрэниие шагнаад, гэртээ урижа, Бурханай зам тухай тэрээндэ бүри тодорхойгоор хөөрэжэ үгэбэ.

²⁷Тэрэнэй Ахайя ошохо гэжэ шиидэхэдэ, тэрэниие угтажа абахыень гуйһан бэшэг аха дүүнэр тэндэхи шабинарта бэшээ бэлэй. Ахайя ерээд, Бурханай үршөөлөөр хүзэглэһэн зондо Аполлос ехэ туһалба.

²⁸Юуб гэхэдэ, тэрэ олон зоной дунда еврейнүүдтэй заргалдан, тэдэниие буруушаажа, Нангин Бэшэгһээ хэһэгүүдые хэрэглэн, Иисус гээшэмнай Бурханай табисуурта мүн гэжэ баталжа байгаа.

Элшэнэрэй бүтээһэн хэрэгүүд 19

Павел Эфес хотодо

¹Аполлосой Коринфда байха үедэ Павел Галадай ба Фригийн газар дайдые дабан, Эфес хүрэжэ ерэхэдээ, хэдэн шабинартай уулзаа бэлэй.

²Тэдэнтэй хөөрэлдэжэ байхадаа Павел: – Һүзэглэхэдөө таанад Нангин Һүлдые тогтоон абаа һэн гүт? – гэжэ һураба. – Бидэ Нангин Һүлдэ тухай ойро наашашье дуулаагүй байнабди, – гэжэ тэдэнь харюусаба.

³– Тиихэдээ таанад ямар уһан арюудхалда хүртэбэ гээшэт? – Иоаннай уһан арюудхалда хүртэһэн байгаабди.

⁴– Хүнүүдэй нүгэл хэхээ болихын тула Иоанн уһаар арюудхаа юм. Тиихэдээ минии хойноһоо заларжа ябаа хүндэ, ондоогоор хэлэбэл Иисуста, таанад этигэхэ ёһотойт гэжэ Иоанн хүнүүдтэ хэлэдэг байгаа, – гэжэ Павел тэдээндэ хэлэбэ.

⁵Энээн тухай мэдэхэдээ, тэдэ шабинар Дээдын Эзэн Иисусай нэрэ алдараар уһан арюудхалда хүртэбэ.

⁶⁻⁷Павелай тэдэ арбан хоёр оршом шабинар дээрэ гараа табихадань, Нангин Һүлдэ тэдэндэ буужа, тэдэ элдэб хэлэнүүд дээрэ дуугаржа, номножо эхилбэ.

⁸Павел гурбан һарын үргэлжэдэ мүргэлэй гэртэ ерэжэ, заргалдан, Бурханай хаан орон тухай зоригтойгоор хөөрөжэ, баталан һургажа байба.

⁹Зарим хүнүүдэй зүрью зан гаргажа, этигэхэ дурагүй байхадань, Дээдын Эзэнэй замые зоной дунда хардажа эхилхэдэнь, Павел шабинартайгаа тэдэниие орхижо ошобо. Тиигээд Павел Тиранн гэдэг хүнэй һургуулида үдэр бүри номнодог болобо.

¹⁰Тиигэжэ хоёр жэлэй турша соо Аси можодо ажаһуудаг еврейнүүдшье, грегүүдшье Дээдын Эзэн тухай соносожо байгаа бэлэй.

Скевын хүбүүд

¹¹Бурхан Павелай гараар олон гайхамшагта хэрэгүүдые бүтээбэ.

¹²Павелай нюурай аршуул гү, али хормойбшо үбшэн зондо асархадань, тэдэнь эдэгэжэ, ада шүдхэрнүүд бөөһөөнь гаража, тониолон ошодог байгаа.

¹³Тиихэдэ ада шүдхэрнүүдые дарадаг зарим еврей тэнүүлшэд ада шүдхэртэ барюулһан хүниие аргалхадаа Дээдын Эзэн Иисусай нэрэ дурдадаг болобо. «Павелай номножо байһан Иисусай нэрээр таанадта захирнаб», – гэжэ тэдэ хэлэдэг байгаа.

¹⁴Еврейнүүдэй ахамад санаарта Скевын долоон хүбүүд баһал тиигэжэ захирба.

¹⁵Гэбэшье ада шүдхэр тэдэндэ: «Би Иисусые мэдэнэб, Павелыешье би танинаб. Харин таанад хэд гээшэбта?» – гэбэ.

¹⁶Тиигээд ада шүдхэртэй хүнэй тэдэндэ добтолжо, бултыень наншахада, тэдэнь салдаган шархатаһан юумэд гэрһээ зугадан гүйлдэбэ.

¹⁷Энэ ушар тухай Эфес хотодо ажаһуудаг еврейнүүд, еврей-бэшэнэр баран дуулаа бэлэй. Тэдэ булта айн хүрдэжэ, Дээдын Эзэн Иисусай нэрэ хүндэлжэ эхилбэ.

¹⁸Һүзэглэһэн зоной олонхинь хэһэн элдэб шэбшэлгынгээ муу ёрые мэдэрэн, тэрээн тухайгаа хүн зондо хөөрөжэ үгэбэ.

¹⁹Эльбэ жэльбэ хэрэглэдэг зарим зон номуудаа асаржа, хүн зоной урда галда шатаагаа бэлэй. Тэдэ номуудай сэнгыень тоолоходо, тэдэнь таби мянган мүнгэнэй сэнтэй байшаба.

²⁰Иимэл хүсэ эршэтэйгээр Дээдын Эзэнэй үгэ таража, олон хүнүүд һүзэглэжэ байба.

Эфестэ болоһон үймөөн



²¹Эдэ ушарнуудай һүүлдэ Павел Македониин ба Ахайяын нютагуудаар ябажа, Иерусалим ошохо гэжэ шиидэбэ. – Удаань би Рим хүрэхэ ёһотойб, – гэжэ Павел хэлэбэ.

²²Тэрэ Тимофей Эраст хоёр туһалагшадаа Македони эльгээжэ, өөрөө халта зуура Аси можодо үлэбэ.

²³Тэрэ үедэ Дээдын Эзэнэй замһаа боложо ехэхэн арсалдаан хөмороон гараба.

²⁴Мүнгөөр урлагша Димитрий гэдэг хүн Артемидын хүмын мүнгэн дүрсэнүүдые бүтээдэг байгаа. Тэрэнэй ашаар бусадшые олон урладаг зон бага бэшэ олзо олодог бэлэй.

²⁵Димитрий тэдэниие, мүн ондоошые урлагшадые суглуулаад: – Эрэшүүл аа, энэ урлал ажалһаа манай ажабайдал дулдыдана гэжэ таанад һайн мэдэнэт.

²⁶Павелай гансашые Эфес хотодо бэшэ, харин бүхы Асида номнолоороо олон зоной тархи толгой эрьюуһыень таанад хаража дуулажа байгаа бэээт. Гараар бүтээгдэһэн юумэн бурхан байжа шадахагүй гэжэ тэрэ хэлэнэ.

²⁷Энээнһээ боложо манай урлал ажал хэндэшые хэрэггүй болохоһоо гадна, агууехэ бурхан Артемидыншые хүмэ хэрэггүй болохо аюул тохёолдохоёо байна. Тиигэбэл бүхы Асиин болон юртэмсын шүтэжэ байһан бурханай хүр жабхалангынь буураха бшуу, – гэжэ хэлэбэ.

²⁸Хэлэһыень дуулаһан зон хоро шараяа ехээр бусалжа: – Эфесэй Артемида алдаршаһай! – гэжэ хашхаралдаба.

²⁹Хотынхид үймөө буһалгаа татажа, Павелай замай нүхэд болохо Македониин Гай Аристарх хоёрые театр руу шэрэбэ.

³⁰Павелай өөрөө тэдэ зоной урда гараха гэхэдэнь, шабинарынь тэрэниие табибагүй.

³¹Аси можын зарим захирагшад Павелай нүхэд байһан дээрһээ театр ошохоһоонь тэрэниие һэргылэн хүнүүдые эльгээгээ бэлэй.

³²Театрта сугларһан зоной зариманиинь нэгэ юумэ һүхиржэ, нүгөөдүүлһынь ондоо юумэ хашхаржа байба. Суглаанай эмхи гуримгүй үнгэржэ байхада, тэндэ байһан зоной олонхинь юундэ сугларһанаашье ойлгонгүй байба.

³³Тиимэһээ сугларһан зоной зариман Александр гэжэ нэрэтэй хүндэ юу боложо байһые тайлбарила гэхэн эрилтэ табиба. Александрые еврейнүүд өөһэдынгөө дундаһаа түлхижэ урагшань гаргаһан байгаа. Тэрэ шэмээгүй бологты гэжэ гараараа харуулаад, бэеэ сагааруулха һанаатай байхадань,

³⁴тэрэниие еврей байна гэжэ мэдэхэдээ, зон нэгэн дуугаар: «Агууехэ Эфесэй Артемида алдаршаһай», – гэжэ хоёр сагай туршада зогсонгүй хашхаралдаба.

³⁵Һүүлэй Һүүлдэ хотын захирагшадай нэгэн зониие номгоруулжа: – Эфесэй эрхэтэн! – гэжэ хандаба. – Эфес хото агууехэ бурхан Артемидын һүмые, огторгойһоо унаһан нангин шулууе хамгаалан сахигша хото гэжэ мэдэхэгүй хүн олдого аал?

³⁶Энэ арсашагүй баримта юм, тиимэһээ таанад номгоржо, үймэлдэхэ шууялдаһаяа болигты.

³⁷Таанадай иишэнь шэрэжэ асарһан зон һүмэ дээрмэдээгүй, тиихэдэ Артемида бурханииемнайшье муудхаагүй ха юм.

³⁸Хэрбээ Димитрий болон тэрээнтэй ерэхэн урлагшадай хэн нэгэниие зэмэлээ һаань, заргашада гү, али захирагшадта гэмнэлгэ нэхэбэритэйгээ хандаг лэ.

³⁹Хэрбээ бүри шухала юумэ нэхэбэлтнай, хэрэгтнай хуулиин ёһоор зарлагдаһан эрхэтэнэй суглаан дээрэ шиидхэгдэхэ.

⁴⁰Үгы һаа, бидэниие үймөө татаа гэжэ зэмэлхэдээ болохо, яахадааб гэбэл, мүнөөдэр юундэ эндэ сугларһанаа бидэ тайлбарилжа

шадахагүйбди, юугээршые өөһэдыгөө сагааруулха аргагүйбди. Иигэжэ хэлээд, тэрэ захирагша сугларһан зоние тарааба.

Элшэнэрэй бүтээһэн хэрэгүүд 20

Павел Македони болон Ахайя руу зорибо

¹Үймөөнэй үнгэрһэн хойно Павел шабинараа суглуулжа урмашуулан зоригжуулаад, тэдэнтэйгээ хахасажэ, Македони ошобо.

²Македониин газараар ябахыдаа, Павел хүзэглэгшэ зонтой оло дахин хөөрэлдэжэ, тэдэниие зоригжуулжа байба. Һүүлэй Һүүлдэ тэрэ Эллада хүрэжэ ерээд,

³тэндэ гурбан һара байба. Элладаһаа Сири тамаран ошохо һанаатай байхадань, еврейнүүд эсэргүү нюуса хэлсээ зохёобо гэжэ мэдэхэдээ, Павел дахин Македонёор ябаад, һөөргөө бусаха гэжэ шийдэбэ.

⁴Тэрэниие харгыдань Бери хотодо түрэхэн Пиррэй Сопатр хүбүүн, Фессалоникиин Аристарх ба Секунд хоёр, Дербэхэе уг гарбалтай Гай, Тимофей болон Асиһаа уг гарбалтай Тихик, Трофим гэгшэд дахажа ябаа.

⁵Тэдэнэр урдэмнай орожо, бидэниие Троадада хүлэжэ байгаа.

⁶Харин бидэ Эһээбэригүи Хилээмэн гэдэг һайндэрэй үнгэрһэн хойно Филиппһээ тамаран гаража, табан үдэрэй удаа Троада хүрөөд, тэндэ долоон хоног байгаабди.

Павел һүүлшынхией Троада хотодо байна

⁷Гарагай нэгэндэ, воскресенидэ бидэ бултадаа үдэшын хоол барихаяа суглараа бэлэйбди. Хойто үдэрынь ябахаяа түхээржэ байһан дээрэхэе Павел шабинартайгаа удаан саг соо, һүниин тэн болотор хөөрэлдөө һэн.

⁸Бидэнэй сугларһан дээдэ дабхарай таһалга соо олон дэн аһаалгаатай байгаа.



⁹Евтихий гэжэ залуу хүбүүн сонхын табсан дээрэ хуугаа хэн. Павелай ехэ удаан номножо байхада тэрэ хүбүүн нойртоо диилдэжэ, гурбадахи дабхарай сонхооо унашоо хэн. Шабинарайнь гүйжэ ошоходо, тэрэ үхэшээн байгаа.

¹⁰Гэбэшье Павел доошоо буугаад, дээрэнь тонгойжо, хүбүүе шангаар тэбэрибэ. «Һанаагаа бү зобогты, тэрэ амиды байна», – гэжэ Павел хэлэбэ.

¹¹Бусажа дээшээ гараад, хилээмэ хухалжа эдеэд, Павел үүр сайтар номнобо. Тиигээд гаража ябаа хэн.

¹²Харин үнөөхи хүбүүнэй амидырхадань, бултадаа ехэ баяртай юумэд гэртэнь абаашаа хэн.

Павел Троадаһаа Милет хото руу аяншалба

¹³Бидэ Павелые хүлээнгүй, корабльда хуужа, Асс хото зорёо бэлэйбди. Тэндэ Павелые корабльдаа тодожо абаха ёһотой байгаабди. Павел Асс хүрэтэр ябагаар ошохо гэжэ шиидэһэн байгаа.

¹⁴Тэрэниие Ассста тодожо, корабльдаа хуулгаад, бидэ Мителен тамаржа ерээбди.

¹⁵Мителенһээ гараад, хойто үдэрынь бидэ Хиос хото тамаржа ерээбди. Тэндэһээ гаража нэгэ хоноод, Самос хото ерээбди. Тиигээд Самосхоо гаража нэгэ хоноод, Милет хото хүрэжэ ерээ бэлэйбди.

¹⁶Павел Асида удаан болохогүйн тула, Эфес хото руу зогсонгүй тамарха гэжэ шиидэбэ. Арга байбал, Табидахи үдэрэй хайндэрые Иерусалимда угтаха һанаатай тэрэ ехэл яаралтай ябаа бэлэй.

Павел Эфесэй бүлгэмэй хүтэлэгшэдтэй хөөрэлдэнэ

¹⁷Милет хотодо байхадаа, Павел Эфесэй бүлгэмэй хүтэлэгшэдэй хойноһоо хүнүүдые Эфес хото эльгээбэ ха.

¹⁸Тэдэнэй хүрэжэ ерэхэдэ Павел иигэжэ хэлэбэ: – Асиин газарта ерэхэн түрүүшынгээ үдэрһөө хойшо таанадтай үргэлжэ байһыемни өөһэдөө мэдэнэт.



¹⁹Даруу зантайгаар, нулимсаа гарган, еврейнүүднээ, тэдэнэй зохёонон нюуса хэлсээнүүднээ боложо, хүндэ хүшэр бэрхэшээлнүүдтэ орожо байгаад, Дээдын Эзэндэ яжа алба хэжэ байһыемни таанад баһа мэдэнэт.

²⁰Зонойшье дунда, гэрээршье ябаад таанадые хургахадаа, таанадта туһатай юумэ огто нюудаггүй бэлэйб.

²¹Би еврейнүүдыешье, ондоо яһатаниешье нүгэл хэхээ болижо, Бурханда хандахыень, манай Дээдын Эзэн Иисуста этигэхыень гуйдаг бэлэйб.

²²Харин мүнөө би Нангин хүлдын захиралта дүүргэн, Иерусалим ошожо байнаб, юун намайе тэндэ хүлеэжэ байһые би мэдэнэгүйб.

²³Гэбэшье ямаршье хотодо хүрэжэ ерэхэдэмни, хаанашье байхадамни намайе түрмэ зоболон хоёр хүлеэжэ байна гэжэ Нангин хүлдэ хэлэжэ байдаг.

²⁴Харин би ами наһаяа оройдоошье хайрланагүйб. Бурханай үршөөл хайра тухай һайн Мэдээсэл айладхажа бай гэжэ Дээдын Эзэнэй намда даалгаһан үүргэ гүйсэдхэн, ябаха ёһотой замаараа ябажа түгэсхэбэлни һайн гэшэ.

²⁵Таанадта Бурханай хаан орон тухай номножо байһан намайе дахин харахагүйт гэжэ би мүнөө мэдэнэб.

²⁶Тиимэхээ хэн нэгэнэйтнай абарагдаагүй һаа, би огто зэмэгүйб гэжэ хэлэнэб.

²⁷Юундэб гэхэдэ, Бурханай эрхэ хүсэлые таанадта мэдүүлхэдээ, би юушье таанадһаа нюугаагүйб.

²⁸Нангин хүлдын харууһалжа байхаар таанадта даалгаһан хүрэгөө, өөһэдыгөө анхаржа байгты. хүзэглэгшэ хүнүүднээ бүридэһэн хүрэгөө харууһалжа байгты, юуб гэхэдэ, Бурхан энэ хүрэг хүбүүнэйнгээ шуһанай сэнгээр олоо юм.

²⁹Минии ябаһан хойно таанадта хэрзэгы шононууд ерэжэ, хүрэгыетнай хайрлахагүй гэжэ би мэдэнэб.

³⁰Өөһэдынтнайшые дундаһаа буруу номногшод гаража, шабинарыемни дахуулха.

³¹Тиимэхээ гурбан жэл соо үдэр хүнигүй нулимсаа дуһаан, таанадай хүн бүхэниетнай хургажа байһыемни һанан, һэргэг байгты.

³²Би таанадые Бурханда, Бурханай үршөөл хайра тухай хургаалда даалганаб. Бурханай үршөөл хайра тухай хургаал таанадые үлүү һайн хургажа магадгүй. һүзэглэгшэ зондо бэлдээтэй зөөри зөөшэхөө тэрэ хургаал таанадта баһа үгэхэ.

³³Би алта, мүнгэ, хубсаһа хунар өөртөө олзолхоёо огто һанаагүйб.

³⁴Хара хүлһөөрөө өөрыгөө, замынгаа нүхэдые тэжээдэг байһыемни таанар мэдэнэт.

³⁵Тиигэжэ би таанадта яажа хүдэлхэб, ядуу һула зондо туһалхаб гэхэн жэшээ харуулаа бэлэйб. «Үгэхэнь абахаһаа бүри жаргалтай», – гэжэ Иисусай хэлэһые һанажа ябагты.

³⁶Иигэжэ хэлээд, Павел үбдэглэн һуугаад, бусад зоноор хамта зальбараа бэлэй.

³⁷Булта айхабтар ехээр уйлалдан, Павелые тэбэрижэ таалабад.

³⁸Намае дахин харахагүйт гэжэ хэлэхэн туладань тэдэ ехээр гуниглажа байгаа. Удаань тэдэнэр булта Павелые корабль хүрэтэр үдэшөө һэн.

Элшэнэрэй бүтээһэн хэрэгүүд 21

Павел Иерусалим ошобо

¹Бидэ Эфесэй бүлгэмэй хүтэлэгшэдтэй хахасаһаар Кос арал тамаржа ерээбди, тиигээд хойто үдэрынь Родос арал хүрэжэ, тэндэхээ Патара хото тамараа бэлэйбди.



- ²Патарада бидэ Финики ошохо корабль оложо нуугаабди.
- ³Кипр аралые зүүн таладаа орхижо, Сири тээшэ тамарбабди, тиигээд корабльнай ашаагаа буулгахаяа Тир хотодо зогсоо бэлэй.
- ⁴Тиртэ бидэ шабинарые оложо, тэдэнтэй долоо хонообди. Тэдэ шабинар Павелые Иерусалим бү ошыш даа гэжэ гуйба, юундэб гэхэдэ, Нангин хүлдэ тэдэндэ тиигэжэ захиһан байна.
- ⁵Долоон хоногой үнгэрхэдэ замдаа гарахадамнай, хүзэглэгшэд эхэнэр үхибүүдээрээ суг бидэниие корабль хүрэтэрнай үдэшөө һэн. Эрье дээрэ бидэ үбдэглэн нуужа зальбараад,
- ⁶хахасажа, корабльдаа нуубабди, хүзэглэгшэд гэртээ бусаба.
- ⁷Тир хотоһоо бидэ Птолемаида хото хүрэтэр тамаржа ерээд, эрье дээрэнь буужа, хүзэглэгшэ аха дүүнэртээ айлшалан, тэдэнэйдээ нэгэ хоноо һэмди.
- ⁸Хойто үдэрынь бидэ Кесари хото хүрэжэ, һайн Мэдээсэл номнодог долоон туһалагшадай нэгэн болохо Филиппэй гэртэ зогсоо бэлэйбди.
- ⁹Тэрэ хадамда гараагүй дүрбэн басагатай һэн. Басагадынь булта лүндэншэд байгаа.
- ¹⁰Тэрэнэйдэ хэдэн үдэр байһанаймнай һүүлээр Агав гэжэ нэрэтэй лүндэншэн Иудейһээ ерээ.
- ¹¹Агав манай байһан газарта ерэжэ, Павелай бүһэ абажа, хүл гараа хүлеэд: – «Энэ бүһын эзэниие еврейнүүд Иерусалимда иигэжэ хүлеэд, бусад арадуудта тушааха» гэжэ Нангин хүлдэ хэлэжэ байна, – гэбэ.
- ¹²Энээниие дуулахадаа бидэшье, эндэхи хүзэглэгшэдшье бултадаа Павелые Иерусалим бү ошыш даа гэжэ гуйгаа бэлэйбди.
- ¹³Тиихэдэмнай Павел: – Үгы, яана гээшэбта? Юундэ уйлалдажа бархиралдажа, минии зүрхэ сэдхэлые зобооно гээшэбта? Би Иерусалим ошоод, хүлюулхэхээ гадна, Дээдын Эзэн Иисусай нэрэ алдарай түлөө үхэхээшье бэлэнби, – гэжэ харюусаба.



¹⁴Павелые үгэдөө оруулха аргагүй байһанаа ойлгоходоо, бидэ аргадахаяа болижо: – Дээдын Эзэнэй эрхэ мэдэлээр лэ болог даа! – гэлсээ бэлэйбди.

¹⁵Хэдэн үдэрэй үнгэрхэдэ бидэ харгыдаа түхээржэ, Иерусалим тээшэ зорёо һэмди.

¹⁶Бидэнэрээр суг Кесариһаа хэдэн шабинар ябалсаа һэн. Тэдэнэр бидэниие Кипрһээ уг гарбалтай, түрүүшын шабинарай нэгэн болохо Мнасон гэжэ хүнэйдэ абаашаха байгаа. Бидэ тэрэнэйдэ зогсохо ёһотой байгаабди.

Павел Яковтай уулзана

¹⁷Иерусалим хүрэжэ ерэхэдэмнай, аха дүүнэрнай бидэниие ехэ дулаанаар угтажа абаа.

¹⁸Хойто үдэрынь Павел бидэнэрээр суг Яковта ошоо һэн. Ошоһон газартань бүлгэмэй хүтэлэгшэдшье булта суглараа ха.

¹⁹Тэдэниие мэндэшэлээд, бусад арадуудай дунда Бурханай тэрээгээр хүүлэһэн юумэнүүд тухай Павел тодорхойгоор хөөрөжэ үгэбэ.

²⁰Тэрэниие шагнаад, сугларагшад Бурханиие магтан алдаршуулба, һүүлдэнь: – Павел аха, олон мянган еврейнүүдэй этигэжэ, Хуули ханамжатай найнаар сахижа байһые ши харана гүш?

²¹Тэдэ зон шам тухай: «Тэрэ бусад арадуудай дунда ажаһуудаг еврейнүүдые Моисейн Хуулиһаа холодуулан, хүбүүдээ бү отолуулагты, ёһо гуримуудаа бү сахигты гэжэ нургана», – гээд хэлсэнэ.

²²Яаха гээшэб? Хүн зон ерэхэн тухайшни заатагүй дуулаха.

²³Тиимэхээ манай хэ гэхэн юумые хэ даа. Бурханда тангариг үгэхэн дүрбэн хүн эндэ бии юм.

²⁴Тэдэнэрээр хамта ошожо, заншалай ёһоор өөрыгөө арюудха, тиигээд үһөө абхуулха мүнгэ тэдэндэ үгөөрэй. Тиигэбэл ши Хуули сахинаш гэжэ, шам тухай дэмы юумэ шашалдана гэжэ булта ойлгохо.

²⁵Бусад арадуудай дундаһаа Христосто хүзэглэһэн зон тухай хэлэбэл, тэдэ бидэнэй урдань бэшэһэн захиралтые дүүргэхэ ёһотой: тэдэ ондоо бурхадта үргэһэн эдеэ хоол, шуһа болон боожо алаһан амитадай мяха эдихэ ёһогүй, забхайралдаха ёһогүй.

²⁶Хойто үдэрын Павел тэдэ дүрбэн хүнүүдээр хамта өөрыгөө арюудхаха, арюудхалгын ёһололой дууһаха үдэрые дуулгаха гэжэ Бурхан хүмэдэ оробо. Тэрэ үдэр тэдэ зон өөһэдынгөө түлөө үргэл хэхэ ёһотой байгаа.

Павелые хүмэ соо бариба

²⁷Үлэһэн долоон үдэрэй үнгэржэ байхада, Аси можын еврейнүүд Павелые хүмэ соо харахадаа, хүн зоние хөөрсэгэнүүлжэ, тэрэниие бариба.

²⁸– Израильшууд! Туһалыт! – гэжэ тэдэ хүхиржэ байба. – Энэл хүн манай улад зон, Хуули, энэ газар доромжолһон һургаал хүн бүхэндэ хаа хаанагүй номноно. Мүнөө грегүүдые хүмэдэ асаржа, нангин газар бузарлаа!

²⁹Юундэ тиигээб гэбэл, урдань тэдэ зон хотодо Павелые Эфесэй Трофимтай хараһан байгаа, тиимэһээ Павел тэрэниие дахуулаад, Бурханай хүмэ асараа гэжэ бодоһон байна.

³⁰Хөөрсэгэнэһэн хотын зон булта гүйлдэжэ ерээд, Павелые барижа, хүмэ сооһоо шэрэн гаргаба. Тэрэнэй хойноһоо хүмын үүдэ хааба.

³¹Тэдэ зоной Павелые алахая забдажа байхада, бүхы Иерусалим үймэжэ байна гэжэ түмэнэй даргада дуулгаба.

³²Тэрэ дарга удангүй зуунай дарганартай, сэрэгшэдтэйгээ хамта тиишээ ошобо. Түмэнэй даргые сэрэгшэдтэйнь харахадаа, улад зон Павелые наншахая болибо.

³³Түмэнэй дарга тэдэндэ дүтэлжэ, Павелые дабхар гэнжээр хүлихыень захираад, һүүлдэ тэрэнэй хэн байһан, юу хэһэн тухай һураашалба.



³⁴Зон элдэб юумэ хашхаржа байба, гэбэшье шууяатай байһан дээрэһээ тэрэ дарга юушье ойлгобогүй. Тиимэһээ тэрэ Павелые хэрэм руу туужа абаашаад, тэндэ хаахыень захирба.

³⁵Павелай гэшхүүрэй дээдэ табсан дээрэ гараад байхадань, хүн зон бүри ехээр гааралдан дошхоржо, сэрэгшэд тэрэниие гар дээрээ үргөөд ябаха баатай болобо.

³⁶Олон зон хойноһоонь дахалдан: – Энээниие алагты! – гэжэ хашхаралдажа байгаа бэлэй.

Павел өөрыгөө үмэглэнэ

³⁷Хэрэмдэ оруулхынь урда тээ Павел түмэнэй даргада хандажа: – Шамда юумэ хэлэжэ болохо гү? – гэжэ грек хэлэн дээрэ һураба. – Ши грек хэлэ мэдэхэ гүш? – гэжэ урдаһаань түмэнэй дарга һураба. –

³⁸Тиихэдээ ши һая үймөө татажа, өөрынгөө хойноһоо сүл губи руу дүрбэн мянган алууршадые дахуулжа ошоһон египет хүн бэшэ гүш?

³⁹– Би еврей хүнби, – гэжэ Павел буруушааба, – Килики ороной Тарс гэдэг түб хотын эрхэтэн хүнби. Эдэ зонтой хөөрэлдэхыемни зүбшөөгүш даа, – гэжэ тэрэ гуйба.

⁴⁰Дарга зүбшөөбэ. Павел гэшхүүрэй дээдэ табсан дээрэ зогсоод, аалин бологты гэжэ гараараа зондо харуулба. Булта аниргүй боложо, Павел еврей хэлэн дээрэ дуугарба:

Элшэнэрэй бүтээһэн хэрэгүүд 22

¹– Аха дүүнэр, эсэгэнэр! Минии үмэглэлгын үгэ мүнөө шагнажа хайрлыт!

²Павелай еврей хэлэн дээрэ хэлэжэ байхые дуулахадаа тэдэ зон бүри намдаба.

³– Би Килики ороной Тарс хотодо түрэхэн еврей хүнби. Тэрэ хотодо Гамалиилай хүтэлбэри доро үбгэ эсэгэнэрэй Хуули ехэ нягтаар сахижа



хүмүүжүүлэгдэһэн хүнби. Би таанадтал адли Бурханай урда бүхы үүргэнүүдээ оролдосотойгоор дүүргэдэг һэнби.

⁴Дээдын Эзэнэй Замаар зоригшо зоние үхэтэрынъ хашан мүрдэжэ, эрэшүүлыешье, эхэнэрнүүдыешье барижа түрмэдэ хаядаг һэнби.

⁵Минии хэлэһые ахамад санаарташье, Зүблэлэй гэшүүдшье баталха. Тэдэнһээ би бэшэг абаад, Христосто хүзэглэдэг тэндэхи зоние барижа хүлээд, Иерусалим хэһээхыень абажа ерэхээр аха дүүнэртээ Дамаск ошохо гэжэ гараа бэлэйб.

Павел Христосто хүзэглэһэн тухайгаа хөөрэнэ

⁶Гэбэшье үдэ багта, Дамаскһаа холо бэшэ ябахадамни ялагар туяа тэнгэриһээ сасаран, намайе гэрэлтүүлбэ.

⁷Би газарта унажа: «Саул, Саул, юундэ ши намайе хашан мүрдэнэбши?» – гэхэн абяа дуулааб.

⁸«Эзэмни, үгы ши хэн гээшэбши?» – гэжэ би һурабаб. «Шамда хашуулан мүрдүүлэгшэ Назаредэй Иисус гээшэлби даа», – гэжэ тэрэ харюусаба.

⁹Харгы замаймни нүхэд гэрэл туяа харабашье, намда хандаһан абяа дуулаагүй юм.

¹⁰«Дээдын Эзэн, тиихэдээ би яаха болонобиб?» – гэжэ һурабаб. «Мүнөө дээрээ ши бодоод, Дамаск хото ошо. Юу хэхэ тухайшни тэндэ шамда хэлэгдэхэ», – гэжэ Дээдын Эзэн намда харюусаа бэлэй.

¹¹Тэрэ гэрэл туяагай толондо юумэ харахаяа болёод байхадамни, намтай ябаһан хүнүүд гарһаамни хүтэлжэ, Дамаск хото хүргэжэ асараа һэн.

¹²Тэндэ Хуули хэшээлтэйгээр сахидаг Анания гэжэ хүн намда ерээ бэлэй. Тэрэ хүниие Дамаск хотын бүхы еврейнүүд ехэ хүндэлдэг юм.

¹³Тэрэ намда ерэжэ, хажуудамни зогсоод: «Саул, нүхэрни, нюдэншни харадаг болог лэ!» – гэжэ хэлээ һэн. Тэрэ дороо би хараатай боложо, тэрэниие хараа бэлэйб.



¹⁴«Манай үбгэ эсэгэнэрэй Бурхан эрхэ хүсэлөө шамда мэдүүлхын тула Үнэн сэдхэлтэниие шамда харуулхын тула, тэрэнэй абяа дуулахыншни тула шамайе шэлэжэ абаа, – гэжэ Анания үргэлжэлүүлбэ.

–

¹⁵Юундэб гэхэдэ, ши хараһан дуулаһан бүхэнөө бүхы зондо дуулган, Дээдын Эзэн тухай гэршэлхэ ёһотойш.

¹⁶Тиихэдэе юундэ удааржа байнабши? Бодоод, Дээдын Эзэнэй нэрэ алдарые дуудан, уһаар арюудхуулаад, нүгэл шэбэлээ арилга».

¹⁷Иерусалим бусажа ерээд, Бурхан хүмэ соо зальбаржа байхадаа, би үзэгдэлдөө

¹⁸Дээдын Эзэниие хараа бэлэйб. «Энэ дороо яаралтайгаар Иерусалимые орхижо ошо, юундэб гэхэдэ, энэ хотодо нам тухай гэршэлхэдэшни этигэхэгүй», – гэжэ тэрэ хэлээ.

¹⁹«Дээдын Эзэн аа! – гэжэ би үгэлбэб, – мүргэлэй гэрнүүдээр ябажа байгаад, шамда хүзэглэдэг зониие барижа, түрмэдэ хаажа, сохижо байһан тухаймни тэдэ мэдэнэ ха юм.

²⁰Мүн шинии гэршэ Стефанай шуһа адхархада би хажуудань байгааб, тэрэнэй алууршадай тала барин, хубсаһануудыень харууһалжа байгааб».

²¹Тиихэдэ тэрэ намда: «Яба, би шамайе эндэһээ холо бусад арадуудта эльгээхэмни», – гэжэ хэлээ бэлэй.

Павел түмэнэй дарга хоёр

²²Эдэ үгэнүүдээ хэлэтэрынь хүн зон тэрэниие шагнажа байһанаа, мүнөө шаг шууяа табижа: – Иимэ хүн газар дээрэ ябаха ёһогүй. Энэ хүн амиды ябаха ёһогүй! – гэжэ хашхаралдаба.

²³Тэдэнэй иигэжэ хашхаралдажа, хубсаһаяа шуура татажа, шорой сасажа байхада,



²⁴Түмэнэй дарга Павелые хэрэмдэ туужа абаашаад, яахадаа зон иигэжэ тэрэнэй урдаһаа хашхаралдааб гэжэ мэдэхын тула тэрэниие ташуурдагты гэхэн захиралта үгэбэ.

²⁵Павелые баханада уяжа хүлихэдэнь, тэрэ хажуудань байһан зуунай даргада хандан: – Таанар римэй эрхэтэниие зарга шүүбэриггүйгөөр ташуурдаха эрхэтэй аалта? – гэжэ Павел асууба.

²⁶Энээниие дуулахадаа, зуунай дарга түмэнэй даргада ошожо: – Үгы, ши юу хэхээ байнабши? Энэ хүншни римэй эрхэтэн байнал, – гэбэ.

²⁷Тиихэдэнь түмэнэй дарга Павелда ойртожо: – Хэлыш даа, ши үнэхөөрөө римэй эрхэтэн гүш? – гэжэ һураба. – Тиимэ, – гэжэ Павел харюусаба.

²⁸– Би ехэ мүнгэ түлэжэ римэй эрхэтэн болоо һэнби, – гэжэ түмэнэй дарга хэлэбэ. – Харин би түрэхэһөө римэй эрхэтэнби, – гэбэ Павел.

²⁹Павелые ташуурдаха ёһотой байһан сэрэгшэд түргэхэн тэрээнһээ холо болобо. Харин түмэнэй дарга римэй эрхэтэниие гэнжээр хүлибэб гэжэ мэдэхэдээ ехээр айн хүрдэбэ.

Павел Зүблэлэй гэшүүдэй урда

³⁰Хойто үдэрынь Павелые юунэй түлөө еврейнүүд зэмэлнэб гэжэ тодорхойлохо һанаатай түмэнэй дарга тэрэнэй гэнжыень тайлажа, түрүү санаартадай болон Зүблэлэй гэшүүдэй суглархые захиржа, Павелые тэдэнэй урда байлгаба.

Элшэнэрэй бүтээһэн хэрэгүүд 23

¹Павел Зүблэлэй гэшүүдые шэртэн хараад: – Аха дүүнэр! Бүхы наһаараа энэ үдэр хүрэтэр би Бурханда үнэн сэхээр алба хээб, – гэжэ хэлэбэ.

²Анания гэжэ нэрэтэй ахамад санаарта хажуудань байһан зондо нюур амыень альгадагты гэжэ захирба.



- ³– Ай, сагаанаар будагдаһан хана, шамайе Бурхан сохихо, – гэжэ тэрээндэ Павел хэлэбэ. – Хуулийн ёһоор намайе шийдхэхэ гэжэ эндэ һууһан аад лэ, намайе сохигты гэжэ захирхадаа Хуули эбдэбэш.
- ⁴– Ши Бурханай ахамад санаартые доромжолнош, – гэжэ хажуудань байһан хүнүүд хэлэбэ.
- ⁵– Аха дүүнэр, энэ хүн ахамад санаарта гэжэ би мэдээгүйлби, – гэжэ Павел харюусаба. – «Улад зонойнгоо захирагша тухай муу юумэ бү хэлэ», – гэжэ Нангин Бэшэгтэ бэшээтэй юм.
- ⁶Зүблэлэй гэшүүдэй нэгэ зариманиинь саддукейнэр, нүгөөдүүлһын фарисейнүүд байна гэжэ харахадаа, Павел шангаар ооглобо: – Аха дүүнэрни, би фарисейнүүдэй хүбүүн гээшэб, өөрөө фарисей хүнби. Үхэхэн хүнүүдэй амидыралгада этигэжэ байһанаймнай түлөө намайе сүүдлэжэ байна.
- ⁷Иигэжэ хэлэхэнэйнь һүүлээр фарисейнэр ба саддукейнэр хоорондоо арсалдажа, сугларһан зоной һаналнуудын хубаарба.
- ⁸Ушарын юуб гэхэдэ, саддукейнэр үхэхэн хүнүүд амидырдаггүй, Бурханай Эльгээмэлнүүдшье, һүлдэшье үгы юм гэжэ баталдаг байгаа, харин фарисейнүүд эдэ бүгэдэ бии гэжэ тоолодог байгаа.
- ⁹Шанга хүхирэлдөөн боложо, фарисейнүүдэй дундаһаа хэдэн Хуули заадаг багшанар бодоод: – Энэ хүниие гэмнэхээр нэгэшье юумэ олоногүйбди. Энэ хүнтэй һүлдэ гү, али Бурханай Эльгээмэл хөөрэлдэхэн байхадаа болохо, – гэжэ хэлэбэ.
- ¹⁰Арсалдаанай улам шангадахада, Зүблэлэй гэшүүд Павелые таһара удара татана аа гү гэжэ түмэнэй дарга айгаад, сэрэгшэдтэй суглаанай таһалга руу ороод, Павелые абажа, хэрэм туужа абаашахыень захирба.
- ¹¹Хойто һүнинь Дээдын Эзэн Павелай урда бии боложо: «Зоригтой бай! Иерусалимда нам тухай гэршэлһэндээл адляар, ши мүнөө Рим хотодо гэршэлхэш», – гэбэ.

Павелые алаха гэхэн нюуса хэлсээн

¹²Хойто үдэрынъ еврейнүүд хоорондоо хэлсээ үүдхэн сугларжа, Павелые алаагүй хаа, юумэ эдихэ уухагүйбди гэжэ тангариглаба.

¹³Энэ хэлсээе дүшэ гаран зон үүдхэнэн байгаа.

¹⁴Тэдэнэр түрүү санаартадта болон ахамадуудта ерээд: – Павелые алаагүй хаа, амандаа юушье хэхэгүйбди гэжэ тангариглаабди.

¹⁵Мүнөө таанар, мүн Зүблэлэй гэшүүд Павелай хэрэгы дахин шалгажа хараха ханаатайбди гэнэн хэбэр үзүүлэн, түмэнэй даргада хүнүүдые эльгээжэ, тэрэниие асаруулагты. Бидэ бэлэн байхабди, иишэ орохоһоонь урда тэрэниие алахабди, – гэбэ.

¹⁶Гэбэшье энэ хэлсээн тухай Павелай эгэшын хүбүүн мэдээд, хэрэм ерэжэ, Павелда дуулгаба.

¹⁷Тиихэдэ Павел зуунай даргые дуудуулаад: – Энэ хүбүүн түмэнэй даргада юушьеб дуулгаха ханаатай байна. Энэниие тэрээндэ хүргэжэ үгыш, – гэбэ.

¹⁸Зуунай дарга хүбүүниие түмэнэй даргада хүргэжэ: – Хаалтада байһан Павел намайе дуудажа, энэ хүбүүн шамда юушьеб дуулгаха ханаатай юм гэжэ хэлээд, энэниие шамда асархыемни гуйгаа, – гэжэ элидхэбэ.

¹⁹Түмэнэй дарга тэрэ хүбүүе гарһаань хүтэлжэ хажуу тээшэнь абаашаад: – Зай, намда юу дуулгахаяа байнабди, – гэжэ һураба.

²⁰– Павелые Зүблэлэй гэшүүдтэ абаашахые шамһаа гуйха тухай еврейнүүд хоорондоо үгэсэн хэлсэбэд, – гэжэ хүбүүн харюусаба. – Тэдэ Павелай хэрэгы дахин шалгажа хараха ханаатайбди гэнэн хэбэр үзүүлхэ.

²¹Гэбэшье ши тэдэнэй үгэдэ бү ороорой. Павелые алаагүй хаа, юумэ эдихэ уухагүйбди гэжэ тангариглаһан дүшэ гаран хүн тэрэниие һахин хүлеэжэ байха. Тэдэ мүнөөшье бэлэн байна, гансал шинии захиралта хүлеэнэ.

²²– Намда хөөрэхэн юумэеэ ши хэндэшье бү хэлээрэй, – гэжэ түмэнэй дарга хүбүүндэ хэлээд, тэрэниие табиба.

Павелые Феликс захирагшада эльгээбэ

²³Тиигээд түмэнэй дарга хоёр зуутаниие дуудажэ: – Хоёр зуун сэрэгшэдые, далан морин сэрэгшэдые ба хоёр зуун жадашэдые бэлдэгты. Тэдэнэр үдэшын юэн сагта Кесари ошохо ёһотой.

²⁴Павелда моридые бэлдээд, захирагша Феликсдэ тэрэниие бүтэн бүрин зандань хүргэжэ үгэгты, – гэбэ.

²⁵Түмэнэй дарга Феликсдэ иимэ бэшэг бэшээ:

²⁶«Эрхим хүндэтэ захирагша Феликс, шамайе би, Клавдий Лисий амаршалнаб.

²⁷Энэ хүниие еврейнүүд баряад, алаха гэхэн байна. Тэрэ римэй эрхэтэн байна гэжэ мэдэхэдээ, би бүлэг сэрэгшэдтэйгээ тэрэниие абарааб.

²⁸Юундэ тэрэниие зэмэлнэб гэжэ тодорүүлха ханаатайгаар тэрэниие Зүблэлэй гэшүүдтэ асараа хэнби.

²⁹Амииень хороохоор, али түрмэдэ хаахаар нэгэшье муу юумэ хээгүй, харин тэдэнэй Хуулийн арсалдаатай асуудалай түлөө тэрэниие зэмэлжэ байна гэжэ би элирүүлбэб.

³⁰Энэ хүнэй урдаһаа нюуса хэлсээн үүдхэгдэжэ байна гэхэн мэдээсэл абамсаараа, энээниие шамда эльгээжэ, харин гэмнэгшэдтэнь өөрынгөө гэмнэлгы шамда хэлэхыень захирбаб».

³¹Абаһан захиралтынгаа ёһоор сэрэгшэд Павелые хүнндөө Антипатри хото хүргэбэ.

³²Хойто үдэрын морин сэрэгшэдые Павелтай ябуулаад, сэрэгшэд өөһэдөө хэрэмээ бусажа ерэбэ.

³³Харин морин сэрэгшэд Кесари хүрэжэ ерээд, захирагшада Павелые, түмэнэй даргын бэшэг дамжуулжа үгэбэ.



³⁴Захирагша абанан бэшэгээ уншаад, ямар могооооби гэжэ Павелһаа һураба. Килики могооо гэжэ мэдэхэдээ:

³⁵– Шинии гэмнэгшэдэй иишэ хүржэ ерэхэдэ би хэрэгыешни шагнуужамби, – гэжэ тэрэ хэлэбэ. Тиигээд захирагша Павелые Иродэй ордондо харуул доро байлгаха гэнэн захиралта үгэбэ.

Элшэнэрэй бүтээһэн хэрэгүүд 24

Еврейнүүд Павелые зэмэлнэ

¹Табан үдэрэй үнгэрһэн хойно ахамад санаарта Анания хэдэн ахамадуудтай, Тертулл гэдэг үмэглэгшэтэй хүржэ ерэбэ. Тэдэ Павелда тохожо байгаа гэмнэлгээ захирагшада мэдүүлбэ.

²Павелые дуудуулжа асархадань, Тертулл тэрэниие гэмнэн, захирагшада хандаба: – Эрхим хүндэтэ Феликс! Шинии ашаар бидэ энхэ тайбан ажаһуунабди, оюун ухаанайшни хүсөөр энэ арад түмэнэй дунда хэгдэһэн ехэ хубилалтануудыешни

³бидэ хэзээшье, ямаршье талаһаань һайшаадагбди, баяр баясхалангаар дүүрэдэгбди.

⁴Юумэ удаан хэлэжэ шамайе хашараахаяа хүсэнэгүйб. Манай богони хөөрөөе шагнажа хайрлыш даа гэжэ гуйналби.

⁵Энэ хүн Назорейн шажанай бүлгэм толгойлжо, хөмороо татадаг хүн юм, юртэмсэ дэлхэйгээр хаа хаанагүй ажаһуудаг еврейнүүдэй дунда үймөө татаа юм.

⁶Энэ хүн Бурханай һүмыешье бузарлаха һанаатай байгаа, теэд бидэ энээниие барижа үрдеэбди.

⁸Энээниие өөрөө мүшхэжэ, манай гэмнэлгын зүбые баталха байхаш.

⁹Тертуллай хэлэһэниинь үнэн гэжэ еврейнүүдшье баталан, тэрэниие дэмжэбэ.

Павел Феликсын урда өөрыгөө үмэглэнэ



- ¹⁰Захирагшын Павелда дохёо тэмдэг үгэхэдэнь, тэрэ иигэжэ хэлэбэ: – Ши олон жэлэй үргэлжэдэ манай арад зоной зарга шүүгшэ байгааш гэжэ мэдэдэг ушарһаа би өөрыгөө гүйсэд үмэглэхэб.
- ¹¹Арбан хоёр үдэрэй урда тээхэнэ Иерусалим хото мүргэл хэхээ ерэһыемни ши өөрөө лаблаха байхаш.
- ¹²Намайе Бурхан хүмэдэ хэн нэгэнтэй арсалдажа, мүргэлэй гэртэ, али ондоо газарта үймөө татажа байхыемни хэншые хараагүй юм.
- ¹³Намда тохожо байгаа зэмэ эдэ зон өөһэдөөшые баримталан харуулжа шадахагүй.
- ¹⁴Буруу шажанай бүлгэм гэжэ эдэ зоной нэрлэдэг Зам баримталжа байһан дээрэһээл би үбгэ эсэгэнэрэйнгээ Бурхание хүндэлнэб гэжэ шамда мэдүүлхэ байнаб. Моисейн Хуулида болон лүндэншэдэй номууд соо бэшэгдэһэн бүхы юумэндэ би этигэнэб.
- ¹⁵Эдэ зоной Бурханда найдадагтал адляар би баһал үнэн сэдхэлтэншые, бусадшые зон амидырха гэжэ найдадаг хүнби.
- ¹⁶Тиимэхээ би Бурханайшые, хүнүүдэйшые урда арюун һайн сэдхэлтэй байха гэжэ ходо оролдодогби.
- ¹⁷Иерусалимда олон жэл ерэнгүй байгаад, һаяар би арад зондоо мүнгэ сангын туһаламжа хүргэхээе, үргэл асархаяа ерээ һэм.
- ¹⁸Эдэ зон намайе Бурхан хүмэ соо бээе арюудхажа байхадамни хараһан байна. Тэрэ үедэ хажуудамни олон зоншые байгаагүй, үймэлдөөншые болоогүй һэн.
- ¹⁹Харин хэдэхэн Асиин еврейнүүд лэ... Хэрбээ тэдэ зон намайе зэмэлхэ шалтагаантай байбал, урдашни зогсожо, намайе зэмэлхэ ёһотой байгаа.
- ²⁰Зүблэлэй гэшүүдэй урда зогсоходомни ямар гэмтэ ябадалда хабаатай байһыемни тодоруулһанаа эдэ зон өөһэдөө хэлэжэ үгэг лэ.



²¹Тэдэнэй урда зогсожо байхадаа: «Үхэнэн зоной амидыралгын түлөө таанад мүнөөдэр намайе шүүбэрилнэт!» – гэжэ хэлэнэймни түлөө үһөөрхэнэн байжа магадгүй.

²²Дээдын Эзэнэй Зам тухай хэнһээшье хайн мэдэжэ байһан Феликс хэрэгэй шиидхэбэриее хойшолуулан: – Түмэнэй дарга Лисиин иишэ хүрэжэ ерэхэдэ би танай хэрэг шиидхэхэб, – гэжэ хэлэбэ.

²³Павелые хатуу бэшэ харуул доро байлгагты, нүхэдэйн туһалхада һаад бү хэгты гэжэ Феликс зуунай даргада захирба.

Павел Феликс болон Друзилла хоёрой урда

²⁴Хэдэн үдэрэй үнгэрһэн хойно Феликс Друзилла һамгатаяа (тэрэнэ еврей эхэнэр байгаа) ерэжэ, Павелые дуудажэ асаруулаад, Христос Иисуста хүзэглэдэг тухайгаа хөөрэхыень шагнаба.

²⁵Теэд Павелай үнэн зүб ажаמידарха, бэеэ бариха тухай, ерээдүй зарга шүүбэри тухай хөөрэхэдэнь, Феликс айгаад: – Зай, иигээд мүнөөдэр болоо. Яба. Сүлөө саг гарабал, би шамайе дуудуужаб, – гэжэ хэлэбэ.

²⁶Тиихэдэ Павел мүнгэ үгэнэ аа гү гэжэ найдан, Феликс хойноһоонь оло дахин эльгээжэ, тэрээнтэй хөөрэлдэдэг байгаа.

²⁷Хоёр жэлэй үнгэрһэн хойно Феликсын орондо захирагшын тушаалда Поркий Фест оробо. Феликс еврейнүүдэй һайшаалда хүртэхын тула Павелые харуул доро орхёо бэлэй.

Элшэнэрэй бүтээһэн хэрэгүүд 25

Павел римэй хаанай зарга сүүд шаардана

¹Албан тушаалда ороһоор гурба хоноод, Фест захирагша Кесариһаа Иерусалим хото ошобо.

²Түрүү санаартад, хотын нэрэ хүндэтэй зон Павелые Фестын урда гэмнэбэ,



³тиин тэрэнэй талаһаа хайн хандалга хүлеэжэ, Павелые Иерусалим асарха зүбшөөл гуйба. Юундэ тиигээб гэхэдэ, тэдэнэр Павелые харгыдань алаха гэжэ хэлсэһэн байгаа.

⁴Гэбэшье Павел Кесари хотын түрмэдэ харуул доро үлэхэ, би өөрөөшье мэнэ гэхээр тишээ ошохо ханаатайб гэжэ Фест харюусаба.

⁵– Таанадай ахаматууд намтай ябалсаг. Хэрбээ тэрэ хүнэй буруу юумэ хэһэн байбалнь, тэрэниие тэндэ ошоод зэмэлээрэйт, – гэжэ Фест хэлэбэ.

⁶Иерусалимда арба шахуу үдэр байгаад, Фест Кесарияа бусаба. Хойто үдэрынь тэрэ заргашын шэрээдэ һуугаад, Павелые асархыень захирба.

⁷Павелай ерэхэтэй сасуу Иерусалимһаа ерэхэн еврейнүүд тэрэниие тойрожо, гэршэлэн баталхын аргагүй олон зэмэ тэрээндэ тохобо.

⁸– Би еврейнүүдэй Хуулиин, Бурхан хүмын, римэй хаанайшые урда зэмэгүйб, – гэжэ Павел өөрыгөө үмөөрбэ.

⁹Фест еврейнүүдэй хайшаалда хүртэхэ ханаатай: – Иерусалим ошожо, тэндэ хэрэгээ намаар шийдхүүлхээе хүсэнэ гүш? – гэжэ Павелһаа һураба.

¹⁰– Би римэй хаанай зарга шүүбэридэ ороод байнаб, тиимэхэе минии хэрэг эндэ шийдхэхэ ёһотой, – гэжэ Павел харюусаба. – Би еврейнүүдтэ ямаршые муу юумэ хээгүйб гэжэ ши өөрөө хайн мэдэнэш.

¹¹Хэрбээ хуули бусын юумэ хэһэн, саазада хүртэмөөр юумэ үйлэдэхэн байбал, би үхэхэдэшье бэлэнби. Хэрбээ эдэнэй намда тохонон зэмэдэ хабаагүй һаамни, хэншые намайе эдэнэй гарта үгэхэ эрхэгүй. Би римэй хаанай зарга шүүбэри шаарданаб.

¹²Тиэхэдэнь Фест зүблэлтэйгөө зүбшөөд: – Ши римэй хаанай зарга шүүбэри шаардаба гүш? Римэй хаанда ошохош, – гэбэ.

Павел Агриппа хаанай урда

¹³Хэдэн үдэрэй үнгэрхэн хойно Агриппа хаан Берника һамгатаяа Кесари хото Фестдэ айлшаар ерэбэ.

¹⁴Тэдэнэй нэгэ хэды хоноһон хойно Фест Агриппа хаанда Павелай хэрэг тухай хөөрөжэ үгэбэ: – Феликсын хаалтада байлгалан нэгэ хүн эндэ бии.

¹⁵Иерусалим ошоходомни түрүү санаартад болон еврейнүүдэй ахамадууд тэрэниие зэмэлжэ, тэрэнэй талаар гэмнэлгын шийдхэбэри гаргахыемни шаардаа.

¹⁶Тиихэдэ гэмнэгдэһэн хүниие зэмэлһэн хүнүүдтэйнэ уулзуулангүй, зэмэлэгдэжэ байһан ушараар өөрыгөө үмэглэхэ арга олгонгүй хэһээхэнь римэй эрхэтэнэй заншал ёһоор бэшэ гэжэ би харюусаа һэм.

¹⁷Тэдэ зоной намтай иишэ ерэхэдэнь, би хэрэгыень хойшолуулангүй, хойто үдэрынэ заргашын шэрээдэ һуугаад, тэрэ зэмэлүүлһэн хүниие асарагты гэжэ захираа һэнби.

¹⁸Зэмэлэгшэд гэмнэһэн хүнтэйгөө уулзахадаа тэрээндэ тохохо гэжэ минии ханаһан ямаршые зэмэ тохоогүй һэн.

¹⁹Харин тэдэ өөһэдынгөө шажанай талаар, Павелай амиды гэжэ баталан хэлэдэг Иисус гэдэг үхэһэн хүн тухай асуудалаар арсалдаа бэлэй.

²⁰Яажэ энэ асуудалаар мүрдэлгэ хэхэб гэжэ гайхан, Иерусалим ошожо, тэндэ намаар хэрэггэ шийдхүүлхэ дуратай гүш гэжэ би Павелһаа һурааб.

²¹Тиигээд тэрэнэй римэй хаанай зарга шүүбэри шаардахадань, римэй хаанда ябуулха арга олоторни тэрэниие хаалтада байллагты гэжэ би захирааб.

²²– Би баһа тэрэниие шагнаха дуратай байнаб, – гэжэ Фестдэ Агриппа хэлэбэ. – Үглөө ши шагнаарай, – гэжэ нүгөөдынэ харюусаба.

²³Хойто үдэрынэ Агриппа Берника хоёр ялалзаһан талалзаһан юмэд суглаанай таһалга руу түмэнэй дарганартай, хотын изагууртантай хамта оробо. Тиигээд Фестын захиралтаар Павелые оруулба.

²⁴– Агриппа хаан, эндэ сугларһан бүхы зон! Энэ хүниие амиды ябаха ёһогүй гэжэ Иерусалимайшые, эндэхишые еврейнүүд гэмнэн, олоороо намда хандаа бэлэй.

²⁵Өөрынгөө талаһаа энэ хүн саазада хүртэхөөр нэгэшые муу юумэ хээгүй байна гэхэн тобшолол хээб. Тиигээд энэ хүнэй римэй хаанай зарга шүүбэри шаардаа юм хадань би тэрэниие римэй хаанда эльгээхэ гэжэ шиидээб.

²⁶Гэбэшые римэй хаанда юу бэшэхээс һайн ойлгожо ядан, мүрдэлгэ хээд, юу бэшэхээс ойлгохын тула би энэ хүниие, Агриппа хаан, урдашни байлгааб.

²⁷Юундэ тиигээб гэхэдэ, хаалтада һууһан хүнэй зэмыень заангүйгөөр эльгээхэнь бодолгүй хэрэг гэжэ би һананаб.

Элшэнэрэй бүтээһэн хэрэгүүд 26

Павел өөрыгөө хамгаална

¹Үмэглэлтын үгөө хэлэхыеш зүбшөөнэбди, – гэжэ Павелда Агриппа хэлэбэ. Тиихэдэнь Павел гараа үргөөд, өөрыгөө хамгаалан иигэжэ хэлэбэ:

²– Агриппа хаан! Еврейнүүдэй намда тохожо байгаа зэмэдэ хабаагүйб гэжэ мүнөөдэр шинии урда өөрыгөө үмэглэжэ байһандаа би өөрыгөө хуби заяатай хүн гэжэ тоолоноб.

³Ши еврейнүүдэй ёһо заншалыешые, арсалдаан гаргадаг асуудалнуудыешые һайн мэдэнэш. Тиимэхээ намайе тэсэбэритэйгээр шагнахыешни гуйнаб.

⁴Минии ажамидарал эдир залуу наһанһаа эхилэн еврейнүүдэй дунда мэдээжэ. Би түрүүн өөрынгөө арад зоной дунда, һүүлдэнь Иерусалимда ажаһуудаг һэм.



⁵Эдэ еврейнүүд үнинэй намайе мэдэхэ, тиимэхэ дуратай хаа, манай шажанай эгээл хатуу журамтай фарисей бүлгэмэй гэшүүн байһан тухаймни баталжа үгэхэ.

⁶Бурханай үбгэ эсэгэнэртэмнай найдуулһан юумэндэ мүнөөшье этигэжэ байһан дээрэхэ би танай урда шүүлгэн зогсоноб.

⁷Тиихэдэ манай арбан хоёр угсаатаншые энэ найдуулга бүтэхэ гэжэ этигэхээр лэ үдэр хүнигүй Бурханда алба хэдэг байгаа. Хаан, энэ бүхэнэйл түлөө намайе еврейнүүд зэмэлнэ.

⁸Үхэхэн зоние Бурхан амидыруулха аргагүй гэжэ таанар яахадаа һананабта?

⁹Би өөрөөшье Назаредэй Иисусай нэрэ алдарай урдаһаа шадалаараа тэмсэхэ ёһотойб гэжэ һанадаг байгааб.

¹⁰Иерусалимда би энэ бүхэниие гүйсэдхэжэ байгаа бэлэйб. Түрүү санаартадай үгэхэн эрхээр би Христосто хүзэглэдэг олон зоние түрмэдэ хаагаа һэнби. Тиихэдэ хэн нэгэниие саазалха тухай асуудалай шийдхэгдэхэдэ, би ходо саазада хүртүүлхэ гэжэ хэлэдэг байгааб.

¹¹Тиин мүргэлэй гэр бүхэндэ Иисусаа арсахыень баадхан, хүзэглэгшэдые хэхээдэг һэм. Би тэдээндэ айхабтар ехээр хоро шараяа бусалан, хариин хото нютагуудааршые ябажа, тэдэниие мүрдэн мүшхэдэг байгааб.

Павел Христосто хүзэглэнэн тухайгаа хөөрэнэ

¹²Нэгэтэ би түрүү санаартадһаа хүзэглэгшэдые хэхээхэ эрхэ болон зүбшөөл абажа, Дамаск хото ошоо һэм.

¹³Хаан, үдэ багта намайе, мүн замаймни нүхэдые тэнгэриһээ сасаран гэрэлтүүлһэн, наранһаа үлүү ялагар гэрэл туяа би хараа бэлэйб.

¹⁴Бидэ булта газарта унажа, намда еврей хэлэн дээрэ: «Саул, Саул, юундэ ши намайе хашан мүрдэнэбши? Ташуурай урдаһаа зүдхэхэн зүрюу бухадал адляар ши өөрыгөө зобоонош!» – гэхэн абяа дуулааб.



¹⁵«Эзэмни, үгы ши хэн гээшэбши?» – гэжэ би хурабаб. «Шамда хашуулан мүрдүүлэгшэ Иисус гээшэб, – гэжэ Дээдын Эзэн харюусаа. –

¹⁶Мүнөө ши хүл дээрээ бодо. Шамайе өөрынгөө зараса болгохын тула, мүнөөдэр хараһан үзэхэн, мүн ерээдүйдэ минии харуулха бүхы юумэнэй гэршэ болохыншни тула би шамда үзэгдэбэ гээшэб.

¹⁷⁻¹⁸Би шамайе еврейнүүдһээ, мүн бусад арадуудһаа абархаб. Мүнөө тэдэнэй нюдыень нээжэ, харанхы мунхагһаа гэрэл туяада шэглүүлхыншни тула, сатанагай эрхэ мэдэлһээ Бурханай эрхэ мэдэлдэ оруулхыншни тула, мүн намда этигэн тэдэнэй нүгэл шэбэлээ хүлисүүлжэ, Бурханай арад зоной дунда өөрынгөө һуури эзэлхын тула би шамайе тэдэндэ эльгээнэб».

Павел ажал тухайгаа хөөрэнэ

¹⁹Агриппа хаан, энээнһээ боложо би тэнгэридэ үзэгдэһые буруушаангүй,

²⁰түрүүн Дамаск хотынхидтэ, һүүлдэнь Иерусалимай зондо, удаань бүхы Иудейн орон нютагайхинда, һүүлэй һүүлдэ бусад яһатанда нүгэл хэхээ болигты, нүгэл хэхээ болиһоноо бодото хэрэгүүдээрээ баталжа, Бурханда хандагты гэжэ уряалаа бэлэйб.

²¹Энээнэй түлөө еврей зон намайе Бурхан һүмэ соо барижа алаха гээ.

²²Гэбэшье Бурханай хүсэ туһаламжаар би энэ саг хүрэтэр сухаришагүй зогсоноб, юрыншье, нэрэ хүндэтэйшье зондо гэршэлнэб. Лүндэншэдэй болон Моисейн уридшалан хэлэхэндэ нэмэжэ би нэгэшье үлүү юумэ хэлээгүйб.

²³Харин Бурханай табисуурта ехэ зоболон эдлэжэ, үхэхэн зоной дундаһаа эгээн түрүүн амидыржа, манайшье арад зондо, бусад арадуудташье абаралга тухай хөөрэхэ гэжэ тэдэнэй бэшэһые хэлэхэн байгааб.

²⁴Иигэжэ Павелай өөрыгөө үмэглэжэ байхада Фест: – Павел шинии ухааншни муудаа! Ши ехэ эрдэм номһоо боложо үбэштэйрөөш, – гэжэ шангаар хашхарба.

²⁵– Эрхим хүндэтэ Фест, би үбэштэйрөөгүйб, – гэжэ Павел буруушааба. – Би үнэн зүб, сэсэн удхатай үгэнүүдые хэлэнэб.

²⁶Хаанда иимэ зоригтойгоор хандажа байнаб. Хааншье энээниие мэдэнэ. Эдэ бүхэниие хаан анхарангүй орхихогүй гэжэ би этигэнэб, юундэб гэхэдэ, энэ бүхэн ямар нэгэн харанхы буланда ушараа бэшэ ха юм.

²⁷Агриппа хаан, ши лүндэншэдтэ этигэнэ ха юмши? Этигэнэш гэжэ мэдэнэб!

²⁸– Ушаргүй түргөөр намайе христос шажанда хандуулха ханаатай гүш! – гэжэ Агриппа Павелда хэлэбэ.

²⁹– Түргөөр гү, түргөөр бэшэ гү, гэбэшье гансал ши бэшэ, харин мүнөөдэр намайе шагнажа байгаашад булта (энэ гэнжэнүүдһээ гадна) намдал адли болохыень би Бурханда зальбарнаб, – гэжэ Павел харюусаба.

³⁰Хаан өөдөө бодобо, хойноһоонь захирагша, Берника, бусадшье улад бодобо.

³¹Таһалгаһаа гараад, тэдэ бэе бээдээ: – Энэ хүн саазалуулхаар гү, али түрмэдэ һуухаар нэгэшье муу юумэ хээгүй байна, – гэлдэбэ.

³²– Римэй хаанай зарга шүүбэри шаардаагүй юм һаань, энэ хүниие сүлөөдэ табижа болохо байгаа, – гэжэ Агриппа хаан Фестдэ хэлэбэ.

Элшэнэрэй бүтээһэн хэрэгүүд 27

Павел Рим руу тамарба

¹Бидэнэй Итали тамарха гэжэ шиидэһэн хойно Павелые хаалтада байһан үшөө хэдэн хүнүүдтэй римэй хаанай түмэнэй Юлий гэдэг зуунай даргада даалгаба.

²Асиин эрье зубшан тамарха ёһотой Адрамиттиһаа ерэнэн корабльда бидэ һуугаад тамарбабди. Маанадай дунда Фессалоникиһаа уг гарбалтай Аристарх гэжэ македон хүн байлсаа.

³Хойто үдэрынь бидэ Сидон хотодо зогсообди, Юлий Павелда ехэ уян хандажа, нүхэдтэйгөө уулзан, хэрэгтэй юумэ абажа ерэхыень зүбшөөбэ.

⁴Сидонһоо гараад, бидэ Кипр аралай хажуугаар һалхинһаа хоргодон тамараабди, юундэб гэхэдэ, һалхин урдаһаамнай үлеэжэ байгаа.

⁵Бидэ Килики, Памфили аралнуудые тамаран үнгэржэ, далай гаталаад, Лики нютагай Миры хотодо зогсообди.

⁶Тэндэ зуунай дарга Итали тамаржа ошохо гэнэн Александриин корабль бэдэржэ олоод, бидэниие һуулгаа.

⁷Бидэ хэдэн үдэр ехэ удаан тамаржа, һүүлэй һүүлдэ арайл гэжэ Книд хото хүрөө бэлэйбди. Бидэнэй тамаржа зүгһөө һалхин үлеэжэ, һалхинһаа хоргодон, бидэ Салмоне хушууе үнгэрөөд, Крит аралые урда зүгһөөнь тойрон тамараа һэмди.

⁸Кридэй эрье зубшан арай шамай тамарһаар бидэ Ласея хотын ойро оршодог «Номгон гавань» гэжэ нэрэтэй газарта хүрөөбди.

⁹Бидэ ехэ саг гээжэ, Масаглалгын Үдэрэй үнгэрһэн тула саашадаа тамархань ехэ аюултай боложо байгаа.

¹⁰– Нүхэд, минии һаналаар саашадахи тамаралга ехэ аюултай байжа магадгүй, ганса ашаа корабль хоёрнай аюулда орохо бэшэ, маанадшые аюул оһолдо орожо магадгүйбди, – гэжэ Павел аргадаба.

¹¹Харин зуунай дарга кораблиин эзэнэй, корабль хүтэлэгшын үгэ дуулаад лэ, Павелай хэлэһые анхарбагүй.

¹²Кораблиин тогтоһон газар үбэлжэхэдэ таарахагүй байһан дээрһээ ехэнхи зон эндэһээ гаража, арга байбал урда баруун ба хойто баруун талаһаа нээлтэтэй Крит аралай Финик пристаньда тамаржа ошоод, тэндэ үбэлжэе гэнэн дурадхал оруулба.

Далайн шуурган



¹³Урдаһаань аалин һалхинай үлөэхэдэ, тэдэнэр тухайлаашань бээлхэ гэжэ бодоод, бархагуудаа дээшэнь татажа абаад, Крит аралай эрье зубшан тамарба.

¹⁴Гэбэшье удангүй аралай саанаһаа «Зүүн хойто зүгэй» гэжэ нэрэшэһэн айхабтар шанга һалхин буужа, зогсонгүй үлөбэ.

¹⁵Корабль һалхинда абтажа, бидэ һалхинай урдаһаа юушье хэхэ аргагүй байгаабди. Тиимэһээ бидэ оролдохоёо болижо, корабльнай һалхинда туугдаба.

¹⁶Клавда гэжэ нэгэ аралай хажуугаар үнгэрэн гарахадаа, кораблингаа онгосые бидэ арай гэжэ бүтэн үлөөбэбди.

¹⁷Тэрэ онгосо кораблингаа табсан дээрэ гаргаад, һүүлдэнь таталгаар бүһэлэн уяабди. Сиртай гэдэг харьялтай мүргэлдэнэ гүбди гэжэ айгаад, морягууд бархагаа хаяжа, һалхинда туулгаһан онгосомнай саашаа гүйбэ.

¹⁸Һалхи шуурган улам шангаржа байһан дээрэһээ бидэ ашаанайнгаа заримыень хаябабди,

¹⁹үшөө нэгэ хоноод, кораблингаа түхээрэлгые уһа руу хаяа бэлэйбди.

²⁰Нилээд олон үдэр огторгойдо нараншье, одо мүшэдшье харагдабагүй. Шуурганай яажашье зогсохогүйдэ бидэ абарагдахабди гэжэ найдахаяашье болёобди.

²¹Хүнүүд үнинэй эдеэлхээшье болёод байгаа. Тиихэдэ Павел тэдэнэй урда гараад, иигэжэ хэлэбэ: – Нүхэд, минии үгэ дуулажа, Крит арал дээрэ үлэхэ байгаабди. Тиигээ һаа, бидэ иимэ гай оһолдо орохогүй һэмди, иимэ ехэ гарзашье гарахагүй байгаа.

²²Харин мүнөө зоригоо бү алдагты гэжэ уряалнаб. Хэншье хосорхогүй, гансал корабльнай хосорон халаха.

²³Эрхэ мэдэлдэнь байдаг, минии шүтэдэг Бурхан үнгэрһэн һүни Эльгээмэлээ намда эльгээгээ.



- ²⁴Тэрэ Бурханай Эльгээмэл: «Павел бү ай! Ши римэй хаанай урда зогсохо ёһотойш, тиимэхээ Бурхан шинии аша туһада замайншни нүхэдтэ ами наһа үршөөн хайрлана», – гэжэ хэлээ.
- ²⁵Нүхэд, тиимэхээ зоригтой байгты! Би Бурханда этигэнэб! Тэрэнэй хэлэһэн ёһоор хамаг юумэн болохо.
- ²⁶Корабльнай ямаршьеб даа аралда заатагүй туугдажа ерэхэ.
- ²⁷Дундада далайда арбан дүрбэдэхи хүниее долгиндо туугдан дабшажа байхадамнай хүниин тэн багаар матросууд гэнтэ газарта дүтэлжэ байһанаа мэдэрбэ.
- ²⁸Уһанай гүнзэгы хэмжэжэ үзэхэдэнь, гушан долоон метр шахуу байба, нэгэ хэды болоод дахин хэмжэжэ үзэхэдэнь, хорин долоо хахад метр гүнзэгы харуулжа байба.
- ²⁹Уһан дорохи хада корабляараа мүргэнэ гүбди гэжэ айн, тэдэ түргэхэн үдэр болоһой гэжэ зальбарһаар корабльһаа дүрбэн бархаг хаяба.
- ³⁰Морягууд корабльһаа тэрьедэхэ гэжэ шиидээд, хушуун талаһаа бархагуудые бүхэлжэ уяха һанаатайбди гэхэн хэбэр үзүүлжэ, бага онгосо уһанда буулгаба.
- ³¹– Хэрбээ эдэ зоной корабль дээрээ үлөөгүй һаа, таанад бээ абаржа шадахагүйт, – гэжэ Павел зуунай даргада болон сэрэгшэдтэ хэлэбэ.
- ³²Тиихэдэнь сэрэгшэд бага онгосые барижа байһан аргамжануудые таһа сабшажа, онгосонь далайда шэнгэбэ.
- ³³Үүр сайхын урда тээ Павел хүнүүдые эдеэлыт даа гэжэ аргадаба: – Таанад арбан дүрбэн үдэр найдан хүлээһээр огто эдеэлбэгүйт, амандаашье юумэ абабагүйт.
- ³⁴Тиимэхээ бээ абархын тула эдеэлыт даа гэжэ таанадые гуйнаб. Та бүхэнэй тархиһаа нэгэшье үһэн унахагүй!
- ³⁵Иигэжэ хэлээд, Павел хилээмэ абажа, бултанай байхада Бурханда баясхалан хүргэн зальбаржа, хилээмээ хухалан эдижэ оробо.



³⁶Булта урма зориг орожо, баһа эдэе хоол бариба.

³⁷Корабль дээрэ бидэ ниитэдэе хоёр зуун далан зургаан хүн байгаабди.

³⁸Эдеэлжэ садаад, тэдэ зон тарья талхаа уһа руу хаяжа, корабляа хүнгэлбэ.

Кораблин хосорһон тухай

³⁹Үдэр болоходо морягууд танигдахагүй хуурай газар хараба. Элһэн эрьетэй далайн тохой обёороод, тиишэнь корабляа оруулжа, тэндэ зогсожо туршая гэжэ тэдэ шиидэбэ.

⁴⁰Бархагуудаа таһалжа далайда орхихотойгоо сасуу тэдэ жолоодогшо һэльбүүрнүүдые бариһан аргамжануудаа тайлаад, һалхинда туугдахын тула далбагаа татан, эрьедэ дүтэлжэ байба.

⁴¹Гэбэшье тэдэ хушуурһан элһэн газарта тээгдэжэ, корабль элһэндэ шаагдаад, хүдэлхэгүйгөөр байшаба, харин далайн эбхэрээн кораблин хойто талые сохижо, бутаргажа захалба.

⁴²Тиихэдэнь хаалтын зон эрьедэ гараад зугадана гү гэжэ айһан сэрэгшэд тэдэниие алаха гэжэ шиидэбэ.

⁴³Гэбэшье зуунай дарга Павелые абарха һанаатай байжа, сэрэгшэдэй һанаашалһанаа бэлүүлхэдэнь һаалта хэбэ. Зуунай дарга тамаржа шадаха хүн бүхэндэ түрүүн уһанда һүрэхыень,

⁴⁴харин үлэһэн зоние эрье хүрэтэр модон дээрэ гү, али кораблин хэлтэрхэй дээрэ тамаржа ошохыень захирба. Тиигэжэ булта хуурай газар дээрэ бүтэн бүрин юумэд гараба.

Элшэнэрэй бүтээһэн хэрэгүүд 28

Павел Мальта аралда

¹Маанадай бэеэ абарһан арал Мальта гэжэ нэрэтэй байһыень мэдэбэбди.

²Тэндэхи зон бидэниие угаа һайнаар угтаа. Бороо орожо, ехэ хүйтэн байһан хадань тэдэнэр түүдэг аһаажа, бултыемнай дуудаба.



³Павелай тэбэри бургааһа түүжэ асараад, түүдэг руу хаяжа байхадань хорото могой гартань аһашаба. Тэрэ могой халуун галһаа тэрелжэ, түүдэгэй бөөн бургааһан сооһоо мүлхижэ гараа бшуу.

⁴Гартань аһашоод байһан могойе харахадаа Мальтын зон бэе бээдээ: «Энэ хүн алууршан байгаа ёһотой. Далайһаа абарагдаһаншье һаа, Үһөөгөө абалгын бурхан энээниие амиды орхиногүй», – гэлдэбэ.

⁵Харин Павел өөртөө ямаршье гэм хүргэнгүй тэрэ могойе галда һэжэрэн хаяба.

⁶Павелай хабдахые гү, али гэнтэ амигүй унахыень зон хүлээбэ. Ехэ удаан хүлээжэ, Павелтай муу юумэнэй тохёолдонгүй байһыень харахадаа, һанамжаяа хубилган, энэмнай ямар нэгэн бурхан байна гэлсэбэд.

⁷Тэндэһээ холо бэшэ Публий гэжэ нэрэтэй аралай захирагшын гэр буусань оршодог байгаа. Тэрэ бидэниие ехэ дулаанаар угтаа, бидэ тэрэнэйдэ гурбан үдэр айлшалаа һэмди.

⁸Эгээл энэ үедэ Публиин эсэгэнь дизентеригээр үбдөөд, халууржа хэбтээ. Павел таһалгадань орожо зальбараад, тэрэниие гараараа адислан эдэгээбэ.

⁹Энээнэй һүүлдэ үбшэн байһан аралай бусад зон Павелда ерэжэ, өөһэдыгөө эмнэлүүлдэг байгаа.

¹⁰Тамаржа ошохоёо байхадамнай, тэдэ зон хүндэлһэнэй тэмдэг үзүүлэн, бидэндэ ехэ бэлэг асаржа, бүхы шухала юумээр маниие хангаба.

Мальтаһаа Рим аяншалһан тухай

¹¹Гурбан һара үнгэрһэн хойно энэ аралда үбэлжэһэн Александриин «Диоскуры» гэжэ корабльда һуужа, бидэ саашаа тамараа бэлэйбди.

¹²Сиракуз хото ерэжэ, гурбан үдэрөөр зогсоод,



¹³Тэндэһээ гараад, Реги хото тамаран хүрэбэбди. Хойто үдэрынь урда зүгһөө һалхин үлэбэ, тиимэһээ хоёр хоноод бидэ Пуतेол портдо байгаабди.

¹⁴Тэндэ хүзэглэгшэ аха дүүнэртэйгөө уулзажа, гуйһан ёһоорнь долоон хоног айлшалбабди. Тиигэжэ бидэ Рим хото хүрэбэбди.

¹⁵Тэндэхи хүзэглэгшэ аха дүүнэрнай бидэнэр тухай дуулахадаа, урдаһаамнай угтан гараба. Нэгэ зариманиинь Аппиевай Форум гэжэ, нүгөөдүүлынь Айлшадай гурбан буудал гэжэ газарта хүрэжэ ерэбэд. Тэдэниие харахадаа, Павел Бурханда баясхалан хүргэжэ, урмашаба.

Рим хотодо

¹⁶Павелай Рим ерэхэдэнь, харууһалжа байһан сэрэгшэтэйнь хамта тусгаар газарта байрлаха зүбшөөл үгтэһэн байгаа.

¹⁷Гурбан үдэрэй үнгэрһэн хойно Павел эндэхи нютагай еврей бүлгэмэй хүндэтэй хүнүүдые өөртөө уриба. Тэдэнэй ерэхэдэнь, Павел иигэжэ хэлэбэ: – Аха дүүнэрни! Арад зондоо эсэргүү гү, али үбгэ эсэгэнэрэйнгээ ёһо заншал буруушааһан ямаршые муу юумэ хээгүй байхадамни намайе Иерусалимда барижа, римэйхинэй гарта тушаагаа.

¹⁸Тэдэ намайе мүшхэжэ, саазалхаар юумэ хээгүй хадамни табиха һанаатай байгаа.

¹⁹Еврейнүүдэй арсажа байһан дээрэһээ би римэй хаанай зарга шүүбэри шаардаха баатай болооб. Гэбэшые би арад зоноо зэмэлхын тула энэ бүхэниие хээ бэшэб.

²⁰Энэ талаар уулзажа хөөрэлдэхын тула би таанадые өөртөө дуудааб. Юуб гэхэдэ, Израилиин зоной найдажа байһан хүнэй түлөө би гэнжэлүүлээд ябанаб.

²¹– Бидэ шамда хабаатай ямаршые бэшэг Иудейһээ абаагүйбди, аха дүүнэрэймнай хэнииньшые тэндэһээ ерэжэ шам тухай мэдээсэл, муу юумэ дуулгаагүй.

²²Гэбэшье өөрыншни һанамжа бидэ дуулаха дуратай байнабди, юуб гэхэдэ, хүзэглэгшэдэй энэ бүлгэм хаа хаанагүй арсалдаа гаргадаг гэжэл бидэ мэдэнэбди.

²³Павелтай хэлсэжэ тогтооһон үдэр тэрэнэй байрада ехэ олон зон сугларба. Үглөөнһөө үдэшэ орой болотор Павел Бурханай хаан орон тухай номнобо. Иисус тухай хэлэһэн үгэнүүдэйнгээ үнэн зүб байһыень Моисейн Хуулиин ба лүндэншэдэй гэршэнүүдээр баталжа байгаа.

²⁴Нэгэ зарим шагнагшадынь тэрэнэй үгэдэ этигэжэ, нүгөө зариманиинь этигэнгүй байба.

²⁵Нэгэ һаналда ерэнгүй тэдэнэй таража эхилхэдэ, Павел тэдэниие иимэ үгэнүүдээр үдэшэбэ: – Нангин һүлдэ лүндэншэ Исаяягаар дамжуулан манай үбгэ эсэгэнэртэ сохом үгэнүүдые хэлээ һэн:

²⁶«Шэхээрээ шагнаад, ойлгохогүйт, Нюдөөрөө хараад, харахагүйт гэжэ тэрэ арадта ошожо хэлэ.

²⁷Энэ арадай зүрхэниинь өөхөөр хушагдаа, Шэхээрээ арай гэжэ дуулана, нюдэниинь анилдаад байна. Тиигээгүй һаа, нюдөөрөө хараха, шэхээрээ дуулаха, зүрхөөрөө ойлгохо һэн. Тиигээд намда хандаха һэн, тиин би тэдэниие эмшэлэн эдэгээхэ һэм».

²⁸Абаралга тухай энэ Бурханай Мэдээсэл бусад арадуудта эльгээгдээ гэжэ таанад мэдэгты. Тиигээд тэдэл дуулаха.

³⁰Аяар хоёр жэл соо Павел хүлһэлжэ байрлаһан байрадаа ерэһэн хүн бүхэниие угтажа абадаг һэн.

³¹Тэрэ Бурханай хаан орон тухай номножо, Дээдын Эзэн Иисус Христос тухай зоригтойгоор хургажа байгаа. Хэншье тэрэндэ һаалта хэдэггүй һэн.



Яковай хандалга

Яковай хандалга 1

Һүзэг этигэл болон ухаан бодол тухай

¹Бүхы газар дэлхэйгээр тараһан арбан хоёр угсаата Бурханай зон, таанадые Бурханай болон Дээдын Эзэн Иисус Христосой Яков зараса мэндэшэлнэ.

²Аха дүүнэрни, элдэб олон бэрхэшээл зоболонгуудые үзэхэдөө, өөһэдыгөө жаргалтайбди гэжэ тоологты.

³Һүзэгэйтнай туршагдахада, тэсэбэритэй болонобди гэжэ өөһэдөө мэдэнэ гүбта даа.

⁴Эрхим түгэс, алишье талаараа болбосон, дутагдал дутуугүй байхын тула таанад ямаршье юумые эсэс хүрэтэрнь тэсэжэ гараха ёһотойт.

⁵Хэрбээ хэн нэгэнэйтнай сэсэн ухаагаар дуталдабалнь, тэрэ тиимэ сэсэн ухаае таанадта хайрладаг Эзэн Бурхание гуйг лэ, Эзэн Бурхан хүн бүхэндэ гуйһаниенъ элбэг дэлбэгээр, уур суhalгүйгөөр үгэдэг ха юм.

⁶Зүгөөр Бурхание гуйхадаа һүзэгтэйгөөр, маргангүй гуйгты. Маргаһан хүн далайн долгинуудай һалхинда иишэ тишээ туугдаһантай адли гүб даа.

⁷⁻⁸Тиимэһээл һанаа бодолоо хубилгадаг, хэжэ байһандаа гүйсэд этигэдэггүй хүн Дээдын Эзэнһээ ямаршье юумэ абахаб гэжэ бү найдаг.

Үгытэй болон баян хүнүүд тухай

⁹Бурханай үгытэй һүзэглэгшые дээгүүр үргэһэндэ тэрэ хүн баярлажа байг.

¹⁰Баяншье хүниие Бурханай доошонъ дарахадань, тэрэ хүн баярлажа байг, юуб гэбэл, тэрэ уданшьегүй талын сэсэгтэл хүнэхэ ха юм.

¹¹Наран шангаар шаража, сэсэг ногоое хатаана, һалбарһан сэсэгэй үнгөнъ буурана. Энээндэл адляар баян хүн өөрынгөө замаар ябахадаа, хосорон һаладаг юм.

Хорхойтуулгаар туршаха тухай

¹²Туршалгануудые дабажа гараһан хүн жаргалтай юм, юуб гэбэл, туршалгануудые дабахадаа, тэрэ хүн Бурханай өөртэнь дуратай зондо найдуулһан мүнхын амидаралда хүртэнэ ха юм.

¹³Туршалгада ороходоо «Бурхан намайе туршана» гэжэ бү хэлээрэйт, юундэб гэбэл, Бурхание харатай юумээр туршадаггүй, тиин тэрэ өөрөөшье хүнүүдые туршадаггүй юм.

¹⁴Харин хүн бүхэн өөрынгөө нүгэлтэ хүсэлэнгүүдтэ хүтэлүүлэн, альбандань орон, хорхойтуулгада абтадаг юм.

¹⁵Харата хүсэлэнгүүднай бүрилдэһөөр нүгэл түрүүлнэ, харин нүгэлнай ехэ боложо халихадаа, үхэл түрүүлнэ.

¹⁶Хайрата нүхэдни, өөһэдыгөө бү мэхэлүүлэгты.

¹⁷Бүхы һайн һайхан, эгээн эрхим бэлэгүүд дээрэһээ, тэнгэрийн одо мүшэдые, нара һарые бүтээһэн, хэзээдэшье хубилдаггүй, тэдэ ододто адли һүүдэр хэзээшье татадаггүй Бурханһаа үгтэдэг юм.

¹⁸Бурхан өөрынгөө һайн дураар үнэн зүб мэдээсэлэй ашаар бүхы зохёон бүтээгдэһэн юумэнүүдэйнгээ дээжэнь болгохын тула маанадые мүндэлүүлһэн байгаа.

Бурханай үгэ дуулажа, тэрэниие баримталжа байха тухай

¹⁹Тиимэһээл, инаг хайрата аха дүүнэрни, шагнахадаа шамдуухан, хэлэхэдээ, уурлахадаа яаралгүй байгты.

²⁰Таанад уурлаха сухалдахадаа Бурханай хүсэһэн һайн һайхан юумэнүүдые бүтээжэ шадахагүйт.

²¹Элдэб янзын забхай зальхай, нүгэлтэ юумэнүүдые үйлэдэхээ болёод, зүрхэ сэдхэлдэтнай һуулгагдаһан, таанадые абарха аргатай мэдээсэлые зосоогоо тогтоожо байгаарайгты.

²²Тэрэ мэдээсэлые гансал шагнан өөһэдыгөө мэхэлнэгүй, ажамидаралдаа хэрэгжүүлжэ байгаарайгты.

²³Тэрэ үгые шагнаад, харин ажамидаралдаа хэрэглээгүй хүнүүд өөһэдыгөө гэрэлдэ хараад, дүрэмни жэнхэни бодото гэжэ үзэһэн хүнүүдтэл адли юм.

²⁴Тэдэнэр өөһэдыгөө гэрэлдэ харахаяа болихотойгоо сасуу ямар дүрэтэй байһанаа мартажархидаг.

²⁵Хүнүүдые эрхэ сүлөөтэй болгодог эрхим түгэс хуули таа бүгэдын мэдэржэ, анхаржа байбалтнай, шагнаад, һүүлээрнь мартадаггүй, ажамидаралдаа хэрэглэдэг байбалтнай, ажамидаралтнай үлзы буянтай байхал.

²⁶Хэн нэгэнтнай хүзэг хүлдэтэйб гэжэ өөр тухайгаа һанана гү? Хэрбээ таанад хэлэ амаа татажа шададаггүй юм һаа, хүзэг хүлдэтнай дэмы хоһон гээшэ, таанад миин лэ өөһэдыгөө мэхэлнэт.

²⁷Үншэн үхибүүдтэ, бэлбэһэн эхэнэрнүүдтэ туһалха, юрын байдалаар өөрыгөө бузарлахаһаа болгоомжолхонь лэ Эсэгэ Бурханда һайшаагдадаг хүзэг хүлдэ юм.

Яковай хандалга 2

Хүнүүдые илгажа байха хэрэггүй

¹Аха дүүнэрни, манай алдарта Дээдын Эзэн Иисус Христосто хүзэглэдэг юм хадаа хүнүүдые нюураарнь илгaha ёһогүйт.

²Танай суглаанда алтан бэһэлигтэй, баян хубсаһатай хүн, мүн элэһэн хубсаһа үмдэһэн үгытэй хүн орожо ерэбэ гээд бодоод үзэгты.

³Та баян хубсаһатай хүниие ехээр хүндэлжэ: «Танда эндэ һуубалтнай дээрэ», – гэжэ хэлээд, харин үгытэй хүндэ: «Ши тээ тэндэхэнэ хүл дээрэ зогсоод бай», али үгы һаа «мини хүлөөр эндэ шала дээрэ һуу», – гэжэ хэлэбэлтнай,

⁴сэдьхэлдээ хүнүүдые илгадаг, муу һанаатай зарга шүүгшэ байһыетнай харуулха бэшэ гү?



⁵Хайрата аха дүүнэрни, шагнагты даа: Бурхан үгтэйшүүлые этигэл хүзэгөөрөө баян бардам байхыень, өөртэнь дуратай хүнүүдтэ үгэхэб гэжэ найдуулһан хаан оронойнгоо залгамжалагшад болохыень шэлэжэ абаа бэшэ һэн гү?

⁶Харин таанар үгтэй хүниие гомдохообот! Тиихэдээ таанадые баяшуул лэ хашажа мүрдэжэ, зарга шүүбэридэ оруулдаг бэшэ аал?

⁷Таанадта үгтэһэн Дээдын Эзэнэй алдар нэрые тэдэнэр лэ муулан муудхана бэшэ аал?

⁸«Бусад зондо өөртөөл адли дуратай бай», – гээд Нангин Бэшэг соо бэшээтэй Хуули сахижа байдаг хаа, таанад зүб юумэ хэнэт.

⁹Харин хүнүүдые нюураарнь, гадаада шэнжээрнь илгадаг байбал, таанад нүгэл абанат, тиигээд Хуулида заагдаһан ёһоор хуули эбдэгшэд болонот.

¹⁰Хэрбээ хэн нэгэн Хуулиин зүйл бүхэниие сахижа байгаад, нэгыеньшые эбдэһэн байбал, Хуулиин бүхы зүйлнүүдые эбдэһэн болоно.

¹¹Ушарынь юуб гэбэл, «Хурисалтай юумэ бү хэ» гэжэ хэлэһэн лэ нэгэн «Бү ала» гэжэ хэлэһэн байгаа юм. Тиимэһээ хурисалтай үйлэ хээгүй аад, хүниие алаһан байбал, таанад Хуули эбдэһэн хүн болонот.

¹²Маанадые эрхэ сүлөөтэй болгохо хуулиин зарга шүүбэридэ орохо хүсэлтэй хүнүүдтэ зохихоор юумэ хэлэжэ, хэжэ ябагты.

¹³Ушарынь хэлэбэл, үршөөл хайра үзүүлдэггүй хүниие Бурхан үршөөл хайрагүйгөөр шүүбэрилхэ юм; тиихэдэ үршөөл хайра зарга шүүбэриһээ дээгүүр үргэгдэхэ.

Һүзэг этигэл ба үйлэ хэрэгүүд тухай

¹⁴Аха дүүнэрни, этигэл хүзэгтэй байһанаа гэршэлхэ ямаршые юумэ хэдэггүй аад, этигэл хүзэгтэйб гэжэ хэлэдэгынь ямар аша тухатай юм бэ? Тиимэ этигэл хүзэг таанадые абарха аал?



¹⁵Хубсаһа хунаргүй, эдихэ хоолгүй аха дүүнэр байгаа гэжэ бодоод үзэгты.

¹⁶Тиигээд хэн нэгэнэйтнай тэдэндэ хэрэгтэй юумэ үгэнгүй, зүгөөр: «Би таанадта хайн хайхание хүсэнэб, таанад дулаасагты, эдеэлэгты», – гэжэ хэлэхэниинь ямар аша туһатай юм бэ?

¹⁷Этигэл хүзэгшые баһал тиимэ: үйлэ хэрэгүүдээр баталагдаагүй хаа, тиимэ этигэл хүзэг дэмы хоһон юм.

¹⁸Хэн нэгэн зүбшөөнгүй: «хайн хайхан хэрэгүүдые бүтээншыегүй этигэл хүзэгтэй байжа болохол», – гэжэ хэлэхэ. «хайн хайхан хэрэгүүдые бүтээнгүй, өөрынгөө этигэл хүзэгые харуула. Тиихэдэ би хэрэгүүдээрээ этигэл хүзэгөө харуулхаб», – гэхэн харюу би үгэхэб.

¹⁹Бурхан ори ганса юм гэжэ ши этигэнэш. Тэрэшни хайн. Ада шүдхэрнүүдшые баһа тиимэ этигэлтэй байһан дээрэхэ айн хүрдэн халаганадаг юм.

²⁰Тэнэг амитан, үйлэ хэрэгүүдээр баталагдаагүй этигэл хүзэгэй дэмы хоһон байһыень ши мэдэхэ хүсэлтэй аалши?

²¹Манай үбгэ эсэгэ Абраһам Исаак хүбүүгээ үргэлэй газарта тахил болгон үргэжэ, тэрэ хэрэгээрээ үнэн сэдхэлтэй байһанаа баталаа бэшэ гү?

²²Харагты даа, тэрэнэй этигэл хүзэгынь хэрэгүүдтэнь хамһалсажа, тиигээд хэрэгэйнь ашаар этигэл хүзэгынь эрхим түгэс болоо.

²³«Абраһам Бурханда этигээ, тиигэхэдэнь Бурхан тэрэниие үнэн сэдхэлтэн гэжэ тоолоо», – гээд Нангин Бэшэг соо хэлэгдэхэн юумэн бээлбэ даа. Тиигэжэ Абраһам Бурханай нүхэр гэжэ нэрлэгдэбэ.

²⁴Харана гүт, хүн гансал этигэл хүзэгөөрөө бэшэ, харин хэхэн хэрэгүүдээрээ Бурханай урда үнэн зүб болодог юм.

²⁵Янхан эмэ Раавтай тон тиимэ юумэн ушараа һэн. Тэрэ израилиин тагнуулшадые гэртээ оруулжа хүндэлөөд, ондоо харгыгаар

тэрьедэхэдэнь туһалһан байгаа. Тиигэжэ тэрэ өөрынгөө хэрэгүүдээр Бурханай урда үнэн зүб гэжэ тоологдоо.

²⁶Тиимэхээл, хүнэхэгүй махабад бэе яжа үхэхэн байдаг бэ, тон тиигэжэл үйлэ хэрэгээр баталагдаагүй этигэл хүзэг дэмы хоһон байдаг юм.

Яковай хандалга 3

Хэлэн тухай

¹Аха дүүнэрни, таанад бүгэдөөрөө багшанар болохо гэжэ бү оролдогты, бидэ багшанар бүри шэрүүн зарга шүүбэридэ орохобди гэжэ таанад мэдэнэ ха юмта.

²Бидэ булта олон нүгэл шэбэл хэдэгбди. Тиихэдээ хэлэ амаараа нүгэл хэдэггүй хүн эрхим түгэс гээшэ, тэрэ хүн өөрыгөө хазаарлажа шадаха юм.

³Бидэ мори жолоодохын тулада хазаарладагбди, тиигээд лэ тэрэниие дуратай тээшээ ябуулха аргатай байдагбди.

⁴Али үгышье һаа, далайн онгосонуудые хараад үзэгты: тэдэнэр абарга томо, айхабтар шанга һалхинда туугдадагшье һаа, багахан жолоогоор хүтэлүүлэгдэн, жолоодогшын һанаһан лэ зүг руу ябадаг юм.

⁵Хэлэн тон тиимэ юм: бишыхан эрхэтэн аад лэ, тэрэ агууехэ юумэнүүд тухай айладхадаг юм. Хараад үзэгты, галай багахан дүлөөр ямар ехэ ой модон шатаагдадаг бэ.

⁶Хэлэн гал дүлэнтэй адли, бэеын ондоо бүхы эрхэтэнүүдые бузарладаг нүгэлтэ хүсэн юм, тиигээд хүнэй бүхы амидаралые тамын оёорһоо гаража байһан гал дүлөөр шатаадаг юм.

⁷Бидэ хүнүүд шубуудые, мүлхигшэдые, далайн амитадые, бусадшье элдэб янзын амитадые номгоруулха аргатайбди, номгоруулһаншье байгаабди.

⁸Төөд нэгэшье хүн хэлээ номгоруулжа шадаагүй юм. Тэрэмнай үхэлэй хоро сасадаг баригдашагүй хорон юм.

⁹⁻¹⁰Бидэ хэлээрээ магтаалшье, хараалшье хэлэдэгбди. Бидэ хэлээрээ Эсэгэдээ болон манай Дээдын Эзэндэ баяр баясхалан хүргэнэбди, Бурхантай адли байхаар бүтээгдэһэн хүнүүдые хараалда хүртөөнэбди. Тиимэ юумэн байха ёһогүй.

¹¹Нэгэ булагһаа нэгэ зэргэ амтатай болон гашуун уһан дэлбэрхэ аргатай аал?

¹²Аха дүүнэрни, боди модонһоо олива гараха аал, үгы һаа үзэмэй модонһоо боди модоной жэмэс гараха аал? Тэрээндэл адляар гашуун уһатай булагһаа амтатай уһан урдаха аал?

Дээрэһээ үршөөгдэһэн ухаан бодол тухай

¹³Танай хэнтнай сэсэн ухаатайб, юумэ ойлгодог бэ? Тэрэнээ үнэн зүбөөр ажамидаран, дарууханаар болон бодолтойгоор һайн һайхан үйлэ хэрэгүүдые бүтээн гэршэлэгты.

¹⁴Төөд сэдхэлдээ хорон атаархалтай, ганса бээе бододог аад, сэсэн ухаатайб гэжэ һайрхан, худал юумэ хэлэн, үнэн зүбые бү далдалагты.

¹⁵Тиимэ ухаан дээдэ тэнгэриһээ үгтэнэ бэшэ, харин энэ дэлхэйһээ, ганса бээе бодоһонһоо, ада шүдхэрһөө эхитэй ухаан юм.

¹⁶Хүнүүдэй атаа жүтөөндэ абтаһан, ганса бээе бодоһон ушарта эмхи журамгүй байдал, элдэб янзын нүгэл шэбэл дайралдадаг.

¹⁷Харин дээрэһээ үгтэдэг ухаан маанадые арюун сэбэр, эб найрамдалтай, номгон даруу, энэрхы сэдхэлтэй, үршөөл хайратай, аша туһатай, хүнэй нюур харадаггүй, үнэн сэхэ болохо тээшэ хүтэлдэг юм.

¹⁸Эб найрамдал найруулагшад эб найрамдалай үрэ тарихадаа үнэн зүбэй ургаса хададаг юм.

Яковай хандалга 4



Бурханай мэдэлдэ байгты

¹Юундэ таанад бэе бээдээ үһөөрхэлдэнэ, хоорондоо арсалдана гээшэбта? Тэдэтнай танай махабад бэеые мэдэлдээ абахын тула оролдодог хүсэлэнгүүдһээ болоно бэшэ гү?

²Таанад ямар нэгэн юумэтэй болохые хүсэнэт, теэд тиимэ юумэтэй боложо шаданагүйт, тиимэхээ таанад алахадашье бэлэн байнат. Юумэнүүдтэй байхые угаа ехээр хүсэнэт, теэд тэдэ юумэнүүдтэй болохо аргагүй байһанһаа хэрүүл ама гарганат, үһөөрхэнэт. Хүсэхэн юумэнүүдээ Бурханһаа гуйгаагүй юм хадаа таанад тэдэнээ абанагүйт.

³Тиихэдэ гуйхадаашье тэдэ юумэнүүдээ абанагүйт, юундэб гэхэдэ, таанад хайн хайханай тула бэшэ, харин өөрынгөө хүсэлэнгүүдые хангахын тула гуйнат.

⁴Бурханда урбагша зон, энэ оршолон дэлхэйдэ дуратай байхадаа таанад Бурханай дайсад болонот гэжэ мэдэнэгүй аалта? Тиин энэ оршолон дэлхэйтэй нүхэсэхээ ханабал, Бурханай дайсан болонот.

⁵«Зосоомнай оршоһон хүлдын үнэн сэхэ байхые Бурхан хүсэжэ байна», – гэжэ Нангин Бэшэг соо дэмы хэлэгдээгүй юм.

⁶Тиихэдэ Бурхан маанадые бүришые элбэг дэлбэгээр үршөөл хайрадаа хүртөөнэ. «Омог бардам зоние Бурхан буруушаана, харин номгон даруу зоние үршөөл хайрадаа хүртөөнэ», – гэжэ Нангин Бэшэг соо хэлээтэй байна ха юм.

⁷Тиимэхээ Бурханай мэдэлдэ байгты. Шолмосто эсэргүүсэгты, тиигэбэлтнай тэрэ таанадһаа зайлаха.

⁸Бурханда дүтэлэгты, тиихэдэтнай тэрэ танда ойртохо. Нүгэлтэн, ажамидаралаа арюудхагты; билдагуушад, зүрхэ сэдхэлээ арюудхагты.

⁹Гашуудагты, бархирагты, гэгэн уйлагты. Энеэлдэхээ болёод, уйлалдагты. Баярлахын орондо гашуудажэ байгты.

¹⁰Бурханай урда номгон даруу байгты, тиин тэрэ таанадые агууехэ гэжэ тоолохо.

Бэе бэеэ бү шүүмжэлэгты

¹¹Аха дүүнэр, бэе бэеэ бү шүүмжэлэгты. Һүзэглэгшэ нүхэрөө шүүмжэлхэдээ, али зэмэлхэдээ, таанад Бурханай Хуули шүүмжэлнэ, зэмэлнэ гээшэт. Зүгөөр Хуули зэмэлхэдээ, таанад Хуули сахигша бэшэ, харин Хуули шүүбэрилэгшэ болобо гээшэт.

¹²Гансал Бурхан Хуули үгэдэг ба шүүбэрилдэг юм. Гансал тэрэ абарха, али үгы һаа хүнөөхэ аргатай. Харин ши ондоо хүниие зэмэлхэдээ өөрыгөө хэн гэжэ тоолобош?

Ехэрхүү зан бү гаргагты

¹³Зай, «Мүнөөдэр гү, али үглөөдэр тэрэ хото ошохобди, тэндэ нэгэ жэл соо худалдаа наймаа хээд, ехэхэн алта мүнгэ олохобди», – гэжэ хэлэдэг таанад мүнөө намайе шагнагты.

¹⁴Үглөөдэр таанадтай юу тохёолдохые таанад мэдэнэгүйлта. Таанад халта зуура бии болоод, һүүлээрнь үгы болошодог утаа ууралтай адлит.

¹⁵«Дээдын Эзэнэй хүсэбэл бидэ амиды байхабди, тиимэ юумэ, али ондоо юумэ хэхэбди», – гэжэ хэлэжэ байхын орондо

¹⁶таанад бардам зангаараа бүдүүрхэнэт, теэд тиигэжэ бүдүүрхэхэнь буруу юм.

¹⁷Бидэ хайн хайхан юумэ хэхэ ёһотой байһанаа мэдэжэ байгаад, хэдэггүй байбал, нүгэл абана гээшэбди.

Яковай хандалга 5

Баяшуулда һэргылэмжэ үгэнэ

¹Баяшуул, мүнөө таанад намайе шагнагты! Таанад орилон бархирагты, гэгэн уйлагты, танай тархи дээрэ оһол гай буухаяа байна ха юм.

²Баялиг зөөритнай үмхирөө, хубсаһа хунартнай хибэндэ эдьюлшоо.

³Алта мүнгэнтнай жэбэдэ даруулаа, тиин тэрэ жэбэ таниие зэмэлхэ, махабад бэеыетнай галда мэтэ шатаажархиха. Таанад зөөри зөөшээ эдэ һүүлшын үдэрнүүдтэ дэмы суглуулжал байнат.

⁴Таряалан дээрэтнай ажаллаһан хүдэлмэришэдтэ хүлһыень түлэхээ таанад арсабат, харин мүнөө тэдэнэй түлэгдөөгүй салингын таанадые зэмэлэн хашхаржа байна. Һүр жабхаланта Дээдын Эзэн ургасыетнай хадаһан хүдэлмэришэдэй гэгэхые дуулаа.

⁵Эндэ, газар дэлхэй дээрэ байхадаа таанад гансал өөһэдынгөө гэдэһэ дүүргэхэ ба наартайгаар сагаа үнгэргэхэ тухайл бододог байгаат. Харин мүнөө таанад гаргахаяа абаашажа байһан шахамал буруундал адли байнат.

⁶Таанадта эсэргүүсээшьегүй үнэн сэдхэлтэниие таанад зэмэлжэ алаһан байгаат.

Тэсэбэритэй, сагаан сэдхэлтэй байгты

⁷Зай, аха дүүнэр, Дээдын Эзэнэй заларан ерэтэр тэсэбэритэй байгты. Таряашаниие хараад үзыт, тэрэ газарһаа ургаса абахын тула ехэл тэсэбэритэйгээр намарай болон хабарай бороо хүлеэжэ байдаг.

⁸Таанадшые тэдэ таряашанда адли ехэ тэсэбэритэй байгты, зоригоо бү алдагты. Дээдын Эзэнэй заларжа ерэхэ үдэр ойртоод байна.

⁹Аха дүүнэр, бэе бээдээ гомдохол бү баригты, тиигэбэл таанад гэмнүүлхэгүйт; Заргаша Бурхан үүдэнэй саана зогсожо байнал.

¹⁰Дээдын Эзэнэй нэрээр айладхажа байһан лүндэншэдые һанагты. Бэрхэшээл зоболондо ороходоо тэдэнэй ехэл тэсэбэритэй байдагые жэшээ болгон һажаажа байгты.

¹¹Аргагүй ехэ тэсэбэриинь түлөө бидэ тэдэ зониие жаргалтай гэжэ тоолодогбди. Таанад Иовой ямар тэсэбэритэй байһые, Дээдын Эзэнэй һүүлэй һүүлдэ тэрээниие буян хэшэгтээ хүртөөһые һаныт. Дээдын Эзэн үршөөл хайратай, энэрхы сэдхэлтэй байһан дээрэхэе тиигэжэ туһалһан байгаа.



¹²Аха дүүнэрни, гол шухал юумэ хэлэхэмни: тэнгэрээршье, газар дэлхэйгээршье, ондоошье юумээр бү тангариглагты. Харин гэмнүүлхэгүйн тула „тиимэ“ гээ хаа, зүбшөөгты, „үгы“ гээ хаа, үгы гэхээрээ байгты.

¹³Зоболон бэрхэшээлдэ ороһон байбал, таанад зальбаржа байха ёһотойт. Баяртай хүхюутэй ябабал, Бурхание магтаһан дуунуудые дуулажа ябаха ёһотойт.

¹⁴Хэн нэгэнэйтнай үбдөөд байгаа хаа, хүзэглэгшэдэй бүлгэмһөө хүтэлэгшэдые дуудагты. Тэдэнэр Дээдын Эзэнэй нэрэ алдарые дуудан, үбшэн хүнэй толгойдо оливай тоһо түрхөөд, хажуудань зальбарха.

¹⁵Этигэл хүзэгтэйгөөр зальбархада үбшэн хүн эдэгэхэ, Дээдын Эзэн тэрэниие хүл дээрэнь бодхоохо. Тэрэ хүнэй нүгэл хэһэн байгаа хаань, нүгэлынь хүлисэгдэхэ.

¹⁶Эдэгэхэ гэбэл бэе бээдээ нүгэл шэбэл тухайгаа хөөрөжэ үгөөд, бэе бээынгээ түлөө зальбарагты: үнэн сэдхэлтэнэй зальбаралга ехэ юумэ хэхэ аргатай.

¹⁷Илия маанадтал адли хүн байгаад, бороо бү ороһой гэжэ ханалтайгаар зальбаран мүргөө, тиин бороо гурба хахад жэл соо ороогүй юм.

¹⁸Бороо ороһой гэжэ тэрэ дахин зальбаран мүргэбэ, тиихэдэнь огторгойһоо газар дээрэ бороо адхаржа, ургаса гараба.

¹⁹Аха дүүнэрни! Хэрбээ хүнэй зүб замһаа хадуурхада, хэн нэгэн тэрэниие сэхэ харгыдань оруулбал,

²⁰нүгэлтэниие буруу харгыһаань холодуулһан хүн тэрэниие үхэлһөө аршалжа, тэрэнэй олон нүгэлынь хүлисүүлбэ гэжэ мэдэг.



Пётрой 1-дэхи хандалга

Пётрой 1-дэхи хандалга 1

Амаршалга

¹Понт, Галат, Каппадоки, Аси, Бетани нютагуудаар таража нууһан ерүүл зон, Бурханай шэлэжэ абаһан хүнүүд, таанадые Иисус Христосой Пётр элшэн амаршална.

²Иисус Христосой үгэ дуулажа, шуһаарнь сэбэрлүүлхын тула таанад Эсэгэ Бурханай эрхэ мэдэлээр шэлэгдэжэ абтаһан байгаат, тэрэнэй Нангин хүлдын ашаар арюудхагдаһан байгаат. Бурханай үршөөл хайра, амгалан тайбан та бүхэнтэй элбэг дэлбэг байхань болтогой.

Амиды найдал

³Манай Дээдын Эзэн Иисус Христосой Эсэгэ Бурханда баяр хүргэе! Үхэхэн Иисус Христосые амидыруулхадаа, Бурхан агууехэ үршөөл хайраараа шэнэ амидарал бидэндэ үршөөгөө. Тиин маанадые амиды найдалаараа дүүргээ,

⁴тиимэхээ Бурханай өөрынгөө хүнүүдтэ үгэхөөр хадагалжа байһан элбэг дэлбэг буян хэшэгтэ хүртэхэбди гэжэ бидэ найданабди. Тэрэ буян хэшэг таанадта тэнгэри дээрэ хадагалагдана, тэрэ үмхирхэгүй, хүнэхэгүй, бузарлагдахагүй.

⁵Бурханай хүсэн этигэл хүзэгэйтнай ашаар сагай эсэстэ абаралгада хүртэтэртнай таанадые хахижа байна.

⁶Тиимэхээ энээндэ баясажа байгты. Мүнөө түр зуура элдэб янзын туршалгануудһаа зобожо тулижашье байбал, баясажа байгты.

⁷Юундэб гэхэдэ, тэдэ зоболонгууд танай хүзэг этигэл бодото байна гү гэжэ туршана, батална гээшэ. Галда шатажа үгы болодог алтаншые галаар туршагдадаг ха юм, зүгөөр танай хүзэг этигэл алтанһаа үлүү үнэтэй, тиимэхээл тэрэнэйтнай үнэн байһыень заабол туршаха, баталха хэрэгтэй юм. Тиигээд лэ таанад Иисус Христосой заларан ерэхэ Үдэр магтаалда, алдар солодо, нэрэ түрэдэ хүртэхэт.

⁸Тэрэниие хараагүйшые хаа, таанад тэрээндэ дуратай байнат; мүнөө тэрэниие харангүйшые байхадаа, тэрээндэ этигэжэ байнат. Тиимэхэ таанад үгэнүүдээр дамжуулхын аргагүй, гайхалтай баяраар баясанат,

⁹юундэб гэхэдэ, өөрыгөө абарха хүзэг этигэлэйнгээ зорилгодо хүрэжэ байнат.

¹⁰Таанадта үгтэхэ Бурханай иимэ үршөөл хайра тухай энэ абаралгада хабаатай, бүхы юумэнүүдые шудалжа, шүүбэрилжэ байһан лүндэншэд уридшалан хэлээ юм.

¹¹Ямар сагта, яажа тэрэ буян хэшэгэй үгтэхые лүндэншэд досоогоо байһан Христосой хүлдын зааһан сагаар тодорүүлха гэжэ оролдоо. Тиихэдээл Христос зоболонгуудые дабажа гараад, һүүлдэнь алдаршаха гэжэ хүлдэ уридшалан хэлээ юм.

¹²Өөһэдынгөө аша туһада бэшэ, харин хүзэглэгшэ таанадай аша туһада тэдэнэр алба хэнэ гэжэ Бурхан тэдэ лүндэншэдтэ элирхэйлээ, тиимэхэ тэнгэриһээ эльгээгдэһэн Нангин хүлдын дамжуулһан һайн Мэдээсэлые айладхаһан хүнүүдые таанад мүнөө шагнаба гэшэт. Тэрэ нюуса Бурханай Эльгээмэлнүүдшые нээжэ мэдэхэ хүсэлтэй байна.

Арюун нангин ажамидаралтай байгты

¹³Тиимэхэ һэргэлэн байгты, оюун ухаагаараа хүдэлхэдэ бэлэн байгты. Иисус Христосой ерэхэ Үдэр таанадта үгтэхэ буян хэшэгтэ аргагүй ехээр найдажа байгты.

¹⁴Бурхание мэдэхгүй байһан үе сагтаа ажамидаралыетнай хүтэлдэг байһан хүсэлэнгүүдые дахангүй, Бурханай мэдэлдэ байгты.

¹⁵Таанадые дуудаһан Бурханай арюун нангин байдагтал адляар, таанад алишые талаһаа арюун нангин байгты.

¹⁶«Би арюун нангин байнаб, тиимэхэ таанадшые арюун нангин байгты», – гэжэ Нангин Бэшэгтэ хэлэгдэнэ.

¹⁷Нюур харангүй бүхы хүнүүдые хэһэн хэрэгүүдэйн хэмжээгээр шүүбэрилдэг Бурхание таанад Эсэгэмнай гэжэ нэрлэнэт, тиимэхэ

эндэ, энэ дэлхэйдэ байха үдэрнүүдээ тэрээндэ хүрдэн хүгэдэн үнгэргыт даа.

¹⁸Үбгэ эсэгэнэрһээ залгамжалһан удхагүй хоһон ажамидаралһаа таанад үмхирдэг мүнгэ алтаар абтаһан бэшэт,

¹⁹харин бэеын дутагдалгүй, сэбэр Хурьганай, Христосой үнэтэй сэнтэй шуһаар худалдажа абтагдаһан байгаат.

²⁰Юртэмсэ дэлхэйн зохёон бүтээгдэхэнээ урда таанадайл аша туһада Бурхан Христосые шэлэжэ абаа юм, үе сагай дүүрэжэ байхада тэрэниие элирхэйлэн харуулаа юм.

²¹Тэрэнэйл аша туһаар таанад Бурханда этигэнэт. Бурхан тэрэниие үхөөд байхадань амидыруулаа, алдаршуулаа, тиимэхээл таанад Бурханда хүзэглэнэт, найданат.

²²Үнэн зүбые дахажа, Бурханда хүзэглэдэг аха дүүнэртээ үнэн зүрхэнһөө дуратай байхын тула таанад сэдхэл зүрхээ арюудхабат. Тиимэхээ бүхы һанал бодолоороо бэе бээдээ дуратай байгты.

²³Юундэб гэхэдэ, таанад үмхирдэг үрэхөө бэшэ, харин үмхирдэггүй үрэхөө дахин түрэн байгаат. Тэрэ үрэ болбол амиды Бурханай бодото Үгэ юм.

²⁴«Ямаршье махабад бэе ногоондо адли. Ямаршье хүнэй алдар нэрэ талын сэсэг мэтэ. Ногооной хатахада сэсэгынһ унадаг.

²⁵Гэхэтэй хамта Дээдын Эзэнэй Үгэ хэтын хэтэдэ мүнхэ оршодог», – гэжэ Нангин Бэшэг соо хэлэгдэнэ. Энэ Дээдын Эзэнэй Үгэ таанадта номногдоһон һайн Мэдээсэл гээшэ.

Пётрой 1-дэхи хандалга 2

Амиды шулуун болон Бурханай хүнүүд

¹Худалаар хэлэхээ, нүгэл хэхээ болигты, хүнэй нюур бү харагты, хүндэ бү атаархагты, худалаар бү гэршэлэгты.



²Ная түрэхэн үхибүүд яажа хүндэ дуратай байдаг бэ, тэдэндэл адляар таанадшые Бурханай Үгэдэ дуратай байгты. Тэрэнэй ашаар таанад ургахат, абарагдахат.

³«Дээдын Эзэнэй үршөөлые таанад мэдэрээт», – гэжэ Нангин Бэшэгтэ хэлэгдэнэ ха юм.

⁴Хүнүүдэй голоһон, зүгөөр Бурханай шэлэжэ абаһан, Бурханай нюдэндэ үнэтэй сэнтэй байдаг амиды шулуунда – Дээдын Эзэндэ – ерэгты.

⁵Таанад амиды шулуунуудта адли Бурханда ерэгты, тиигээд Бурхан таанадһаа хүмэ бодхоохо, тиигээд тэрэ хүмэдөө таанад нангин санаартан болоод, Иисус Христосоор дамжуулан Нангин хүлдэһөө Бурханда һайшаагдаха оюун ухаанай үргэл асаржа байгты.

⁶Нангин Бэшэг соо: «Эгээн шухала, шэлэгдэжэ абтаһан, үнэтэй сэнтэй шулууе Сион дээрэ мүнөө би табинаб; тэрээндэ этигэһэн хүн хэзээшые эшэхэгүй», – гэжэ хэлэгдэнэ.

⁷Тиимэһээ хүзэглэгшэ таанадта Христос агууехэ баялиг болоно, харин хүзэглэдэггүй хүнүүдтэ тэрэ «барилгашадай голоһон шулуун» байһан аад, эгээн шухала,

⁸хүнүүдэй бүдэрдэг шулуун, хүнүүдэй торожо унадаг шулуун болоо. һайн Мэдээсэлдэ этигэдэггүйл хадаа тэдэнэр бүдэржэ байна. Тэдэнэр тиимэ табилантай юм.

⁹Тиихэдэ таанад шэлэгдэжэ абтаһан угсаатан гээшэт, Хаанай санаартад, нангин арад, Бурханай хүнүүд болонот, шэб харанхыһаа таанадые гайхалтай гэрэл туяадаа дуудаһан Бурханай агууехэ үйлэ хэрэгүүд тухай номнохоор шэлэгдэһэн хүнүүд гээшэт.

¹⁰Урдань таанад Бурханай хүнүүд бэшэ һэнта, зүгөөр мүнөө таанад тэрэнэй хүнүүд гээшэт. Урдань таанад Бурханай үршөөл хайрые мэдэхэгүй һэнта, мүнөө таанад тэрэнэй үршөөл хайрада хүртэбэт.

Һүзэглэгшэдэй баримталха ёһотой дүримүүд



¹¹Хүндэтэ аха дүүнэрни, энэ дэлхэйдэ таанад хариин, ерүүл хүнүүд юм хадаа танай ухаан бодолые хамааруулдаг нүгэлтэ хүсэлэнгүүдхээ холодожо,

¹²бусад арадуудай дунда өөхэдыгөө хайн абажа ябагты гэжэ гуйнаб. Тиигэбэлтнай мүнөө таанадые нүгэл хэгшэд гэжэ хардажа байһан зон таанадай хайн хайхан үйлэ хэрэгүүдые харахадаа, Бурханай газар дэлхэй дээрэ хүнүүдые шалгахаяа ерэхэдэнь, тэрэниие алдаршуулха.

¹³Дээдын Эзэнэй түлөө засаг захиргаанай үгэ дуулажа байгты: дээдэ засаг захиргааниие түлөөлһэн хаанай мэдэлдэ байгты,

¹⁴хуули эбдэһэн хүнүүдые хэхээхын тула, хайн хайхан хэрэгүүдые бүтээһэн хүнүүдые урмашуулхын тула хаанай табиһан захирагшадай үгэ дуулажа байгты.

¹⁵Бидэ хайн хайхан лэ хэрэгүүдые бүтээжэ, хэрэггүй юумэ шашадаг тэнэг хүнүүдэй амыень хааха ёһотойбди. Бурхан тэрэниие хүсэдэг.

¹⁶Эрхэ сүлөөтэй хүнүүдтэл адляар ажамидарагты. Зүгөөр элдэб янзын нүгэлнүүдээ нюухын тула тэрэ эрхэ сүлөөгөө бү хэрэглэгты. Таанад Бурханай зарасанарта адляар ажамидарагты.

¹⁷Хүн бүхэниие хүндэлжэ байгты. хүзэглэгшэ бүлгэмдөө дуратай байгты. Бурханһаа айн хүрдэгты, хааниие хүндэлжэ ябагты.

Зарасанарай баримталха ёһотой дүримүүд

¹⁸Зарасанар, эзэдээ хүндэлжэ, үгыень дуулажа байгты. Гансал хайн аашатай, зөөлэн зантай эзэдээ бэшэ, харин шэрүүншые зантай эзэдээ дуулажа байгты.

¹⁹Бурханай дура хүсэлые мэдэрһэн дээрэһээ гэм зэмэгүй зобожо, гай гасалан дабажа байһан хүниие Бурхан буян хэшэгтээ хүртөөхэ.

²⁰Зэмэтэй байһандаа сохюулаад лэ, тэсэжэ ябабалтнай, тэрэтнай таанадта аша тухатай байха аал? Харин хайн хайхан хэрэгүүдые

бүтээжэ байхадаа тэсэбэритэйгээр зоболон эдлэжэ байбалтнай, Бурхан таанадые найшааха.

²¹Тиимэ тэсэбэритэй байхынтнай тула Бурхан таанадые дуудаа, тиихэдэ Христос өөрыень нажаажэ байхынтнай тула таанадай түлөө зоболон эдлэжэ, таанадта жэшээ харуулаа.

²²Тэрэ ямаршые нүгэл хээгүй, тэрэнэй худал юумэ хэлэжэ байхыень нэгэшые хүн дуулаагүй.

²³Тэрэниие доромжолжо байхада, тэрэ доромжолһон харюу үгөөгүй, тэрэ зобожо байхадаа, зобоогшодойнгоо урдаһаа занаагүй, зүгөөр тэрэ өөрыгөө үнэн сэхэ Заргашын гарта үгөө юм.

²⁴Бидэнэй нүгэл шэбэлһээ зайсажа, үнэн зүбөөр амидархымнай тула Иисус өөр дээрээ нүгэл шэбэлымнай үргэлжэ абаа, модон дээрэ үргэгдөө: тэрэнэй шархаар таанад аршалагдан эдэгээгдэһэн байгаат.

²⁵Таанад төөриһэн хонид мэтэ адуулагшагүй ябаат, мүнөө Адуулагшадаа, харууһалагшадаа таанад бусажа ерээт.

Пётрой 1-дэхи хандалга 3

Эхэнэрнүүдэй баримталха ёһотой дүримүүд

¹⁻²Эхэнэрнүүд, таанад баһал нүхэдэйнгээ мэдэлдэ байгты; хэрбээ тэдэнэрэй дунда Бурханай Үгэдэ этигэдэггүй хэн нэгэн байгаа һаа, эхэнэрэйнгээ арюун сэбэр, хүзэгтэй ажамидаралые хараад, этигэхэл. Тиихэдэ таанадта юумэ хэлэжэ байхын хэрэг үгы.

³Гоё найхан болохын тула таанад өөһэдыгөө гадна талаһаа шэмэглэжэ, үһээ гоёожо гү, али алтан зүүдхэлнүүдые зүүжэ гү, али зөөлэн хубсаһа үмдэжэ бү байгты.

⁴Харин Бурханда аргагүй найшаагдадаг сэдхэлэй даруу ба зөөлэн занһаа гараһан үнэн бодото мүнхын гоёолтоор өөһэдыгөө шэмэглэгты.

⁵Урдань Бурханда найдадаг эхэнэрнүүд өөһэдыгөө тиигэжэл шэмэглэдэг, нүхэдэйнгээ үгэ дууладаг байһан юм.

⁶Сарра тиигэжэл Абраһамай үгэ дууладаг, тэрэнээ эзэмни гэжэ нэрлэдэг һэн. һайн һайхан хэрэгүүдые бүтээжэ, ямаршые юумэнһээ айдаггүй байбал, таанадшые баһал Саррын басагад гээшэт.

⁷Эрэшүүл, таанадшые һамгадаа хүндэлжэ, ойлгожо байгты, тэдэтнай таанадта ороходоо һула хүнүүд ха юм. Тиихэдэ тэдэтнай таанадтайл адлихан Бурханай ажамидаралай шагналда хүртэхэ. Бурханай үгын ёһоор эхэнэрнүүдтээ хандажа байбалтнай, ямаршые юумэн зальбархадатнай һаалта болохогүй.

Һүзэглэгшэдэй баримталха ёһотой үшөө хэдэн дүримүүд

⁸Түгэсхэлдэнь хэлэхэдэ, таанад булта нэгэ һанал бодолтой байгты, адляар юумэндэ хандажа байгты, бэе бээдээ аха дүүнэдтэл адли дуратай байгты, бэе бээ хайрлажа, даруухан ажамидарогты.

⁹Таанадта муу юумэ хэхэдэнь, харюудань муу юумэ бү хэгты; таанадые харахадань, урдаһаань бү харагты. Харин буян хэшэгтээ хүртөөхын тула Бурхан таанадые уряалан дуудаа гэжэ мэдэн, һайн һайхан хэрэгүүдые бүтээжэ, һайн үгөөр үреэлжэ байгты.

¹⁰«Ажамидаралда дуратай, һайн һайхан үдэрнүүдые үзэхэ дуратай хүн нүгэлтэ юумэ бү хэлэг, худалаар дуугархаяа болиг.

¹¹Тэрэ хүн нүгэл үйлэдэхээ болёод, һайн һайхан хэрэгүүдые бүтээжэ байг, энхэ тайбан байдалые найруулжа байг, энхэ тайбан байдалые тогтоожо байг.

¹²Дээдын Эзэн үнэн сэдхэлтэниие хаража байдаг, тэдэнэй зальбаралнуудые дуулажа байдаг, харин муу юумэ хэгшэдые тэрэ буруушаадаг юм», – гэжэ Нангин Бэшэг соо хэлэгдэнэ.

¹³Һайн юумэ хэхэ дуратай байбалтнай, хэн таанадта һаалта болохоб?

¹⁴Зүб юумэ хэжэ байһанайнгаа түлөө зоболон эдлэжэ байбалтнай, Бурхан ашыетнай харюулхал! Хэнһээшые бү айгты, һанаагаа бү зобогты.



¹⁵Харин зүрхэ сэдхэлдээ Дээдын Эзэн Христосые аргагүй хүндэлжэ ябагты. Ямаршые хүнэй ажамидалайтнай найдал тухай нурабалнь, хэзээшые харюу үгэхэдэ бэлэн байгты.

¹⁶Тиихэдээ дарууханаар, хүндэлхэнөө харуулан харюусаарайт. Нэшхэлтнай арюун сэбэр байг, тиигэбэл Христосто хүзэглэдэг танай үлзытэй ажамидалалые хардадаг хүнүүд өөхэдэньгөө хэлэхэн үгэнүүдхээ эшэхэл.

¹⁷Бурханай хүсэлөөр нүгэл хэжэ байһанайнгаа түлөө бэшэ, харин һайн һайхан хэрэгүүдые бүтээжэ байһанайнгаа түлөө зобожо байһань дээрэ юм.

¹⁸Бидэниие Бурханда хандуулхын тула Христос манай нүгэл шэбэлэй түлөө нэгэтэ зоболон эдлэхэн байна. Тэрэ үнэн сэдхэлтэн хара һанаатай зоной түлөө бээе хүнөөлгэжэ, хүлдөөрөө амидырһан юм.

¹⁹Тиигээд хүлдөөрөө хаалтада байһан хүлдэнүүдтэ ошожо номноо юм.

²⁰Нойн томо корабль барижа дүүргэхые Бурханай ехэ тэсэбэритэйгээр хүлеэжэ байха үе сагта тэдэ хүлдэнүүд мэдэлдэнь байхаяа арсаа бэлэй. Нойн бариһан корабльда үсөөн хүн, хамтадаа найман хүн уһанһаа абарагдаһан юм.

²¹Тиигэжэ уһанһаа абарагдаһаниинь мүнөө бидэниие абаржа байдаг уһан арюудхалай бэлгэ тэмдэг болоо. Уһан арюудхалга бэеын муухайе арилгана бэшэ, харин Иисус Христосой амидыралгын ашаар һайн һайхан сэдхэл үршөөхыень Бурханһаа гуйна.

²²Христос тэнгэридэ дэгдээд, бүхы Эльгээмэлнүүдые, тэнгэрийн бүхы захиргаан, хүсэнүүдые эрхилэн, Бурханай баруун таладань оршоно.

Пётрой 1-дэхи хандалга 4

¹Христос махабад бэээрээ зоболон эдлээ, тиимэхээ таанадшые тиигэжэ зобоходо бэлэн байха ёһотойт, юундэб гэхэдэ, зобожо байһан хүн нүгэл



хэхээ болидог. Христосой түлөө зобохые хүсэхэдөө, таанад нүгэл хэхээ болиһоноо баталнат.

²Энэ саһаа эхилээд, газар дэлхэй дээрэ үнгэргэхэ үдэрнүүдтээ хүнэй хүсэлэнгүүдые дахаха бэшэ, харин Бурханай дура хүсэлөөр ажамидарха ёһотойт.

³Урдань таанад бусад арадуудай хэхэ дуратай юумэнүүдые хэжэ, нилээн саг үнгэргөөт. Зохиогүй юумэнүүдые үйлэдэжэ, зальхайржа, архидажа, һогтуу хүнүүдээр ниилэжэ, найрлажа, онгонуудта жэрхэдэһэтэйгээр мүргэжэ байгаат.

⁴Мүнөө тэдэнээр ниилэн зальхайрха, забхайрхаяа болиходотнай тэдэтнай ехээр гайхалдана, тиимэһээл таанадые доромжолно.

⁵Гэхэтэй хамта амиды ба үхэхэн хүнүүдые һаядаа шүүхэ Бурханай урда тэдэнэр үйлэдэхэн бүхы юумэнүүдэйнгээ түлөө харюусаха.

⁶Тиимэһээл Христос һайн Мэдээсэлые үхэхэн хүнүүдтэ баһа номноо гээшэ. Тэдэнэр махабад бэеэрээ хүн бүхэндэл адли зарга шүүбэриде үгтэхэ, харин һүлдөөрөө тэдэнэр Бурхандал адляар амидарха боломжотой юм.

⁷Бүхы юумэнэй эсэс ойртожо байна. Тиимэһээ һүбэлгэн байгты, бэеэ баригты, тиигэбэл зальбарха аргатай байхат.

⁸Юумэнэй түрүүндэ үнэн зүрхэнһөө бэе бээдээ дуратай байгты, юундэб гэхэдэ, дуран олон нүгэлнүүдые хүлисэн арилгадаг юм.

⁹Бэе бэеэ гэртээ айлшалуулхадаа, элдэбээр бү гэмэрэгты.

¹⁰Хүн бүхэнтнай Бурханһаа абьяастай юм, тиин тэрэ олон янзын абьяаснуудаа ухаатайгаар, бэе бээдээ аша туһатайгаар хэрэглэжэ байгыт даа.

¹¹Номножо байһан хүн Бурханай Мэдээсэлые номножо байг лэ; алба хэжэ байһан хүн Бурханай үршөөһэн хүсэ шадалаар өөрыгөө бэхижүүлжэ байг лэ. Бүхы юумэнүүд Иисус Христосоор дамжан

Бурхание алдаршуулжа байг лэ! Бурхан хэтын хэтэдэ алдар солотой, хүсэ шадалтай байхань болтогой! Зобоходоо баясажа байгты.

¹²Хүндэтэ аха дүүнэрни, зоболонто туршалгануудай тохёолдобол, бү гайхаарайт, гайхалтай юумэн гэжэ бү бодооройт.

¹³Зүгөөр, Христосой зоболонгууды хубаалсажа байһандаа баясажа байгаарайт, тэрэнэй хүр жабхалантайгаар ерэхэ Үдэрнь таанад баясахат, хүхихэт.

¹⁴Христосой нэрэ алдарай түлөө таанадые хүнүүдэй доромжолболнь, таанад жаргалтайт. Ушарынь хэлэбэл, алдар солын хүлдэ, Бурханай хүлдэ таанад соо оршоно гээшэ.

¹⁵Алууршан, хулгайшан, хүнэй хэрэгүүдтэ оролсодог, хуули эбдэһэн хүн байһанһаа боложо хэнтнайшые зоболон эдлэхэгүйнь болтогой.

¹⁶Гэхэтэй сасуу христос шажанай түлөө зоболон эдлэбэл, бү эшэгты, тиимэ хубитай байһандаа Бурхание алдаршуулжа байгты.

¹⁷Зарга шүүбэрийн эхилхэ саг дүтэлөөд байна. Тиихэдэ Бурханай хүнүүд хамагай түрүүн зарга шүүбэридэ орохо. Хэрбээ заргая бидэнһээ эхилбэл, Бурханда хүзэглэхээ арсаһан хүнүүд ямар хойшолонтой байхань гээшэб?

¹⁸«Һайн хүнүүдэй абарагдахада хүшэр байхадань, хүзэггүй, нүгэлтэй зон яахань гээшэб?» – гэжэ Нангин Бэшэг соо хэлэгдэнэ.

¹⁹Тиимэһээ Бурханай дура хүсэлөөр зоболон эдлэжэ байһан хүнүүд үнэн сэхэ Бүтээгшэдэ өһөдыгөө бүрин бүтэн даалгаг лэ, һайн һайхан хэрэгүүдые бүтээжэ байг лэ.

Пётрой 1-дэхи хандалга 5

¹Мүнөө би танай хүзэглэгшэдэй бүлгэмэй хүтэлэгшэдтэ ханданаб. Би өөрөө бүлгэмэй хүтэлэгшэб, Христосой зобохыень хараа һэнби, һаядаа элирхэйлэгдэхэ тэрэнэй алдары хубаалсахаб.



²Таанадта даалгагдаһан Бурханай хүрэгыг адуулжа байгты. Баалалтаар хэжэ байһан мэтэ бэшэ, харин сэдхэлээрээ энэ хэрэгыг бүтээжэ байгты. Олзо олохо зорилготойгоор бэшэ, харин оролдосотойгоор алба хэжэ байгты.

³Таанадта даалгагдаһан хүнүүдые захирха гэжэ бү оролдогты, харин тэдэндээ хайн жэшээ харуулжа байгты.

⁴Тиигэбэл, таанад эгээн ехэ Адуулагшын ерэхэдэ, хүнэшэгүй алдарай шагналда хүртэхэт.

⁵Залуушуул, таанад баһал бүлгэмэй хүтэлэгшэдэй үгэ дуулажа байгты. Таанад булта бэе бээдээ номгон даруугаар хандажа байгты. «Бурхан омог зантай зоние буруушаадаг, харин даруу номгон зондо үршөөлтэйгөөр хандадаг», – гэжэ Нангин Бэшэг соо хэлэгдэнэ.

⁶Тиимэхээ хүр хүсэтэй Бурханай урда даруухан байгты, тиигэбэлтнай сагай ерэхэдэ, Бурхан таанадыг дээшэнь үргэхэл.

⁷Бүхы бэрхэшээлнүүдээ Бурханда даалгагты, тэрэ хойноһоотнай хаража байхал.

⁸Һэргэлэн байгты, бү унтагты. Танай дайсан болохо шолмос эдихэ зууха хүниие бэдэржэ байһан арсалан мэтэ хүрхиржэ ябана.

⁹Хатуу этигэл хүзэгтэй зогсогты, шолмосто бү абтагты; бүхы дэлхэйгээр аха дүүнэртнай тиимэл зоболонгуудыг дабажа байна гэжэ мэдэжэ байгты.

¹⁰Зүгөөр танай зоболонгууд һаядаа дууһаха. Иисус Христостой нэгэдүүлэн, мүнхэ алдараараа хубаалсахын тула таанадыг дуудаһан, элдэб үршөөлнүүдэй эхин болохо Бурхан таанадыг заһаха, бэхижүүлхэ, хүсэ шадалтай болгохо, батадхаха.

¹¹Тэрэ хэтын хэтэдэ захиржа байг лэ. Болтогой!

¹²Христосой шударгы хүзэглэгшэ Силуанай туһаламжаар би таанадта энэ богонихон бэшэг бэшээб. Таанадыг урмашуулха ба Бурханай буян



хэшэгыг таанадта дамжуулха зорилготойгоор бэшээб. Энэ буян хэшэгыг хатуу баримталжа байгты.

¹³Таанадтал адли шэлэгдэжэ абтаһан Вавилондохи эгэшэтнай, Марк хүбүүмни таанадта мэндые хүргэнэ.

¹⁴Аха дүүнэрэй дура элирхэйлэн бэе бэеэ таалан амаршалагты. Христостой нэгэн хамта та бүхэн энхэ тайбан байхатнай болтогой.



Пётрой 1-дэхи хандалга

Пётрой 1-дэхи хандалга 1

Амаршалга

¹Манай Бурхан ба Абарагша болохо Иисус Христосой үршөөхэн үнэн сэдхэлэй ашаар маанадтал адли этигэл хүзэгтэй болоһон хүнүүд, таанадта Иисус Христосой зараса болон элшэн Симон Пётр бэшэнэ.

²Манай Бурхан ба Дээдын Эзэн Иисусые мэдэрхэнэйтнай ашаар Бурханай үршөөл хайра, амгалан тайбан та бүхэнтэй элбэг дэлбэг байхань болтогой!

Бурханай хүнүүдые дуудаһан, шэлэжэ абанан тухай

³Бурханай эрхэ мэдэлээр ажамидаржа байхымнай тула тэрэниие мэдэрхэнэймнай ашаар Иисусаа эхитэй Бурханай хүсэн бүхы хэрэгтэй юумые маанадта үгөө. Бурхан алдараараа болон буян хэшэгээрээ хубаалсахын тула бидэниие дуудаа,

⁴тэдэнэйнгээ ашаар бидэндэ агууехэ, ехэ үнэтэй найдуулга үгөө. Энэ дэлхэйн хүсэлэнгүүдтэй холбоотой үхэлые дабажа, Бурханай ажамидаралаар ажаһуухынтнай тула энэ найдуулга үгтөө юм.

⁵⁻⁷Тиимэһээл таанад һайн һайхан хэрэгүүдээрээ хүзэг этигэлээ бэхижүүлхые бүхы хүсэ шадалаараа оролдогты, һайн һайхан хэрэгүүдһээ гадна эрдэм ухаантай байхые, эрдэм ухаантай байхаһаа гадна бээ бариха аргатай, бээ барихаһаа гадна тэсэбэритэй байхые, тэсэбэритэй байхаһаа гадна Бурханда өөрыгөө зорюулан ажамидархые, Бурханда өөрыгөө зорюулан ажамидархаһаа гадна аха дүүнэрэй найрамдалтай, аха дүүнэрэй найрамдалһаа гадна хайра дуратай байхые бүхы хүсэ шадалаараа оролдожо байгты.

⁸Иимэ һайн һайхан шанарнуудаа бэхижүүлжэ байбалтнай, манай Дээдын Эзэн Иисус Христосые мэдэрхэдэ тэдэтнай таанадые үрэ дүнгүй, аша туһагүй байлгахагүйл.

⁹Харин иимэ шанарнуудгүй хүнүүд холо харадаггүй хохорнууд юм: урданайгаа нүгэлнүүдхээ аршалагдаһанаа мартажархидаг юм.

¹⁰Тиимэхээл, аха дүүнэр, Бурханда дуудуулһанаа, шэлэгдэжэ абтаһанаа баталхые һайса оролдогты. Тиигэжэ байбал таанад зүб замһаа хадуурхагүйт.

¹¹Тиигэбэлтнай манай Дээдын Эзэн, Абарагша Иисус Христосой мүнхын хаан орондо орохо бүрин эрхэ таанадта үгтэхэл.

¹²Эдэ бүгэдые мэдээд, таанадта үгтэһэн үнэн зүбые хатуу баримталжа байгаашье һаатнай, би эдэниие таанадта дахин дахин һануулжа байхаб.

¹³Амиды ябаха хаһадаа эдэ бүгэдые таанадта ходо һануулжа байхань зүб гэжэ бодоноб.

¹⁴Ушарынь юуб гэбэл, мүнхынгөө гэртэ мордохо сагни ойртоо гэжэ би мэдэнэб, манай Дээдын Эзэн Иисус Христосье тиигэжэ намда хэлээ.

¹⁵Үхэхэншье хойномни хэдыдэшье эдэ бүгэдые һанажа байхынтнай тула би бүхы хүсэ шадалаа үгэхэб.

¹⁶Манай Дээдын Эзэн Иисус Христосой заларан ерэхэ тухай хэлэхэдээ бидэ хэн нэгэнэй зохёһон үльгэрнүүдые дабтаагүйбди. Бидэ өөһэдөө тэрэнэй һүр жабхалангые үзэһэн гэршэнэр байгаабди.

¹⁷«Энэ минии дуратай Хүбүүн, би тэрэниие һайшаанаб» гэжэ Бурханай Агууехэ Алдарай дуугай һонортонь хүрэхэтэйнэ зэргэ Бурхан Эсэгэһээ нэрэ түрэдэ, алдар солодо хүртэхэдэнь бидэ байгаа һэмди.

¹⁸Тэрээнтэй хамта нангин хада дээрэ байхадаа, тэнгэриһээ бууһан энэ Бурханай дууе бидэ өөһэдөө дуулаа һэмди.

¹⁹Тиимэхээ таанад лүндэншэдэй айладхаһан юумэнүүдтэ бүришье ехээр этигэжэ байгты. Үдэр мандаад, үглөөнэй толон зүрхэ сэдхэлдэтнай бадарха үе саг болотор харанхы газарта аһажа байһан

зуладал адли лүндэншэдэй үгэнүүдтэ анхаралаа хандуулбал, таанад зүб юумэ хэхэт.

²⁰Нангин Бэшэгтэ хэлэгдэһэн лүндэншэдэй үгэнүүдые хүн өөрөө тайлбарилжа шадахагүй гэжэ таанад нэн түрүүн ханажа байгты.

²¹Юундэб гэхэдэ, нэгэшье лүндэншэ өөрынгөө дура хүсэлөөр уридшалан хэлээгүй, харин Нангин хүлдөөр хүтэлүүлэгдэн Бурханай үгэ айладхадаг байгаа.

Пётрой 1-дэхи хандалга 2

Хуурмаг хургагшанар тухай

¹Урдань израильшуудай дунда хуурмаг лүндэншэдэй бии болодогтол адляар таанадай дунда хуурмаг хургагшад байха. Тэдэнэр зүб замһаа хадууруулдаг хуурмаг хургаалнуудые нюусаар асарха, тэдэниие эрхэ сүлөөтэй болгоһон Дээдын Эзэнһээ арсаха, тиигэжэ тэдэнэр өөһэдтөө түргэн хосорол олохо.

²Олон хүнүүд тэдэнэрэй бузар хэрэгүүдые һажааха, тиигэжэ Үнэн бодото зам муушалха шалтаг тэдэнэр бусад зондо үгэхэ.

³Тэдэ хомхой хуурмаг хургагшад, зохёоһон үльгэрнүүдээ таанадта хөөрөөд, нилээн олзо өөһэдтөө олохо. Гэхэтэй сасуу хэһэн хэрэгүүдэйнь түлөө хэһээлтэ үни гэхээр бэлэн хүлеэжэ байна, тэдэнэй үхэлынь удахагүй.

⁴Бурханай Эльгээмэлнүүдэйшье нүгэл хэхэдэ Бурхан тэдэниие хайрлаагүй юм, Зарга сүүдэй Үдэрэй ерэтэр тэдэниие тамада мүнхын харанхыда хүлеэд барижа байгаа.

⁵Бурхан урдын хүнүүдыешье хайрлаагүй, муу муухай ябадал гаргагшадые уһан галабаар һүйдхөө юм. Тиихэдэ Бурханда үнэн зүбөөр хандаха тухай хургадаг Нойе, тэрээнтэй хамта үшөө долоон хүнэй амиие үлээгөө юм.

⁶Муу муухай ябадал гаргадаг зоние хэргэлэн, Бурхан Содом ба Гоморро хотынхидыг гэмнээд, үнэн болгон усадхаа.

⁷Зүгөөр тэрэ зальхай забхай хүнүүдэй дунда арай шамай тэсэжэ байһан үнэн сэдхэлтэй Лотыг абараа.

⁸Тэрэ үнэн сэдхэлтэн тэдэ зоноор ажамидархадаа, нүгэлтэ үйлэ хэрэгүүдыг харахадаа, дуулахадаа, үдэр бүхэн аргагүй ехээр тулижа байгаа бэлэй.

⁹Үнэн сэдхэлтэй зоние туршалгануудһаа яажа аршалхыг, муу муухай ябадал гаргагшадыг Зарга шүүбэрийн Үдэрэй хэһээлтэ хүрэтэр яажа хахижа байхыг Дээдын Эзэн мэдэхэ юм гэжэ урда хэлэгдэһэн харуулна.

¹⁰Илангаяа энэн махабад бэеынгээ муу муухай хүсэлэнгүүдэй мэдэлдэ байдаг, Бурханай эрхэ засагыг тоодоггүй хүнүүдтэ хабаатай юм. Тэдэ убайгүй, хэшхэлгүй хуурмаг хургагшанар огторгойныг хүсэнүүдыг доромжолхоёо айдаггүй.

¹¹Эдэ хуурмаг хургагшадта ороходоо нилээн хүсэтэй, хүр жабхалантай Бурханай Эльгээмэлнүүдыг тэдэ огторгойн хүсэнүүдыг доромжолдоггүй, Дээдын Эзэнэй урда тэдэниг зэмэлдэггүй.

¹²Харин эдэ хүнүүд гансал зүнгөөрөө мэдэдэг, баригдажа алуулхын тула түрэдэг зэрлиг амитадтал адли юм: ухаанаараа ойлгохо аргагүй юмэнүүдээ хардадаг юм, тиимэһээ тэдэ зэрлиг амитадтал адли үхэхэ.

¹³Тэдэнэр хүнүүдтэ хүргэһэн гэмээ эдлэнэ. Тэдэнэр үдэр дунда найрлаха, архидаха, һамгадаар орёолдохонь зохистой гэжэ тоолодог. Тиимэһээ таанадтай хамта хоол барихадаа тэдэнэр өөһэдынгөө худал хуурмаг ябадалаар сэдхэл ханажа, танай нэрэ түрыг унагаадаг, бузарладаг юм.

¹⁴Тэдэнэй нүдэдыг ташаяан хүсэлэнгөөр дүүрэнхэй, тэдэ нүгэл хэжэ бээ ханахагүй. Тэдэнэр тулгагүй ахир хүнүүдыг зангадаа оруулдаг. Тэдэнэй сэдхэлыг хомхолзожо хуршанхай. Тэдэнэр үхэхэл табилантай юм.



¹⁵Тэдэ сэхэ замһаа хадуураад, төөришэбэ; буруу юумэ хэжэ, мүнгэ абаха дуратай байһан Веорой Валаам хүбүүнэй замаар ябаба.

¹⁶Гэбэшье Валаамай нүгэлынэ элирүүлэн шүүмжэлэгдээ: хэлэгүй элжэгэнь хүндэл адли дуугаржа, лүндэншын тэнэг юумэ хэхэ гэжэ байхадань зогсоогоо юм.

¹⁷Тэдэ хүнүүд хатаһан булагуудта, шуурганда туугдаһан үүлэнүүдтэл адли дэмы юм: Бурхан тэдэндэ хаб харанхыда газар бэлдээд байна.

¹⁸Бардам хоһон үгэнүүдые хэлэн, тэдэнэр буруу замда ороһон хүнүүдһээ арай шамай холодоһон хүнүүдые бэеын хурисалай, зальхайралай зангада оруулдаг.

¹⁹Өөһэдөө үхэлэй барлагууд байһан мүртөө мэхэдээ оруулһан хүнүүдтэ эрхэ сүлөө амалдаг. Бидэниие ямар юумэн иланаб, бидэ тэрэ юумэнэй барлагууд болонобди.

²⁰Манай Дээдын Эзэн, Абарагша Иисус Христосые мэдэрээд, энэ дэлхэйн бузарнуудһаа мултаржа шадан аад, һүүлдэнь дахин тэдэ хүсэнүүдтэ баригдажа илагдаһан хүнүүд һүүлэй һүүлдэ түрүүшынхиһээ бүри муу нүхэсэлдэ ороно гээшэ.

²¹Үнэн сэдхэлтэнэй замые мэдээд, өөһэдтэнь даалгагдаһан Бурханай нангин захяа заабариие сахихаяа болинхаар, тэдэ хүнүүдэй тэрэ замые юрэдөө мэдэнгүй байһань холо дээрэ байгаа.

²²«Нохой бөөлжэһэндөө бусажа ошодог», «Угаагдаһан гахай һөөргөө шабар шабхайда хэбтэхээ ошодог» гэхэн үнэн зүб оньһон үгэнүүдтэ тэдэ хүнүүдэй тушаа хэлэгдэнэ гээшэ.

Пётрой 1-дэхи хандалга 3

Дээдын Эзэнэй хоёрдохийё заларан ерэхэ тухай

¹Хайрата аха дүүнэрни, таанадта хоёрдохийё бэшэнэб. Түрүүн бэшэһэн юумэнүүдээ һануулан, зосоотнай арюун һанал бодолнуудые түрүүлхэ гэжэ оролдобоб.



²Гэгээн лүндэншэдэй хэлэһэн үгэнүүдые, элшэнэрэйтнай таанадта дамжуулһан Дээдын Эзэнэй ба Абарагшын захяа заабарие хануулха хүсэлтэй байгааб.

³Нэн түрүүн таанад һүүлшын үдэрнүүдтэ хүсэлэнгүүдэйнгээ мэдэлдэ байдаг хүнүүд ерэхэ гэжэ мэдэжэ байха ёһотойт. Тэдэнэр таанадые наада барин,

⁴«Ерэхэб гэжэ үгөө таанадта үгөө бэшэ һэн гү? Тиигээд хаанаб тэрэтнай? Үбгэ эсэгэнэрнайшые наһа бараа, теэд бүхы юумэн юртэмсэ дэлхэйн бүтээгдэһэнһээ хойшо тэрэл хэбээрээ байна бэшэ аал?» – гэжэ хэлэхэ.

⁵⁻⁶Эртэ урда сагта Бурханай өөрынгөө үгөөр огторгой бүтээһэниие, уһые хумяад ба уһа тойруулаад хуурай газар бии болгоһониие, тэрэ уһанһаа боложо тэрэ үеын газар дэлхэй уһан галабта абтаад хүнөөгдэһэниие тэдэнэр зорюута анхарангүй байна.

⁷Харин мүнөө оршожо байһан огторгой дэлхэй хоёр галда хүнөөлгэхын тула тэрэл Бурханай үгөөр хадагалагдажа байгаа юм. Тэдэнэр Бурханиие буруушааһан хүнүүдэй шүүбэрилүүлжэ хосорхо Зарга шүүбэриин үдэрэй ерэтэр хадагалагдажа байха.

⁸Хайрата аха дүүнэрни, Дээдын Эзэндэ нэгэ үдэр мянган жэлнүүдтэ адли, тиин мянган жэлнүүд нэгэ үдэртэл адли юм. Энэениие бү мартаарайгты.

⁹Дээдын Эзэн найдуулһан юумээ бэлүүлхээ яаранагүй гэжэ зарим хүнүүд һанадаг. Үнэндөө болбол тэрэ маанадай нэгэшые хүнэй хосоронгүй, нүгэлөө мэдэрэн гэмшэхыемнай тэсэбэритэйгээр хүлеэжэ байгаа юм.

¹⁰Гэхэтэй сасуу Дээдын Эзэнэй Үдэр хулгайшандал адли һанамсаргүй байхада ерэхэ. Тэрэ Үдэр огторгой шангаар дуугаран үгы болохо, огторгойдо байһан нара, нара, одо мүшэд шатажа хүнэхэ, газар дэлхэй болон дээрэнь оршоһон бүхы юумэнүүд галда шатан усадхагдаха.

¹¹Эдэ бүхы юумэнүүдэй иимэ аргаар хүнэжэ байхада таанад ямархан хүнүүд байха ёһотойбта? Таанад гэгээн амидаралтай, өөһэдыгөө Бурханда зорюулһан байха ёһотойт,

¹²огторгойн шатажа хүнэхэ, огторгойдо байһан нара, нара, одо мүшэдэй галда хайлаха Бурханай тэрэ Үдэрые хүлэжэ, тэрэ үдэрые ойртуулхын тула бүхы шадалаараа оролдохо ёһотойт.

¹³Тиихэдэ бидэ Бурханай найдуулһан ёһоор ажамидарха шэнэ огторгой ба шэнэ газар дэлхэй хүлэжэ байнабди.

¹⁴Тиимэхээ, хайрата аха дүүнэрни, тэрэ Үдэрые хүлэжэ байхадаа, Бурханай урда ямаршые бузаргүй, арюун сэбэр байхые, Бурхантай энхэ тайбан оршожо байхые оролдыт даа.

¹⁵Бидэндэ абарагдаха боломжо үгэн, манай Дээдын Эзэн аргагүй удаан тэсэжэ байна гэжэ бодогты. Тон тиигэжэл хайрата Павел аха Бурханай хайрлаһан ухаанай хүсөөр таанадта бэшээ бэлэй.

¹⁶Павел хандалга бүхэндөө энээн тухай хэлэнэ. Тэрэнэй хандалганууд соо ойлгоходо хүшэр юумэнүүд баһа бии, тэрэниенһ үндэһэ һууригүй, харанхы мунхаг хүнүүд Нангин Бэшэгэй ондоошые номуудтал адли буруугаар, хазагайруулан тайлбарилдаг юм. Тиигэжэ тэдэ зон өөһэдтөө үхэл бэдэрнэ гээшэ.

¹⁷Хайрата аха дүүнэрни, таанад энээн тухай мэдэн болгоомжотой байгты, эдэ Бурхание буруушаһан хүнүүдтэл адли үндэһэ һууригүй зон бү бологты.

¹⁸Зүгөөр, манай Дээдын Эзэн ба Абарагша Иисус Христосые саашадаашые мэдэржэ, үршөөл хайрадань хүртэжэ байгты. Тэрэ мүнөөшые, хэтын хэтэдэшые алдар солотой байһай! Болтогой!

Иоаннай 1-дэхи хандалга

Иоаннай 1-дэхи хандалга 1

Амидаралгын Үгэ тухай

¹Бидэ амидаралгын Үгэ тухай иигэжэ мэдээсэнэбди: анханһаа нааша амидаралгын Үгэ бии байгаа, бидэ тэрэ Үгэ дуулаа шагнаабди, нюдөөрөө хараабди, гараараа хүрөөбди.

²Тэрэ амидаралга бидэндэ харуулагдаһан байна, тэрэ амидаралгыг хараабди. Тиин тэрэ амидаралга тухай гэршэлнэбди. Хэтэ мүнхын тэрэ амидаралга Эсэгэтэй хамта байжа, бидэндэ үзүүлэгдэһэн юм гээд бидэ таанарта мэдээсэнэбди.

³Бидэнтэй таанарай нүхэсэхын тула хараһан, дуулаһан юумэеэ бидэ таанарта мэдээсэнэбди. Харин бидэнэр Эсэгэ Бурхантай, тэрэнэй хүбүүн Иисус Христостой нүхэсэнэбди.

⁴Ехэтэ баясахынгаа тула бидэ энээн тухай бэшэнэбди.

Бурхан хадаа гэрэл туяа мүн

⁵Тэрээнһээ дуулаһан мэдээсэлээ бидэ таанарташые дуулганабди: Бурхан хадаа гэрэл туяа мүн, харанхы ямаршые юумэн Бурханда байдаггүй!

⁶«Бидэ Бурхантай нүхэсэнэбди», – гэжэ хэлээд, урдынхяараал нүгэлэй харанхы соо һуугаа һаа, бидэ худалаар хэлэһэн болонобди, үнэн зүб бэшээр ажаһууна гээшэбди.

⁷Хэрбээ Бурханда алдьяр гэрэл туяа соо бидэн байгаа һаа, хоорондоо бидэ эбтэй гээшэбди, тиин Бурханай Хүбүүн Иисусай шүһаниинь маниие ямаршые нүгэл шэбэлһээ арюудхан сэбэрлэнэ гээшэ.

⁸Бидэ нүгэл хилэнсэ хээгүйбди гээ һаа, бидэ өөһэдыгөө мэхэлнэбди. Энэнь манда үнэн зүб юумэн үгы гэхэн удхатай болоно.

⁹Хэрбээ нүгэл шэбэл хэһэнээ бидэнэй мэдэрээ юм һаа, үнэншэ зүб Бурхан нүгэл шэбэл хэһемнай хүлисэхэ, бүхы муу юумэнһээ маниие арюудхан сэбэрлэхэ.



¹⁰«Бидэ нүгэл хээгүйбди», – гэжэ бидэнэй хэлээ хаа, Бурханиие бидэ худалша мэтээр харуулһан болонобди. Бурханай Үгэ бидэнтэй байгаагүй болоно гээшэ.

Иоаннай 1-дэхи хандалга 2

Христос маниие Хамгаалагша мүн

¹Үхибүүдни, саашадаа нүгэл шэбэл хэхэгүйнтнай тула би энэниие бэшэнэб. Хэрбээ хэн нэгэнэй нүгэл хээ хаа, Эсэгэ Бурханай урда маниие Хамгаалагша, үнэн сэдхэлтэ Иисус Христос бии юм.

²Бидэнэй хэһэн нүгэлэй, гансашье бидэнэй бэшэ, харин бүхы дэлхэйнхинэй хэһэн нүгэлэйнь түлөө Иисус өөрыгөө үргэл болгоһон байна.

³Бурханай захяа заабариие сахидаг болоходоол Бурханиие бидэ мэдэнэбди гэжэ лаб найдахабди.

⁴Бурханай захяа заабариие сахидаггүй аад, «Бурханиие би мэдэнэб», – гэжэ хэлэдэг хүн худалша гээшэ, үнэн юумэн тэрэ хүндэ үгы!

⁵Бурханай үгэ дуулагша хүн Бурханда үнэн сэдхэлһээ дуратай байна. Бурхантай нэгэн хамта байһанаа бидэ иигэжэл мэдэхэ болонобди.

⁶Бурхантай нэгэн хамта байнаб гэгшэ болбол Иисустал адляар ажаһууха ёһотой.

Шэнэ захяа заабари

⁷Инаг хайрата нүхэдни, минии бэшэжэ байһан юумэн шэнэ захяа заабари бэшэ, хуушан захяа заабари юм. Энэ захяа заабариие таанар анханһаа хойшо мэдэнэт. Тэрэ хуушан захяа заабари – бидэнэй дуулаһан мэдээсэл гээшэ.

⁸Гэхэтэй хамта, минии бэшэжэ байһан юумэн шэнэшье захяа заабари мүн. Энэ захяа заабари үнэн зүб юм гэжэ Христосойшье, таанарайшье ажабайдал харуулна. Нүгэлэй харанхы хүнэн ошожо байна, ёһотой гэрэл туяа сасаран гэрэлтэжэ байна!



⁹Би гэрэл туяа соо байнаб гэдэг аад, өөрынгөө аха дүүдэ дурагүй хүн мүнөө болотор нүгэлэй харанхыда байна гээшэ.

¹⁰Аха дүүдээ дуратай хүн гэрэл туяа соо ябана. Тэрэ хүн өөрынгөө аяг зангаар дүтынгөө хүниие нүгэлдэ оруулха ушар шалтагааниинь болохогүй.

¹¹Аха дүүдээ дурагүй хүн нүгэлэй харанхы соо ябана, тэрэ хүн хайшаа тэмтэржэ ябаһанаа мэдэнэгүй, яахадааб гэбэл, тэрэ хүниие нүгэлэй харанхы нохор болгоно.

¹²Үхибүүдни, би таанадта хандажа бэшэнэб: таанарай хэһэн нүгэл хилэнсэтнай Христосой алдар нэрын аша туһада хүлисэгдэбэ.

¹³Эсэгэнэр, би таанадта хандажа бэшэнэб: анханһаа хойшо оршожо байдаг Бурханиие таанар мэдэнэт. Залуушуул, би таанадта хандажа бэшэнэб: таанар шолмосые диилээт.

¹⁴Үхибүүд, би таанадта бэшэбэб: таанар Эсэгэ Бурханиие мэдэбэт. Эсэгэнэр, би таанадта бэшэбэб: анханһаа хойшо оршожо байдаг Бурханиие таанар мэдэбэт. Залуушуул, би таанадта бэшэнэб: таанар ехэ хаба шадалтайт, Бурханай Үгэ таанартай байна, тиин таанар шолмосые диилээт.

¹⁵Газар дэлхэйдэ бү дурлагты, газар дэлхэй дээрэхи юумэндэ бү дурлагты. Газар дэлхэйдэ дурлаа һаа, Эсэгэ Бурханда дурагүй гээшэт.

¹⁶Ушарынь гэбэл, газар дэлхэйн бүхы юумэнүүд: нүгэл шэбэлые хэхэ шунал, нюдэнэй хүсэл шунал, омог бардам зан Эсэгэ Бурханһаа заяагдаагүй, харин газар дэлхэйһээ бии болоо.

¹⁷Харин газар дэлхэй энэ дэлхэйдэ һайшаагадаг бүхы юумэнтэй хамта хүнэн һалаха. Эсэгэ Бурханай дура хүсэлые сахин бөөлүүлэгшэл хэтэ мүнхэдөө амиды ябаха юм.

Христосой дайсан



¹⁸Үхибүүд, хүүлшын саг хүрэжэ ерэбэ! Христосой дайсан ерэхэ ёһотой гэжэ таанар дуулаһан байхат. Тиин Христосой дайсад мүнөө олон болонхой. Иихэдээ хүүлшын саг хүрэжэ ерэбэ гэжэ мэдэнэбди.

¹⁹Христосой дайсад маниие хаяад ябаа һэн, теэд тэдэнэр манай хүнүүд байгаа гэхын аргагүй. Хэрбээ манай хүнүүд байгаа һаа, тэдэнэр манаар сугтаа үлэхэ һэн. Теэд бидэниие орхёод ошоһон ушарынь тодоруулбал, тэдэ манай хүнүүд бэшэ һэн.

²⁰Таанарта Нангин хүлдэ Бурханһаа үгтөө, тиимэхээ таанар бүхы юумэ мэдэнэт.

²¹Таанар үнэн зүбые мэдэнэгүйт гэжэ би таанадта бэшээгүйб. Үгы даа, таанадта иигэжэ бэшээ һэм: таанар үнэн зүбые мэдэнэт, тиин ямаршые худал юумэн үнэн юумэнһээ тад ондоо байдаг гэжэ бэшээб.

²²Худалша гэшэмнай хэн гэшэб? Иисусые Бурханай табисуурта Христос гэжэ тоолодоггүй хүн худалша мүн. Христосой дайсан хадаа Эсэгэ Бурханай, тэрэнэй Хүбүүнэй оршожо байһые арсагша юм.

²³Хүбүүндэнь этигэдэггүй һаа, Эсэггүй байна гэхэн удхатай юм. Хүбүүндэнь этигэдэг хүн Эсэгэтэйн хамта байна.

²⁴Анха түрүүн юун гэжэ дуулаа һэмта, тэрээндээл этигэжэ байгты! Хэрбээ энээндэ саашадаа этигэжэ байгаа һаа, таанар Хүбүүнтэйн, Эсэгэтэйн хамта байхат.

²⁵Христос бидэндэ мүнхын Амидаралга үгэхэб гэжэ найдуулаа!

²⁶Таанарые мэхэлхээ һанагшад тухай эдэ бүгэдые би таанадта бэшэбэб.

²⁷Бурханай таанадта үгэхэн Нангин хүлдэ сэдхэлдэтнай байна, тиимэхээ таанарые хэн нэгэнэй хургаһанай хэрэгын үгы. Нангин хүлдэ таанарта үнэн зүб юумэ хэлэнэ, худал юумэ хэлэнэгүй, тиигэжэ таанарые бүхы юумэндэ хургана. Нангин хүлдын хургаһан ёһоор таанар Христостой нэгэн хамта байгты.

Бурханай үхибүүд



²⁸Үхибүүд, мүнөө таанар Христостой нэгэн хамта байгты. Тиигээ хаа, тэрэнэй бусажа ерэхэдэнь, бидэ айхые мэдэхэгүйбди, эшэхэгүйбди.

²⁹Христосые үнэн сэдхэлтэй гэжэ таанар мэдэдэгта, тиимэһээ үнэн сэдхэлээрнь байдаг хүн Бурханһаа түрэнэн хүн гэжэ таанар баһа мэдэнэт.

Иоаннай 1-дэхи хандалга 3

¹Таанар хараад үзыт, Эсэгэ Бурхан маанадта ямар ехэ дуратай байгаа гээшэб! Бидэнэр Бурханай үхибүүд гэжэ нэрлэгдэнэбди. Үнэхөөрөөшье тиимэбди! Газар дэлхэйнхин бидэниие Бурханай үхибүүд гэжэ мэдэнэгүй, юундэб гэдэл, Бурханиие тэдэ мэдэнэгүй бшуу.

²Инаг хайрата аха дүүнэрни, бидэ мүнөө Бурханай үхибүүд гээшэбди, теэд саашадаа ямар болохоннай үшөөл мэдэгдэнэгүй. Христосой ерэхэдэ тэрээндэл адли болохобди гэжэ ойлгонобди, юундэб гэдэл, бидэ тэрэниие үнэн бодото зандань харахабди.

³Христосто иимэ этигэл найдабаритай байгаа хаа, алишье хүн өөрыгөө арюудхана, ушарынь гэдэл, Христос арюун нангин байгаа.

⁴Нүгэл хилэнсэ хэгшэ хүн бүхэн гэмтэ ябадал гаргана; нүгэл хилэнсэ болбол гэмтэ ябадал мүн.

⁵Христос өөрөө нүгэл хээгүй аад, хүнүүдые хэһэн нүгэлһөөнь сүлөөлхээе ерээ гэжэ таанар мэдэнэт.

⁶Тэрээнтэй нэгэн хамта байгшад нүгэл хэдэггүй. Нүгэл хэгшэд Христосые хараагүй, мэдэрээгүй гээшэ.

⁷Үхибүүд аа, хэншье таанарые зүб харгыһаатнай бү хадууруулаг! Үнэн зүб юумэ хэгшэ Христостол адли үнэн зүб байгты.

⁸Нүгэл шэбэл хэгшэ шолмосхоо болоно, юундэб гэдэл, шолмос анханһаа хойшо нүгэл хилэнсэ хэдэг юм. Тиимэһээ шолмосой үйлэ уршагые үгы хэхын тула Бурханай Хүбүүн ерэнэн юм.



⁹Бурханһаа мүндэлэн гарагша нүгэл хэдэггүй, яахадааб гэхэдэ, тэрэ хүн Бурханай үршөөһэн шэнэ амидаралай ёһоор ажаһууна. Тэрэ хүн ондоо нүгэл хэхэггүй, ушарынь гэхэдэ, тэрэ Бурханһаа мүндэлөө.

¹⁰Бурханай үхибүүд шолмосой үхибүүд хоёр хоорондоо иимэ илгаатай: үнэн зүб юумэ хэдэггүй хүнүүд, өөрынгөө ахада дурагүй хүнүүд адли – Бурханай бэшэ юм.

Бэе бээдээ дуратай байгты

¹¹Бидэ бэе бээдээ дуратай байха ёһотойбди гэхэн мэдээсэл таанар анханһаа хойшо дуулаат.

¹²Бидэнэр Каин шэнги байха ёһогүйбди. Каин хадаа шоломосой түрэлэй байжа, дүүгээ алаа һэн. Юундэ тиигээб гэхэдэ, Каинай үйлэ хэрэгынь харатай муухай байгаа, харин дүүгэйн хэрэг үнэн зүб байгаа бшуу.

¹³Аха дүүнэрни, таанарта газар дэлхэйнхин дурагүй байна гэжэ бү гайхагты.

¹⁴Үхөөд амидыраат гэжэ бидэ мэдэнэбди, ушарынь хадаа, аха дүүнэртээ бидэ дуратайбди. Аха дүүнэртээ дурагүй хүнүүд үхэхэн зандаа үлэнэ.

¹⁵Аха дүүгээ үзэн ядагша алууршан гэшэ. Харин ямаршые алууршан мүнхын амидаралда хүртэдэггүй гэжэ таанар мэдэнэт.

¹⁶Өөрынгөө ами наһые бидэнэй түлөө Христосой үгэһыень дуран гэшэ гэжэ бидэ ойлгонобди. Тиин бидэшые аха дүүнэрэйнгээ түлөө ами наһаяа үгэхэ ёһотойбди.

¹⁷Энэ дэлхэйдэ юумээр дутадаггүй баян һуудаг хүн аад, аханар дүүнэрэйнгээ үгытэй ядуу һуухадань ханаагаа зободоггүй хүн: Бурханда дуратайб гэжэ яагаад хэлэжэ шадаха гэшэб?

¹⁸Үхибүүдни, иигэжэ дэмы хоһон ама хэлээрээ дурлаһан хэбэр үзүүлээд бү байя, харин үнэхөөрөө дуратай байһанаа үнэн бодото хэрэгээрээ харуулая!

Бурханай урда этигэл зоригтой байха



19-20 Үнэн бодото хэрэгтэ хабаатай байhanaa, Бурханай урда этигэл зоригтой байhanaa яжа мэдэхэбиди. Хэрбээ маниие зүрхэ сэдхэлнай зэмэлээ наа, Бурхан бидэнэй зүрхэ сэдхэлнээ ехэ, бүгэдые мэдэгшэ юм гэжэ бидэ ойлгонобди.

21 Инаг хайрата аха дүүнэрни, хэрбээ зүрхэ сэдхэлнай маниие зэмэлээгүй наань, Бурханай урда этигэл зоригтой байхабди.

22 Тиин бүхы эриhэн юумээ Бурханнаа абанабди, юундэб гэбэл, тэрэнэй захяа заабариие бээлүүлэн сахинабди, тэрэндэ найшаагдаха юумэ хэнэбди.

23 Бурханай захяа заабаринь иимэ: Бурханай Хүбүүн Иисус Христосто этигэхэ, Иисус Христосой захиһан ёһоор бэе бээдээ дуратай байха зэргэтэйбди.

24 Бурханай захяа заабариие сахигшад тэрээнтэй нэгэн хамта байна, Бурхан тэдэнтэй нэгэн хамта байна. Иигэжэл Бурханай бидэнтэй нэгэн хамта байдагые бидэ мэдэхэ аргатайбди, бидэндэ Бурханай заяаһан Нангин һүлдэн ашаар мэдэхэ аргатайбди.

Иоаннай 1-дэхи хандалга 4

Бурханай хүлдэ, Бурханай дайсанай хүлдэ

1 Инаг хайрата аха дүүнэрни, али бүхы хүлдэнүүдтэ бү этигэгты, Бурханнаа эльгээгдэһэн хүлдэнүүд гү гэжэ шалгагты, юундэб гэбэл, худал хуурмаг лүндэншэд газар дэлхэй дээрэ олон болошонхой.

2 Бурханай хүлдые иигээд мэдэхэт: Иисус Христос хүн боложо, газарта ерээ гэдэг хүлдэ бүхэн Бурханай хүлдэ мүн.

3 Иисусые хүн боложо, газарта ерээгүй гэдэг хүлдэ Бурханай бэшэ, харин Христосой дайсанай хүлдэ гэшэ. Тиимэ хүлдэ тухай таанар дуулаһан байнат, тэрэ хүлдэ газар дэлхэйдэ ерэхэ гэжэ таанар мэдэнэт, тэрэнь дэлхэйдэ ерэшоод байна.

⁴Үхибүүд, таанар Бурханһаат, тиимэхээ худал хуурмаг лүндэншэдые диилээт, яахадааб гэбэл, таанарай досоо байдаг Бурхан газар дэлхэйдэ байдаг шолмосхоо ехэ юм.

⁵Тэдэ хуурмаг лүндэншэд газар дэлхэйнхин мүн, юундэб гэбэл, тэдэнэр газар дэлхэйнхинэй хэлээр дуугаралсана, газар дэлхэйнхин тэдэ лүндэншэдэй хэлэһые шагнана.

⁶Харин бидэнэр Бурханай хүнүүдбди. Тиимэхээ Бурхание мэдэгшэнь бидэниие шагнана, Бурханай бэшэ хүн шагнанагүй. Иигэжэл бидэ үнэн зүбэй хүлдые худал хуурмагай хүлдэхөө илгаруулан мэдэнэбди.

Бурхан гэшэ дуран мүн

⁷Инаг хайрата аха дүүнэрни, бэе бээдээ дуратай байябди, юундэб гэбэл, хайра дуран Бурханһаа заяагдаһан юм. Али бүхы хайра дуратай зон Бурханһаа түрөө, Бурхание мэдэнэ.

⁸Хайра дурагүй хүн Бурхание мэдэнэгүй, яахадааб гэхэдэ, Бурхан гэшэ дуран мүн.

⁹Бидэндэ дуратай байдагаа Бурхан иигэжэ харуулаа: Хүбүүгээрнь дамжан бидэнэй мүнхэдөө амиды ябахын тула Бурхан ори ганса Хүбүүгээ газар дэлхэйдэ эльгээгээ.

¹⁰Дуран гэшэ иимэ: Бурханда бидэ дурлаагүйбди, Бурхан өөрөө бидэндэ дурлажа, бидэнэй хэһэн нүгэлэй түлөө үргэл болгон, өөрынгөө Хүбүүе эльгээгээ.

¹¹Инаг хайрата аха дүүнэрни, Бурханай иимэ ехээр манда дурлаһан хадань бидэшье бэе бээдээ дуратай байха ёһотойбди.

¹²Бурхание хэншье хээээшье хараагүй юм. Теэд хэрбээ бидэнэй бэе бээдээ дуратай байхада, Бурхан бидэнтэй нэгэн хамта байна гэшэ. Бурханай дураниинь бидэнэй зүрхэ сэдхэлдэ тон ехэ юм.

¹³Бурхан бидэнтэй нэгэн хамта байна гү, бидэ Бурхантай нэгэн хамта байна гүбди гэжэ маанадта Бурханай заяаһан Нангин хүлдөөрнь мэдэнэбди.



¹⁴Эсэгэ Бурхан газар дэлхэйе Абарагша болгон, Хүбүүгээ эльгээгээ гэжэ бидэ хараабди, гэршэлэн баталнабди.

¹⁵Иисус болбол Бурханай Хүбүүн гэжэ мэдэрдэг хүн Бурхантай нэгэн хамта байна, Бурхан тэрэ хүнтэй нэгэн хамта байна.

¹⁶Бидэндэ Бурхан дуратай гэжэ мэдээд, бидэ тэрэ дурандань этигэн найданабди. Бурхан болбол дуран гээшэ. Хайра дуратай хүн Бурхантай нэгэн хамта байдаг, Бурхан тэрэ хүнтэй нэгэн хамта байдаг, Бурхан тэрэ хүнэй досоонь байдаг.

¹⁷Энээгээрээ дуран бидэнэй зүрхэ сэдхэлдэ тон ехэ байна. Тиимэхээ Зарга шүүбэрийн болохо Үдэрые бидэ айнгүйгөөр угтахабди, юундэб гэбэл, энэ дэлхэйдэ бидэнэр Христостол адляар ажаһуунабди.

¹⁸Дуран айхые мэдэдэггүй: ёһотой дуран айлтые зайлуулдаг, яахадааб гэбэл, айха гээшэ хэһээлтэтэй холбоотой, тиигээд хэн айнаб, тэрэ хүн дуранай эрхим шанарые туйлаагүй гээшэ.

¹⁹Бидэ Бурханда дуратайбди, юундэб гэбэл, бидэндэ түрүүшээр Бурхан дурлаа.

²⁰«Би Бурханда дуратайб» гэдэг аад, өөрынгөө ахада дурагүй хүн худалша гээшэ. Ахаяа хаража байгаад, тэрээндээ дурагүй хүн Бурхание хараагүй аад, Бурханда дурлахагүй бшуу.

²¹Бидэндэ Бурхан иимэ захяа заабари үгөө: Бурханда дуратай хүн ахадаашье дуратай байха ёһотой.

Иоаннай 1-дэхи хандалга 5

Бурханда этигэдэг хүн оршолонто дэлхэйе диилэнэ

¹Иисус Бурханай табисуурта мүн гэжэ этигэдэг хүн бүхэниие Бурхан бүрилдүүлээ. Эсэгэ Бурханда дуратай хүн Бурханай үхибүүдтэшье дуратай юм.

²Бурханай үхибүүдтэ дуратай байһанаа иигэжэ мэдэнэбди: Бурханда дуратай хаа, тэрэнэй захяа заабариеннь сахинабди.



³Бурханай захяа заабарие сахихадаа, Бурханда бидэ дуратай байнабди. Бурханай захяа заабаринь хүшэр хүндэ бэшэ юм.

⁴Бурханһаа түрэхэн хүн оршолонто дэлхэе диилэгшэ юм. Бидэнэй этигэл найдабари болбол илалта мүн. Тэрэ этигэлэйнгээ ашаар бидэ оршолонто дэлхэе диилэнэбди.

⁵Иисус Бурханай Хүбүүн гэжэ этигэдэг хүн лэ дэлхэе илагша юм.

⁶Тэрэ бидэндэ уһа шуһан хоёрой ашаар ерээ. Тэрэмнай Иисус Христос мүн. Иисус уһанһаа гадна, уһа шуһан хоёртой хамта ерээ. Энээниие Нангин һүлдэ гэршэлнэ, яахадааб гэбэл, Нангин һүлдэ үнэн бодото зүйл мүн.

⁷Тэнгэридэ гурбан гэршэ бии бшуу: Эсэгэ, Үгэ, Нангин һүлдэ гурбан. Эдэ гурбан гэршэнүүд нэгэл юумые баталан гэршэлнэ.

⁸Газар дээрэ һүлдэ, уһан, шуһан гурбан гэршэлнэ.

⁹Бидэ хүнэй гэршэлһыеел хараадаа абанабди, харин Бурханай гэршэлгэ хүнэй гэршэлгэхээ холо шухала юм. Энэ Бурханай өөрын гэршэлгэ мүн: Бурхан өөрынгөө Хүбүүн тухай гэршэлнэ.

¹⁰Бурханай Хүбүүндэ этигэдэг хүнэй зүрхэ сэдхэлдэнь энэ гэршэлгэнь байна. Харин Бурханда этигэдэггүй хүн Бурханиие худалша мэтэ харуулжа байна, ушарын гэбэл, Бурханай өөрынгөө Хүбүүн тухай гэршэлхэдэнь, тэрэ хүн этигээгүй.

¹¹Иимэ гэршэлгэ байгаа: Бурхан бидэндэ хэтэ мүнхын амидарал олгоо. Бурханай Хүбүүн хэтэ мүнхын амидаралай эхин мүн.

¹²Бурханай Хүбүүнтэй хүндэ хэтэ мүнхын амидарал үршөөгдэхэ, Бурханай Хүбүүнгүй байһан хүндэ тиимэ амидарал үгтэхэгүй.

Хэтэ мүнхын амидарал тухай

¹³Таанадта хэтэ мүнхын амидаралай үршөөгдэһые мэдэжэ байхынтнай тула Бурханай Хүбүүнэй алдар нэрэдэ этигэгшэ таанарта хандан, эдэ бүгэдые би бэшэбэб.



14Тиимэһээл Бурханай урда этигэл зоригтой байхабди. Бурханай дура хүсэлөөр бидэнэй юушые эрээ наа, Бурхан дуулажа байна. Энээндэ бидэ этигэн найданабди.

15Юу эриһыемнай Бурханай дуулажа байһые мэдэжэ байһан туладаа, Бурханһаа эриһэн бүхы юумые бидэ абахабди гэжэ мэдэнэбди.

16Хэрбээ ахань үхэлдэ хүргэдэггүй нүгэл хэнэ гэжэ мэдэжэ хаража байһан хүн Бурханда мүргэг, тиихэдэнь Бурхан тэрээниие амиды байлгаха. Үхэлдэ хүргэдэггүй нүгэл хэһэн хүн тухай эндэ би хэлэжэ байнаб. Харин үхэлдэ хүргэдэг нүгэл гэжэ бии юм. Тиимэ нүгэл хэгшэдэй түлөө зальбарха ёһотой гэжэ би эндэ хэлэнэгүйб.

17Үнэн бэшэ алишые үйлэ нүгэл гэшэ, теэд үхэлдэ хүргэдэггүй нүгэл гэжэ бии юм.

18Бурханһаа түрэхэн хүн бүхэн нүгэл хэгшэгүй гэжэ бидэ мэдэнэбди: Бурханһаа түрэхэн хүниие Бурханай Хүбүүн хаража аршалжа байдаг. Шолмос тэрэ хүндэ муу юумэ хэжэ шадахагүй.

19Бидэ Бурханай үхибүүдбди, бүхы газар дэлхэйнхин шолмосой эрхэ мэдэлдэ байна гэжэ мэдэнэбди.

20Ёһотой Бурханиие бидэнэй танидаг болохын тула маанадта Бурханай Хүбүүн ерэжэ ойлгуулаа гээд бидэ мэдэнэбди. Бидэ Бурхантай нэгэн хамта, тэрэнэй Иисус Христостой нэгэн хамта байнабди. Иисус Христос хадаа ёһотой Бурхан гэшэ, хэтэ мүнхын амидарал гэшэ.

21Үхибүүд, өөһэдыгөө хуурмаг бурхадһаа хэргылжэ ябагты.

Иоаннай 2-дохи хандалга

Иоаннай 2-дохи хандалга 1

Амаршалга

¹Нүзэглэгшэ бүлгэмэй ахалагшаһаа – Бурханай шэлэжэ олоһон Хатанда. Танда, танай үхибүүдтэ би үнэхөөрөө дуратайб. Гансашье би бэшэ, мүн үнэн зүб юумые мэдэһэн бүхы хүнүүд таанадта дуратай.

²Юундэб гэбэл, Бурханай үнэн зүбынь бидэнтэй байна. Тэрэ үнэн зүбынь хододоо маанадтай хамта байлсаха.

³Үнэн зүбөөр, бэе бээдээ дуратайгаар ажаһуугша бидэндэ Эсэгэ Бурханай, тэрэнэй Хүбүүн Иисус Христосой дураниинь, үршөөл хайрань, энхэ тайбан байдалынь үршөөгдэхэ.

Бурханай үнэн зүбынь, тэрэнэй дуран тухай

⁴Эсэгэ Бурханһаа бидэнэй зааһан заабаряар, үнэн зүбөөр ажаһуугшадые шинии үхибүүдэй дунда олоод, би ехэ баярлааб.

⁵Бэе бээдээ дуратай байял даа гэжэ одоо би шамайе, хүндэтэ Хатан, гуйнаб. Мүнөө минии бэшэжэ байһан юумэн шэнэ захяа заабари бэшэ юм. Энэ заабариие бидэ анханһаа хойшо абаабди!

⁶Эсэгэ Бурханай захяа заабаряар бидэнэй һуугаа һаа, тэрэмнайл дуран гээшэ. Энэмнайл анханһаа хойшо таанарай дуулагша захяа заабари мүн, тиин энэ захяа заабариие сахиха ёһотойбди.

⁷Юундэб гэбэл, олон тоото мэхэшэд газар дэлхэй руу ошобо. Иисус Христосые хүн боложо газарта ерэһые тэдэ мэдэрнэгүй. Тиимэ хүнүүд мэхэшэд, Христосой дайсад гээшэ.

⁸Тиимэхээ бээе нарин нягтаар абажа ябагты, юунэй түлөө бидэнэй ажаллаһые миин бү хосороогты, теэд ажалайнгаа түлөөһые хүсэд дүүрэнээр абаха гэжэ оролдогты.

⁹Христосой хургаалһаа холодон, тэрэ хургаалые дахадаггүй хүн Бурхангүйгөөр ажаһууна гээшэ. Харин Христосой хургаалые хэн

баримталан сахинаб, тэрэ хүн Эсэгэ Бурхантай, тэрэнэй Хүбүүнтэй нэгэн хамта байна.

¹⁰Хэрбээ Христосой хургаалгүйгөөр танда хэн нэгэнэй ерээ наа, тэрэ хүниие гэртээ бү оруулагты, тэрээнтэй бү мэндэшэлэлсэгты.

¹¹Тэрээнтэй мэндэшэлэлсэхэн хүн тэрэнэй хорото муухай хэрэгтэ өөрөө хабаадалсаһан болоно.

Түгэсхэл

¹²Таанарта бэшэхэ гэнэн юумэн намда олон бии. Теэд саарһа, бэхэ хэрэглэжэ бэшэхэ дурагүй байнаб. Би өөрөө ерээд, таанартай хөөрэлдэхэб гэжэ найданаб. Тиихэдэл бидэнэй баяр баясхалан хүсэд дүүрэн болохо.

¹³Мүн баһал Бурханай шэлэжэ олоһон эгэшиншни үхибүүдтэ мэндые хүргэнэм.



Иоаннай 3-дахи хандалга

Иоаннай 3-дахи хандалга 1

¹Һүзэглэгшэ бүлгэмэй ахалагшаһаа – инаг дуратай Гайда! Би шамда үнэн сэдхэлһээ дуратайб.

²Минии инаг хайрата дүү, шинии сэдхэл ханаанай сэбэр хайхан байдагтал адляар, шинии ажабайдал баһал хайн байһай. Шинии бэе хододоо элүүр мэндэ байһай. Эдэ бүгэдын түлөө Бурханда мүргэнэб.

³Бодото зүб хэрэгтэ ши үнэн сэхэ зандаа байнаш гэжэ дуулахадаа, би ехэ баярлааб. Энэ һониние намда ерэн аха дүүнэр дуулгаа.

⁴Минии үхибүүд бодото зүб хэрэгтэ үнэн сэхэ зандаа гэжэ дуулахадаа, энээнһээ бүри ехэ баяр баясхалан намда байдаггүй юм.

Гай гэгшые магтан

⁵Инаг хайрата дүүмни, аха дүүнэрэйнгээ түлөө, харгы замда ябагшадай түлөө шинии бүтээдэг али бүхы ажал хэрэгшни шинии үнэн сэхэ байдагые батална.

⁶Шинии дуратай байһые аха дүүнэршни һүзэглэгшэдэй бүлгэмэй урда хэлээ. Бурханай зохидшоомо харгы замаа тэдэ аяншадайнгаа үргэлжэлүүлхэдэ туһалыш даа.

⁷Тэдэ хүнүүд Христосой алдар нэрын лэ түлөө харгы замда ябаа, бусад арадуудһаа тэдэ туһаламжа абангүй гараа бшуу.

⁸Үнэн бодото ябадалай түлөө хамта ажаллахынь тула тиимэ хүнүүдые хайшаан дэмжэхэ ёһотойбди.

Иоанн Диотрефые буруушаана, Деметриие хайшаана

⁹Һүзэглэгшэдэй бүлгэмдэ тобшо тэды бэшэг бэшээб, тээд ноёрхохо дуратай Диотреф мание тооногүй.

¹⁰Хэрбээ ерэхэ аргатай болоо һаа, тэрэнэй хэдэг бузар муухай үйлэ хэрэгые, бидэн тухай тэрэнэй тараадаг шал худал хардалгануудые би тэрээндэ хануулхаб. Тиин Диотреф энээгээр ханаагаа ханаагүй: аха дүүнэриемнай өөрөө тэрэ угтажа абанагүй, бэшэнүүдэйшые угтажа

абаха гэхэдэнь хаалта хэнэ. Хэтэрхэдээ, аха дүүнэрыемнай хүзэгтэнэй бүлгэмһөө үлдэжэ гаргана.

11Инаг хайрата дүүмни, муу юумэ хэгшэдые бү дахаарай, хайн юумэ хэгшэдые дахаад ябаарай. хайн юумэ хэгшэд Бурханай хүнүүд гээшэ. Харин муу юумэ хэгшэд Бурхание хараа үзөөгүй юм.

12Деметри тухай бултадаа имагтал хайн юумэ хэлэнэ. Үнэн зүб ушар энээниие мүн лэ гэршэлнэ. Бидэшье баһа тиигэжэл хэлэнэбди, бидэнэй хэлэнэн гэршэ үгэнүүд үнэн зүб байдаг гэжэ ши мэдэнэш.

Түгэсхэл

13Шамда бэшэхэ гэхэн юумэн намда олон бии, теэд бэхэ, гуурһа хэрэглэжэ бэшэхэ дурагүй байнаб.

14Һаядаа шамтай нюур нюураараа уулзахабди гэжэ найданаб, тиихэдээ хөөрэлдэхэбди.

15Энхэ амгалан байгаарай. Нүхэдшни шамда амар мэндые хүргэнэ. Шишье хажуудахи нүхэдөө нэрэ нэрээрнь дурдажа, мэндые хүргөөрэй.



Иудын хандалга

Иудын хандалга 1

Амаршалга

¹Эсэгэ Бурханай хайра дурада хүртэһэн, Иисус Христосой харьяалда байһан Бурханда дуудуулһан хүнүүд аа, таанадые Иисус Христосой зараса, Яковай дүү Иуда амаршална.

²Үршөөл хайра, энхэ тайбан ба хайра дуран таанадай дунда оршожо байг лэ!

Хуурмаг хургагшадһаа хэргылнэ

³Хүндэтэ аха дүүнэрни, бидэ бүгэдын абарагдаха тухай би бэшэхэ ханаатай байгаа. Тиихэ зуураа Бурханай зондо нэгэтэ, гэхэдэ хэтын хэтэдэ үгтэһэн хүзэгэй түлөө таанад тэмсэхэ ёһотойт гэжэ уряалан бэшэхэ хэрэгтэй гэжэ тоолоноб.

⁴Өөһэдынгөө харата хэрэгүүдые сагааруулха зорилготойгоор Бурханаймнай буян хэшэг тухай хургаалые хазагайруулдаг, буруу болгодог, манай Захирагша болон Дээдын Эзэн Иисус Христосые буруушаадаг хүзэг шүтөөнгүй зарим хүнүүд бидэнэй дунда шургажа ороо. Тэдэ зон хэһээлтэдэ орохо гэжэ Нангин Бэшэгтэ эртэ урдын саһаа хойшо бэшээтэй байдаг.

⁵Дээдын Эзэнэй өөрынгөө арадые Египедһээ гаргажа абарһан тухайнь, тиигээд тэрээндэ хүзэглэдэггүй зоние үгы хэһэн тухайнь ханагты.

⁶Эрхэ түрээ алдаад, байраяа орхиһон Эльгээмэлнүүдые Бурхан харанхыда хэтын хэтэдэ гэнжээр хүлиһэн тухайнь ханагты. Тэдэ Эльгээмэлнүүд агууехэ үдэр зарга шүүбэридэ оротороо тэндэ байха юм.

⁷Тэдэндэл адли зальхай забхай ажамидаралтай Содом, Гоморро хотынхидой, хажуудахи хотонуудайнь зоной мүнхын галда шатан, аймшагтай саазада хүртэһэн тухай ханагты. Таанадай эдэ бүхэниие мэдэжэ байһаншье хаатнай, би хануулжа хэлээб.

⁸Тэдэнэй хэһээлтэ хүн бүхэндэ һэргылэмжэ болоно. Тэдэ зондол адли өөһэдынгөө үзэгдэлнүүдые баримталан, хуурмаг һургагшад бээ бузарлуулна, засаг буруушаана, огторгойн хүсэнүүдые муушална.

⁹Гэхэтэй сасуу Михаил гэдэг Бурханай ахалагша Эльгээмэлшые Моисейн махабад бэе тухай шолмостой арсалдахадаа, хорото үгөөр тэрэниие зэмэлжэ шадаагүй юм, тэрэ гансал: «Дээдын Эзэн шамайе хориг лэ!» – гэжэ хэлээ ха юм.

¹⁰Харин тэдэ хуурмаг һургагшад ойлгохогүй юумэнүүдээ хорото үгэнүүдээр хараажа, хэлэгүй малдал мэтэ зүнгөөрөө мэдэдэг юумэнүүдээрээ өөһэдыгөө хосорооно.

¹¹Тэдэнэр Каинай замаар ябана, Валаамда адли алта мүнгэндэ шунан, зониие буруудхана, Корейдэ адли зүрюу зан гаргаад, хосорно. Тэдэнэр гай зоболон амсахал.

¹²Тэдэ зон бузарта адли юм. Таанарай аха дүүнэрээрээ хамта хоол барихада, тэдэнэр өөһэд тухайгаал бодон, эшэхэ нюургүйгөөр гүзээгээ дүүргэн, таанадые бузарладаг юм. Тэдэнэр һалхинда туугдаһан бороогүй үүлэнүүд юм. Тэдэнэр үндэхэтэйгөө абтажа хаягдаһан, голоороо хаташаһан, намартаашые үрэжэлгүй модод юм.

¹³Тэдэнэй бузар хэрэгүүд дошхон далайн долгиной хөөһэн мэтэ эли. Тэдэ мүнхын харанхыда байха табилантай, төөриһэн одод мэтэ.

¹⁴Тэдэнэр тухай Адамай долоодохи үеын үри һадаһан болохо Енох иигэжэ уридшалан хэлээ: «Тоогүй олон гэгээнүүдтэйгээ хамта Дээдын Эзэн ерэнэ.

¹⁵Бүхы хүнүүдые шүүхээе, харата хэрэгүүдэйнь түлөө, өөрыень буруушаажа хэлэхэн зүрюу үгэнүүдэйнь түлөө Бурханда хүзэглэдэггүй нүгэлтэниие шүүмжэлэн элирүүлхээе ерэнэ».

¹⁶Тэдэнэр бүхы юумэндэ дурагүйсэхэн гэмэрэлдэгшэд, тэдэнэр ташаяангы хүсэлэнгүүдээ дахажа ажамидардаг, ёһорхуу омог

үгэнүүдээр өөһэдыгөө магтадаг, алта мүнгэндэ обтожо билдагуушалдаг юм.

Нүхэдөө нэргылнэ, захяа үгэнэ

¹⁷Хүндэтэ аха дүүнэрни, манай Дээдын Эзэн Иисус Христосой элшэнэрэй уридшалан хэлэһые ханажа ябагты.

¹⁸Һүүлэй үедэ харатай хүсэлэнгүүдээ хангадаг, таанадые наада барیداг хүнүүд бии болохо гэжэ тэдэнэр таанадта хэлэдэг хэн.

¹⁹Тэдэ зонһоо боложо хүнүүд эбээ таһалдаг, тэдэ зон махабад бэеынгээ хүсэлэнгүүдтэ хүтэлүүлэн, Нангин Һүлдэгүй ажамидардаг.

²⁰⁻²¹Харин таанад, хүндэтэ аха дүүнэрни, Дээдын Эзэн Иисус Христосой хизааргүй үршөөлөөрөө таанадта мүнхын амидарал үгэхыень хүлеэжэ байхадаа, өөһэдыгөө нангин хүзэг дээрэ һуурижуулан ургуулжа байгты. Нангин Һүлдын урмашуулгаар зальбаржа, Бурханда дуратай байгты.

²²Маргажа байһан зониие үршөөхые хэшээгты.

²³Хүнүүдые хэһээлтын галһаа аршалжа байгты. Бусад зониие үршөөжэ хайрлагты, тиибэшье тэдэнһээ болгоомжолжо, нүгэлөөр бузарлуулагдаһан хубсаһанһаань жэрхэжэ байгты.

Баяр хүргэжэ зальбарна

²⁴Таанадые нүгэл шэбэлдэ унахаһаатнай аршалжа, өөрынгөө Алдарай урда тээ хирэгүй сэбэр, баяртай юумэдые байлгажа шадаха,

²⁵Дээдын Эзэн Иисус Христосоор дамжан бидэниие абарһан ори ганса Бурханда анханһаа эхилээд, мүнөө саг болотор хэтын хэтэдэ алдар соло, һүр жабхалан, хаан түрэ, эрхэ засаг байһай! Болтогой!



Римэйхиндэ

Римэйхиндэ 1

1-7 Бурханай хайра дурада хүртэһэн, тэрэнэй нангин арадынъ байхаар дуудуулагдаһан Рим хотын бүгэдэ зон, таанадта Иисус Христосой зараса, элшэнгээр һунгагдаһан Павел бэшэнэ. Манай Эсэгэ Бурхан ба Дээдын Эзэн Иисус Христос таанадта үршөөл хайра ба амгалан тайбаниие үршөөг лэ! Бурхан һайн Мэдээсэл номнохыемни намайе шэлэжэ абаа юм. Нангин Бэшэг соо хэлэгдэһэнэй ёһоор Бурхан тэрэ һайн Мэдээсэлые урдань лүндэншэдөөрөө дамжуулан найдуулһан байгаа. Тэрэ Мэдээсэлые Бурханай Хүбүүн, манай Дээдын Эзэн Иисус Христос тухай. Иисус хүнэй бэе бээлхэдээ Давидай үри һадаһан боложо түрөө. Харин тэрэнэй хүр хүсэтэй Бурханай Хүбүүн байһыень, үхөөд амидырхадань Нангин һүлдэ харуулаа. Бүхы яһатаниие, тиихэдэ Иисус Христосой дуудаһан таанадые этигэл хүзэгтэй, мэдэлдэ оросотой болгохын тула Бурхан Хүбүүгээрээ дамжан, тэрэнэй аша туһада намайе элшэн болгон үршөөгөө юм.

8 Бүхы газар дэлхэйнхидэй танай этигэл хүзэг тухай дуулажа байһандань би Иисус Христосоор дамжуулан та бүхэнэй түлөө нэн түрүүн Бурханда баяр баясхалан хүргэнэб.

9-10 Зальбарха бүхэндөө таанад тухай дурдажа, таанадтай хэзээшьеб уулзуулхыень гуйдаг байһыемни Бурхан мэдэхэ. Би Хүбүүн тухайнь һайн Мэдээсэл номнон, үнэн зүрхэнһөө тэрээндэ алба хэнэ ха юмбиб.

11 Би таанадтай уулзажа, Бурханай һүлдын үршөөһэн аша буянгаар хубаалсахаяа аргагүй ехээр хүсэжэ байнаб. Тиигэбэл этигэл хүзэгтнай бэхижэхэ байгаа.

12 Этигэл хүзэгөөрөө бидэ бэе бээе урмашуулха байгаалди.

13 Аха дүүнэр, таанадта ошохо гэжэ минии оло дахин тэмүүлдэг байһые мэдэжэ байха ёһотойт. Гэхэдэ, нэгэл юумэн намда ходо һаалта болодог байгаа. Бусад арадуудай дунда хүнүүдые Христосто

хандуулдагтайгаал адляар таанадайшые дунда үрэ дүнтэйгөөр ажаллаха дуратай байгааб.

14-15 Хүнүүд хүмүүжүүлэгдэһэн гү, али хүмүүжүүлэгдээгүй гү, эрдэм ухаантай гү, али ном болбосоролгүй байна гү, илгаагүй юм. Би хүн бүхэндэ һайн Мэдээсэлые номнохо ёһотой хүм. Тиимэл ушарһаа би Римдэ байһан таанадташые ошожо номнохые аргагүй ехээр хүсэжэ байнаб.

Һайн Мэдээсэлэй һүр хүсэн тухай

16 Һайн Мэдээсэл тухай номнохоёо би эшэнэгүйб. Ушарынь юуб гэхэдэ, тэрэ һүзэглэһэн хүн бүхэниие, нэн түрүүн еврейнүүдые, тиихэдэ баһал бусад арадуудые абарха Бурханай һүр хүсэн юм.

17 Гансал этигэл һүзэгэй ашаар хүнүүдые Бурханай үнэн сэдхэлтэн болгодогынь һайн Мэдээсэл соо элээр харуулагдана. «Үнэн сэдхэлтэн этигэл һүзэгэйнгөөл ашаар ажамидарха», – гэжэ Нангин Бэшэг соо бэшээтэй.

Хүн түрэлхитэн гэмтэй

18 Нүгэлтэ болон бузар муухай юумэнүүдые үйлэдэжэ, үнэн зүбые даража байһан хүнүүдтэ ехэ уур сухалтай байһанаа Бурхан тэнгэриһээ харуулна.

19 Бурхан тухай мэдэжэ болохо бүхы юумэнүүдые тэдэ зон мэдэнэ, юундэб гэхэдэ, тэдэ зондо бултандань Бурхан өөрыгөө элирүүлэн харуулаа юм.

20 Бурханай харагдадаггүй мүнхэ һүр хүсэн болон Бурханай мүн шанарынь газар дэлхэйн зохёон бүтээгдэхэһээ эхилэн тэрэнэй бүхы бүтээһэн юумэнүүдэй ашаар эли харуулагдана. Тиимэһээл үнөөхи зондо өөһэдыгөө хамгаалха юумэн байхагүй.

21 Тэдэнэр Бурхание мэдэһэншые һаа, Бурханда алдар соло дуудаагүй, баяр баясхаланшые хүргөөгүй. Тэдэнэй һанал бодолынь удхагүй хоһон боложо, тэнэг зүрхэ сэдхэлынь харанхыда хушагдаба.

²²Тэдэнэр өөһэд тухайгаа ухаантай сэсэнбди гэнэ, үнэн дээрээ тэдэнэр үбэштэй тэнэгүүд юм.

²³Тэдэнэр алдарта, мүнхэ Бурханда хүгэдэхын орондо мүнхэ амидаралгүй хүнүүдтэ гү, али шубуудта, амитадта, мүлхигшэдтэ адли онгонуудта шүтэнэ.

²⁴Тиимэхээ Бурхан тэдэ зоние өөһэдынь замаар ябуулаа. Тэдэнэр хэхэ дуратай юумээ хээ, бузар муухай һанал бодолнуудынь эшэхээр юумэнүүдые хүүлэн, бэеыень бузарлуулжа байгаа.

²⁵Тэдэнэр Бурхан тухай үнэн зүбые худал хуурмагаар һэлгээ, тиигээд хэтын хэтэдэ магтаал солотой байха Бүтээгшэ Бурханда шүтэхын орондо Бурханай бүтээһэн юумэнүүдтэ шүтэжэ байна.

²⁶Тиигэхэдэнь өөһэдынгөө хүсэлэнгүүдые дахан ажамидархадань Бурхан тэдэндэ һаалта хээгүй. Тэдэнэй эхэнэрнүүдыньше дэлхэйн жама ёһоор хурисалда орохоёо болёод, юрэ бусын аргаар хурисалда ородог болобо.

²⁷Эрэшүүлшые тон тиигэжэл ябадаг болоо. Тэдэнэр эхэнэрнүүдтэй унтахаяа болёод, эрэ хүнтэй унтахые аргагүй ехээр хүсэдэг болоо. Тиигэжэ эрэшүүл бэе бээтэйгээ эшэмээр юумэ худхана, тиигээд һүүлэй һүүлдэ буруу ябадалнуудайнгаа түлөө хэхээлтэдэ хүртэнэ.

²⁸Тэдэ зоной Бурхан тухай бодожо байхаяа арсаһан хадань тэдэнэй тэнэг хоһон ухаан бодолойнгоо хүсэлэнгөөр ябахадань Бурхан һаалта хээгүй. Тиимэхээл тэдэ зон хэхэ ёһогүй юумэнүүдые хэнэ.

²⁹Тиимэхээл тэдэнэр нүгэл шэбэлдэ унаһан, зальхай забхай ябадалтай, алта мүнгэндэ шунаһан, хара һанаатай зон. Тэдэнэр атаархадаг, аладаг, хэрүүл ама гаргадаг, худалаар хэлэдэг, харата ааша гаргадаг, хүниие хардадаг,

³⁰хоблодог, Бурханда дурагүй байдаг, хүниие доромжолдог, өөрөөрөө омогорходог, һайрхадаг, муу муухай юумые ходо һанаашалжа байдаг, аба эжынгээ үгэ дууладаггүй юм.

³¹Тэдэнэр тэнэг хооһон, хэлэһэн үгэдөө хүрэдэггүй, хүниие үршөөхэ, хайрлаха гэжэ мэдэдэггүй юм.

³²Тиимэ юумэ үйлэдэжэ байһан хүн бүхэн үхэлдэ хүртэхэ табилантай гэжэ Бурханай хэлэһые мэдэжэ байһаншье хаа, тэдэнэр нүгэлтэ юумэ хэжэл байдаг, үшөө тиихэдэ бусад зониие тиимэ юумэ үйлэдүүлхэдэ түлхидэг юм.

Римэйхиндэ 2

Бурханай зарга шүүбэри

¹Заримантнай буруу юумэ хэжэ байһан зониие шүүбэрилдэг. Зүгөөр тиигэжэ байһандатнай таанадта ямаршье хүлисэл байхагүй. Бусад зониие зэмэлхэдээ, таанад өөһэдыгөө зэмэлнэт, ушарынь юуб гэхэдэ, таанад үнөөхил зонтойгоо адли буруу юумэ хэһэн гэмтэй болонот.

²Тиимэ мэтын юумэнүүдые үйлэдэжэ байһан хүнүүдые гэмнэн шүүбэрилжэ байһан Бурхан үнэн зүб юм гэжэ бидэ мэдэнэбди.

³Гэмнэжэ байһан хүнүүдтэйгээл тон адли юумэ үйлэдэжэ байхадаа таанад Бурханай хэһээлтэдэ хүртэхэгүйбди гэжэ үнэхөөрөө һанана гүт?

⁴Али таанад Бурханай агууехэ үршөөл хайра, хүлисэл, тэсэбэри тооногүй аалта? Таанадые өөртөө хандуулхын тула Бурхан танда үршөөл хайратай байна гэжэ мэдэнэгүй аалта?

⁵Харин таанад зүрюутэжэ, Бурханда хандахаяа арсанат. Тиигэжэ тэрэнэй уур сухалаа элирүүлхэ, газар дэлхэйнхидые гэмнэн шүүбэрилхэ үдэр хүрэтэр таанад өөһэдтөө бүрил муу хэһээлтэ бэлдэжэ байнат.

⁶Бурхан хүн бүхэнииемнай хэһэн хэрэгүүдээрнь шиидхэхэ юм.

⁷Һайн һайхан хэрэгүүдые бүтээжэ ябадаг, алдар соло, нэрэ түрэ, һүнэшгүй ажамидарал бэдэржэ байдаг зондо Бурхан мүнхын амидарал үршөөхэ.



⁸Харин өөһэд тухайгаал бододог, үнэн зүбые буруушаадаг, тийхэдэ буруу хэрэг үйлэдэхэ дуратай зондо Бурхан уур сухалаа, хоро шараяа харуулха.

⁹Харата бузар юумэ үйлэдэжэ байһан хүн бүхэндэ, нэн түрүүн еврей хүндэ, баһа ондоошые яһатанай хүндэ зоболон ба бэрхэшээл тудаха юм.

¹⁰Харин һайн һайхан юумэ бүтээжэ байһан хүн бүхэндэ, нэн түрүүн еврей хүндэ, баһа ондоошые яһатанай хүндэ Бурхан алдар соло, нэрэ түрэ, амгалан байдал үршөөхэ юм.

¹¹Бурхан яһа илгадаггүй юм!

¹²Бусад арадуудта Моисейн Хуули байгаагүй. Тэдэнэр Хуулигүйгөөр нүгэл шэбэл хээ, тиимэхээ Хуулигүйгөөр хосорхо. Еврейнүүд Хуулитай байгаа. Тэдэнэр Хуули доро нүгэл шэбэлээ хээ, тиин Хуулиин ёһоор гэмнүүлэн шүүлгэхэ юм.

¹³Хуули юрэ шагнажа байһан хүнүүд бэшэ, харин тэрэниие сахижа байһан хүнүүд Бурханай урда үнэн сэдхэлтэй байха.

¹⁴Бусад арадуудай зарим хүнүүд Хуулигүй байһаншые һаа, Хуулиин заабаринуудые зүнгөөрөө мэдэн сахижашые байдаг. Тиимэхээ тэдэнэр Хуулигүй байһаншые һаа, сэдхэл дотороо хуулитай байһанаа харуулна.

¹⁵Тэдэнэр өөрынгөө үйлэ хэрэгүүдээр Хуулиин эрилтэнүүдэй зүрхэ сэдхэлдэнь бэшээтэй байһые харуулна. Тэдэнэй һэшхэлшые тэрэ ушар гэршэлнэ: заримдаа һанал бодолнуудынь тэдэниие зэмэлнэ, заримдаа хамгаална.

¹⁶Тон энээндэл адляар номноһон һайн Мэдээсэлэймни ёһоор тэрэ Үдэр Иисус Христосой ашаар бүхы хүнүүдэй нюуса һанал бодолнуудыень Бурхан гэмнэн шүүхэ юм.

Еврейнүүд болон Хуули

¹⁷Заримантнай өөһэдыгөө еврейби гэжэ нэрлэнэ, Хуулида найдана, Бурханаар бахархана.

- ¹⁸Өөхэдыгөө яаж абажа ябабалтнай Бурхан найшаахаб гэжэ мэдэнэт, Хуули шудалан, үнэн зүбые илгадаг болобот.
- ¹⁹Һохор хүнүүдэй хүтэлэгшэдынь, харанхыда ябагшадай гэрэл туяань гээшэбди гэжэ өөһэд тухайгаа бата этигэлтэй байнат.
- ²⁰Хуули соо эрдэм ухаанай ба үнэн зүйлэй байхада таанад тэнэг зондо заабарилха, залуушуулые һургаха аргатайбди гэжэ бодонот.
- ²¹Бусадые һургадаг аад лэ, юундэ өөһэдөө һуранагүйбта? Хулгай хэжэ болохогүй гэжэ номножо байгаад, өөһэдөө хулгай хэнгүй байдаг аалта?
- ²²Гэрлэхэдээ нүхэртөө үнэн сэхэ байха хэрэгтэй гэжэ хүнүүдтэ хэлээд, өөһэдөө үнэн сэхэ байдаг аалта? Таанад онгонуудые үзэжэ яданат, үшөө тиихэдэ хүмэнүүдые тононот.
- ²³Таанад Хуулитай байһандаа бахарханат, гэхэтэй сасуу Хуули сахингүй Бурханай нэрэ гутаанат.
- ²⁴«Еврей таанадһаа боложо бусад арадууд Бурхание муудхана», – гэжэ Нангин Бэшэг соо хэлээтэй байдаг.
- ²⁵Бэлгээ отолуулһан ушарта Хуули сахижа байбалтнай, тэрэ отолуулга танда аша туһатай юм. Хэрбээ Хуули сахидаггүй байбал, отолуулаагүй зонһоо таанад юугээрээшье дээрэ бэшэт.
- ²⁶Хэрбээ отолуулаагүй хүнэй Хуулиин тогтоолнуудые сахижа байгаа һаа, Бурхан тэрэниие отолуулһантай адляар бодохо бэшэ аал?
- ²⁷Тиимэхээ хэзээшье отолуулаагүй Хуули сахидаг хүн бүхэн еврейнүүдые гэмнэхэ бэшэ аал? Таанад отолуулһан байнат, Хуулитай байнат, гэхэдэ таанад тэрэ Хуули сахинагүйт.
- ²⁸Гадна талаһаа еврейдэл адляар ажамидарһантнай, отолуулһан байдалтнай таанадые жэнхэни еврейнүүд болгоногүй.
- ²⁹Жэнхэни еврей болбол гансал махабад бээ отолуулһан бэшэ, харин зүрхэ сэдхэлэйнгээ гүн соо отолуулһан байха ёһотой. Энэнь Хуулиин

тогтоолнуудай бэшэ, харин Нангин Һүлдын ажал юм. Тиимэ хүн уладай магтаалда бэшэ, харин Бурханай магтаалда хүртэхые хүсэдэг.

Римэйхиндэ 3

¹Еврей байхада юугээрээ хайн юм? Отолуулһан байхада ямар аша тухатай юм?

²Алишье талаһаа хайн, илангаяа еврейнүүдтэ Бурханай хургаалай даалгагдаһаниинь шухала юм.

³Үнэн дээрээ тэдэнэй зариманиинь тэрэ хургаалда этигээгүй. Тиин тэдэнэй этигэл хүзэггүй байхада Бурхан найдабаригүй байха аал?

⁴Үгыл даа. Хүн бүхэнэй худал хуурмаг юумэ хэлэжэ байбашье, Бурхан үнэн зүбые хэлэдэг юм. «Хэлэһэншни үнэн зүб байһыеш баталха, Зарга шүүбэриин болоходо ши илажа гарахаш», – гэжэ Нангин Бэшэг соо Бурхан тухай хэлэгдэнэ.

⁵Хэрбээ Бурханай үнэн зүб байһые нүгэлтэ хэрэгүүднай элирүүлжэ байбал, бидэ юун гэжэ хэлэхэбибди? Уур сухалаа хүрөөд маанадые хэһээжэ байһан Бурхан буруу юумэ хэнэ аал? (Энэ оршолонгой зон тиигэжэ һурадаг юм).

⁶Үгыл даа. Бурхан үнэн зүб бэшэ һаа, газар дэлхэйнхидые яжа шүүбэрилхэб?

⁷«Хэрбээ манай буруу ябадал Бурханай үнэн сэхэ байһые харуулан, тэрээндэ агууехэ алдар соло олгожо байбалнь, юундэ Бурхан мүнөө болотор маанадые нүгэлтэн гэжэ нэрлэнэб»,

⁸үшөө «Нүгэлтэ юумэ үйлэдэжэ байя, тиигэбэл тэрэмнай хайн үрэ дүнтэй байха», – гэлдэнэбди гэжэ зарим зон маанадые зэмэлнэ. Зүгөөр Бурхан тэдэниие үнэн зүб зарга шүүбэридэ оруулха.

Хэншье үнэн сэдхэлтэн гэжэ тоологдохогүй

⁹Зай, хэлэһэн бүхы юумэмнай ямар удхатайб? Бидэ еврейнүүд бусад яһатанһаа дээрэ болоно гээшэ гүбди? Үгыл даа. Еврейнүүд бусад



яһатанай зондол тон адляар нүгэл шэбэлдэ хүтэлүүлэгдэдэг юм гэжэ би һаяхан хэлээ һэнби.

¹⁰Нангин Бэшэг соо иигэжэ хэлэгдэнэ: «Үнэн сэдхэлтэй нэгэшье хүн үгы, Бурханда һайшаагдаха нэгэшье хүн үгы,

¹¹Сэсэн ухаатай, Бурхание бэдэрһэн нэгэшье хүн үгы.

¹²Булта Бурханһаа хадуураа, Булта хэндээшье хэрэггүй болоо. Хэншье, нэгэшье хүн үнэн зүб юумэ хэнэгүй.

¹³Тэдэнэй үгэнүүдынь үхэлэй зам руу татадаг, Хэлэнүүдынь худал хуурмаг юумэ үгүүлхэдээ бэрхэ. Үгэ бүхэниинь могойн хэлэндэ адли аюултай.

¹⁴Тэдэ хорон үгэ, хараалһаа ондоо юумэ хэлэдэггүй.

¹⁵Тэдэнэр гэмтээхэ, алахадаа түргэн юм.

¹⁶Гэшхэһэн газартаал тэдэнэр һүйдхэл һүнэлгэ асардаг.

¹⁷Тэдэнэр эб найрамдалда ажамидархые мэдэхэгүй юм.

¹⁸Тэдэнэр Бурханһаашье айн хүрдэдэггүй юм».

¹⁹Хүн түрэлхитэнэй өөрыгөө сагааруулхаяа болихын тула, бүхы газар дэлхэйнхидые Бурханай зарга шүүбэридэ оруулхын тула Хуули соо хэлэгдэһэн бүхы юумэнүүд Хуулиин мэдэлдэ байһан хүнүүдтэ хандуулаатай гэжэ бидэ мэдэнэбди.

²⁰Юундэб гэхэдэ, Хуулиин тогтоолнуудые дүүргэжэ байһанаараа нэгэшье хүн Бурханда һайшаагдахагүй. Хуули болбол маанадай нүгэлтэй байһые мэдэрүүлхэ зорилготой юм.

Бурханай урда үнэн сэдхэлтэй байха тухай

²¹Харин мүнөө Бурханай урда үнэн сэдхэлтэй байха арга зам харуулагдаба. Тэрээн тухай Моисейн Хуулиин ба лүндэншэдэй гэршэлһэншье байбаль, тэрэ арга зам Хуулида ямаршье хабаагүй юм.

²²Иисус Христосто хүзэглэһэн этигэл хүзэгэйнь ашаар Бурхан хүн бүхэниие, ямаршье илгаагүйгөөр, үнэн сэдхэлтэнэй тоондо оруулна.



²³Ушарынь юуб гэхэдэ, хүн бүхэн нүгэл шэбэл хээд, Бурханай алдарта хүртэнэгүй.

²⁴Зүгөөр маанадые сүлөөлһэн Иисус Христосой ашаар бидэ Бурханай аша буянда хүртэн, үнэн сэдхэлтэй болонобди.

²⁵⁻²⁶Бурхан маанадтай эбтэй эетэй болохын тула Христосые тахил болгон эльгээгээ. Тиимэһээ бидэ тэрээндэ хүзэглэһэнэйнгөө ашаар Бурхантай эблэрнэбди. Бурхан урдань тэсэбэритэй, нүгэлтэнүүдые тоонгүй байһанаараа үнэн зүб байһанаа харуулба. Баһа Иисуста хүзэглэһэн зоние үнэн сэдхэлтэй гэжэ тоолоходоо Бурхан үнэн зүб байһанаа харуулна.

²⁷Зай, тиихэдээ юугээрээ бахархамнайб? Юугээршые бахархалтагүй. Хуули сахиханаараа үнэн сэдхэлтэнэй тоодо ороо гүбди? Үгыл даа. Этигэл хүзэгэйнгөө ашаар үнэн сэдхэлтэн болообди.

²⁸Ушарынь юуб гэхэдэ, хүн Хуулиин тогтоолнуудые дүүргэһэнээрээ бэшэ, харин этигэл хүзэгэйнгөө ашаар Бурханай урда үнэн сэдхэлтэй болодог гэжэ бидэ тоолонобди.

²⁹Али Бурхан гансал еврейнүүдэй Бурхан болоно гү? Тэрэ баһал бусад арадуудай Бурхан бэшэ аал? Тиимэл даа,

³⁰Бурхан ори ганса юм хадаа бүхы арадуудай Бурхан мүн. Тиин Бурхан бусад арадуудые еврейнүүдтэй тон адляар этигэл хүзэгэйнь ашаар өөрынгөө урда үнэн сэдхэлтэй байлгадаг юм.

³¹Тиихэдээ бидэ этигэл хүзэгөөрөө Хуули хүсэгүй болгоно гүбди? Үгыл даа, бидэ Хуули бүришые хүсэн түгэлдэр болгонобди.

Римэйхиндэ 4

Абраһам үльгэр жэшээ мүн

¹Зай, өөрынгөө үбгэ эсэгэ Абраһам тухай юун гэжэ хэлэхэбибди?

²Хэрбээ тэрэ хэһэн хэрэгүүдээрээ Бурханай урда үнэн сэдхэлтэн гэжэ тоологдобол, бахархаха юумэтэй байха. Гэхэтэй сасуу Абраһам тэрэ хэрэгүүдээрээ Бурханай урда хэзээшье бахархажа шадахагүй юм.

³«Абраһамай Бурханда этигэһэн хадань Бурхан тэрэниие үнэн сэдхэлтэнэй тоондо оруулаа», – гэжэ Нангин Бэшэг соо хэлээтэй байдаг.

⁴Хүдэлмэришэндэ түлэгдэһэн мүнгэн болбол бэлэг бэшэ юм. Тэрэ мүнгыг хүн хүлһөөрөө олоно.

⁵Хүнүүд хэһэн юумээрээ бэшэ, харин этигэл хүзэгөөрөө Бурханай урда үнэн сэдхэлтэн гэжэ тоологдохо юм.

⁶Хэһэн хэрэгүүдтэйнь холбонгүй хүниие үнэн сэдхэлтэн гэжэ Бурханай тоолоходонь, тиимэ хүниие Давид аза жаргалтай гэжэ нэрлэбэ.

⁷«Хара хэрэгүүдынь хүлисэгдэһэн, нүгэл шэбэлнүүдынь сагааруулагдаһан хүнүүд жаргалтай юм,

⁸Дээдын Эзэнэй хэһэн нүгэлнүүдыень хүндэ тохоогүй хаа, тэрэ хүн жаргалтай юм».

⁹Үнөөхи Давидай хэлээшэ аза жаргал гансал отолуулһан зондо хабаатай аал? Үгыл даа. Тэрэнь отолуулаагүйшье зондо адлихан хабаатай юм. «Абраһамай Бурханда этигэһэн хадань Бурхан тэрэниие үнэн сэдхэлтэнэй тоодо оруулаа», – гэжэ Нангин Бэшэг соо хэлэгдэһые бидэ дурдаа һэмди.

¹⁰Тэрэнь хэзээ ушарһан байгаа? Абраһамай отолуулһанһаа урда гү, али отолуулһан хойнонь гү? Отолуулһанайнь хойно бэшэ, харин отолуулхынь урда тээ болоһон байгаа.

¹¹Абраһам этигэл хүзэгэйнгөө түлөө үшөө отолуулхынгаа урда тээ үнэн сэдхэлтэнэй тоодо ороод, тэрэнээ баталан отолуулһан байгаа. Тиигэжэл Абраһам отолуулаагүй аад, Бурханда хүзэглэһэнэйнгөө

ашаар үнэн сэдхэлтэн гэжэ тоологдоһон бүхы хүзэглэгшэдэй эсэгэнь болоо юм.

¹²Тэрэнэй отолуулхынгаа урда тээ Бурханда хүзэглэдэгтэйнь адляар хүзэглэдэг отолуулһаншье хүн бүхэнэй эсэгэнь болоо юм.

хүзэглэгшэдтэ Бурханай үгэһэн найдуулга

¹³Бурхан Абраһамда, тэрэнэй үри һадаһадта газар дэлхэйе залгамжалан абахаш гэһэн найдуулга үгэһэн байгаа. Абраһамай Хуули сахижа байһан дээрэһэнь бэшэ, харин Бурханда хүзэглөөд, үнэн сэдхэлтэй болоһон хадань тэрэ найдуулга үгтэһэн байгаа.

¹⁴Хэрбээ тэрэ найдуулгын Хуули сахиһанай түлөө үгтэһэн байбалнь, этигэл хүзэг юуншье бэшэ, найдуулга ямаршье үрэ дүнгүй байха һэн.

¹⁵Хуули эбдэхэдэ Бурханай уур сухалынь хүрэдэг юм. Харин Хуулиин үгы байбал, тэрэниие эбдэхын аргагүй юм.

¹⁶Тиимэһээ найдуулга этигэл хүзэг дээрэ үндэһэлнэ, тиин Абраһамай бүхы үри һадаһадта, гансашье Хуули сахидаг бэшэ, харин Абраһамдал адляар хүзэглэһэн хүн бүхэндэ Бурханай агууехэ үршөөл хайраар тэрэ найдуулгань батаар үгтэбэ. Абраһам бултанаймнай эсэгэ.

¹⁷Нангин Бэшэг соо: «Би шамайе олон арадуудай эсэгээр табяаб», – гэжэ хэлээтэй байдаг. Үхэһэн юумые амидыруулдаг, байхагүй юумые захиралтаараа бии болгодог Бурханда хүзэглэһэн Абраһам манай эсэгэ юм.

¹⁸Найдаха шалтагаанайшье үгы байхада, Абраһам этигээ, найдаа, тиимэһээ «олон арадуудай эсэгэнь» болоо, Нангин Бэшэг соо хэлэгдэһэн ёһоор үри һадаһадынь одо мүшэдтэл адли тоогүй олон байха.

¹⁹Тэрэ үедэ Абраһам зуу хүрэхэ тооной байгаа, зүгөөр үхэхын наана болоһон махабад бэе тухайгаа, үри хүүгэдые түрэхэ сагайнь үнгэрһэн Сарра тухайгаа бодоходоо, тэрэнэй этигэл хүзэгынь һулараагүй.

²⁰Абраһам Бурханай найдүүлгыг хэжэглээгүй, тэрээндэ бата этигэжэ байгаа, тиин этигэл хүзэгын бүришье ехэ болоо. Тэрээгээрээ Абраһам Бурхание алдаршуулаа.

²¹Бурхан найдүүлһан юумээ дүүргэхэ аргатай гэжэ Абраһам бата этигэлтэй байгаа.

²²Тиимэхээл Абраһам этигэл хүзэгэйнгөө ашаар «үнэн сэдхэлтэнэй тоодо оруулагдаһан байгаа».

²³«Үнэн сэдхэлтэнэй тоодо оруулагдаа», – гэдэгын гансал Абраһамда хабаатай бэшэ.

²⁴Тэрэнь баһал манай Дээдын Эзэн Иисус Христосые амидыруулһан Бурханда хүзэглөөд, үнэн сэдхэлтэнэй тоодо ороһон маанадта хабаатай юм.

²⁵Бурхан манай нүгэл шэбэлэй түлөө Иисусые үхэлдэ үгөөд, үнэн сэдхэлтэй байхымнай тула һүүлдэнь тэрэниие амидыруулаа юм.

Римэйхиндэ 5

Бурханай урда үнэн сэдхэлтэй байха тухай

¹Мүнөө бидэ этигэл хүзэгэйнгөө ашаар Бурханай урда үнэн сэдхэлтэй болообди, тиин манай Дээдын Эзэн Иисус Христосоор дамжан Бурхантай эбээ нэгэдхээбди.

²Христос баһа этигэл хүзэгэймнай ашаар маанадые мүнөө манай оршожо байһан Бурханай үршөөл хайрада хүтэлэн асараа. Тиимэхээ Бурханай алдарта хүртэхэбди гэжэ найдан, баяр жаргалтай байнабди.

³Бидэ зобожо байһандаа баһа баяр жаргалтай байнабди, юундэб гэхэдэ, зоболон бэрхэшээлнүүд тэсэбэри тэнхээтэй болгодог,

⁴харин тэсэбэри тэнхээтэй байхада Бурхан һайшаадаг, тиихэдэ Бурханай һайшаал найдабари түрүүлдэг,

⁵Тиимэхээ тэрэ найдабари маанадай урма хухалхагүй. Эдэ бүхы юумэнүүд Бурханай маанадта хайрлаһан Нангин хүлдэхээ, тэрэнэй зүрхэ сэдхэлдэмнай бүрилдүүлдэг хайра дуранһаа эхитэй юм.

⁶Христос Бурханай тогтоохон сагта манай түлөө маанадай ахир нула, нүгэл шэбэлтэй байхада үхөө гээшэ.

⁷Үнэн сэдхэлтэнэй түлөө үхэхые хүн үнэндөө хүсэдэггүй, тиихэдэ эрхим һайн хүнэй түлөө үхэхые хэншьеб хүсэхэн байжа магадгүй.

⁸Харин манай үшөө нүгэлтэй байхада Бурхан маанадай түлөө Христосые үхэлдэ хүртөөгөөд, манда аргагүй ехэ дуратай байһанаа баталаа.

⁹Христосой адхарһан шуһанай ашаар бидэ мүнөө Бурханай урда үнэн сэдхэлтэй болоод, Бурханай хэһээлтэхээ заатагүй абарагдахабди.

¹⁰Хэрбээ Бурханай дайсадынь байхадамнайшье тэрэ өөрынгөө Хүбүүнэй үхэлөөр маанадтай эбээ нэгэдхэхэн байгаа хадаа, мүнөө эбтэй эетэй байхадамнай, тэрэ Хүбүүнэйнгээ аминай ашаар маанадые хэһээлтэхээ заабол абарха бэшэ аал.

¹¹Бурханай маанадтай эб найрамдал тогтоохоор Дээдын Эзэн Иисус Христосые эльгээһэн ушарта бидэ аргагүй баяртай байнабди.

Адам Христос хоёр тухай

¹²Нүгэл нэгэ хүнөөр дамжан газар дэлхэйдэ буугаа, тиигээд тэрэ нүгэл үшөө үхэл дахуулан асараа. Тиимэхээ хүн бүхэнэй нүгэлтэй байһан хадань, хүн түрэлхитэнэй дунда үхэл тараһан байгаа.

¹³Хуулиин үгтэхэхөөшье урда газар дэлхэй дээрэ нүгэл байгаа. Зүгөөр Хуулиин үгы байхада нүгэлшье тоогдодоггүй.

¹⁴Адамай үе саһаа эхилээд, Моисейн үе саг хүрэтэр бүхы хүн түрэлхитэниие, тэдэнэй тоодо Бурханай захиралтые Адамай эбдэхэндэл адляар зүршөөгүй байһан хүнүүдыешье үхэл мэдэлдээ абаад байгаа. Адам болбол һүүлдэнь ерэхэн Христосой анхан жэшээ байгаа.

¹⁵Гэхэтэй сасуу Бурханай элбэг дэлбэгээр үршөөһэн бэлэгынь Адамай нүгэлтэй адли бэшэ. Тэрэ нүгэл бусад олон зондо үхэл асараа. Харин гансал Иисус Христосой олон зондо асарһан Бурханай буян хэшэгтэ бэлэг бүришые хүр жабхалантай байгаа.

¹⁶Адамай нүгэлэй ба Бурханай бэлэгэй хоорондо тон ехэ илгаа байна. Үнөөхи нүгэл хэхээлтэдэ хүтэлжэ байгаа. Харин Бурханай үршөөл бэлэгынь олон нүгэл шэбэлнүүдыемнай хүлисүүлэн, маанадые үнэн зүб болгожо байна.

¹⁷Ганса хүнэй нүгэлөөр дамжан, тэрэ ганса хүнөө боложо, үхэл захиржа байһан юм. Гэхэтэй сасуу ганса хүнэй, Иисус Христосой бүтээһэн үрэ дүн бүришые агууехэ юм. Бурханай элбэг үршөөл бэлэгээр үнэн зүб болоһон хүн бүхэн Иисус Христосой ашаар ажамидаржа, захиржа байха.

¹⁸Тиимэхээ нэгэ нүгэлэй бүхы хүнүүдые гэмнэн буруудхажа байхада, үнэн зүб нэгэ хэрэгэй ашаар хүн бүхэн үнэн сэдхэлтэй болоно, ами наһанда хүртэнэ.

¹⁹Нэгэ хүнэй Бурханай мэдэлһээ гарахада яажа бүхы хүнүүд нүгэлтэнүүд болоо һэм, тон тиигэжэл нэгэ хүнэй Бурханай мэдэлдэ байһанай ашаар хүнүүд булта үнэн сэдхэлтэй болохо.

²⁰Нүгэл шэбэлые элеэр харуулхын тула Хуули үгтэһэн байгаа. Зүгөөр нүгэл шэбэлэй ехэ элбэг байһан газарта Бурханай үршөөл хайрашые бүри элбэг дэлбэг үгтэжэ байгаа.

²¹Хүн бүхэниие нүгэлэй хүтэлэн үхэлдэ хүргэдэг байһантайл тон адляар Бурханай үршөөл хайра маанадые хүтэлэн, үнэн сэдхэлтэй болгодог, манай Дээдын Эзэн Иисус Христосой ашаар мүнхын амидаралда хүргэдэг.

Римэйхиндэ 6

Нүгэлэй эрхэ мэдэлһээ мултараад, Христосой эрхэ мэдэлдэ байха тухай



- ¹Зай, яахабибди? Бурханай үршөөл хайрын элбэгжэжэ байхын тула саашадаашье нүгэл шэбэл хэжэл байхамнай гээшэ гү?
- ²Үгыл даа. Нүгэлэй талаар үхөөд, эрхэ мэдэлһээнъ мултарһан хадаа яажа саашадаашье нүгэл хэжэ ажамидархабибди?
- ³Иисус Христостой нэгэдэн уһаар арюудхагдахадаа бидэ тэрэнэй үхэлыешье хубаалсан, тэрээнтэй нэгэдэһэн байгаабди гэжэ мэдэнэгүй аалта?
- ⁴Уһаар арюудхуулхадаа бидэ Христостой хамта үхөөд хүдөөлүүлэгдэһэн байгаабди. Тиимэһээ Эсэгын алдарта хүр хүсэнэй Христосые амидыруулһандал адляар бидэшье ажамидаралай шэнэ зүргөөр ябахабди.
- ⁵Хэрбээ бидэ Иисустай үхэлыень хубаалсан нэгэдэһэн байбал, тэрээнтэй хамта баһа амидыруулагдахабди.
- ⁶Нүгэлтэ махабад бэемнай саашадаа маанадые нүгэлэй барлаг болгохогүйн тула урданаймнай байдал Христостой хамта хэрээһэн дээрэ хадагдан хүнэгдөө юм гэжэ бидэ мэдэнэбди.
- ⁷Хүн үхэхэдөө нүгэлэй мэдэлһээ мултарна.
- ⁸Христостой хамта үхэһэн хадаа бидэ тэрээнтэйл хамта амидархабди гэжэ этигэнэбди.
- ⁹Ушарынъ юуб гэбэл, Христос үхөөд амидыруулагдаһан байгаа, тиигээд дахин үхэхэгүй, юундэб гэбэл, үхэл тэрээн дээрэ ондоо ямаршье эрхэ засаггүй ха юм.
- ¹⁰Христос нэгэл дахин манай нүгэлнүүдэй түлөө үхөөд, мүнөө Бурханай түлөө ажамидаржа байна.
- ¹¹Тиимэһээ таанадшье нүгэлэй талаар үхөөбди, харин Иисус Христосой үгэһэн амыар Бурханай түлөө ажамидарнабди гэжэ өөһэд тухайгаа бодохо ёһотойт.

¹²Махабад бэеынгээ хүсэлэнгүүдые дахахагүйн тула хүүртэ бэе нүгэлэй мэдэлдэ бү байлгагты. Нүүлэй нүүлдэ махабад бэетнай хүнэн хосорхо, тиимэһээ тэрэнэй хүсэлэнгүүдые дахажа бү ябагты.

¹³Махабад бэеынгээ алишье эрхэтэниие нүгэлдэ хүтэлхэ хуурмаг ябадалай зэбсэг бү болгогты. Зүгөөр үхөөд амидырһан зондол адляар өөһэдыгөө Бурханда зорюулан, махабад бэеынгээ алишье эрхэтэниие Бурханай хэрэглэхэ зүб ябадалай зэбсэг болгогты.

¹⁴Нүгэл танай ажамидаралые захирха ёһогүй. Таанад Хууляар бэшэ, харин Бурханай үршөөл хайраар ажамидарна ха юмта.

¹⁵Зай, тиигээд яахамнайб? Хуулийн доро бэшэ, харин Бурханай үршөөл хайра доро ябажа байгаа хадаа нүгэл шэбэлээ саашадаашье үйлэдэхэмнай гээшэ гү? Үгыл даа!

¹⁶Хэнэй үгэ дууланат, тэрэнэйл барлагынь болонот гэжэ таанад мэдэнэгүй аалта? Таанад нүгэлэй барлагынь байбал, үхэлдэ хүртэхэт, али үгы наа, Бурханай үгөөр байдаг барлагынь байбал, үнэн сэдхэлтэй болохот.

¹⁷Бурханда баяр баясхалан хүргэе! Таанад нэгэ үедэ нүгэлэй барлагууд байһан аад, номногдоһон хургаалай үнэн зүбые бүхы зүрхэ сэдхэлээрээ дуулажа абаат.

¹⁸Тиин нүгэлэй мэдэлһээ мултараад, таанад зүб юумэнэй барлагууд болобо гээшэт.

¹⁹Таанадай үшөөл гүйсэд болбосороогүй хада би юрын жэшээнүүдые хэрэглэнэб. Урдань таанад бузар муухай юумэнүүдые үйлэдэхэ зорилготойгоор махабад бэеынгээ эрхэтэнүүдые нүгэлэй барлаг болгоһон байгаат. Харин мүнөө махабад бэеынгээ бүхы эрхэтэнүүдые нангин хэрэгүүдые бүтээжэ байхаарнь зүб юумэнэй барлагууд болгогты.

²⁰Нүгэлэй барлагууд байхадаа таанад зүб юумэндэ ямаршье хабаагүй байгаат.

²¹Урдань үйлэдэдэг хэрэгүүдхээ таанад юу оложо абабат? Мүнөө тэдэ хэрэгүүдхээ эшэжэ улайхаһаа бэшэ ондоо юумэн үгы, тэдэтнай таанадые үхэлдэ хүтэлжэ байгаа ха юм.

²²Мүнөө таанад нүгэл шэбэлхээ сүлөөлэгдөөд, Бурханай барлагууд болобот. Тэрэнэй үрэ дүндэнь таанад арюун гэгээн болобот, мүнхын амидаралда хүртэбэт.

²³Хэһэн нүгэл шэбэлэйтнай түлөөһэниинь үхэл юм. Харин манай Дээдын Эзэн Иисус Христостой нэгэдэн мүнхэ амидархань Бурханай үршөөл бэлэг юм.

Римэйхиндэ 7

Гэрлэлгэхээ жэшээ дурдая

¹Аха дүүнэрни, таанад Хуули ойлгонот, тиимэхээ Хуули гансал амиды хүнүүдые захиржа шадаха гэжэ мэдэнэт.

²Жэшээлбэл, хуулиин ёһоор хадамтай эхэнэр нүхэрэйнгөө амиды мэндэ байха үедэл нүхэртэйгөө холбоотой юм; хэрбээ нүхэрынгөө наһа барабалнь, тэрэ эхэнэр гэрлэлгын Хуулиһаа сүлөөтэй болоно.

³Тиимэхээ нүхэрэйнгөө амиды мэндэ байха сагта ондоо хүнтэй ханилбалнь, тэрэ эхэнэр эрэдээ урбагша гэжэ нэрлэгдэхэ, харин нүхэрэйннь нүгшэһэн байбал, тэрэ эхэнэр хуулиин ёһоор сүлөөтэй болоод, ондоо хүнтэй хугаашье һаа, эрэдээ урбагша гэжэ тоологдохогүй.

⁴Аха дүүнэрни, таанадай ушар тон тиимэл юм. Таанад мүнөө Христосой бэеын эрхэтэн болоод, Хуулитай холбоогоо таһалба гээшэт. Мүнөө таанад Бурханда алба хэжэ аша тухатай байхын тула үхөөд амидырһан Христосой хүнүүд болобот.

⁵Энэ дэлхэйн жама ёһоор ажамидархадамнай Хуули махабад бэеымнай нүгэлтэ хүсэлэнгүүдые һэргээдэг байгаа, бидэ булта үхэхэ хойшолонтой байгаабди.

⁶Харин мүнөө бидэ урдань маанадые хүлээд байһан Хуулиин талаар үхөөд, эрхэ мэдэлһээнъ мултараабди. Саашадаа бидэ бэшэгдэһэн Хуули сахижа, хуушан аргаар алба хэхэгүйбди, харин шэнэ аргаар һүлддын мэдэлдэ байгаад, Бурханда алба хэхэбди.

Хуули ба нүгэл тухай

⁷Зай, тиигээд Хуули өөрөө нүгэлтэй гэжэ хэлэхэмнай гү? Үгыл даа! Зүгөөр Хуулиин үгы байбал, би нүгэл гээшэ юун бэ гэжэ мэдэхэгүй байха һэнби. «Ондоо хүнэй юумэндэ бү һанаарха», – гэжэ Хуулиин хэлээгүй юм һаа, би тиигэжэ һанаархаха гээшэ нүгэл юм гэжэ мэдэхэгүй һэм.

⁸Зүгөөр нүгэл тэрэ захяа заабариин ашаар элдэб янзын харата хүсэлэнгүүдые зосоомни түрүүлээ. Нүгэл Хуулигүйгөөр ямаршые хүсэгүй.

⁹Урдань Хуули мэдэхэгүй байхадаа би амиды ябааб, теэд энэ захяа заабариие дуулахадаа, зосоомни нүгэл бүрилдэбэ,

¹⁰тиигээд би хосорооб. Тиигэжэ амидарал асарха ёһотой байһан захяа заабари намда үхэл асараа.

¹¹Боломжо гарахада, нүгэл энэ захяа заабаряар намайе мэхэлбэ, тиигээд алаба.

¹²Тиибэ яабашые Хуули өөрөө арюун нангин юм, захяа заабаринууднь баһа арюун нангин, үнэн зүб, һайн һайхан юм.

¹³Зай, тиихэдээ һайн һайхан юумэн намда үхэл асараа гээшэ гү? Үгыл даа, нүгэл үхэлые асараа. Үнэн байдалаа элирүүлхын тула нүгэл һайн һайхан юумые хэрэглэн, зосоомни үхэл түрүүлээ. Тиимэһээ захяа заабариин ашаар нүгэлэй бүришые аймшагтай, бүришые бузар булай байһаниинь харуулагдаа юм.

¹⁴Хуули оюун сэдхэлтэй холбоотой, харин би бэе махабадтаа хүлюулээд, нүгэлэй богоолынь болон худалдагдаһан байгааб гэжэ би мэдэнэб.



¹⁵Би юу хэжэ байһанаашье ойлгоногүйб, юундэб гэхэдэ, би хэхэ дуратай юумэеэ хэнэгүйб, харин хэхэ дурагүй байһан юумэеэ үйлэдэжэ байнаб.

¹⁶Хэхэ дурагүй юумэеэ хэжэ байхадаа би Хуулийн үнэн зүб байһые баталнаб.

¹⁷Тиимэхээ үнэндөө болбол би бэшэ, харин зосоомни оршожо байһан нүгэл тиимэ юумэ үйлэдэнэ гээшэ.

¹⁸Һайн һайхан юумэн зосоомни, махабад бэе соомни оршоногүй гэжэ би мэдэнэб. һайн һайхан юумэ бүтээхэ хүсэлтэй байдагшые һаа, үнэндөө бүтээжэ шададаггүй хүм.

¹⁹Хэхэ дуратай байһан һайн һайхан юумые хэнэгүйб, харин орондонь хэхэ дурагүй байһан харатай муухай юумые үйлэдэнэб.

²⁰Хэрбээ хэхэ дурагүй байһан юумэеэ хэжэ байгаа юм хадаа би өөрөө тиимэ юумэ хэнэгүйб, харин зосоомни оршожо байһан нүгэл тиимэ юумэ үйлэдэнэ.

²¹Тиимэхээ һайн һайхан юумэ бүтээхэ дуратай байхадамни, харата һаналнууд намда һаалта болодог заншалтай.

²²Зүрхэ сэдхэлдээ би Бурханай Хуули дэмжэжэ байна ха юмбиб.

²³Харин бэеымни эрхэтэнүүдые хүдэлгэдэг ёһон ухаан бодолоймни дэмжэдэг хуулита ёһонтой тулалдадаг юм. Бэе махабад соомни хүдэлдэг нүгэлэй ёһон намайе богоолшолоод байна.

²⁴Ямар азагүй хүн гээшэбиб! Үхэлдэ хүргэжэ байһан энэ махабад бэеһээмни хэн намайе аршалхань гээшэб?

²⁵Бурханда баяр баясхалан хүргэнэб, тэрэ манай Дээдын Эзэн Иисус Христосой ашаар аршалха юм. Зай, иигээд би бэеэрээ нүгэлэй хуулида, харин ухаан бодолоороо Бурханай Хуулида алба хэжэ байгаа хүнби.

Римэйхиндэ 8

Бурханай хүлдын хүсөөр ажамидарха тухай



- ¹Иисус Христостой нэгэдэн ажамидаржа байһан хүнүүд мүнөө зэмэлэгдэхгүй.
- ²Ушарынь юуб гэбэл, Иисус Христостой хамта ажамидаруулжа байһан хүлддын хуули намайе нүгэлэй ба үхэлэй хуулиһаа сүлөөлөө юм.
- ³Манай нүгэлтэ мүн шанарһаа боложо Хуулийн бүтээжэ шадаагүй юумые Бурхан бүтээбэ. Тэрэ Хүбүүгээ нүгэлтэ маанадтайл адли бэетэйгээр нүгэлнүүдэймнай түлөө тахил болгон эльгээжэ, махабад бэээрнь манай нүгэлнүүдые гэмнэн шүүбэрилээ юм.
- ⁴Өөһэдынгөө хүсэлэнгүүдые дахангүй, харин хүлдые дахан ажамидардаг маанад соо Хуулийн шаардаһан нангин зүйл бүтэхын тула Бурхан тиигээ.
- ⁵Нүгэлтэ шанарай хүсэлэнгүүдые дахан ажамидардаг хүнүүдэй ухаан бодолынь нүгэлтэ шанарай хүсэлэнгүүдэй мэдэлдэ байдаг. Харин хүлддын хэлэһэн ёһоор ажамидардаг хүнүүдэй ухаан бодолынь хүлддын эрхэ мэдэлээр болодог юм.
- ⁶Нүгэлтэ мүн шанарай мэдэлдэ байһань үхэлдэ хүргэдэг, харин хүлддын мэдэлдэ байһань амидарал ба энхэ тайбан найруулдаг.
- ⁷Хүнүүд махабад бэеынгээ мэдэлдэ байхадаа Бурханай дайсадынь байдаг, ушарынь хэлэбэл, тэдэнэр Бурханай хуулиие сахинагүй, сахижа шадахашьегүй юм.
- ⁸Нүгэлтэ мүн шанарайнгаа хүсэлэнгөөр ажамидарһан хүнүүд Бурханда таатай байжа шадахагүй.
- ⁹Таанад нүгэлтэ мүн шанарайнгаа хүсэлэнгүүдые даханагүйт, тиин зосоотнай Бурханай хүлддын оршожо байхадань, хүлддын эрхэ хүсэлөөр ажамидарнат. Зосоогоо Христосой хүлдэгүй хүн тэрэнэй бэшэ юм.
- ¹⁰Хэрбээ зосоотнай Христосой оршожо байбал, нүгэл шэбэлһээ боложо бэе махабадайтнай хүнэхэдэ, Бурханай урда үнэн сэдхэлтэй байһан ашаартнай хүнэһэ хүлдэтнай амиды байха.

¹¹Иисусые үхэхэдэнь амидыруулһан Бурханай Һүлдэн зосоотнай оршожо байхадань, Христосые Амидыруулагша зосоотнай оршожо байһан Һүлдөөрөө таанадайшые үхэлтэ бээдэ ами үршөөхэл.

¹²Тиимэһээл, аха дүүнэрни, бидэ нүгэлтэ мүн шанар байдалайнгаа хүсэлэнгүүдые дахан ажамидарха ёһогүйбди.

¹³Тиигэжэ ажамидараа хадаа үхэхэт, харин Һүлдөөрөө нүгэлтэ хэрэгүүдээ хүнөөжэ байбал, амиды байхат.

¹⁴Бурханай Һүлдөөр хүтэлүүлэгдэһэн хүнүүд Бурханай үхибүүдынь гээшэ.

¹⁵Бурханай Һүлдэ таанадые тэрээнһээ айжа байдаг барлаг болгоогүй, харин Бурханай үхибүүдынь болгоо, тиин Һүлдэн хүсөөр бидэ Бурхание: «Аба, Эсэгэмнай!» – гэжэ нэрлэдэгбди.

¹⁶Бурханай Һүлдэ манай хүнэһэ Һүлдэтэй ниилэн, маанадые Бурханай үхибүүд гэжэ батална.

¹⁷Бидэ тэрэнэй үхибүүдынь хадаа өөрынгөө хүнүүдтэ хадагалажа байһан буюн хэшэгэйнь залгамжалагшад гээшэбди, баһа Христосто бэлдээтэй юумые Христостой хамта залгамжалхабди. Христосой зоболонгуудые хубаалсаа юм хадаа, тэрэнэй алдарташые хүртэлсэхэ ха юмбибди.

Бурханай хүнүүдэй ерээдүй алдар тухай

¹⁸Мүнөөнэй сагта зобожо байһамнай ерээдүйдэ маанадта үгтэхэ алдарай хажууда юуншые бэшэ гэжэ бодоноб.

¹⁹Бүтээгдэһэн бүхы юумэнүүд Бурханай өөрынгөө үхибүүдые элирүүлэн харуулхыень аргагүй ехээр хүлеэжэ байна.

²⁰Бүтээгдэһэн бүхы юумэнүүд өөһэдынгөө дура зоргоор бэшэ, харин Бурханай эрхэ хүсэлөөр зорилгоёо бээлүүлээгүй юм.

²¹Тэдэ өөһэдөө үхэлтэ богоолшолгоһоо нэгэ сагта мултаржа, Бурханай үхибүүдэй һүр жабхаланта эрхэ сүлөөе хубаалсаха юм гэжэ Бурхан түлэблэжэ байгаа ха.

²²Мүнөөнэйшье саг хүрэтэр бүтээгдэһэн бүхы юумэнүүд үхибүү түрэхэдөө үбдэжэ байһан эхэнэртэл адляар үбдэн ёолоно гэжэ бидэ мэдэнэбди.

²³Гансашье бүтээгдэһэн бүхы юумэнүүд ёолоно бэшэ, харин Бурханай түрүүшын үршөөл бэлэгтэ, һүлдэдэнь хүртэһэн бидэшье Бурханай маанадые үхибүүдынь болгохые, махабад бэеьемнай сүлөөлхые хүлеэжэ байхадаа баһал зосоогоо ёолонобди.

²⁴Ушарынь хэлэбэл, бидэ иимэ найдалтай болоод абарагдаһан байгаабди. Хэрбээ маанадай найдажа байһан юумэеэ хаража байбалнай, тэрэмнай бодото найдал бэшэ байха һэн. Хаража байһан юумэндээ яжа найдалтайб?

²⁵Харин хараагүй юумэндээ найдажа байхадаа бидэ ехэл тэсэбэритэйгээр хүлеэжэ байдагбди.

²⁶Маанадай шадал тэнхээгүй байхада маанадта һүлдэ туһалдаг. Яжа зальбарха хэрэгтэйб гэжэ мэдэхэгүй байхадамнай һүлдэ тайлбарилхын аргагүй ёолоогоор манай түлөө зальбардаг.

²⁷Харин зүрхэ сэдхэлыемнай соо харадаг Бурхан һүлдын һанал бодолые мэдэжэ байдаг юм. һүлдэ Бурханай эрхэ хүсэлөөр лэ тэрэнэй арадай түлөө тэрэниие гуйна ха юм.

²⁸Бурханда дуратай, тэрэнэй эрхэ хүсэлөөр дуудуулагдаһан хүнүүдэй бүхы юумэнүүдтэнь Бурхан урагшатай байдаг.

²⁹Бурханай шэлэжэ абаһан хүнүүд Хүбүүндэнь адли байха табилантай, тиин Хүбүүниинь олон хүзэглэгшэ аха дүүнэрэй дунда ууган Хүбүүниинь байха юм.

³⁰Бурхан шэлэжэ абаһан хүнүүдээ дуудаа, дуудаһан хүнүүдээ үнэн сэдхэлтэй болгоо, үнэн сэдхэлтэнгүүдые алдар солодоо хүртөөгөө.

Бурханай хайра дуран

³¹Эдэ бүхэн тухай бидэ юун гэжэ хэлэхэбибди? Хэрбээ Бурханай манай талада байбал, маанадта эсэргүүсэһэн хүн байха аал?

³²Бурхан өөрынгөө Хүбүүниие хайрлангүй, бидэнэй бултанаймнай түлөө үргэһэн байгаа. Бурхан маанадта Хүбүүгээ үгэжэ байбал, бусадшые бүхы юумэнүүдээ элбэгээр үгэхэ бэшэ гү?

³³Бурханай шэлэжэ абаһан хүнүүдые хэн гэмнэхэб? Бурхан өөрөө тэдэниие зэмэгүй гээ ха юм.

³⁴Тиихэдээ хэн тэдэниие зэмэлхэб? Үхөөд, тиигээд амидыраад, Бурханай баруун гарынь болоһон, маанадай түлөө гуйлта үргэжэ байһан Христос Иисус тэдэниие гэмнэхэгүйл!

³⁵Тиихэдээ юун бидэниие Христосой хайра дураһаа холодуулхаб? Зоболонгууд гү, али бэрхэшээлнүүд гү, али хашалга мүрдэлгэнүүд гү, али үлбэр үлэсхэлэн байдал гү, али ядуу тулюур байдал гү, али аюул оһол гү, али үхэл холодуулха болоно гү?

³⁶«Шинии түлөө бидэ үдэр бүхэн үхэлэй аюултай тохёолдонобди. Гаргуулхаяа байһан хониндол адли байнабди», – гэжэ *Нангин Бэшэг соо хэлэгдэнэ.*

³⁷Эдэ бүхы ушарнуудта бидэ маанадта дуратай байһан Христосой ашаар илалта туйлан гаранабди.

³⁸Амиды байна гүбди, али үхэхэн байна гүбди, юуншые бидэниие Бурханай хайра дуранһаа хаһаахагүйл. Эльгээмэлнүүдшые, бусад огторгойн хүсэнүүдшые, оршон үеын юумэнүүдшые, ерээдүй сагай юумэнүүдшые,

³⁹дээдын хүсэнүүдшые, доодын хүсэнүүдшые, бүтээгдэхэн бүхы юумэнүүдшые манай Дээдын Эзэн Христос Иисус соо оршоһон

Бурханай хайра дуранһаа маанадые холодуулжа шадахагүй гэһэн бата этигэлтэй байнаб.

Римэйхиндэ 9

Бурхан болон тэрэнэй арад

¹Христосто хүзэглэдэг би үнэн зүбые хэлэнэб, худалаар хэлэнэгүйб. Тиин Нангин хүлдэшье, һэшхэлнишье минии хэлэһые үнэн гэжэ гэршэлнэ.

²Би угаа ехээр уйдана гашууданаб, зүрхэ сэдхэлни зогсонгүй үбдэнэ.

³Өөрынгөө арадые абархын түлөө Бурханай хараалда хүртөөд, Христосхоо холодуулхадашье би бэлэнби.

⁴Тэдэ израильшууд Бурханай шэлэжэ абаһан хүнүүд юм. Бурхан тэдэндэ алдараа харуулаа, тэдэнтэй хэлсээ баталаа, тэдэндэ Хуули, тиигээд шүтэлгын хүмэ ба найдуулгаа үгөө.

⁵Тэдэнэр агууехэ үбгэ эсэгэнэртэй юм, тиихэдэ Бурханай табисуурта махабад бэеэрээ баһал тэдэнэй яһанай хүн юм. Бүхы юумые захиржа байһан Бурхан хэтын хэтэдэ магтаал солотой байһай гэжэ би зальбарнаб! Болтогой!

⁶Бурхан амалһан юумэеэ дүүргээгүй гэжэ хэлэхын аргагүй. Һүүлэй Һүүлдэ Израилиин арад зон бултадаа Бурханай бодото хүнүүд бэшэ.

⁷Тиин Абраһамай үри һадаһад бултадаа Бурханай үхибүүд бэшэ. «Ши Исаагаар лэ дамжан минии амалһан үри һадаһадтай болохош», – гэжэ Бурхан Абраһамда хэлэһэн байгаа.

⁸Ондоогоор хэлэбэл, юрын аргаар түрэхэн үхибүүд Бурханай үхибүүд бэшэ. Бурханай найдуулһанай ёһоор лэ түрэхэн үхибүүд бодото үри һадаһад гэжэ тоологдодог гээшэ.

⁹«Хойто жэл энэл сагтаа би дахин ерэхэб, тиин Саррашни хүбүүтэй болоод байха», – гэжэ хэлэһэниинь Бурханай найдуулһан үгэ байһан юм.



¹⁰Энээнһээ гадна Ребекка ба манай үбгэ эсэгэ Исаагай хоёр хүбүүтэй болоходо тиимэ юумэн баһа тохёолдоо һэн.

¹¹⁻¹²Үшөө тэдэ хоёрой түрөөгүй, хайн гү, али муу юумэ хээгүй байхадань, «Ехэ хүбүүншни дүүдээ алба хэжэ байха», – гээд Дээдын Эзэн Ребеккэдэ хэлэһэн байгаа. Тиигэжэ хэлэхэдээ Дээдын Эзэн хүнүүдэй хэрэгүүдээр бэшэ, харин өөрынгөө эрхэ хүсэлөөр шэлэжэ байһанаа харуулһан байгаа.

¹³«Яковта би дуратай, харин Исаавта дурагүй байгааб», – гэжэ Нангин Бэшэг соо хэлээтэй байдаг.

¹⁴Зай, тиихэдээ Бурхан үнэн зүб бэшэ гэжэ хэлэхэмнай гээшэ гү? Үгыл даа!

¹⁵Тэрэ Моисейдэ: «Дуратайл хүнөө би үршөөхэб, дуратайл хүнөө би хайрлахаб», – гэжэ хэлэһэн байгаа.

¹⁶Тиимэһээ бүхы юумэн бидэ хүнэй хүсэһэнһөө гү, али хэһэнһээ бэшэ, харин Бурханайл үршөөһэнһөө дулдыдана.

¹⁷«Шамаар дамжан һүр жабхалангаа харуулхын тула, бүхы газар дэлхэйн зоной магтаал солодо хүртэхын тула би шамайе хаанаар табья хүм», – гэжэ Дээдын Эзэн Египедэй фараондо Нангин Бэшэг соо хэлэнэ.

¹⁸Тиимэһээ Бурхан дуратайл хүнөө үршөөнэ, дуратайл хүнөө зүрюу болгоно.

¹⁹«Тиигэбэл Бурхан яахадаа хүниие зэмэлнэб? Бурханай эрхэ хүсэлдэ хэн эсэргүүсэхэ аргатайб?» – гэжэ хэн нэгэн намһаа һураха.

²⁰Ай, нүхэр, Бурханда үсэрхэжэ байхаар ши хэн гээшэбши? Бүтээлынь тэрэниие бүтээгшэдэ: «Юундэ намайе иигэжэ бүтээгээбши?» – гэжэ хэлэхэ аал?

²¹Домбонуудые бүтээдэг хүн нэгэл адли шабарһаа тусгай хэрэглэлэй домбо ба үдэр бүхэн хэрэглэгдэдэг юрын домбо бүтээхэ эрхэтэй бэшэ аал?

²²Бурхан уур сухалаа харуулха, хүр жабхалангаа элирүүлхэ ханаатай байгаа, гэхэдэ, хосорхо заяатай байһан хүнүүдтэ тэрэ ехэл тэсэбэритэйгээр хандана.

²³Бурхан алдартаа хүртөөхэ гэжэ бэлдээд байһан үршөөлтэ хүнүүдтэ баһал элбэг дэлбэг алдараа элирүүлхэ дуратай байна.

²⁴Бидэ гансал еврейнүүдэй дундаһаа бэшэ, харин бусадшые арадуудай дундаһаа шэлэгдэжэ абтаһан хүнүүд гээшэбди.

²⁵Тон тиигэжэл Дээдын Эзэн Осиин ном соо хэлэнэ: «Минии арад бэшэшые байгаа хаань, Би тэдэниие өөрынгөө арад болгохоб. Дурагүй байһан яһатандаа Би хайра дуратай болохоб».

²⁶«Таанад минии арад бэшэт гэжэ хэлэгдэһэн эгээл тэрэ нууринда тэдэнэр Амиды Бурханай үхибүүд гэжэ нэрлүүлхэ».

²⁷⁻²⁸«Дээдын Эзэн зарга шүүбэреэ газар дэлхэй дээрэ шуумгайгаар ябуулха. Тиимэһээ Израилиин арад зоной далайн элһэндэл адли тоогүй олон байгаашые хаань, тэдэнэй үсөөниинь абарагдаха», – гэжэ Израилиин арад зон тухай Исаяя лүндэншэн айладхаа юм.

²⁹«Хэрбээ хүр хүсэтэй Дээдын Эзэн зарим үри хадаһадые маанадта үлөөгөөгүй юм болбол, бидэ Содомдол адли хүнөөгдэхэ, Гоморродол адли усадхагдаха байгаабди», – гэжэ баһал Исаяя лүндэншэн уридшалан хэлэнэ.

Израиль болон Һайн Мэдээсэл

³⁰Зай, юун гэжэ хэлэхэбибди? Бурханай урда үнэн сэдхэлтэй байхые оролдоогүй бусад арадууд этигэл хүзэгэйнгөө ашаар үнэн сэдхэлтэй болоо.

³¹Харин Хуули сахин үнэн сэдхэлтэй болохые зорихон Израилиин арад зон үнэн сэдхэлтэй болоогүй.

³²Юундэ болоогүйб? Юуб гэбэл, тэдэнэр этигэл хүзэгтөө бэшэ, харин хэрэгүүдтэ найдаһан байгаа. Тиимэһээ «бүдэрдэг шулуунда» тэдэнэр бүдэрһэн байгаа.

³³Бурхан Нангин Бэшэг соо тон тиигэжэ хэлэнэ: «Хара даа! Би Сион дээрэ хүнүүдэй бүдэрдэг, хүнүүдые гомдохоодог шулуу табинаб. Харин тэрээндэ этигэл хүзэгтэй хүнүүд хэзээдэшье урмаа хухархагүй».

Римэйхиндэ 10

¹Аха дүүнэр! Израилиин арад зоной абарагдахые би бүхы зүрхэ сэдхэлээрээ хүсэнэб, тэрээн тухай Бурханда зальбарнаб.

²Тэдэнэр Бурханда хүгэдэдэг гэжэ гэршэлнэб, гэхэтэй сасуу тэдэнэй хайра дуран үнэн зүб мэдэрэл дээрэ оршоногүй.

³Тэдэнэр Бурханай урда яжаа үнэн сэдхэлтэй байхые мэдэнгүй, өөһэдынхээрээ болоод, Бурханай мэдэлһээнэ гаран, үнэн сэдхэлтэй болгодог Бурханай замһаа хадуурна.

⁴Ушарынь хэлэбэл, хүзэглэһэн хүн бүхэнэй үнэн сэдхэлтэй болохын тула Христос Хуулиин зорилго бээлүүлнэ.

Һүзэглэгшэдэй абарагдаха тухай

⁵Хуули сахин үнэн сэдхэлтэй болохо тухай: «Хуулиин захяа заабаринуудые сахинан хүн бүхэн амиды байха», – гэжэ Моисей бэшээ.

⁶Харин этигэл хүзэгэйнгөө ашаар үнэн сэдхэлтэн гэжэ тоологдодог зондо хэлэгдэнэ: «Христосые өөһэдтөө дошонь буулгахаяа тэнгэри өөдэ гараһанай хэрэггүй».

⁷Али «Христосые үхэлһөө бодхоохын тула үхэлэй доодо орондо бууһанай хэрэггүй».

⁸Юундэб гэбэл, «Бурханай мэдээсэл хажуудашни байна, хэлэ амандашни, зүрхэ сэдхэлдэшни байна». Эгээл тэрэ мэдээсэлые бидэ таанадта номнонобди.

⁹Хэрбээ Иисусые Дээдын Эзэн гэжэ айладхаад, Бурхан тэрэниие амидыруулаа гэжэ зүрхэ сэдхэлээрээ этигэжэ байбал, ши абарагдахаш.

¹⁰Зүрхэ сэдхэлээрээ хүзэглэһэнэйнгөө ашаар бидэ үнэн сэдхэлтэн болонобди, хэлэ амаараа айладхан абарагданабди.



¹¹«Тэрээндэ хүзэглэһэн хүн бүхэн урмаа хухархагүй», – гэжэ Нангин Бэшэг соо хэлэгдэнэ.

¹²Еврей хүн гү, али ондоо яһанай хүн гү, ямаршые илгаагүй юм. Дээдын Эзэн хүн бүхэндэ ори ганса юм, тиин тэрээндэ хандаһан хүн бүхэниие тэрэ элбэг дэлбэгээр үршөөлдөө хүртөөдэг.

¹³«Дээдын Эзэниие дуудаһан хүн бүхэн абарагдаха», – гэжэ Нангин Бэшэг соо хэлээтэй байдаг ха юм.

¹⁴Тиигээд хүзэглөөгүй байһан хүнөө яжа гуйн дуудалтайб? Тиихэдэ тэрээн тухай дуулаагүй аад, яжа хүзэглэлтэйб? Тиихэдэ хүнэй номноогүй ушарта яжа мэдээсэлые дуулалтайб?

¹⁵Тиихэдэ номногшодые ябуулаагүй һаа, яжа мэдээсэлые номнолтойб? «Һайн Мэдээсэл асаржа байһан номногшодой ерэхые харахада үзэсхэлэнтэ гоё юм», – гэжэ Нангин Бэшэг соо хэлэгдэнэ.

¹⁶Гэхэтэй сасуу һайн Мэдээсэлдэ булта этигээгүй юм. «Дээдын Эзэн, хэн манай мэдээсэлдэ этигээб?» – гэжэ Исаяя лүндэншэн хэлэнэ.

¹⁷Тиимэһээ этигэл хүзэгтэй болохын тула хүн мэдээсэл дуулаха ёһотой, тиин мэдээсэлэй үгтэхын тула Христос тухай номногдохо ёһотой.

¹⁸Израилиин арад зон мэдээсэл дуулаагүй аал гэжэ би асуужа байнаб. Юундэ дуулаагүй байха юм, «Тэдэнэй дуун бүхы газар дэлхэйгээр тараа, тэдэнэй үгэнүүдынь газар дэлхэйн заха хизаар хүрөө», – гэжэ Нангин Бэшэг соо хэлэгдэнэ ха юм.

¹⁹Израилиин арад зон ойлгоо гү, али үгы гү гэжэ би дахин асуунаб. Моисей өөрөө энээндэ Дээдын Эзэнэй нэрһээ харюу үгөө юм: «Юуншые бэшэ яһатанаар би арад зонойнгоо атаархал түрүүлхэб, юушые ойлгодоггүй хүнүүдээр би арад зонойнгоо уур сухалынь хүргэхэб».

²⁰«Намайе бэдэрээгүй хүнүүд намайе олоо. Нам тухай асуужа байгаагүй хүнүүдтэ би өөрыгөө нээгээб», – гэжэ Исаяшые Бурханай нэрһээ зоригтой хатуугаар айладхана.

²¹«Үгэ дууладаггүй, үхэрхүү зүрюу арадта Дээдын Эзэн бүхэли үдэртөө гараа харбайжа байгаа», – гэжэ Исаяя Израилиин арад тухай хэлэнэ.

Римэйхиндэ 11

Израильда үгтэһэн Бурханай үршөөл хайра тухай

¹Зай, тиихэдээ Бурхан өөрынгөө арадһаа арсаба гэшэ гү гэжэ би нуранаб. Үгыл даа! Би өөрөөшые Израилиин хүн, Абраһамай үри һадаһан, Вениаминай обогой хүн гэшэб.

²Эхинһээ нааша шэлэжэ абаһан арадһаа Бурхан арсаагүй. Нангин Бэшэг соо Израилиин арадые зэмэлэн Илиягай Бурханда хандаһые һананагүй аалта?

³Тэрэ: «Дээдын Эзэн, тэдэнэр шинии лүндэншэдые алаа, үргэлэй газарнуудыешни һандаргаа, би гансаараал үлөөд байнаб, тиин тэдэнэр намайешые алаха гэжэ забдана», – гээ һэн.

⁴Бурхан харюудань юун гэжэ хэлээ һэм? «Хуурмаг бурхан Ваалда мүргөөгүй долоон мянган хүнүүдые би өөртөө үлөөгөөб».

⁵Мүнөөнэйшые сагта тон тиимэ: Бурханай үршөөл хайраар шэлэгдэжэ абтаһан хүнүүд үшөөл бии юм.

⁶Тэрэ хүнүүдые хэһэн хэрэгүүдээрнь бэшэ, харин үршөөл хайраараа шэлэжэ абадаг юм. Тиигээгүй болбол тэрэнэй үршөөл хайра бодото бэшэ байха һэн.

⁷Зай юун болоноб? Израилиин арад зон бэдэрһэн юумээ олоогүй. Зүгөөр үсөөхэн лэ Бурханай шэлэжэ абаһан хүнүүд бэдэрээшээ олоо юм, харин бусад зониинь Бурханай уряалые анхараагүй юм.



⁸Нангин Бэшэг соо хэлэхэнэй ёһоор: «Бурхан тэдэнэй сэдхэлые мэдэрэлгүй болгоо, тиин тэдэнэр мүнөөдэршые болотор хараха гү, али дуулаха аргагүй байна».

⁹«Найр баярай шэрээдэ нуухадаа тэдэнэр зангада орог, бүдэржэ унаг, хэһээлтэдэ орог!

¹⁰Хаража шадахагүй байхаар Тэдэ һохорог лэ! Бэрхэшээл зоболонгуудта дарагдан хэтын хэтэдэ тахииг лэ!» – гэжэ Давид бэшэнэ.

¹¹Тиигэбэл еврейнүүд дахин хэзээшые һэргэжэ бодохогүйгөөр бүдэржэ унаа гү гэжэ би нуранаб. Үгыл даа! Тэдэнэй нүгэл шэбэлдэ унахада, атаархалынь хүргэжэ байхаар бусад арадууд абаралда хүртөө.

¹²Еврейнүүдэй нүгэлһөө боложо газар дэлхэйнхид элбэг дэлбэгээр буян хэшэгтэ хүртөө, тэдэнэй оюун сэдхэлэй ядуу байһанһаа бусад арадууд баян бардамаар буян хэшэгтэ хүртөө. Тиихэдэ еврейнүүдэй Бурханда хандабалнь, буян хэшэг бүришые элбэг дэлбэгээр үгтэхэ бэшэ аал.

Бусад арадуудай абарагдаха тухай

¹³Бусад арадууд, мүнөө би таанадта ханданаб. Бусад арадуудай элшэнээр ажаллажа байһандаа би бахархажэ байхаб.

¹⁴Тиигэжэ өөрынгөө яһанай аха дүүнэрэй дунда атаархал түрүүлжэ, заримыеньшые абаржа магадгүйб.

¹⁵Тэдэнһээ арсахадаа, Бурхан бусад арадуудтай эбгүй байһанаа эбтэй зетэй болоо. Харин Бурханай еврейнүүдые ойртуулбалнь, юун болохоб? Тиигэбэл үхэхэн хүнүүдэй амидыһантай адли байха!

¹⁶Хэрбээ дээжынь Бурханда зорюулаатай байбал, үлэхэнииньшые арюун сэбэр байхал. Хэрбээ модоной үндэхэниинь Бурханда зорюулаатай байбал, эшэ халаануудыншые баһа арюун сэбэр байха юм.

¹⁷нуулгагдаһан модоной зарим халаануудыень таһалаад, орондонь зэрлиг оливай халаануудые нуурижуулба ха. Бусад арадуудай



түлөөлэгшэ таанад эгээл тэрэ зэрлиг оливай модотой адлит, мүнөө таанад үндэһэндэ, шэмэ шүүһэндэ баһа хабаатай болобот.

¹⁸Тиимэхээ таанад үнөөхи халаануудта адляар таһалагдажа хаягдаһан хүнүүдые доогуур бү харагты. Яахадаа таанад хамараа дээгүүр үргэбэбта? Таанад миин лэ халаанууд ха юмта, таанад үндэһэ тэнжүүлэн баринагүйт, харин үндэһэн таанадые тэнжүүлэн барина.

¹⁹«Минии хуурижахын лэ тула халаанууд таһалагдаһан байгаа», – гээд таанад хэлэхэт.

²⁰Тэрэшни зүб. Тэдэнэр этигэл хүзэггүй байһан хадаа таһаржа унаа, харин таанад этигэл хүзэгөөрөөл тэрэ хууринда баригдажа байнат. Тиимэхээ тэрээгүүрээ бү бахархагты, зүгөөр айжа хүрдэжэ байгты.

²¹Бурхан жэнхэни халаанууд болохо еврейнүүдыешье хайрлаагүй, тиихэдэ тэрээндэ үһэрхэбэлтнай, тэрэ таанадые бүришье хайрлахагүй.

²²Бурхан ямар үршөөл хайратай, ямар уур сухалтай байдаг бэ гэжэ таанад эндэһээ харабат. Бурхан өөртэнь үһэрхэһэн зондо уур сухалтайгаар, зүгөөр тэрэнэй үршөөл хайрада байһан танда үршөөл хайратайгаар хандадаг. Тэрэнэй үршөөл хайрадань оршоогүй хаатнай, таанадые баһал таһалжа хаяха.

²³Харин үнөөхи этигэл хүзэггүй еврейнүүд хубилбал, дахин хууриндаа байрлуулагдаха. Бурхан тэдэниие бусаажа хууриндань байрлуулха арга хүсэтэй юм.

²⁴Бусад арадууд таанад зэрлиг оливай халаа набшаһадта адлит. Хэрбээ өөһэдынгөө зэрлиг модонһоо таһалагдаад, ондоо таримал оливай модондо хуурижуулагдадаг байхадань, таримал модондой халаада адли еврейнүүдые түрэл хууриндань хуулгахада Бурханда бүришье амархан бэшэ гү?

Бүхы зондо үзүүлһэн Бурханай үршөөл

²⁵Аха дүүнэр, өөһэдыгөө сэсэн ухаатайбди гэжэ бодожо байхагүйнтнай тула энэ нюуса үнэниие таанадта мэдүүлхэ ханаатайб. Израилиин



зарим хүн зон хододоо тиимэ зүрюу байхагүй, тэдэнэр шэлэгдэнэн бусад арадуудай бүрин Бурханда ерэтэр лэ тиимэ байха.

26Тиигэжэ Израилиин бүхы арад зон абарагдаха. «Сион хадаһаа Абарагша ерэхэ, Яковай үри хадаһадһаа нүгэл шэбэлые зайсуулха.

27Тэдэнэй нүгэл шэбэлыень зайсуулаад, Би тэдэнтэй энэ хэлсээ баталхаб», – гэжэ Нангин Бэшэг соо бэшээтэй байдаг.

28Бусад арадууд таанадай аша туһада һайн Мэдээсэлые буруушаһан еврейнүүд Бурханай дайсадын болоо. Харин Бурханай шэлэжэ абаһанай, үбгэ эсэгэнэртэнэ үгэһэн найдуулгын ашаар тэдэнэр Бурханай нүхэдын юм.

29Ушарын юуб гэбэл, Бурхан шэлэжэ абаһан, буян хэшэгтээ хүртөөһэн хүнүүд тухайгаа һаналаа хубилгадаггүй.

30Бусад арад таанадай урдань Бурханай үгэ дууладаггүй байһантайтнай адляар мүнөө еврейнүүд баһа Бурханай үгэ дууладаггүй. Тэрэһэнь боложо таанад Бурханай үршөөл хайрада хүртэбэт.

31Тон тиигэжэл танай хүртэһэн үршөөл хайрада хүртэхын тула еврейнүүд Бурханай үгэ дууланагүй.

32Үршөөл хайраяа бултанда харуулхын тула Бурхан бүхы хүнүүдые үсэд зүрюу ябадалайнь түлөө баряад байгаа.

33Хэн Бурханай баян бардамые, сэсэн ухааниие, мэдэрэл ойлгосые хэмжэжэ барахаб? Хэн тэрэнэй шиидхэбэри шүүбэриие тайлбарилжа шадахаб? Хэн тэрэнэй харгы замые ойлгохоб?

34Бурханай һанал бодолнуудые мэдэжэ байһан, али тэрээндэ зүблэл үгэжэ байһан хүн олдохо аал?

35Бусаажа үгэхэ уялгатайгаар Дээдын Эзэндэ юумэ зээлидэһэн хүн байха аал?

³⁶Бүхы юумые тэрэ бүтээһэн байна, бүхы юумэн тэрэнэй ашаар ба тэрэнэй тулада оршоно ха юм. Бурхан хэтын хэтэдэ алдар солотой байһай! Болтогой.

Римэйхиндэ 12

Бурханда алба хэжэ ажаһууха тухай

¹Зай, аха дүүнэрни, Бурханай үршөөл хайраар өөһэдыгөө арюун сэбэр, таатай, амиды үргэл болгон Бурханда асарагты гэжэ гуйжа байнаб. Тиигэбэл тэрэтнай танай бодото алба болохо.

²Энэ дэлхэйн зондо адли бү байгты, харин ухаан бодолоо шэнэлүүлэн, өөһэдыгөө бүрин хубилгагты. Тиигэбэл таанад Бурханай эрхэ мэдэлые: тэрээндэ хайн хайхан, таатай, эрхим түгэс байхые мэдэжэ байхат.

³Бурханай намда үршөөһэн абьяас бэлэгэй ашаар таанадай хүн бүхэндэ хэлэнэб: байһанһаан үлүү ехээр өөр тухайгаа бү ханажа байгты. Зүгөөр Бурханай шамда үгэһэн этигэл хүзэгэй хэмжээгээр өөр тухайгаа дарууханаар бодомжолжо байгты.

⁴Манай ганса бээдэ олон эрхэтэнүүд байна ха юм, тиин бэеын эрхэтэн бүхэн ондо ондоо зорилготой гээшэ.

⁵Тон тиигэжэл бидэ олоншые байһан мүртөө бултадаа Христостой хамта нэгэ бэе болонобди, тиин бидэ нэгэ бэеын ондо ондоо эрхэтэнүүдтэл адли бэе бээтэйгээ холбоотойбди.

⁶Тиимэхээ Бурханай маанадта хайрлаһан элдэб янзын абьяас бэлигүүдээ хэрэглэнэбди. Хэрбээ Бурханай хэлэһые дамжуулха абьяас бэлигтэй байгаа хаа, этигэл хүзэгэйнгөө хэмжээгээр лэ хүргэхэ ёһотойбди.

⁷Бусад зондо алба хэхэ табиантай хаа, алба хэхэ ёһотойбди; хургаха табиантай хаа, хургаха ёһотойбди;

⁸бусадые урмашуулха табиантай хаа, урмашуулха ёһотойбди. Бусадтай хубаалсажа байгаа хаа, бардам баянаар хубаалсажа бай;



хүтэлэгшэ юм хаа, бүхы хүсэ шадалаараа захиржа бай; буян хэгшэ юм хаа, баяртайгаар буян хэжэ бай.

⁹Хүнүүдтэ үнэн зүрхэнһөө дуратай байгты; нүгэлтэ юумэнүүдһээ зайсажа байгты; хайн хайхан юумэндэ эрмэлзэжэ байгты.

¹⁰Бэе бээдээ аха дүүнэртэйл адляар дуратай байгты, бусад зоние өөрһөөн дээгүүр хүндэлэгты.

¹¹Дээдын Эзэндэ урматайгаар, оролдосотойгоор алба хэжэ байгты.

¹²Найдалаараа урмашажа, зоболон бэрхэшээлнүүдтэ тэсэбэритэй байжа, саг үргэлжэ зальбаржа байгты.

¹³Дуталдажа байһан хүзэглэгшэдтэй хубаалсажа, аяншадые гэртээ оруулан хүндэлжэ байгты.

¹⁴Таанадые хашан мурдэжэ байһан хүнүүдые үреэжэ, хараалгүйгөөр үреэжэ байгты.

¹⁵Баяр жаргалтай байһан зонтой баярлажа, уйлажа гашуудажа байһан зонтой гашуудажа байгты.

¹⁶Хоорондоо нэгэ һанал бодолтой байгты. Омогорхон бахархангүй, юрын хүнүүдтэй нүхэсэжэ байгты. Өөһэд тухайгаа сэсэн ухаантайбди гэжэ бү бодогты.

¹⁷Таанадта муу юумэ хэһэн хүндэ харюудань муу юумэ бү хэгты. Харин хүн бүхэнэй хайн гэжэ бододог юумэ бүтээхээ оролдогты.

¹⁸Хүн бүхэнтэй эбтэй эетэй байхын тула бүхы шадалаараа шармайжа байгты.

¹⁹Аха дүүнэр, үһөөгөө абаха гэжэ бү забдагты, харин Бурханай уур сухалда тэрэнээ даалгагты. «Би үһөөгөө абахаб, би харюулхаб гэжэ Дээдын Эзэн хэлэнэ», – гээд Нангин Бэшэгтэ бэшээтэй байдаг ха юм.

²⁰«Хэрбээ дайсаншни үлэсэжэ байбал, тэрээндээ эдее хоол үгэ; хэрбээ ангажа байбал, тэрээнээ ундалуула. Тиигэбэлшни тэрэ эшэһэндээ газар доро орон алдахал», – гэжэ Нангин Бэшэг соо баһа хэлэгдэнэ.

²¹Харатай муу юумэн шамайе бү илаг, харин орондонь ши харатай муу юумые хайн хайхан юумээр илажа бай.

Римэйхиндэ 13

Засаг захиргаанай урда дүүргэхэ уялганууд тухай

¹Хүн бүхэн засаг баригшадтай үгэ дуулажа байха ёһотой, ушарынь юуб гэбэл, ганса Бурханай зүбшөөлөөр лэ хүндэ засаг бариха эрхэ үгтэдэг юм, тиин мүнөөнэй засаг баригшадые Бурхан лэ табиһан болоно.

²Засаг захиргаанай урдаһаа эсэргүүсэһэн хүн Бурханай тогтоолдо эсэргүүсэнэ, тиимэһээ тэрэ хэһээлтэдэ орохо.

³Засаг захиргаан хайн юумэ бүтээжэ байһан зондо бэшэ, харин харата муухай юумэ үйлэдэжэ байһан зондо аймшагтай байдаг. Засаг захиргаанһаа айхын хэрэггүй: хайн юумэл бүтээжэ байгаарай, тиигэбэл засаг захиргаанай магтаалда хүртэхэш.

⁴Тэдэнэршни шинии хайн хайханай түлөө ажаллажа байһан Бурханай зарасанар ха юм. Хэрбээ харата муухай юумэ үйлэдэжэ байбал, тэдээнһээ айжа бай, тэдэшни хэһээхээр бодото хүсэ шадалтай юм. Тэдэ засаг баригшадшни харата муухай юумэ үйлэдэжэ байһан зоние хэһээдэг Бурханай зарасанар юм.

⁵Тиимэһээл ши гансал хэһээлтэһээ айгаад бэшэ, харин зүб юумэ хэнэб гэжэ һэшхэлээрээ ойлгон засаг баригшадтай мэдэлдэ байха ёһотойш.

⁶Засаг баригшад Бурханай ажал хэхэ уялгатай, тиимэһээл таанад тэдэндэ татабари түлэнэт.

⁷Үгэхэ ёһотой юумээе бүхы хүнүүдтэ үгэжэ байгты: татабари үгэхэ ёһотой болбол, татабаряа үгэгты; алба түлэхэ ёһотой болбол, албаяа түлэгты; хүрдэхэ ёһотой болбол, хүрдэжэ байгты; хүндэлэл үзүүлхэ ёһотой болбол, хүндэлэл үзүүлжэ байгты.

Хайра дуран тухай



⁸Хэндэшье үритэй байха ёһогүйт, зүгөөр бэе бээдээ дуратай байһантнай гансал үри шэритнай байха ёһотой. Ондоо хүндэ дуратай байхадаа хүн Хуулиин зүйлнүүдые гүйсэдхэбэ гээшэ.

⁹«Эрэдээ гү, али эхэнэртээ бү урба; бү ала; бү хулгайла; хүнэй юумэндэ бү ханаарха» гэхэн захяа заабаринууд болон бусадшье олон заабаринууд «Дүтынгөө хүндэ өөртөө адли дуратай бай» гэхэн гансал захяа заабари соо тобшологдоно ха юм.

¹⁰Хэрбээ таанад бусад зондо дуратай байбал, тэдэ зондоо хэзээшье муу юумэ хэхэгүйт. Хайра дуратай байхань Хуулиин зүйлнүүдые гүйсэдхэхэтэй адли юм.

¹¹Ямар сагай ерээд байһые таанад мэдэнэ ха юмта: нойрһоо һэрихэ сагтнай болоо, анхан этигэхэн хаһада ороходоо абарагдаха сагтнай бүри ойртоо.

¹²Һүни үнгэрөөд, үдэр болохонь ойртобо. Харанхы мунхагта хабаатай юумэнүүдые хэхээ болёод, зэр зэбсэг баряад гэрэл туяа соо тулалдахаяа бэлэн байял!

¹³Үдэрэй гэрэл туяада ажамидаржа байһан зондо зохихоор өөһэдыгөө абажа ябаял: забхай найр наада хэнгүй, архидангүй, ташаяаралдангүй, зальхайралдангүй, хэрүүл ама гаргангүй, атаархалдангүй байжа үзээл.

¹⁴Харин Дээдын Эзэн Иисус Христосые хуяг дуулгадад адли үмдээл, нүгэлтэ мүн шанар байдалаа анхархаяа, хүсэлэнгүүдые нь хангахаяа болиёл.

Римэйхиндэ 14

Ондоо хүнүүдые бү шүүбэрилэ

¹Этигэл хүзэгөөр һула хүнүүдые хүндэлжэ байгты, һанал бодол тухайнь тэдэнтэй бү арсалдагты.

²Зарим хүнүүдэй этигэл хүзэгынь ямаршье юумэ эдихые зүбшөөдэг, харин этигэл хүзэгөөр һула хүнүүд гансал ургамал эдидэг.



³Ямаршые юумэ эдидэг хүн нүгөөдэ эдидэггүй хүнөө доогуур бү хараг; тиин гансал ургамал эдидэг хүн үнөөхи ямаршые юумэ эдидэг хүнөө бү шүүбэрилэг, Бурхан тэрэ хүниие һайшаагаад байна ха юм.

⁴Ондоо хүнэй зарасые шүүбэрилжэ байхаар ши хэн гээшэбши? Тэрэ хүнэйшни эзэниинь лэ зарасынгаа зүб гү, али буруу байһыень мэдэхэ юм. Тэрэ зүб байха, юундэб гэбэл, Дээдын Эзэн тэрэниие зүб байлгаха арга хүсэтэй юм.

⁵Зарим хүнүүд нэгэ үдэрые бусад үдэрнүүдтэ ороходоо шухала гэжэ тоолоод, тусгайгаар тэмдэглэдэг, тиихэдэнь нүгөө зарим хүнүүд үдэрнүүдые хоорондонь илгадаггүй. Хүн бүхэмнай хэжэ бодожо байһанайнгаа ушар шалтагынь ойлгожо байг.

⁶Нэгэ үдэрые бусад үдэрнүүдтэ ороходоо шухала тусхай гэжэ тоолодог хүн Дээдын Эзэнэй алдарта тиигэнэ. Ямаршые юумэ эдидэг хүн Дээдын Эзэнэй алдарта эдинэ, тэрэ эдээ хоолойngoо түлөө Бурханда баяр баясхалан хүргэнэ ха юм. Зарим юумэнүүдые эдидэггүй хүн Дээдын Эзэнэй алдарта эдинэгүй, тэрэ хүн Бурханда баяр баясхалан хүргэдэг юм.

⁷Бидэ ганса бээ бодон ажамидардаггүйбди, али ганса бээ бодон үхэдэггүйбди.

⁸Ажамидархадаа бидэ Дээдын Эзэниие бодон ажамидарнабди, үхэхэдөө бидэ Дээдын Эзэниие бодон үхэнэбди. Тиимэхээ амидарна гүбди, али үхэнэ гүбди, бидэ Дээдын Эзэнэйл хүмди.

⁹Амиды ба үхэхэн хүнүүдэй Дээдын Эзэн байхын тула Христос үхөөд амидырһан байгаа.

¹⁰Тиихэдээ ши юундэ һүзэглэгшэ аха дүүгээ шүүбэрилээ хүмши? Али яахадаа ши һүзэглэгшэ аха дүүгээ доогуур хараа хүмши? Бидэ бултадаал Бурханай зарга шүүбэридэ орохо ха юмбибди.

¹¹«Яһатан бүхэн урдамни мүргэхэ, ямаршые хэлэтэй хүн намайе Бурхан гэжэ айладхаха, ами наһаараа тангаригланаб гэжэ Дээдын Эзэн хэлэнэ», – гэжэ Нангин Бэшэг соо хэлээтэй байдаг.

¹²Хүн бүхэмнай өөрынгөө үйлэ ябадалай түлөө Бурханай урда тоосохо юм.

Бусад зониие бү доройтуула

¹³Зай, бэе бээ шүүбэрилхэ шүүмжэлхээ болиёл даа. Харин бусад зониие бүдэрүүлхэ гү, али нүгэл шэбэлдэ унагааха юумэ хэхэгүй гэжэ оролдожо байял.

¹⁴Ямаршые эдээ хоол эдижэ болохо гэжэ Дээдын Эзэн Иисус намда бата этигэл үгөө. Хэрбээ таанад зарим эдихэ юумээ бузартай гэжэ тоолоо хаа, тэрэ эдеэнтнай танда бузартай байха.

¹⁵Хэрбээ эдижэ байһан юумээрээ ши ондоо хүниие гомдохооболшни, ши хайра дураар хүтэлүүлэгдэнэгүйш. Эдижэ байһан хоолоороо ши тэрэ хүниие доройтуулан бү хосороо. Тэрэ хүнэйшни түлөө Христос өөрынгөө амиие үгөө ха юм.

¹⁶Шинии һайн гэжэ бодожо байһан юумэнүүдые хүнүүд бү шүүбэрилэг.

¹⁷Ушарынь юуб гэбэл, Бурханай хаан орон эдихэ, ууха тухай бэшэ, харин Нангин һүлдэһөө эхи абадаг үнэн сэдхэл, энхэ тайбан, баяр жаргал тухай юм.

¹⁸Таанад тиимэ маягаар Христосто алба хэжэ байбал, Бурханда таатай ба хүн зондо хүндэтэй байхат.

¹⁹Тиимэхээл бидэ энхэ тайбаниие найруулдаг, бэе бээынгээ этигэл хүзэг бэхижүүлдэг юумэнүүдтэ зорижо байха ёһотойбди.

²⁰Эдээ хоолһоо боложо Бурханай хэһэн юумэ бү һандарга. Ямаршые эдээ хоол эдижэ болохо юм, гэхэтэй сасуу ондоо хүниие нүгэл шэбэлдэ унагааха шалтаг болохо юумэ эдихэнь буруу юм.

²¹Бусад хүзэглэгшэдые доройтон унагааха шалтаг болохо ямаршые юумэ хэнгүй, мяха эдингүй, архи уунгүй байхань зүб юм.

²²Эдэ мэтэ этигэжэ бодожо байһан юумэнүүдээ зосоогоо баряад, Бурхандаал мэдүүлээд бай. Эдihэн ууһан юумээрээ һэшхэлдээ гэмнүүлээгүй хүн жаргалтай байна!

²³Харин эдижэ байһан юумэн тухайгаа һэжэглэһэн хүниие Бурхан тэрэ юумээ эдижэ байхадань гэмнэдэг, юундэб гэбэл, тэрэ хүн этигэл хүзэгэйнгөө ёһоор болоногүй ха юм. Тиин этигэл хүзэгэй ёһоор хэгдэдэггүй юумэнүүд булта нүгэлтэй юм.

Римэйхиндэ 15

Ганса бэе тухайгаа бү бодогты, бусадта аша тухатай байгты

¹Бата этигэл хүзэгтэй бидэнэр ганса бээ бодохо ёһогүйбди, харин этигэл хүзэгөөр бирагүйхэн зоние дэмжэхэ ёһотойбди.

²Бусад хүзэглэгшэдэй эрхим һайн байхын түлөө, этигэл хүзэгынь бата бэхи болгохын тула бидэ булта тэдэндэ аша тухатай юумэ хэхэ ёһотойбди.

³Юундэб гэбэл, Христосшые ганса бээ бодожо байгаагүй юм. Харин: «Шамайе доромжолһон баһалтанууд нам дээрэ буугаа», – гэжэ Нангин Бэшэг соо бэшэгдэһэнэй ёһоор болоо юм.

⁴Нангин Бэшэг соо хэлээтэй бүхы юумэнүүд маанадта найдал үгэхэ зуураа һургаха, тэсэбэритэй болгохо, урмашуулха зорилготойгоор бэшээтэй байгаа.

⁵Маанадые тэсэбэритэй байлгадаг, урмашуулдаг Бурхан Христос Иисусай жэшээгээр таанадые нэгэ һанал бодолтой байлгаһай.

⁶Тиигэбэл таанад бултадаа нэгэ дуугаар Бурханда, манай Дээдын Эзэн Иисус Христосой Эсэгэдэ алдар соло дуудахат.

Һайн Мэдээсэл еврейнүүдтэ болон бусад арадуудта үгөөтэй юм

⁷Христосой таанадые хүндэлдэг байһандал адляар таанадые бэе бэе хүндэлжэ, Бурханда магтаал соло дуудажа байгты.

⁸Бурханай үбгэ эсэгэнэртэ үгэһэн найдуулгын бүтэһые харуулан, Христос еврейнүүдэй зарасань болон ерээ гэжэ би хэлэнэб.

⁹Баһа бусад арадуудай үршөөл хайрынь түлөө Бурханда магтаал соло дуудажа байхын тула Христос ерээ юм. «Бусад арадуудай дунда би шам тухай айладхажа байхаб, шинии нэрэ алдарта би магтаалнуудые дуулажа байхаб», – гэжэ Нангин Бэшэг соо бэшээтэй байдаг.

¹⁰«Бусад яһатад, Бурханай арадтай хамта баярлагты», – гэжэ баһа бэшээтэй байдаг.

¹¹«Бусад яһатад, бултадаа Дээдын Эзэндэ магтаал соло дуудагты, бүхы арад, тэрээниие алдаршуулагты!» – гэжэ баһа бэшээтэй байдаг.

¹²«Иессэй үри һадаһан бии болохо, тэрэ бусад арадые захирхаяа ерэхэ, харин тэдэнэрынь тэрээндэ найдажа байха», – гэжэ баһа Исаяя хэлэнэ.

¹³Найдал үршөөдэг Бурхан этигэл хүзэгэйтнай ашаар таанадые бүтэн баяр жаргалаар ба амгалан байдалаар дүүргэг лэ, тиигэжэ Нангин хүлдын хүсөөр этигэл найдалтнай нэмэгдэжэ байг лэ.

Павелай сэхыень бэшэһэнэй шалтаган

¹⁴Аха дүүнэрни, таанад эрхим һайнта, элдэб янзын эрдэм мэдэрэлтэйт, бэе бэеэ һургаха аргатайт гэжэ би хатуу этигэлтэй байнаб.

¹⁵Энэ бэшэг соогоо зарим юумэнүүдые һануулхадаа би сэхыень хэлээб. Бурханай үршөөл хайраар би

¹⁶бусад арадуудай аша туһада Христос Иисусай зараса болооб. Бусад арадые Нангин хүлдын ашаар Бурханда таатай арюун нангин үргэл болгохын тула би Бурханай һайн Мэдээсэлые номнон, санаартанай ажал ябуулнаб.

¹⁷Иисус Христосой ашаар Бурханда алба хэжэ байһанаараа би бахархаха аргатайб.



18-19Бусад арадуудыг Бурханай мэдэлд оруулхын тула Христос гайхамшагта тэмдэгүүдээр ба үйлэ хэрэгүүдээр, Бурханай хүлдын хүсэ шадалаар намаар юу хэлүүлээ, хүүлээ һэм, тэрээн лэ тухай би хөөрэхээ зүрхэлхэб. Аяншалжа ябахадаа би Иерусалимһаа Иллирик хүрэтэр хаа хаанагүй Христос тухай һайн Мэдээсэл номножо байгаа.

20Тиихэдээ би ондоо хүнэй татаһан һуури дээрэ барихагүйн тула Христос тухай хүнүүдэй огто дуулаагүй газар дайдаар номнохо гэжэ оролдожо байгаа.

21Нангин Бэшэгэй хэлэһэн ёһоор: «Тэрээн тухай мэдээсэлгүй байһан хүнүүд хараха, Тэрээн тухай юумэ дуулаагүй хүнүүд ойлгохо».

Павелай Рим хото ошохо түлэблэлгэ

22Таанадта оло дахин ошохо гэхэдэмни, энэ ажални намайе табидаггүй байгаа.

23Харин мүнөө эдэ нютагуудта ажалаа дүүргэһэн, олон жэлэй туршада таанадтай ошожо уулзаха һанаатай байһан юм хадаа

24Испани ошохо замдаа таанадыг дайрахаб. Тиигээд нэгэ хэды саг соо таанадтайгаа уулзажа баярлахаб, һүүлдэнь замаа үргэлжэлүүлхэдэмни туһалхат гэжэ найданаб.

25-26Харин мүнөө би Македониин ба Ахайяын хүзэглэгшэдэй һайн дураараа суглуулһан алта мүнгэ дуталдажа байһан Бурханай хүнүүдтэ хубаажа үгэхөөр Иерусалим хото ошоноб.

27Тэдэ хүзэглэгшэд туһалха гэхэн шийдхэбэри өөһэдөө гаргаа. Гэхэтэй зэргэ үнэн бодолоороо тэдэнэр туһалха ёһотойшы юм. Хэрбээ еврейнүүд оюун сэдхэлэй буян хэшэгээрээ бусад арадуудтай хубаалдаһан байбал, бусад арадуудшы алта мүнгэнэй буян хэшэгээрээ еврейнүүдтэ туһалха ёһотой юм.

28Тэдэндэ суглуулагдаһан алта мүнгэ хүргэхэ ажалаа бүтээгээд, би таанадаа дайран Испани руу ябахаб.



²⁹Таанадта ерэхэдээ би Христосой буян хэшэгээр таанадтай элбэг дэлбэгээр хубаалсахаб гэжэ мэдэнэб.

³⁰Аха дүүнэр, намтай хамта минии түлөө Бурханда ханалгатайгаар зальбаржа байгыт даа гэжэ гуйнаб. Бидэ манай Дээдын Эзэн Иисус Христосто нэгэ адли этигэл хүзэгтэй, хүлдын үршөөдэг нэгэ адли хайра дуратай ха юмбибди.

³¹Иудейн хүзэггүй зонһоо Бурхан намайе аршалһай, Иерусалимда хэхэ ажални тэндэхи Бурханай зондо хайшаагдаһай гэжэ зальбарыг даа.

³²Тиигэбэл би, Бурханай хүсөө һаа, таанадта баяр жаргалтай ерэхэб, таанадтайгаа уулзаад һанаагаа амархаб.

³³Амгалан байдал үршөөдэг Бурхан та бүхэнтэй оршожо байхань болтогой!

Римэйхиндэ 16

Хүнүүдые амаршална

¹Кенхрейын хүзэглэгшэдэй бүлгэмдэ хүдэлдэг Фойбэ эгэшэтэй таанадые танилсуулхамни.

²Тэрэниие Бурханай хүнүүдтэ зохиhoо Дээдын Эзэнэй нэрээр угтажа абаарайгты, хэрэгүүдтэнь өөһэдынгөө зүгһөө шадалаараа хамһалсажа байгаарайгты. Тэрэ эхэнэр намдашье, бусадшье олон зондо ехэ туһа хүргөө юм.

³Акила Прискилла хоёрто намһаа мэндэ дамжуулаарайгты. Тэдэнэр намтай хамта Христос Иисуста гансашье алба хэжэ байгаа бэшэ,

⁴харин минии түлөө ами наһанай аюул оһолдошье орожо байгаа. Гансашье би бэшэ, харин еврей-бэшэ хүзэглэгшэдэй бүлгэмүүд бултадаа тэдээндэ баяр баясхалан хүргэжэ байна.

⁵Тэдэнэй гэртэ суглардаг хүзэглэгшэдэй бүлгэмдэ амар мэндэ хүргөөрэйгты. Аси можын Христосто хүзэглэгшэдэй түрүүшын



хүнийн байхан инаг хайрата Эпанэт нүхэртэмни мэндэ дамжуулаарайгты.

⁶Таанадай аша туһада аргагүй ехээр хүдэлжэ байхан Марияда амар мэндэ хүргөөрэйгты.

⁷Намтай хамта түрмэдэ һууһан манай яһанай Андроник Юния хоёрто мэндэ дамжуулаарайгты. Тэдэ хоёр элшэнэрэй дунда мэдээжэ, намһаа урда Христосто хүзэглэһэн түүхэтэй юм.

⁸Дээдын Эзэнээр намда ехэл хайра дуратай байдаг Амплиатда мэндэ дамжуулаарайгты.

⁹Маанадаар хамта Христосто алба хэдэг Урбанда, минии инаг хайратай Стахида амар мэндэ хүргөөрэйгты.

¹⁰Туршалгануудые дабахадаа Христосто үнэн сэхэ байһанаа баталһан Апеллестэ мэндэ дамжуулаарайгты. Аристочулай гэр бүлэдэ амар мэндэ хэлээрэйгты.

¹¹Минии яһанай Иродиондо, Христосто хүзэглэдэг Наркисай гэр бүлынхидтэ амар мэндэ хүргөөрэйгты.

¹²Дээдын Эзэндэ алба хэжэ байһан Трюфана Трюфоса хоёрто, Дээдын Эзэнэй аша туһада аргагүй ехэ ажал бүтээһэн инаг хайрата Персидэдэ мэндэ дамжуулаарайгты.

¹³Дээдын Эзэнэй шэлэжэ абаһан Руфта, намда хүбүүндээл адли хандадаг тэрэнэй эжыдэ мэндыемни дамжуулаарайгты.

¹⁴Асинкрит, Флегонт, Ерми, Патроб, Ерма болон тэдэнтэй байһан бусад хүзэглэгшэ аха дүүнэртэ мэндыемни дамжуулаарайт.

¹⁵Филолог Юлия хоёрто, Нерейдэ, тэрэнэй дүү басаганда, Олимпда, тэдэнтэй хамта байһан Бурханай бүхы хүнүүдтэ мэндыемни дамжуулаарайгты.

¹⁶Бэе бэеэ таалажа амаршалаарайгты. Христосой хүзэглэгшэдэй бүхы бүлгэмүүд таанадта мэндэээ дамжуулжа байна.

Түгэсхэлэй захибари

¹⁷Аха дүүнэр, таанадай нуража абаһан бүхы юумые буруушаан, бэрхэшээл зоболон тулгаруулдаг, хүзэглэгшэдэй бүлгэмые хоорондонь хубаадаг хүнүүдһээ болгоомжолжо байгты гэжэ гуйнаб. Таанад тиимэ зонһоо зайсажа байгты.

¹⁸Тэдэ зон тиимэ юумэ хэхэдээ, манай Дээдын Эзэн Христосто бэшэ, харин өөрынгөө гэдэнэ ходоодо алба хэнэ гээшэ. Тэдэнэр уран гоё үгэ хүүрээрээ гэнэн гэдэргэ зониел зангадаа оруулдаг юм.

¹⁹Дээдын Эзэнэй мэдэлдэ бүрин байдагыетнай хүн бүхэн мэдэхэ, тиимэхээ би таанадай түлөө баярлажа байдаг хүнби. һайн һайхан юумые ойлгожо байгаад, нүгэлтэ муухай юумэнһээ зайсажа байһайт гэжэ хүсэнэб.

²⁰Маанадта амгалан байдал үршөөдэг Бурхан удангүй сатанае танай ула доро оруулан хүнөөхэ. Манай Дээдын Эзэн Иисусай үршөөл хайра таанадтай оршожо байхань болтогой!

²¹Намтай хамта хүдэлдэг Тимофей, баһа манай яһатанай хамаатан Луций, Иасон, Сосипатр гэгшэд таанадта мэндые дамжуулна.

²²Энэ бэшэгые саарһан дээрэ буулгаһан хүзэглэгшэ Тертый би баһа таанадта амар мэндые дамжуулнаб.

²³Гэртээ намайе айлшалуулжа байһан, хүзэглэгшэдэй бүлгэмые суглуулжа байһан Гай таанадта мэндые дамжуулна. Хотын мүнгэнэй һан эрхилэгшэ Эраст, Кварт дүүмнай таанадта баһа мэндые дамжуулна.

²⁴Манай Дээдын Эзэн Иисус Христосой үршөөл хайра та бүхэнтэй оршожо байһай!

Түгэсхэлэй зальбаралга

²⁵Бурханда магтаал соло дуудая! Тэрэ болбол Иисус Христос тухай минии номноһон һайн Мэдээсэлэй ёһоор танай этигэл хүзэгые



бэхижүүлхэ аргатай юм. Урдань тэрэ һайн Мэдээсэл үни удаан саг соо далда нюуса байгаа.

²⁶Харин мүнөө тэрэ үнэн зүбые лүндэншэдэй бэшэгүүд нээгээ; бүхы хүнүүдэй хүзэглэжэ, үгыень дуулажа байхын тула мүнхэ Бурхан захиралтаараа бүхы арадуудта тэрэниие мэдүүлээ.

²⁷Ори ганса, сэсэн мэргэн Бурхан Иисус Христосой ашаар хэтын хэтэдэ алдар солотой байһай! Болтогой!



Коринфынхидтэ 1-дэхи

Коринфынхидтэ 1-дэхи 1

Павелай амаршалга

¹⁻²Коринф хотын хүзэглэгшэдэй бүлгэм, Иисус Христостой нэгэдэн Бурханда зорюулагдаһан зон, Бурханай хүнүүд болохоор дуудуулагдаһан зон, манай Дээдын Эзэн Иисус Христосто, тэдэнэй болон манай Дээдын Эзэндэ газар бүхэндэ зальбарагша бүгэдэ зон, Бурханай эрхэ мэдэлээр Христос Иисусай элшэн болохоор дуудуулагдаһан Павел, тиихэдэ хүзэглэгшэ Сосфен хоёр таанадта бэшэнэ.

³Манай Эсэгэ Бурхан ба Дээдын Эзэн Иисус Христос таанадта үршөөл хайра ба амгалан тайбаниие үршөөг лэ!

⁴Та бүхэнэй түлөө, Христос Иисусаар дамжуулан таанадта үгтэһэн абьяас бэлигүүдэй түлөө би Бурханда үргэлжэ баяр баясхалан хүргэдэгби.

⁵Христостой нэгэдэхэдээ, таанад алишье талаһаа баяжабат, зондо Бурханай мэдээсэл дуулгахадаашье, тэрэниие ойлгоходоошье эрхим хайн болобот.

⁶Тиигэжэ Христос тухай гэршэлһэнэймнай үнэн зүб байһаниинь таанадта баталагдаба.

⁷Тиимэһээ манай Дээдын Эзэн Иисус Христосой ерэхые хүлээхэ үедээ таанад ямаршье абьяас бэлигээр дуталданагүйт.

⁸Манай Дээдын Эзэн Иисус Христосой ерэхэ үдэр ямаршье гэмгүй байхынтнай тула тэрэ таанадые һүүл хүрэтэрнь батадхажа байхал.

⁹Өөрынгөө Хүбүүтэй, манай Дээдын Эзэн Иисус Христостой харилсахаар таанадые дуудаһан Бурхан найдабаритай юм.

Һүзэглэгшэдэй бүлгэмэй дотороо хубаарһан тухай

¹⁰Аха дүүнэр, хоорондоо хубааралдажа байхагүйн тула һаналаа нэгэдүүлжэ байгты, нэгэ һанал бодолтой, нэгэ зорилготой байгты гэжэ

Манай Дээдын Эзэн Иисус Христосой нэрэ түрөөр та бүхэндэ гуйн ханданаб.

11Юундэ тиигэжэ хэлэнэбиб гэхэдэ, та аха дүүнэрэй хоорондо арсалдаан гарана гэжэ намда Хлоягай гэр бүлынхид дуулгаа юм.

12Таанад бэе бээдээ ондо ондоо юумэ хэлэдэг байнат: нэгэ заримантнай «Бидэ Павелые даханабди», нүгөөдэтнай «Бидэ Аполлосые даханабди», үшөө нүгөөдэтнай «Бидэ Пётрые даханабди», заримантнай «Бидэ Христосые даханабди» гэлдэнэ.

13Тиихэдээ Христос хубаараа гээшэ гү? Тиихэдээ Павел таанадай түлөө хэрээхэн дээрэ саазалуулагдаһан байгаа гээшэ гү? Али Павелай нэрэ алдараар таанад уһаар арюудхагдаһан байгаа гээшэ гүт?

14Крисп Гай хоёрһоо ондоо бэшэ хэниетнайшые уһаар арюудхаагүй байһандаа би Бурханда баяр хүргэнэб.

15Минии нэрэ алдараар уһаар арюудхагдааб гэжэ нэгэнтнайшые хэлэхэ аргагүй юм.

16Ай, мартааб, үшөө Стефанай гэр бүлые уһаар арюудхаа бэлэйб. Үшөө хэниие уһаар арюудхаһанаа, али үгыгөө ханахагүй байнаб.

17Христос намайе уһаар арюудхахын тула эльгээгээ бэшэ, харин һайн Мэдээсэл сэсэрхэһэн уран үгэнүүдые хэрэглэнгүй номнохыемни эльгээгээ юм. Хэрбээ сэсэрхэһэн уран үгэнүүдые хэрэглэбэлни, Христосой үхэлһөө эхитэй хүсэн бууража магадгүй байгаа.

Христос болбол Бурханай хүр хүсэ, эрхэ засаг мүн

18Христосой хэрээхэн дээрэ үхэхэн тухай мэдээсэл хосорогшодто ямаршые удхагүй тэнэг юм, харин абарагдажа байһан бидэндэ тэрэ мэдээсэл Бурханай хүр хүсэн болоно.

19Нангин Бэшэг соо: «Сэсэн мэргэн хүнүүдэй сэсэнниень хүнөөхэб, ухаатайшуулай ухаан бодолыень буруушаахаб», – гэжэ хэлэгдэнэ.



²⁰Тиимэһээ сэсэн мэргэн хүнүүд хаанаб? Али эрдэмтэй ухаатайшуул хаанаб? Али энэ дэлхэйн уран арсалдагша боосолдогшод хаанаб? Энэ дэлхэйн сэсэн мэргэнэй тэнэг байһыень Бурхан харуулаа бэшэ аал?

²¹Энэ дэлхэйн зоной өөһэдынгөө ухаагаар Бурханиие мэдэрхын аргагүй байһыень Бурхан өөрөө оюун ухаагаараа заяагаа, тиигээд «тэнэг» гэгдэдэг мэдээсэлээр хүзэглэгшэ зониие абарха гэжэ шиидээ.

²²Хэрбээ иудейнүүд гайхамшагта үйлэ хэрэгүүдээр юумэнүүдэй баталагдахые хүлээдэг байбалнь, бусад арадууд сэсэн мэргэнээр юумэнүүдэй баталагдахые хүлээдэг юм.

²³Харин бидэ саазалуулагдаһан Христос тухай, еврейнүүдэй дурые гутаадаг, бусад арадуудта, ямаршые удхагүй байдаг мэдээсэлые номнонобди.

²⁴Харин еврейнүүдэйшые, бусад арадуудайшые дундаһаа Бурханай дуудаһан хүнүүдтэ энэ мэдээсэл – Бурханай хүр хүсэн, Бурханай оюун ухаан болохо Христос гээшэ.

²⁵Бурханай тэнэг гүүлэдэг юумэнь хүнүүдэй ухаанһаа сэсэн юм, Бурханай бирагүй һула гүүлэдэг юумэнь хүнүүдэй хүсэ шадалһаа хүсэтэй юм.

Бурхан яжа шэлэжэ абадаг бэ?

²⁶Аха дүүнэр, Бурханай таанадые дуудахада таанад ямар байһанаа һаньт: хүнүүдэй хэмжээгээр харабал, үсөөнтнайл сэсэн ухаантай, хэдыхэнтнайл хүр хүсэтэй, хэдыхэнтнайл дээгүүр уг изагууртай байгаа бэлэй.

²⁷Тиимэһээ Бурхан энэ дэлхэйн сэсэн мэргэниие номгоруулхын тула ямаршые удхагүй гэжэ тоологдодог юумэнүүдые шэлэжэ абаа, энэ дэлхэйн хүр хүсые сарахын тула хүнүүдэй дундаһаа ахир һула гэжэ тоологдодогудыень шэлэжэ абаа.

²⁸Бурхан энэ дэлхэй дээрэ шухала гэжэ тоологдодог юумые болюулхын тула хүнүүдэй дундаһаа ямаршые уг изагуургүй, дарлагдаһануудыень шэлэжэ абаа.

²⁹Эдэ бүхэн Бурханай урда нэгэшые хүн найрхахагүй гэхэн удхатай юм.

³⁰Юуб гэбэл, Бурхан лэ таанадые Христос Иисустай нэгэдүүлээ, Христосые манай сэсэн ухаан болгоо. Христосой ашаар бидэ үнэн сэдхэлтэнгүүд, Бурханай нангин хүнүүд, сүлөөтэй хүнүүд болообди.

³¹«Найрхаһан хүн Дээдын Эзэнэй бүтээһэн лэ юумээр найрхаг», – гэжэ Нангин Бэшэг соо хэлэгдэһэнэй ёһоор бүхы юумэн бүтэжэ байг лэ.

Коринфынхидтэ 1-дэхи 2

Христос болон хэрээһэн тухай мэдээсэл

¹Аха дүүнэр, Бурханай гэршэлгые номнохоёо таанадта ерэхэдээ, би уран гоё үгэнүүдые гү, али агуухэ ухаа хэрэглээгүй хэнби.

²Таанадтай байха хаһадаа би Иисус Христосхоо, илангаяа тэрэнэй хэрээһэн дээрэ үхэхэн ушарһаа бэшэ бүхы юумые мартахань дээрэ гэжэ бодоо бэлэйб.

³Тиимэхээ таанадта ерэхэдээ би нуларшаһан, ехэл хүрдэхэн амитан байгаа бэлэйб,

⁴үгэнүүдээ хэлэхэдээ, номноходоо би уран үгэнүүдые хэрэглэн идхаагүйб, харин Бурханай хүлдын хүр хүсэн хэлэһыемни баталан идхажа байгаа.

⁵Тиимэхээ танай хүзэг хүнүүдэй сэсэн ухаанһаа эхи татана бэшэ, харин Бурханай хүр хүсэн дээрэ нуурижана.

Бурханһаа үгтэхэн сэсэн ухаан тухай

⁶Зүгөөр сэсэн ухаан тухай мэдээсэлые би хүзэг этигэлээрээ болбосон хүнүүдтэ номнодогби. Гэхэдээ тэрэ сэсэн ухаан энэ дэлхэйн бэшэ юм, эрхэ засагаа алдадаг энэ дэлхэе захирагшадай бэшэ юм.



⁷Минии номнодог сэсэн ухаан хүнүүдхээ далда хадагалагдаһан Бурханай нюуса ухаан юм, гэхэтэй зэргэ Бурхан манай магтаал солотой байхын тула газар дэлхэйн үшөө бүтээгдээгүй байхада тэрэ ухаа заяагаа юм.

⁸Тэрэ сэсэн ухаае энэ дэлхэйн захирагшадай нэгэньшье мэдэрээгүй. Хэрбээ мэдэрһэн байбал, тэдэ алдарта Дээдын Эзэниие саазалхагүй байгаа.

⁹Яаба тиибэшье, Нангин Бэшэг соо иигэжэ бэшээтэй байдаг: «Нэгэшье хүнэй хараагүй, дуулаагүй, тиимэ юумэн болохо гэжэ нэгэшье хүнэй ойндoo оруулаагүй байһан юумые Бурхан өөртэнь дуратай хүнүүдтэ бэлдээд байна».

¹⁰Тэрэ нюусаа Бурхан бидэндэ бүхы юумые харадаг, далда байһан Бурханайшье зорилгые харадаг хүлдынгөө ашаар нээгээ.

¹¹Гансал зосоомнай оршодог хүлдэ бидэн тухай хамагые мэдэдэг бэшэ аал? Тон тиигэжэл ганса Бурханай хүлдэ Бурхан тухай хамагые мэдэдэг юм.

¹²Бидэ энэ дэлхэйн зондол адляар бодомжолхогүйн тула энэ дэлхэйн хүлдые тогтоожо абаагүй хүмди, зүгөөр Бурханай эльгээһэн хүлдые тогтоожо абаа хүмди, тиимэхээ Бурханай маанадта үршөөһэн бүхы юумые мэдэхэбди.

¹³Тиимэхээ бидэ хүнүүдэй сэсэн ухаанай хургаһан үгэнүүдээр дуугарна бэшэбди, харин хүлдын хургаһан үгэнүүдээр дуугарнабди. Тиигэжэл бидэ хүлдые тогтоожо абаһан хүнүүдтэ оюун сэдхэлэй үнэн зүбые хүлдын үршөөһэн үгэнүүдээр тайлбарилна гээшэбди.

¹⁴Зүгөөр хүлдые тогтоожо абаагүй хүн Бурханай хүлдын үгэхэн абьяас бэлигүүдые абажа шадахагүй. Тиимэ хүн тэдэ абьяас бэлигүүдые ойлгохогүй, тэдэниие ямаршье удхагүй гэжэ тоолохо. Ушарынь юуб гэхэдэ, тэдэ юумэнүүдые гансал оюун сэдхэлээрээ ойлгожо болохо юм.



¹⁵Тиихэдэ хүлдэтэй хүн ямаршые юумые шүүбэрилхэ аргатай, харин тиимэ хүниие нэгэшые хүн шүүбэрилхэ аргагүй юм.

¹⁶«Дээдын Эзэнэй ханал бодолые хэн мэдэрээб? Хэн тэрэниие хургажа шадааб?» гэжэ Нангин Бэшэг соо бэшээтэй байдаг. Гэхэтэй зэргэ бидэ Христосой ханал бодолые мэдэнэбди.

Коринфынхидтэ 1-дэхи 3

Һүзэглэгшэдэй бүлгэмэй дотороо хубаархан тухай

¹Аха дүүнэр, хүлдэ тогтооһон хүнүүдтэл адляар таанадта хандан хэлэхэ аргагүй байгаа, харин энэ дэлхэйн хүнүүдтэл, Христосто хүзэглэхэнөөрөө нарай үхибүүд байһан хүнүүдтэл мэтэ хандан хэлээ бэлэйб.

²Таанадай хатуу юумэ эдижэ шадахагүй байһан хада би таанадые хүгөөр гэжээһэн байгаа. Зүгөөр, мүнөөшые таанад хатуу юумэ эдижэ шадахагүйт.

³Ушарынь юуб гэхэдэ, таанад үшөөл энэ дэлхэйн хүнүүдэй жама ёһоор ажамидарнат. Бэе бээдээ атаархалдадаг, хоорондоо арсалдадаг байһантнай таанадай энэ дэлхэйн хүнүүдэй заншалаар бээе абажа ябадаг энэ дэлхэйн хүнүүд байһыетнай харуулна бэшэ аал?

⁴Нэгэнтнай «Бидэ Павелые даханабди», нүгөөдэтнай «Бидэ Аполлосые даханабди» гэжэ байхадаа, таанад энэ дэлхэйн хүнүүд бэшэ аалта?

⁵Эсэсэй эсэстэ Аполлос гэдэгтнай хэн гээшэб? Тиихэдэ Павел гэдэгтнай хэн гээшэб? Бидэ таанадай Христосто хүзэглэхэдэ туһалһан юрэ Бурханай зарасанар гээшэбди. Бидэ Дээдын Эзэнэй хүн бүхэндэмнай үгэһэн ажалыел бүтээгээбди:

⁶Би үрэнүүдые тариһан, Аполлос уһалһан, харин Бурхан ургуулһан байгаа.

⁷Тиимэхээ тариһан, уһалһан хүнүүдынь ямаршые хабаагүй, зүгөөр ургуулһан Бурхан гол шухала юм.

⁸Тариһан, али уһалһан хүнүүдэй хоорондо ямаршые илгаа үгы, Бурхан хүн бүхэниие хэһэн ажалайнь зэргээр шагнаха.

⁹Бидэ Бурханай түлөө хамтаран ажаллагшад гээшэбди, харин таанад – Бурханай таряалан гээшэт. Тиихэдээ таанад баһа Бурханай барилга гээшэт.

¹⁰Бурханай намда үгэһэн абьяас бэлиг хэрэглэн, би сэсэн барилгашандал мэтэ барилгын һуури татааб, үшөө ондоо хүн тэрэ һуурин дээрэ байра барина. Гэхэтэй сасуу хүн бүхэн яжа барижа байһанаа анхарха ёһотой.

¹¹Бурхан гансал Иисус Христосые һуури болгон табиһан байгаа, тиимэһээ ондоо ямаршые һуури табигдаха аргагүй.

¹²Зарим хүнүүд энэ һуурин дээрэ алта гү, али мүнгэ гү, али эрдэни шулуунуудые хэрэглэн бариха, нүгөө зарим хүнүүд модо гү, али үбһэ гү, али голоомо хэрэглэн бариха.

¹³Тиихэдэ хүн бүхэнэй ажалай шанарынь Христосой ерэхэ Үдэр мэдэгдэхэ. Тэрэ Үдэр хүн бүхэнэй ажалые гал дүлэн элирүүлхэ, гал дүлэн тэрэниие туршаха, тиигээд бодото шанарыень харуулха.

¹⁴Һуурин дээрэ баригдаһан, гал дүлые тулажа гараһан хүнэй ажал байбал, барилгашань шагналаа абаха.

¹⁵Хэрбээ хүнэй ажалынь галда шатабал, тэрэ хүн гарзатай байха, тиигэбэшые тэрэ хүн өөрөө абарагдаха, галда шатахаһаа абарагдаха гэжэ хэлэхэдэ болохо.

¹⁶Таанад Бурханай хүмэ гээшэт, зосоотнай Бурханай хүлдэ оршоно гэжэ таанад мэдэхэгүй аалта?

¹⁷Бурханай хүмэ нангин юм, таанад өөһэдөө Бурханай хүмэ гээшэт. Тиимэһээ Бурханай хүмые һандаргаһан хүн бүхэниие Бурхан хэһээхэ.

¹⁸Таанад өөһэдыгөө бү мэхэлэгты. Хэрбээ таанадай хэн нэгэн энэ дэлхэйн шатада өөрыгөө сэсэн мэргэнби гэжэ тоолоболнь, үнэндөө сэсэн мэргэн болохын тула тэнэг болохо ёһотой.

¹⁹Энэ дэлхэйн сэсэн мэргэн гэжэ тоологдодог юумэнүүд Бурханай урда ямаршые удхагүй юумэнүүд юм. «Бурхан сэсэн мэргэн хүнүүдые мэхэ гохоорнь баридаг», – гэжэ Нангин Бэшэг соо бэшээтэй байдаг.

²⁰«Сэсэн мэргэн хүнүүдэй ханал бодолынь ямаршые аша туһагүй юм гэжэ Дээдын Эзэн мэдэхэ», – гээд Нангин Бэшэгэй ондоо газартань хэлэгдэнэ.

²¹Тиимэхээ хэнтнайшые ямар нэгэн бүлгэмэй гэшүүнби гэжэ бү омогорхог лэ, юуб гэбэл, бүхы юумэн таанадай ха юм:

²²Павелшые, Аполлосшые, Пётршые, энэ газар дэлхэйшые, аминшые, үхэлшые, оршон үешые, ерээдүй сагшые илгаагүй таанадай ха юм,

²³тиихэдэ таанад Христосой ха юмта, тиин Христос Бурханай ха юм.

Коринфынхидтэ 1-дэхи 4

Христосой элшэнэр тухай

¹Бурханай нюуса тайлбарилжа байхаар табигдаһан юрэ Христосой зарасанар байһыемнай таанад ойлгохо ёһотойт.

²Тиимэ зарасанар булта эзэндээ үнэн шударга байха ёһотой.

³Таанадай гү, али ондоо хүнүүдэй намайе шүүмжэлхэ шүүбэрилхэнь намда ямаршые хамаагүй, би өөрөөшые өөрыгөө шүүбэрилдэггүйб.

⁴Сэдьхэлни арюуншые хаа, үнэхөөрөө ямаршые гэмгүй байһамни энээгээр баталагданагүй, юундэб гэбэл, гансал Дээдын Эзэн минии заргаша юм.

⁵Тиимэхээ тогтоогдоһон сагай болоогүйдэ хэниешые бү шүүбэрилэ. Дээдын Эзэн ерэхэдээ, шэб харанхыда хоргодоһон юумэнүүдые гэрэлтүүлхэ, хүнүүдэй далда ханаа зорилгые элирүүлхэ, тиихэдэ хүн бүхэн хэһэн зэргээрээ Бурханайл магтаалда хүртэхэ.



⁶Аха дүүнэр, таанадайл аша туһада би эдэ бүхэниие Аполлос бидэ хоёрой жэшээ дээрэ харуулбаб. Хүн бүхэнтнай Бурханай һургаалые гүйсэдхэжэ байһай гэжэ хүсэнэб. Хэнтнайшые нэгэ хүнөө хүндэлөөд, нүгөөдээе баһаад бү ябаһай.

⁷Хэн таанадые бусадһаа дээгүүр табяа юм? Таанадта байһан бүхы юумые Бурхан лэ таанадта үгөө бэшэ аал? Тиихэдээ танда байһан бүхы юумэнүүд дээрэхээ үгтэхэн бэлэг бэшэ юм шэнгээр яахадаа ямбарһаа хүмта?

⁸Зай, тиихэдээ таанад садхалдиба гүт? Баяжаба гүт? Бидэнэй хаан шэрээдэ һуугаагүй байхада таанад хаанууд болобо гүт? Үнэхөөрөө таанадай хаан шэрээдэ һуухые хүсэнэб, тиигэбэл бидэшые таанадтай хамта захирха һэмди.

⁹Бүлэг зоной урда үхэхэ табилаантай зондол адли Бурхан элшэнэр бидэндэ хамагай һүүлэй һууринуудые үгөө гэжэ намда һанагдадаг. Бурханай Эльгээмэлнүүдэйшые, хүнүүдэйшые, бүхы юртэмсэ дэлхэйн урда үзэсхэлэн болоо ха юмбибди.

¹⁰Бидэ Христосой түлөө тэнэг болообди, зүгөөр таанад Христостой хамтаран сэсэн мэргэн болобот! Бидэ ахир һулабди, тиихэдэ таанад хүсэтэй болобот! Бидэнэй нэрые гутаагаа, харин таанад алдар солодо хүртэбэт!

¹¹Мүнөө болотор бидэ үлэн хооһон, амаа ангажа, үмхирһэн хахарһан хубсаһатай ябанабди, маанадые сохино, бидэ нэгэ газарһаа нүгөө газарта тэнэжэ ябанабди.

¹²Бидэ хүшэр хүндэ ажал хэжэ хүлһөө гоожуулнабди. Маанадые хараалда хүртөөхэдэ, бидэ үрэнэбди, маанадые хашан мүрдэхэдэ, бидэ тэсэбэритэй байнабди,

¹³маанадые хардахадань, бидэ энхэргэн үгэнүүдээр харюусанабди. Бидэ энэ дэлхэйн хаягдал гээшэбди, бидэ мүнөө болотор газарай хог болоод байнабди.



¹⁴Эшээхэ улайлгаха зорилготойгоор энэниие таанадта бэшэнэ бэшэб, харин инаг хайрата үхибүүдээ хургаһандал адляар таанадта ухаа заанаб.

¹⁵Яажа Христостой ажамидархаб гэжэ таанадые хургадаг үй түмэн хүтэлэгшэд байхаданьшье, таанадта гансал эсэгэ байна. Христос Иисустай нэгэдэхэдэтнай би таанадта һайн Мэдээсэлые хүргэн, эсэгэтнай болооб.

¹⁶Тиимэхээ намайе нажаажа ябагты гэжэ таанадые ехэтэ гуйнаб.

¹⁷Тиимэл зорилготойгоор Дээдын Эзэндэ үнэн сэхэ Тимофейе таанадта эльгээнэб. Тэрээндэ би Хүбүүндээл адли дуратай хүнби. Хаанашье ябахандаа хүзэглэгшэдэй бүхы бүлгэмүүдые хургадаг байһан тухаймни – Христос Иисустай нэгэдэһэн ажамидаралдаа баримталдаг юумэнүүд тухаймни таанадта тэрэ һануулха.

¹⁸Таанадые би эрьежэ ошохогүйб гэжэ бодон заримантнай хамараа үргэшэбэ.

¹⁹Гэбэшье Дээдын Эзэнэй үршөөбэл би һаядаа таанадта ошохооб, тиигээд тэрэ хамараа үргэһэн зоной хэлэһэн юумэнүүдыень бэшэ, харин хүсыень туршажа мэдэхэб.

²⁰Ушарынь гэхэдэ, Бурханай хаан орондо үгэнүүд бэшэ, харин хүр хүсэн шухала юм.

²¹Минии таанадта ташууртай ерэхыемни хүсэнэ гүт, али энхэргэн зөөлэн, хайра дурын хүлдэтэй ерэхыемни хүлээнэ гүт?

Коринфынхидтэ 1-дэхи 5

Таанадай дунда забхай зон байха ёһогүй

¹Таанадай дунда забхай зальхай ябадал тохёолдоно, нэгэнтнай хойто эхэтэйгээ орёолдоно гэһэн һураг минии һонорто хүрэбэ. Тиимэ бузар забхайралга бусад арадуудайшье дунда дуулдаагүй юм байна.

²Харин тийхэдэ таанад омогорхолдобот! Орондонь таанад уйдаха гашуудаха байгаат, тиймэ бузар юумэ хэһэн хүниие өөһэдһөө холодуулха ёһотой байгаат.

³⁻⁵Танай хажууда байгаагүйшье хаа, ханал бодолоороо таанадтай хамта байнаб. Тийгээд таанадтай хамта байһан мэтэл би манай Дээдын Эзэн Иисус Христосой нэрээр тэрэ бузар булай юумэ хэһэн хүниие гэмнэбэб. Таанад суглархадаа, ханал бодолоороо тантай байхадамни, манай Дээдын Эзэн Иисусай хүр хүсэнэй маанадтай оршохо сагта тэрэ бузар булайе сатанада гардуулан, махабад бэеыень хүнөөлгэхэ ёһотойт. Тийгэжэ тэрэ хүнэй хүнэһэ хүлдэ Дээдын Эзэнэй ерэхэ Үдэр абарагдаха.

⁶Таанадай омогорхолдожо байһантнай буруу. Багахан эһээбэри бүхы эдьхүүр эһээдэг гэдэгые таанад мэдэхэгүй аалта?

⁷Таанад шэнэ эдьхүүр байхын тула хуушан нүгэлтэ эһээбэриһээ өөһэдыгөө арилгагты. Тийгэбэшье таанад эһээбэригүй арюунта, юундэб гэбэл, манай Паасхын хурьган болохо Христос тахил болгон үргэгдэһэн байгаа ха юм.

⁸Паасхынгаа һайндэрые нүгэл шэбэлтэй ба худал хуурмагтай хуушан эһээбэреэр эдьхэһэн хилээмэнтэй бэшэ, харин ямаршье эһээбэригүй, арюун сэбэр, үнэн зүб хилээмэтэйгээр тэмдэглэе.

⁹Забхай зоноор бү харилсагты гэжэ би бэшэг соогоо бэшээ һэнби.

¹⁰Зүгөөр, юрэнь забхай, алта мүнгэндэ шунаһан зоноор, дээрмэшэдээр, онгонуудта шүтэдэг зоноор огто бү харилсагты гэһэн удхаар бү ойлгооройт, тэдэ зонһоо зугадабал таанад энэ дэлхэйһээ огто гаража ошохо байгаат.

¹¹Харин өөрыгөө Христосто хүзэглэдэг хүн гэжэ нэрлэжэ байһан мүртөө забхай ябадалтай, али алта мүнгэндэ шунахай, али онгонуудта шүтэдэг, али хорон хэлэтэй, али архинша, али хулгайшан зонтой бү

харилсагты гэхэн удхатайгаар бэшэһэн байгааб. Тиимэ хүнүүдээр хамта хоолшые эдихэ хэрэггүй.

12-13 Гаднын хүнүүдые гэмнээд яахабиб даа. Бурхан тэдэниие шиидхэхэ. Харин өөһэдынгөө бүлэгэй хүнүүдые бидэ зэмэлхэ ёһотойбди. «Өөһэдыгөө нүгэл үйлэдэдэг хүнһөө арилгагты», – гэжэ Нангин Бэшэг соо бэшээтэй ха юм.

Коринфынхидтэ 1-дэхи 6

Һүзэглэгшэд хоорондоо заргалдаха ёһогүй

1 Та һүзэглэгшэд хоорондоо заргалдахадаа, яахадаа Бурханай хүнүүдтэ ошонгүй, харин һүзэггүй зоноор заргаяа шиидхүүлнэ гээшэбта?

2 Бурханай хүнүүд энэ дэлхэйн зоние шиидхэхэ юм гэжэ таанад мэдэхгүй аалта? Хэрбээ таанад энэ дэлхэйн зоние шиидхэхэ ушартай юм болбол, жэжэ асуудалнуудаар шиидхэбэри гаргаха аргагүй аалта?

3 Бидэ Бурханай Эльгээмэлнүүдтэ шиидхэбэри гаргахабди гэжэ таанад мэдэхгүй аалта? Тиихэдэ энэ дэлхэйн хэрэгүүдые бүришые бэлээр шиидхэхэ бэшэ аалта?

4 Харин таанад заргалдаанай хэрэгүүдые шиидхэхэдэ һүзэглэгшэдэй бүлгэмдэ ямаршые нэрэ хүндгүй хүниие яахадаа заргашанаар табижа, тэрээндэ заргаяа үргэнэбта?

5 Ай, эшхэбтэр юумэ байна! һүзэглэгшэдэй хоорондохи арсалдаае шиидхэхэ аргатай сэсэн ухаантай нэгэшые хүн таанадай дунда олдбогүй гээшэ гү?

6 Харин тиихэдэ һүзэглэгшэ хүн һүзэглэгшэ аха дүүгэйнгээ урдаһаа зарга барижа, үшөө тиихэдэ һүзэггүй зоноор асуудалаа шиидхүүлжэ байна.

7 Хоорондоо заргалдаһан ушартнай таанадай илагдаһые харуулна. Гомдохуулһан, мэхэлүүлһэн байбалтнай дээрэ байха бэшэ һэн гү?



⁸Тиигэхын орондо таанад өөһэдөө бэе бээ, хүзэглэгшэ аха дүүнэрээ гомдохоонот, мэхэлнэт.

⁹Харата хэрэг үйлэдэгшэд Бурханай хаан ороние залгамжалхагүй юм гэжэ таанад мэдэхгүй аалта? Бү эндүүрэгты: забхайралдагшадшье, онгонуудта шүтэгшэдшье, нүхэртөө, али эхэнэртээ урбагшадшье, эрэшүүлтэй гүйлдэдэг эрэ хүнүүдшье,

¹⁰хулгайшадшье, алта мүнгэндэ шунагшадшье, архиншадшье, хардагшадшье, мэхэшэдшье, эдэнэй али нэгэньшье Бурханай хаан ороние залгамжалхагүй.

¹¹Танай заримантнай урдань тиимэл нүгэлтэн байһан юм. Гэхэдээ таанад нүгэлнүүдһээ арилгагдаһан, Бурханда зорюулагдаһан, Дээдын Эзэн Иисус Христосой ба манай Бурханай хүлдын ашаар Бурханай урда сагааруулагдаһан байгаат.

Дээдын Эзэндэ зорюулһан бэе тухай

¹²Бидэ ямаршье юумэ хэхэ эрхэтэйбди гэжэ зарим хүнүүд хэлэхэ, гэхэтэй зэргэ бүхы юумэн таанадта аша туһатай бэшэ юм. Би ямаршье юумэ хэхэ эрхэтэйб гэжэ хэлэхэб, гэхэтэй сасуу би алишье юумэнэй барлагынь болохогүйб.

¹³Эдее хоол ходоододол орохын тула байдаг, харин ходоодо хоол барихын тула байдаг юм гэжэ зарим хүнүүд хэлэхэ. Гэхэдэ Бурхан али алиниеньшье үгы болгохо. Махабад бэе ташаяан хурисалай тулада бүтээгдээ бэшэ, харин Дээдын Эзэндэ алба хэхээр бүтээгдэһэн юм, тон тиигэжэл Дээдын Эзэншье махабад бэеые хаража анхаржа байдаг юм.

¹⁴Бурхан Дээдын Эзэниие амидыруулаа, тиин бидэниешье хүр хүсөөрөө амидыруулха.

¹⁵Танай махабад бэе Христосой бэеын хэхэгынь юм гэжэ таанад мэдэхгүй аалта? Тиихэдээ би Христосой бэеын хэхэгы абажа, янханай бэеын хэхэг болгохо аалби? Үгыл даа!

¹⁶Янхан эмэтэй ниилэлэн хүн тэрээнтэй нэгэ бэе болоно гэжэ таанад мэдэхэгүй аалта? «Хоёр хүн нэгэ бэе болохо», – гэжэ Нангин Бэшэг соо элеэр бэшээтэй ха юм.

¹⁷Харин Дээдын Эзэнтэй ниилэлэн хүн хүнэлэ хүлдөөрөө тэрээнтэй нэгэдэдэг юм.

¹⁸Ташаяан хурисалһаа зайсажа байгты. Хүнэй үйлэдэдэг бусад нүгэлнүүд махабад бэеые ехэ гэмдэ орууладаггүй юм, харин янхаржа байһан хүн өөрынгөө бэеые ехэл гэмдэ оруулна гээшэ.

¹⁹Танай махабад бэе зосоотнай оршодог Бурханһаа таанадта үгтэлэн Нангин хүлдын хүмэ юм гэжэ таанад мэдэхэгүй аалта? Таанад өөһэдэньгөө дураар бэшэт, таанад Бурханай мэдэлдэ байнат.

²⁰Бурхан таанадые үнэтэй сэнгээр худалдажа абаа. Тиимэлээ махабад бэеэрээ Бурхание алдаршуулжа байгты.

Коринфынхидтэ 1-дэхи 7

Гэрлэлгэ тухай

¹Таанадай намда бэшэлэн юумэн тухай хэлэбэл, эрэ хүнэй һамга абаагүй һаань һайн юм.

²Гэхэтэй сасуу ташаяан хурисалһаа бэеэ һэргылхын тула хүн бүхэн һамгантай байха, эхэнэр хүн нүхэртэй байха ёһотой.

³Эрэ хүн һамганайнгаа урда өөрынгөө уялга гүйсэд дүүргэхэ албатай, тиин эхэнэр хүншые нүхэрэйнгөө урда өөрынгөө уялга гүйсэд дүүргэхэ албатай юм.

⁴Эхэнэр хүн өөрынгөө бэеын эзэн бэшэ, нүхэрынь һамганайнгаа бэеын эзэн гээшэ, тон тиигэжэл эрэ хүн өөрынгөө бэеын эзэн бэшэ, һамганиинь нүхэрэйнгөө бэеын эзэн гээшэ.

⁵Бэе бээтэйгээ инаглан харилсажа байгты, зальбаржа сагаа үнгэргэхэ гэжэ хоюулан зүбшэлэн сагтаа инаглан харилсахаяа болигты, тиигээд

бэеэ барижа шадахагүй байхадатнай сатанагай таанадые хорхойтуулхагүйн тула дахин бэе бээдээ няалдагты.

⁶Энээниие би таанадта заабаришална бэшэб, харин зүбшөөрэн хэлэнэб.

⁷Хүн бүхэн намдал адли хамгагүй байһай гэжэ би хүсэнэб, гэхэтэй сасуу хүн бүхэн Бурханһаа өөрын тусгай абьяас бэлигтэй юм, нэгэ хүн иимэ абьяастай, нүгөө хүн тиимэ абьяастай гээшэ.

⁸Намдал адли саашадаа гансаараа байбалтнай хайн гэжэ би гэрлээгүй хүнүүдтэ, бэлбэһэн хүнүүдтэ хэлэхэ байнаб.

⁹Харин тэдэ хүнүүдэй бэеэ бариха аргагүй байбал, гэрлэгты гэжэ хэлэхэ байнаб. Хүсэлэнгөөр бэеэ туляахын орондо гэрлэһэниинь дээрэ юм.

¹⁰Гэрлэһэн хүнүүдтэ өөрһөө бэшэ, харин Дээдын Эзэнһээ иимэ заабари буулганаб: эхэнэр хүн нүхэрһөө халаха ёһогүй.

¹¹Хэрбээ нүхэрһөө халабал, дахин хадамда гараха ёһогүй, али үгы хаа нүхэртэйгөө эблэрхэ ёһотой. Эрэ хүн хамгаяа орхихо ёһогүй.

¹²Бусад зондо өөрһөөн (Дээдын Эзэнэй заабари бэшэ) хэлэхэ байнаб: Христосто хүзэглэдэг хүн хүзэггүй хамгантай байбал, тэрэ хамганайнь нүхэртэйгөө һууха дуратай байбал, нүхэрынь тэрэ хамгаяа орхихо ёһогүй.

¹³Тон тиигэжэл Христосто хүзэглэдэг эхэнэр хүзэггүй нүхэртэй байгаад, тэрэ нүхэрэйн хамгантайгаа һууха дуратай байбал, тэрэ эхэнэр нүхэрөө орхихо ёһогүй.

¹⁴Юундэб гэхэдэ, хүзэглэдэггүй эрэ хүзэглэдэг хамганайнгаа ашаар арюудхагдана, тон тиигэжэл хүзэглэдэггүй эхэнэр хүзэглэдэг нүхэрэйнгөө ашаар Бурханай урда арюудхагдана гээшэ. Тиигээгүй хаа, тэдэнэй үхибүүдын сэбэр бэшэ байха һэн, үнэндөө болбол тэдэ үхибүүд Бурханай урда арюун сэбэр юм.

¹⁵Хүзэглэдэггүй хүн хүзэглэдэг ханиһаан халаха хүсэлтэй байбал, халаг лэ. Тиимэ ушарта хүзэглэдэг ханинь, эхэнэршье хүн байг, эрэшье

хүн байг, дураараа болог. Бурхан бидэниие энхэ тайбан ажамидархымнай түлөө дуудаа юм.

¹⁶Христосто хүзэглэдэг эхэнэр, нүхэрөө абарха магадгүй байһанаа ши мэдэхэ аалши? Али Христосто хүзэглэдэг эрэ, һамганаа абарха магадгүй байһанаа ши мэдэхэ аалши?

¹⁷Дээдын Эзэнэй табилангаар лэ хүн бүхэнтнай ажамидаржа байг лэ, Бурханай таанадые дуудахада ямар байгаа һэмта, тиимээрээл үлөөрэйгты. Тиигэжэл би бүхы хүзэглэгшэдэй бүлгэмүүдтэ заабаришалжа байдагби.

¹⁸Бэлгээ отолуулһан хүниие Бурханай дуудабалнь, тэрэ хүн отолуулһан мүнүүдээ зайлуулха гэжэ бү оролдог лэ, отолуулаагүй хүниие Бурханай дуудабалнь, тэрэ хүн отолуулха ёһогүй.

¹⁹Отолуулһан байна гү, али отолуулаагүй гү, ямаршые илгаагүй юм, гансал Бурханай захяа заабаринуудые дүүргэжэ байһаниинь шухала юм.

²⁰Бурханай таанадые дуудахада ямар байдалтай һэмта, тэрэл хэбээрээ хүн бүхэнтнай үлэхэ ёһотой.

²¹Бурханай дуудахада барлаг байһан хүн һанаагаа бү зобоорой. Хэрбээ эрхэ сүлөөтэй болохо аргатай байбал, тэрэ арга боломжоёо ашаглаарай.

²²Юундэб гэхэдэ, Дээдын Эзэнээр дуудуулагдаһан барлаг Дээдын Эзэнэй эрхэ сүлөөтэй хүниинь гээшэ, тон тиигэжэл Христосоор дуудуулагдаһан эрхэ сүлөөтэй хүн тэрэнэй барлагынь гээшэ.

²³Бурхан таанадые худалдажа абаа юм, тиимэһээ хүнүүдэй барлагууд бү бологты.

²⁴Аха дүүнэр, Бурханай таанадые дуудахада ямар байгаа һэмта, тэрэл хэбээрээ хүн бүхэнтнай Бурханай урда үлэхэ ёһотой.

Гэрлээгүй зон тухай



²⁵Хадамда гараагүй басагадай талаар Дээдын Эзэнһээ намда ямаршые заабари үгтөөгүй, гэхэтэй сасуу Дээдын Эзэнэй үршөөл хайраар найдабаритай байһан хубидаа би өөрынгөө һанал бодолоор таанадтай хубаалсаха һанаатайб.

²⁶Энэ бэрхэшээлтэй байдалай талаар бодоходоо, хүн ямар байгаа, тиигээд лэ байбалнь дээрэ гэжэ бодоноб.

²⁷Һамгатай һаа, тэрээнһээ һалаха шалтагаа бү бэдэрэ. Һамгагүй байгаа һаа, һамга бү бэдэрэ.

²⁸Һамга абаашье һаа, ши нүгэл шэбэлдэ унахагүйш, хадамгүй басаганшые хадамда гарабал, нүгэл шэбэлдэ унахагүй. Гэрлэһэн хүнүүдтэ үдэр бүхэн бэрхэшээлнүүд тулгардаг юм, тиин би таанадые тэдэ бэрхэшээлнүүдһээ һэргылнэб.

²⁹Аха дүүнэр, би таанадта иимэ удхатайгаар хэлэнэб: саг багал үлэжэ байна, тиимэһээ гэрлэһэн хүнүүд гэрлээгүй хүнүүдтэл адли ажамидарха ёһотой.

³⁰Уйлажа байһан хүнүүд гашуудал амсаагүй хүнүүдтэл адляар, баярлажа байһан хүнүүд жаргал амсаагүй хүнүүдтэл адляар, юумэ худалдажа абаһан хүнүүд зөөри зөөшэгүй хүнүүдтэл адляар ажамидарха ёһотой.

³¹Энэ дэлхэйн баялигуудые ашаглажа хэрэглэжэ байһан хүнүүд энэ дэлхэйн баялигуудта шуналгүй хүнүүдтэл адляар ажамидарха ёһотой, юундэб гэхэдэ, оршон үеын хүнэхэ сагынь ойртожо байна.

³²Ямаршые тухашаралгүй амидарһайт гэжэ таанадта хүсэнэб. Гэрлээгүй хүн Дээдын Эзэндэ һайшаагдаха гэжэ Дээдын Эзэнэй ажалда бүхы һанал бодолоо хандуулдаг.

³³Харин гэрлэһэн хүн эхэнэртээ һайшаагдахын тула энэ дэлхэйн юумэнүүдтэ һанаагаа табидаг,



³⁴Тиигэжэ тэрэ хоёр ондоо тээшээ татагдадаг юм. Хадамда гараагүй эхэнэр гү, али басаган бээе, хүнэһэ хүлдээе дууһан Дээдын Эзэндэ зорюулжа, хамаг һаналаа Дээдын Эзэнэй ажалда хандуулдаг. Харин хадамда гараһан эхэнэр нүхэртөө һайшаагдахын тула энэ дэлхэйн юумэнүүдтэ һаналаа табидаг.

³⁵Таанадые дарамталха зорилготойгоор бэшэ, харин үнэн зүб ба хэрэгтэй юумые дүүргэжэ, өөһэдыгөө Дээдын Эзэндэ гүйсэд зорюулан алба хэһыетнай хүсэн, танай аша туһада би эдэ бүгэдые таанадта хэлэнэ гээшэб.

³⁶Гэрлэхэб гэжэ үгөө үгэһэн хүн һамганиинь болохо басаганайнгаа энэ һаһандаа хадамгүй байхань аягүй гэжэ тоолоод, заабол гэрлэхэ хэрэгтэй гэжэ бодобол, өөрынгөө дураар болог. һамга абахадаа, тэрэ хүн ямаршые нүгэл хэнэгүй.

³⁷Харин тиимэ юумэ хэхэ ямаршые хашалтагүйгөөр һамга абахагүйб гэжэ досоогоо хатуугаар шиидэһэн, өөрынгөө хүсэлые гүйсэд мэдэлдээ абаһан, юу хэхэеэ һанал бодолдоо шиидээд байһан эрэ хүндэ һамга абангүй байбалнь һайн юм.

³⁸Тиимэһээ гэрлэхэ басагаяа һамга абаһан хүн һайн юумэ хэнэ, гэхэтэй сасуу һамга абаагүй хүн бүришые һайн юумэ хэнэ гээшэ.

³⁹Хадамтай эхэнэр нүхэрэйнгөө элүүр мэндэ байха сагта нүхэртэйгөө холбоотой юм. Харин нүхэрэйнь нүгшэбэл, тэрэ эхэнэр сүлөөтэй боложо, дуратай хүндөө дахин хадамда гараха эрхэтэй, гэхэтэй сасуу тэрэ хүниинь заабол Христосто хүзэглэдэг хүн байха ёһотой.

⁴⁰Хэрбээ тэрэ эхэнэр дахин хадамда гарангүй байбал бүри жаргалтай гээшэ. Энэ миниил һанал юм, гэхэдэ бишые баһа Бурханай хүлдэтэй байнаб гэжэ өөр тухайгаа бодоноб.

Коринфынхидтэ 1-дэхи 8

Онгонуудта үргэгдэһэн хоол тухай

- ¹Мүнөө таанадай бэшэһэн онгонуудта үргэгдэһэн эдээн тухай хөөрэлдэе. Бидэ булта мэдэлгэтэйбди гэжэ тэдэнэй хэлээшэ үнэн зүб юм. Гэхэдэ тиимэ мэдэлгэ хүниие омог бардам болгодог, харин хайра дуран бэхижүүлдэг юм.
- ²Ехэ юумэ мэдэнэб гэжэ бодоһон хүн үнэндөө болбол юушые мэдэдэггүй.
- ³Тиихэдэ Бурханда дуратай хүниие Бурхан мэдэхэ юм.
- ⁴Онгонуудта үргэгдэһэн хоол бариха тухай хэлэбэл, онгонууд юуншые бэшэ, гансал ори ганса Бурхан бии юм гэжэ бидэ мэдэнэбди.
- ⁵Тэнгэри дээрэ гү, али газар дээрэ бурхад гэжэ нэрлэгдэдэг юумэнүүдэй байбашье, олон түрэлэй бурхадай, эзэдэй байбашье,
- ⁶бидэндэ ори гансал Эсэгэ Бурхан, ори ганса Эзэн Иисус Христос бии юм. Эсэгэ Бурхан бүхы юумые бүтээһэн байгаа, бидэ тэрэнэй түлөө ажамидарнабди; бүхы юумэн Дээдын Эзэн Иисус Христосой ашаар бүтээгдэһэн байгаа, бидэ тэрэнэй ашаар ажамидарнабди.
- ⁷Энэ үнэн юумые зарим зон мэдэдэггүй. Зарим хүнүүд мүнөө болотор онгонуудта үргэгдэһэн хоол эдихые онгонуудые тахиһантай адляар урдынхяараа бододог. Тиин тэрэ эдээ амсан, ахир нула һэшхэлээ бузарлуулдаг.
- ⁸Эдээ хоол бидэниие Бурханда ойртуулдаггүй юм, тиимэхээ тэрэ эдээ амсаагүй һаа, бидэ юушые алдахагүйбди, тэрэ эдээ амсаһан байбал, бидэ юушые олохогүйбди.
- ⁹Гэхэтэй сасуу танай эрхэ сүлөөтнай ахир нула хүзэгтэй зониие нүгэлдэ бү оруулуужа.
- ¹⁰Тиимэ ахир нула хүзэгтэн онгонуудта шүтэдэг газарта юумэ мэдэрһэн шинии эдеэлжэ байхыешни хараад, онгонуудта үргэгдэһэн эдээ амсахаяа һанахагүй аал гэжэ бодоод үзыш.

¹¹Тиигэжэ мэдэлгэһээшни боложо ахир хүзэгтэй аха дүүшни хосорхол. Харин Христос тэрэнэй түлөө ами наһаяа үргэһэн байгаа ха юм.

¹²Тиигэжэ таанад хүзэглэгшэ аха дүүгэйнгээ урда нүгэл абахадаа, ахир нула һэшхэлыень доро даража, Христосой урда нүгэл хэнэ гэшэт.

¹³Тиимэхээ эдее хоол аха дүүемни нүгэлдэ оруулха байбал, аха дүүгээ нүгэлдэ оруулхагүйн тула би дахин хэзээшье мяха эдихэгүйб.

Коринфынхидтэ 1-дэхи 9

Элшэнэрэй эрхэ тухай

¹Би эрхэ сүлөөтэй хүн бэшэ аалби? Би элшэн бэшэ аалби? Манай Дээдын Эзэн Иисус Христосые би хараа бэшэ аалби? Таанад Дээдын Эзэнэй түлөө ажалһанаймни үрэ дүн бэшэ аалта?

²Бусад зон намайе элшэн гэжэ тоолоогүйшье һаа, таанадта би элшэн гэшэб, юундэб гэхэдэ, танай ажамидарал Дээдын Эзэнэй элшэн байһыемни батална.

³Хүнүүдэй намайе шүүмжэлхэдэ би иигэжэ өөрыгөө хамгаалдагби:

⁴Али хэһэн ажалайнгаа түлөө бидэ эдихэ, уха эрхэгүй гэшэ гүбди?

⁵Али бусад элшэнэрые, Дээдын Эзэнэй дүүнэрые, Пётрые һажаан, хүзэглэгшэ һамгаяа замай хани болгон абажа ябаха эрхэгүй аалди?

⁶Али гансал Варнава бидэ хоёр ажамидархын тула ажаллаха ёһотой гэшэ гүбди?

⁷Сэрэгшэд өөһэдынгөө түлөө түлэжэ алба хэдэг аал? Али үзэм тарилгашан өөрынгөө сэсэрлигэй үзэмһөө амсадаггүй аал? хүрэг малаа адуулдаг ямар хүн малайнгаа хүнһөө уудаггүйб?

⁸Эдэ юрын жэшээнүүдээр би өөрыгөө хизаарлахагүйб, Хуули соошье баһал тиимэ юумэнүүд тухай хэлэгдэнэ.

⁹«Галха тарья хадажа байһан сарай эдихэдэнь һаалта бү хэ», – гээд Моисейн Хуули соо бэшээтэй байдаг. Бурхан сарнуудта һанаагаа зобоно гээшэ гү?

¹⁰Али үнэндөө бидэниие бодожо хэлэнэ гээшэ гү? Зүб даа, энэ бидэндэ зорюулан бэшээтэй. Хахалжа, али хадажа байһан алишые хүн хүдэлмэрийн гөө эсэстэнь хубияа абаха найдалтайгаар лэ ажаллаха ёһотой юм.

¹¹Бидэ таанад соо оюун сэдхэлэй үрэнэ тариһан байгаа бди. Тиигээд харюудань таанадһаа энэ дэлхэйн юумэнүүдые абалнай буруу хэрэг гээшэ гү?

¹²Хэрбээ бусад зоной таанадһаа түлөөһэ хүлээхэ эрхэтэй байхадань, бидэ бүришые ехэ эрхэтэй бэшэ аалди? Тиигэбэшье бидэ энэ эрхээ хэрэглээгүй бди. Орондонь бидэ Христос тухай һайн Мэдээсэл ямаршые уршаг бэрхэшээлгүй тараахын тула бүхы юумые тэсэбэритэйгээр дабана бди.

¹³Һүмэдэ алба хэгшэдэй һүмэһөө эдэе хоолоо олодогые, тиин тахилай газарта ажаллагшадай тахилай юумэнһээ хубаалсажа абадагые таанад мэдэхэгүй аалта?

¹⁴Тон тиигэжэл номнолгоороо хоолойгоо тэжээжэ байхыень Дээдын Эзэн һайн Мэдээсэл номногшодто захираа юм.

¹⁵Гэхэтэй зэргэ би энэ дурдаһан эрхэнүүдээ нэгэтэшые хэрэглээгүй һэнби, тиин эрхээ мэдүүлхын тулашые энэ бүхэниие мүнөө бэшэнэ бэшэб. Тиигээ һаа, үхэбэлни дээрэ. Хэншые минии хүлһөөрөө олоһон магтаалые хоһон үгэ болгожо шадахагүй.

¹⁶Тиигээдшые гансал һайн Мэдээсэлые номножо байһанаараа би омогорхохо эрхэгүйб. Энэ минии уялга юм. һайн Мэдээсэлые номноогүй һаа, гай гашуудал толгой дээрэмни буухал.

¹⁷Хэрбээ би ажалаа һайн дураараа хэжэ байбал, шагналда хүртэхэ байгаа бди; гэхэдэ би Бурханай намда даалгаһан албые дүүргэжэ байна бди.



¹⁸Тиихэдээ би ямар шагналда хүртэхэбиб? Түлөөхэгүйгөөр хайн Мэдээсэл номножо байһамни, номногшынгоо эрхэнүүдые мэдүүлэнгүй ажаллажа байһамни минии шагнал гээшэ.

¹⁹Эрхэ сүлөөтэй хүн байһан аад, би боломжоороо олон хүнүүдые олохын тула өөрыгөө хүн бүхэнэй барлаг болгооб.

²⁰Иудейнүүдтэй байхадаа, би иудейнүүдые татахын тула иудейнүүдтэл адляар өөрыгөө абажа ябааб. Би өөрөө Моисейн Хуулийн мэдэлдэ бэшэшье хаа, тэрэ Хуулийн мэдэлдэ байһан хүнүүдые татахын тула өөрөө тэрэ Хуулийн мэдэлдэ байһанда адляар ажамидаржа байгаааб.

²¹Хуулигүй бусад арадуудай дунда байхадаа, би тэдэниие татахын тула Хуулигүй бусад арадай түлөөлэгшэдэл адляар байгаааб. Тиихэдээ би Бурханай Хуулийн мэдэлһээ гараагүйб, Христосой Хуули баримталжа байгаааб.

²²Ахир хүзэгтэй зоной дунда байхадаа, тэдэниие татахын тула ахир хүзэгтэнүүдэй нэгэниинь шэнги болоод ябааб. Хүнүүдэй заримыеньшье шадаха зэргээрээ абархын тула би бүхы хүнүүдтэ бүхы юумэн болоһон байгаааб.

²³Эдэ бүгэдые би хайн Мэдээсэлэй түлөө, тэрэнэй буян хэшэгыг хубаалсахын түлөө хэжэ байгаааб.

²⁴Урилдаанда хабаадалсагшадай бултанайнь нэгэниинь лэ шагналда хүртэдэг юм гэжэ таанад хайн мэдэнэт. Тиимэхээ шагналда хүртэхын тула гүйгты.

²⁵Урилдагшад мүнхэ оршодоггүй титимээр титимнүүлхын түлөө бултадаа хатуу журам баримталдаг, харин бидэ мүнхэдөө оршодог шагналай түлөө урилдана гээшэбди.

²⁶Тиимэхээ би зорилгодоо хүрэхын тула сэхэ гүйнэб, тиимэхээ би хүсээ дэмы бууруулдаггүй барилдаашан мэтэ барилданаб.

²⁷Бусад зондо номножо байгаад, өөрөө хаһуулхагүйн тула бэеэ ехээр хоризо, дадаажа, бүрин мэдэлдээ оруулнаб.

Коринфынхидтэ 1-дэхи 10

Маанадта үгтэһэн һэргылэмжэ тухай

¹Аха дүүнэр, Моисейе дахажа ябаһан үбгэ эсэгэнэртэймнай юунэй болоһые би таанадта һануулха һанаатайб. Тэдэниие бултыень үүлэн хамгаалжа ябаа, тэдэнэр бултадаа Улаан далайе аюулгүй гаталһан байгаа.

²Үүлэн соо, далай соо тэдэнэр Моисейтэй нэгэдэн «уһаар арьудхагдаһан» байгаа.

³Тэдэнэр булта нэгэ адли гайхамшагтай эдее эдижэ,

⁴нэгэ адли гайхамшагтай унда уужа байгаа һэн. Тэдэнтэй хамта ябаһан гайхамшагтай хабсагайһаа тэдэ уужа байгаа. Тэрэ хабсагай болбол Христос өөрөө байһан юм.

⁵Тиигэбэшье тэдэнэй олониинь Бурханда һайшаагдаагүй, тиимэһээ тэдэнэр сүл губида хосорһон байгаа.

⁶Үбгэ эсэгэнэрэйнгээ нүгэлтэ ябадалнуудые дабтаха дураа хүрэхэгүйн тула эдэ бүхэн бидэндэ һэргылэмжэ болоо.

⁷Тэдэнэй зариманиие һажаажа онгонуудта бү шүтэгты. «Хүн зон эдихэ, уухаяа һууба, найрлажа нааршаажа оробо», – гэжэ Нангин Бэшэг соо бэшээтэй байдаг.

⁸Тэдэнэй зариманиинь янхараад, нэгэ үдэр соо хорин гурбан мянган хүн үхэхэн байгаа. Тиимэһээ бидэ тэдэндэл адли янхарха ёһогүйбди.

⁹Тэдэнэй зариманиинь Дээдын Эзэниие туршаад, хорото могойнуудта хадхуулан үхэхэн байгаа. Тиимэһээ бидэ тэдэндэл адли Дээдын Эзэниие туршаха ёһогүйбди.

¹⁰Тэдэнэй зариманиинь гэмэрэлдээд, Үхэлэй Эльгээмэлээр амья хүнөөлгэһэн байгаа. Тиимэхээ бидэ тэдэндэл адли гэмэрэлдэхэ ёһогүйбди.

¹¹Тэдэ юумэнүүд бусад зоние һэргылхын тула үбгэ эсэгэнэртэймнай тохёолдоһон байгаа, тиин бүхы юумэнэй эсэсэйнь ерэхэ сагта ажамидарһан бидэниие һэргылхын тула бэшэгдэһэн байгаа.

¹²Тиимэхээ батаар зогсоноб гэжэ өөр тухайгаа бодожо байһан хүн унашахагүйн тула болгоомжотой байг.

¹³Таанадай дабаһан ямаршые туршалганууд юрэ хүнүүдтэ тулгардаг юумэнүүд юм. Гэхэтэй сасуу Бурхан амалһан юумээ дүүргэжэ, даахын аргагүй туршалгануудые таанадта тулгаруулхагүй, тиигээд туршахадаа, тэсэжэ гараха хүсэ шадал таанадта үгэхэ юм.

Онгонуудта бү шүтэгты

¹⁴Тиимэхээ, инаг хайрата аха дүүнэрни, онгонуудта шүтэхэхөө зайсажа байгты.

¹⁵Би таанадые бодомжолхо аргатай хүнүүд гэжэ тоолон хэлэнэб, тиимэхээ хэлэһэн юумэнүүд тухаймни өөһэдөө бодооройгты.

¹⁶Бурханда баяр хүргэдэг, тэрэнэй үхэлые дурасаһан аягаһаа уухадаа, бидэ Христосой шуһанда хабаатай болонобди. Хилээмэ хухалаад эдихэдээ, бидэ Христосой бээдэ хабаатай болонобди.

¹⁷Хилээмэн ори ганса юм, тиимэхээ ори ганса хилээмэ хубаалсажа байхадаа, бидэ олоороо ганса бэе гээшэбди.

¹⁸Үргэлэй юумые эдижэ байһан израильшууд тухай бодоод үзэгты, тэдэнэр үргэлэй газарта Бурханда алба хэхэдэ хабаадалсана бэшэ гү?

¹⁹Онгонууд гү, али онгонуудта үргэгдэһэн юумэнүүд үнэндөө ямар нэгэн ушартай юм гэжэ хэлэхэ ханаатай гээшэ гүб?

²⁰Үгыл даа, бусад арадуудай онгонуудта үргэдэг юумэнүүд Бурханда бэшэ, харин ада шүдхэрнүүдтэ зорюулаатай юм гэжэ би хэлэхэ

hanaатай байнаб. Тиимэхээ таанадай ада шүдхэрнүүдтэй нэгэдэхые хүсэнэгүйб.

²¹Таанад Дээдын Эзэнэй аягаһаа ба ада шүдхэрэй аягаһаа нэгэ зэргэ уужа шадахагүйт, таанад Дээдын Эзэнэй шэрээдэ ба ада шүдхэрэй шэрээдэ нэгэ зэргэ хоол барижа шадахагүйт.

²²Али бидэ Дээдын Эзэнэй уур сухал хүргэхэмнай гээшэ гү? Өөһэдыгөө тэрээнһээ хүсэтэйбди гэжэ тоолоно гүбди?

Һүзэглэгшэдэй эрхэ сүлөө тухай

²³Бидэ ямаршые юумэ хэхэ эрхэтэйбди гэжэ зарим хүнүүд хэлэдэг, гэхэтэй сасуу бүхы юумэн хайн бэшэ юм. «Бидэ ямаршые юумэ хэхэ эрхэтэйбди», гэхэтэй сасуу бүхы юумэн аша туһатай бэшэ юм.

²⁴Нэгэнтнайшые өөрынгөө хайн хайханай түлөө бү оролдог, харин бусадай хайн хайханай түлөө оролдожо байг.

²⁵Худалдаа наймаанай газарһаа абаһан ямаршые юумэн тухайгаа ханаагаа зобонгүй, асуултагүйгөөр эдижэ байгты.

²⁶«Газар дэлхэй болон дээрэнһ байһан бүхы юумэнүүд Дээдын Эзэнэй юм», – гэжэ Нангин Бэшэг соо бэшээтэй ха юм.

²⁷Хэрбээ һүзэглэдэггүй хүнэй таанадые урихада, таанад ошохо гэжэ шиидэбэл, ханаагаа зобонгүй, ямаршые асуултагүйгөөр урдатнай табиһан бүхы юумэнүүдые эдижэ байгты.

²⁸Харин хэн нэгэнэй: «Энэ эдеэн онгонуудта үргэгдэһэн юм», – гэжэ таанадта хэлэбэлһ, тэрэ хэлэһэн хүнэй аша туһада, бусадай ханаае зобохогүйн тула тэрэ эдеэнһээ бү амсаарайт.

²⁹Би танай һэшхэл тухай бэшэ, харин бусад зоной һэшхэл тухай бодон хэлэнэб. Минии эрхэ сүлөө бусад зоной һэшхэлээр бү шүүмжэлэгдэһээ гэжэ хүсэнэб.

³⁰Хэрбээ үгтэһэн эдеэ хоолой түлөө Бурханда баяраа хүргэбэлһи, баяр хүргэһэн эдеэ хоолоймни түлөө яахадаа намайе хүн шүүмжэлхэ юм?

³¹Тиихэдээ эдинэ гүт, али ууна гүт, али ямаршьеб даа ондоо юумэ хэнэ гүт, бүхы юумые Бурханай алдарай түлөө хэжэ байгты.

³²Иудейнүүдтэшье, бусад арадай зондошье, Бурханай хүзэглэгшэдэй бүлгэмдэшье ямаршье гомдохол түрүүлэнгүй ажамидарагты.

³³Ямаршье юумэ хэхэдээ, би өөрынгөө хайн хайханай түлөө бэшэ, харин бүхы хүнүүдэй абарагдахын тула тэдэнэй хайн хайханай түлөө оролдодогби.

Коринфынхидтэ 1-дэхи 11

¹Христосые нажаажэ байһандамни адли таанад намайе нажаажэ байгты.

Бурхан бүхы юумэнэй толгойлогшо мүн

²Намайе ходо ханажа, таанадта дамжуулһан хургаалнуудыемни баримталжа байһанайтнай түлөө би таанадые магтанаб.

³Христос бүхы эрэшүүлэй толгойлогшо, нүхэр хамганайнгаа толгойлогшо, тиин Бурхан Христосой толгойлогшо байһые ойлгоһойт гэжэ хүсэнэб.

⁴Тиимэхээ толгой дээрээ юумэ табяад зальбарһан, али үгы хаа, Бурханай мэдээсэл элирүүлһэн алишье эрэ толгойгоо гутаана.

⁵Толгой дээрээ юумэ табингүй зальбарһан, али үгы хаа, Бурханай мэдээсэл элирүүлһэн алишье эхэнэр толгойгоо гутаана, юундэб гэхэдэ, тиимэ эхэнэрэй ба үһеэ хюһаһан эхэнэрэй хоорондо ямаршье илгаа үгы юм.

⁶Толгойгоо хушаха дурагүй эхэнэр үһеэ хюһажа хаяг. Тиигэжэ эхэнэр тайрагдаһан үһэтэй, али хюһагдаһан толгойтой ябахаяа эшэбэл, толгойгоо юумээр хушаг лэ.

⁷Эрэ хүн Бурханай дүрэ алдар харгажа байгаа хадаа толгойгоо хушангүй ябаха эрхэтэй. Тиихэдэ эхэнэр хүн нүхэрэйнгөө алдар харгана.



⁸Юундэб гэхэдэ, эрэ хүн эхэнэрһээ бүтээгдээгүй, харин эхэнэр хүн эрэ хүнһөө бүтээгдэһэн байгаа.

⁹Тиихэдэ эрэ хүн эхэнэрэй тула бэшэ, харин эхэнэр хүн эрэ хүнэй тулада бүтээгдэһэн байгаа.

¹⁰Энэ ушарһаа, үшөө тиихэдэ Бурханай Эльгээмэлнүүдһээ боложо эхэнэр хүн толгой дээрээ эрхэ засагай тэмдэгтэй байха ёһотой.

¹¹Дээдын Эзэнтэй нэгэдэһэн манай ажамидаралда эхэнэр хүн эрэ хүнһөө дулдыдана, эрэ хүн эхэнэр хүнһөө дулдыдана.

¹²Ушарынь юуб гэхэдэ, яажа эхэнэр хүн эрэ хүнһөө бүтээгдэһэн байгаа, тон тиигэжэл эрэ хүн эхэнэр хүнһөө түрэдэг юм, тиин бүхы юумэн Бурханһаа юм.

¹³Өөһэдөө бодожо үзыт, олон зоной дунда эхэнэр хүнэй толгойгоо хушангүй Бурханда зальбархань зохид аал?

¹⁴Эрэ хүн ута үһэ табихадаа, өөрыгөө гутаадаг гэжэ оршолон хургана бэшэ аал?

¹⁵Харин ута үһэн эхэнэрэй гоёолтонь болоно, толгойгоо хушахынь тула үгтэнэ.

¹⁶Хэн нэгэнэй энэ асуудалаар арсалдаха ханаатай байбал, бидэшье, Бурханай хүзэглэгшэдэй бүлгэмшье ондоо тиимэ ёһо заншал үгы юм гэжэ би хэлэхэ байнаб.

Үдэшын хоол

¹⁷Мүргэлдэ суглархадаа, таанад аша туһа хүргэхын орондо хоро хүргэнэт, тиимэһээ саашадахи заабаринуудые үгэхэдөө, би таанадые магтахагүйб.

¹⁸Нэн түрүүн, танай бүлгэм суглархадаа хоорондоо хубаарана гэжэ би дуулааб, нэгэ талаараа тиимэл байха гэжэ би бодоноб.

¹⁹Зүб, үнэн бодото хүнүүдэй элирүүлэгдэхын тула таанадай дунда элдэб ханал бодолнууд байха ёһотой.



²⁰Тиигэжэ бүлгэмөөрөө суглархадаа, таанад Дээдын Эзэнэй Үдэшын хоол тэмдэглэнэгүйт.

²¹Юундэб гэхэдэ, хүн бүхэнтнай бусадһаа түрүүн эдеэ хоолоо барина, тиимэһээ заримантнай үлэн хоһон үлэнэ, нүгөө заримантнай амаараа гаратар эдеэлээд, мэдээгээ алдатараа ууна.

²²Таанад эдижэ, уужа байхаар гэргүй юм гүт? Али таанад Бурханай хүзэглэгшэдэй бүлгэмые тоонгүй, дуталдаһан зоние доромжолно гүт? Энээн тухай юу гэхыемни хүлезнэбта? Таанадые магтаха ёһотой гүб? Үгы даа, энээнэй түлөө магтахагүйб!

²³Би Дээдын Эзэнһээ абаһан хургаалаа таанадта дамжуулһан байгаа: Дээдын Эзэн Иисуста урбаһан хүни тэрэ хилээмэ абаад,

²⁴Бурханда баяр хүргөөд, хилээмээ хухалаад: «Энэ танай түлөө хухалагдаһан махабад бэемни гээшэ. Минии дурасхаалда иимэ юумэ хэжэ байгаарайт», – гэжэ хэлэһэн байгаа.

²⁵Һүүлээрнь аяга абаад: «Энэ аяга болбол минии шуһаар баталагдаһан Бурханай шэнэ хэлсээн гээшэ. Ямаршые сагта уухадаа, минии дурасхаалда уужа байгаарайт», – гэжэ хэлээ юм.

²⁶Энэ хилээмэ эдихэ, энэ аягаһаа ууха бүхэндөө таанад Дээдын Эзэнэй ерэтэр тэрэнэй үхэл тухай айладхажа байнат.

²⁷Дээдын Эзэнэй хилээмэ эдихэдээ, аягаһаань уухадаа өөрыгөө доогуур абажа ябаһан хүн Дээдын Эзэнэй махабад бэеын ба шуһанай урда зэмэтэй байха.

²⁸Тиимэһээ хүн бүхэнтнай түрүүн өөрыгөө шалгаг, тэрэнэй һүүлдэ хилээмэнһээ эдижэ, аягаһаа ууг.

²⁹Хилээмэнһээ эдихэдээ, аягаһаа уухадаа Дээдын Эзэнэй махабад бэеын удха мэдэрээгүй һаа, таанад эдихэн, ууһанаараа өөһэдыгөө зэмэдэ оруулнат.

³⁰Тиимэ ушарһаа олонтнай үбшэн ядуу, ахир һула байна, заримантнай үхэбэ.

³¹Хэрбээ бидэ түрүүн өөһэдыгөө шалгабал, Бурханай заргада орохогүй байгаабди.

³²Харин бидэ Дээдын Эзэнэй заргада ороод, хэһээлтэдэнь хүртэжэ байнабди, тиимэһээ энэ дэлхэйн зоноор хамта зэмэлэгдэхэгүйбди.

³³Тиимэһээ, аха дүүнэрни, Дээдын Эзэнэй Үдэшын хоолдо суглархадаа, бэе бэеэ хүлэжэ байгты.

³⁴Суглархадаа Бурханай заргада орохогүйнтнай тулада үлэн хоһон байһан зонтой гэртээ эдеэлжэ байг. Бусад асуудалнуудые таанадта ерэхэдээ тайлбарилжа үгэхэб.

Коринфынхидтэ 1-дэхи 12

Нангин хүлдэһөө үгтэһэн абьяас бэлигүүд тухай

¹Аха дүүнэр, мүнөө Нангин хүлдэһөө үгтэһэн абьяас бэлигүүд тухай үнэниие таанадта мэдүүлхэ һанаатай байнаб.

²Һүзэглөөгүй байхадатнай таанадые оло дахин төөрюүлдэг, дуугүй онгонуудта шүтэхэдэ түлхидэг байгаа гэжэ мэдэнэт.

³Бурханай хүлдөөр хүтэлүүлһэн ямаршые хүн: «Иисус хараалда хүртэлэ», – гэхэгүйл, тон тиигэжэл Нангин хүлдөөр хүтэлүүлһэн хүнһөө ондоо ямаршые хүн: «Иисус болбол Дээдын Эзэн», – гэхэгүйл гэжэ таанадта дуулганаб.

⁴Оюун сэдхэлэй абьяас бэлигүүд элдэб янзын байдаг, гэхэтэй сасуу тэдэниие бултыень нэгэл Нангин хүлдэ үршөөдэг юм.

⁵Элдэб янзын албанууд бии, гэхэтэй сасуу нэгэл Дээдын Эзэндэ алба хэдэг юм.

⁶Элдэб янзын абьяастайгаар албаяа хэжэ болохо, гэхэтэй сасуу нэгэл Бурхан хүн бүхэндэ тусхай ажал хэхэдэнь абьяас бэлиг хайрладаг юм.

⁷Нангин хүлдэ хүн соо оршоходоо, бултанайл аша туһада ямар нэгэн абьяас бэлигээр элирхэйлэгдэдэг.

⁸Зарим хүнүүдтэ хүлдэ сэсэн мэргэн үгэ хайрладаг, тэрэл хүлдэ нүгөө зариманда тусгай мэдэлгэ хайрладаг.

⁹Тэрэл хүлдэ хэхэг хүнүүдтэ агууехэ этигэл хүзэг хайрлана, нүгөө хэхэг хүнүүдтэ үбшэн зониие эмнэхэ хүсэ шадал олгоно.

¹⁰Тэрэл хүлдэ нэгэ хүнүүдтэ гайхамшагта үйлэ хэрэгүүдые бүтээхэ хүсэ шадал үгэнэ, нүгөөдүүлдэ Бурханай мэдээсэл тайлбарилха абьяас хайрлана, үшөө нүгөөдүүлдэ хүлдэнүүдые хоорондонь илгаха абьяас олгоно, зарим хүнүүдтэ элдэб янзын танигдахагүй хэлэнүүд дээрэ дуугарха бэлиг хайрлана, үшөө зариманда тэрэ хэлэһэн юумыень тайлбарилжа үгэхэ абьяас олгодог юм.

¹¹Эдэ онсо абьяас бэлигүүдые нэгэл хүлдэ хүн бүхэндэ өөрынгөө дураар хайрладаг юм.

¹²Христос олон эрхэтэнһээ бүридэһэн нэгэ махабад бээдэ адли; бэеын эрхэтэнүүд олоншые хаа, тэдэнэр нэгэ бэе бүрилдүүлдэг.

¹³Бидэшые булта, иудейнүүд байгаа гүбди, али бусад арадууд гү, барлагууд байгаа гүбди, али эрхэ сүлөөтэй гү, нэгэл хүлдөөр нэгэ бэе болон уһаар арюудхуулһан байгаабди, зүрхэ сэдхэлдэмнай нэгэл хүлдэ үгэһэн байна.

¹⁴Махабад бээшые өөрөө нэгэ эрхэтэнһээ бэшэ, харин олон эрхэтэнүүдһээ бүридэдэг.

¹⁵«Би гар бэшэб, тиимэһээ бээдэ ямаршые хамаагүйб», – гэжэ хүлэй хэлэбэшые хаа, тэрэ бэеын эрхэтэн байхаяа болихо аал?

¹⁶«Би нюдэн бэшэб, тиимэһээ бээдэ ямаршые хамаагүйб», – гэжэ шэхэнэй хэлэбэшые хаа, тэрэ бэеын эрхэтэн байхаяа болихо аал?

¹⁷Хэрбээ бүхы бэе ганса нюдэн байбал, тэрэ яжа дуулаха байгааб? Хэрбээ бүхы бэе ганса шэхэн байбал, тэрэ яжа юумэ үнэрдэхэ байгааб?



¹⁸Гэхэтэй зэргэ Бурхан бүхы эрхэтэнүүдые махабад бэе соо өөрынгөө дураар байрлуулаа.

¹⁹Хэрбээ булта нэгэ адли эрхэтэн байһан байбал, махабад бэе байхагүй байгаал.

²⁰Харин олон эрхэтэнүүд, гэхэдээ нэгэ махабад бэе байна.

²¹Тиимэхээ нюдэн: «Ши намда хэрэггүйш», – гэжэ гарта хэлэхэ аргагүй юм, али үгы хаа толгой: «Ши намда хэрэггүйш», – гэжэ хүлдэ хэлэхэ аргагүй юм.

²²Ахир нула гэжэ ханагдадаг эрхэтэнүүд бидэндэ бүришые хэрэгтэй байдаг.

²³Тиимэ хүндэгүй гэжэ тоолодог эрхэтэнүүдээ бидэ бүри ехээр анхардагбди, тиихэдэ эшхэбтэр гэжэ тоолодог эрхэтэнүүдээ тусхайгаар анхардагбди.

²⁴Бэеымнай зохид гэжэ ханагдадаг эрхэтэнүүд тусхай анхарал абадаггүй. Бурхан бэеыемнай зохёоходоо, нэрэ хүндэгүй эрхэтэнүүдтэмнай хамагһаа үлүү хүндэтхэл үзүүлэн бүтээгээ юм.

²⁵Тиимэхээл бэе соо ямаршые илгарал хубаарал үгы, харин олон янзын эрхэтэнүүд бултадаа бэе бээ анхаржа байха ёһотой.

²⁶Тиигээд лэ нэгэ эрхэтэнэй зобоходо, нүгөө эрхэтэнүүдынь бултадаа зободог, нэгэ эрхэтэнэй магтуулхада, бусад эрхэтэнүүдынь бултадаа баярладаг.

²⁷Таанад булта Христосой бэе гээшэт, харин ганса гансаараа тэрэнэй эрхэтэнүүдынь гээшэт.

²⁸Һүзэглэгшэдэй бүлгэм соо Бурхан хүн бүхэниие байрадань байлгаба: анха түрүүн, элшэнэрые, хоёрдохи һуурида Бурханай мэдээсэл элирүүлэгшэдые, гурбадахи һуурида хургагшэдые, тиигээд гайхамшагта үйлэ хэрэгүүдые бүтээдэг зониие, хойноһоонь үбшэн хүнүүдые аргалан эдэгээдэг, бусад зондо туһалдаг, бусэдые

ударидадаг, элдэб танигдахагүй хэлэн дээрэ дуугардаг абьяастай хүнүүдые табиһан юм.

²⁹Тэдэнэр бултадаа элшэнэр, али Бурханай мэдээсэл элирүүлэгшэд, али һургагшад бэшэ юм. Хүн бүхэн гайхамшагта үйлэ хэрэгүүдые бүтээдэггүй,

³⁰тон тиигэжэл хүн бүхэн үбшэнүүдһээ аргалха абьяастай байдаггүй, элдэб танигдахагүй хэлэнүүд дээрэ дуугардаггүй, тэрэ хэлэһэн юумэнүүдые нь тайлбарилдаггүй.

³¹Тиимэһээ таанад бүришые агууехэ абьяас бэлигүүдтэ хүртэхые сэдхэл зүрхэндөө хүсэжэ байгты. Харин мүнөө би таанадта бүри һайн харгы зам харуулхаб.

Коринфынхидтэ 1-дэхи 13

Хайра дуран хамаг юумэнһээ шухала юм

¹Хэрбээ би хүнүүдэй гү, али Бурханай Эльгээмэлнүүдэй хэлэн дээрэ хэлэжэ байгаад, харин хайра дурагүй байгаа хаа, би ханхинаһан зэд, хонгириһон сан гэшэб.

²Абарал буулгаха абьяастай, бүхы нюусануудтай болон мэдэсэтэй, хада уулануудые һууряарнь һэлгэхэ ехэ һүзэг этигэлтэй аад, хайра дурагүй юм хаа, би юуншые бэшэб.

³Зөөри зөөшээ бултыень тараажа, ами бээе тахил болгон шатаалгаһан аад, хайра дурагүй юм хаа, ямаршые ашаг олзо намда тэрээнһээ байхагүйл.

⁴Хайра дуратай хүн тэсэбэритэй, энэрхы сэдхэлтэй юм, атаархадаггүй, һайрхадаггүй, бүдүүрхэдэггүй, дээрэлхэдэггүй юм.

⁵Хайра дуратай хүн бадашадаггүй, өөртөө олзо бэдэрдэггүй, абаһаар сухалдадаггүй, муу юумэ һанаандаа баряад байдаггүй.

⁶Хайра дуратай хүн нүгэл шэбэлдэ баярладаггүй, харин үнэн зүбтэ баярладаг.



⁷Хайра дуратай хүн хэзээшье орхидоггүй, ходо этигэдэг, найдадаг, бүхы юумэ тэсэжэ гарадаг.

⁸Хайра дуран мүнхэ юм. Уридшалан хэлэгдэнэн үгэнүүд байбашье, үнгэржэ ошохо, элдэб хэлэнүүд байбашье, хүнэхэ, мэдэсэ байбашье, үгы болохо.

⁹Юундэб гэхэдэ, бидэ юумые гүйсэд мэдэхэгүйбди, Бурханай мэдээсэлшье гүйсэд элирүүлэгдэдэггүй.

¹⁰Харин бүрин бүтэн юумэнэй ерэхэдэ, бүрин түгэс бэшэ юумэнүүд хүнэхэ.

¹¹Үхибүүн байхадаа, би үхибүүндэл адли дуугардаг, үхибүүндэл адли бодомжолдог байгааб, харин ехэ болоходоо би үхибүүн шанараа орхёоб.

¹²Мүнөө бидэ Бурхание бүүдэг гэрэлэй һүүдэртэ адли харанабди, харин һүүлдэнь бидэ тэрээнтэй сэхэ харилсахабди. Мүнөө би юумэ гүйсэд мэдэнэгүйб, харин һүүлдэ Бурханай намайе мэдэнэндэл адляар би юумые бүрин түгэс мэдэдэг болохоб.

¹³Тиибэ яабашье, би этигэл хүзэгтэй, найдалтай, хайра дуратай байнаб. Эдэ гурбанай тон шухалань хайра дуран юм.

Коринфынхидтэ 1-дэхи 14

Бурханай мэдээсэл элирүүлхэ абьяас ба танигдахагүй хэлэнүүд дээрэ дуугарха абьяас бэлигүүд тухай

¹Таанад хайра дураяа үүсхэжэ байгты. Оюун сэдхэлэй абьяастай байхые, илангаяа Бурханай мэдээсэл элирүүлхэ абьяастай байхые хүсэжэ байгты.

²Танигдахагүй хэлэнүүд дээрэ дуугаржа байһан хүнүүд бусад хүнүүдтэ бэшэ, харин Бурханда хандан дуугарна, тиимэхэ хэншье тэдэниие ойлгоногүй, тэдэ Нангин һүлдэн хүсөөр нюуса үнэн зүйлые айладхана гээшэ.



³Харин Бурханай мэдээсэлые зондо элирүүлһэн хүнүүд тэдэ зониие хургана, урмашуулна, ханааень заһана ха юм.

⁴Танигдахагүй хэлэнүүд дээрэ дуугардаг хүнүүд өөһэдыгөө хургана, харин Бурханай мэдээсэл элирүүлһэн хүнүүд хүзэглэгшэдэй бүхы бүлгэмые хургана гээшэ.

⁵Тиимэхээ танигдахагүй хэлэнүүд дээрэ дуугарһайт гэжэ би та бүхэндэ хүсэнэб, гэхэтэй сасуу Бурханай мэдээсэл элирүүлхэ абьяастай байһайт гэжэ би бүришые ехээр хүсэнэб. Юундэб гэхэдэ, мэдээсэл элирүүлһэн хүн танигдахагүй хэлэнүүд дээрэ дуугаржа байһан хүнһөө бүри шухала, зүгөөр хүзэглэгшэдэй бүлгэмдэ хургаал дамжуулхын тула танигдахагүй хэлэн дээрэ хэлэһэн юумэеэ тайлбарилха аргатай хүниие би энэ тоодо оруулнагүйб.

⁶Тиимэхээ, аха дүүнэр, мүнөө таанадта ошоходоо би танигдахагүй хэлэнүүд дээрэ дуугараад, харин Бурханай намда нээһэн мэдээсэл гү, али мэдэлгэ гү, али буулгагдаһан абарал гү, али хургаал заабари асараагүй хаа, таанадта ямар аша тухатай байхабиб?

⁷Хүгжэм гаргадаг жэмбүүр ба ятага хоёрые абаад үзэе, тэдэнэй аялгануудайнь илгаа эли тодо бэшэ байбалнь, бидэ жэмбүүр дээрэ наадаһые, ятага дээрэ наадаһые ойлгохогүй байгаалди.

⁸Дохёо үгэдэг бүрээгэй тодо бэшэ абяануудые гаргадаг байбалнь, хэн тулалдаанда бэлдэхэ байгааб?

⁹Тон тиигэжэл танай хэлэһэн юумэн ойлгосотой бэшэ байбал, хэн таанадые ойлгохоб? Таанад миин лэ агаар доһолгохот.

¹⁰Дэлхэй дээрэ элдэб янзын олон хэлэнүүд бии, гэхэдэ тэдэнэй дунда удхагүй нэгэшые хэлэн үгы юм.

¹¹Хүнэй хэлэжэ байһан юумэнэй удхыень ойлгохогүй хаа, би тэрэ хүндэ хариин хүн болоноб, тиин тэрэшые хүн намда хариин хүн болоно.

¹²Таанад оюун сэдхэлэй абьяас бэлигтэй байхые хүсэжэ байгаа юм хадаа хүзэглэгшэдэй бүлгэмые бэхижүүлхэ абьяас бэлигүүдтэ элбэгээр хүртэхээ оролдогты.

¹³Тиимэхээ танигдахагүй хэлэн дээрэ дуугардаг хүн хэлэнэн юумээ тайлбарилжа шадаха абьяастай байха тухай зальбаржа байг.

¹⁴Ушарынь юуб гэхэдэ, танигдахагүй хэлэн дээрэ зальбархадамни хүнэнэ хүлдымни зальбаржа байбашье, ухаан бодолдомни ямаршые аша туһагүй байдаг юм.

¹⁵Тиигэхэдэ би яаха болонобиб? Би хүнэнэ хүлдөөрөө зальбархаб, гэхэтэй сасуу ухаан бодолоороошые баһа зальбархаб; би хүнэнэ хүлдөөрөө дуу дуулахаб, гэхэтэй сасуу ухаан бодолоороошые дуу дуулахаб.

¹⁶Хэрбээ шинии хүнэнэ хүлдөөрөө Бурханда баясхалан хүргэжэ байбалшни, хэлэнэн юумыешни ойлгохогүй байһан юрын хүн хайшан гээд шинии баясхаланда «болтогой» гэжэ хэлэхэ юм.

¹⁷Үлэмжэ найнаар Бурханда баясхалан хүргэншые сагтаа бусад зондо ямаршые туһагүй байхалши.

¹⁸Таанадай дундаһаа хэнхээшые үлүү ехээр танигдахагүй хэлэнүүд дээрэ дуугаржа байһандаа Бурханда баяр хүргэнэб.

¹⁹Тиихэдэ хүзэглэгшэдэй бүлгэм соо байхадаа бусад зоние хургахын тула танигдахагүй хэлэн дээрэ олон мянган үгэнүүдые хэлэнхаар ойлгомжотой табан лэ үгэ хэлэхэнэ дээрэ гэжэ тоолодогби.

²⁰Аха дүүнэр, таанад үхибүүдтэл адляар бодомжолхоёо болигты. Нүгэл шэбэлэй талаар зэмэгүй хүүгэд байгты, харин бодомжолходоо наһаяа хүсэхэн хүнүүд байгты.

²¹«Танигдахагүй хэлэнүүд дээрэ дуугардаг хүнүүдээр ба хариин хүнүүдээр дамжуулан би арад зондоо хэлэхэб, теэд тиихэдэмнишые

тэдэ намайе дуулахагүйл гэжэ Дээдын Эзэн хэлэнэ», – гээд Нангин Бэшэг соо бэшээтэй байдаг.

²²Тиимэхээ танигдахагүй хэлэнүүд дээрэ дуугарха абьяас хүзэглэгшэдэй аша туһада бэшэ, харин хүзэглэдэггүй хүнүүдтэ дүлгэ тэмдэг болодог, тиин Бурханай мэдээсэл элирүүлхэ абьяас хүзэглэдэггүй хүнүүдэй аша туһада бэшэ, харин хүзэглэдэг зоной аша туһада юм.

²³Хэрбээ хүзэглэгшэдэй бүлгэмэй бүгэдөөрөө суглараад, хүн бүхэнэйн танигдахагүй хэлэн дээрэ дуугаржа эхилхэдэ юрын гү, али хүзэглэдэггүй хүн орожо ерэбэл, таанадые галзуураад байна гэхэгүй аал?

²⁴Хэрбээ хүн бүхэнэй Бурханай үгэ номножо байхада юрын гү, али хүзэглэдэггүй хүн орожо ерэбэл, дуулаһан юумэнүүдын тэрэнэй нүгэлнүүдые шүүмжэлэн элирүүлхэ, гэмнэхэ.

²⁵Тэрэ хүнэй һанал бодолойн нюусанууд эли боложо, тэрэ хүгэдэн Бурханай урда унажа, «Үнэхөөрөө Бурхан таанадай дунда байна», – гээд айладхаха.

²⁶Тиигээд юун гэжэ хэлэхэбиб, аха дүүнэр? Танай суглархада нэгэнтнай бурханай дуунуудтай, нүгөөдэтнай һургаалтай, үшөө нүгөөдэтнай Бурханай нээжэ үгэһэн мэдээсэлтэй, заримантнай танигдахагүй хэлэнүүд дээрэ үгтэһэн мэдээсэлтэй, нүгөө заримантнай хэлэгдэһэн юумэнэй тайлбарилгатай байдаг. Эдэ бүгэдэ булта хүзэглэгшэдэй бүлгэмэй аша туһада юм.

²⁷Хэрбээ хэн нэгэнэй танигдахагүй хэлэн дээрэ дуугаржа эхилбэлнь, хоёр гү, али дээдэ захань гурбан хүн хойно хойноһоон ээлжэлээд хэлэхэ ёһотой, тиин үшөө нэгэ хүн хэлэгдэһэн юумые тайлбарилжа байха ёһотой.

²⁸Харин тайлбарилжа үгэхэ хүнэй үгы байбал, танигдахагүй хэлэн дээрэ дуугарагша абья гарангүй, гансал өөртөө ба Бурханда хандан зосоогоо дуугарха ёһотой.

²⁹Хоёр гү, али гурбан хүн Бурханай мэдээсэл элирүүлэг, харин бусад зон хэлэһэн тухайнь бодомжолжо байг.

³⁰Хэрбээ суглаан дээрэ һууһан хүнэй Бурханһаа мэдээсэл абабал, дуугаржа байһан нүгөө хүниинь дуугүй болог.

³¹Таанад булта ээлжэ ээлжээгээр Бурханай мэдээсэл элирүүлхэ, бултанаа һургаха, урмашуулха аргатайт.

³²Бурханай мэдээсэл элирүүлхэ абьяас тэрэл хүнэй мэдэлдэ байха ёһотой юм.

³³Ушарынь юуб гэхэдэ, Бурхан эмхи гуримгүй бэшэ, харин энхэ тайбанай эхин юм. Һүзэглэгшэдэй бүхы бүлгэмүүд соо Бурханай хүнүүдэй бээе абаад ябадаг ёһоор

³⁴эхэнэр хүнүүд суглаан дээрэ дуугүй байха ёһотой. Тэдэнэр юумэ дуугарха эрхгүй, Моисейн Хуули соо хэлэгдэһэнэй ёһоор тэдэнэр үгөөр байха ёһотой.

³⁵Хэрбээ тэдэнэр юумэ һураха гэбэл, гэртээ нүхэрһөөн һуража байг. Эхэнэр хүнэй һүзэглэгшэдэй суглаан дээрэ дуугархань ехэ эшхэбтэр юм.

³⁶Али Бурханай үгэ таанадай досоо түрэбэ гү? Али тэрэ үгэ гансал таанадта хүрэбэ гү?

³⁷Хэрбээ хэн нэгэн өөрыгөө Бурханай мэдээсэл элирүүлэгшэб, али оюун сэдхэлэй абьяастайб гэжэ тоолобол, минии таанадта бэшэһэн юумэн Дээдын Эзэнэй захяа заабари мүн гэжэ мэдэрхэ ёһотой.

³⁸Хэрбээ тэрэ хүнэй энээндэ анхаралаа хандуулаагүй хаань, таанадшые тэрэ хүниие бү анхарагты.

³⁹Тиимэхээ, аха дүүнэрни, Бурханай мэдээсэл элирүүлхые аргагүй ехээр хүсэжэ байгты, танигдахагүй хэлэнүүд дээрэ дуугархые бү хоригты.

⁴⁰Бүхы юумэн ёһо гуримаараал ябаха ёһотой.

Коринфынхидтэ 1-дэхи 15

Христос үхэлые илаба

¹Мүнөө, аха дүүнэр, минии таанадта номноһон, таанадай тогтоожо абаһан, этигэл хүзэгэйтнай һуури табиһан һайн Мэдээсэл таанадта һануулхамни.

²Тэрэнэй ашаар таанад абарагдаһан байгаат. Минии таанадта номноһон Мэдээсэл хатуугаар баримталжа байһандаа таанад абарагдабат, хэрбээ үгы юм һаа, таанад дэмы хүзэглэһэн байгаат.

³Нангин Бэшэг соо уридшалан хэлэгдэһэнэй ёһоор Христос манай нүгэл шэбэлэй түлөө үхэһэн байгаа гэхэн эгээн шухала юумые би өөрөө тогтоожо абаад, һүүлдэнь таанадта дамжуулһан байгааб.

⁴Тэндэл уридшалан хэлэгдэһэнэй ёһоор Христос хүдөөлүүлэгдээд, гурбадахи үдэртөө амидыруулагдаһан байгаа,

⁵тиигээд Пётрто, һүүлдэнь арбан хоёр шабинартаа бултандань үзэгдэһэн байгаа.

⁶Тиигээд тэрэ табан зуугаад шахуу хүзэглэгшэдтэ нэгэ зэргэ үзэгдэһэн юм. Тэдэ хүзэглэгшэдэй олониинь мүнөөшье хүрэтэр амиды мэндэ, харин зариманиинь наһа бараһан байна.

⁷Тиигээд тэрэ Яковта, удаань элшэнэртэ бултандань үзэгдэбэ.

⁸Хамагай һүүлдэ тэрэ намдашые үзэгдөө. Би дутуу гараһан үхибүүндэ адли хүнби.

⁹Элшэнэрэй эгээн «багань» гээшэб, элшэн гэжэ нэрлэгдэхэшые эрхэгүй байгааб, юундэб гэхэдэ, би хүзэглэгшэдэй бүлгэмые хашан мүрдэдэг байгааб.

¹⁰Гэхэтэй сасуу би Бурханай үршөөл хайраар мүнөөнэй байдалтай байнаб, тиин тэрэ үршөөл хайрань дэмы үнгэрөөгүй. Би өөрынгөө хүсэ шадалаар бэшэ, харин досоомни ажаллажа байһан Бурханай үршөөл хайраар бусад элшэнэрһээ үлүү ехэ хүдэлжэ байгааб.

¹¹Тиимэхээ би байна гүб, али тэдэнэр гү, бидэ булта илгаагүй Мэдээсэлые номнонобди, тиин таанад хүзэглэбэт.

Үхөөд амидырха тухай

¹²Христос үхөөд амидыруулагдаһан байгаа гэжэ номножо байхадамнай заримантнай юундэ үхэхэн хүнүүд амидырхагүй гэжэ хэлэнэб?

¹³Хэрбээ үхэхэн хүнэй амидырха аргагүй хаань, Христосшые амидырхагүй байгаал.

¹⁴Хэрбээ Христос үхөөд, амидыраагүй юм хаа, маанадай номноһон дэмы, таанадай хүзэглэхэн дэмы юм.

¹⁵Харин үхэхэн хүнүүд амидырдаггүй юм хаа, бидэ Бурханай Христосые амидыруулаагүй байхадань амидыруулаа гэжэ хэлэхэдээ, Бурхан тухай худалаар гэршэлхэн болонобди.

¹⁶Ушарынь юуб гэхэдэ, хэрбээ үхэхэн хүнүүд амидырдаггүй юм хаа, Христосшые амидыруулагдаагүй гээшэ.

¹⁷Хэрбээ Христосой амидыруулагдаагүй юм хаа, танай этигэл хүзэг дэмы, таанад нүгэл шэбэлтэйгээ үлэнэ гээшэт.

¹⁸Тиихэдээ Христосто хүзэглөөд үхэхэн хүнүүд баһал хосороо гэжэ ойлгожо болохо.

¹⁹Хэрбээ бидэ гансал энэ амидаралдаа Христосто найдажа байбал, бидэ бүхы дэлхэй дээрэ эгээл аза хубигүй зон гээшэбди.

²⁰Зүгөөр Христосой үхөөд амидыруулагдаһаниинь үнэн зүб юм. Үхөөд амидыруулагдаха зондо энэнь баталалга юм.

²¹Нэгэ хүнөөр дамжан үхэл тудаб, тон тиигэжэл нэгэ хүнөөр дамжан үхэлһөө амидыралга тудаха.



²²Хүнүүд булта Адамтай холбоотой байһан дээрһээ яажа үхэдэг бэ, тон тиигэжэл булта Христостой холбоотой байһан дээрһээ амидыруулагдаха.

²³Гэхэдээ хүн бүхэн өөрынгөө ээлжээгээр, хамагай түрүүн Христос, тиигээд тэрэнэй ерэхэдэ бүхы тэрэнэй хүнүүд амидыруулагдаха.

²⁴Тиигээд бүхы юумэнэй эсэс ерэхэ, Христос бүхы хүсэнүүдые, замбуулинай бүхы засаг захиргааниие, засаглагша захирагшадые илаад, хаан түрые Эсэгэ Бурханда барюулха.

²⁵Христос бүхы дайсадаа ула дороо оруултараа захирха.

²⁶Һүүлшынь дайсан болохо үхэл усадхагдаха.

²⁷«Бурхан бүхы юумые ула доронь оруулха», – гээд Нангин Бэшэгтэ хэлэгдэнэ, зүгөөр тэрэ «бүхы юумэнэй» тоодо Христосой ула доро бүхы юумые оруулһан Бурхан өөрөө ороногүй гэжэ ойлгосотой бээ даа.

²⁸Христос бүхы юумэнүүдые захирхадаа, бүхы юумые мэдэлдэнь оруулһан Бурханай мэдэлдэ өөрөө орохо, тиигээд Бурхан хамаг юумые бүрин захиржа байха.

²⁹Хэрбээ амидыралгын үгы юм хаань, үхэхэн хүнүүдэй түлөө уһаар арюудхуулһан зон яахань гэшэб? Хэрбээ үхэхэн хүнүүдэй юрэдөө амидырдаггүй юм хаань, яахадаа хүнүүд тэдэнэй түлөө уһаар арюудхуулнаб?

³⁰Бидэшье юундэ аюул оһолтой үргэлжэ нюураараа тулана гэшэбибди?

³¹Аха дүүнэр, би үдэр бүхэн үхэлтэй нюураараа уулзанаб. Манай Дээдын Эзэн Иисус Христостой нэгэдэхэн ажамидаралтнай минии омогорхол байһан дээрһээнэ би энээн тухай айладханаб.

³²Хэрбээ би юрэ хүн шанараараа бодоод, «ан арьяатануудтай» Эфес хотодо тулалдабал, намда ямар аша туһа байгааб? Хэрбээ үхэхэн

хүнүүдэй амидырдаггүй юм хаа, хүнүүдэй хэлээшээр «үглөөдэр хосорхо юм хаа, мүнөө эдие, ууял».

33Таанад бү эндүүржэ ябагты. «Муу ханинар һайн сэдхэлтэй хүниие доройтуулдаг».

34Ой ухаандаа орогты, нүгэл хэхээ болигты. Заримантнай Бурханиие мэдэхэгүй, тиин эшэжэ зобожо байхаартнай энээниие хэлэнэб.

Үмхирэн хосордог ба үмхирдэггүй мүнхэ бэе тухай

35«Яажа үхэхэн хүнүүд амидырдаг бэ? Ямар махабад бэетэй байха бэ?» – гээд хэн нэгэн асуужа магадгүй.

36Ямар тэнэг гээшэбта! Үрэхэ тарихадашни тэрэ үрэхэншни хосороогүй хаа, амидыран ургахагүйл.

37Таряа гү, али ямаршьеб ондоо үрэхэ тарихадаа ши бүтэн ургамал бэшэ, зүгөөр үрэхэ нуулгана ха юмши.

38Харин Бурхан өөрынгөө дураар тэрэ үрэхэндэ бэе хайрлана, тиин үрэхэ бүхэндэ өөрын тусхай бэе хайрлана.

39Бэенүүд ондо ондоо байдаг: хүнүүд нэгэ түрэлэй бэетэй, амитад ондоо түрэлэй бэетэй, шубууд баһа ондоо бэетэй, заһаһад үшөө ондоо бэетэй байдаг.

40Тиихэдэ огторгойн бэенүүд ба газар дэлхэйн бэенүүд байдаг. Газар дэлхэйн бэенүүдэй хүр жабхаланиинь огторгойн бэенүүдэй хүр жабхаланһаа илгаатай юм.

41Наранай хүр жабхалан нэгэ, харын хүр жабхалан ондоо, одо мүшэдэйшье хүр жабхалан баһа ондоо, тиихэдэ одо мүшэд бэе бэеһээ баһа хүр жабхалангаараа илгардаг юм.

42Тон тиимэл юумэн үхэхэн хүнүүдэй амидырхада болохо: махабад бэе үхэл соо таригдаад амидырхадаа, үмхирдэггүй мүнхэ болохо.

43Һуулгагдахадаа, тэрэ нэрэ түрэгүй, ахир һула байха, харин амидырхадаа, алдартай, хүр хүсэтэй байха.

⁴⁴Һуулгагдахадаа, юрэ махабад бэе байгаад, амидырхадаа, оюун сэдхэлэй бэе байха. Юрэ махабад бэе байбал, оюун сэдхэлэй бэешье байха.

⁴⁵«Түрүүшын хүн, Адам, амитан болон бүтээгдээ, харин һүүлшын Адам ами хайрладаг һүлдэ юм», – гээд Нангин Бэшэг соо хэлэгдэнэ.

⁴⁶Анха түрүүн оюун сэдхэлтэй бэшэ, харин юрэ махабад бэетэй ерэхэ, тиигээд оюун сэдхэлтэй болоод ерэхэ.

⁴⁷Түрүүшын Адам газар хүрһэнһөө бүтээгдэһэн газар дэлхэйн хүн юм, харин нүгөө Адам тэнгэриһээ юм.

⁴⁸Газар дэлхэйн хүнүүд газар хүрһэнһөө бүтээгдэһэн үнөөхи хүндэ адли, харин тэнгэрийн хүнүүд тэнгэриһээ ерэхэн нүгөө хүндэ адли.

⁴⁹Газар хүрһэнһөө бүтээгдэһэн хүнэй түхэл шанартай ябадагтаал адляар бидэ баһа Тэнгэрийн хүнэй түхэл шанартай ябахалди.

⁵⁰Махабад бэе шуһан хоёрһоо бүтээгдэһэн юумэн Бурханай хаан түрые залгамжалха аргагүй, үмхиржэ хосордог юумэн үмхирдэггүй мүнхэ юумые залгамжалха аргагүй юм гэжэл би таанадта хэлэхэ һанаатай байнаб.

⁵¹⁻⁵²Зай, би таанадта үнэн зүб нюуса нээнэб: бидэ булта үхэхэгүйбди, гэхэтэй сасуу бүрээгээ һүүлшынхиеэ дуугархада бидэ булта нюдэнэй сабшаха зуура гэнтэ хубилгагдахабди. Бүрээгээ дуугархада үхэхэн хүнүүд хэтын хэтэдэ үхэхэгүйгөөр амидыруулагдаха, тиин бидэшье хубилгагдахабди.

⁵³Тиигэжэ үмхирэн хосордог юумэн үмхирдэггүй мүнхэ юумэн боложо хубилха ёһотой, үхэлэй юумэн үхэдэггүй юумэн боложо хубилха ёһотой.

⁵⁴Үмхирэн хосордог юумэнэй мүнхэ боложо хубилхада, үхэлэй юумэнэй үхэдэггүй боложо хубилхада, «Үхэл хосорбо, илалта туйлагдаба», – гэжэ Нангин Бэшэг соо хэлэгдэһэн юумэн бэелхэ.



⁵⁵«Ай, Үхэл, илалташни хаанаб? Ай, Үхэл, хадхууршни хаанаб?»

⁵⁶Үхэлэй хадхуурай хорон нүгэл шэбэл соо юм, нүгэл шэбэлэй хүсэн Хуули соо юм.

⁵⁷Харин манай Дээдын Эзэн Иисус Христосой ашаар маанадта илалта хайрлаһан Бурханда баяр баясхалан хүргээл!

⁵⁸Тиимэхээ, инаг хайрата аха дүүнэрни, Дээдын Эзэнэй түлөө хэһэн ямаршые ажалтнай дэмы бэшэ гэжэ мэдэн, Дээдын Эзэнэй ажалда өөһэдыгөө бүрин зорюулагты, нугаршагүй, бата хатуу байгты.

Коринфынхидтэ 1-дэхи 16

Һүзэглэгшэ аха дүүнэртэ үзүүлхэ туһаламжа тухай

¹Мүнөө дуталдажа байһан Иудей можын Бурханай хүнүүдтэ алта мүнгэ суглуулжа туһалха талаар хэлэхүүб. Галадай һүзэглэгшэдэй бүлгэмүүдтэ юу хэхыень захяа һэнби. Таанадшые тэрэ захяе дүүргэгты.

²Гарагай нэгэн, воскресени бүхэндэ хүн бүхэнтнай оролгоһоон боломжоороо мүнгэ гаргаад, тэрэнээ суглуулжа байг. Тиигэбэлтнай, ерэхэдэмни алта мүнгэ суглуулха хэрэг гарахагүй.

³Би ерэхэдээ, шэлэжэ абаһан хүнүүдтэтнай бэшэгээ үгөөд, бэлэгүүдтэйн Иерусалим хото ябуулхаб.

⁴Хэрбээ тэдэнтэй ябалсахамни зохид байбал, тэдэнтэй ябуужаб.

Һүүлшын заабаринууд тухай

⁵Би Македонёор дайраад, һүүлээрнь таанадта ерэхэб. Македони дайраха ёһотой хүнби.

⁶Нэгэ хэды саг соо таанадтай байхаб, үбэлжэжэшые магадгүйб, һүүлээрнь таанад намайе замдамни үдэшэхэт.

⁷Би таанадтай халта уулзаад лэ хахасаха дурагүй байнаб. Хэрбээ Дээдын Эзэнэй үршөөбэл, таанадтайгаа удаан байһайб гэжэ хүсэнэб.

⁸Эндэ Эфестэ би Табидахи үдэрэй һайндэр болотор байхаб.



⁹Эндэ эсэргүүсэгшэдэй олон байгаашье хаань, агуухэ шухала хэрэг бээлүүлхэ боломжо гараад байна.

¹⁰Хэрбээ Тимофейн таанадта ошобол, танай дунда айлта зоболтогүй байха тухайнь бодооройт, тэрэ намдал адли Дээдын Эзэнэй аша туһада ажаллажа байна ха юм.

¹¹Хэншые тэрэниие доогуур бү хараг. Тэрэнэй намда бусажа ерэхэ замайнэ энхэ тайбан тухай бодон тэрэниие үдэшэхэ ёһотойт. Би тэрэниие хүзэглэгшэ аха дүүнэртэйгээ ерэхыень хүлеэжэ байнаб.

¹²Мүнөө манай хүзэглэгшэ нүхэр Аполлос тухай хэлэхүүб. Би тэрэниие таанадта хүзэглэгшэ аха дүүнэрээр хамта ошохыень ехэл гуйһан байгааб. Теэд тэрэ мүнөө таанадта ошохо аргагүй байна, гэхэдэ боломжо гарабал, тэрэ таанадта заабол ошохо.

¹³Нэргэг байгты. хүзэгөө алдангүй, зоригтой, хатуу байгты.

¹⁴Ямаршые юумэ хэхэдээ дуратайгаар хэжэ байгты.

¹⁵Таанад Стефан ба тэрэнэй гэр бүлэ тухай мэдэнэт, тэдэнэр Ахайяын зоной дундаһаа анха түрүүн Дээдын Эзэндэ хүзэглэһэн, Бурханай хүнүүдэй алба хэхэдэ өөһэдыгөө бүрин зорюулһан юм. Аха дүүнэрни,

¹⁶тиимэл хүнүүдэй ба тэдэнтэй ажаллажа, алба хэжэ байһан хүнүүдэй хүтэлбэри доро ябагты гэжэ таанадые гуйнаб.

¹⁷Стефан, Фортунат, Ахаик гурбанай ерэхэндэ би аргагүй ехээр баярлажа байнаб, тэдэнтэй байхадаа, таанадай үгы байһые ойлгонгүй үнгэрбэб.

¹⁸Тэдэнэр намайешье, таанадыешье баярлуулаа. Тиимэ зоние хүндэлжэ байгты.

¹⁹Аси можын хүзэглэгшэдэй бүлгэмүүд таанадта мэндые хүргэнэ. Акила Прискилла хоёр, тэдэнэй гэртэ суглардаг хүзэглэгшэдэй бүлгэм таанадта Дээдын Эзэндэ хүзэглэгшэдэй халуун мэндые хүргэнэ.

²⁰Таанадта эндэхи хүзэглэгшэ аха дүүнэр булта мэндые хүргэнэ. Бэе бэеэ арюун нангинаар таалажа мэндэшэлээрэйт.

²¹Энэ мурнуудые өөрынгөө гараар бэшэнэб: Павел таанадта амар мэндые хүргэнэ.

²²Дээдын Эзэндэ дурагүй байһан хүнэй толгой дээрэ хараал бууг. Манай Дээдын Эзэн, ерыш даа!

²³Дээдын Эзэн Иисусай үршөөл хайра таанадтай байһай!

²⁴Минии хайра дуран Иисус Христос соо та бүхэнтэй оршохонь болтогой!



Коринфынхидтэ 2-дохи

Коринфынхидтэ 2-дохи 1

¹Коринф хотын хүзэглэгшэдэй бүлгэм, Ахайяын нютагта байһан Бурханай бүхы хүнүүд, таанадые Бурханай эрхэ мэдэлээр Христос Иисусай элшэн болохоор дуудуулагдаһан Павел болон хүзэглэгшэ Тимофей мэндэшэлнэ.

²Манай Эсэгэ Бурхан ба Дээдын Эзэн Иисус Христос таанадта үршөөл хайра, амгалан тайбаниие үршөөг лэ!

³Үршөөл буян хайрладаг Эсэгэ, элдэб янзын ушарта ханаа заһадаг Бурхан, манай Дээдын Эзэн Иисус Христосой Эсэгэ Бурхан үреэл магтаалда хүртэжэ байг лэ.

⁴Элдэб янзын бэрхэшээлнүүдэй тудабал, тэрэ манай ханаа заһадаг, тиимэхээ ондоо зоной элдэб янзын бэрхэшээлнүүдтэ ороходонь, Бурханай маанадай ханаа заһадагтал адляар бидэшье тэдэ зоной ханаа заһаха аргатай байдагбди.

⁵Христосой олон зоболонгуудые хубаалсаха тума бидэ Христосой ашаар Бурханай туһаламжада бүри ехээр хүртэнэбди.

⁶Зоболон эдлэжэ байхадаа бидэ таанадай аша туһада, таанадыел абархын тула зобоно гээшэбди, Бурхан маанадай ханаа амаруулһандал адляар таанадай ханаа амаруулна, тиихэдээ маанадай эдлэжэ байһан зоболонгуудые тэсэжэ гарахынтнай тула таанадай ханаа амаруулна гээшэ.

⁷Тиимэхээ бидэ таанадта бата найданабди, зоболонгуудыемнай хубаалсахадаа, таанад маанадтал адли ханаагаа амарнат гэжэ мэдэнэ ха юмди.

⁸Аха дүүнэр, Асиин можодо бидэнтэй ушарһан бэрхэшээл зоболонгууд тухай таанадта хануулха ханаатайбди. Тиихэдэ бидэ ханаагаараа аргагүй ехээр унажа, доройтожо, амиды үлэхэбди гэжэ найдахаяашье болёод байгаабди.

⁹Үхөөбди гэжэ бидэ ханажа байгаабди. Тэрэ ушарһаа бидэ өөһэдтөө найдангүй, харин үхэхэн хүнүүдые амидыруулдаг Бурхандал ганса найдаха хэрэгтэй гэжэ ойлгообди.

¹⁰Тиимэхээл тэрэ бидэниие тиимэ аюул үхэлһөө абараа, абаржашье байха. Тэрээндэл ганса найданабди, тиимэхээл тэрэ бидэниие дахин абархал,

¹¹бидэнэй тулада танай үргэжэ байһан зальбаралнууд бидэндэ туһалнал. Тиимэхээ маанадта аша туһатай байһанайнь түлөө олон зон Бурханда баяр баясхалан хүргэхэл.

Павелай түсэбүүдын хубилна

¹²Энэ дэлхэйдэ байхадаа, илангаяа таанадтай харилсахадаа, бидэ Бурханһаа үгтэһэн үнэн сэхэ, арюун сэбэр ажамидаралтай байгаабди, һэшхэл бодолнайшье тэрэниие гэршэлнэ, тиимэхээл бидэ ехэл бахархадагбди. Бидэ хүнэй сэсэн ухаагаар бэшэ, харин Бурханай үршөөлөөр тиимэ ажамидаралтай байгаабди.

¹³⁻¹⁴Таанадай уншаха, ойлгохо аргатай юумэнүүдыел бидэ бэшэнэбди. Мүнөө бидэниие бага зэргээр ойлгожо байгаашье һаатнай, хожомын гүйсэд ойлгодог болохот гэхэн найдалтай байнаб, тиин Дээдын Эзэн Иисусай ерэхэ Үдэр таанад маанадаар бахархахат, харин бидэ таанадаар бахархахабди.

¹⁵Эдэ бүхы юумэнүүдтэ хатуу этигэлтэй байһан хадаа таанадай хоёрдохийёо буян хэшэгтэ хүртэхын тула би түрүүн таанадта ошохые түсэблэжэ байгааб.

¹⁶Таанадта дайраад Македони ошохо, тиигээд тэндэхээ бусаха замдаа дахин таанадтай уулзаха ханаатай байгааб. Тиигэхэдэмни таанад саашаа Иудей руу ябаха замдамни намайе бэлдэжэ үгэхэт гэжэ найдажа байгааб.

¹⁷Энэ түсэбүүдни һэбхи ябадал болоо гээшэ гү? Нэгэ хэлэхэдээ «тиимэ», нүгөө хэлэхэдээ «үгы» гэжэ хэлэдэг найдабаригүй хүн гээшэ гүб?



¹⁸Бурханай бата найдабаритай байдагтал адляар минии «тиимэ» гэхэмни «үгы» бэшэ, харин тиимэ байдаг юм.

¹⁹Ушарынь юуб гэхэдэ, Силуан, Тимофей бидэ гурбанай таанадта номноһон Бурханай Хүбүүн Иисус Христос «тиимэ» гэхэдээ «үгы» гэхэн удхатайгаар хэлэдэггүй байгаа. Тэрэ өөрөө Бурханай «тиимэ» гээшэ.

²⁰Тэрэ Бурханай бүхы найдуулгануудайнь «тиимэ» гээшэ. Тиимэхээл Христосоор дамжуулан бидэ «Болтогой» гэжэ Бурханай алдарта айладхаа бэлэйбди.

²¹Бурхан өөрөө Христосые та бидэнэй бата һуури болгожо табяа, илгажа абаа,

²²бидэн дээрэ тамгаа дараа, бидэндэ үгэхэ бүхы юумэнүүдэйнгээ бэлгэ тэмдэг болгон Нангин һүлдые хайрлаа.

²³Би Бурхание гэршэ болгожо дууданаб, тэрэ минии һанал бодолые мэдэхэ. Таанадые хайрлаһандаа би таанадта Коринф ошохогүй гэжэ шиидээ һэнби.

²⁴Юундэ шүтэжэ байхыетнай таанадта зааха гэжэ бидэ оролдоогүйбди, таанадай хатуу этигэл хүзэгтэй байһые бидэ мэдэнэ ха юмди. Таанадай жаргалтай байхын лэ түлөө бидэ таанадаар хамта хүдэлнэ гээшэбди.

Коринфынхидтэ 2-дохи 2

¹Тиимэхээ таанадта гашуудал асархагүйн тула би дахин таанадта ошохогүйб гэжэ шиидээб.

²Хэрбээ минии таанадые дахин гомдохооболни, намайе баярлуулха хүн танай дунда дахин олдохогүйл.

³Дахин таанадта ошоод, намайе баярлуулха ёһотой хүнүүдһээ гашуудаха дурагүй байһандаал би түрүүн бэшэһэн байгааб. Минии баяртай байхада таанадшые булта баяртай байдагта гэхэн хатуу этигэлтэй байна ха юмбиб.

⁴Таанадые гашуудуулха голхоруулхын тула бэшэ, харин хэды ехээр таанадта дуратай байһанаа мэдүүлхын тула би ехэл ханаа зобон, ехэл нулимсаа гоожуулан таанадта бэшэһэн байгаааб.

Гомдохоогшые хүлисэхэ тухай

⁵Хэрбээ хэн нэгэн намайе гомдохообол, тэрэ хүн намһаа үлүү ехээр таанадые бултыетнай гомдохоогоо гэжэ хэлэбэл хэтэрүүлхэгүйб.

⁶Тиимэ хүниие хэһэн аргаарнь лэ олонхинойтнай хэһэбэл болохо.

⁷Зүгөөр тэрэ нүхэрөө аргагүй ехээр уйдажа, сэдхэлээрээ унахагүйнь тула хүлисөөд, ханааень заһабалтнай таанадта дээрэ байха.

⁸Үнэн дээрээ тэрэндээ дуратай байһанаа мэдүүлхыетнай таанадһаа гуйнаб.

⁹Туршалгануудые хэр дабахатнай гээшэб, хэлэһэн юумэнүүдыемни ходо дүүргэхэтнай гү гэжэ харахын лэ тула би бэшээ хүнби.

¹⁰Хэрбээ хэһэн муу юумэнэйнь түлөө хүниие хүлисэбэлтнай, бишье тэрэниие хүлисэнэб. Христосой урда таанадай аша туһада хүлисэхэ ёһотой бүхы юумые би хүлисэнэб.

¹¹Тиигэбэл сатана маанадые хууража мэхэлжэ шадахагүй. Бидэ булта тэрэнэй һанал бодолыень һайн мэдэнэ ха юмди.

¹²Христос тухай һайн мэдээсэл номнохоёо Троада хото ерэхэдэмни, Дээдын Эзэн бүхы хэрэгүүдтэмни урагшатай байгаа.

¹³Гэхэтэй сасуу, тэндэ Тит дүүгээ оложо ядахадаа, би ехээр ханаа зобожо байгаааб. Тиимэһээ тэндэхи зондо баярлаһанаа мэдүүлээд, Македони ошоһон байгаааб.

¹⁴Христостой хамтарһан маанадые илалтада хүргэжэ байдаг Бурханда баяр баясхалан хүргэнэб. Бурхан баһал Христос тухай мэдээ хангалтай үнэртэл адляар хаа хаанагүй маанадаар дамжуулан тараадаг юм.



¹⁵Ушарынь юуб гэхэдэ, бидэ абарагдажа болон хосоржо байһан зоной дунда Бурханай һанаашалһанаар Христосой хангалынь болонобди.

¹⁶Хосорһон зондо тэрэ хангал бузар үнэртэй байжа, үхэлдэ хүргэдэг, харин абарагдаһан зондо тэрэ хангал һайхан үнэртэй байдаг, амидарал үршөөдэг юм. Тиимэхээ хэн иимэ үүргэ гүйсэдхэхөөр бэлэн бэ?

¹⁷Бидэ Бурханай мэдээсэл номнон өөһэдтөө ашаг олодог хүнүүдтэл адли бэшэбди. Бидэ үнэн шударгаар ажалдагбди. Юундэб гэбэл, Бурхан бидэниие эльгээгээ, Бурхан манай гэршэ, тиин бидэ Христосой зарасанарбди.

Коринфынхидтэ 2-дохи 3

Шэнэ Хэлсээнэй зараса

¹Бидэ дахин өөһэдыгөө таанадтай танилсуулха болоно гээшэ гүбди? Али зарим хүнүүдтэ адляар бидэ өөһэд дундаа магтан дурадхаһан бэшэгүүдые харуулжа байха ёһотой гээшэ гүбди?

²Таанад өөһэдөө бүхы хүнүүдтэ уншаха ойлгохоор манай зүрхэ сэдхэлдэ бэшэгдэһэн бэшэг гээшэт.

³Христосой өөрөө энэ бэшэг бэшээд маанадаар дамжуулһаниинь эли байна. Энэ бэшэг бэхээр бэшэ, харин амиды Бурханай һүлдөөр бэшээтэй, шулуун хабтагайнууд дээрэ бэшэ, харин хүнүүдэй зүрхэ сэдхэлдэнь бэшээтэй юм.

⁴Бидэ эдэ бүхэн үнэн зүб байна гэжэ Бурханай урда Христосой ашаар бата этигэлтэй байнабди.

⁵Энэ ажал бүтээхэ аргатайбди гэжэ бидэ өөрынгөө нэрэхээ баталха эрхэгүйбди. Бурхан лэ бидэндэ тиимэ арга боломжо үгэжэ байдаг юм.

⁶Тэрэл Бурхан бэшээтэй Хуули дээрэ бэшэ, харин Нангин һүлдэ дээрэ һуури татаһан Шэнэ Хэлсээнэй зарасанар байха боломжо бидэндэ олгоо. Юундэб гэхэдэ, Хуули үхэл асардаг, харин һүлдэ амидарал үршөөдэг юм.

⁷Шулуун хабтагайнууд дээрэ үзэгүүдээр Хуули ниилэхэдэнь, тэндэнь Бурханай алдар оршоһон юм. Тиин Израилиин арадай харахын аргагүй харгама гэрэлээр Моисейн нюурын гэрэлтэһэн юм. Үхэл асардаг Хуули хүсэндөө байхадаа иимэ ехэ алдар үзүүлдэг байбал,

⁸Һүлдэһөө эхитэй юумэн бүришые ехэ алдартай байха бэшэ аал?

⁹Гэмнэлгэдэ хүргэжэ байһан юумэнэй алдартай байбал, үнэн зүбтэ хүтэлһэн ябадал бүришые ехэ алдартай байха бэшэ аал?

¹⁰Анхан алдартай байһан юумые мүнөөнэй тон харгама алдартай сасуулбал, тэрэ ямаршые алдаргүй болоо гэжэ хэлэхэдэ болохо.

¹¹Саг зуура оршодог юумэнэй алдартай байбал, хэтын хэтэдэ оршодог юумэн бүришые ехэ алдартай байха бэшэ аал?

¹²Иимэ эрхим хайн найдалгатай байхадаа бидэ ехэл зоригтой байнабди.

¹³Ойр зуурын һүр жабхалангай буурахые Израилиин арадай харахагүйн тула бидэ нюураа бүдөөр хаһан Моисейдэл адли бэшэбди.

¹⁴Үнэхөөрөө тэдэ зоной ухаан бодолынь хаалтатай байгаа. Манайшые үдэрнүүд хүрэтэр Хуушан Хэлсэе уншахадань, үнөөхи хушалтань абтаагүй байна. Гансал Христос тэрэ хушалтые абаха аргатай.

¹⁵Мүнөөдэршые тэдэнэй ямаршые сагта Моисейн Хуули уншахадань, зүрхэ сэдхэлынь үшөөл хаалтатай байдаг.

¹⁶Зүгөөр тэрэ хушалта хүнэй Дээдын Эзэндэ хандаһан лэ сагтань абтажа хаягдадаг.

¹⁷Дээдын Эзэн – һүлдэ мүн, тиин Дээдын Эзэнэй һүлдын оршожо байһан газарта эрхэ сүлөө бии юм.

¹⁸Тиимэхээ бидэ булта хушагдаагүй нюураараа Дээдын Эзэнэй алдарые хаража байнабди. Дээдын Эзэнэй һүлдэ Дээдын Эзэнэй алдарта бүри ойртуулан маанадые хубилгана.

Коринфынхидтэ 2-дохи 4

Шабар домбо соо байһан баялиг тухай

¹Бурханай үршөөл хайраар бидэ иимэ ажал хэнэбди, тиихэдээ урмаа хухарнаггүйбди.

²Бидэ нюужа байхаар эшхэбтэр хэрэгүүдые хэхээ болёобди, хүниие мэхэлхэ хуурахаяа гү, али Бурханай үгэ хазагайруулхаяа оролдоноггүйбди. Үнэн зүб тухай айладхажа байһыемнай Бурхан гэршэлхэ. Тиимэһээ маанадта этигэжэ найдажа болохо юм.

³Хэрбээ манай номножо байһан һайн Мэдээсэл далда байгаа һаа, тэрэ гансал хосоржо байһан зондо далда байха.

⁴Һүзэглэдэггүй зоной ухаан бодолыень энэ дэлхэе захиржа байһан нүгэлтэ бурхан харанхы мунхагаар хушаа, тиимэһээ тэдэ балар һохор зон Бурханай дүрэнэ болохо Христосой алдар тухай һайн мэдээсэлһээ сасарһан гэрэл туяае хараха аргагүй байгаа.

⁵Бидэ өөһэдыгөө номноно бэшэбди, харин Иисус Христосые Дээдын Эзэн байна гэжэ, бидэ Иисусай аша туһада танай зарасанар байнабди гэжэ номнонобди.

⁶«Гэрэл туяагай харанхыһаа гэрэлтэхэнь болтогой», – гэжэ Бурхан хэлээ. Мүнөө тэрэл Бурхан манай зүрхэ сэдхэлдэ гэрэлтэжэ, Христосто оршожо байһан Бурханай алдарай мэдээгээр бидэниие гэгээрүүлээ юм.

⁷Бидэ энэ баялиг хадагалһан шабар домбонуудта адли хүмди. Тиимэһээ бодото һүр хүсэн маанадһаа бэшэ, харин Бурханһаа эхи абадаг.

⁸Бидэ оло дахин хашуулан зобонобди, гэхэтэй сасуу дарагдаагүй байнабди. Юу хэхээ мэдэхээшье болёод байхадаа бидэнэр урмаа хухардаггүйбди.

⁹Олон дайсантайшье байгаа һаа, бидэ нүхэдгүй үлэдэггүйбди. Даруулһаншье байгаа һаа, бидэ үхэжэ хосордоггүйбди.



10-11 Иисусай амидаралай маанад соо элирхэйлэгдэхын тула бидэ тэрэнэй түлөө үдэр бүхэн үхэлтэй ушардагбди. Иисусай амидарал манай богони гэнэн амидаралда харагдажа байхын тула бидэ амиды зон тэрэнэй түлөө үхэлтэй ходо ушардагбди.

12 Энэнь үхэл маанад соо, харин амидарал таанад соо ажаллана гэнэн удхатай юм.

13 «Би хүзэглэһэн ушарһаа хэлээб», – гэжэ Нангин Бэшэгтэ бэшээтэй байдаг. Бидэ тэрэл хүзэгэй хүлдэтэй байжа хүзэглэһэндөө хэлэнэбди.

14 Дээдын Эзэн Иисусые амидыруулһан Бурхан Иисустай хамта бидэниие амидыруулха, тиигээд та бидэниие өөрынгөө урда асаржа байлгаха гэжэ бидэ мэдэнэбди.

15 Эдэ бүхэн таанадай аша туһада хэгдэһэн байна. Тиигэжэл бүри олон зоной Бурханиие магтажа, алдарыень дуудаһан ушарһаань Бурханай үршөөл хайра элбэгжэжэл байха.

Һүзэг этигэлээрээ амидарха тухай

16 Иимэһээл бидэ хэзээшье урмаа хухардаггүйбди. Махабад бэеымнай хүнэжэ байбашье һаа, бидэ досоогоо үдэрһөө үдэртэ шэнэлэн бэхижэнэбди.

17 Тиимэ ойро зуурын бэрхэшээл зоболонгууд маанадта угаа ехэ мүнхын алдар асардаг.

18 Харагдадаг юумэнүүд саг лэ зуура оршодог, харин харагдадаггүй юумэнүүд хэтын хэтэдэ оршодог. Тиимэһээл бидэ харагдадаг юумэнүүдтэ хандуулха бэшэ, харин харагдадаггүй юумэнүүдтэ анхаралаа хандуулнабди.

Коринфынхидтэ 2-дохи 5

1 Манай махабад бэе газар дэлхэй дээрэ байхадаа маанадай ажамидардаг майханда адли юм. Хэрбээ эдэ майхануудаймнай унабал,

Бурхан маанадта бултандамнай хүнэй гараар бодхоогдоогүй, тэнгэридэ хэтын хэтэдэ оршожо байха гэр үгэхэ гэжэ бидэ мэдэнэбди.

²Тэрэ тэнгэрийнгээ гэртэ ажамидарха дуратай байһан дээрэһээ бидэ энэ дэлхэйдэ байха сагтаа ёолонобди.

³Бидэ тэрэ гэрээ хубсаһандал адляар өөр дээрээ нэмэрээд, нюсэгэн байхагүйе хүсэнэбди.

⁴Энэ дэлхэйн майханда ажамидарха сагтаа бидэ дарлалтада ороод байһантай адли ёолонобди. Өөһэдынгөө бэе орхихо дуратай байһандаа бэшэ, харин тэнгэрийн амидаралда хүртэхэ дуратай байһандаа тиигэжэ ёолонобди. Тиигэжэ үхэлые амидарал залгиха юм.

⁵Бурхан бидэниие эгээл тэрэ хубилалгада бэлдээд, хэхэ юумээ баталан маанадта өөрынгөө һүлдые үгөө.

⁶Тиимэһээ бидэ ходо урма зоригтой байдагбди. Бэе соогоо байха сагтаал бидэ Дээдын Эзэнһээ холо байһанаа мэдэнэбди.

⁷Бидэ хаража байһан юумэндэ бэшэ, харин хүзэг этигэлдэ найдан ажамидарна ха юмди.

⁸Бидэ зоригтой байнабди, эдэ бэенүүдээ орхёод, Дээдын Эзэнтэй гэртэнь байха дуратай байнабди.

⁹Тиимэһээ эндэхи гэртээ байха сагтаашье, Дээдын Эзэнэй гэртэ байха үедөөшье бидэ бүхы хүсэ шадалаараа тэрээндэ найшаагдаха гэжэ оролдодогбди.

¹⁰Газар дэлхэй дээрэ ябахадаа муу, һайн юумэ хэһэнэйнгээ түлөө шүүлгэхын тула бидэ булта Христосой зарга шүүбэридэ орохо ёһотойбди.

Бурхантай эбээ нэгэдэхэ тухай

¹¹Дээдын Эзэнһээ айн хүрдэхэнь ямар удхатайб гэжэ мэдэжэ байгаад, бидэ бусад зониие тэрээндэ хандахаар идхаха гэжэ оролдонобди.



Бурхан бидэниие бүрин мэдэхэ, тиин таанадшые бидэниие ямархан хүнүүд байһыемнай һайн мэдэнэт гэхэн найдалтай байнаб.

¹²Дахин өөһэдыгөө таанадта танилсуулха гэжэ бидэ бодоногүйбди. Харин маанадаар омогорхохо шалтаг таанадта үгэнэбди. Тиимэхээ таанад хүнүүдэй зосоохи байдалаар бэшэ, харин газаахи түхэл шэнжээр омогорходог хүнүүдтэ харюу үгэжэ шададаг байхат.

¹³Хэрбээ өөрһөөн гарабал, Бурханай аша туһада бидэ тиидэгбди. Хэрбээ һаруул бодолтой байбал, таанадай аша туһада тиимэ байдагбди.

¹⁴Маанадые Христосой хайра дуран захирна, тиин хүн бүхэнэй түлөө нэгэ хүнэй үхэбэл, тэрэ үхэлыень хүн бүхэн хубаалсана гэжэ бидэ мэдэнэбди.

¹⁵Бүхы хүнүүдэй түлөө тэрэ үхөө. Тиимэхээ амиды байһан хүнүүд өөһэдынгөө түлөө ажамидарха бэшэ, харин тэдэнэй түлөө үхөөд амидырһан Христосойл түлөө ажамидарха ёһотой.

¹⁶Тиимэхээ бидэ энэ саһаа эхилээд хэниешые энэ дэлхэйн заргаар бү шийдхэе. Нэгэтэ бидэ Христосые энэ дэлхэйн заргаар шийдхэнэн байгаабди, мүнөө тиигэхээ болёобди.

¹⁷Христостой нэгэдэнэн хүн бүхэн шэнэ хүнүүд гээшэ: урданай юумэнүүд хүнэгдөөд, бүхы юумэн шэнэдхэгдэбэ.

¹⁸Эдэ бүхы юумэнүүдые Бурхан бүтээгээ. Тэрэ маанадтай эбээ нэгэдхүүлхын тула Христосые эльгээгээ, тиин эб нэгэдхүүлхэ тухай номнохые маанадта даалгаа.

¹⁹Бурхан Христос соо оршожо, энэ дэлхэйн зонтой эбээ нэгэдхээ, нүгэлнүүдыень хүлисөө. Тиигээд эб нэгэдхэхэ тухай мэдээсэлээ маанадта даалгаа.



²⁰Бидэ Христосой нэрээр эльгээгдэн байгаабди, тиин Бурхан бидэнэрээр дамжан таанадта гуйн хандана. Бурхантай эбээ нэгэдхэгты гэжэ бидэ Христосой нэрээр таанадые гуйнабди.

²¹Бурхан маанадай түлөө ямаршые нүгэлгүй байһан Христосто манай нүгэлнүүдые ашаа. Тиигэжэ бидэ Христостой нэгэдэн, Бурханда зохистой болообди.

Коринфынхидтэ 2-дохи 6

¹Бурханай буян хэшэгы дэмы бү абагты гэжэ бидэ Бурхантай хамта ажаллажа байһан ушарһаа таанадые гуйнабди.

²«Саг болзорой болоходо, Би шамайе дуулаа хүм, Шамайе абарха үдэрэй ерэхэдэ, Би шамда туһалаа хүм», – гэжэ Бурхан хэлээ. Эгээл тэрэ саг болзор болобо, шамайе абарха тэрэ үдэр ерэбэ.

³Ямаршые зондо бэрхэшээлнүүдые ушаруулхаяа бидэ оролдоногүйбди, тиимэхэ хэжэ байһан ажалдамнай алдуу дутагдал олохо шалтаг бидэ хэндэшые үгэнэгүйбди.

⁴Ямаршые юумэ хэхэдээ бидэ тохёолдоһон бэрхэшээл зоболонгуудые, дутагдал дундануудые, хүшэр байдалые даруу номгоноор дабажа гаран, өөһэдыгөө Бурханай үнэн зарасанар гэжэ харуулнабди.

⁵Бидэ сохюулһан, түрмэдэ һууһан, хүрэг зондо дайруулһан байгаабди. Бидэ аргагүй ехээр ажалладаг, амаралта нойргүй, эдэе хоолгүй ябадаг һэмди.

⁶Бидэ арюун сэбэр, мэдэлгэтэй, тэсэбэритэй, үршөөл буянтай байдагбди. Нангин һүлдэ маанадтай оршодог, тиин хайра дуран үнэн зүрхэнһөөмнай гарадаг.

⁷Бидэ үнэн зүбые хэлэдэгбди, Бурханай хүр хүсэн манаар дамжан ажалладаг юм. Үнэн сэдхэлнай – манай добтолхошые, бээе хамгаалхашые хуяг дуулга мүн.



⁸Бидэ нэрэ хүндэтэйшье, нэрэ хүндэгүйшье ябаабди, магтаалдашье, хараалдашье хүртэжэ байгаабди. Үнэн зүбые хэлэжэ байһаншье хаа, бидэ худалшад мэхэшэдшье гэжэ тоологдодог байгаабди.

⁹Хүнүүдтэ танигдахагүй шэнги аад лэ, хүн бүхэндэ мэдээжэбди. Үхэжэ байһан шэнги үзэгдэһэн аад лэ, мүнөөшье болотор амиды байнабди. Хэһээлгэжэ байһаншье хаа, үхэлэй саазада хүртөөгүй байнабди.

¹⁰Зобожо байһаншье хаа, бидэ ходо баяртай байдагбди; үгытэй ядуушье хаа, олон хүнүүдые баян болгодогбди; ямаршье юумэгүй байһан шэнги аад, үнэндөө бидэ бүхы юумэнэй эзэдынь гээшэбди.

¹¹Коринфынхид, бидэ таанадта сэхыень хэлэнэбди, зүрхэ сэдхэлнай нээлтэтэй байна.

¹²Манай зүрхэ сэдхэл таанадта хаалтатай бэшэ, харин танай зүрхэ сэдхэл маанадта хаалтатай байна.

¹³Маанадай таанадта хандажа байһандал адляар таанад маанадта хандагты, зүрхэ сэдхэлээ маанадта нээгты гэжэ үхибүүдтээ хэлэхэндэл адляар таанадта хэлэнэб.

Амиды Бурханай хүмэ

¹⁴Дээдын Эзэндэ хүзэглэдэггүй зоние бү нажаагты. Зүб юумэн буруу юумэнтэй хамта байжа шадаха аал? Яжа гэрэл туяа шэб харанхытай хамта оршожо шадахаб?

¹⁵Яжа Христос Шолмостой эбтэй эетэй байжа шадахаб? Яжа хүзэгтэй зон хүзэггүй зонтой эблэржэ шадахаб?

¹⁶Яжа Бурхан хүмэ онгонуудта хамаатай байхаб? Бидэл амиды Бурханай хүмэ гээшэбди. Бурхан өөрөө иигэжэ хэлээ юм: «Өөрынгөө хүнүүдэй дунда би гэр бодхоохоб, Тиигээд тэдэнэйнгээ дунда оршожо байхаб, Тэдэнэйнгээ Бурханиинь байхаб, Харин тэдэнэр минии арад болохо».

¹⁷«Тиимэхээ тэдэ хүзэггүй зоной оршолоние орхижо, Тэдэ зонһоо холодогты. Сэбэр бэшэ юумэндэ бү хүрэгты, Тиигэбэл би таанадые найшаахаб.

¹⁸Би танай Эсэгэтнай болохоб, Таанад минии хүбүүд басагад болохот гэжэ Бүрин хүсэтэй Дээдын Эзэн хэлэнэ».

Коринфынхидтэ 2-дохи 7

¹Нүхэдни, Бурхан эдэ найдуулгануудаа маанадта үгөө юм. Тиимэхээ бэеыемнай, хүнэхэ хүлдыемнай бузарладаг юумэнүүдхээ өөһэдыгөө сэбэрлээл, Бурханда хүгэдэн, гүйсэд арюун нангин байял.

Павелай баярлаһан тухай

²Маанадта дуратай байһанаа харуулыт даа. Бидэ хэниешье мэхэлээгүйбди, хэниешье дээрмэдэн хоһолоогүйбди, хэн дээрэшье баяжаха гэжэ оролдоогүйбди.

³Таанадые зэмэлхэ һанаатайгаар энээниие хэлэнэ бэшэб. Амидышье, үхэхэншье байбалнай илгаагүй таанад хододоо манай зүрхэ сэдхэл соо байнат гэжэ түрүүн би хэлээ һэнби.

⁴Би таанадта аргагүй ехээр найдажа байнаб, таанадаар аргагүй ехээр омогорхожо байнаб. Бүхы бэрхэшээл зоболонгуудтаа би ехэл урма зоригтой, аргагүй баяр жаргалтай байнаб.

⁵Юундэб гэхэдэ, Македонишье ерээд бидэ амархые мэдээгүй һэмди. Тэндэ маанадтай элдэб янзын бэрхэшээлнүүд ушараа, бидэ дайсадтайгаа тулалдажа, досоогоо айн хүрдэһэн юумэд байгаабди.

⁶Харин сэдхэлээрээ унаһан зоние урмашуулдаг Бурхан маанадта Титые эльгээжэ урмашуулаа.

⁷Бидэ гансал тэрэнэй ерэхэдэ баярлаа бэшэбди, харин таанадай тэрэниие урмашуулһан тухай дуулаад аргагүй баярлаа хүмди. Таанадай намайе аргагүй ехээр харахые хүсэжэ байһан тухай, уйдажа шаналжа байһан тухай, намайе ехээр анхаржа бодожо байһан тухай



Тит маанадта хөөрөө юм. Тиимэхээ би бүришые ехээр баярлаһан жаргаһан байгааб.

⁸Минии бэшэгэй таанадые уйдуулһаншые байбал, би халагланагүйб. Түрүүн халаглаһан байгааб, тиигээд тэрэ бэшэгни таанадые ойро зуурал уйдуулаа гэжэ харабаб.

⁹Мүнөө би таанадые уйдуулһандаа баярлана бэшэб, харин тэрэ уйдхарай таанадые Бурханда хандуулһанда баярланаб. Тэрэ уйдхарыетнай Бурхан ашаглаа, тиин бидэ таанадта ямаршые гэм хүргөөгүйбди.

¹⁰Бурханай ашаглаһан уйдхар зүрхэ сэдхэлые хубилган абаралгада хүтэлдэг, тиин энээн тухай халаглахын хэрэггүй. Харин юрын уйдхар үхэл асардаг юм.

¹¹Бурхан танай уйдхартай юу хээб, харыт: таанад ехэл оролдосотой болоот, гэм зэмэгүй байһанаа тон нарин нягтаар хамгаалдаг болоот, ямар уур сухалтай байбат, ямараар гайхажа ханабат, ямар хэшээл оролдосотой болобот, буруутаһан зоние хэхээхэдэ бэлэн болобот! Энэ хэрэгтэ алишые талаһаа алдуу дутагдал гаргангүй өөһэдыгөө харуулбат.

¹²Тиимэхээ би тэрэ бэшэгээ бэшэһэншые байбал, доромжолһон хүнэй гү, али доромжолуулһан хүнэй тулада бэшээгүй хүнби, харин маанадта хэды анхарал хандуулжа байһыетнай Бурханай урда таанадта тайлбарилхын тула бэшээ хүнби.

¹³Эдэ бүхы ябадалаар бидэ ехэл урмашаабди. Энэ урмандамнай нэмэжэ Тит өөрынгөө баяраар бидэниие үшөө ехээр баярлуулаа. Таанад булта Титэй һанал бодолые заһаа юм байнат.

¹⁴Би тэрэнэй урда таанадаар бахархааб, тиин таанадшые намайе эшээжэ улайлгаагүйт. Бидэ таанадта ходо үнэн зүбые хэлэжэ байдагбди, тон тиигэжэл мүнөө Титэй урда таанадаар бахархаһан ябадални үнэн зүб юм.



¹⁵Захяа заабаринуудыень дүүргэхэдэ бултанайтнай бэлэн байдагые, хүндэлэн тэрэниие угтажа абадагые нанан, тэрэ таанадта бүрил хайн болоно.

¹⁶Таанадта бүрин найдажа болохо байһандаа би ехэл баяр жаргалтай байнаб.

Коринфынхидтэ 2-дохи 8

Иерусалимай хүзэглэгшэдтэ туһалха тухай

¹Аха дүүнэрнай, Бурханай үршөөл хайра Македониин хүзэглэгшэдэй бүлгэмүүдтэ ямар юумэ бүтээһые таанадта дуулганабди.

²Тэдэнэр бэрхэшээл зоболонгуудаар ехэтэ туршуулһаншье хаа, аргагүй ехэ баяртай байдаг. Тэдэнэр үгытэй ядуу байһаншье хаа, үгэхэдөө аргагүй баян бардам байгаа.

³Тэдэнэр шадаха зэргээрээ, бүри шадахаһаа үлүү ехээр үгөө гэжэ би гэршэлнэб. Өөһэдынгөө хайн дураар тиигээ юм.

⁴Иерусалимай хүзэглэгшэдтэ туһалха ханаатайгаар тэдэнэр маанадые аргагүй ехээр гуйһан байна.

⁵Тэдэнһээ хүлеэжэ найдажа байһанһаамнай үлүү юумэ тэдэнэр хэһэн юм. Тэдэнэр өөһэдыгөө түрүүн Дээдын Эзэндэ үргэбэ, һүүлдэнь Бурханай эрхэ хүсэлөөр маанадташье үргэбэ.

⁶Тиимэһээ бидэ танайда хэжэ эхилһэн буянта ажалые түрүүн түгэсыш даа гэжэ Титые гуйһабди.

⁷Таанад хүзэг этигэлээрээ, үгэ хүүрээрээ, мэдэлгээрээ, оролдосоороо, маанадта хандуулһан хайра дураараа аргагүй баян бардам хүнүүд гээшэт. Тиимэһээ энэшье үлзы хайн ажалаа хэнһээшье үлүү хайнаар дүүргэхыетнай хүсэнэбди.

⁸Би таанадые захирнагүйб, гэхэтэй сасуу бусад зоной аргагүй ехээр туһалха дуратай байһые харуулан, хайра дурантай гүнзэгы аа гү гэжэ туршанаб.



⁹Таанад манай Дээдын Эзэн Иисус Христосой үршөөл хайрые мэдэнэ ха юмта. Тэрэ баян байһан аад, танай аша туһада үгытэй ядуу болоо. Өөрынгөө үгытэй ядуу байдалаар тэрэ таанадые баяжуулаа.

¹⁰Таанадта һаналаа хэлэхэ һанаатайб. Үнгэрһэн жэл эхилһэн юумэе мүнөө дүүргэбэлтнай таанадта һайн лэ байха һэн. Таанад гансал хэхэдээ бэшэ, харин хэхэ гэжэ шиидэхэдээшье эхи табигшад һэнта.

¹¹Харин мүнөө ажалаа гүйсэдхэгты. Шадаха зэргээрээ туһаламжа хүргэбэл, таанад үгэхэл гэжэ байһанаа үгэбэт гэжэ баталхат.

¹²Туһалхые аргагүй хүсэжэ байбал, таанад өөһэдтөө байхагүй юумэнһээ бэшэ, харин байһан юумэнһээ үгэхэт гэжэ Бурхан хүлеэнэ ха юм.

¹³Би танай ажамидарал хүшэр хүндэ болгон, бусад зоной ажамидарал хүнгэлхэ гэжэ оролдоногүйб, харин нэгэ жэгдэ байлгахын тула тиигэнэб.

¹⁴Мүнөө сагта таанадта элбэг дэлбэг байһан юумэн дуталдажа байһан зоние дэмжэхэ, харюудань тэдэ зон үлүү юумэтэй болоходоо дуталдахадатнай таанадтай хубаалсаха. Тиигэжэ булта нэгэ жэгдэ байха юм.

¹⁵«Ехэ юумэ суглуулһан хүн үлүү юумэгүй байгаа, харин үсөөн юумэ суглуулһан хүн дутагдалгүй байгаа», – гэжэ Нангин Бэшэг соо бэшээтэй байдаг ха юм.

Тит ба тэрээнтэй хамта ажаллагшад тухай

¹⁶Бидэндэл адляар таанад тухай бодожо байха боломжо Тидтэ олгоһон Бурханда баяр баясхалан хүргэнэб.

¹⁷Тэрэ гансал манай гуйлтаар таанадта ошоо бэшэ, харин таанад тухай аргагүй бодожо байһан ушарһаа өөрынгөө һайн дураар таанадта ошохо гэжэ шиидээ юм.



¹⁸Тэрээнтэй хамта бидэ найн Мэдээсэл номнононойнгоо түлөө бүхы хүзэглэгшэдэй бүлгэмүүдтэ магтаалда хүртэжэ байһан хүзэглэгшэ дүүгээ ябуулжа байнабди.

¹⁹Тэрээнһээ гадна хүзэглэгшэдэй бүлгэмүүд тэрэ хүниие замаймнай нүхэр боложо, буянта хэрэгээ бүтээхэдэмнай маанадта туһалхаар хунган табяа юм. Энэ ажалаа бидэ Дээдын Эзэнэй алдарай тулада ба Иерусалимда ажамидардаг тэрэнэй хүнүүдтэ аргагүй ехээр туһалха дуратай байһанаа баталан дүүргэнэбди.

²⁰Маанадта даалгаһан элбэг баян үргэлэй түлөө хэншые маанадые шүүмжэлхэгүйн тула бидэ тэрэниие эльгээжэ байгаа хүмди.

²¹Ушарынь хэлэхэдэ, бидэ гансал Бурханай урда бэшэ, харин хүн зоной урда үнэн зүб юумэ хэхэ гэжэ оролдонобди.

²²Үнөөхи хоёр дүүнэрһээ гадна бидэ оло дахин туршуулһан, таанадта аргагүй этигэжэ байһан дээрэһээ тон ехээр туһалха дуратай байһан үшөө нэгэ дүүгээ ябуулнабди.

²³Тит тухай хэлэбэл, тэрэ минии нүхэр, намтай хамта таанадта туһалдаг юм. Тэрээнтэй ябаһан нүгөө хүзэглэгшэ дүүнэр тухай хэлэбэл, тэдэнэр хүзэглэгшэдэй бүлгэмүүдэй түлөөлэгшэд, Христосые алдаршуулагшад гээшэ.

²⁴Тиимэһээ хүзэглэгшэдэй бүлгэмүүдэй мэдэжэ байхаарнь тэдэндэ өөһэдынгөө хайра дурые харуулагты, манай бахархал байһанаа баталагты.

Коринфынхидтэ 2-дохи 9

Юумээр дуталдаһан хүзэглэгшэдтэ туһалха тухай

¹Иерусалимда ажаһуудаг Бурханай хүнүүдтэ туһалха дэмжэхэ тухай таанадта дахин һануулха хэрэггүй байха.

²Таанадай туһалха дуратай байһан тухай би мэдэнэб, тиин Македониин хүн зоной урда би таанадаар бахархаа хүм. «Ахайяын хүзэглэгшэд үнгэрһэн жэлһээ хойшо туһаламжа үзүүлхэдэ бэлэн



байна», – гэжэ би хэлээ хүнби. Тиигэжэ танай зүдхэмжэ тэдэнэй олониенень үргэл хэхэдэ баһал зүдхүүлһэн байгаа.

³Тиигэжэл таанадые магтаһан үгэнүүдни хоһон үгэнүүд байшахагүйн тула би хүзэглэгшэ дүүнэрээ таанадта ябуулаа хүм. Харин минии хэлээшээр таанад туһаламжынгаа мүнгэ бэлдээд байгаарайгты.

⁴Зүгөөр Македониин зоной таанадта ошоходо, тэрэтнай бэлэн байха ёһотой. Үгы һаа, бидэшье, үшөө ехээр таанадшье эшэхэ улайха болохолта.

⁵Тиимэхээ эдэ хүзэглэгшэ дүүнэрэй намһаа урда ошоод, таанадай амалһан үргэлые эртэнһээ бэлдээд байбал зүб гэжэ би бодооб. Тиигэбэл үргэл туһаламжатнай минии ерэхэдэ бэлэн болоод, таанадай мүнгөө харамнангүй, һайн дураараа элбэг дэлбэгээр үргэһыетнай харуулхал.

⁶Багаар тариһан хүн бага ургаса абаха, ехээр тариһан хүн ехэ ургаса абаха гэжэ таанадта һануулжа хэлэнэб.

⁷Хүн бүхэнтнай дурагүйгөөр гү, али баалалтаар юумэ бү үргэг, харин һанаандаа шиидэһэн зэргээр лэ үгэг. Бурхан баяртайгаар үгэжэ байһан хүндэ дуратай байдаг ха юм.

⁸Бурхан таанадта хэрэгтэй юумэнһээ үлүүшье үгэжэ шадаха, тиимэхээ таанад хододоо өөһэдтэтнай хүрэхэ, үшөө элдэб янзын буянтай хэрэгүүдые бүтээхэдэ хүрэхэ юумэтэй байхат.

⁹«Тэрэ үгытэй дуталдаһан зондо элбэг дэлбэгээр үгөө юм, Тэрэнэй бардам гар хэтын хэтэдэ оршожо байгаа юм», – гэжэ Нангин Бэшэг соо Бурхан тухай бэшээтэй байдаг.

¹⁰Тариха таряа, эдихэ хилээмэ үгэдэг Бурхан таанадта хэрэгтэй таряа, мүн бардам гарһаатнай баян ургаса үгэхэ.

¹¹Тиигээд таанадай ямаршые юумэ үгэхэдэ бардам гартай байхынтнай тула тэрэ таанадые бүхы юумээр баяжуулжа байха, тиимэхээ маанадай бадар хубаахада олон зон Бурханда баяр баясхалан хүргэжэ байха.

¹²Юундэб гэхэдэ, энэ буянтай албатнай гансал Иерусалимда ажаһуудаг Бурханай хүнүүдэй дутагдалнуудые хангадаг бэшэ, харин олоной дунда Бурханда баяр баясхалан хүргэхэ дурыень халяадаг юм.

¹³Таанадай Христос тухай мэдээсэлые баримталжа байһые, тэрэнэ баталан өөһэдтэйнэ болон бусад зонтой бардам хубаалсажа байһые хараһандаа тэдэ Бурхание алдаршуулна.

¹⁴Тиимэхээ таанадаар дамжан Бурханай бүтээһэн үршөөл хайрын түлөө тэдэ зон таанадта ехэ найнаар хандажа, хойноһоотнай зальбаржа байдаг юм.

¹⁵Үнэлшэгүй бэлэгэйнэ түлөө Бурханда баяр баясхалан хүргэл!

Коринфынхидтэ 2-дохи 10

Павел Христосой түлөө хэжэ байһан ажалаа хамгаална

¹Таанадтай байхадаа даруу номгон, таанадһаа холо болоходоо таанадта хатуу шэрүүн гүүлэгдэдэг би Павел таанадые Христостой адли даруу номгон, энхэргэн зөөлэн зангаар гуйнаб.

²Таанадта ошоходоо хатуу шэрүүн үгэнүүдые хэрэглэхгүй байхыемни хэшээгээрэйгты. Зүгөөр маанад тухай өөдгүй һула зон гэдэг нобшонуудта би заабол хатуу шэрүүн үгээ хэлэхэб.

³⁻⁴Бидэ энэ дэлхэйдэ ажамидаржа байбашье, тулалдаанда хэрэглэдэг буу зэбсэгүүдые хубиингаа ашагта хэрэглэдэггүйбди. Бидэ тэдэ зэбсэгүүдэй хүсэ Бурханай аша туһада хэрэглэнэбди: хэрэмнүүдые һандаргадагбди, ама хэрүүл зогсоодогбди,

⁵Бурхание мэдэрхэдэ һаалта болоһон элдэб янзын бэрхэшээлнүүдые усадхадагбди, Христосой мэдэлдэ оруулхаар бүхы һанал бодолнуудые эзэлдэгбди.

⁶Тиигээд Христосой мэдэлдэ бүрин ороходотнай, тэрэнэй захяануудые зүршэһэн ябадалнуудыетнай бултыень хорин хэһээжэ байхабди.

⁷Таанад юумэнүүд тухай гансал гадаада талаарнь тухайлнат. Христосой мэдэлдэ байнаб гэхэн бата этигэлтэй хүн өөртэйнъ тон адляар Христосой мэдэлдэ бидэнэйшье байһые мэдэрхэ ёһотой.

⁸Таанадые хандарган хосороохын тула бэшэ, харин һэргээн бодхоохын тула Дээдын Эзэнэй маанадта үгэхэн эрхэ засаг тухай хэтэрхэй ехээр һайрхабашье, би эсэсэй эсэстэ ходо үнэн зүбые хэлэжэ байхаб.

⁹Тиихэдэ гансал бэшэг соогоо таанадые айлганаб гэжэ бү бодооройгты.

¹⁰«Павелай бэшэгүүд хатуу, шэрүүн байдаг, харин маанадтай байхадаа тэрэ өөрөө зөөлэн, үгэнүүдыньшье энхэргэн байдаг», – гэжэ таанадай зариман хэлэхэн байна.

¹¹Тиигэжэ хэлэхэн хүнүүд иимэ юумэ ойлгохо ёһотой: таанадтай байхадаашье би бэшэгтээ бэшэхэн ёһоороол болохоб.

¹²Өөһэдыгөө һайрхажа танилсуулдаг зонтой бидэ өөһэдыгөө зэргэсүүлхээ гү, али сасуулхаяа зүрхэлхэгүй байнабди. Тэдэнэр ямар тэнэгүүд гээшэб! Тэдэнэр өөһэдыгөө өөһэдынгөө хэмжүүрээр хэмжэнэ, өөһэдыгөө өөһэдынгөө зарга шүүбэрээр шүүбэрилнэ.

¹³Зүгөөр бидэ Бурханай маанадта тогтоохон хэмжээ хэтэрүүлнэгүйгөөр өөһэдыгөө магтахабди. Тэрэ тогтоогдоһон хэмжээндэ танай дунда ажаллахамнай баһа оролсоно.

¹⁴Тиимэхээ Христос тухай һайн Мэдээсэлтэй таанадта ерэхэдээ бидэ маанадай ажаллажа байха ёһотой хилые зүршөөгүй хүмди.

¹⁵Тиигээд бидэ Бурханай маанадта тогтоохон хилын саана ажаллажа байһан бусад зоной ажалаар һайрханагүйбди. Харин танай хүзэг этигэлэй бэхижэхэдэ таанад Бурханай тогтоохон хэмжээ хэтэрүүлэнгүй маанадые һайрхан магтахат гэжэ найданабди.

¹⁶Тиигэжэ бидэ ондоо хүнэй хэһэн ажалаар найрхангүй, таанадһаа гадуур бусадшые оронуудаар һайн Мэдээсэлые номнохо аргатай байхабди.

¹⁷«Һайрхаха дуратай хүн Дээдын Эзэнэй бүтээһэн ажалаар лэ найрхаг!» – гэжэ Нангин Бэшэг соо бэшээтэй байдаг.

¹⁸Өөрыгөө магтаһан хүн бэшэ, харин Дээдын Эзэнэй магтаалда хүртэһэн лэ хүн үнэхөөрөө һайшаагдаба гээшэ.

Коринфынхидтэ 2-дохи 11

Павел ба хуурмаг элшэнэр тухай

¹Тэнэг зан гаргахадамни тэсэбэритэй байһайт гэжэ хүсэнэб. Хэрэг дээрээ тиимэл байдаг ха юмта даа.

²Би Бурхандад адляар таанадта һанаагаа табинаб. Таанадые хүнэй гар хүрөөгүй, арюун басагандал мэтэ гансал хүндэ, Христосто хадамда үгэхэ гэжэ үгөө үгэһэн байнаб.

³Могой мэхэ гохо гарган Евые яажа мэхэлээ һэм, тон тиигэжэл таанад мэхэлүүлээд, Христосто үнэн сэхэ, арюун сэбэр һанал бодолнуудтнай хубилшахагүй аа гү гэжэ би айнаб.

⁴Хэрбээ хэн нэгэнэй таанадта маанадай номноһонһоо ондоо Иисусые номнобол, али маанадһаа тогтоожо абаһанһаа илгаатай ондоо һүлдые, һайн мэдээсэлые үгэбэл, таанад тэдэниенъ амархан абахаар байна ха юмта.

⁵Тэдэ «агууехэ элшэнэр» гэгдэдэг зонһоо би юугээрээшые дутанагүйб гэжэ бодоноб.

⁶Би уран гоё хэлэтэй бэшэб, гэхэтэй сасуу эрдэм мэдэлгэтэйб. Таанад өөһдөөшые энээниие элдэб ушарнуудһаа тухайлһан мэдэһэн байнат.

⁷Таанадые дээшэнь үргэхын тула өөрыгөө доошонъ даража байхадаа, Бурханай һайн Мэдээсэлые түлөөһэгүйгөөр таанадта номноходоо, би буруу юумэ хээ аалби?



⁸Ондоо хүзэглэгшэдэй бүлгэмүүдые дээрмэдэн, тэдэнһээ түлөөһе абажа байгаад, би таанадта алба хэжэ байгааб.

⁹Таанадтай байхадаа мүнгөөр дуталдажашье байха сагтаа таанадта ашаан болодоггүй һэм. Македониһоо ерэнэн хүзэглэгшэд намда хэрэгтэй юумэнүүдые асаржа үгөө һэн. Урдань таанадта ашаан болохогүй гэжэ оролдодогтоол адляар ерээдүйдэшье оролдожо байхаб.

¹⁰Энэ бахархалыемни Ахайяын нэгэшье хүн буляжа шадахагүй гэжэ зосоомни оршодог Христосой үнэн зүбөөр баталан хэлэнэб.

¹¹Таанадта дурагүй байһандаа иимэ юумэ хэлэнэ аалби? Таанадта аргагүй ехээр дуратай байһыемни Бурхан мэдэхэ юм.

¹²Тэдэ бусад «элшэнэрэй» маанадтайл адли юумэ хэнэбди гэжэ бахархаха боломжогүй байхын тула мүнөө хэжэ байһан юумэеэл хэжэ байхаб.

¹³Тэдэ худалша ажалшад, хуурмаг элшэнэр Христосой бодото элшэнэр байһан хэбэр үзүүлдэг.

¹⁴Эндэ гайхалтай юумэн үгы: сатана өөрөөшье гэрэл туяагай эльгээмэлэй дүрэ дүрсэлэн мэхэлдэг ха юм.

¹⁵Тиимэһээ тэрэнэй зарасанарай үнэн зүбэй зарасанарай дүрэ дүрсэлэн, тэдээндэл адляар харагдахада ямаршье гайхамаар юумэн үгы. Эсэстээ тэдэнэр хэнэн юумэнүүдэйнгээл үрэ дүнгые абаха.

Христосой түлөө Павелай зобоһон тухай

¹⁶Хэншье намайе тэнэг байна гэжэ бү бодог гээд дахин дабтажа хэлэнэб. Харин тиигэжэ бодоо юм һаа, тэнэгтэхэ, бага зэргэ өөрөөрөө һайрхаха боломжо үгыт даа.

¹⁷Тиигэжэ һайрхахадаа би Дээдын Эзэнэй һанаһанаар һайрхаагүй байһамни мэдээжэ, харин үнэхөөрөө тэнэг байһандал хэлэнэб.

¹⁸Олон хүнүүд уг гарбалаараа һайрхадаг, тиин бишье тиигэжэл һайрхахамни.

¹⁹Таанад өөһэдөө ехэл сэсэн ухаантай, тиин тэнэг үбэштэй зондо ехэл тэсэбэритэй байдаг ха юмта!

²⁰Таанадые богоолшолходо гү, али ашаглахада гү, али мэхэлхэдэ гү, али дээрһээтнай харахада гү, али нюурыетнай альгадахада гү, таанад үнэндөө тэсэбэритэй байдагта.

²¹Тиигэжэ өөһэдыгөө абажа ябадаг зөөлэн нуланууд байгаади гэжэ эшэжэ байгаад хэлэнэб! Хэрбээ бусадай өөһэдөөрөө найрхахаяа зүрхэлбэл, бишье зүрхэлнэб. Тиихэдээ минии тэнэг байһамни мэдээжэ.

²²Тэдэнэр еврейнуудди гэнэ гү? Тиин бишье тиимэб. Тэдэнэр израильшууд гү? Тиин бишье тиимэб. Тэдэнэр Абраһамай үри һадаһад гү? Тиин бишье тиимэб.

²³Тэдэнэр Христосой зарасанар гү? Тиихэдэ би тэдэнһээ үлүү һайн зарасань гээшэб. Тиигэжэ үбэштэйһэндэл хэлэхэмни мэдээжэ. Би тэдэ зонһоо үлүү ехээр ажаллажа, бүри оло дахин түрмэдэ орооб, тоогүй оло дахин ташуурдуулан хэхээлгээд, үхэлэй хажууда байгаа һэнби.

²⁴Иудейнууд намайе табан удаа гушан юһэ дахин ташуурдаһан байгаа.

²⁵Гурба дахин намайе модоор сохёо, нэгэтэ һайса шулуудаа юм. Гурба дахин би кораблиин хүмэрилгэдэ орооб, нэгэтэ би нэгэ үдэрэй, нэгэ һүнийн туршада далайн уһан соо байгааб.

²⁶Оло дахин аяншалхадаа би аюул оһолдо орожо байгааб: мүрэнүүдые гаталхадаа, дээрмэшэдтэй дайралдахадаа, өөрын яһатан зонтой байхадаа, бусад яһатанаар ябахадаа, хотодо ябахадаа, сүл губида ябахадаа, далайгаар тамархадаа, хуурмаг хүзэгтэнтэй уулзахадаа аюул оһолдо орожо байгааб.

²⁷Би ажаллажа, тулин зүдэржэ, нойро зүүдэгүйшье ябааб, үлэн хооһон, эдихэ хоолгүй, уха ундагүйшье байгааб, хүйтэн нойтондо, нүсэгэн салдаганшье ябааб.



²⁸Бусад юумэнүүдые тоолонгүй хэлэбэл, би бүхы хүзэглэгшэдэй бүлгэмүүдтэ ханаагаа табиха үдэр бүрийн үүргэтэй хүм.

²⁹Хэн нэгэнэй нулархада, бишье нулархан шэнги байдагби. Хэн нэгэнэй хорхойтолгодо абтан нүгэл үйлэдэхэдэ, бишье тэрэнэй түлөө сухалдадагби.

³⁰Хэрбээ бахархаха ёһотой байбал, минии нула байһыемни харуулһан юумэнүүдээр бахархаха байнаб.

³¹Бурхан болон Дээдын Эзэн Иисусай Эсэгэ хэтын хэтэдэ үреэл магтаалда хүртэжэ байһай: хэзээшье худалаар хэлэдэггүй байһыемни тэрэ мэдэхэ.

³²Дамаск хотодо байхадамни Арет хаанай захирагшань намайе барихын тула хотын хаалгыг хахижа байгаа һэн.

³³Харин ханада хэгдэһэн нүхөөр намайе түрсүүг соо нуулгаад доошонь буулгаа юм. Тиигэжэ би зугадаһанби.

Коринфынхидтэ 2-дохи 12

Павелай хараһан үзэгдэл тухай

¹Һайрхахада ямаршье ашаг туһагүй байбалшье, би һайрхаха ёһотой байнаб. Зүгөөр мүнөө Дээдын Эзэнэй элирүүлһэн үзэгдэл ба гэршэлгэнүүд тухай хэлэхэмни.

²Арбан дүрбэн жэлэй саада тээ дээдын гурбадахи тэнгэридэ дэгдүүлэгдэһэн Христосто хүзэглэгшэ хүниие би мэдэхэб. (Үнэхөөрөө тэрэ дэгдүүлэгдэһэн байгаа гү, али үзэгдэл хараһан байгаа гү, би мэдэнэгүйб, гансал Бурхан тэрэниие мэдэхэ).

³Түрүүн хэлэһэндээл адляар тэрэ хүн үнэхөөрөө дэгдүүлэгдэһэн байгаа гү, али үзэгдэл хараһан байгаа гү, би мэдэнэгүйб, гансал Бурхан тэрэниие мэдэхэ юм.

⁴Зүгөөр тэрэ диваажинда дэгдүүлэгдээд, тэндэ дуулгажа болохогүй хэзээшье хэлэгдээгүй юумэнүүдые дуулаа юм гэжэ би мэдэнэб.



⁵Тиимэхээ би тэрэ хүнөөр бахархахамни, харин өөрынгөө ахир нула байһанһаа бэшэ юумээр бахархахагүйб.

⁶⁻⁷Хэрбээ бахархахаяа һанабал, би мунхаг тэнэг бэшэ байха һэнби, ушарынь юуб гэбэл, би үнэн зүбые хэлэхэ һэнби. Харин би бахархахагүйб, юундэб гэбэл, минии хараһан олон үзэгдэлнүүдээр бэшэ, харин хэжэ байһан юумэнүүдээрни, хэлэжэ байһан үгэнүүдээрни хүнүүд нам тухай тухайлһай гэжэ бодоноб. Агууехэ үзэгдэлнүүдые хараһанаараа бахархажа, дээгүүр үргэгдэхэгүймни тула бэндэмни үбшэнтэй хадхуур хээтэй: сатанагай эльгээмэлдэл намайе хадхажа туляадаг юм.

⁸Би энээн тухай Дээдын Эзэндэ гурба дахин зальбарһан байгааб, тэрэ хадхуурые намһаа абажа хаяхыень гуйһан байгааб.

⁹«Минии үршөөл хайрал шамда яһала хангалтатай хүрэхэ, хүр хүсэн ахир нула байхада аргагүй һайнаар элирэн харагдадаг юм», – гэжэ тэрэ намда харюусаа. Тиимэхээ би Христосой хүсэ шадалаар дүүрэхын тулада ахир нула байһанаараа бахархаха ехэл дуратай байнаб.

¹⁰Христосой түлөө ахир нула байхадаа, доромжолуулхадаа, юумээр дутажа ябахадаа, хашуулан мүрдүүлхэдээ, зүдэржэ зобожо ябахадаа би баяртай байдаг хүнби. Ушарынь юуб гэбэл, нулахан байхадаа би хүсэ шадалтай байдаг хүнби.

¹¹Би өөрыгөө тэнэг болгооб, зүгөөр тиигэһэмни таанадай зэмэ юм. Таанад нам тухай һайн үгэнүүдые хэлэхэ ёһотой байгаат. Би хэншье бэшэшье һаа, тэдэ «дээдын элшэнэрһээ» юугээрээшье дутанагүйб.

¹²Танай дунда байхадаа би бодото элшэн байһанаа баталан үсэд сухаришагүй байгааб, олон гайхамшагта үзэгдэлнүүдые, үйлэ хэрэгүүдые бүтээгээб.

¹³Намда мүнгөөр тухалаагүйһөө гадна таанад бусад хүзэглэгшэдэй бүлгэмүүдһээ юугээр доро байгаабта? Таанадта ашаан болоогүй тэрэ гэмьемни хүлисөөрэйт даа.

Павел Коринфын хүзэглэгшэдтэй гурбадахияа уулзана

14Гурбадахияа таанадтай ошожо уулзахаяа би бэлэн байнаб, тиихэдээ таанадта ашаан болохогүйб. Би таанадай алта мүнгэ бэдэрнэ бэшэб, харин таанадые өөһэдыетнай бэдэрнэб. Ушарынь юуб гэхэдэ, үхибүүд аба эжыдээ алта мүнгэ суглуулха бэшэ, харин аба эжынь үхибүүдтээ суглуулжа байха ёһотой юм.

15Би өөрыгөө, намда байһан юумэнүүдээ дууһан баяртайгаар таанадай түлөө үрихэ байнаб. Минии таанадта аргагүй ехээр дуратай байхада таанад намда багаар дуратай байха аалта?

16Таанадта ашаан болоогүйб, тэрэ тон зүб, гэхэтэй сасуу мэхэ гохо гарган, хууран таанадые гартаа оруулааб гэжэ таанад хэлэхэдээ болохот.

17Таанадта ябуулһан хүнүүдэй гараар таанадһаа ашаг олзо олодог байгаа аалби?

18Таанадта Титэй ошохые гуйгаа һэнби, тэрээнтэй хамта нэгэ хүзэглэгшэ дүүгээ ябуулаа һэнби. Тит таанадһаа ашаг олзо оложо байгаа аал? Тит бидэ хоёр нэгэ һүлдөөр хүтэлүүлэн, нэгэ харгы замаар ябадаг бэшэ һэн аалди?

19Таанадай урда бээ хамгаалжа байнабди гэжэ ман тухай таанад саг үргэлжэ бодожо байнат гэжэ би мэдэнэб. Бидэ Бурханай урда Христосой маанадһаа дуулаха дуратай юумыел хэлэнэбди. Тиин, инаг хайрата аха дүүнэрни, маанадай бэшэжэ байһан юумэнүүд таанадайл аша туһада бэшэгдэнэ.

20Таанадта ошоходоо, бидэ бэе бээдээ урмаа таһархагүй гүбди гэжэ айн болгоомжолжо байнаб. Таанадай дунда хэрүүл ама, атаа жүтөө, уур сухал, хэрэлдээ, хардалга, хоблолго, омогорхолго, журамгүй байдал байгаагүй аабза гэжэ айн болгоомжолжо байнаб.

21Дахинаа таанадта ошоходомни таанадай урда намайе Бурхамни эшээхэгүй аал, тиин урдань нүгэл шэбэлдэ унаад, хэһэн бузар муухай

ябадалнуудаа, зальхайралга забхайралгаяа, ташаяан хурисалаа орхижо гэмшээгүй хүнүүд тухай би шаналан уйлахагүй аалби гэжэ айн болгоомжолноб.

Коринфынхидтэ 2-дохи 13

¹Мүнөө гурбадахияа таанадтай уулзахаар ошожо байнаб. «Ямаршье зэмэлэлгэ хоёр гурбан гэршэнэрэй баталжа шадаха байбал үнэн болодог», – гэжэ Нангин Бэшэгтэ хэлээтэй байдаг.

²Дахин ерэхэдээ би урдань нүгэл шэбэл үйлэдэһэн зоние, бусадшье зоние үршөөхэ хүлисэхэгүйб. Хоёрдохиёо таанадта ошоходоо би тиигэжэ һэргылээ һэнби. Мүнөөшье таанадай дунда үгы байхадаа дахин дабтажа хэлэнэб.

³Намаар дамжуулан Христос хэлэнэ гү гэхэн баталалга таанад бэдэрнэт. Тиихэдэ таанадтай харилсахадаа Христос ахир һула бэшэ юм, зүгөөр тэрэ таанадай дунда хүсэ шадалаа харуулжа байгаа юм.

⁴Хэрээһэн дээрэ хадуюлан саазалуулхадаа тэрэ ахир һула байбашье, Бурханай хүсэ шадалаар амиды ябаа. Тэрээнтэй нэгэдэхэдээ бидэ ахир һуланууд байнабди, тиин тэрээнтэй хамта Бурханай хүсэ шадалаар амиды ябахыемнай таанад харахат.

Һүүлшын һэргылэмжэнүүд, мэндэшэлгэнүүд

⁵Һүзэг этигэлтэй ажамидаржа байна гүт гэжэ өөһэдыгөө шалгагты, өөһэдыгөө туршагты. Иисус Христос таанадай досоо байна гэжэ таанад ойлгоногүй аалта? Ойлгоогүй һаа, таанад шалгалтаа үгөөгүй гээшэт.

⁶Харин маанадай шалгалта үгэхэн тухай таанад мэдэхэт гэхэн найдалтай байнаб.

⁷Буруу юумэ бү үйлэдэһэйт гэжэ бидэ Бурханда зальбарнабди. Шалгалтаяа баряабди гэжэ харуулхын тула зальбарнаггүйбди, харин маанадай шалгалтаяа үгөөгүйшье һаа, таанадай үнэн зүб юумэ бүтээжэ ябахын тула тиигэжэ зальбарнабди.



⁸Бидэ үнэн зүбэй урдаһаа юушые хэжэ шадахагүйбди, харин бүхы юумые үнэн зүбэйл түлөө хэнэбди.

⁹Маанадай ахир һула байхада, харин таанадай хүсэтэй байхада бидэ баярладагбди. Тиигээд баһал таанадай заһархын түлөө бидэ зальбаржа байдагбди.

¹⁰Таанадта ошоходоо хатуу шэрүүнээр хандахагүйн тула таанадтай байхагүйдөө би эдэ бүхэниие бэшэнэб. Һүүлэй һүүлдэ Дээдын Эзэнэй намда үгэһэн эрхэ засаг таанадые бутарган унагаахын тула бэшэ, харин һэргээн бодхоохын тула үгтөө юм.

¹¹Мүнөө, аха дүүнэрни, баяртай! Заһарха гэжэ оролдожо, хэлэһэн юумэнүүдыемни анхаржа, хоорондоо эбтэй эетэй, энхэ тайбан байгыт даа. Хайра дуран ба энхэ тайбан үршөөдэг Бурхан таанадтай оршожо байһай!

¹²Бэе бэеэ арюунаар таалажа мэндэшэлээрэйт. Бурханай хүнүүд булта таанадта амар мэндые дамжуулна.

¹³Дээдын Эзэн Иисус Христосой үршөөл хайра, Бурханай хайра дуран та бүхэнтэй оршохонь болтогой, Нангин һүүлдэ та бүхэниие нэгэдхэжэ байхань болтогой!



Галадуудта

Галадуудта 1

¹Нэгэ хүнэй гү, али хэдэн хүнүүдэй эрхэ мэдэлээр бэшэ, харин Иисус Христосой, тэрэниие амидыруулһан Эсэгэ Бурханай мэдэлээр шэлэгдээд, элшэнгээр табигдаһан Павелһаа,

²тиин тэрээнтэй хамта байгааша хүзэглэгшэдһөө Галат можын хүзэглэгшэдэй бүлгэмдэ

³Эсэгэ Бурханһаа болон манай Дээдын Эзэн Иисус Христосхоо амар мэндые хүргэнэбди.

⁴Христос болбол манай Эсэгэ Бурханай эрхэ мэдэлээр бидэниие нүгэл шэбэлһээ, оршон үеын хорото муу байдалһаа аршалан сүлөөлхын түлөө ами бээе үргэл болгожо үгэһэн байна.

⁵Эсэгэ Бурханда хэтын хэтэдэ алдар соло! Болтогой.

Гансал һайн Мэдээсэлые баримталха ёһотойт

⁶Агууехэ үршөөл хайраараа таанадые дуудаһан Христосхоо иимэ түргөөр холодожо, ондоо хургаал номнолдо хулжан ороходотнай би ехэ шаналжа байнаб.

⁷Христосой хургаалһаа ондоо үнэн зүб хургаал үгы юм! Харин таанадые үймүүлжэ, Христосой хургаалые буруудхаха һанаатай хүнүүд лэ бии.

⁸Таанадта урдань номногдоһон хургаалһаа ондоо хургаалые заһан хүн бүхэн, бишье байгаа һаа, али тэнгэриһээ бууһан Бурханай Эльгээмэлшье байгаа һаа, булта хатуу хэһээлтэдэ хүртэг лэ.

⁹Таанадай хүлеэжэ абаһан хургаалда эсэргүүсэн зүршэһэн юумэндэ хургаһан хүн бүхэн хатуу хэһээлтэдэ хүртэг гэжэ би һаяхан хэлээ һэм, мүнөөшье дахин дабтанаб.

¹⁰Иигэжэ хэлэхэдээ би хүнүүдэй һайшаалда хүртэхээ оролдоно гүб, али Бурханай һайшаалда гү? Иихэдээ хүнүүдтэ һаймһархаяа

оролдоһон болоно гүб? Хэрбээ би хүнүүдэй урда хойгуур гүйдэг байгаа хаа, Христосой зараса байхагүй һэм.

Павелай элшэн болоһон тухай

11 Аха дүүнэрни, минии таанадта номноһон һайн Мэдээсэл хүнүүдээр дамжан ерээгүй юм гэжэ мэдэжэ абагты.

12 Би тэрэниие хүнүүдһээ дуулаагүйб, нэгэшье хүн намайе тэрээндэ хургаагүй, харин Иисус Христос тэрэниие намда нээгээ юм.

13 Урдань иудейн ёһо гуримые бодотоор сахин ажамидаржа ябаһан тухаймни таанад дуулаа ёһотойт. Би Христосто хүзэглэдэг зониие гайтайгаар хашан мүрдэдэг, хандарган хосороодог һэм.

14 Би үбгэ эсэгэнэрэйнгээ ёһо гуримуудые ханалгатайгаар баримталдаг, шажанайнгаа хуули ёһые өөрынгөө үетэнһөө үлүү найнаар сахидаг бэлэйб.

15 Үшөө эхынгээ умайда байхадамни Бурхан агууехэ үршөөл хайраараа намайе шэлэжэ абаад,

16 Хүбүүн тухайгаа үнэн зүбые нээгээд, бусад арадуудта Христос тухай номнохыемни захираа бэлэй. Тиихэдэ би өөртөө хүнгэн харгы шэлээгүй һэм.

17 Намһаа урда элшэнэрээр табигдаһан зонтой уулзахаяашье би Иерусалим ошоогүй бэлэйб. Харин Аравиин газар нютагаар ябаад, һүүлдэнь Дамаск хото бусажа ерээ һэнби.

18 Гурбан жэлэй үнгэрһэн хойно би Пётртой уулзахаяа Иерусалим ошоо бэлэйб. Тэндэ тэрээнтэй арбан дүрбэн үдэр байлсаа һэм.

19 Иисусай дүү хүбүүн Яковһаа бэшэ ондоо элшэнэрые би хараагүй һэм.

20 Таанадта минии бэшэжэ байһан бүхы юумэн үнэн зүб юм гэжэ Бурхан мэдэнэ.

21 Һүүлдэнь би Сириин, Киликиин газар дайдаар ябааб.



²²Иудейн орон нютагта ажаһуудаг Христосто хүзэглэгшэ бүлгэмүүд намайе нюураарни танихагүй байгаа.

²³Урдань тэдэниие хашан мүрдэдэг, хургаалыень һандарган һалгаадаг хүн байһан аад, мүнөө тэрэ хургаалые номнодог гэжэл тэдэ нам тухай дуулаһан байна.

²⁴Намтай тохёолдоһон ушарта баярлан, тэдэ хүзэглэгшэд Бурханиие алдаршуулжа байгаа.

Галадуудта 2

Павел ба Иерусалимай элшэнэр

¹Арбан дүрбэн жэлэй үнгэрһэн хойно би Варнава Тит хоёрые абажа, дахин Иерусалим ерээ бэлэйб.

²Бурханай хүсэһэн хадань би иишэ ерээ һэм. Дэмы юумэ хэжэ байгаагүйгөө тодорхойлхын тула би бусад арадуудта номнодог хургаалаа эгээн хүндэтэ багшанарта баһа хөөрөө бэлэйб.

³Юун гэжэ һананат? Замаймни нүхэр болохо Тит гэдэг грек хүбүүе бэлгээ отолуула гэжэ хэншые баалаагүй юм.

⁴Гансал худал хуурмаг хүзэгтэн энээн тухай хэлээ һэн. Иисус Христосой бидэндэ үгэһэн эрхэ сүлөө тухай тэдэнэр мэдэжэ, бидэниие дахин дарлаха һанаатайгаар тагнуулшад мэтэ мэхэ гохо гарган, бидэнэй дунда нюусаар шурган ороо бэлэй.

⁵Харин бидэ хургаалай бодото удхые хэбээрнь таанадта дамжуулхын тула тэдэнэй үгэдэ ойро зуурашые ороогүй һэмди.

⁶⁻⁹Харин Яков, Кефас (Пётр), Иоанн гэдэг эгээн хүндэтэ багшанар тухай хэлэбэл, урдань тэдэнэй ямар хүнүүд байһаниинь намда хамаагүй, юуб гэхэдэ, Бурхан хүниие яһаарнь илгадаггүй юм. Тэдэнэр һайн Мэдээсэл номнохыемни намда зүбшөөгөө юм. Тэдэ нэрэ хүндэтэй зон бидэнтэй нэгэ ажал хэрэг бүтээжэ байһанаа баталан, Варнава бидэ хоёрой гарые бариба, Бурханһаа үршөөл хайра бидэндэ үгтэһые зүбшөөбэ. Тиигээд бидэ бусад арадуудые, харин тэдэ еврейнүүдые хургахань зүбтэй гэжэ

тоолобо. Юундэ тиигээб гэбэл, еврейнүүдтэ номнохо үүргэ Пётрто Бурханһаа үгтэһэндэл адли бусад арадуудые хургаха үүргэ намда үгтөөд байһые тэдэнэр хараа ха юм. Яажа Пётр Бурханай хүсөөр элшэн болгогдоод, еврейнүүдтэ номнодог бэ, тон тиигэжэл бишье Бурханай хүсөөр элшэн болгогдоод, бусад арадуудые хургадаг болооб.

10Тэдэ элшэнэр Иерусалимай ядуу хүзэглэгшэдэй бүлгэм тухай ханаагаа табижа ябахымнай бидэнһээ гуйгаа бэлэй. Тиимэһээ би энээндэ ханалаа табижа, тэдэ зондо туһалдаг байгаа.

Павел Пётрые Антиох хотодо шүүмжэлбэ

11Пётрой Антиох хото ерэхэдэнь, би тэрэниие шүүмжэлээб, юундэб гэхэдэ, тэрэ өөрыгөө доогуур абажа ябаа.

12Яковай хүнүүдэй Антиох ерэхын урда тээ Пётр бусад арадуудай дундаһаа Христосто хүзэглэһэн зоноор хамта хоол баридаг байгаа. Теэд Яковай зоной ерэхэдэ еврейнүүдһээ айжа, бусад арадуудай дундаһаа хүзэглэһэн зонһоо гэнтэ холодоод, суг эдеэлэлсэхээ болибо.

13Тон тиигэжэл бусад еврей хүзэглэгшэд, тэдэнэй тоодо Варнавашье зүб харгыһаа хадууржа, нюур харадаг болоо.

14Пётр үнэн зүб хургаалай ёһоор бээ абажа ябанагүй гэжэ мэдэхэдээ, би хүн зоной дунда: «Ши еврей хүн аад, бусад арадуудай дунда еврейнүүдэй ёһо гуримаар бэшэ, харин бусад арадуудай гуримаар бээ абажа ябаһан аад, яахадаа тэдэниие еврейнүүдэй ёһо гуримаар ябахыень баалаа хүмши», – гэжэ тэрээндэ сэхэ хэлэбэб.

Хүн Хуули сахиһаараа бэшэ, харин этигэлээрээ абарагдаха

15Бидэшье түрэхэһөө еврейнүүд гээшэбди. Нүгэлтэ бусад арад бэшэ ха юмбибди.

16Теэд нэгэшье хүн Хуули сахижа өөрыгөө хамгаалхагүй, харин Иисус Христосто этигэжэ абарагдаха юм гэжэ бидэ мэдэнэбди. Хуули сахижа «нэгэшье хүн абарагдахагүй» байһан дээрэһээ бидэ Хуули сахяд бэшэ,



харин Иисус Христосто найдан абарагдахабди гэжэ Иисус Христосто этигээбди.

¹⁷Хэрбээ бидэ Христостой нэгэдэн өөһэдыгөө сүлөөлхэ гэжэ байтараа, Хуули сахин нүгэл хэнэбди гэжэ баһа мэдэрбэл, Христос нүгэл хэлгэдэ хамһалсагша болоно гээшэ гү? Үгы даа!

¹⁸Хэрбээ би гараараа һандарган һалгааһан юумээ дахин һэргээн бодхообол, үнэхөөрөө нүгэлтэн болохоб.

¹⁹⁻²⁰Хуули үхэлһөө ондоо юумэ намда үгэжэ шадахагүй хадаа ажамидаралдамни ямаршые удхагүй юм. Тиимэһээ би Бурханай түлөө амидарнаб. Мүнөө би өөрөө амидарна бэшэб, харин Христос зосоомни амидарна. Намда хайра дуратай байжа, минии түлөө өөрыгөө үргэһэн Бурханай Хүбүүндэ һүзэглэн этигэдэг дээрэһээ би мүнөө амиды ябанаб. Би Христостой хамта хэрээһэндэ хадуулааб.

²¹Бурханай үршөөл хайраһаа би арсанагүйб. Хэрбээ гансал Хуули сахижа аршалагдаха аргатай байбал, Христос дэмы наһа бараһан болоно гээшэ.

Галадуудта 3

Этигэл хүзэгтэй байха гү, али Хуули сахиха гү?

¹Ай, мунхаг тэнэг галадууд! Хэн таниие эльбэдэбэ гээшэб? Минии номноходо хэрээһэндэ саазалагдаһан Христосые таанад нюдөөрөө хаража байһандал байгаа бэшэ һэн гүт?

²Таанад Хуули сахижа байһан дээрэһээ гү, али Христосто этигэһэн дээрэһээ Нангин һүлдэдэ хүртэбэ гүт гэжэ би таанадһаа һураха һанаатай байнаб.

³Нангин һүлдөөр дахуулжа ябаһан аад, мүнөө махабад бээдээ татуулаа гүт? Тиихэдээ таанад иимэ балар мунхаг хүнүүд гээшэ гүт?

⁴Али таанадтай ушарһан бүхы юумэн дэмы үнгэрөө гээшэ гү? Дэмы үнгэрөөгүйл байгаа даа!



⁵Хуули сахижа байһан дээрэһээтнай бэшэ, харин Христосто этигэһэн дээрэһээтнай Бурхан таанадта Нангин һүлдые хайрлажа, гайхамшагта үйлэ хэрэгүүдые бүтээгээ юм.

⁶Энээндэл адляар Абраһамай Бурханда этигэхэдэ, Бурхан тэрэниие үнэн сэдхэлтэн гэжэ тоолоо һэн.

⁷Абраһамдал адли Бурханда хүзэглэдэг зон Абраһамай үри һадаһад гэжэ таанар мэдэжэ байгты.

⁸Арадуудые этигэлээрнь Бурхан аршалан сүлөөлхэ юм гэжэ Нангин Бэшэгтэ үни гэхээр уридшалан бэшэгдэһэн байна. Тэндэ Абраһамда: «Бурхан шамаар дамжуулан, бүхы арадуудые абарха», – гэжэ хэлэгдэһэн байна.

⁹Тиимэһээ Бурханда хүзэглэһэн зон Абраһамтай хамта үршөөгдэхэ.

¹⁰Харин Хуули сахижа аршалагдахаб гэжэ һанаһан хүн бүхэн хэхээгдэхэ. Юундэб гэхэдэ, «Хуулиин зүйл бүхэниие үргэлжэ гүйсэдхэжэ байгаагүй хүн бүхэн хэхээгдэхэ», – гэжэ Нангин Бэшэгтэ хэлээтэй байдаг.

¹¹Хуули сахижа байһанаараа хэншье Бурханай абарал үршөөлдэ хүртэхэгүй, юундэб гэхэдэ, Нангин Бэшэгтэ: «Үнэн сэдхэлтэн этигэлээрээ амидарха», – гэжэ бэшэгдэнхэй юм.

¹²Хуули гээшэмнай һүгэдэлгэ бэшэ, тиимэһээ тэндэ: «Хуулиин зүйл бүхэниие гүйсэдхэдэг хүн амидарха», – гэжэ хэлэгдэнэ.

¹³Дээрэмнай бууха ёһотой байһан Хуулиин хэхээлтэһээ бидэниие Христос аршалжа, тэрэ хэхээлтые өөр дээрээ даажа абаһан юм. Тиимэһээ Хуули соо баһа иигэжэ бэшэгдэһэн байна: «Модондо үлгэжэ саазалууһан хүн хараалда хүртөө».

¹⁴Иисус Христосоор дамжан найдуулагдаһан Нангин һүлдые этигэлээрээ тогтоожо абахынь тула Абраһамай үршөөл хайра мүнөө бүхы арадуудта үгтэбэ гээшэ.

Бурханай найдуулга ба Хуули тухай



¹⁵Аха дүүнэрни! Юрэ хэлэбэл, хүнэйшье бэшээд орхиһон һүүлшын захяе хэншье хубилгажа шадахагүй юм.

¹⁶Харин Абраһамда, тэрэнэй үридэ Бурхан найдуулга үгэһэн байгаа. Үри хүүгэдтэш гэжэ хэлэгдээгүй, харин үридэшни гэжэ нэгэл хүн тухай хэлэгдээ, тиин тэрэ нэгэнь – Христос гээшэ.

¹⁷Христос тухай хэлсээе Бурханай баталһан саһаа дүрбэн зуун гушан жэл үнгэрһэн хойно бии болоһон Хуули энэ хэлсээе болуулха аргагүй, тиимэһээ Бурханай найдуулгань хүсэндөө үлэбэ гэжэ би хэлэнэб.

¹⁸Юундэб гэхэдэ, хэрбээ уг залгамжалга Хуулиин ёһоор үгтэдэг һаа, найдалга хэрэггүй байгаа. Гэбэшье Бурхан Абраһамые найдуулһан ёһоороо шагналдаа хүртөөгөө ха юм.

¹⁹Юундэ Хуули үгтэһэн байгаа? Абраһамай үри бэеын ерэхэ гэжэ Бурханай найдуулһан саг хүрэтэр гэмтэ ябадал юун бэ гэжэ ойлгожо байхын тула энэ Хуули үгтэһэн байна. Энэ Хуули хүн зондо Эльгээмэлээр болон зууршалагшаар дамжуулан үгтэһэн байна.

²⁰Төөд Бурхан гансаараа ха юм, тэрэ зууршалагшые хэрэглэдэггүй юм.

²¹Иихэдээ Хуули Бурханай найдуулга буруушаана гү? Үгы даа! Хэрбээ Хуули хүниие абарха аргатай байбал, Хуули гүйсэд сахидаг хүн бүхэн үнэн сэдхэлтэн болохо һэн.

²²Гэбэшье хүн бүхэн нүгэл шэбэлдэ унаад байна гэжэ Нангин Бэшэг соо хэлэгдэнэ. Энэ бэшэгдэһэн бүхэнэй ушарынь гэхэдэ, Иисус Христосто хүзэглэһэн бүхы зон этигэлээрээ Бурханай найдуулһые хүлеэжэ абаха байна.

²³Этигэлэй сагай ерээдүйдэ, этигэл хүзэгэй бидэндэ нээгдэтэр бидэ Хуулиин эрхэ мэдэлдэ ороод байгаабди.

²⁴Иихэдээ Хуули гээшэмнай этигэл хүзэгөөрнай абардаг Христосто этигэхыемнай бидэниие бэлдэһэн шэрүүн хургагша байгаа гээшэ.

²⁵Тиимэхээ этигэлэй сагай ерэхэдэ бидэ энэ шэрүүн хургагшын мэдэлхээ мултаран гараабди.

²⁶Мүнөө таанад булта Иисус Христосто хүзэглэһэн этигэлээрээ Бурханай үхибүүд гээшэт.

²⁷Иисус Христосой нэрэ алдараар уһаар арюудхуулһан зон, таанад булта Иисус Христостой нэгэдэбэ гээшэт.

²⁸Тиимэхээ мүнөө еврейнүүдшье, бусад арадуудшье илгаагүй, барлагуудшье, сүлөөтэйшүүлшье илгаагүй, эрэшүүлшье, эхэнэрнүүдшье илгаагүй. Таанад булта мүнөө нэгэн адли боложо, Иисус Христостой нэгэдэбэт.

²⁹Хэрбээ Христостой нэгэдээд байбал, таанад Абраһамай үри һадаһад гээшэт, тиигээд Абраһамда найдуулһан бүхэниие залгамжалжа абахат.

Галадуудта 4

Таанар зарасанар бэшэ, харин Бурханай үхибүүд гээшэт

¹Уг залгамжалагша балшар үхибүүн ябахадаа бүхы юумэнэй эзэн байбашье, зарасаһаа юугээрээшье илгардаггүй юм.

²Тиимэхээ Эсэгийн тогтооһон саг болзор хүрэтэр тэрэ үхибүүн даалгагдаһан хүнүүдэй болон гэрэй захирагшын харууһа доро байдаг.

³Бидэшье бага балшар наһандаа энэ дэлхэйн эмхи гуримгүй хүсэнүүдэй мэдэлдэ ороод байгаабди.

⁴⁻⁵Харин саг болзорой ерэхэдэ, эхэнэрхээ түрэхэн Хүбүүгээ Бурхан эльгээбэ. Хуулиин эрхэ мэдэлдэ байһан хүнүүдые абархын тула, Бурханай найдуулһан юумэнэй уг залгамжалагшад болгохын тула түлөөһэ үгэжэ, эльгээһэн тэрэ Хүбүүниинь Хуулиин ёһоор ажамидаржа байгаа бэлэй.

⁶Таанадай Бурханай уг залгамжалагшад болоһон хадатнай, Бурхан таанадта: «Аба, Эсэгэ», – гэжэ ооглоһон Хүбүүнэйнгээ һүлдые эльгээгээ.



⁷Иихэдээ ши зараса бэшэ, харин Христосоор дамжан, Бурханай хүбүүнийнь, уг залгамжалагшань болобо гээшэш.

Павел галадуудта ханаагаа зобоно

⁸Урдань таанад Бурхание мэдэхэгүй байһан дээрэхээ үнэн дээрээ бурхад бэшэ «бурхадуудта» алба хэжэ байгаа бэлэйт.

⁹Мүнөө таанад Бурхание мэдэхэн аад лэ, тодорхойлон хэлэбэл, Бурханай таанадые мэдэхэн хойно таанад яагаад хүр хүсэгүй, ахир тулюур хүсэнүүдтэ дахин бусабат, тиигээд тэдэндэ алба хэхээ ханабат?

¹⁰Таанад шажанай тусхай хайндэрнүүдые тэмдэглэн үнгэргэнэт.

¹¹Танай дунда дэмы хурган номножо ябаа гээшэ гүб гэжэ би ханаагаа зобоноб.

¹²Аха дүүнэрни, намдал адли Хуулиин мэдэлхээ мултаран гарыт гэжэ би гуйнаб, юундэб гэхэдэ, би Хуулиин мэдэлхээ гаран, таанадтал адли хүн болоо хэнби. Таанад намайе огто гомдоогоогүй ха юмта.

¹³Үбшэн ядуу байхадаа анха түрүүшынхиеэ таанадта хургаал номноһыемни таанад ханана ёһотойт.

¹⁴Үбшэн ядуу байхадамни таанад хэжэглэнгүй, намайе өөһэдхөө түлхингүй, Бурханай Эльгээмэл мэтэ, Иисус Христостол адляар угтажа абаа бэлэйт.

¹⁵Урматнай хосороо гээшэ гү? Тэрэ үедэ таанар нюдөөшье хайрлангүй, таһа татажа гаргаад, намда үгэхөөр бэлэн байгаа хэнта гэжэ би гэршэлнэб.

¹⁶Таанадта үнэн зүбые номножо байһан дээрэхээ дайсантай болобо гүб?

¹⁷Тэдэ хүнүүд таанарта муу ханана, таанад тухай ханаагаа зобоһон хэбэр үзүүлхэ гэхэн хара ханаатай байна. Тэдэнэр бидэнэй эб таһалаад, анхаралыетнай өөһэдтөө хандуулха ханаатай юм.



¹⁸Гансашье минии таанадтай суг байха сагта бэшэ, мүн хододоо нам тухай һонирхожо байбалтнай ехэ һайн байгаа.

¹⁹Үхибүүдни, Христосто хүзэглэжэ байһантнай эли болохын тула би түрэжэ байһан эхэнэртэл адли зобожо байнаб, найдажа байнаб.

²⁰Мүнөө таанадай дунда байбал, таанадтай ондоохоноор хөөрэлдэхэ байгааб, харин эндэһээ таанадтай юу хэхээ ойлгохоёо болёод байнаб.

Агарь Сарра хоёр болбол хоёр хэлсээнүүдтэл адли юм

²¹Хуули сахихые һанаһан таанар мүнөө намда хэлэжэ үгыт, таанад Хуули гүйсэд ойлгоно аалта?

²²Абраһам хоёр хүбүүтэй байгаа: нэгыень зараса эхэнэр түрөө, нүгөөдыень сүлөөтэй эхэнэр түрөө гэжэ тэрэ Хуули соо бэшээтэй юм.

²³Зараса эхэнэрһээ гараһан хүбүүниинь хүнүүдэй шиидхэбэрээр түрөө, харин сүлөөтэй эхэнэрһээ гараһан хүбүүниинь Бурханай найдуулһан ёһоор түрөө бэлэй.

²⁴Энэ ушар гүнзэгы удхатай юм: эдэ хоёр эхэнэрнүүд хоёр хэлсээнүүдтэл адли бшуу. Синай хада дээрэ үгтэһэн нэгэдэхи хэлсээниинь Хуули дээрэ үндэһэлнэ. Энэ хэлсээн зараса Агарьдал адли, барлагуудай хэлсээн юм.

²⁵Агарь гэжэ Аравида оршодог Синай хада нэрлэдэг юм. Энэнь дарлалта доро байһан мүнөө үеын Иерусалим хотые бүхы хүн амитантайнь тэмдэглэдэг.

²⁶Харин тэнгэрийн Иерусалим эрхэ сүлөөтэй юм. Тэрэ Иерусалим бидэнэй эхэ гээшэ.

²⁷Тэрээн тухай Нангин Бэшэгтэ иигэжэ хэлэгдэнэ: «Үхибүү түрөөгүй, үри хүүгэдгүй эхэнэр, хүхин баясыш! Үхибүү түрэхын зоболон мэдэрээгүй эхэнэр, хүхиш, баярлыш! Юуб гэхэдэ, хадамда гараагүй эхэнэр хадамтай эхэнэртэ ороходоо тоогүй олон үхибүүтэй байха».

²⁸Аха дүүнэрни, таанад баһа Исаагтал адли Бурханай найдуулһан ёһоор түрөө гээшэт.

²⁹Тиихэдэ хүнүүдэй хэлсээгээр түрэхэн хүбүүн Бурханай найдуулгаар түрэхэн хүбүүе яжа хашан мүрдөө һэм, тиигэжэл мүнөө таанадыешье хашажа байна.

³⁰Нангин Бэшэг соо энээн тухай: «Барлаг эхэнэрэй хүбүүн сүлөөтэй эхэнэрэй хүбүүнтэй хамта уг залгамжалхагүйн тула ши барлаг эхэнэрые хүбүүнтэйнһ намна», – гэжэ бэшэгдэнхэй.

³¹Тиимэхээ, аха дүүнэрни, бидэ зараса эхэнэрэй бэшэ, харин сүлөөтэй эхэнэрэй үхибүүд гээшэбди.

Галадуудта 5

Эрхэ сүлөөдэ ажамидаргты

¹Христосой үршөөһэн эрхэ сүлөөдэ ажамидаржа байгты, дахин барлагууд бү бологты.

²Хэрбээ бэлгээ отолуулһан байбалтнай, Христос таанадта ямаршые аша туһа хүргэхэгүй гэжэ би Павел таанадта хэлэнэб.

³Харин бэлгээ отолуулһан хүн бүхэн Хуулиин бүхы зүйлнүүдые гүйсэдхэхэ ёһотой болоно гэжэ баталан гэршэлнэб.

⁴Хуули сахин өөһэдыгөө абарха һанаатайшуул Христосхоо түгдэрэн унажа, Бурханай үршөөл хайраһаа арсана гээшэ.

⁵Харин бидэ Бурханай үршөөл хайрада хүртэжэ, өөһэдынгөө этигэлээр абарагдахабди гэжэ найданабди.

⁶Иисус Христосой ашаар абарагдаха һанаатай байбал, бэлгээ отолуулаа гүбди, али отолуулаагүй гүбди – ямаршые илгаагүй юм, гансал хайра дура үгэдэг этигэл шухала юм.

⁷Таанад һайнаар эхилээ бэлэйт, теэд саашадаашье үнэн зүбые баримталхадатнай хэн таанадта һаалта хэбэб?

⁸Иимэ буруу ханал бодолнуудые урдань таанадые дуудаһан Бурхан таанадта идхуулаа бэшэ.

⁹Багахан эһээбэри бүхы эдьхүүрые эһээдэг юм.

¹⁰Гэхэтэй сасуу таанад зүбөөр бодомжолжо байхат гэхэн найдалга Бурхан намда үгэнэ. Харин таанадые зүб харгыһаа хадууруулһан хүн, хэншые байг, илгаагүй зэмэлэгдэхэ.

¹¹Аха дүүнэрни, хэрбээ бэлгээ отолуулхада аша тухатай юм гэжэ минии хөөрөжэ байбал, намайе хашан мүрдэхэгүй байгаа. Тиигэбэл Иисус Христосой хэрээһэн тухай хургаал би номнохогүй һэм, хүн зонойшые дунда худхалая хуймаа гарахагүй һэн.

¹²Танай дунда худхалая хуймаа гаргадаг зон таанадһаа холодобол һайн байгаа.

¹³Аха дүүнэрни, Бурхан таанадые эрхэ сүлөөдэ дуудаа юм. Энэ эрхэ сүлөөтнай хүсэлэнгүүдээ хангахын тулада муу юумэ үйлэдэхэ харгыда таанадые гансал бү түлхиг. Таанад бэе бээдээ дуратай байгты, бэе бээдээ тухалжа байгты.

¹⁴Юундэб гэхэдэ, Хуулиин бүхы зүйлнүүд: «Дүтынгөө хүндэ өөртөөл адли дуратай бай», – гэхэн энэ захяа заабари соо тобшологдоно.

¹⁵Харин бэе бээе таһара удара таталсажа, эдилсэжэ байһаар таанар өөһэдыгөө бү сүм хюдажа һалгаажархигты.

Нангин һүлдын үрэ дүн, мүн махабад бэеын хүсэлэнгүүд тухай

¹⁶Һүлдын хургаһан ёһоор ажамидаржа байгты, тиигэбэл муу муухай ябадал гаргахагүйт гэжэ би хэлэнэб.

¹⁷Юуб гэхэдэ, махабад бэеымнай һанаашалһан юумэн һүлдынхихөө тад ондоо юм, тиин һүлдын һанаашалһан юумэн махабад бэеынхихээ тад илгаатай юм. Тиимэхээ таанад һанаһан юумээе олон ушарта хэдэггүй бшуут.

¹⁸Хэрбээ таанадые һүлдэ хүтэлжэ ябабал, Хуули таанадта хэрэггүй юм.

¹⁹Махабад бэеын хүсэлэнгүүд гэхэдэ иимэ: эрэдээ гү, али эхэнэртээ урбаха, забхай зальхай, намуу һэбхи ябадал гаргаха,

²⁰онгонуудта мүргэхэ, эльбэ жадха хэхэ, зэбүүрхэхэ, хэрүүл ама гаргаха, атаархаха, уурлаха, дээрэлхүү зантай байха, арсалдаха ба хэрэлдэхэ, буруу үзэл номнохо,

²¹жүтөөрхэхэ, алалсаха ба хюдалсаха, архидаха ба аашалха гэхэ мэтын буруу ябадалнууд. Иимэ муу юумэ үйлэдэжэ байгаа хүнүүд Бурханай хаан орондо уг залгамжалан орожо шадахагүй гэжэ урда хэлэһэнээ би дахин дабтанаб.

²²Нангин һүлдэн үрэ дүн болбол иимэ: хайра дуран, баяр, энхэ тайбан, тэсэбэри, һайн һанаан, ниигүүлэсхы сэдхэл, үнэн сэхэ ябадал,

²³номгон даруу зан. Иимэ зондо Хуули хэрэггүй.

²⁴Өөһэдыгөө Христос Иисуста зорюулһан хүнүүд махабад бэеэ хорхойтолготойнь, хурисал ташаяантайнь хэрээһэндэ хадаба гээшэ.

²⁵Хэрбээ бидэ Нангин һүлдөөр ажамидаржа байбал, һүлдэн һургаһан ёһоор лэ ябаял.

²⁶Ехээрхүү дээрэлхүү зан гаргангүй, бэе бээдээ өөдэрхэн хэрүүлхэнгүй, атаархангүй ябаял даа.

Галадуудта 6

Бэе бэеынгээ ашаа бэрхэшээл хубаалсажа, бэе бээдээ туһалжа байгты

¹Аха дүүнэрни, хэрбээ хэн нэгэнэй нүгэл хээ һаа, һүлдэн һургаһан ёһоор ажамидардаг таанад иимэ хүниие даруу зангаараа заһажа байгты. Тиихэдэ нүгэл шэбэл хэжэрхихэгүйн тулада өөһэдынгөө хойноһоо анхаржа ябагты.

²Христосой үгэһэн «хуули» иимэ: бэе бэеынгээ ашаа бэрхэшээлые хубаалсажа, бэе бээдээ туһалжа байгты.

³Хэрбээ хэн нэгэн оройдоо хэншые бэшэ аад, бэеэ дээгүүр абабал, тэрэ хүн өөрыгөө дэмы мэхэлнэ гээшэ.

⁴Тиимэхээ хүн бүхэн бүтээһэн хэрэгүүдэйнгээ зэргээр өөрыгөө үнэлжэ байг. Тиигэбэл тэрэ хүн бээ бэшэнтэй сасуулангүй, ажал амжалтануудаараа омогорхожо байха.

⁵Юуб гэхэдэ, хүн бүхэн өөрынгөө ашаа бэрхэшээлые өөр дээрээ абажа ябаха ха юм.

⁶Бурханай хургаал заалгаһан хүн хурган хүмүүжүүлэгшэтэйгөө бүхы эд зөөрөөрөө хубаалсаг.

⁷Бурхание мэхэлхэ аргагүй юм. Тиимэхээ бү эндүүрэгты. Хүн тариһанаал хададаг.

⁸Махабад бэеынгээ хүсэлэнгүүдые хангажа байдаг хүн үхэл олохо, харин Нангин хүлдын тулада оролдодог хүндэ Нангин хүлдэ мүнхын амидарал олгохо.

⁹Тиимэхээ эсэхэ сусахые мэдэнгүйгөөр хайн юумэ хэжэ ябагты. Гэдэргээ сухаряагүй хаа, бидэ саг болзортонь ургасаа хуряахабди.

¹⁰Арга боломжотой байхадаа бүхы хүнүүдтэ, илангаяа өөрынгөө бүлгэмэй хүзэглэгшэдтэ үлүү ехээр хайниие хэжэ ябагты.

Түгэсхэлэй нэргылэлгэ ба амаршалга

¹¹Энэ хандалгаяа таанадта ямар томо үзэгүүдээр бэшэһыемни харагтыл даа.

¹²Хүнүүдтэ хайшаагдаха дуратай зон бэлгээ отолуулхыетнай баадхана, тиихэдэ тэдэнэр Христосой хэрээһэнэй түлөө хашуулха мүрдүүлхэ дурагүй байна.

¹³Тэдэ өөһэдөө отолуулһан мүртөө Хуули сахидаггүй юм, харин бээ хайрхахын тула таанадые отолуулха ханаатай байна.

¹⁴Харин би юугээршые хайрхахаяа хананагүйб, гансал манай Дээдын Эзэн Иисус Христосой хэрээһээр хайрханаб. Минии урда энэ хэрээһэн дээрэ бүхы дэлхэйн омогорхол хадагдаа, тиихэдэ би өөрөөшые энэ дэлхэйн омогорхолой урда хэрээһэн дээрэ хадагдаад байнаб.



15Отолуулһан гү, али отолуулаагүй гү – тэрэнь ямаршые хамаагүй. Шэнэ хүн бии боложо мүндэлһэниинь лэ шухала юм.

16Энэ гурим сахидаг хүн бүхэн, Израилиин Бурханай хүнүүд энхэ тайбанда, үршөөл хайрада оршохонь болтогой!

17Саашадаа хэншые намда зоболон бү асараг, юуб гэхэдэ, би Иисусай шархануудые бэе дээрээ абажа ябана ха юмбиб.

18Аха дүүнэрни, манай Дээдын Эзэн Иисус Христосой үршөөл хайрань таанадтай оршожо байг лэ! Болтогой!



Эфесэйхиндэ

Эфесэйхиндэ 1

¹Иисус Христостой нэгэдэһэн Эфес хотын хүзэг этигэлтэй Бурханай хүнүүд, Бурханай эрхэ мэдэлээр Иисус Христосой элшэн болоһон Павел таанадые амаршална.

²Бурхан Эсэгэһээ болон манай Дээдын Эзэн Иисус Христосоо үршөөл хайра ба амгалан тайбаниие таанадта хүсэнэб.

Бурханда баяр баясхалантай байха тухай

³Манай Дээдын Эзэн Иисус Христосой Эсэгэ болохо Бурханда магтаал соло дуудаял! Маанадай Христостой нэгэдэһэн ушарһаа дээдын тэнгэриһээ оюун ухаанда хабаатай буян хэшэг тэрэ маанадта хайрлаа юм.

⁴Бурханай урда арюун нангин ба дутуу дутагдалгүй байхымнай тулада тэрэ бидэниие Христостой нэгэдхэн өөрын болгожо, газар дэлхэйн бүтээгдэхэһээ урда шэлэжэ абаа юм. Бурхан бидэндэ дуратай байжа,

⁵өөрынгөө һайн дураар, эрхэ хүсэлөөр Иисус Христосоор дамжан бидэниие өөрынгөө үхибүүд болгохо гэжэ заяһан байна.

⁶Инаг хайрата Хүбүүнэйнгээ ашаар маанадые буян хэшэгтээ элбэг дэлбэг хүртөөһэнэйнь түлөө Бурханиие алдаршуулаял.

⁷⁻⁸Тэрэ агууехэ буян хэшэгтээ маанадые элбэг дэлбэгээр хүртөөгөө. Тэрэнэйнь ашаар бидэ Хүбүүнтэйнь нэгэдээд, шуһанайнь сэнгээр сүлөөтэй боложо, нүгэлнүүдээ хүлисүүлээ гээшэбди. Тэрэ сэсэн ухаагаараа, оюун мэдэлээрээ

⁹зорихон юумээ бүтээгээ, Христосоор дамжан бүтээхэ гэжэ анханһаа шиидэһэн өөрынгөө эрхэ мэдэлэй нюусые бидэндэ нээгээ.

¹⁰Дээдэ огторгойдо, доодо замбида байһан бүхы амитадые Христос соо нэгэдхүүлэн, тэрэнэй хүтэлбэри доро байлгахые түлэблэбэ. Энэ хүсэлэнгөө Бурхан тогтооһон сагтаа бээлүүлхэ.

¹¹Бурхан өөрынгөө зорилгоор, заяаһан ёһоороо маанадые Христостой нэгэдхүүлэн өөрынгөө арад болгон шэлэжэ абаа.

¹²Тиин Христосто найдаһан түрүүшын хүнүүдэй дунда байһан хадаа тэрэнээр алдаршуулжа байял!

¹³Таанадшые баһа өөрынгөө абаралга тухай үнэн зүб Бурханай үгэ дуулаад, Христосто этигээт, тиин Бурхан Нангин хүлдээе таанадта үгэн, өөрынгөө тамга таанад дээрэ дараба.

¹⁴Бурханай өөрынгөө хүнүүдтэ найдуулһан бүхэниие маанадай абаха тухай тэрэ хүлдэнь батална, тиин Бурханай өөрынгөө хүнүүдые бодото сүлөөтэй болгохо тухай баһа батална. Бидэ тэрэнэй алдар солые дуудаял!

Павелай зальбаралга тухай

¹⁵Тиимэхээ таанадай Дээдын Эзэн Иисуста хүзэглэжэ, Бурханай хүнүүдые бүгэдыень энхэржэ хайрлажа ябадаг тухай дуулахадаа,

¹⁶би зальбархадаа таанадые һанан, таанадай түлөө үргэлжэ Бурханда баяр баясхалан хүргэжэ байдагби.

¹⁷Манай Дээдын Эзэн Иисус Христосой Бурхан, алдарай Эсэгэ өөрыень таанадай мэдэрхынтнай тулада сэсэн ухаан үршөөдэг хүлдые таанадта хайрлаг лэ.

¹⁸⁻¹⁹Бурханай таанадые дуудахада таанадта үгтэһэн найдабариин ямар байдагые, өөһэдынгөө хүнүүдтэ тэрэнэй үгэхэб гэһэн найдуулгын элбэг дэлбэг байдагые, тэрээндэ этигэһэн бидэн соо хүдэлжэ байһан хүсэ шадалынь аргагүй ехэ байдагые мэдэжэ байхынтнай тулада оюун ухаанайтнай нюдые тэрэ нээжэ үгэг лэ.

²⁰Тэрэл хүсэ шадалаараа Бурхан Христосой үхэхэдэнь амидыруулаад, дээдын огторгойдо баруун таладаа

²¹захирагшад, ноёд, эзэд, элдэб хүсэнүүдэй дээгүүр табин һуулгаба. Бурхан тэрэниие мүнөөнэйшые сагта, ерээдүйдэшые бүхы нэрэ түрэнүүдэй дээгүүр үргэн табиба.

²²Бүхы юумые хүлдэнь хаяжа мэдэлдэнь оруулаад, бүхы юумэнэй Дээдын Эзэн байһан хадань хүзэглэгшэдэй бүлгэмэй хүтэлэгшөөр томилоо бэлэй.

²³Хүзэглэгшэдэй бүлгэм Христосой махабад бэень гээшэ, бүтээгдэһэн бүхы юумые өөрөөрөө дүүргэдэг тэрэниие хүзэглэгшэдэй бүлгэм бүрин түгэс болгоно.

Эфесэйхиндэ 2

Үхэлһөө амидыруулга тээшэ

¹Урдань таанад өөһэдынгөө муу муухай хэрэгүүдһээ болон нүгэл шэбэлһээ боложо үхэхэн амигад байгаат.

²Тиихэдэ таанад газар дэлхэйн нүгэл шэбэлтэ замаар ябажа, Бурханай мэдэлдэ байдаггүй хүнүүдые мүнөөшье захиржа байдаг хүлдын, хара хүсэнүүдэй ноёной мэдэлдэ байгаат.

³Бидэ булта тэдэ зондол адли Бурханай мэдэлдэ байдаггүй байгаабди, өөһэдынгөө бэеын ба һанал бодолой хүсэлэнгүүдые ханган, махабад бэеын жама ёһоор амидаржа байгаабди. Тиимэхээ өөһэдынгөө мүн шанарһаа боложо, бидэ хүн бүхэндэл адли Бурханай уур сулалһаа зобохо табилантай бэлэйбди.

⁴Харин үршөөл хайраар элбэг Бурхан бидэндэ аргагүй ехээр дуратай байжа,

⁵нүгэл шэбэлһээ боложо үхэхэн бидэниие Христостой хамта амидыруулаа гээшэ. Таанад Бурханай үршөөл хайраар абарагдаба гээшэт.

⁶Бурхан бидэниие Исустай хамта амидыруулаад, тэрэнэй хажууда дээдын огторгойдо һуулгаа юм.

⁷Иигэжэ Бурхан Исусаар дамжуулан маанадта тон ехээр дуратай байһанаа, аргагүй ехэ үршөөл хайраа ерээдүй сагуудта харуулаа.



⁸Этигэл хүзэгэйтнай ашаар таанадые Бурханай үршөөл хайра абараа. Тиин тэрэ этигэл хүзэгтнай өөһэдһөөтнай бэшэ, харин Бурханай үршөөһэн бэлэг гээшэ.

⁹Тэрэ болбол танай оролдолгын үрэ дүн бэшэ, тиимэхээ хэншые өөрыгөө магтахые бү хануужа.

¹⁰Ямар байнабди, тиимээр Бурхан бидэниие бүтээгөө, бидэниие Иисус Христостой нэгэдүүлэн хайн хайхан хэрэгүүдые хэдэг заншалтай байхыемнай анханһаа түлэблэн бүтээгөө юм.

Христостой нэгэдэһэн тухай

¹¹Таанад түрэхын еврей-бэшэнүүд байгаат, өөһэдыгөө отолуулһан (бэеын эрхэтэниие гараараа отолхо гэхэн удхатай) гэжэ нэрлэдэг еврейнүүд таанадые «отолуулаагүй» гэжэ нэрлэдэг байгаа, урдань хэд байһанаа бү мартагты,

¹²тиихэдэ таанад Христосгүй амидардаг байгаат. Таанад Бурханай шэлэһэн хүнүүдэй тоодо ородоггүй байгаат. Бурханай өөрынгөө хүнүүдтэ үгэхэн найдуулгада, тэрэнэй Хэлсээндэ таанад ямаршые хабаагүй байгаат. Таанад энэ газар дэлхэй дээрэ найдалгагүй, Бурхангүй амидаржа байгаа һэнта.

¹³Харин мүнөө Иисус Христостой нэгэдээд, урдань Бурханһаа холо байһан хүнүүд Христосой шуһаар тэрээндэ ойртобот.

¹⁴Христос өөрөө еврейнүүдые болон бусад арадуудые нэгэ арад болгон, бидэндэ энхэ тайбаниие асараа. Тэрэ маанадые хубаажа, эбыемнай таһалжа байһан ханые өөрөөрөө эбдээ.

¹⁵Тэрэ хоёр арадһаа өөртэйгөө хамта нэгэ шэнэ арад нэгэдүүлэн бүтээжэ, энхэ тайбаниие мандуулхын тула Моисейн Хуули тогтоолнуудтайнь болон дүримүүдтэйнь хүсэнгүй болгоо.

¹⁶Христос хэрээһэн дээрэ үхэхэдөө тэдэнэй үһөө хиһаае усадхаад, нэгэ бэе соо хоёр арадые эблүүлээд, тэдэниие һөөргэнь Бурханда асараа.

¹⁷Христос ерэжэ бүхы хүнүүдтэ, Бурханһаа холо байһан бусад арадуудташье, Бурханай ойро байһан еврейнүүдтэшье энхэ тайбан тухай һайн Мэдээсэл номноо.

¹⁸Еврейнүүдшье, ондоо яһатаншье, бидэ булта Христосой ашаар нэгэ хүлдөөр Эсэгэдэ ойртохо аргатайбди.

¹⁹Тиимэхээ таанад, еврей бэшэ зон, хариин гү, али ерүүл зон бэшэт, харин Бурханай хүнүүдтэй нэгэ хотын зон гээшэт, Бурханай бүлын гэшүүд гээшэт.

²⁰Таанад элшэнэрэй ба лүндэншэдэй табиһан һуури дээрэ бодхоогдоһон байнат. Тэрэ һууриин түшэг тулгуурынь Иисус Христос өөрөө гээшэ.

²¹Тэрэ өөрөөрөө байшангые холбожо бүхэлөөд, Дээдын Эзэндэ зорюулагдаһан хүмэ болгон дээшэнь бодхоно.

²²Христостой нэгэдэн таанадшье баһа хүлдын ашаар Бурханай байдаг байра болохын тулада бодхоогдожо байна гээшэт.

Эфесэйхиндэ 3

Павелай бусад арадуудай дунда ажалһан тухай

¹Тиимэл шалтагаанаар би, Павел, еврей бэшэ таанадай түлөө Иисус Христосхоо боложо хаалтада һуунаб.

²Бурхан өөрынгөө үршөөл хайраар таанадай һайн һайханай тулада энэ ажал хэхыемни намда даалгаһан байна гэжэ таанад сохом мэдэжэ байгаа ёһотойт.

³Бурхан нюусаяа намда нээжэ үгөө. (Энээн тухай би түрүүн тобшохоноор бэшэһэн байгааб).

⁴Тэрэ бэшэһэн юумыемни уншаад, Христос тухай нюусые яжа ойлгожо байһыемни таанад мэдэжэ абахат.



⁵Энэ нюусые урданай хүнүүдтэ нээдэггүй байгаа, харин мүнөө Бурхан Нангин хүлдөөрөө дамжуулан гэгээн элшэнэртээ ба лүндэншэдтэ тэрэ нюусаа нээгээ.

⁶Тэрэнь бусад арадууд хайн Мэдээсэлэй ашаар баһал Бурханай үршөөлдэ хүртэхэ, тэдэнэр баһал нэгэ бэсын эрхэтэн болохо, Бурханай Иисус Христосоор дамжуулһан найддуулга баһа тэдэндэ үгтэхэ гэхэн удхатай юм.

⁷Бурханай хүсэ шадалай нүлөөгөөр намда үгтэхэн тусгай үршөөлөөр би хайн Мэдээсэлэй зарасань болоһон байгаа.

⁸⁻¹⁰Ой ухаандаа оруулхын аргагүй ехэ Христосой баялиг тухай хайн Мэдээсэлые бусад арадуудта номнохые, Бурханай нюусын яжа бээлхэ тухай бүхы хүнүүдтэ харуулхые Бурханай хүнүүдэй эгээл багань байһан намда Бурхан хайрлаа бэлэй. Үнгэрһэн сагуудта хамаг юумые Бүтээгшэ Бурхан нюусаяа хадагалжа байһан юм. Тиин мүнөөнэй үе сагта тэрэ өөрынгөө оюун ухааниие хүзэглэгшэдэй бүлгэмөөр дамжуулан тэнгэрийн захирагшадта, огторгойн хүсэнүүдтэ элдэб янза хэбээрнь харуулаа.

¹¹Замбуулин дэлхэйе бүтээхэхээ урда түлэблэжэ байһан юумээ Бурхан манай Дээдын Эзэн Иисус Христосой ашаар бээлүүлээ.

¹²Христостой нэгэдэхэн, тэрээндэ этигэжэ хүзэглэжэ байһанаараа бидэ зоригтойгоор, найдамжатайгаар Бурханда ойртожо байна гээшэбди.

¹³Тиимэхээ минии тулижа, зобожо байһанда урмаа бү хухарагты гэжэ би таанадые гуйнаб. Минии зоболон танай аша туһада юм.

Христосой дуран тухай

¹⁴Эсэгэдээ би үбдэгөө бохиилгон мүргэнэб.

¹⁵Тэнгэри дээрэшье, газар дэлхэйдэшье байһан бүхы изагуур угсаатан Эсэгэхээ эхитэй юм.



¹⁶Досоогоо хүсэ шадалтай болохынтнай тула хүлдөөрөө дамжуулан алдарайнгаа баялигһаа таанадтай хубаалсахыень би Бурханиие гуйнаб.

¹⁷Танай этигэл хүзэгэй ашаар зүрхэ сэдхэлдэтнай Христос нууришаһай, инаг дуран танай үндэһэ, нуури болоһой гэжэ би баһал зальбарнаб.

¹⁸Тиигэбэл таанад Бурханай хүнүүдээр хамта Христосой хайра дуранай хизааргүй ехэ үргэн, ута байһые, аргагүй үндэр, гүнзэгы байһые тухайлха аргатай болохот.

¹⁹Тэрэ гүйсэд мэдэрхын аргагүй байһан хайра дурые таанад мэдэрдэг болохот. Тиигээд таанад алишье талаһаа Бурхандал адли эрхим түгэс болоһойт гэжэ би зальбарнаб.

²⁰Досоомнай хүсэ шадалаа ажаллуулжа, бидэнэй гуйжа хүсэхэ гү, али ханажа бодохоһоо үлүү юумые бүтээхэ аргатай Бурхан алдаршаһай.

²¹Бурхан хүзэглэгшэдэй бүлгэмөөр болон Иисус Христосоор дамжан хэтын хэтэдэ, үеһөө үедэ алдар солотой байг лэ! Болтогой!

Эфесэйхиндэ 4

Христосой бэеын эрхэтэнүүдэй эблэрэл тухай

¹Дээдын Эзэндэ алба хэжэ байһан дээрэһээ хаалтада нууһан би Бурханай таанадта даалгаһан уялгада зохистойгоор амидарагты гэжэ ехэтэ гуйнаб.

²Ходо даруу, номгон, тэсэбэритэй байгты. Бэе бээдээ тэсэбэритэйгээр хандажа, өөһэдэньгөө хайра дурые харуулжа байгты.

³Нангин хүлдын таанадта хайрлаһан, энхэ тайбанаар таанадые холбоһон нэгэдэлые сахиха гэжэ бүхы хүсэ шадалаараа оролдогты.

⁴Бурханай таанадые уряалһан найдуулгын гансал юм хадань таанад нэгэ бэе гэшэт, нэгэ Нангин хүлдэтэй байнат.



⁵Гансал Дээдын Эзэн, гансал хүзэг этигэл, гансал уһан арюудхалга бии юм.

⁶Бүхы юумэн дээгүүр байһан, бүхы юумэн соо болон бүхы юумээр дамжан ажаллажа байһан гансал Бурхан – бүхы хүнүүдэй Эсэгэ бии юм.

⁷Христосой маанадта үгэхэ гэжэ шиидэһэн хэмжээгээр хүн бүхэмнай онсо абьяас бэлигтэ хүртэбэ.

⁸Тиимэһээ Нангин Бэшэгтэ иигэжэ бэшээтэй байдаг: «Дайлажа мэдэлдээ оруулһан олон хүнүүдые абаад, тэрэ үндэртэ дээшээ гараба, хүнүүдые бэлэгтэ хүртөөбэ».

⁹«Дээшээ гараад» гэдэгынь баһа ямар удхатай юм? Урдань тэрэнэй газарай доодо үнсэгтэ бууһыень харуулна бэшэ гү?

¹⁰Газарай доодо үнсэгтэ бууһан нэгэн замбуулиниие өөрөөрөө дүүргэхын тулада огторгой тэнгэриһээ дээгүүр дэгдэһэн лэ хүн бэшэ аал?

¹¹Тэрэл хүнүүдые абьяас бэлигтээ хүртөөбэ, хэһэг хүнүүдые элшэнэр болгожо табиба, үшөө хэһэг хүнүүдые лүндэншэд болгожо табиба, зарим хүнүүдые һайн Мэдээсэл номнохыень табиба, бусадые хүзэглэгшэдэй хүтэлэгшэдөөр, багшанараар томилбо.

¹²Тэрэ Бурханай хүнүүдые Бурханда алба хэхэ ажалда бэлдэхын тула, Христосой бэеые бодхохын тула тиигээ юм.

¹³Тиимэһээ бидэ бултадаа нэгэ этигэл хүзэгтэй болохо, Бурханай Хүбүүниие мэдэрхэ ёһотойбди. Бидэ Христосой хүсэд болбосорһон хэмжээндэ хүрэн, хүсэд болбосорһон хүнүүд болохо ёһотойбди.

¹⁴Тиин бидэ уһанай долгиндо, али һалхинай һэршэгэнэлгэдэ абтаһан юумэндэл ямаршые һургаалда абтан хэлбэлзэдэг, хүнэй мэхэ гоходо орожо, ехэ шадамараар мэхэлүүлдэг балшар хүүгэд байхаяа болиёл.

¹⁵Тиигэхын орондо хайра дураар халин, үнэн сэхые хэлэжэ байбал, бидэ толгой болохо Христосто алишые талаһаа ойртон ургахабди.

¹⁶Христосой хүтэлбэри доро бэеын эрхэтэнүүд бүхэ зангилаагаар холбогдонхой байһанһаа боложо бэе өөрөө бүрин бүтэн байна. Эрхэтэн бүхэн өөрынгөө хэхэ ёһотой үүргые дүүргээд, бүхы бэе хайра дурын ашаар ургажа, өөрыгөө бүрилдүүлнэ.

Хуушан амидаралһаа шэнэ амидарал руу шэглэхэ

¹⁷⁻¹⁸Дэмы хоһон бодолтой, оюун ухааниинь балартаһан ондоо яһатанда адли бээе абажа ябахаяа болигты гэжэ би таанадые Дээдын Эзэнэй нэрээр гуйжа найжа байнаб. Сэдьхэл зүрхэниинь шулуундал адли шэрүүн байжа, Бурхание мэдэрхэ гэжэ огто хүсэхэгүй байһан дээрһээ тэдэнэр Бурханай хайрлажа байһан амидаралһаа хасагдаба.

¹⁹Нэшхэлээ бүрин алдан, тэдэнэр ямаршые хэмжээ ханалые мэдэнгүй хуули буса юумэ үйлэдэжэ, өөһэдыгөө ташаяангы хүсэлэнгүүдэй мэдэлдэ үгөө.

²⁰Христос тухай нургахадаа таанадта тиимэ юумэ заагаагүй юм.

²¹Таанад тэрээн тухай дуулаһан байгаат, тэрээнһээ нуража абаат. Тэрэ болбол үнэн зүб ха юм.

²²Тэрээнһээ иимэ юумэндэ нураһан байгаат: хуурмаг хүсэлэнгүүдээрээ өөһэдыгөө хүнөөн урданайхяараа амидархаяа болигты.

²³Зүрхэ сэдьхэлтнай, һанал бодолтнай хубилан шэнэрхэ ёһотой.

²⁴Бурханай дүрые һажааһан үнэн сэдьхэлтэй, арюун гэгээн амидаралтай шэнэ хүн боложо хубилагты.

²⁵Тиимэһээ худал юумэ хэлэхээ болёод, дүтынгөө хүндэ хүн бүхэнтнай үнэниие хэлэжэ байг, ушарынь хэлэхэдэ, бидэ бултадаа нэгэ бэеын эрхэтэнүүд ха юмди.

²⁶Уур сухалда абтаһаншые һаа, нүгэл шэбэл бү үйлэдэгты, наранай орохоһоо урда уур сухалтнай бууран намдаг.

²⁷Шолмосто шургажа орохо боломжо бү үгэгты.

²⁸Юумэ хулуудаг байбал, дахин юумэ хулуухаяа болёод, гараараа аша туһатай юумэ хэжэ, дутажа зүдэржэ байһан хүнүүдтэй юумээрээ хубаалдажа, үнэн зүбые баримталан амидаржа байгты.

²⁹Хорото үгэнүүд аманһаатнай бү гараг. Шагнажа байһан хүнүүдтэ хэрэгтэй, хүзэгыень бэхижүүлхэ аргатай, аша туһатайл үгэнүүдые хэлэжэ байгты.

³⁰Ойртожо байгаа тэрэ Үдэр таанадай сүлөөтэй болохые баталан, Бурхан таанад дээрэ Нангин һүлдэн тамга табиһан байна. Тиимэһээ Нангин һүлдые гуниглуулан шаналуулангүй ябагты.

³¹Гомдохо голхорхоёо, хорон хэлэндэ абтахаяа, уур сухалаа хүрэхээ, хэрүүл хэхээ, хардахаяа, бусадшые эдэ мэтын харата муухай юумэ үүсхэхээ огтолон болигты.

³²Харин бэе бээ энхэрэн, хайрлажа ябагты, Бурханай Христосоор дамжан таанадые хүлисэһэндэл адляар бэе бээ хүлисэжэ байгты.

Эфесэйхиндэ 5

Гэрэл туяа соо амидарха тухай

¹Бурханай инаг хайрата үхибүүдын юм хадаа Бурханиие нажаан ажамидархые оролдогты.

²Христосой бидэндэ дуратай байгаад, ами наһаяа хангалтай, Бурханда таатай тахил болгон маанадай түлөө үгэһэндэл адляар хайра дуранай жама ёһоор амидарагты.

³Таанад Бурханай хүнүүд юм хадаа зальхайралга, бэлиндэлгэ, али хомхойролго гэхэ мэтын юумэнүүд тухай өөһэд хоорондоо хэлэхэ, хүндэхэшые ёһогүйт.

⁴Уйгарлажа, дэмы юумэ шашажа, бузар муухай үгэ дуугаржа ябахань таанадта зохихогүй юм. Бурханда баясхалан хүргэжэ байбал таараха.



⁵Зальхайржа, бэлиндэжэ, али алта мүнгэндэ шунашаһан ямаршые хүн (алта мүнгэндэ шунаһан байдал онгондо мүргэһэндэл адли) Христосой болон Бурханай хаан орониие залгамжалхагүй юм гэжэ таанад мэдэхэ ёһотойт.

⁶Хооһон үгэтэй хүнэй мэхэ гоходо бү орогты, ушарынь гэхэдэ, Бурхан тиимэ юумэнүүдэй түлөө үгыень дууладаггүй хүнүүд дээрэ уур сухалаа буулгаха.

⁷Тиимэхээ тэрэ хүнүүдээр орёолдохо огто хэрэггүй.

⁸Урдань таанад өөһэдөө харанхы мунхагта байгаат, харин Дээдын Эзэнэй хүнүүд болоходоо, гэрэл туяада байдаг болоот. Тиимэхээ таанад гэрэл туяагай хүнүүдтэ адляар амидарха ёһотойт.

⁹Гэрэл туяа таанадые һайн һайхан, гэнэн сэхэ, үнэн сэдхэлтэй болгодог.

¹⁰Дээдын Эзэндэ һайшаагдадаг юумые мэдэхэ гэжэ оролдогты.

¹¹Харанхы мунхагай үрэ дүнгэй хэрэгүүдтэ ямаршые хабаагүй байгты, тэрэ хэрэгүүдые гэрэл туяада гаргажа элирүүлжэ байгты.

¹²Нюусаар хэгдэжэ байһан тэрэ хэрэгүүд тухай хэлэхэдэшые эшхэбтэр юм.

¹³Элирүүлэгдэжэ байһан юумэнэй гэрэл туяадал гарахадань, бүхы юумэн эли болодог.

¹⁴Гэрэл туяагай ашаар элирүүлэгдэһэн бүхы юумэн гэрэл туяа болоно. Тиимэхээ иигэжэ хэлэдэг байха: «Унтажа байһан хүн, һэри, амидыра, Христос шамайе гэрэлтүүлхэ».

¹⁵Тиимэхээ өөһэдынгөө алхамуудые бодомжолжо үзөөд хэжэ байгты. Тэнэг хүнүүдтэл адли бэшэ, харин сэсэн хүнүүдтэл адли өөһэдыгөө абажа ябагты.

¹⁶Гараһан боломжо бүхэнөө ашаглан, һайн һайхан юумэ бүтээжэ байгты, юундэб гэхэдэ, мүнөөнэй саг ехэл муу үе саг юм.

¹⁷Бодолгүй тэнэг юумэнүүд ябахын орондо Дээдын Эзэнэй эрхэ хүсэлые ойлгохо гэжэ шармайгты.

¹⁸Таанадые гансал уруунь татаха аргатай архи дарһа һогтотороо уунгүй, орондонь өөһэдыгөө һүлдөөр дүүргэжэ байгты.

¹⁹Бурханай дуунуудаар, магтаалта дуунуудаар, һүлдын хайрлаһан дуунуудаар бэе бэеэ урмашуулжа байгты. Үнэн зүрхэнһөө Дээдын Эзэниие алдаршуулан дуулажа, магтажа ябагты.

²⁰Манай Дээдын Эзэн Иисус Христосой нэрээр Эсэгэ Бурханда бүхы юумэнэй түлөө үргэлжэ баяр баясхалан хүргэжэ байгты.

Үбгэн һамган хоёр

²¹Христостые шүтэдэг юм һаа, бэе бэеынгээ үгөөр ябагты.

²²Эхэнэрнүүд, Дээдын Эзэнэй үгөөр ябадагтал адляар нүхэрэйнгөө үгэ дуулажа байгты.

²³Ушарынь ямар бэ гэхэдэ, яажа Христос һүзэглэгшэдэй бүлгэмэй, өөрынгөө бэеын толгойлогшо болон Абарагша байнаб, тон тиигэжэл үбгэниинь һамганайнгаа толгойлогшонь юм.

²⁴Тиин һүзэглэшэдэй бүлгэм яажа Христосой мэдэлдэ байдаг бэ, тон тиигэжэл һамгад үбгэдэйнгөө мэдэлдэ бүримүһэн байха ёһотой.

²⁵Эрэшүүл, Христос яажа һүзэглэгшэдэй бүлгэмдэ дуратай байжа, тэрэнэй түлөө ами наһаяа үгөө һэм, тон тиигэжэл таанад һамгадтаа дуратай байгты.

²⁶Һайн мэдээсэл номнон, уһаар мэтэ үгөөрөө сэбэрлэн, һүзэглэгшэдэй бүлгэмые Бурханда зорюулхын тула Христос ами наһаяа үгөө юм.

²⁷Һүзэглэгшэдэй бүлгэмые тэрэ өөрынгөө урда ямаршые гэм бузаргүй, дутуу дутагдалгүй үзэсхэлэнтэ гоё байлгаха һанаатай байгаа.

²⁸Тон тиигэжэл нүхэд өөһэдынгөө бээдэ дуратай байһандал адляар һамгадтаа дуратай байха ёһотой. һамгандаа дуратай эрэ өөртөө дуратай гэхэн үгэ юм.

²⁹Өөрынгөө бэе үзэжэ ядаһан хүн хэзээдэшье байгаагүй. Зүгөөр Дээдын Эзэнэй өөрынгөө хүзэглэгшэдэй бүлгэмые анхарһандал адляар хүн өөрынгөө бэеые тэжээжэ, бөөмэйлжэ ябадаг гээшэ.

³⁰Юундэб гэхэдэ, бидэнэр Христосой бэеын эрхэтэнүүд гээшэбди.

³¹«Тиимэһээл хүн эхэ эсэгэ хоёроо орхёод, һамгантайгаа ниилэхэ, тиин хоёр эрхэтэн нэгэ бэе болохо».

³²Эдэ бүхэндэ агууехэ нюуса далдалаатай юм. Христос болон тэрэнэй хүзэглэгшэдэй бүлгэмэй талаар би хэлэнэб.

³³Гэхэдэ энэ бүхэн таанадташые хабаатай: ямаршые эрэ өөртөө дуратай байһандал адляар һамгандаа дуратай байха ёһотой, тиин ямаршые эхэнэр нүхэрөө хүндэлжэ ябаха ёһотой юм.

Эфесэйхиндэ 6

Үхибүүд болон тэдэнэй түрэлхид тухай

¹Үхибүүд, таанад Дээдын Эзэнэй юм хадаа аба эжынгээ үгэ дуулажа байгты. Энэ танай уялга гээшэ.

²⁻³«Аба эжыгээ хүндэлжэ яба» гэхэн түрүүшын захяа заабарие: «Тиигэбэл шамда ехэ һайн байха, газар дэлхэйдэ ши ута наһа наһалхаш» гэхэн найдуулга дахадаг юм.

⁴Аба эжынэрынь, үхибүүдээ уурлуулан урмыень бү хухалагты, зүгөөр Дээдын Эзэн тухай заажа, заабаришалжа, тэдэнээ хүмүүжүүлжэ байгты.

Барлагууд болон тэдэнэй эзэд тухай

⁵Барлагууд, Христосой үгэ дуулажа байһандал адляар газар дэлхэйдэхи эзэдээ үнэн зүрхэнһөө хүндэлжэ, айн хүрдэжэ байгаад, үгыень дуулажа байгты.

⁶Һайшаалдань хүртэхын тула тэдэнэйнгээ гансал хаража байхадань бү тиигэжэ байгаарайгты, харин Христосой барлагуудтал адляар Бурханай хүсэхэн юумые үнэн зүрхэнһөө хэжэ байгаарайгты.

⁷Юрын хүндэ бэшэ, харин Дээдын Эзэндэл шэнгеэр эзэдтээ баяртайгаар алба хэжэ байгаарайт.

⁸Барлаг гүт, али эрхэ сүлөөтэй хүн гүт, Дээдын Эзэн илгаагүйгөөр хайн юумэ хэһэнэйтнай түлөө ашыетнай харюулха гэжэ ханажа байгаарайгты.

⁹Эзэд, таанад барлагуудтаа баһал тиигэжэ хандажа байгты, хэрзэгы хатуу бү байгты. Таанад өөһэдөө тэдэнтэй хамта тэнгэридэ яһа илгадаггүй нэгэ Эзэнтэй байһанаа мэдэнэ ха юмта.

Харата хүсэнүүдэй урдаһаа тэмсэхэ тухай

¹⁰Эсэстэнь иигэжэ хэлэхүү: Дээдын Эзэнэй хүр хүсөөр бэхижэжэ байгты.

¹¹Шолмосой мэхэ гохохоо өөһэдыгөө хамгаалжа байхын тула Бурханай үгэһэн хуяг дуулга бүрин үмдэгты.

¹²Ушарынь юуб гэбэл, бидэ хүнүүдэй урдаһаа бэшэ, харин замбуулинай харата хүсэнүүд, захирагшад, эрхэ засагууд, энэ харанхы мунхаг үеын замбуулинай хүсэнүүдэй урдаһаа тэмсэнэ гээшэбди.

¹³Тиимэхээ Бурханай үгэжэ байһан хуяг дуулга үмдэгты. Тиигэбэл харата үдэрэй ерэхэдэ, таанад өөһэдыгөө дайсадһаа хамгаалха аргатай байхат; байлдаанда сухаришагүй зогсожо байхат.

¹⁴Бэлэн байгты! Үнэн сэхэ ябадалаараа һур бэһэндэл адляар бээ бэһэлжэ байгты, үнэн сэдхэлээрээ хуягтал адляар өөһэдыгөө хамгаалжа байгты.

¹⁵Энхэ тайбан тухай хайн мэдээсэлые дуулгаха хүсэлтнай гуталдал адли бэлэн байг.

¹⁶Ходо этигэл хүзэгэй бамбай халхабшатай ябагты, тиигэбэл таанад Харата Нэгэнэй галта һомо годлинуудыень зогсоохо аргатай байхат.

¹⁷Абаралгые дуулгадад адляар, Бурханай үгые һүлдэн үгэжэ байһан хэлмэдэл адляар абагты.



¹⁸Таанад хүлдөөр хүтэлүүлэн, ямаршые ушарта элдэб янзын зальбарал гуйлтануудые үдэр хүнигүй Бурханда үргэжэ байгты. Тиимэхээ хэргэлэн байжа, Бурханай бүхы хүнүүдэй түлөө ханамжатайгаар зальбаржа байгты.

¹⁹Һайн Мэдээсэл тухай нюуса зоригтойгоор тайлбарилан элирүүлхэдэмни Бурханай намда хэрэгтэй үгэнүүдые үгэжэ байхын тула минии түлөө баһа зальбаржа байгты.

²⁰Тэрэ һайн Мэдээсэл номноходоо ёһоорнь хэлэжэ байха зоригтой байхымни тула баһа зальбаржа байгты. Би, Бурханай элшэн, мүнөө тэрэ Мэдээсэл номноһонойнгоо түлөө түрмэдэ һуужа байна ха юмбиб.

Һүүлшын амаршалганууд

²¹Ажал хэрэгүүд тухаймни, хэр байһан тухаймни мэдээсэл, нам тухай бүхы һонинуудые таанадта манай инаг хайрата дүү, Дээдын Эзэнэй үнэн сэхэ албатан Тихик дуулгаха.

²²Би Тихигые таанадта манай ажабайдал тухай дуулгахыень, таанадые урмашуулхыень ябуулааб.

²³Эсэгэ Бурхан болон Дээдын Эзэн Иисус Христос бүхы хүзэглэгшэ аха дүүнэртэ амгалан байдал, хайра дуран, этигэл хүзэг үршөөжэ байһай!

²⁴Манай Дээдын Эзэн Иисус Христосто хүнэшэгүй хайра дураар дуратай хүн бүхэн үршөөл хайратай байһай!



Филиппынхидтэ

Филиппынхидтэ 1

¹Филипп хотын хүзэглэгшэдэй бүлгэм, танай хүтэлэгшэд болон танай туһалагшад, таанадта Иисус Христосой зарасанар болохо Павел Тимофей хоёр бэшэнэ.

²Манай Эсэгэ Бурхан болон Дээдын Эзэн Иисус Христос таанадые үршөөл хайрадаа хүртөөжэ, амгалан тайбан байлгахань болтогой!

Павел филиппынхидэй түлөө зальбарна

³Таанадые ханаха бүхэндөө би Бурхандаа баяр баясхалан хүргэжэ байдагби.

⁴Тиин та бүгэдын түлөө зальбарха бүхэндөө би баяр жаргалтайгаар зальбардаг хүнби,

⁵юундэб гэхэдэ, таанад хайн Мэдээсэл дэлгэрүүлхэдэмни анха түрүүшын үдэрһөө эхилэн мүнөө болотор намда туһалжа хамһалсажа байгаат.

⁶Тиихэдэ таанадай дунда үлзы хайхан үйлэ хэрэг бүтээжэ эхилһэн Бурхан Иисус Христосой заларан ерэхэ үдэр хүрэтэр тэрэ хэрэгээ залируулангүй бүтээжэл байха гһэн хатуу этигэлтэй байнаб.

⁷Таанад хододоо минии зүрхэ сэдхэл соо оршонот! Тиимэһээл иигэжэ таанадта ханаагаа табижа байдагни зүб юм. Түрмэдэшье байхадамни, хайн Мэдээсэлые хамгаалха, хатуугаар баталха эрхэ сүлөөтэйшье байхадамни, та бүгэдэ намда Бурханай даалгаһан ажалда хабаадалсажа туһалжа ябадаг хэнта.

⁸Иисус Христосой таанадта хайра дуратай байдагтал тон адляар миниишье та бүхэндэ хайра дуратай байһые Бурхан мэдэнэ.

⁹Бурханда, бэе бээдээ бүри ехээр дуратай байһайт, үнэн зүб юун бэ гэжэ бүри хайнаар мэдэрһэйт, сэдхэхэйт гэжэ би зальбарнаб.

¹⁰Тиигэбэл таанад үнэн зүбые шэлэхэ аргатай байхат. Тиигээд Иисус Христосой заларжа ерэхэ үдэр таанад арюун сэбэр, ямаршые гэмгүй байхат.

¹¹Хэһэн бүхы үйлэ хэрэгүүдтнай Иисус Христосой нүлөөгөөр үнэндөө һайн һайхан байхал. Тиигэжэл Бурхан алдаршаха, тэрээндэ магтаал соло дуудаха.

Христосто алба хэжэ ажамидарха тухай

¹²Аха дүүнэрни, намтай ушарһан бүхы юумэн һайн Мэдээсэлэй бүри амжалтаттайгаар дэлгэрхэдэ үнэхөөрөө аша туһатай байгаа юм гэжэ мэдэжэ байгты.

¹³Христосто алба хэдэг байһанһаа боложо түрмэдэ ороһон тухаймни бүхы ордоной харуулшад болон бусадшые эндэ байһан зон мэдэдэг болоо.

¹⁴Түрмэдэ һууһан ябадални хүзэглэгшэдэй олоной хүзэг бүри бэхижүүлбэ, тэдэнэр бүри зоригтойгоор, айлтагүйгөөр Бурханай мэдээсэл номножо захалба.

¹⁵Тиихэдээ нэгэ зариманиинь манда атаархаһан, маанадтай арсалдаһан шалтагаанһаа Христос тухай номноно, харин нүгөө зариманиинь һайн дураараа, туһалхаяа хүсэжэ байһан дээрэхэ номноно.

¹⁶Һайн дураараа номногшод Бурханай намда һайн Мэдээсэл хамгаалха үүргэ даалгаһыень мэдэнэ ха юм.

¹⁷Харин намда атаархаһан номногшод Христос тухай үнэн зүрхэнһөө айлрадханагүй. Тэдэ намайе түрмэдэ бүри ехээр зобоолгохо зорилготойгоор лэ номноно.

¹⁸Зай, яахаб даа. Христос тухай үнэн зүрхэнһөөшые һургахада, үнэн зүрхэнһөөн номноһон хэбэр үзүүлэншые һургахада би адлил баясанаб. Саашадаашые баясажа байхаб.



¹⁹Ушарынь гэхэдэ, танай зальбаралай ашаар, Иисус Христосой һүлдүн туһаламжаар би сүлөөдэ гарахаб гэжэ һайн мэдэнэб.

²⁰Үүргэеэ дүүргэхэдээ, эшэхэ улайхаар юумэ хэхэгүйб, харин хэтын хэтэдэ, илангаяа энэ сагта зоригтой зүрхэтэй байхаб, тиин ямаршые юумэ хэхэдээ, амиды байна гүб, али үхэнэ гүб, илгаагүй, Христосые алдаршуулхаб гэжэ бүхы һанал бодолоороо хүсэжэ, найдажа байнаб.

²¹Минии ажамидаралай зорилго – Христос гээшэ. Харин минии үхэл бүришые ехэ аша туһа асарха юм.

²²Тиихэдэ амиды ябахадаашые үрэ дүнтэй ажал хэхэ аргатай хүм. Тиимэһээ алиниенъ шэлэхэ ёһотойгоо мэдэхэгүй байнаб.

²³Тэрэ хоёр зүг хожулан намайе өөр тээшээ татаад байна. Үхөөд, Христостой суг байхые аргагүй ехээр хүсэнэб. Энэнь ушаргүй һайн шэлэлтэ юм.

²⁴Харин амиды мэндэ ябабални, таанадта үлүү шухала хэрэгтэй юм.

²⁵Би энээниие һайн мэдэнэб, тиимэһээ таанадтайгаа үлэхэб, этигэл хүзэгэйтнай нэмэгдэн бэхижэхэдэ, баяр жаргал асархада та бүгэдэнтэйгөө байжа туһалхаб.

²⁶Тиигээд дахин таанадта ошоходомни, намаар бахархаха бүришые һайн шалтагаан таанадта олгогдохо.

²⁷Эдэ бүгэдэндэ нэмэжэ хэлэбэл, таанад Христос тухай һайн Мэдээсэлэй һургаһан ёһоор амидарха ёһотойт. Тиимэһээ таанадта ошоно гүб, али ошонгүй байна гүб, таанад булта нэгэ зорилготой, һайн Мэдээсэлэй хүзэгэй түлөө һанал нэгэн тэмсэнэт гэжэ дуулаһайб.

²⁸Дайсадһаа хэзээдэшые бү айгты, хододоо зоригтой зүрхэтэй байгты, тиигээ һаа тэдэнэй хосорхые, харин өөһэдынгөө абарагдахые харуулхат. Бурхан таанадта тэрэ абаралга үршөөхэ.

²⁹Ушарынь хэлэбэл, таанад Христосто гансал хүзэглэн алба хэхэ бэшэ, харин тэрэнэй түлөө зоболон амсан үүргээ бэлүүлхэ табиантай хаямта.

³⁰Мүнөө таанад намтай хамта тэмсээндэ хабаадалсагты. Тиимэ байлдаанда минии урдань тулалдажа байһые хараа хэнта, мүнөөшье тулалдажа байһан тухаймни дууланат.

Филиппынхидтэ 2

Христос номгон даруу, тиихэдээ агууехэ юм

¹Христос таанадые урмашуулжа, хайра дурань ханааетнай заһадаг, Бурханай хүлдэ таанадые нэгэдхэдэг юм бол, таанадай бэе бээ анхаржа, хайрлажа ябадаг юм бол,

²таанад нэгэ ханал бодолтой, бэе бээдээ хайра дуратай, ханал нэгэн, бодол нэгэн байжа, намайе бүрин баяр жаргалтай болгыт даа.

³Юумэ хэхэдээ, өөр тухайгаал бодоод бү ябагты, али хүнэй магтаалда хүртэхын лэ тула оролдолго бү гаргагты. Харин даруу номгон байгты, бусад зоние өөрөө дээгүүр бодожо байгты.

⁴Гансал өөһэдынгөө бэшэ, харин бусадайнгаа хайн хайханай түлөө ханалаа табижа байгты.

⁵Таанад Иисус Христостол адли ханал бодолтой байгты:

⁶Тэрэ анханһаа Бурханай шанартай байһан аад, Бурхантай нэгэ зиндаада байха ёһотойб гэжэ өөр тухайгаа бодоогүй юм.

⁷Харин орондонь хамаг эрхэ түрээ тэрэ дуратайгаар орхёод, зарасын дүрсэ дүрсэлжэ, маанадтал адли болон, хүн түхэлтэй мүндэлбэ.

⁸Тэрэ номгон даруу байгаа, үхэн үхэтэрөө, хэрээһэн дээрэ үхэтэрөө Бурханай үгэ дууладаг байгаа.

⁹Тиимэхээ Бурхан тэрэниие дээгүүр үргэжэ, бусад алдарнуудһаа ушаргүй үндэр нэрэ түрэдэ хүртөөбэ.

¹⁰Тиимэһээл Иисусай алдарта нэрэ түрэдэ дээдэ огторгойн, газар дэлхэйн, доодо тамын амитан бүхэн мүргэн хүгэдэхэ,

¹¹тиигээд Эсэгэ Бурханай алдар солодо, Иисус Христос болбол Дээдын Эзэн юм гэжэ Хүн бүхэн айладхажа байха.

Энэ дэлхэйн гэрэл туяа болохот

¹²Инаг хайрата нүхэдни, таанадтайгаа суг байхадамни, үгыемни ходо дууладаг һэнта. Теэд мүнөө хажуудатнай үгы байхадамни, бүришье найнаар үгыемни дуулажа байха ёһотойт. Гүйсэд абарагдахын тула хүрдэн хүгэдэн ажаллажа байгты.

¹³Ушарынь гэхэдэ, Бурхан өөрөө сэдхэлдэтнай хүсэлнүүдые бадараадаг, хэхэ ёһотой юумээ хэжэ байха тээшэ таанадые хүтэлдэг юм.

¹⁴⁻¹⁶Ямаршье гэмгүй, арюун сэбэр, эрхим хайн Бурханай үхибүүдын байхын тула таанад юушье хэхэдээ бү гэмэрэлдэгты, арсалдаа бү гаргагты. Забхай зальхай, нүгэл шэбэлтэй зоной дунда амидархадаа амидарал хайрладаг мэдээсэлые хатуугаар баримталан, таанад тэдэ зоной дунда тэнгэридэ гэрэлтэжэ байһан одо мүшэдтэл адли яларжа толоржо байха ёһотойт. Тиигэбэлтнай Христосой заларан ерэхэ үдэр би таанадаар бахархан омогорхохо шалтагаантай байхаб, бүхы оролдолгонуудни, үйлэ хэрэгүүдни дэмы үнгэрөөгүй гэжэ мэдэхэлби.

¹⁷Танай этигэл хүзэгтнай, албантнай Бурханда үргэгдэһэн үргэлдэ адли юм. Тэрэ үргэлтэйтнай хамта минишье шуһан үргэл болон адхарха ёһотой байжа магадгүй. Тиигэбэл би та бүхэнтэй хамта баярлажа байнаб.

¹⁸Тон тиигэжэл таанадшье намтай суг баярлаха ёһотойт.

Тимофей Епафродит хоёр

¹⁹Таанад тухай мэдээсэл абажа өөрыгөө урмашуулха дуратай байнаб. Тиимэһээ Дээдын Эзэн Иисусай эрхэ мэдэлээр таанадта һаядаа Тимофейе эльгээхэб гэжэ найданаб.



²⁰Минии хажууда Тимофейнээ ондоо хэншье тиигэжэ ехээр таанадта һаналаа табижа ябадаггүй юм.

²¹Бусад зон бүгэдөөрөө Иисус Христосто һайшаагдаха юумэ бүтээхэ тухай огто бодонгүй, өөрынгөө амидаралай түлөө оролдожо ябадаг.

²²Тимофейн үнэн шударгуу байһанаа баталһыень, тэрэ бидэ хоёрой эсэгэ хүбүүн хоёртол адляар хамта һайн Мэдээсэл дэлгэрүүлхын түлөө хүдэлжэ байһые таанад өөһэдөө мэдэнэт.

²³Намтай юунэй ушарха тухай мэдэхэтэйгээ сасуу би таанадта тэрэниие эльгээхэб гэжэ найданаб.

²⁴Би өөрөөшье Дээдын Эзэнэй эрхэ мэдэлээр һаядаа таанадта ошоход гэхэн бата этигэлтэй байнаб.

²⁵Намда туһалхаар таанадай эльгээһэн, намтай хамта эндэ ажаллажа, тэмсэжэ байһан манай хүзэглэгшэ дүү Епафродитые бусаажа таанадта ябуулха хэрэгтэй гэжэ би бодобоб.

²⁶Тэрэ та бүгэдые харахаяа аргагүй ехээр хүсөө, өөрынь үбдэһэн тухай таанадай дуулаһанда тон ехээр шаналаа.

²⁷Тэрэ үнэхөөрөө үбдэжэ, үхэхээ байгаа. Гэбэшье Бурхан тэрэниие хайрлан үршөөгөө; намайешье баһа үшөө ехэ гашуудал зоболондо дарагдахаһаа хамгаалан үршөөгөө.

²⁸Тэрэниие хараад таанад дахин баясахат, тиигээд бишье голхорхоёо болиход гэхэн бодолтойгоор тэрэниие таанадта бушуухан ябуулбаб.

²⁹Дээдын Эзэнэй тэрэ хүзэглэгшые баяртайгаар угтажа абагты. Тэрээндэл адли хүнүүдые бултыень хүндэтэйгөөр угтажа байгты.

³⁰Епафродит Христосой түлөө ажаллажа байхадаа үхэн алдаа, таанадай хэхэ аргагүй юумэ намда хэжэ, тэрэ ами наһаяа хайрлаагүй юм.

Филиппынхидтэ 3

Бурханай урда үнэн сэдхэлтэй байха тухай



¹Аха дүүнэрни, Дээдын Эзэнтэй нэгэдэхэндээ баяр жаргалтай байгты гэжэ түгэсхэлдөө хэлэхэ байнаб. Урда бэшээн юумээ дахин дабтахадамни намда хүндэ бэшэ, харин таанадта аша туһатай юм.

²Нохойнуудтал адли өөһэдыгөө абажа ябадаг зонһоо бэээ хэргылэгты, нүгэл шэбэл үйлэдэдэгшэдһөө хэргылжэ байгты, бэлгээ отолуулагты гэжэ баадхадаг зонһоо хэргылжэ байгты.

³Тэдэнэр бэшэ, харин бидэнэр жэнхэни «отолуулга» хэһэн зон гээшэбди, юуб гэбэл, бидэ Бурханай хүлдын ашаар Бурханда мүргэжэ, Иисус Христостой нэгэдэхэндээ бахархан баясанабди. Бидэ бэеын эрхэтэнэй отолуулха ёһололдо найданагүйбди.

⁴Гэхэтэй зэргэ би тиимэ мэтын юумэндэ найдаха аргатай байгааб. Хэрбээ бэеын эрхэтэниие отолуулха ёһололдо найдаха ханаатайшуулай байбаль, би хэнһээшье үлүү тиигэжэ найдаха шалтагаантай хүнби.

⁵Би түрэхөөр наймадахи үдэртөө бэлгээ отолуулһан байгааб. Би болбол Израильһаа уг изагууртай, Вениаминай обогой жэнхэни еврей хүнби. Моисейн Хуули хэшээлтэйгээр сахижа байдаг фарисей байхадаа,

⁶би хүзэглэгшэдые гайтайгаар хашан мүрдэдэг байгааб. Бурханай урда үнэн сэдхэлтэй байхын тула би Хуулиин бүхы заабаринуудые сахижа, ямаршье гэмнэмээр юумэ хээгүй бэлэйб.

⁷Урдань ехэ хэрэгтэй, шухала гэжэ тоолодог байһан юумэнүүдээ мүнөө, Христосһоо боложо, хэрэггүй хоһон гэжэ тоолоноб.

⁸Бүри үнэтэй сэнтэй юумэнһээ, минии Дээдын Эзэн Иисус Христосые мэдэрхэхээ гадна бусад бүхы юумэнүүдые би хэрэггүй ба дэмы хоһон гэжэ тоолоноб. Христосһоо боложо би бүхы юумэнһээ арсааб. Христосые оложо, тэрээнтэй сүм нэгэдэхын тулада би бусад бүхы юумые юун дээрэшье тоолоногүйб.



⁹Тиимэхээ би Хуули сахижа байһанаараа бэшэ, харин Христосто этигэл хүзэгтэй байһанаараа Бурханай урда үнэн сэдхэлтэн болоноб. Бурхан этигэл хүзэгөөрнь лэ хүниие үнэн сэдхэлтэнэй тоодо оруулдаг юм.

¹⁰Христосые, тэрэниие амидыруулһан хүсые мэдэрхэ гэжэ хүсэнэб. Тэрээндэл адляар зобохо, тэрээндэл адляар үхэхэ дуратай байнаб,

¹¹тиигэбэл би өөрөө үхөөд амидырха байгааб.

Зорилго эрмэлзэлдээ хүрэхэ тухай

¹²Би зорилго эрмэлзэлдээ хүрөөб, хэхэ ёһотой юумээ бүгэдыень хээб, эрхим түгэс болооб гэнэгүйб. Гэхэдээ Иисус Христос намайе ямар шагналда хүртөөхөөр өөртөө татажа абаа һэм, тэрэ шагналыень абаха гэжэ би оролдожо байнаб.

¹³Аха дүүнэрни, тэрэ шагналыень абааб гэжэ би үнэхөөрөө һананагүйб. Яба тиибэшье, би үнгэрһэн юумээ мартажа, ерээдүй юумэндээ хүрэхэ гэжэ бүхы шадалаараа шармайнаб.

¹⁴Тиимэхээ би мүнхын амидаралай шагналые абахаар сэхэ зорижо ябанаб. Тэрэ амидаралда Бурхан намайе Иисус Христосоор дамжуулан дуудаһан байгаа.

¹⁵Оюун сэдхэлээрээ болбосон хүн бүхэмнай иимэл һанал бодолтой байха ёһотой. Хэрбээ зариманайтнай ондоо һанал бодолтой байбал, Бурхан тэрэниетнай эли болгожо харуулхал.

¹⁶Яабашье бидэ мүнөө ойлгожо абаһан гуримаа саашадаашье баримталха ёһотойбди.

¹⁷Аха дүүнэрни, намайе һажаажа байгты. Манай таанадта харуулһан үльгэр жэшээгээр ажамидаржа байдаг хүнүүдые хаража, дуряжа байгты.

¹⁸Олон хүнүүд Христосой хэрээһэндэ хадуулжа үхэхэн ябадалда эсэргүүсэхэн дайсад мэтэ ажамидардаг гэжэ би таанадта урдань оло дахин хэлэжэ байгаа һэм, мүнөөшье нулимсаа гарган дабтажа байнаб.



¹⁹Бэе махабадайн хүсэлэнгүүд тэдэнэй бурханиинь юм. Тэдэ эшэжэ байха ёһотой юумээрээ омогорхожо байна, энэл дэлхэйн юумэнүүд тухай тэдэ бододог. Тиимэхээ тэдэ тамада орожо хосорхол!

²⁰Харин бидэнэр тэнгэрийн харьяалай хүнүүд гээшэбди, бидэ тэнгэрийнээ өөһэдынгөө Абарагша, Дээдын Эзэн Иисус Христосой ерэхые аргагүй ехээр хүлээжэ байнабди.

²¹Бүхы юумые өөрынгөө эрхэ мэдэлдэ оруулха аргатай хүсэ шадалаараа тэрэ манай ахир нулахан бээнүүдые хубилгажа, өөрынгөө алдарта бээтэй адлихан болгохо юм.

Филиппынхидтэ 4

Павел хүзэглэгшэдые зоригжуулна

¹Инаг хайрата аха дүүнэрни, би таанадые ехэл үгылжэ байнаб. Таанад намайе баяр жаргалаар дүүргэнэт, таанадаар би омогорхоноб. Инаг хайрата аха дүүнэрни, иигэжэл Дээдын Эзэндэ үнэн сэхэ байгты.

²Эводи Синтихи, та хоёр һамгад хоорондоо хэрүүл хэхээе болигты гэжэ ехэл гуйнаб, та хоёр Дээдын Эзэнэй мэдэлдэ байна ха юмта.

³Шишье, үнэн сэхэ хүдэлмэрилэгшэмни, баһа тэдэ эхэнэрнүүдтэ туһалаарай. Тэдэнэр намтай, Клементтэй болон бусадшье хүзэглэгшэдтэй хамта һайн Мэдээсэлые эдэбхитэйгээр дэлгэрүүлээ юм. Тэдэ зоной нэрэнүүдын мүнөө Бурханай номдо бэшэгдээ.

⁴Дээдын Эзэнтэй нэгэдэхэндээ ходо баясажа байгты. Баясагты гэжэ би дахин хэлэнэб.

⁵Хүн бүхэндэ номгон даруугаар хандажа байгты. Дээдын Эзэн удангүй заларан ерэхэ.

⁶Юундэшье һанаагаа бү зобогты, зальбарха бүхэндөө Бурханда баясхалан хүргөөд, хэрэгтэй юумээ гуйжа байгты.

⁷Тиигэбэл Бурхан таанадта хүнэй гүйсэд ойлгохын аргагүй амгалан тайбан байдал үршөөхэ, тиин тэрэ амгалан байдал зүрхэ

сэдьхэлыетнай, һанал бодолыетнай Иисус Христосой ашаар сахижа байха.

⁸Аха дүүнэрни, таанад һанал бодолдоо үнэн зүб, шулуун сэхэ, һайн һайхан, арюун сэбэр, илдам налгай, магтаалда хүрэмөөр юумэнүүд тухай сэдьхэжэ ябагты гэжэ түгэсхэлдөө захижа байнаб.

⁹Минии хэлэжэ, юумэ хэжэ байхада намһаа һуража, ойлгожо абаһан бүгэдые бэелүүлжэ байгты. Тиигэбэл зүрхэ сэдьхэлдэмнай, һанал бодолдомнай амгалан байдал үршөөдэг Бурхан манай дунда оршожо байхал.

Туһалһанай түлөө баяр хүргэнэ

¹⁰Нилээд удаан сагай үнгэрһэн хойно дахин намда һаналаа табижа байхадатнай Дээдын Эзэнтэй нэгэдэһэн минии амидаралда ехэ баяр боложо байна. Таанад урдань нам тухай бододоггүй байгаат гэнэгүйб, урдань таанад намайе анхаржа байһанаа харуулха арга боломжогүй байгаат.

¹¹Юумээр дуталдаһандаа тиигэжэ хэлээгүйб, би байһан юумээрээл сэдьхэл дүүрэн байжа һурашаһан хүнби.

¹²Би дутуу дундашье, элбэг баяншье байдалда амидаржа шадахаб. Бүхы юумэндэ һурааб, ямаршье сагта, хаанашье садхалан гүб, али үлдэнэ гүб, элбэг дэлбэг юумэтэй гүб, али дутуу дунда ябана гүб илгаагүй һанаа дүүрэн ябадагби.

¹³Христосой намда үршөөжэ байһан хүсэ шадалаар би ямаршье байдалые дабаха аргатайб.

¹⁴Тиигэбэшье, гай бэрхэшээлдэ ороод байхадамни намда туһалхадаа, ехэл һайн хэрэг бүтээгээт.

¹⁵Македониһоо гараад һайн Мэдээсэл номножо эхилхэдэмни гансал танай хүзэглэгшэдэй бүлгэм намда туһалжа, гансал танай бүлгэм минии олзо гарзые хубаалсажа ябадаг байһые таанад, филиппынхид, һайн мэдэнэт.



¹⁶Фессалоники хотодошые байхадамни таанад хэдэн удаа намда хэрэгтэй юумэ эльгээгээ һанта.

¹⁷Таанадһаа юумэ абаха зорилготойгоор энээниие хэлэнэ бэшэб, харин таанадай шагналда нэмэри болохо юумые хараха һанаатайгаар хэлэнэб.

¹⁸Би таанадай эльгээһэн бүхы юумые абааб – тэдэ бүхэн намда хангалтай хүрөө. Таанадай үгэһэн бүхы бэлэгүүдые Епафродит намда асаржа үгөө, мүнөө хэрэгтэй бүхы юумэн намда байна. Хангал һайхан уталга үргэхэдэ Бурхан ехэ дуратай байдаг, тон тиигэжэл тэрэ танай бэлэгүүдтэ баясана.

¹⁹Бурхамни Иисус Христосой аша туһаар өөрын элбэг дэлбэг баялигһаа таанадта хэрэгтэй бүхэниие үршөөһэй гэжэ би зальбарнаб.

²⁰Манай Эсэгэ Бурхан хэтын хэтэдэ алдар солотой байһай! Болтогой!

Түгэсхэлэй үгэнүүд

²¹Иисус Христосой мэдэлдэ байһан Бурханай хүнүүдтэ минии мэндые дамжуулаарайгты. Намтай хамта байһан хүзэглэгшэд таанадта амар мэндые хүргэнэ.

²²Эндэ байһан Бурханай хүнүүд булта, илангаяа хаанай ордондо ажал хэгшэд таанадта амар мэндые хүргэжэ байна.

²³Дээдын Эзэн Иисус Христосой үршөөл хайра та бүгэдэнтэй оршожо байг лэ.



Колоссынхидтэ

Колоссынхидтэ 1

Амаршалга

¹⁻²Аха дүүнэр, Иисус Христостой нэгэдэһэн Колоссы хотын хүзэг этигэлтэй Бурханай хүнүүд, Бурханай эрхэ мэдэлээр Христос Иисусай элшэн болоһон би Павел ба манай дүү Тимофей таанадые амаршалнабди. Бурхан Эсэгэһээ таанадта үршөөл хайра ба амгалан тайбаниие айладханабди.

Павел баясхалан хүргэн зальбарна

³⁻⁴Иисус Христосто этигэдэг тухайтнай, Бурханай бүхы зондо дуратай байдаг тухайтнай бидэ дуулаа һэмди. Тиимэһээ та бүхэнэй түлөө зальбархадаа, бидэ Дээдын Эзэн Иисус Христосой Эсэгэ Бурханда ходо баясхалан хүргэжэ байдагбди.

⁵Үнэн зүб үгые, һайн Мэдээсэлые анхан таанадта номноходомнай, таанад найдалга тухай дуулаа һэнта. Бурханай тэнгэри дээрэ бэлдээд байһан юумэндэ найдажа байһан дээрэһээ таанад хүзэглэнэт, дуратай байнат.

⁶Һайн Мэдээсэл бүхы замбуулин дэлхэй дээрэ ехэ һайнаар дэлгэржэ, үрэ дүн асаржа байна. Бурханай буян хэшэг тухай анха дуулаад, үнэн ушарынь мэдэхэдэтнай тэрэ таанадай дунда баһа һайнаар дэлгэржэ байһан юм.

⁷Бидэнтэй хамта хүдэлдэг, бидэнэй аша туһада Христосто этигэл найдалтайгаар алба хэдэг инаг хайрата Епафрачаа Бурханай үршөөл хайра тухай мэдэһэн байгаат.

⁸Таанадта үгэжэ байһан Нангин һүлдын хайра дуран тухай тэрэ бидэндэ дуулгаһан байгаа.

⁹Тиимэһээ бидэ таанад тухай дуулаһан үдэрһөө эхилжэ үргэлжэ таанадай түлөө зальбаржа байдагбди. Бурханай һүлдын үгэдэг гүн



ухаан, ойлгосо таанадтай байха тухайнь, тиигэхэдэ Бурханай дура хүсэлөө таанадта харуулжа байха тухайнь бидэ Бурхание гуйдагбди.

10Тиигэбэл таанад Дээдын Эзэнэй хүсэһэн ёһоор ажамидаржа, тэрээндэ найшаагдаха юумые хэдэг байхат. Таанад хайн хайхан хэрэгүүдые бүтээжэ, Бурхание бүрил хайн мэдэрдэг болохо хэнта.

11-12Тэрэнэй алдарта хүсэ шадалаар бэхижэн, таанад аргагүй ехэ тэнхээ тэсэбэритэй болохот. Тиимэһээ тэнгэрийн гэрэл туяада өөрынгөө хүнүүдтэ бэлдээд байһан юумые хубаалсаха эрхэ таанадта үгэһэн Эсэгэдээ баяртайгаар баясхалан хүргэгты.

Христос ба тэрэнэй ажал тухай

13Бурхан бидэниие харанхы мунхагай хүсэһөө аршалжа, инаг хайрата Хүбүүнэйнгээ эрхэ засагта оруулаа юм.

14Тэрэ Хүбүүниинь бидэнэй нүгэлнүүдые хүлисөөд, бидэниие эрхэ сүлөөтэй болгоо юм.

15Харагдадаггүй Бурхание бидэ Христос соо хараха аргатайбди. Христос Бурханай ууган Хүбүүн юм, Тэрэ бүтээгдэһэн бүхы юумэнэй дээгүүр юм.

16Газар дэлхэй, тэнгэри огторгой дээрэхи Харагдадагшые, харагдадаггүйшые юумэнүүдые, тэдэнэй тоодо хаануудые, эзэдые, засаглагшадые, захирагшадые Бурхан тэрэнэй ашаар бүтээгөө. Бүхы юумые тэрэнэй ашаар, Бүхы юумые тэрэнэй тулада Бурхан бүтээгөө юм.

17Бүхы юумэнүүдэй бүтээгдэхэһээ урда Христос байгаа, тиимэһээ тэрэнэй ашаар бүхы юумэн оршожо байна.

18Тэрэ хүзэглэгшэдэй бүлгэмэй толгойнь юм, хүзэглэгшэдэй бүлгэм тэрэнэй бэень юм. Тэрэ тус бэеын амидаралай эхин болоно. Бүхы юумэнүүдэй дээгүүр байхын тула тэрэ ууган Хүбүүн үхөөд, хамагай түрүүндэ амидыруулагдаһан юм. Тэрэ хамаг юумэнэй түрүүндэ юм.

19Бурхан бүхы шанарнуудаа Хүбүүндээ шэнгээхэ дуратайл байгаа.

²⁰Хүбүүнэйнгээ ашаар бүхы юртэмсэтэй Бурхан эблэрхэ ханаатай байгаа. Хэрээһэндэ хадуулаад үхэхэн Хүбүүнэйнгээ шуһаар Бурхан энхэ тайбаниие тогтоожо, газар дэлхэй болон тэнгэри огторгой дээрэхи бүхы юумэнүүдтэй эбээ нэгэдхүүлээ юм.

²¹Нүгэлтэ юумэнүүдые ханаашалжа, үйлэдэжэ байһан дээрэһээ хэзээ нэгэн сагта таанад Бурханһаа холо байгаат, тэрэнэй дайсадынь байгаат.

²²Харин мүнөө өөрынгөө урда таанадые нангин, арюун сэбэр, гэмгүй байлгахын тула Хүбүүнэйнгээ үхэлөөр Бурхан таанадтай эбээ нэгэдхүүлбэ.

²³Тиимэхээ таанад хатуу ба сухаришагүй хүзэглэжэ байха ёһотойт, һайн Мэдээсэлые шагнажа этигэхэн найдабарияа алдаха ёһогүйт. Ушарынь юуб гэхэдэ, би Павел газар дэлхэй дээрэ бүхы амитадта номногдоһон тэрэ һайн Мэдээсэлэй зарасань болооб.

Һүзэглэгшэдэй бүлгэмэй албатан Павелай ажал

²⁴Мүнөө би таанадай түлөө зоболон эдлэжэ байхадаа жаргалтай байнаб, ушарынь ямар бэ гэхэдэ, Христосой бэень болохо хүзэглэгшэдэй бүлгэмэй түлөө би Христостол адляар зобоноб, тиихэдэ дутуу зоболонгуудые хүсэлдүүлжэ байнаб.

²⁵⁻²⁶Бурхан намайе хүзэглэгшэдэй бүлгэмэй алба хэгшээр табяад, таанадай һайн һайханай түлөө Бурханай үгые гүйсэд номнохо ажал даалгаа. Тэрэ Бурханай үгэ үнгэрһэн үе сагта хүн түрэлхитэнһөө далда байгаа, харин мүнөө Бурханай зондо элирхэйлэгдээ.

²⁷Энэ нюусаяа Бурхан өөрынгөө хүнүүдтэ мэдүүлхэ гэжэ түсэблэжэ байна, гэхэтэй сасуу энэ үнэтэй ба алдарта нюусань бүхы хүнүүдтэ юм. Тэрэ нюусань – Христос таанадай досоо гэхэн удхатай, таанад Бурханай алдарые хубаалсахат гэхэн удхатай юм.

²⁸Тиимэхээ бидэ Христосые хүн бүхэндэ номножо байнабди. Иисус Христостой нэгэдэһэн хүн бүхэниие Бурханай урда байлгахын тула бидэ бүхы ухаан бодолоороо тэдэниие хурганабди, идханабди.

²⁹Тэрэ бүхэнэй тулада би Христосой үгэжэ байһан, минии зосоо ажаллажа байһан агуу хүсые ашаглан оролдосотойгоор хүдэлжэ байнаб.

Колоссынхидтэ 2

¹Таанадай, Лаодики хотынхидой болон намайе нюураарни танихагүйшые хүнүүдэй түлөө эршэтэйгээр минии ажаллажа байһан тухай мэдэжэ байхыетнай хүсэнэб.

²Тэдэниие урмашуулхын, хайра дураарнь нэгэдүүлхын тула, үнэн зүб ойлгосо үгэдэг баталаатай баялигаар элбэг байлгахын тула би тиигэжэ хүдэлнэб. Тиигэжэл тэдэ зон Бурханай нюусые, Христосые мэдэхэ.

³Христос болбол Бурханай мэргэн ухаанай болон мэдэрэлгын баялигые нээхэ түлхюур юм.

⁴Хэдышые хайн гэжэ ханагдаһан хуурмаг үгэнүүдээр таанадые хэнэйшые хорхойтуулхагүйн, хамааруулхагүйн тула эдэ бүгэдые хэлэжэ байнаб.

⁵Би бэээрээ таанадай хажууда байгаашьегүй хаа, ханал бодолоороо таанадтай хамта байнаб, тиин Христосто этигэһэн хүзэгэйтнай бата хатуу байһыень, хайн журамтай байхыетнай хараад баясажа байнаб.

Христос жэнхэни ажамидарал үршөөнэ

⁶Христос Иисусые Дээдын Эзэн гэжэ тооложо байһандаал адли тэрээнтэй хамта ажамидаржа байгты.

⁷Таанадые хурганан ёһоор тэрээн соо үндэхээ гүнзэгы табигты, тэрэниие нуури болгон ажамидаралаа зохёогты, бүри ехээр тэрээндэ хүзэглэжэ байгты. Тиигэхэтэйгээ сасуу Бурханда ходо баяр хүргэжэ байгты.



⁸Христосоо бэшэ, харин замбуулиниие захирхан хүсэнүүднээ, хүнүүдэй хөөрэдэг үльгэрнүүднээ эхи абадаг дэмы хоонон, хуурмаг үгэнүүдэй эльбэдэ абтаад, богоолшолуулханаа хэргылэгты.

⁹Христосой махабад бэе соо Бурханай бүхы шанарнууд бүрин оршоно.

¹⁰Тэрээнтэй нэгэдэхэдээ таанадайшые ажамидарал эрхим түгэс шанартай болоо. Христос ямаршые засаглагшаднаа, захирагшаднаа дээгүүр юм.

¹¹Христостой нэгэдэхэдээ, таанад отолуулхан байгаат, зүгөөр хүнүүдэй отолуулдаг аргаар бэшэ, харин Христосоор отолуулхан байгаат. Энэ отолуулга таанадые нүгэлтэ хэрэгүүдые хүүлэдэг заншалнууднаатнай сүлөөлхэн удхатай юм.

¹²Таанад уһаар арюудхагдахандаа Христостой хамта үхөөт, тиихэдээл тэрэниие амидыруулхан Бурханай хүсэндэ этигэжэ, Христостой хамта амидыруулагдаат.

¹³Таанад нүгэл хэдэг, отолуулаагүй, Бурханай хүнүүд бэшэ байһан дээрһээ урдань үхэхэн хүнүүдтэл адли байгаат. Харин Бурхан таанадые мүнөө Христостой хамта амидыруулаа. Бурхан бидэнэй бүхы нүгэлнүүдые хүлисөө.

¹⁴Нүгэлнүүднай маанадые Бурханда үритэйшүүл болгоо. Хуулиин ёһоор бидэнэй түлэхэ ёһотой үри шэрийн тэмдэглэлнүүдые тэрэ арилгаба. Манай үри шэри ба нүгэлнүүдые тэрэ хэрээһэн дээрэ саазалуулагдан түлэбэ.

¹⁵Тиигэжэ Христосой ашаар Бурхан захирагша ба засаглагша хүсэнүүдые дараа, тиигээд илалта туйлахадаа тэдэ хүсэнүүдые плендэ абтаһан зондол адляар бүхы арадай урда ябуулаа.

¹⁶Иигэхэдээ эдижэ, уужа байһан юумэнһээтнай боложо гү, али ямар нэгэн һайндэрэй, Шэнэ һарын һайндэрэй гү, али субботын үдэрэй түлөө хэншые таанадые бү зэмэлэг.

¹⁷Тэдэ юумэнүүд ерээдүй алдарай – Христосой бэеын – һүүдэрынъ лэ гээшэ.

¹⁸Үзэл үзэдэг хадаа бусад хүнүүдһээ дээгүүрби гэдэг хүнүүд, даруу зантай байһан хэбэр үзүүлдэг хүнүүд, Эльгээмэлнүүдтэ шүтэдэг хүнүүд шагналыетнай бү буляаг лэ. Тиимэ хүнүүд ехэ ухаатайб гэжэ дэмы һайрхана. Үнэндөө тэдэнэр тэнэгүүд юм.

¹⁹Тэдэнэр бэеын толгой болохо Христосто найданагүй. Гэхэтэй сасуу бэе толгойн, Христосой хиналта доро ургажа, тэрэнэй бүридэл болон барисаагаар холбогдуулан эблэрэн, Бурханайл дураар ургадаг юм.

²⁰⁻²¹Таанад Христостой үхөөд, энэ замбуулиниие захирһан хүсэнүүдһээ сүлөөлэгдэбэт. Тиихэдээ яагаад таанад энэ дэлхэйн харьяалда байһандал адли ажамидарна гээшэбта? Яагаад таанад: «Гар бү хүрэ», «Амтыень бү үзэ», «Барижа бү үзэ» гэхэ мэтын тогтоолнуудые сахина гээшэбта?

²²Тэрэ мэтын юумэнүүд хэрэглэгдэһэнэйнгээ һүүлээр хэрэггүй болодог. Эдэ тогтоолнууд хүнүүдэйл зохёһон дүримүүд ба һургаалнууд гээшэ.

²³Тиимэ тогтоолнуудые баримталхада сэсэн юумэ хэһэнтэйл адляар бодогдодог. Гэхэтэй сасуу Бурханда бүри ехээр дуратай, даруу зантай, бэеэ баридаг болоһон шэнги байдаг. Үнэндээ тэдэ тогтоолнууд хүнэй хүсэлэнгүүдые мэдэлдээ абаха аргагүй юм.

Колоссынхидтэ 3

Христостой нэгэдэн шэнээр ажамидарха тухай

¹Таанад Христостой амидыруулагдаһан хадаа Бурханай баруун талада хаан шэрээдэ һууһан Христосой оршодог тэнгэридэхи юумэнүүдтэ зүдхэгты.

²Эндэ, газар дэлхэйдэ байһан юумэнүүдтэ бэшэ, харин тэндэ, тэнгэридэ байһан юумэнүүдтэ һаналаа табижа байгты.

³Таанад Христостой үхэн байгаат, тиимэһээ аминтнай Бурханай урда Христостой хамта хоргодуулагдаад байна.

⁴Танай бодото амидарал болбол Христос гэшэ, тиин тэрэнэй ерэхэдэ таанадшые тэрэнтэй хамта алдартань хүртэлсэн ерэхэт.

⁵Таанад досоотнай хүдэлдэг дэлхэйн хүсэлэнгүүдые: эрэдээ гү, али эхэнэртээ урбалта, забхайралга, шунал, нүгэлтэ хүсэлэнгүүд, онгонуудта шүтэхэтэй сасуулагдама хомхойрол гэхэ мэтын юумэнүүдые хүнөөхэ ёһотойт.

⁶Тиимэ юумэнүүдые үйлэдэдэг, мэдэлдэнь ородоггүй хүнүүдые Бурхан хэһээхэ.

⁷Таанад өөһэдөөшые тэдэ зоной дунда амидаржа байхадаа тиимэ хүсэлэнгүүдэй мэдэлдэ байдаг бэлэйт.

⁸Харин мүнөө таанад уурлахаяа, галзуугаар суhalдахаяа, хорлохоёо, Бурхание муушалхаяа, муухай үгэнүүдые хэлэхээ, эдэ мэтын муухай юумэнүүдые үйлэдэхээ болигты.

⁹Бэе бээдээ худал юумэ хэлэхээ болигты, таанад урданайгаа ажамидаралые заншалнуудтайнь хамта орхо ха юмта.

¹⁰Таанад шэнэ хүнүүд болобот. Таанадта өөрыгөө бүрин мэдүүлхын тула Бурхан, Бүтээгшэ тиимэ хүнүүдые бүрил өөртөө адли болгон шэнэдхэдэг юм.

¹¹Эсэстээ грегүүдэй болон иудейнүүдэй хоорондо, отолуулһан болон отолуулаагүй хүнүүдэй хоорондо, хариин болон зэрлиг зоной хоорондо, барлагуудай болон сүлөөтэй хүнүүдэй хоорондо ямаршые илгаа үгы юм, гансал Христос бии юм, тиин бүхы юумэн Христос, бүхы юумэн соо Христос байха юм.

¹²Таанад гэгээн хүнүүд гэшэт. Бурхан таанадта дуратай, таанадые өөртөө шэлэжэ абаа юм. Тиимэһээ таанад бэе бээ хайрлажа, бэе бээдээ найнаар хандажа байгты, номгон, даруу зантай, тэсэбэритэй байгты.

¹³Таанад бэе бээ ойлгожо байгты, тиймэхээ хэн нэгэнэйтнай нүгөөдэдөө гомдолтой байбалнь, гомдохоон хүнөө хүлисэжэ байгты. Дээдын Эзэнэй таанадые хүлисэхэндэл адли таанад бэе бээ хүлисэжэ байха ёһотойт.

¹⁴Энээнһээ гадна үшөө бэе бээдээ дуратай байгты. Хайра дуран бүхы хүзэглэгшэдые холбодог, тийгэжэ тэдэнэр бодотоор нэгэдэдэг юм.

¹⁵Христосой хайрлажа байһан энхэ тайбан таанадай зүрхэ сэдхэлые хүтэлжэ байг лэ. Бурхан энхэ тайбанай тулада таанадые дуудажа, нэгэ бэе болгон нэгэдхээ ха юм. Үргэлжэ баяр хүргэжэ байгты.

¹⁶Христосой хургаал ажамидаралайтнай гол хүтэлэгшэнь болог лэ. Бэе бээ ухаатайгаар, бодомжотойгоор хургажа, заабарилжа байгты. Бурханда баяр хүргэн, псаломууд, магтаалнууд, арюун нангин дуунуудые дуулажа байгты.

¹⁷Ямаршые юумые Дээдын Эзэн Иисусай нэрэ алдарай түлөө хэжэ, али хэлэжэ байгты, тэрэнээр дамжуулан Эсэгэ Бурхандаа баяр хүргэжэ байгты.

Шэнэ ажамидаралдаа сахиха зарим дүримүүд

¹⁸Эхэнэрнүүд, үбгэдэйнгөө эрхэ мэдэлдэ байгты. Дээдын Эзэндэ хүзэглэдэг зон тийгэжэл өөһэдыгөө абажа ябаха ёһотой юм.

¹⁹Эрэшүүл, һамгадтаа дуратай байгты. Тэдээндээ шэрүүнээр бү хандагты.

²⁰Үхибүүд, эхэ эсэгынгээ үгэ ходо дуулажа ябагты. Дээдын Эзэн тиймэ ябадалые һайшаадаг юм.

²¹Эсэгэнэр, үхибүүдэйнгээ сухалыень бү хүргэжэ байгты, тийгэбэлтнай тэдэтнай урмаа хухарха.

²²Барлагууд, эзэдэйнгээ үгэ ходо дуулажа байгты. Билдагуушадтал адли эзэдэйнгээ гансал хаража байхадань бэшэ, харин тэдээндэ һайшаагдаха юумэ гэнэн зүрхэнһөөн, Бурханда хүгэдэн, ходо хэжэ байгты.



²³Ямаршые юумэ хэхэдээ, эзэдынгээ магтаалда хүртэхын тула бэшэ, харин Дээдын Эзэнэй найшаалда хүртэхын тула үнэн зүрхэнһөө зүдхэжэ байгаарайт.

²⁴Дээдын Эзэнэй өөрынгөө хүнүүдтэ бэлдээд байһан юумые тэрээнһээ залгамжалан абахат гэжэ мэдэжэ байгты. Таанад бодото Эзэн Христосто алба хэжэ байна гээшэт.

²⁵Гэмтэ юумэ хэхэн хүн бүхэн өөрынгөө буруугай зэргээр лэ абаха. Бурхан хүн бүхэниие нэрэ түрөөрнь бэшэ, харин үйлэ хэрэгүүдээрнь лэ шиидхэдэг юм.

Колоссынхидтэ 4

¹Эзэд, өөһэдынгөө барлагуудта үнэн сэхээр хандажа байгты. Таанад өөһэдөө тэнгэридэ Эзэнтэй байһанаа мэдэнэ ха юмта.

Һүүлшын заабари

²Үргэлжэ Бурханда баяр хүргэн зальбаржа байгты, зальбархадаа, һэргэлэн байгты.

³Христос тухай нюусые тайлбарилхадамнай, Бурханай үгые дэлгэрүүлхэдэмнай, Бурханай бидэндэ һайн боломжо үгэжэ байхынь тулада, таанад бидэнэйшые түлөө баһа зальбаржа байгты. Христос тухай номноһонойнгоо түлөө би мүнөө түрмэдэ һуужа байнаб.

⁴Тэрэ нюусые номноходоо шадаха зэргээрээ ойлгосотой болгон хэлэжэ байхымни тулада зальбаржа байгты.

⁵Сагаа гээнгүй һүзэглэдэггүй зондо аша туһа хүргэжэ байгаарайт, тэдэндэ ехэл ухаамсараар хандажа байгаарайт.

⁶Хэлэхэдээ таанад зохисохо болон һонирхохо юумэ ходо хэлэжэ байха, тиин хүн бүхэндэ яжа зүб харюу үгэхые мэдэжэ байха ёһотойт.

Һүүлшын амаршалга

⁷Бидэнээр хамта Дээдын Эзэндэ алба хэдэг үнэн сэхэ, инаг хайрата манай дүү Тихик нам тухай таанадта дуулгаха.



⁸Бидэнэй яжа ажамидаржа байһан тухай таанад дуулаад, урмашахынтнай тула би тэрэниие таанадта ябуулаа һэм.

⁹Тихиктэй хамта таанадай нэгэн болоһон, манай найдалтай болон инаг хайрата дүү Онисим ябалсаа. Тэдэнэр эндэ боложо байһан бүхы юумые таанадта хөөрөжэ үгэхэ.

¹⁰Намтай хамта түрмэдэ һууһан Аристарх, Варнавын аша хүбүүн Марк таанадта мэндые хүргэнэ. (Маркын таанадта ошоболь, тэрэниие угтажа абаха захиралта таанадта үгтэһэн байна).

¹¹Иуст гэжэ нэрлэгдэдэг Иисус таанадта баһа мэндые хүргэнэ. Эдэ гурбан Бурханай эрхэ засагай мандахын тула намтай хамта хүдэлжэ байһан еврей хүзэглэгшэд юм, тиин тэдэ намда ехэл аша туһатай байгаа юм.

¹²Иисус Христосой зараса, таанадай үшөө нэгэн болохо Епафрас таанадта баһа амар мэндые хүргэнэ. Тэрэ таанадай эрхим түгэс боложо, Бурханай эрхэ хүсэлые бүрин мэдэжэ байхын тула таанадай түлөө үргэлжэ Бурханда зальбардаг юм.

¹³Таанадай болон Лаодики, Иераполь хотодо байһан хүнүүдэй түлөө тэрэнэй ехэл эршэтэйгээр ажаллажа байдагыень би өөрөө баталжа шадахаб.

¹⁴Манай эрхим хүндэтэ Лука эмшэ ба Демас хоёр таанадта мэндые хүргэжэ байна.

¹⁵Лаодики хотын хүзэглэгшэдтэ, Нимфада, тэрэнэй гэртэ суглардаг хүзэглэгшэдэй бүлгэмдэ бидэнһээ мэндые дамжуулаарайт.

¹⁶Таанад энэ хандалгые уншаад, һүүлдэнь Лаодики хотын хүзэглэгшэдэй бүлгэмдэ баһа уншуулаарайт. Тиихэтэй сасуу Лаодики хотын хүзэглэгшэдтэ минии эльгээһэн хандалгые таанад уншаарайт.

¹⁷«Дээдын Эзэнэй даалгаһан ажалые бүтээгээрэй», – гэжэ Архипда хэлээрэйт.

¹⁸Павел таанадые амаршална гэжэ би өөрын гараар бэшэнэб. Гэнжэнүүдээр хүлээтэй байһан тухаймни һанажа байгаарайгты. Бурханай үршөөл хайра та бүхэнтэй оршожо байхань болтогой.



Фессалоникиинхидтэ 1-дэхи

Фессалоникиинхидтэ 1-дэхи 1

Амаршалга

¹Фессалоники хотын хүзэглэгшэдэй бүлгэм, таанадые Павел, Силуан, Тимофей гурбан амаршална. Эсэгэ Бурхан ба Дээдын Эзэн Иисус Христос таанадта үршөөл хайра ба амгалан тайбаниие үршөөг лэ!

Фессалоники хотынхидой этигэл хүзэг ба ажамидарал тухай

²Та бүхэнэй түлөө бидэ Бурханда ходо баясхалан хүргэжэ, та бүхэниие үргэлжэ зальбаралдаа дурдажа байдагбди.

³Эсэгэ Бурханай урда тээ этигэл хүзэгөө хэрэг дээрээ бээлүүлдэг байһыетнай, хайра дуран ажалыетнай бүхэжүүлдэг байһыень, Дээдын Эзэн Иисус Христосто бэхи батаар найдажа байдагыетнай бидэ үргэлжэ ханадагбди.

⁴Аха дүүнэрни, Бурхан таанадта дуратай, таанадые шэлэжэ абаа юм гэжэ бидэ мэдэнэ ха юмди.

⁵Һайн Мэдээсэлые таанадта асархадаа бидэ ганса үгэнүүдые хэрэглээ бэшэ, үшөө Нангин Һүлдэн хүсэ хэрэглээбди. Һайн Мэдээсэлэй үнэн зүб байһыень харуулаабди. Таанадай дунда байхадаа, танай аша туһада яажа амидаржа байһыемнай таанад мэдэнэт.

⁶Таанад маанадта болон Дээдын Эзэндэ һажаан ажамидаржа эхилээ һэнта. Ехэ зобожо байһаншье һаа, Бурханай үгые таанад баяртайгаар угтажа абаа һэнта. Энэ баяр таанадта Нангин Һүлдэ олгожо байна.

⁷Тиигэжэ таанад Македонидо ба Ахайяда амидарһан бүхы хүзэглэгшэдтэ жэшээ харуулбат.

⁸Таанад Македонидо ба Ахайяда ганса Бурханай үгэ тараагаа бэшэт, үшөө таанадай Бурханда хүзэглэдэг тухай мэдээсэл хаа хаанагүй тараа. Тиимэһээ дахин дурдаһанай хэрэггүй байна.

⁹⁻¹⁰Маанадай таанадта ошоходо, таанадай яажа бидэниие угтажа абаһан тухай, онгонуудаа орхижо, Бурханда хандаһан тухайтнай булта

хөөрэлдэжэ байна. Үнэн зүб ба амиды Бурханда алба хэхэ ханаатайгаар, маанад дээрэ ерээдүйдэ бууха ёһотой Бурханай уур сухалһаа аршалжа байһан, үхөөд амидырһан Христосой тэнгэриһэ буужа ерэхые хүлээхэ ханаатайгаар таанад Бурханда хандаһан байгаат.

Фессалоникиинхидтэ 1-дэхи 2

Павелай Фессалоники хотодо ажалһан тухай

¹Аха дүүнэрни, бидэнэй таанадта ерэнэн хэрэг дэмы үнгэрөөгүй гэжэ таанад өөһэдөө мэдэнэт.

²Филиппы хотодо байхадамнай ямар муугаар бидэндэ хандажа, бидэниие баһажа доромжолһыень таанад мэдэнэт. Манда эсэргүүсэхэн зоной олон байһаншье һаань, һайн Мэдээсэлые номнохо зориг бидэндэ Бурхан үгөө юм.

³Манай таанадта номножо байгаа хургаалда алдуушье үгы, булхайтай ушар шалтагааншьегүй, бидэ хэниешье мэхэлхэ гэжэ оролдоногүйбди.

⁴Бурхан бидэниие туршаад, һайн Мэдээсэл номнохыемнай даалгаа. Тиимэхээ номноходоо бидэ хүнүүдтэ һайшаагдаха гэжэ оролдодоггүйбди, харин бидэнэй һанал бодолые туршажа байдаг Бурханда һайшаагдаха гэжэ оролдодогбди.

⁵Бидэ һаймһарһан үгэнүүдые хэлэхээ таанадта ерээгүйбди, хомхолзоһон сэдхэлээ нюужа уран үгэнүүдые хэлэжэ байгаагүйбди гэжэ таанад яһала һайн мэдэжэ байнат. Бурхан манай гэршэ юм!

⁶Бидэ хэнэйшье, таанадайшье, бэшэшье зоной магтаалда хүртэхые оролдоногүйбди.

⁷Бидэ Христосой элшэд юм хадаа таанадһаа мүнгэнэй туһаламжа абаха аргатай байгаабди. Зүгөөр бидэ үхибүүдтэ һаналаа табижа байдаг эхэнэр шэнги таанадтай энхэргэн байгаабди.



⁸Таанадта дуратай байһан хадаа бидэ Бурханай һайн Мэдээсэлээр хубаалсахаһаа гадна ами наһаараа хубаалсахада бэлэн байгаабди. Бидэ таанадта ехэл дуратай байгаабди.

⁹Аха дүүнэрни, яжа ажаллажа, эсэжэ сусажа байһан тухаймнай таанад һанана байхат. Таанадые ямаршые юумээр зобоохогүй гэжэ бидэ таанадта Бурханай һайн Мэдээсэлые үдэр һүнигүй номножо байгаа һэмди.

¹⁰Та һүзэглэгшэдтэ бидэ арюун һайханаар, үнэн сэхээр, хандадаг байгаабди. Бидэниие зэмэлхээр юумэн үгы. Таанад өөһэдөөшые, Бурханшые тэрэниие гэршэлхэ.

¹¹Эхэ эсэгэ хоёрой үхибүүдтээ хандадагтал адляар бидэ та бүхэндэ хандажа байгаабди.

¹²Хаан түрөөрөө ба алдар солоороо хубаалсаха гэжэ таанадые дуудаһан Бурханда һайшаагдаха амидаралаар амидархыетнай бидэ гуйжа, идхажа, аргадажа байгаабди.

¹³Бурханда үргэлжэ баясхалан хүргэжэ байха ондоошые шалтагаан бидэндэ бии юм. Таанадта Бурханай үгэ асархадамнай, таанад тэрэниие хүнүүдэй үгэдэл бэшэ, харин Бурханай үгэдэл шагнажа, угтажа абаа һэнта. Тэрэ үнэхөөрөө Бурханай үгэ байгаа, та һүзэглэгшэдэй дунда ажаллажа байгаа.

¹⁴⁻¹⁵Аха дүүнэрни, Иисус Христостой нэгэдэһэн Иудейн һүзэглэгшэдэй бүлгэмүүдтэй ямар юумэн ушараа һэм, тон тиимэ юумэн таанадтайшые ушараа. Дээдын Эзэн Иисус Христосые, лүндэншэдые алаһан, бидэниие хашажа мүрдэжэ байһан Иудейн зонһоо боложо, тэдэ зоной зобоһондол адли таанад баһа өөһэдынгөө хотынхидтэ хашуулан мүрдүүлэн зобоот. Тэдэ Иудейн зон Бурханда ехэл жэрхэдэһэтэй байна. Хүн бүхэндэ үһөөрхэжэ байна.

¹⁶Бусад арадуудай абарагдахын тулада Бурханай үгэ номноходомнай тэдэ баһал һаалта хэнэ. Тиигэжэ Иудейн зон хэһэн нүгэлнүүдэйнгөө һүүлшын нүгэлые хэбэ. Одоол мүнөө Бурхан тэдэниие хэһээхэнь даа.

Павел дахин Фессалоники ошохо хүсэлтэй байна

¹⁷Аха дүүнэрни, таанадтай саг зуура хахасаад байхадаа таанадаа ехэл үгылөөбди, таанадтай дахин уулзахаяа ехээр оролдообди. Үшөө бидэ һанал бодолоороо ходо таанадтай байгаабди.

¹⁸Бидэ таанадта ошохо һанаатай байгаабди. Би өөрөө таанадта ошохоёо хэдэ дахин зүдхөөб, зүгөөр сатана бидэндэ һаалта хэжэ байгаа.

¹⁹Һүүлэй һүүлдэ таанад лэ манай найдабари, манай баяр, манай Дээдын Эзэн Иисусай ерэхэдэ илаһандаа бахархаха шалтагаамнай болоно гэшэт.

²⁰Таанад үнэхөөрөө манай бахархал, манай баяр болонот.

Фессалоникиинхидтэ 1-дэхи 3

¹⁻³Һүүлэй һүүлдэ бидэ тэсэхэ аргагүй болообди. Тиимэһээ Христос тухай һайн Мэдээсэл номнон бидэнтэй Бурханда алба хэжэ байһан Тимофей дүүгээ таанадта эльгээгээд, өөһэдөө Афины хотодо үлэхэ гэжэ шиидээ һэмди. Хэнэйтнайшые хашалга мүрдэлгэнүүдһээ айн сухарихагүйн тула таанадые бата бэхи болгохо, һүзэгыетнай урмашуулха зорилготойгоор бидэ Тимофее ябуулаа һэмди. Тиимэ хашалга мүрдэлгэнүүдые Бурханай бидэндэ заяһые таанад өөһэдөөшые мэдэнэт.

⁴Түрүүн таанадтай хамта байхадаа хашуулан мүрдүүлхэбди гэжэ бидэ уридшалан хэлээ һэмди. Тон тиимэл юумэн ушараа.

⁵Саашадаа тэсэхэ аргагүй байһандаа, һүзэг тухайтнай мэдэжэ ерэхээрнь Тимофее эльгээгээ һэмди. Шолмос таанадые хорхойтуулаашые һаань, бүхы манай ажал дэмы үнгэрөөгүйл байха гэжэ этигэлтэй байнабди.



⁶Мүнөө Тимофей бусажа ерээ, танай хүзэг ба дуран тухай хайн мэдээсэл асараа. Таанад бидэниие ходо хайнаар дурданат, таанадые харахаяа ехээр хүсэдэгтэмнайл адляар таанадые бидэниие харахаяа ехэл хүсэнэт гэжэ тэрэ хөөрөө.

⁷Аха дүүнэрни, зоболонтой, дутагдалтай ажамидаржа байхадамнай таанад бидэниие этигэл хүзэгөөрөө урмашуулбат.

⁸Дээдын Эзэнтэй нэгэдэһэн амидаралаа бата бэхээр сахижа байхадатнай бидэ мүнөө бодотоор амидарбабди.

⁹Таанадай бидэндэ асарһан бүхы баярай түлөө бидэ яжа Бурханда гүйсэд баясхалан хүргэхэ гээшэбибди?

¹⁰Таанадтай уулзаха, этигэл хүзэгтэтнай дутажа байһан юумые үгэхэ хүсэлтэйгөөр бидэ үдэр хүнигүй Бурханиие үнэн зүрхэнһөө гуйнабди.

¹¹Таанадта ошохо харгыемнай Эсэгэ Бурхан өөрөө, манай Дээдын Эзэн Иисус бэлдэжэ үгэг лэ.

¹²Таанадта аргагүй ехэ дуратай байдагтамнайл адляар бэе бээдээ болон бусад зондо дуратай байхыетнай Дээдын Эзэн таанадта үршөөг лэ.

¹³Тиигэбэл Дээдын Эзэн Иисусай өөрынгөө хүнүүдтэй хүрэхэ ерэхэдэнь, Эсэгэ Бурханай урда нүгэлгүй, арюун сэбэр байхынтнай тула Дээдын Эзэн таанадые бэхижүүлхэ.

Фессалоникиинхидтэ 1-дэхи 4

Бурханда хайшаагдаха ажамидарал тухай

¹Аха дүүнэрни, Бурханда хайшаагдадаг ажамидарал ямар байдаг бэ гэжэ таанад бидэнһээ һураа бэлэйт. Мүнөөшье таанад тиимэ ажамидаралтай байнат. Тиин саашадаашье тиигэжэл ажамидарагты гэжэ бидэ мүнөө Дээдын Эзэн Иисусай нэрээр таанадые гуйха, аргадаха байнабди.



²Дээдын Эзэн Иисусай эрхэ мэдэлээр бидэнэй таанадта үгэһэн захяа заабаринуудые өөһэдөө мэдэжэ байна ха юмта.

³Бурхан таанадые забхай бэшэ, харин гэгээн хүнүүд байхыетнай хүсэнэ.

⁴Хүн бүхэнтнай бээ арюун нангин ба сэбэрээр абажа ябаха ёһотой.

⁵Бурхание мэдэхгүй бусад арадуудта адли зальхай забхай хүсэлэнгүүдтэ бү абтагты.

⁶Тиимэхээ таанадай хэншые Христосто хүзэглэгшэ ондоо хүндэ муу юумэ хэхэ, мэхэлэн барашхаа ёһогүй. Тиимэ юумэ хэһэн зоние Дээдын Эзэн хэхээ гэжэ бидэ уридшые хэлээ һэмди, мүнөөшые хатуугаар һэргылнэбди.

⁷Бурхан бидэниие забхайралдахыемнай бэшэ, харин арюун гэгээнээр амидархыемнай уряалаа юм.

⁸Тиимэхээ энэ һургаал буруушааһан хүн болбол хүниие буруушаана бэшэ, харин таанадта Нангин һүлдээ үршөөжэ байгаа Бурхание буруушаана.

⁹Бэе бээдээ дуратай байгты гэжэ бэшэхэ хэрэггүй байха. Бэе бээдээ дуратай байхые Бурхан таанадта заажа үгөө ха юм.

¹⁰Таанад Македонидо ажаһуугаа бүхы хүзэглэгшэдтэ дуратайт. Аха дүүнэрнай, бүришые ехээр бэе бээдээ дуратай байгты гэжэ таанадые гуйнабди.

¹¹Бидэнэй түрүүн хэлэһэн ёһоор таанад даруухан ажамидарха, өөрынгөө ажал хэхэ, өөһэдөө бээ тэжээхэ зорилго табигты.

¹²Тиигэжэл таанад хүзэггүй хүнүүдтэ хүндэтэй, ямаршые дутагдалгүй, эрхим түгэс хүнүүд байхат.

Һүзэглэгшэдэй этигэл найдабари тухай



¹³Аха дүүнэрни, этигэл найдабаригүй байһан хүнүүдтэй адли гашуудахагүйнтнай тула наһа бараһан хүнүүд тухай үнэниень мэдэжэ байхыетнай бидэ хүсэнэбди.

¹⁴Иисус үхөөд амидыраа гэжэ бидэ этигэнэбди. Тиимэхээ тэрээндэ хүзэглэжэ байгаад, наһа бараһан хүнүүдые Бурхан Иисустай хамта хүтэлжэ ерэхэ гэжэ бидэ этигэнэбди.

¹⁵Мүнөө бидэ таанадта Дээдын Эзэнэй хургаал номнонобди: Дээдын Эзэнэй ерэхэдэ амиды байгаа бидэ үхэхэн хүнүүдһээ түрүүн тэрээнтэй уулзахагүйбди.

¹⁶Айладхаһан абяанай гарахада, Бурханай ахалагша Эльгээмэлэй дуу дуулдахада, Бурханай бүрээгэй дуугархада, Дээдын Эзэн өөрөө тэнгэриһээ доошоо бууха юм. Эдэ бүхэнэй болохын урда тээ Христосто хүзэглэжэ байгаад үхэхэн хүнүүд амидырха.

¹⁷Тиигээд амиды байһан бидэнэр тэдэ үхэхэн хүнүүдтэй хамта Дээдын Эзэниие угтахаяа агаарта үүлэн дээрэ гарахабди. Тиигээд Дээдын Эзэнтэй ходол хамта байхабди.

¹⁸Иигэжэл, эдэ үгэнүүдээр бэе бээе урмашуулжа байгты.

Фессалоникиинхидтэ 1-дэхи 5

¹Аха дүүнэрни, эдэ бүхэнэй ушарха саг, болзор тухай таанадта бэшэхэнэй хэрэггүй.

²Дээдын Эзэн ерэхэдээ хүниндөө орожо ерэхэн хулгайшандал хүлээгээгүй байхада ерэхэ юм гэжэ таанад өөһэдөө яһала һайн мэдэжэ байнат.

³Хүнүүдэй «амгалан тайбан, аюулгүй байнабди» гэжэ байхада тэдэниие гэнтэ һүйдхэхэ. Тэрэ һүйдхэл болбол түрэхөө байһан эхэнэрэй үбдэдэг мэтэ гэнтэ эхилхэ, тиимэхээ хүнүүд тэрээнһээ зайлажа шадахагүй.

⁴Харин таанад, аха дүүнэрни, харанхы бүрэнхы соо байна бэшэ ха юмта. Тиимэхээ тэрэ Үдэр болбол хулгайшан мэтэ хүлээгээгүй байхадатнай ерэхэ ёһогүй.

⁵Таанад булта гэрэл туяа бэдэрһэн, үдэрэй харьяалай хүнүүд гээшэт. Бидэ болбол хүниин, харанхы бүрэнхыгэй хүнүүд бэшэбди.

⁶Тиимэхээ бидэ бэшэ зондо адли унтаха ёһогүйбди. Бидэ һэргэлэн, эрүүл байха ёһотойбди.

⁷Юундэб гэхэдэ, хүниндөөл хүнүүд унтадаг, хүниндөөл хүнүүд һогтотороо уудаг юм.

⁸Гэхэдээ бидэ үдэрэй харьяалай хүнүүд хадаа эрүүл байха ёһотойбди. Бидэ хүзэг ба дуран хоёроо хуяг мэтэ үмдэжэ, абарагдаха найдалгаа дуулга мэтэ үмдөөд байха ёһотойбди.

⁹Бурхан хэхээхын тула бэшэ, харин Дээдын Эзэн Иисус Христосоор дамжан абархын тула бидэниие шэлэжэ абаа юм.

¹⁰Иисус бидэнэй орондо үхөө, тиимэхээ тэрэнэй ерэхэдэ бидэ амидышые хаа, наһа бараһаншые хаа, тэрэнтэй хамта амидарха ёһотойбди.

¹¹Тиимэхээ таанад бэе бээе урмашуулдаг, бэе бээдээ туһалдаг заншалаа үргэлжэлүүлжэл байгты.

Һүүлшын захяа заабари ба амаршалга тухай

¹²Аха дүүнэрни, таанадай дунда ажаллажа, Бурханда һайшаагдаха ажамидаралда таанадые хүтэлжэ, хургажа байһан хүнүүдые хүндэлжэ байгты гэжэ бидэ гуйнабди.

¹³Хэжэ байһан ажалайнь түлөө тэдэнээ хүндэлжэ, тэдэндээ дуратай байгты. Өөһэд хоорондоо амгалан тайбан байгты.

¹⁴Аха дүүнэрни, залхуу хүнүүдтэ ухаан заагты, зориггүй хүнүүдые урмашуулжа байгты, һулахан хүнүүдтэ дэмжэлгэ үзүүлэгты, хүн



бүхэндэ ехэ тэсэбэритэй хандажа байгты гэжэ бидэ баһа гуйха байнабди.

¹⁵Таанадта муу юумэ хэхэдэнь харюудань муу юумэ бү хэгты, харин бэе бээдээ, хүн бүхэндэ ходо һайн юумэ хэхые оролдогты.

¹⁶Ходо баяртай байгты.

¹⁷Ходо зальбаржа ябагты.

¹⁸Ямаршые нүхэсэлдэ бүхы юумэнэй түлөө бүгэдэндэ баясхалан хүргэжэ байгты. Иисус Христосой харуулһан ёһоор тиимэ юумэ хэжэ байхыетнай Бурхан таанадһаа хүсэжэ байна.

¹⁹Нангин һүлдэньгөө гэрэлыень бү унтараагты.

²⁰Уридшалан хэлэгдэһэн юумэнүүдые бү доромжологты.

²¹Бүхы юумые шалгажа үзөөд, һайниинь баримталжа ябагты.

²²Элдэб гэмтэ ябадалнуудые хэнгүй байхые хэшээгты.

²³Бидэндэ амгалан тайбаниие үршөөжэ байһан Бурхан таанадые бүримүһэн арюун нангин болгог, Дээдын Эзэн Иисус Христосой ерэтэр танай һанал бодол, хүнэһэ һүлдэ, махабад бэе бүрин бүтэнөөрөө ямаршые дутуу дутагдалгүй хадагалагдажа байг.

²⁴Таанадые дуудаһан Бурхан найдабаритай юм хадаа тэрэ бүхэниие бээлүүлхэ.

²⁵Аха дүүнэрни, бидэнэй түлөө баһа зальбаржа байгты.

²⁶Бүхы һүзэглэгшэдые арюунаар таалан амаршалагты.

²⁷Бүхы һүзэглэгшэдтэ энэ бэшэгые уншажа үгэгты гэжэ би Дээдын Эзэнэй нэрэ түрөөр гуйнаб.

²⁸Дээдын Эзэн Иисус Христосой үршөөл хайра та бүхэнтэй оршожо байхань болтогой.

Фессалоникиинхидтэ 2-дохи

Фессалоникиинхидтэ 2-дохи 1

Амаршалга

¹Эсэгэ Бурхан болон Дээдын Эзэн Иисус Христостой нэгэдэһэн Фессалоники хотын хүзэглэгшэдэй бүлгэм, таанадые Павел, Сила, Тимофей гурбан амаршална.

²Эсэгэ Бурхан болон Дээдын Эзэн Иисус Христос таанадта үршөөл хайра ба амгалан тайбаниие үршөөг лэ!

Христосой ерэхэдэ болохо зарга шүүбэри

³Аха дүүнэрни, таанадай түлөө бидэ үргэлжэ Бурханда баясхалан хүргэжэ байха ёһотойбди. Юундэб гэхэдэ, таанад бүри ехээр Бурханда хүзэглэжэ байнат, бүри ехээр бэе бэеэ хайрлажа байнат.

⁴Тиимэхээ бидэ хүзэглэгшэдэй бүлгэмүүдэй урда таанадаар омогорхожо байнабди. Бүхы хашалан мүрдэлгэнүүдтэ, зоболонгуудта хүзэг этигэлээ алдангүй таанадай тэсэбэритэй байһандатнай омогорхожо байнабди.

⁵Эдэ бүхэн Бурханай зарга шүүбэриин үнэн зүб байһыень батална. Саашадаа таанад Бурханай хаан орондо орохо эрхэтэй болохот, юундэб гэхэдэ, тэрэнэй түлөө зобожо байнат.

⁶Бурханай урда үнэн зүб юумэ бүтэхэнь болтогой: таанадые зобоожо байһан хүнүүд зобохо,

⁷⁻⁸харин зобожо байһан таанад, мүн бидэ баясахабди. Дээдын Эзэн Иисусай хүр хүсэтэй Эльгээмэлнүүдтэйгээ тэнгэридэ аһажа байһан гал соо харагдахадань, Бурхан эдэ бүхэниие бэлүүлхэ. Бурханиие буруушааһан хүнүүдые, һайн Мэдээсэлыень баримталдаггүй хүнүүдые Дээдын Эзэн Иисус хэһээхэ.

⁹Дээдын Эзэнэй ерэхэ тэрэ үдэр тэдэ зон Дээдын Эзэнһээ, тэрэнэй алдарта хүр хүсэнһөө илгагдаад, хэтын хэтэдэ хэһээгдэн зобохо.

¹⁰Дээдын Эзэнэй тэрэ үдэр ерэхэдэнь, гэгээн арадынь, бүхы хүзэглэгшэдынь тэрэниие хүндэлхэ, тэрээндэ алдар соло дуудаха. Бидэнэй номноһон һургаалда этигэһэн хадаа таанадшые баһа тэрэ зоной дунда байлсахат.

¹¹Тиимэһээл бидэ таанадай түлөө ходо зальбаржа байдагбди. Зохистой ажамидархынтнай тула Бурхан таанадые дуудаа. Тиин тэрэ ажамидаралые Бурхан таанадта үршөөг лэ. Һайн һайхан юумэ хэжэ байха гэһэн хүсэлэнгүүдыетнай Бурхан өөрынгөө хүсөөр бээлүүлэг лэ, этигэл хүзэгтэйгөөр хэжэ байһан хэрэгүүдыетнай эсэстэнь хүргэг лэ.

¹²Манай Бурхан болон Дээдын Эзэн Иисус Христосой үршөөл хайраар Дээдын Эзэн Иисус Христосой нэрэнь таанад соо алдаршаһай, таанад тэрээн соо алдаршаһайт.

Фессалоникиинхидтэ 2-дохи 2

Бурханай дайсан

¹Дээдын Эзэн Иисус Христосой ерэхэ болон бидэнэй тэрээнтэй хамта байха суглаан тухай хэлэбэл, аха дүүнэрни,

²Дээдын Эзэнэй үдэр ерээ гэхэдэ таанад бэлээр ухаан бодолоороо мэгдэжэ, һанаагаа бү зобооройт гэжэ гуйнаб. Тэрэ үдэр ерээ гэжэ бидэниие уридшалан хэлээ, али номноо, али үгы һаа бэшэг соогоо бэшээ гэжэ таанад бодожо магадгүйт.

³Таанадые хэншые, ямаршые аргаар бү мэхэлэг. Бурханда эсэргүүсэһэн һүүлшын үймөөнэй болотор, һүйдхэл асардаг харата хүнэй элиртэр тэрэ Үдэр ерэхэгүй.

⁴Бурханда, нангин гэжэ нэрлэгдэдэг бүхы юумэндэ тэрэ хүн эсэргүүсэхэ, тэдэ бүхэнэй дээгүүр өөрыгөө табиха. Тиихэдээ тэрэ бүри Бурхан хүмэдэ һуугаад, өөрыгөө Бурханби гэжэ баталан хэлэхэ.

⁵Таанадтай хамта байхадаа би эдэ бүхэн тухай хөөрөжэ байгаа һэм, һанана гүт?



⁶Харата хүнэй ерэхэдэнь ямар юумэн хаалта болоноб гэжэ таанад өөһэдөө мэдэнэт. Тэрэ томилогдоһон сагтаал ерэхэ.

⁷Бурханай дайсан нюусаар ажаллажа байна ха юм, гэхэдээ тэрэниие халхалжа байһан хүсэн түрүүн буураха ёһотой.

⁸Тиигээд Бурханай дайсан элирхэ, харин Дээдын Эзэн Иисус ерэхэдээ, тэрэниие аманайнгаа амисхалаар алаха, өөрынгөө харгама ялагар байдалаар тэрэниие хүнөөхэ.

⁹Бурханай дайсан шолмосой хүсэ барижа ерэхэ, тиигээд элдэб янзын хуурмаг гайхамшагта үзэгдэлнүүдые, дүлгэ тэмдэгүүдые үзүүлжэ,

¹⁰үхэлдэ хүртэхэ хүнүүдтэ элдэб янзын мэхэ гохо хэрэглэхэ. Өөһэдыгөө абаран, үнэн зүб юумэндэ этигээгүй, дурлаагүй зон үхэхэ.

¹¹Тэрэнэйнэ түлөө Бурхан тэдэ зониие эндүүрүүлхэ аргатай хүсэ эльгээхэ, тиигээд тэдэ зон хуурмаг юумэндэ этигэжэ байха.

¹²Һүүлдэнь үнэн зүб юумэндэ этигээгүй, харин нүгэлтэ юумэ үйлэдэхэ дуратай байһан хүн бүхэн буруушаагдаха.

Таанад абарагдахаар шэлэгдэһэн байгаат

¹³Дээдын Эзэндэ инаг хайрата байһан аха дүүнэрни, бидэ таанадай түлөө үргэлжэ Бурханда баясхалан хүргэжэ байха ёһотойбди. Таанадай Нангин хүлдын хүсөөр Бурханай хүнүүд боложо, үнэн зүб юумэндэ этигэһэн хүзэгөөрөө абарагдахынтнай тула Бурхан таанадые эхинһээ нааша шэлэжэ абаа.

¹⁴Бидэнэй таанадта номноһон һайн Мэдээсэлэй ашаар абарагдахынтнай тула Бурхан таанадые дуудаа юм. Дээдын Эзэн Иисус Христосой алдарые хубаалсахаар тэрэ таанадые дуудаа.

¹⁵Тиимэхээ, аха дүүнэрни, бидэнэй номноһон ба бэшэһэн һургаалнуудые баримталжа, бата бэхи байгты.



¹⁶Маанадта дуратай, хайра үршөөлөөрөө маанадые хэтын хэтэдэ урмашуулдаг, бата найдабари үршөөдэг Эсэгэ Бурхамнай болон манай Дээдын Эзэн Иисус Христос өөрөө

¹⁷hanaaetнай заһажа, хайн хайхан үйлэнүүдые ходо хэжэ, хэлэжэ байхаартнай таанадые батажуулаг лэ.

Фессалоникиинхидтэ 2-дохи 3

Бидэнэй түлөө зальбаржа байгты

¹Аха дүүнэрни, түгэсхэлдэнь иимэ юумэн хэлэхэ байнаб: Дээдын Эзэнэй хургаал таанадай дунда яжа таража байнаб, тон тиигэжэл саашадаа таража, алдаршажа байхын тула таанад бидэнэй түлөө зальбаржа байгты.

²Бидэниие нүгэлтэ, хуурмаг хүнүүдһээ зайсуулжа байхыень баһа Бурханда зальбаржа байгты. Хүн бүхэн Бурханай Үгэдэ үнэн сэхэ байдаггүй ха юм.

³Гэхэдэ Дээдын Эзэн этигэл найдабаритай юм. Тиимэхээ тэрэ таанадые батажуулжа, шолмосхоо аршалжа байха.

⁴Таанад бидэнэй захирһан юумые хэхэт, саашадаашье хэжэ байхат гэхэн хатуу этигэл Дээдын Эзэн бидэндэ үгэжэ байна.

⁵Бурханай хайра дурые мэдэрүүлжэ, Христосой ерэхые хүлээхэ тэсэбэри Дээдын Эзэн таанадта үршөөг лэ.

Ажаллаха уялга

⁶Аха дүүнэрни, бидэнэй үгэхэн захяа заабариие сахидаггүй, журамгүй хүзэглэгшэдһөө зайсажа байгты гэжэ Дээдын Эзэн Иисус Христосой нэрэ алдараар таанадтаа захиран ханданабди.

⁷Бидэнэйл хэхэн юумые һажаажа хэхэ ёһотойгоо таанад өөһэдөөшье хайн ойлгоно ха юмта. Таанадтай хамта байхадаа бидэ журам сахидаг бэлэйбди.

⁸Бидэ хэнээшье туһаламжые түлөөһөгүй абадаггүйбди. Таанадай хэндэшье ашаан болохогүй гэжэ бидэ үдэр хүнигүй ажалладаг бэлэйбди.

⁹Туһаламжа эрихэ эрхэгүй байһандаа бидэ тиигээ бэшэбди, харин таанадта һажаажа байха жэшээ харуулхын тула тиигэжэ ажаллажа байгаабди.

¹⁰Бидэ таанадаар суг байхадаа, «Ажаллаха дурагүй хүн эдихэ ёһогүй» гэжэ хэлэдэг бэлэйбди.

¹¹Таанадай дунда журам сахидаггүй, юушье хэдэггүй, гансал ондоо хүнүүдэй хэрэгтэ оролсожо байдаг хүнүүд бии гэжэ дуулаһан хадаа эдэ бүхэниие хэлэнэбди.

¹²Тэдэ зониие дарууханаар амидаржа, өөһэдөө ажаллажа, өөһэдыгөө тэжээжэ байхыень Дээдын Эзэн Иисус Христосой нэрэ алдараар бидэ уряалжа, идхажа байнабди.

¹³Аха дүүнэрни, таанад ходол һайн юумэ хэжэ ябагты.

¹⁴Энэ бэшэг соогоо захиһан үгэнүүдыемнай дуулаха дурагүй хүнүүд байжа магадгүй. Тиигэбэл таанад тэдэ хүнүүдэй эшэжэ улайхын тула тэдэниие ажаглажа байгаад, тэдэнээр харилсангүй байгаарайт.

¹⁵Тиихэдээ тэдэндэ дайсадта адли бү хандаарайт, харин аха дүүнэрээ һургажа байһандал ухаан заажа байгаарайт.

Һүүлшын Үгэнүүд

¹⁶Амгалан тайбанай эхин болохо Дээдын Эзэн өөрөө таанадта хододоо бүхы юумэндэ амгалан тайбаниие үршөөжэ байг лэ. Дээдын Эзэн та бүхэнтэй оршожо байг лэ.

¹⁷Өөрын гараар би энэениие бэшэнэб: Павел таанадые амаршална. Иимэ арга бүхы хандалгануудаймни бэлгэ тэмдэг болодог юм. Иигэжэл би бэшэдэг хүм.



¹⁸Дээдын Эзэн Иисус Христосой үршөөл хайра та бүхэнтэй оршожо байг лэ.



Тимофейдэ 1-дэхи

Тимофейдэ 1-дэхи 1

Амаршалга

¹⁻²Этигэл хүзэгөөрөө үнэн сэхэ хүбүүмни болоһон Тимофей, шамайе би Павел амаршалнаб. Би манай Абарагша Бурханай ба манай этигэл найдал болоһон Дээдын Эзэн Христос Иисусай захиралтаар Христос Иисусай элшэн болоһон байгаа хүнби. Бурхан Эсэгэ болон манай Дээдын Эзэн Иисус Христос шамда хайн хайхание, үршөөл хайра ба амгалан тайбание үршөөг лэ.

Хуурмаг хургаалһаа хэргылнэ

³Македони ошоходоо би шамайе Эфес хотодо үлэхыешни гуйгаа хэнби. Зарим хүнүүд тэндэ хуурмаг юумэндэ хургажа байна, ши тэдэниие зогсоохо ёһотойш.

⁴Арсалдаан лэ гаргадаг үльгэрнүүдээ, дууһашагүй угай бэшэгүүдээ хөөрэхээ болигты гэжэ тэдээндэ захираарай. хүзэгынь Бурханай түсэбтэй таарахагүй байһаниинь мэдээжэ.

⁵Хүзэглэгшэдэй бэе бээдээ дуратай байхые урмашуулхань тэрэ захиралтын зорилго болоно. Тиимэ хайра дуран үнэн зүрхэнһөө, арюун сэбэр ханаанһаа, бодото хүзэг этигэлһээ эхи абадаг.

⁶Зарим хүнүүд сэхэ замһаа буруу замда ороод, дэмы юумэ шашаад байна.

⁷Тэдэнэр Бурханай хуулиин хургагшад байха ханаатай аад, өөһэдынгөө хэлэһэншые юумэ, баталһаншые юумэеэ ойлгоногүй.

⁸Хуули хэрэглэхэ ёһотой аргаар лэ хэрэглэбэл, тэрэ хайн үрэ дүнтэй байдаг юм гэжэ бидэ мэдэнэбди.

⁹Хуули гээшэмнай үнэн сэдхэлтэндэ зорюулагдаһан бэшэ, харин хуули эбдэдэг, Бурханай мэдэлдэ оросогүй зондо, Бурханда шүтэдэггүй, нүгэл хэгшэ зондо, Бурханиешые, нангин



юумэнүүдыешье тоодоггүй зондо, эсэгэ эхэеэ алаһан хүнүүдтэ, алууршадта,

¹⁰зальхай ба ташаяан ябадалтай зондо, хүнүүдые хулуудаг, худал юумэ хэлэдэг, хуурмаг гэршэлгэ үгэдэг зондо, үнэн зүб һургаалда зохихогүй элдэб юумэ хэдэг зондо зорюулагдаһан байгаа юм гэжэ һанажа байха хэрэгтэй.

¹¹Һайн Мэдээсэлэй үнэн зүб һургаалые намда алдарта ба үршөөлтэ Бурхан айладхажа байхыемни даалгаһан байна.

Бурханай үршөөл хайрын түлөө баясхалан хүргэнэб

¹²Намда ажаллаха хүсэ шадал үгэһэн Дээдын Эзэн Христос Иисуста би баясхалан хүргэжэ байнаб. Намайе найдабаритай гэжэ тоолоод, өөртэнь алба хэхиемни табиһандань баясхалан хүргэнэб.

¹³Урдань би тэрэниие доромжолжо, хашан мүрдэжэ, гомдохоожо байгааб. Гэхэдээ һүзэг этигэлгүй байхадаа би тиимэ юумэ хээб. Юу хэжэ байһанаа ойлгоногүй байһандамни, Бурхан намайе хүлисөө.

¹⁴Дээдын Эзэн Иисус Христосой ашаар намда буян хэшэгээ хайрлаа. Тиигэжэ би Дээдын Эзэндэ һүзэглэдэг, тэрээндэ ба тэрэнэй хүнүүдтэ дуратай болоо хүм.

¹⁵Иисус Христос нүгэлтэдые абарха гэжэ газар дэлхэйдэ ерээ гэдэгынь үнэн зүб юм, тиигэжэ хэлэһэндэ этигэжэ боломоор юм. Би болбол тэдэ нүгэлтэдэй эгээн мууниинь байгааб.

¹⁶Бурхан намайе үршөөл хайрадаа хүртөөгөө. Ушарынь юуб гэбэл, нүгэлтэдэй мууниинь байһан намда Христос Иисус ехэл тэсэбэритэй байгаа. Хүн зон тэрээндэ һүзэглэжэ, һүүлдэнь мүнхын амидаралда хүртэхынь тулада Христос тиимэ тэсэбэри үзүүлээ юм.

¹⁷Хэтэдээ амиды, нюдэндэ харагдадаггүй мүнхын Хаан, ори ганса Бурхан хэтын хэтэдэ хүндэтэй, алдар солотой байг лэ. Болтогой!



¹⁸Тимофей хүбүүмни, түрүүн шам тухай уридшалан хэлэгдэнэй ёһоор би шамдаа иимэ юумэ даалганаб. Һайн тэмсэхын тула тэдэ уридшалан хэлэгдэн үгэнүүдые зэбсэгтэ мэтэ ашаглаарай,

¹⁹тиихэдэ хүзэгөө хадагалжа, һэшхэлтэй байгаарай. Зарим хүнүүд һэшхэлээрээ болонгүй хүзэгөө алдаа.

²⁰Тэдэнэй дунда Именей ба Александр байна. Бурхание доромжолхоёо болихын тула би тэдэниие сатанагай гарта үгэжэ хэһээгээб.

Тимофейдэ 1-дэхи 2

Һүзэглэгшэдэй бүлгэмэй зальбаралга

¹⁻²Бурханда хүгэдэн, үнэн зүбөөр өөһэдыгөө абажа, аажам тэнюун, амгалан тайбан ажамидархын тула бүхы хүн зоной, бүхы хаануудай, бүхы зонхилжо захиржа байгаа хүнүүдэй түлөө таанар Бурханда зальбарагты, гуйлта баригты, мүргэгты, баясхалан хүргэгты гэжэ нэн түрүүн таанадые гуйнаб.

³⁻⁴Хүн бүхэн абарагдажа, үнэн зүбые мэдэрэг гэжэ хүсэхэн манай Абарагша Бурханда эдэ бүхэн һайшаагдаха, таатай байха.

⁵⁻⁶Ушарын юуб гэхэдэ, Бурхан ори ганса юм. Тиихэдэ Бурханай болон хүнүүдэй хоорондо гансал зууршалагша бии. Тэрэн бүхы хүн түрэлтэниие абарха гэжэ өөрыгөө үргэл болгоһон Христос Иисус гэдэг хүн юм. Бурхан өөрынгөө тогтоһон сагта тэрэниие харуулаа.

⁷Тиимэхээ хүзэг ба хайра дурын үгэ айладхахаар һургагша ба элшэнээр табигдан, би бусад арадуудта эльгээгдэн байгааб. Би худал юумэ хэлэнгүйб, би үнэниие хэлэнэб.

⁸Бурханда өөрыгөө зорюулһан хүн бүхэнэй ямаршые газарта уур сухалгүйгөөр, хэрүүлгүйгөөр гараа өөдэн һарбайгаад, зальбаржа байхыень хүсэнэб.



⁹Эхэнэрнүүдшые хубсаһа хунартаа бодолтойгоор хандажа, даруухан, зохидоор хубсалжа байг. Үһээ гоёохо, алтан зүүдхэлээр гү, али эрдэни субадаар гү, али үнэтэй хубсаһаар өөһэдыгөө шэмэглэхээ оролдонгүй,

¹⁰харин шажан Бурханда зорюулһан эхэнэрнүүдтэл зохиho үлзытэй һайхан үйлэ хэрэгүүдээр өөһэдыгөө шэмэглэжэ байхыень хүсэжэ байнаб.

¹¹Эхэнэр хүн абяагүй, номгоноор юумэндэ һуража байха ёһотой.

¹²Эхэнэрэй үбгээе һургахыень гү, али тэрээндээ захирхыень би хорижо байнаб. Эхэнэр хүн дуугүй байха ёһотой.

¹³Юундэб гэхэдэ, түрүүн Адам бүтээгдэжэ, һүүлдэнь Ева бүтээгдэһэн байгаа.

¹⁴Тиэхэдээ могой Адамые мэхэлээгүй, харин эхэнэрыень лэ мэхэлһэн байгаа, тиигэжэл эхэнэрынь Бурханай хуулиие эбдээ юм.

¹⁵Гэхэтэй сасуу эхэнэр хүн Бурханда хүзэглэжэ, бусад зондо дуратай, арюун нангин ажамидаралтай байбал, үхибүү түрэжэ абарагдаха юм.

Тимофейдэ 1-дэхи 3

Һүзэглэгшэдэй бүлгэмэй хүтэлэгшэд

¹Һүзэглэгшэдэй бүлгэмэй хүтэлэгшэ болохые һанаһан хүн дэмбэрэлтэ һайхан хэрэг һанаашалаа гэдэгынь үнэн гээшэ.

²Гэхэтэй сасуу һүзэглэгшэдэй бүлгэмэй хүтэлэгшэ болбол ямаршые гэмгүй, гансал һамгатай, ухаансар, бээе баридаг, ехэ томоотой, аяншадые угтажа абадаг, хүнүүдые һургаха абьяастай,

³архиншан бэшэ, дошхон зангүй, номгон даруу зантай, эб найрамдалда дуратай, алта мүнгэ тоодоггүй,

⁴гэр бүлэдөө һанаагаа табидаг хүн байха ёһотой, тэрэнэй үхибүүдынь үгыень дууладаг, хүндэлдэг байха ёһотой.



⁵Гэр бүлэдөө ханаагаа табидаггүй хүн яжа Бурханай хүзэглэгшэдэй бүлгэмые анхаржа шадахаб.

⁶Тэрэ хүн Дээдын Эзэндэ хаял хүзэглэһэн зоной дундаһаа табигдаха ёһогүй, тиигээ һаа тэрэ хамараа дээшэнь үргөөд, һүүлдэнь шолмостой хамта буруушаагдажа магадгүй.

⁷Тиихэдээ муугаар хэлүүлхэгүйн тула, шолмосой һабарта орохогүйн тула тэрэ хүн хүзэглэгшэдэйнгөө бүлгэмһөө гадна хүн зондо хүндэтэй байха ёһотой.

Һүзэглэгшэдэй бүлгэмэй тухалагшад

⁸Һүзэглэгшэдэй бүлгэмэй тухалагшад баһал һайхан зантай, билдагуушалдаггүй хүнүүд байха ёһотой. Тэдэ архи дарһанда болон алта мүнгэндэ шунахай бэшэ,

⁹Һүзэг этигэлэйнгээ элирүүлһэн үнэн зүбые һэшхэлтэйгээр баримталха ёһотой.

¹⁰Тиимэ хүнүүдые түрүүн туршаад, тэдэнэй шалгалтаяа бариһан хойнонь алба хэхэ эрхэ тэдэндэ олгожо болохо юм.

¹¹Тэдэнэй һамгадыньше һайхан зантай, хоб-жэб зөөдэггүй, архинша бэшэ, ямарше юумэндэ этигэл найдабаритай байха ёһотой.

¹²Һүзэглэгшэдэй бүлгэмэй тухалагша гансал һамгатай байха, үхибүүдтээ, гэр бүлэдөө ханаагаа табижа байха ёһотой.

¹³Ажалаа һайн хэжэ байһан тухалагшад нэрэ түрэтэй болохо, Христос Иисуста найдаһан хүзэг тухайгаа зоригтойгоор хэлэхэ аргатай байха.

Һүзэг этигэлэймнай элирүүлһэн үнэн зүб тухай

¹⁴Энэ бэшэгээ бэшэжэ һуухадаа, шамда һаядаа ошохоб, шамтай уулзахаб гэжэ найданаб.

¹⁵Хэрбээ минии һаатабал, үнэн зүбэй тулга ба түшэг болохо амиды Бурханай хүзэглэгшэдэй бүлгэмдэ, али Бурханай гэртэ яжа бидэ

өөһэдыгөө абажа ябаха ёһотойбибди гэжэ энэ бэшэг сооһоо мэдэжэ байхаш.

¹⁶Һүзэг этигэлэймнай элирүүлһэн үнэн зүбынь үнэхөөрөө агууехэ юм: Хүнэй дүрсэ дүрсэлэн Бурхан ерээ, Тэрэнэй үнэн зүб байһыень Нангин Һүлдэ харуулаа, Тэрэ өөрыгөө Эльгээмэлнүүдтэ харуулаа. Арадуудай дунда тэрээн тухай номноо, бүхы газар дэлхэйн зон тэрээндэ этигээ, Тиигээд тэрэ тэнгэридэ дэгдэһэн байгаа.

Тимофейдэ 1-дэхи 4

Хуурмаг хургагшад тухай хургаал

¹Һүүлшын үдэрнүүдтэ зарим хүнүүд этигэл Һүзэгөө алдаха, ада шүдхэрнүүдэй альбанда орохо, шолмосой хургаалые анхарха юм гээд Нангин Һүлдэ элээр хэлэнэ.

²Тэрэ хуурмаг хургаал халуун түмэртэ хайруулжа һэшхэлээ алдаһан билдагууша худалшадай оролдолгоор тараха юм.

³Тэдэ зон гэрлэхые, зарим юумэ эдихые хорихо. Зүгөөр Бурхан тэрэ эдеэ хоолые баясхалан хүргэһэн зальбаралай Һүлдэ Һүзэглэгшэдтэ, үнэн зүбые мэдэрһэн хүнүүдтэ эдихыень бүтээгөө юм.

⁴Бурханай бүтээһэн бүхы юумэн һайн, тиимэһээ ямаршые юумэнһээ арсангүй, харин баясхалангай зальбарал хүргэн абаха ёһотойбди.

⁵Ушарынь гэхэдэ, Бурханай үгөөр, зальбаралаар тэдэ юумэнүүд арюудхагдана.

Иисус Христосой һайн албатан

⁶Иимэ заабаринуудые Һүзэглэгшэдтэ үгэжэ байбал, өөрыгөө зорюулһан үнэн зүб хургаалаар ба Һүзэг этигэлэй үгэнүүдээр һанал бодолоо дүүргэжэ, ши Христос Иисусай һайн албатан болохош.

⁷Бурханиие буруушаһан үльгэр зугаануудһаа холодожо, Бурханай мэдэлдэ байжа һура.



⁸Бэын хорилго нэгэ талаһаа туһатай, гэхэдэ Бурханай мэдэлдэ байхань аргагүй ехэ туһатай юм. Юундэб гэбэл, Бурханай мэдэлдэ байһан хүн энэшье амидаралдаа, ерээдүйдэшье, Бурханай найдуулһан мүнхын амидаралда хүртэхэ.

⁹Минии хэлэһэн үнэн зүб юм, тэрээндэ этигэжэ болохо.

¹⁰Амиды Бурханда найдажа байһан хадаа бидэ тэмсэжэ, хүндэ ажал хэжэ байнабди. Ушарынь юуб гэхэдэ, амиды Бурхан бүхы хүн зоной, илангаяа хүзэглэгшэдэй Абарагша юм.

¹¹Эдэ бүхэниие хүнүүдтэ захи, эдэ бүхэндэ хүнүүдые хурга.

¹²Залуухан байнаш гээд шамда хайхарамжагүйгөөр бү хандаг. Ши хэлэһэн үгөөрөө, амидаралаараа, хайра дураараа, хүзэгөөрөө, арюун сэбэрээрээ хүзэглэгшэдтэ жэшээ харуулжа байгаарай.

¹³Шамда ошоторни, ши хүнүүдтэ Нангин Бэшэг уншажа, номножо, тайлбарилжа байгаарай.

¹⁴Бүлгэмэй хүтэлэгшэдэй уридшалан хэлээд дээрэшни гараа табихадань, шамда абьяас бэлиг үгтэһэн байгаа. Тэрэ абьяас бэлигээ хэрэглэжэ байгаарай.

¹⁵Хүн бүхэндэ амжалтануудайшни элеэр харагдажа байхынь тула ши эдэ үүргэнүүдээ дүүргэжэ бай, өөрыгөө бүрин тэдэндэ зорюула.

¹⁶Ажабайдалдаа, хургажа байһан юумэндээ анхаралаа хандуула. Тиигэжэ байбал ши өөрыгөөшье, өөрынгөө шагнагшадыешье абархаш.

Тимофейдэ 1-дэхи 5

Һүзэглэгшэдэй уялганууд

¹Наһатай хүнүүдтэ хатуу үгэ бү хэлэ, харин эсэгэдээл адляар хандажа бай. Шамһаа залуу хүбүүдтэ өөрынгөө дүүнэртэл адли ханда,

²эгэшэ хүндэ эжыдээл адляар ханда, өөрһөөн дүү басагадта дүү басагандаал адли сэхэ сэбэрээр хандажа байгаарай.



³Үнэхээр гансаардажа байхан бэлбэһэн эхэнэрнүүдтэ хүндэлһэнөө мэдүүлжэ байгаарай.

⁴Хэрбээ бэлбэһэн эхэнэр үхибүүдтэй, үгы һаа аша зээнэртэй байбал, тэдэнь шажанай ёһоор анха түрүүн гэр бүлэдөө дүүргэхэ ёһотой уялгануудаа дүүргэг. Тиигэжэ тэдэнэр аба эжынгээ, хүгшэн аба эжынгээ ашыень харюулха. Энэнь Бурханда һайшаагдаха.

⁵Хойноһоонь хараха хүнгүй, үнэндөө бэлбэһэн эхэнэр хүн гансал Бурханда найдажа, үдэр һүнигүй тэрэниие гуйжа, тэрээндэ зальбаржа байдаг.

⁶Харин хүсэлэнгүүдээ хангажа байдаг бэлбэһэн эхэнэр амилжа байһаншье мүртөө үхэхэнтэй адли юм.

⁷Бэлбэһэн эхэнэрнүүдэй бусад зондо зэмэлүүлхэгүйн тула үгэһэн захяануудыемни тэдээндэ һануулжа байгаарай.

⁸Өөрынгөө аба эжыдэ, илангаяа гэр бүлэдөө һанаагаа табидаггүй хүн этигэл һүзэгһөө арсаба, тиимэ хүн һүзэглэдэггүй хүнһөө доро гээшэ.

⁹Бэлбэһэн эхэнэрнүүдэй тоодо жаран һаһа хүрөөгүй бэлбэһэн эхэнэрнүүдые бү оруула. Жара һаһа гараһан үнэхөөрөө бэлбэһэн эхэнэр нэгэл дахин хадамда гараһан,

¹⁰һайн һайхан үйлэ хэрэгүүдээрээ суурхаһан байха ёһотой: үхибүүдээ һайн хүмүүжүүлһэн, аяншадые гэртээ амаруулжа байһан, бусад һүзэглэгшэдэй урда өөрынгөө уялгануудые дүүргэжэ, зобожо байһан зондо туһалжа, өөрыгөө үлзытэй һайхан хэрэгүүдтэ зорюулжа байха ёһотой.

¹¹⁻¹²Залуу бэлбэһэн эхэнэрнүүдые энэ тоодоо бү оруулаарай. Тэдэ хүсэлэнгүүдээ даган, хадамда гарахые хүсэхэдөө, анхан үгэһэн үгэһөөн арсаад, Христосһоо холододог.

¹³Тиигэхэтэйгээ сасуу тэдэнэр айлаар зайжа, юумэ хэнгүй байжа һурадаг. Тэдэнэр гансашые юумэ хэдэггүй бэшэ, үшөө үргээ

бэлюудэдэг, хүнэй хэрэгтэ оролсодог, хэлэжэ болохогүй юумэнүүдые шашадаг юм.

¹⁴Тиимэхээ залуу бэлбэхэн эхэнэрнүүд хадамда гараад, үхибүүдые түрөөд, гэрээ хараад, манай дайсадта бидэниие муулаха шалтагаан олгонгүй байхыень би хүсэжэ байнаб.

¹⁵Юундэб гэхэдэ, зарим бэлбэхэн эхэнэрнүүд буруу замда ороод, сатанае дахана.

¹⁶Хэрбээ Христосто хүзэглэгшэ эхэнэрнүүд гэртээ бэлбэхэн эхэнэрнүүдтэй байбал, тэдэниие хүзэглэгшэдэй бүлгэмэй ашаан болгонгүй, өөһэдөө тэдээндээ анхаралаа хандуулха ёһотой. Хүзэглэгшэдэй бүлгэм ори гансаараа үлэхэн бэлбэхэн эхэнэрнүүдтэл анхаралаа хандуулха ёһотой.

¹⁷Һайн хэрэг бүтээжэ байгаа хүтэлэгшэд, аргагүй оролдосотойгоор номножо, хургажа байһан хүнүүд дабхар шагнал абаха эрхэтэй юм.

¹⁸«Тарья хадажа байһан сарай амыень бү хаа», «Хүдэлмэришэн шагналаа абаха эрхэтэй» гэжэ Нангин Бэшэг соо бэшээтэй байдаг.

¹⁹Хүтэлэгшые зэмэлхэн үгэнүүдые хоёр гурбан гэршэнэрэй баталха аргатайл байбал шагна.

²⁰Бусад зоной айжа байхын тула нүгэл хэгшэдые олоной дунда шүүмжэлэн элирүүлэ.

²¹Ямаршые юумэ хэхэдээ хүнүүдые илгангүй, нюур харангүй эдэл үгэхэн заабаринуудыемни сахижа байхыешни Бурханай, Христос Иисусай ба шэлэгдэхэн Эльгээмэлнүүдэй урда би шамайе гуйжа найжа байнаб.

²²Дээдын Эзэндэ өөһэдыгөө зорюулан алба хэхэ һанаатай хүнүүдые гараараа адислахаяа бү яара. Хүнүүдэй нүгэлдэ бү оролсо, өөрыгөө арюун сэбэрээр абажа яба.

²³Ганса уһа бү уу. Үбдэжэ байһан хотоёо, үргэлжэ хүдэлдэг үлбэр үбшэнгүүдээ хүнгэлхын тула бага зэргэ дарһа уужа бай.

²⁴Зарим хүнүүдэй нүгэлнүүдынь эли харагдажа, гэмнэлгэдэ сэхэ хүтэлдэг юм. Харин нүгөө зариманай нүгэлнүүдынь һүүлдэ элиржэ гарадаг.

²⁵Тон тэрээндэл адли һайн хэрэгүүдэй зариманиинь мүнөө эли байна, зүгөөр эли бэшэ байһаниинь һүүлдэ элирэн гараха.

Тимофейдэ 1-дэхи 6

¹Бурханай нэрэ алдарые, манай хургаалые хүнүүдэй муулахагүйн тула дарлалтада байһан барлагууд эзэдээ алишые талаһаань хүндэлжэ байха ёһотой.

²Христосто хүзэглэдэг эзэнэй харьяалда байһан барлаг эзэнтэйгээ аха дүүнэр байһан ушарһаа эзэнээ хүндэлхэ ёһотой. Тэрээнһээ гадна, хүзэгтэй, Бурханай хайра дурада хүртэһэн хүндэ алба хэжэ байһан хадаа бүришые оролдосотойгоор ажаллаха ёһотой юм.

Хуурмаг хургаал ба жэнхэни баялиг

Ши тиигэжэл хүнүүдые хургажа, идхажа байгаарай.

³Ондоо юумэндэ хургажа байһан, Дээдын Эзэн Иисус Христосой үнэн үгые болон манай шажанай хургаалые баримталангүй байһан хүн

⁴юушые мэдэхгүй омог зантай хүн гээшэ. Тиимэ хүн арсалдаа гаргажа, үгэ буляалдажа һурашанхай юм. Тэдэнь атаа жүтөөн, хэрүүл ама, хорон үгэ ба хуурмаг һэжэг түрүүлдэг.

⁵Тиимэ хүнүүд үнэн зүбһөө холодоһон, балартаһан ухаантай хүнүүдээр дэмы заргалдажа байдаг. Тэдэнэр зөөри баялигтайл болохын тула Бурханда шүтэдэг гэжэ бододог юм.

⁶Бурханда хүгэдэхэ, бии юумээрээ сэдхэл дүүрэн байха маанадай асари ехэ баялиг гээшэ.

⁷Газар дэлхэйдэ бидэ юушые асараагүйбди, тиин эндэһээ юушые абажа ябаха аргагүй ха юмди.

⁸Тиимэһээ эдээ хоол, хубсаһа хунар байбал, бидэндэ хүрэхэ бэшэ гү?

⁹Харин баяжахаяа һанаһан хүнүүд хорхойтолгодо абтажа, тэдэниие гай зоболондо ба үхэлдэ хүргэдэг олон тэнэг ба хорото хүсэлэнгүүдэй һабарта ородог гээшэ.

¹⁰Хамаг муу муухай юумэн алта мүнгэндэ шунаһанһаа болодог. Алта мүнгэндэ шунаад зарим хүнүүд этигэлээ алдаа, өһөдыгөө тон ехээр зобоогоо, туляагаа юм.

Павел зүбшэл үгэнэ

¹¹Харин ши, Бурханай хүн, эдэ бүхэнһөө болгоомжоло. Ши Бурханай урда үнэн сэдхэлтэй бай, Бурханай эрхэ хүсэлые гүйсэдхэ, тэрээндэ хүзэглэжэ, хайра дура сэдхэлдээ бадараа, тэсэбэритэй, номгон даруу зантай бай.

¹²Христосто хүзэглэн, ажамидаралдаа илалта туйлажа бай. Мүнхын амидаралай дээдын шагналда хүртэхээ зори. «Христос болбол Дээдын Эзэн гээшэ» гэжэ гэршэнэрэй урда хэлэхэдэшни Бурхан шамайе мүнхын амидаралда дуудаа.

¹³⁻¹⁴Бүхы юумэндэ ами хайрлажа байһан Бурханай урда, Понтий Пиладта хүзэгөө баталжа хэлэһэн Христос Иисусай урда Дээдын Эзэн Иисус Христосой ерэхэ үдэр хүрэтэр гэмнүүлхэгүйн тула заабариие үнэн сэхээр сахижа байхыешни би шамда захиаб.

¹⁵Ори ганса Захирагша, хаануудай Хаан, эзэдэй Дээдын Эзэн болохо үршөөлтэ Бурхан хэрэгтэй сагта Христосой ерэхые харуулха.

¹⁶Бурхан гансаараал мүнхэ юм, тэрэ хэнээшые хүрэхэгүй гэрэл туяада байдаг. Нэгэшые хүн тэрэниие хаража үзөөгүй, хаража шадахашыегүй. Тэрээндэ нэрэ хүндэ ба мүнхын хүр хүсэ байг лэ. Болтогой!

¹⁷Баян хүнүүдэй зөөри зөөшөөрөө бүдүүрхэхэгүйень, иимэ мэтын найдабаригүй баялигта найдахагүйень захира, зүгөөр аяшаажа байха



юумэ элбэг дэлбэгээр маанадта үршөөжэ байдаг амиды Бурханда найдажа байхыень заабаришалжа бай.

¹⁸Дэмбэрэлтэ найхан юумэ хэжэ, үлзы найхан хэрэгүүдээрээ баяжажа, бардам гартай, бусад хүнүүдтэй юумээрээ хубаалсахада бэлэн байхыень заабаришалжа бай.

¹⁹Тиигэжэл ерэдүйдэ мүнхын амидаралай бата нуури болохо баялигыг тэдэ өөһэдтөө суглуулха юм.

²⁰Тимофей, шамда даалгаһан юумые сахижа бай. Хэрэггүй хоһон үгэнүүдһээ, «эрдэм ухаан» гэжэ зарим хүнүүдэй худалаар нэрлэһэн, Бурхание буруушаһан арсалдаанһаа зайсажа бай.

²¹Зарим хүнүүд тиимэ «эрдэм ухаантайбди» гээд, хүзэгөө алдаһан байгаа. Бурханай үршөөл хайра та бүхэнтэй оршожо байг лэ.



Тимофейдэ 2-дохи

Тимофейдэ 2-дохи 1

1-2Инаг хайрата Тимофей хүбүүмни, шамда би Павел бэшэнэб. Би Бурханай эрхэ мэдэлээр элшэнгээр хунгагдаад, маанадта Иисус Христостой нэгэдэхэдэмнай найдуулагдаһан амидарал тухай номнохоёо эльгээгдэһэн байгааб. Бурхан Эсэгэ болон манай Дээдын Эзэн Иисус Христос шамда һайн һайхание, үршөөл хайра ба амгалан тайбание үршөөг лэ.

Павел баяр хүргэнэ, урмашуулна

3Үбгэ эсэгэнэрэйнгээ мүргэдэг Бурханда би үнэн зүрхэнһөө алба хэжэ, үдэр һүнигүй тэрээндээ зальбархадаа үргэлжэ шамайе дурдан, баяр хүргэжэ байдагби.

4Дуһааһан нулимсануудыешни һанаад, шамтай уулзаха гэжэ ехээр лэ хүсэнэб. Тиигэбэл, би баяраар дүүрэхэ һэнби.

5Үнэн зүрхэнһөө Бурханда хүзэглэдэг байһыешни би һананаб. Лоида хүгшэн эжышни, Евника эхэшни үнэн зүрхэнһөө хүзэглэдэг бэлэй. Шишье баһал тиимэ хүзэгтэйш гэжэ би этигэнэб.

6Тиимэһээ гараа дээрэшни табихадамни шамда Бурханһаа үгтэһэн абьяас бэлиг зосоошни бадаржал байг лэ.

7Бурханай үршөөһэн Нангин һүлдэ бидэниие аймхай болгодог бэшэ, харин хүсэ шадалаар, хайра дураар дүүргэдэг, бэеэ барижа ябаха шадал үгэдэг юм.

8Тиимэһээ манай Дээдын Эзэн Иисус Христос тухай гэршэлхэээ бү айгаарай, Христосой түлөө түрмэдэ һуужа байһан намһаа бү эшэжэ, улайжа байгаарай. Харин Бурханай үгэһэн хүсэ шадалаар һайн Мэдээсэлэй түлөө зоболон дабажа байгаарай.

9Бурхан хэһэн хэрэгүүдэймнай түлөө бидэниие абараа бэшэ, харин өөрынгөө һайн хүсэлөөр ба үршөөл хайраар бидэниие абаржа, гэгээн

арад болгохоёо дуудаа юм. Бурхан сагай урадхалай эхи абахааа урда бидэндэ Иисус Христосой ашаар өөрынгөө үршөөлые хайрлаа юм.

¹⁰Харин мүнөө манай Абарагша Иисус Христосой ерэхэдэнь, тэрэ үршөөлынъ эли болоо. Христос Иисус үхэлые туйлажа, хайн Мэдээсэлэй ашаар бүхы хүнүүдтэ мүнхын амидарал үршөөгөө.

¹¹хайн Мэдээсэл номнохымни тула Бурхан намайе элшэн ба хургагша болгон табяа.

¹²Тиимэхээ би иигэжэ тулижа зобожо байнаб, зүгөөр би эшэжэ улайнагуйб. Ушарынъ юуб гэхэдэ, хэндэ хүзэглэжэ байһанаа би мэдэнэб, намда даалгаһан юумэеэ тэрэ Үдэр болотор Иисус Христос хадагалжа шадаха гэхэн этигэлтэйб.

¹³Минии шамда хөөрэхэн үнэн зүб хургаалые хатуугаар баримталжа ябаарай. Тэрэ хургаал шамда жэшээ боложо байг. Иисус Христостой нэгэдэхэдээ олоһон хүзэг, хайра дураяа бадараажа ябаарай.

¹⁴Шамда даалгагдаһан үлзйтэй хайхан зүйлнүүдые сэдхэлдэмнай оршоһон Нангин хүлдын хүсэ шадалаар хадагалжа байгаарай.

¹⁵Аси можын бүхы зон, тэдэнэй тоодо Фигелл ба Ермоген хоёр намайе орхижо ошоо гэжэ ши мэдэнэш.

¹⁶Гэхэтэй сасуу оло дахин ханааемни заһажа байһанайнъ түлөө Дээдын Эзэн Онисифорой гэр бүлэдэ үршөөл хайраа харуулһай даа. Түрмэдэ һуужа байна гээд тэрэ намһаа эшэжэ зобожо байгаагүй,

¹⁷харин Рим хото ерээд, намайе ехэл удаан бэдэржэ олоһон байгаа.

¹⁸Дээдын Эзэн ерэхэ Үдэртөө тэрээндэ үршөөл хайраа хайрлаһай даа! Эфес хотодошые байхадаа, тэрэнэй намда ехэл туһа хүргэжэ байһыень ши хайнаар мэдэнэш.

Тимофейдэ 2-дохи 2

Иисус Христосой үнэн сэхэ сэрэгшэ

- ¹Хүбүүмни, Иисус Христосой хайрлаһан үршөөл хайраарнь бэхижэжэ бай.
- ²Олон гэршэнэрэй хажууда хүнүүдые хургаха шадабаритай, этигэлтэй зондо намһаа дуулажа абаһан хургаалаа дамжуулаарай.
- ³Иисус Христосой үнэн сэхэ сэрэгшэдэл адляар зоболонгуудые дабажа байгаарай.
- ⁴Алба хэжэ байһан сэрэгшэ ахалагшадаа найшаагдахын тула юрын ажамидаралтай холбоотой хэрэгүүдтэ оролсодоггүй юм.
- ⁵Урилдаанда хабаадажа байһан тамиршан дүримүүдые баримталаагүй һаа, шагналда хүртэдэггүй юм.
- ⁶Хүндэ ажал хэжэ байһан таряшан гараһан ургасаһаа түрүүн өөрөө амсаха ёһотой.
- ⁷Хэлэһэн юмэнүүд тухаймни бодомжолжо байгаарай. Дээдын Эзэн шамда эдэ бүгэдые ойлгохо ухаан үршөөхэ.
- ⁸Минии номноһон һайн Мэдээсэлэй ёһоор үхөөд амидырһан Давидай үри һадаһан болохо Иисус Христосые һанажа байгаарай.
- ⁹Тэрэл һайн Мэдээсэлэй түлөө би зобожо, үшөө тиихэдэ дээрмэшэндэл мэтэ гэнжээр хүлээтэй байнаб. Зүгөөр Бурханай үгыг гэнжээр хүлижэ болохогүй юм.
- ¹⁰Бурханай шэлэжэ абаһан хүнүүдэй Иисус Христосой ашаар абарагдан, мүнхын алдарта хүртэхын тула би эдэ зоболонгуудые дабажа байнаб.
- ¹¹Иигэжэ хэлэһэн үнэн зүб юм: «Хэрбээ бидэ тэрээнтэй хамта үхэхэн байбал, Тэрээнтэйл хамта амидархабди.
- ¹²Хэрбээ бидэ зоболонгуудые дабажа байбал, Тэрээнтэйл хамта зонхилхобди. Хэрбээ бидэ тэрээнһээ арсабал, Тэрэ баһал бидэнһээ арсаха.



¹³Амалһан юумэеэ дүүргэдэггүй байхадамнай, Тэрэ айладхаһан лэ юумэеэ ходо дүүргэдэг, Ушарынь тайлбарилжа хэлэбэл, Тэрэ өөрыгөө хубилгаха аргагүй юм».

Һайн хүдэлмэришэн

¹⁴Хэлэһэн эдэ бүгэдыемни шагнагшадтаа һануулжа байгаарай. Үгэнүүд тухай арсалдахаяа болигты гэжэ Дээдын Эзэниие гэршэ болгон захиржа байгаарай. Тиимэ арсалдаан шагнагшадта ямаршые туһагүй, тэдэнэй хүзэг этигэл алдуулдаг юм.

¹⁵Һайн албатан байнаш гэхэн Бурханай магтаалда хүртэхын тула һайнаар ажаллажа байгаарай. Хэжэ байһан ажалһаа эшэжэ зобохогүйн тула Бурханай үгые үнэн зүбөөр һургажа байгаарай.

¹⁶Хүнүүдые Бурханһаа холодуулдаг, Бурханиие буруушаһан тэнэг шашалдаанһаа зайсажа байгаарай.

¹⁷Тиимэ шашалдаан болбол махабад бэеэр таража байһан эдеэртэй яра шархада адли юм. Именей Филит хоёр тиимэ дэмы юумэндэ һургажа байна.

¹⁸Тэдэ үнэн зүб замһаа хадуурба, бидэ хүзэглэгшэд амидыраабди гэжэ хэлэн зарим хүзэглэгшэдэй этигэл хүзэгые алдуулна.

¹⁹Тиигэбэшые Бурханай татаһан бата һуури хүдэлөөгүй юм. «Дээдын Эзэн өөрынгөө хүнүүдые мэдэхэ», «Дээдын Эзэнэй харьяалда орооб гэжэ хэлэһэн хүн нүгэлтэ хэрэгүүдые хэхэеэ болихо ёһотой» гэхэн үгэнүүдтэй тамга тэрэ татагдаһан һууриндань табигданхай байна.

²⁰Томо гэртэ элдэб янзын амһартанууд байдаг: зариманиинь мүнгөөр гү, али алтаар хэгдэнхэй, нүгөө зариманиинь модоор гү, али шабараар бүтээгдэнхэй; нэгэ заримыень тусхай ушарнуудта хэрэглэдэг, нүгөө заримыень үдэр бүхэн хэрэглэдэг юм.

²¹Хүнүүдшые баһал тиимэ. Зарим хүнүүд нүгэл хэхэеэ болижо, арюун сэбэр болоод, тусхай хүнүүд болодог. Тэдэнэй ажамидарал Бүтээгшэдэ



таатай арюун гэгээн байдаг, тэдэ ямаршые хайн хайхан хэрэгүүдые хэхэдэ бэлэн байдаг.

²²Залуугай ташаяанһаа зугадажа, Дээдын Эзэндэ үнэн зүрхэнһөө зальбаржа байһан зоноор хамта үнэн зүбые баримталжа, хүзэглэжэ, хайра дуратай, амгалан тайбан байгаарай.

²³Тэнэг, мунхаг хэрүүлһээ зайсажа байгаарай. Тэрээнһээл шэрүүн арсалдаан гарадаг гэжэ ши мэдэнэ ха юмши.

²⁴Дээдын Эзэнэй зараса, ши хэрүүл гаргангүй, харин уринаар хүн бүхэндэ хандажа, тэсэбэритэй хайн хургагша байха ёһотойш.

²⁵Шамда эсэргүүсэһэн хүнүүдые Бурхан нүгэл үйлэдэхыень болюулжа, өөртөө хандуулха, үнэн зүбые мэдэрхэ боломжо үгэхэ магадалтай юм хадань ши тэдэ зониие ехэл дарууханаар заһажа байгаарай.

²⁶Тиигэжэ тэдэнэр шолмосой эрхэ мэдэлдэ байһанаа мэдэржэ, һабарһаань мултаран тэрьедэхэ.

Тимофейдэ 2-дохи 3

Һүүлшын Үдэрнүүд

¹Һүүлшын Үдэрнүүдтэ ехэл хүшэр байха гэжэ мэдэжэ байгаарай.

²Хүнүүд бэеэ дээгүүр абанхай, алта мүнгэндэ шунанхай, омог бардам зантай, хорон үгэтэй, эхэ эсэгынгээ үгые дууладаггүй, хүнэй аша туһые харюулдаггүй, Бурханда шүтэдэггүй, хоорондоо эбгүй,

³эбсэшгүй ябадалтай, хүниие хардадаг, бэеэ баридаггүй, дошхон хэрзэгы зантай, хайн юумэндэ дурагүй,

⁴урбадаг, убайгүй ябадалтай, маадагар зантай, Бурханда шүтэнхаар, нааршаахань дээрэ гэжэ тоолодог,

⁵Бурханда хүзэглэһэн хэбэр үзүүлээд, үнэн дээрээ сэдхэлдээ ямаршые хүзэггүй хүнүүд байха. Тиимэ хүнүүдһээ зайсажа байгаарай.



⁶Тэдэнэй зариманиинь айлаар ябажа, элдэб янзын ташаяан хүсэлэнгүүдтэ хүтэлүүлэн, нүгэл абаһан, һуража байдагшые һаа,

⁷үнэн зүбые мэдэрдэггүй тэнэг эхэнэрнүүдэй толгойень эрьюулдэг юм.

⁸Янэс Ямбрэс хоёрой Моисейдэ эсэргүүсэдэг байһандал тон адляар тэдэ зон зүб бодомжолхоёо болёод, хүзэгөө алдаад, үнэн зүбэй урдаһаа эсэргүүсэбэ гээшэ.

⁹Тиимэхээ тэдэ зон холо ошохогүй, хүн бүхэн тэдэнэй тэнэг байһые мэдэрхэ. Тиимэл юмэн Ианний Имбравий хоёртой болоо һэн.

Һүүлшын заабаринууд

¹⁰Зүгөөр ши минии һургаалые баримталбаш, намдал адли ажамидарнаш, намдал адли зорилготой, хүзэгтэй, хайра дуратай байнаш, намдал адли шиираг тэсэбэритэй байнаш.

¹¹Антиох, Икони, Листра хотонуудта хашуулан мүрдүүлдэг, зободог байһандамнил адли ши баһа хашуулан мүрдүүлнэш, зоболон эдлэнэш. Тэдэ зоболонгуудые би дабажа гараа хүнби, Дээдын Эзэн тэдэнһээ намайе аршалаа юм.

¹²Иисус Христостой нэгэдэн, Бурханда хүзэглэн амидарха һанаатай хүн бүхэндэ тиимэ зоболонгууд тудаха.

¹³Харин хара һанаатай, мэхэшэ зон бусад зониие эндүүрүүлхэ, өөһэдөөшые эндүүрэн бүри муу муухай юмэ үйлэдэжэл байха.

¹⁴Харин ши һуража абаһан үнэн зүб юумэндэ хатуу этигэжэ, тэрэнээ бээлүүлжэ байгаарай. Шамайе хэнэй һургажа байһые ши мэдэнэш,

¹⁵шинии үхибүүн байха саһаа мэдэдэг Нангин Бэшэг шамайе һургажа, эсэн ухаатай болгоно. Тиин тэрэ ухаан Иисус Христосто этигэһэн хүзэгэйшни ашаар шамайе абарна.

¹⁶Нангин Бэшэгэй номуудынь бултадаа Бурханай урмашуулгаар бэшэгдэһэн, тиимэхээ тэдэ булта үнэн зүб юумэндэ һургадаг,

алдуунуудые шүүмжэлэн элирүүлдэг, заһадаг, үнэн сэдхэлтэйгээр ажамидархые заабарилдаг юм.

¹⁷Тиимэхээ Бурханда алба хэжэ байһан хүн ямаршые буянтай һайхан хэрэгүүдые хэхэ бэлэдхэл гаража, тиимэ хэрэгүүдые бүтээхэ аргатай байхань болтогой.

Тимофейдэ 2-дохи 4

¹Иисус Христос хаан ороноо захирхаяа ерэхэдээ үхэнэн ба амиды хүнүүдые бултыень шүүхэ. Тиимэхээ Бурханай, Христосой урда

²Бурханай үгэ номногты гэжэ захиаб. Хүнүүдэй дуулаха дуратай, дурагүйшые байбалнь, сухарингүй номнохо ёһотойш. Буруу хэнэн юумэнүүдыень заажа, нүгэлнүүдыень шүүмжэлэн элирүүлэ. Гэхэтэй сасуу тэрэ хүнүүдые урмашуулжа, тэсэбэритэйгээр һурга.

³Ушарынь юуб гэхэдэ, хүнүүд зүйтэй һургаал дуулахаяа болёод, шагнаха дуратай юумыень хэлэдэг багшанарые өөрынгөө дураар шэлэдэг саг ерэхэ.

⁴Тэдэнэр үнэн зүб юумэ шагнахаяа болижо, хоһон үльгэр зугаа шагнадаг болохо.

⁵Харин ши ямаршые ушарта бээе барижа, зоболонгуудые дабажа, һайн Мэдээсэл дэлгэрүүлхэ ажалаа бүтээжэ, Бурханай зарасын дүүргэхэ ёһотой уялга гүйсэдхэжэ байгаарай.

⁶Ами наһатайгаа хахасаха сагни ерээ, амимни үргэлэй архидал адляар сасагдахань.

⁷Бүхын барилдаанда би һайн барилдааб, урадхални адагтаа хүрөө, этигэл һүзэгөө алдаагүйб.

⁸Тиимэхээ үнэн сэхэ Заргаша, Дээдын Эзэн тэрэ үдэр намда үгэхэ шагналаа мүнөө бэлдээд байна. Тэрэ шагнал гансал намда үгэхэ бэшэ, харин тэрэнэй заларан ерэхые хүлээжэ байһан бүхы зондо үгэхэ юм.

Онсо үгэнүүд



⁹Намда түргэхэн хүрэжэ ерэхые бодоорой.

¹⁰Димас энэ оршолон дэлхэйдэ татагдажа, намайе орхёод, Фессалоники хото руу ябаа. Крискент Галадай можо, Тит Далмадын можо ошобод.

¹¹Гансал Лука намтай хамта байна. Ши Маркые дахуулжа ерээрэй, тэрэ ажалдамни туһатай байха.

¹²Тихикые би Эфес ябуулааб.

¹³Ши ерэхэдээ, Карпында орхиһон субыемни, хуйламал бэшэгүүдыемни, илангаяа арһан хуйламал бэшэгүүдыемни абажа ерээрэй.

¹⁴Түмэр дархан Александр намда ехэл муу юумэ хээ һэн. Дээдын Эзэн хэһэн зэргээрнь тэрээндэ ашыень харюулаг лэ.

¹⁵Шишье тэрээнһээ болгоомжолжо байгаарай, тэрэ манай үгын урдаһаа ехэл эсэргүүсээ юм.

¹⁶Түрүүшынхиеэ өөрыгөө хамгаалхадамни булта намайе орхижо ошоо бэлэй. Тэдэ зоние Дээдын Эзэн бү зэмэлэг лэ.

¹⁷Тэрэ үедэ Дээдын Эзэн намтай байжа, намайе зоригжуулһан байгаа. Тиимэһээ би Бурханай үгэ бусад арадуудай бултанайнь дуулахаар гүйсэд номнохо шадалтай байгаа. Бурхан намайе үхэлэй һабарһаа аршалаа.

¹⁸Дээдын Эзэн намайе муу юумэнһээ аршалан, тэнгэриингээ хаан орондо гэм зэмэгүйгөөр оруулха. Тэрэ хэтын хэтэдэ алдар солотой байхань болтогой.

Һүүлшын амаршалга

¹⁹Прискилла, Акила болон Онисифорой гэр бүлэдэ мэндые дамжуулаарай.

²⁰Эраст Коринф хотодо үлэбэ. Трофимые үбшэн байһан хадань би Милет хотодо орхёоб.



²¹Үбэл болотор ерэхэ гэжэ оролдоорой. Еввул, Пуд, Лин, Клавдий болон бэшэшье хүзэглэгшэд булта шамда мэндые дамжуулна.

²²Дээдын Эзэн шамтай байхань болтогой. Бурханай үршөөл хайра та бүхэнтэй оршожо байг лэ. Болтогой.



Тидтэ

Тидтэ 1

¹⁻⁴Этигэл хүзэгөөрөө намтай нэгэдэһэн үнэн сэхэ Тит хүбүүмни, шамда Бурханай зараса, Иисус Христосой элшэн Павел бэшэнэ. Бурхан Эсэгэ болон манай Абарагша Иисус Христос шамда үршөөл хайра ба амгалан тайбаниие үршөөг лэ. Бурхан намайе шэлэжэ абаад, илгажа абанан хүнүүдэйнгээ хүзэгые дэмжүүлхээр, шажанаймнай хургадаг үнэн зүйлдэ тэдэниие хүтэлүүлхээр намайе эльгээһэн байгаа юм. Энэ үнэн зүйл мүнхын амидаралда найдаха гол түшэг болодог юм. Худал юумэ хэлэдэггүй Бурхан мүнхын тэрэ амидаралые анханһаа нааша бидэндэ найдуулжа, тогтооһон сагтаа тэрэнээ өөрынгөө хургаалда нээжэ үгэһэн байгаа. Тэрэ хургаалынь намда үгтэжэ, манай Абарагша Бурханай захиралтаар би тэрэниие нь номножо байнаб.

Титэй Кридтэ хэхэ ажал

⁵Хэхэ хэрэгтэй юумэнүүдээ бүтээгээд, хото бүхэндэ хүзэглэгшэдэй бүлгэмэй хүтэлэгшэдые томилхоор шамайе Кридтэ орхиһон байгааб. Захиһан юумэнүүдыемни бү мартаарай:

⁶хүтэлэгшэ хүн ямаршые гэмгүй, гансал һамгатай байха ёһотой, харин үхибүүдынь хүнэй үгөөр байдаг, өөһэдыгөө найнаар абажа ябадаг, Христосто хүзэглэдэг байха ёһотой.

⁷Ушарынь юуб гэхэдэ, хүзэглэгшэдэй бүлгэмэй хүтэлэгшэ Бурханай ажалай хойноһоо хаража байгаа хадаа ямаршые гэмгүй байха зэргэтэй. Тэрэ омог бардам зан гаргадаггүй, уур сухалаа хүрэдэггүй, архидадаггүй, дошхордоггүй, алта мүнгэндэ шуналгүй,

⁸мүн аяншадые гэртээ угтажа абадаг, һайн юумэндэ дуратай, ехэ томоотой, үнэниие баримталдаг, арюун ябадалтай, үнэн сэдхэлтэй, бээе баридаг хүн байха ёһотой.

⁹Тэрэ хүн зүб хургаалтай зүрилдэдэггүй, найдабаритай үгые хатуу баримталха ёһотой. Тиигэжэл тэрэ хүтэлэгшэ үнэн зүйтэй хургаалаар

ондоо хүнүүдые урмашуулжа, хургаалда эсэргүү байһан хүнүүдэй бурууе элирүүлэн харуулха аргатай байха.

¹⁰Юундэб гэбэл, хүнэй мэдэлдэ оросогүй, хоһон үгэтэй, худалша зон, илангаяа хүзэглэгшэ еврейнүүдэй дунда олон бии.

¹¹Тэдэнэй амые хааха хэрэгтэй: тэдэ мүнгэ олохо гэхэн эшхэбтэр зорилготойгоор хэрэггүй юумэндэ хургана, гэр бүлэнүүдые Христосоо холодуулна.

¹²Кридүүдэй дундаһаа нэгэ шүлэгшэн: «Кридүүд булта худалшад, зэрлиг арьяатан, залхуу, эдимэр хүнүүд», – гэжэ хэлэһэн байгаа.

¹³⁻¹⁴Тэрэ хэлэһэниинь үнэн юм. Тиимэхээ саашадаа иудейнүүдэй үльгэрнүүдые шагнангүй, үнэн зүбые буруушаадаг хүнүүдэй тогтоолые анхарангүй, бодолтой хүзэгтэй байхынь тула ши тэдэниие хатуу шэрүүнээр шүүмжэлэн элирүүлжэ байгаарай.

¹⁵Арюун сэбэр хүнүүдтэ бүхы юумэн арюун сэбэр байдаг. Харин бузарлагдаһан болон хүзэггүй хүнүүдтэ ямаршые арюун сэбэр юумэн үгы, тэдэнэй һанал бодолынь, һэшхэлынь бузарлагдаатай байна ха юм.

¹⁶Тэдэнэр Бурхание мэдэнэбди гэдэг, харин үйлэ хэрэгүүдынь Бурхание мэдэхэгүй байһыень харуулна. Тэдэ хүнүүд Бурханда жэрхэдэһэтэй байна. Тэдэнэр мэдэлдэ оросогүй, ямаршые һайн юумэ хэжэ шадахагүй хүнүүд юм.

Тидтэ 2

Үнэн бодото хургаал

¹Харин ши үнэн бодото хургаалые номножо байгаарай.

²Хургаалай ёһоор наһатай эрэшүүлые хэргэг, түбшэн зантай, арюун ябадалтай, хатуу хүзэгтэй, хайра дуратай, тэсэбэритэй байхыень хургажа байгаарай.



- ³Наһатай эхэнэрнүүдые Бурханиие хүндэлдэг хүнүүдтэл адляар ажамидаржа байхыень хургаарай. Тэдэнэр хүниие бү хардаг, архинда бү орог, һайн юумэндэ хургажа байг,
- ⁴залуу эхэнэрнүүдые нүхэдтөө, үхибүүдтээ дуратай байхыень хургаг,
- ⁵бээе баридаг, арюун сэбэр ябадалтай байхыень, гэрээ һайнаар хаража, нүхэдэйнгөө үгөөр ябахыень баһа заабаришалжа байг. Тиигэжэ Бурханай үгэ муушалха шалтаг тэдэ хэндэшье бү олгог.
- ⁶Залуу хүбүүдые баһал бээе барижа байхыень идхан заажа ябаарай.
- ⁷Ши өөрөө алибаа юумэндэ һайн хэрэгүүдээрээ жэшээ харуулжа байха ёһотойш. хургажа байхадаа үнэн сэхэ, томоотой байгаарай.
- ⁸Шамае хүнэй буруушаахагүйн тула бодомжолжо үзөөд хэлэжэ бай. Тиигэбэл дайсаднай эшээд, маанад тухай муу юумэ хэлэжэ шадахагүй.
- ⁹Барлагуудые эзэдэйнгээ үгэ дуулажа, ямаршые ушарта тэдэндээ һайшаагдахаяа оролдожо байхыень, урдаһаань зүршэн дуугарангүй,
- ¹⁰юумыень хулуунгүй, харин гүйсэд үнэн сэхэ байхыень хургаарай. Тэдэнэр ямаршые юумэ хэхэдээ, Абарагша Бурханаймнай хургаалда туһатай юумэ хэжэ байха ёһотой.
- ¹¹Ушарынь юуб гэбэл, хүн бүхэниие абарха ушартай Бурхан үршөөл хайраа элирүүлбэ.
- ¹²Тэрэ үршөөл хайрань маанадые энэ оршолон дэлхэйдэ ажамидархадаа бурхангүй амидаралаа, дэлхэйдэхи забхайралаа орхихыемнай, бээе барижа байхыемнай, үнэн сэдхэлтэй, Бурханда шударга байхыемнай хургана.
- ¹³Манай агууехэ Бурханай, Абарагша Иисус Христосой алдарай элирхэ тэрэ үршөөлтэй Үдэртэ найдан, тэрэ Үдэрые хүлеэжэ байнабди.
- ¹⁴Христос маанадые бузар муухай нүгэлнүүдһээмнай аршалан, мэдэлдэнь байдаг, һайн хэрэгүүдые хэхэ гэжэ зүдхэдэг сэбэр арад болгохын тула өөрыгөө бидэнэй түлөө үгөө юм.



¹⁵Эдэ юумэнүүдтэ һургажа, бүхы эрхэ засагаа хэрэглэн, шагнагшадаа зоригжуулжа, шүүмжэлэн элирүүлжэ байгаарай. Шамайе доогуур хэншые бү хараг.

Тидтэ 3

Христос шажантан өөһэдыгөө ямараар абажа ябахаб

¹Засаглагша болон захирагшадай үгыень дуулажа, эрхэ мэдэлдэнь байхые, ямаршые сагта дэмбэрэлтэ һайхан хэрэгүүдые хэхээр бэлэн байхые һүзэглэгшэ зондо һануулжа байгаарай.

²Хүниие хардажа бү хэлэгты, харин эбтэй эетэй, амгалан тайбан байгты, хүн бүхэндэ ходо дарууханаар хандагты гэжэ тэдэндэ баһал хэлэжэ байгаарай.

³Бидэшые өөһэдөө урдань баһал тэнэг, үгэ дууладаггүй байгаабди, эндүүржэ ябадаг бэлэйбди. Ташаяан хүсэлэнгүүдэй болон элдэб янзын сэдхэлээ ханалгын мэдэлдэ байгаабди. Бидэ атаархалдан, хара һанаатай юумэд амидардаг, бэе бэеэ үзэн ядадаг һэмди.

⁴Харин манай Абарагша, Бурхан аша буянгаа, хайра дураяа үршөөжэ,

⁵бидэниие абараа юм. Хэхэн һайн һайхан хэрэгүүдэймнай ашаар бэшэ, харин өөрынгөө үршөөл хайраар Нангин һүлдын ашаар Бурхан бидэниие арюудхан угаажа, шэнээр түрүүлжэ, шэнэ амидарал хайрлажа, бидэниие абараа һэн.

⁶⁻⁷Бурханай үршөөл хайраар үнэн сэдхэлтэн боложо, найдажа байһан мүнхын амидарал залгамжалхын тула Бурхан манай Абарагша Иисус Христосоор дамжуулан, Нангин һүлдэ маанадта элбэг дэлбэгээр үршөөгөө юм.

⁸Энэ хэлээшэмнай үнэн. һайн һайхан хэрэгүүдые оролдосотойгоор хэжэ байхыень Бурханда һүзэглэһэн хүнүүдые ши идхан һургажа байгаарай. Иимэ хэрэгүүд зондо ехэл аша тухатай, һайн юм.

⁹Тэнэг арсалдаанууднаа, уг гарбал ба Хуули тухай хэрүүл, заргалдаанһаа зайлажа байгаарай. Тэдэ болбол аша туһагүй, дэмы юм.

¹⁰Хэрүүл татагшадта хоёр дахин ухаа заагаад, удаань тэдэнһээ холодожо байгаарай.

¹¹Тиимэ хүнүүд буруу замда оробо, тиин нүгэлнүүдынъ тэдэнэй зэмэтэй байһыень гэршэлнэ гэжэ мэдэнэ ха юмши.

Һүүлшын захяа

¹²Шамда Артемые гү, али Тихикые эльгээхэдэмни, ши түргэхэн намда Никополь хото хүрэжэ ерэхые бодоорой. Би тэндэ үбэлжэхэ гэжэ шийдээб.

¹³Зина үмэглэгшэ Аполлос хоёрой аян замаа үргэлжэлүүлхэдэнъ юугээршье дутаангүй ябуулхые шадалаараа оролдоорой.

¹⁴Манай хүнүүд өөһэдтөө шухала хэрэгтэй юумэ хэжэ, буянтай һайхан хэрэгүүдые бүтээн, сагаа үнгэргэжэ һураха ёһотой. Тэдэнэр удхагүй дэмыгээр ажамидарха ёһогүй.

¹⁵Намтай байһан зон булта шамда амар мэндые хүргэнэ. Һүзэглэгшэ нүхэдтэмнай амар мэндыемнай дамжуулаарай. Бурханай үршөөл хайра та бүгэдэндэ үгтэхэнъ болтогой.

Филимондо

Филимондо 1

Амаршалга

¹⁻³Маанадтай хамта хүдэлдэг эрхим хүндэтэ Филимон, шамда Иисус Христосой түлөө түрмэдэ хууһан Павел ба хүзэглэгшэ Тимофей хоёр бэшэнэ. Манай Бурхан Эсэгэһээ болон Дээдын Эзэн Иисус Христосхоо үршөөл хайра ба амгалан тайбаниие айладханабди. Гэртэшни суглардаг хүзэглэгшэдэй бүлгэмдэ, хүндэтэ Апфи дүүдэмнай, бидэнтэй хамта алба хэдэг Архипда мэндые хүргөөрэй.

Филимоной хайра дуран ба хүзэг этигэл

⁴Зальбаралга бүхэндөө шамайе дурдажа, Бурхандаа баясхалан хүргэжэ байдагби.

⁵Бурханай бүхы хүнүүдтэ хайра дуратай байһан тухайшни, Дээдын Эзэн Иисус Христосто хүзэглэжэ байһан тухайшни дуулажа байдагби.

⁶Бидэ хоёр хүзэглэгшэдэй хани нүхэсэл Иисус Христостой нэгэдэһэн манай амидаралда үршөөл бүхэнэй гүнзэгы удхые мэдэрхэдэшни туһалха тухай зальбаржа байдаг хүнби.

⁷Хүндэтэ дүүмни, хайра дураншни намайе ехэтэ баясуулаа, аргагүй урмашуулаа. Ши Бурханай бүхы хүнүүдэй зүрхэ сэдхэлыень амаруулаа ха юмши.

Онисимай түлөө гуйлта

⁸Тиимэ ушарһаа би Христосоор ахашни болоһон хадаа хэхэ ёһотой юумее хэ гэжэ захирха эрхэтэйшье һаа,

⁹шамда дуратай байһан дээрэһээ шамайе миин лэ гуйжа байнаб. Мүнөө Иисус Христосой түлөө түрмэдэ хууһан би Павел гуйжа байнаб.

¹⁰Христосто этигээд, намаар заалгажа хүбүүмни болоһон Онисимай түлөө би шамайе гуйнаб. Түрмэдэ хуужа байхадаа би тэрээндэ ухаа заадаг эсэгэнь болооб.

- 11**Нэгэ сагта Онисим шамда хэрэггүй байгаа, харин мүнөө сагта тэрэ шамдашые, намдашые хэрэгтэй юм.
- 12**Мүнөө би тэрэниие шамда гэдэргэнь ябуулнаб. Би тэрээндэ аргагүй дуратайб, ши тэрэниие найнаар угтажа абаарай.
- 13**Найн Мэдээсэлые номнононойнгоо түлөө түрмэдэ нуухадаа, шинии орондо намда туһалжа байхаарнь тэрэниие хажуудаа байлгaha дуратайл байгааб.
- 14**Гэхэдээ би шинии зүбшөөлгүйгөөр юумэ хэхэ дурагүй байгааб. Баалалтагүйгөөр, харин өөрынгөө найн дураар найн юумэ хэбэлшни намда найшаагдаха байгаа.
- 15**Шамтай ходо байхын тула Онисим саг зуура шамһаа ондоо тээшээ ошоһон байжа магадгүй.
- 16**Мүнөө тэрэ ганса барлаг бэшэ, харин барлагһаа үлүү ехэ юм: тэрэ хайрата дүү гэшэ. Мүнөө би тэрэниие ехэл найшаанаб. Харин хүн байһан хубидаа, Дээдын Эзэнээр дүүшни гэжэ нэрлэгдэһэн хубидаа тэрэ шамда бүришые хайратай байхал.
- 17**Ши намайе нүхэрни гэжэ ханажа байбал, намайе угтажа байһантай адляар лэ тэрэниие угтажа абаарай.
- 18**Хэрбээ тэрэ шамда ямар нэгэ муу юумэ хэжэ, юумэ үритэй байбалнь, үрииень намда тоогоорой.
- 19**Тэрэ үрииень түлэхэб гэжэ би, Павел, өөрынгөө гараар бэшэжэ байнаб. Ши өөрөө ами наһаараа намда үритэй һэнши гэжэ би шамда һануулнагүйб.
- 20**Хайрата дүүмни, Христосоор дүүмни гэжэ нэрлэгдэһэн хадаа Дээдын Эзэнэй түлөө энэ үлзытэй найн хэрэг бүтээжэ, тэрээгээрээ намайе баярлуулаарай, һаналыемни тэгшэлүүлээрэй даа.

²¹Хэлэһэн юумыемни хэхэш гэхэн этигэлтэйгээр эдэ бүхэниие шамда бэшэжэ байнаб. Хэлэһэнһээмни үлүүшье юумэ хэжэ болохош гэжэ би мэдэжэ байнаб.

²²Тиихэ үедөө намда нэгэ таһалга бэлдэжэ байгаарай. Та бүхэнэй зальбаралые Бурхан дуулажа, намайе таанадта эльгээхэ гэжэ би найданаб.

Һүүлшын амаршалга

²³Иисус Христосой түлөө намтай суг түрмэдэ һуужа байһан Епафрас, намтай хамта хүдэлжэ байһан

²⁴Марк, Аристарх, Димас, Луканар шамда мэндые хүргэжэ байна.

²⁵Дээдын Эзэн Иисус Христосой үршөөл хайра та бүхэнтэй оршожо байхань болтогой.



Еврейнүүдтэ

Еврейнүүдтэ 1

Хүбүүгээрээ дамжуулхан Бурханай Үгэ

¹Урдандаа Бурхан лүндэншэдөөр дамжуулжа элдэб аргаар, олон удаа манай үбгэ эсэгэнэртэ үгэ хэлэдэг байгаа.

²Харин һүүлшын эдэ үдэрнүүдтэ тэрэ Хүбүүгээрээ дамжуулан бидэндэ үгэ хэлэжэ байна. Бурхан Хүбүүнэйнгээ ашаар замбуулин дэлхэйе бүтээжэ, бүхы юумые залгамжалхаар тэрэнээл шэлэжэ абаа гээшэ.

³Бурханай алдарай туяа сасаруулан, Бурханай шанар шэнжэтэй байжа, тэрэ бүхы замбуулин дэлхэйе өөрынгөө үгын хүсөөр баридаг. Бүхы хүн түрэлхитэниие нүгэлнүүдһээн сүлөөлэн, огторгой дээрэ хүр жабхаланта Бурханай баруун гарын болоо.

⁴Бурханай Хүбүүнэй нэрэ түрэ Эльгээмэлнүүдэй нэрэ түрэхөө аргагүй шухала юм, тиин Хүбүүн өөрөөшье Эльгээмэлнүүдһээ холо дээгүүр юм.

Бурханай Хүбүүн Эльгээмэлнүүдһээ дээгүүр юм

⁵«Ши минии Хүбүүмни гээшэш. Мүнөөдэр би шинии Эсэгэшни болооб», – гэжэ Бурхан өөрынгөө Эльгээмэлнүүдэй нэгэндэньшье хэлээ аал? «Би тэрэнэй Эсэгэнь болохоб, тэрэ минии Хүбүүн болохо», – гэжэ Бурхан нэгэшье Эльгээмэл тухай хэлээ аал?

⁶Тиэхэдэ Бурхан өөрынгөө ууган Хүбүүе газар дэлхэй руу эльгээжэ байхадаа: «Бурханай бүхы Эльгээмэлнүүд тэрээндэ мүргэхэнь болтогой», – гэжэ хэлээ бэлэй.

⁷Харин Эльгээмэлнүүд тухай: «Бурхан өөрынгөө Эльгээмэлнүүдые халхин болгоно, өөрынгөө зарасанарые галай дүлэн болгоно», – гэжэ Бурхан хэлээ бэлэй.

⁸Гэхэдэ Хүбүүн тухайгаа Бурхан: «Ай Бурхан, шинии хаан түрэ хэтэдээ оршохо, ши арад зоноо үнэн зүбөөр захиржа байхаш.

⁹Ши үнэн зүбтэ дуратайш, зүгөөр ёһо гуримые эбдэхэдэ ехэ дурагүй байдагши. Тиимэһээ Бурхан, шинии Бурхан, шамайе шэлэжэ абаад, нүхэдһөөшни дээгүүр табиба, тиихэдэнь ши ехэл баяртай байбаш», – гэжэ хэлээ бэлэй.

¹⁰Тэрэ үшөө иигэжэ хэлээ юм: «Ши, Дээдын Эзэн, анха түрүүн газар дэлхэйе бүтээгээ бэлэйш. Өөрынгөө гараар огторгой тэнгэриие байгуулааш.

¹¹Тэдэ бүтээһэн юумэнүүдшни хүнэхэ, харин ши үлэхэш. Тэдэ юумэнүүдшни хубсаһан мэтэ үмхирхэ.

¹²Ши тэдэниие хубсаһандал адли эбхэхэш, хубсаһандал мэтэ һэлгэхэш. Харин ши өөрөө хододоо хэбээрээ байхаш, тиин үдэрнүүдшни дууһахагүй».

¹³Бурхан өөрынгөө Эльгээмэлнүүдэй нэгэндэньше: «Шинии дайсадые улан дорошни оруултарни ши эндэ, баруун таладамни һуу», – гэжэ хэлээгүй бэлэй.

¹⁴Тиихэдээ Бурханай Эльгээмэлнүүд хэд гээшэб? Тэдэ Бурханда алба хэжэ, абарагдаха ёһотой хүнүүдтэ туһалхаар Бурханай эльгээһэн хүлдэнүүд гээшэ.

Еврейнүүдтэ 2

¹Тиимэһээ урасхалда абтахагүйн тула бидэ дуулажа абаһан юумэе хатуугаар сахижа байха ёһотойбди.

²Манай үбгэ эсэгэнэртэ Эльгээмэлнүүдээр дамжуулан хэлэгдэһэн Бурханай үгэ үнэн зүб байгаа. Тиин тэрэ үгы баримталаагүй, али үгы һаа дуулаагүй хүн хүртэхэ ёһотойл хэһээлтэдэ хүртэдэг байгаа.

³Тиимэ агууехэ абаралгы тоонгүй, бидэ хэһээлтэһээ яажа зугадаха гээшэбибди? Дээдын Эзэн энэ абаралга тухай анхан өөрөө айладхаа юм. Тэрэниие дуулаһан хүнүүд абаралга болбол үнэн юм гэжэ бидэндэ баталан хэлээ бэлэй.



⁴Бурхан тэрэ гэршэлгэдэ элдэб янзын гайхамшагта үзэгдэлнүүдые болон дүлгэ тэмдэгүүдые нэмэн харуулжа, өөрынгөө найн дураар Нангин хүлдэ хайрлажа байгаа.

⁵Бидэнэй дурдаһан шэнэ газар дэлхэе захиржа байхаар Бурхан Эльгээмэлнүүдые табяагүй юм.

⁶Харин Нангин Бэшэгэй нэгэ газарта: «Хүн гээшэ юун бэ, яагаад тэрэниие ши мартахагүй байнабши? Хүнэй хүбүүн юун бэ, яагаад ши тэрэниие анхарнабши?»

⁷Ойро зуура тэрэниие ши Эльгээмэлнүүдһээ доогуур байлгааш. Тэрээндэ алдар соло, нэрэ түрэ олгоош, бүтээһэн бүхы юумэнэйнгээ захирагшаар табяаш.

⁸Бүхы юумые тэрэнэй мэдэлдэ үгөөш», – гэжэ бэшээтэй байдаг. Бурхан «бүхы юумые тэрэнэй мэдэлдэ үгөө» гэхэдээ, хүнэй мэдэлдэ хамаг юумэ үгөө гэхэн удхатай юм. Тиихэдэ бидэ хүнэй бүхы юумэ мэдэлдээ оруулаад байһыень үшөөл харанагүйбди.

⁹Харин ойро зуура Эльгээмэлнүүдһээ доогуур табигдаад, Бурханай үршөөл хайраар бүхы хүнүүдэй түлөө үхэхэн Иисусые бидэ харанабди. Үхэлые дабажа гараад, алдар солодо ба нэрэ түрэдэ тэрэнэй хүртэһые бидэ мүнөө харанабди.

¹⁰Бурхан бүхы юумэ бүтээгөө, бүхы юумэн тэрэнэй тула оршодог. Тэрэ олон үхибүүдые алдар солодоо хүртөөхэ ханаатай байгаа. Тиимэһээ хүнүүдые абаралгада Хүтэлжэ байһан Иисусые Бурхан зоболон дабуулаад, эрхим түгэс болгоо.

¹¹Арюудхагша ба арюудхагдаһан бүхы хүнүүд нэгэ Эсэгэтэй юм. Тиимэһээ Иисус тэдэниие аха дүүнэрни гэжэ нэрлэхээ эшэдэггүй.

¹²Иисус: «Би аха дүүнэртээ шинии хэхэн бүхы юумэн тухай хөөрөжэ үгэхэб, тэдэнтэй уулзахадаа би шамайе алдаршуулхаб», – гэжэ Бурханда хэлээ бэлэй.

¹³Тэрэ үшөө: «Би Бурханда найдажа байхаб», «Бурханай намда даалгаһан үхибүүдтэй би мүнөө эндэ байнаб», – гэжэ хэлээ.

¹⁴Үхибүүдэй махабад бэе ба шуһанһаа бүридэһэн хадань Иисус өөрөө тэдэнтэйл адли хүн болоо. Үхэлые эрхэ мэдэлдээ абаад байһан шолмосые өөрынгөө үхэлөөр хүнөөхын тула,

¹⁵үхэлһөө айжа бүхы наһаараа барлагууд байһан хүнүүдые сүлөөлхын тула тэрэ тиимэ юумэ хэһэн байгаа.

¹⁶Дээдын Эзэн үнэндөө Эльгээмэлнүүдые дэмжэжэ байгаа бэшэ, харин Абраһамай үри һадаһые дэмжэжэ байгаа.

¹⁷Найдабаритай ба үршөөл хайратай Ахамад Санаарта болоод, бүхы хүнүүдэй нүгэлнүүдыень хүлисүүлхын тула Бурханда алба хэжэ байхадаа өөрынгөө аха дүүнэртэй адли болохо ёһотой байгаа юм.

¹⁸Тэрэ өөрөө туршуулжа, зоболон эдлэһэн юм хадаа мүнөө туршалгада ороһон хүнүүдтэ туһалха аргатай юм.

Еврейнүүдтэ 3

Иисус Моисейһээ дээгүүр юм

¹Бурханай баһал өөртөө дуудаһан арюун нангин аха дүүнэрни! Баримталжа байһан хүзэгэймнай Ахамад Санаарта болгогдон эльгээгдэһэн Иисус тухай һанажа байгты.

²Бурханай гэртэ ажаллажа байхадаа Моисей ямар үнэн сэхэ, шударга байгша һэм, тон тиигэжэл Иисус энэ ажалые хэжэ байхаар шэлэжэ абаһан Бурхандаа үнэн сэхэ байгаа юм.

³Гэр бариһан хүн гэрһээ үлүү нэрэ түрэдэ хүртэдэг. Тон тиигэжэл Иисусһе Моисейһээ үлүү ехэ алдар солодо хүртэхэ ёһотой юм.

⁴Бүхы гэрнүүдые ямар нэгэ хүн баряа, харин бүхы юумые Бурхан баряа.

⁵Моисей Бурханай гэртэ зарасадал адли найдабаритай байхадаа, Бурханай ерээдүйдэ хэлэхэ юумые гэршэлэн хэлэхэ ёһотой байгаа.



⁶Харин Христос тэрээндэ ороходоо Бурханай гэртэ байһан Хүбүүндэл адли найдабаритай юм. Өөһэдынгөө этигэжэ байһан зориг ба найдабари хадагалжа байбал, бидэ тэрэнэй гэрынь болохобди.

⁷⁻¹¹«Үбгэ эсэгэнэртнай сүл губида ябахадаа Бурхание туршажа, үймөө татаа һэн. Дүшэн жэл соо Бурханай юу хэжэ байһыень хаража байһаншье һаа, тэдэнэр Бурхание тэндэ шалгаба, туршаба. Тиимэһээ Бурхан тэдэ зондо сухалаа хүрэжэ: „Тэдэнэр ходо эндүүржэ ябадаг, харгы замаарни ябадаггүй“, – гэжэ хэлэһэн байна. Бурхан уур сухалаа хүрэхэдөө: „Амаруулха гэхэн газартаа тэдэниие хэзээшье оруулхагүйб“, – гэжэ тангариглаһан байна. Тиимэһээ таанад Бурханай дуу дуулахадаа, үбгэ эсэгэнэртэйгэйл адляар зүрюу зан бү гаргагты», – гэжэ Нангин һүлдэ хэлэнэ.

¹²Аха дүүнэрни, амиды Бурханһаа холодохогүйн тула таанад булта нүгэлгүй, этигэлтэй байхые оролдожо байгты.

¹³Таанадай хэн нэгэнэй нүгэлөөр хорхойтуулагдан дошхорхогүйн тула, Нангин Бэшэгтэ бэшээтэй «мүнөөдэр» гэдэг үгын маанадта хандажа байхада, та бэе бээе үдэр бүхэндэ урмашуулжа байха ёһотойт.

¹⁴Хэрбээ бидэ эхилһэн амидаралаа һүүл болоторнь хатуугаар баримталжа байбал, Христосто хабаатай болонобди.

¹⁵Нангин Бэшэг соо: «Таанад мүнөөдэр Бурханай дуу дуулахадаа, Бурханай урдаһаа үймөө татаһан үбгэ эсэгэнэртээл адли зүрюу зан бү гаргагты», – гэжэ хэлэгдэһэн байдаг.

¹⁶Бурханай дуу дуулаһаншье һаа, урдаһаань үймөө татаһан хүнүүд хэд байгаа? Тэдэнэр булта Моисейн хүтэлбэри доро Египедһээ гараһан хүнүүд байгаа.

¹⁷Ямар хүнүүдтэ Бурхан дүшэн жэлэй туршада сухалдажа байгаа? Нүгэлдэ унажа, сүл губида үхэхэн хүнүүдтэ бэшэ аал?



¹⁸«Амаруулха гэхэн орондоо тэдэниие хэзээшье оруулхагүйб», – гэжэ Бурхан тангариглажа байхадаа, хэд тухай хэлэжэ байгаа? Урдаһаань үймөө татаһан хүнүүд тухай хэлэжэ байгаа ха юм.

¹⁹Этигэл хүзэггүй байһанайнгаа түлөө тэдэ хүнүүдэй Бурханай амаруулха гэхэн орондо орожо шадахагүй байһыень бидэ харабабди.

Еврейнүүдтэ 4

¹Тэрэ найдуулһан амаралтадань хүртэнгүй үлэшэхэгүйн тула бидэ булта болгоомжотой байха ёһотойбди.

²Сүл губьяар ябаһан зондол тон адли бидэ һайн Мэдээсэл дуулажа абаһан байгаабди. Тэдэнэр Бурханай үгые дуулаһаншье һаа, һайн болоогүй юм. Ушарынь хэлэхэдэ, тэдэ Бурханай үгые шагнажа байхадаа, тэрэ үгыень этигэл хүзэгтэйгээр тогтоожо абаагүй.

³Харин бидэ, хүзэглэһэн хүнүүд, Бурханай найдуулһан амаралтадань хүртэжэ байнабди. «Уур сухалдаа би тэдэниие амаруулха гэхэн газартаа хэзээшье оруулхагүйб гэжэ тангариглаһан байгаа», – гэжэ тэрэ өөрөө хэлээ. Газар дэлхэйе бүтээхэ саһаа хойшо тэрэ ажалаа гүйсэдхэһэншье һаа, тиигэжэ хэлэһэн байгаа.

⁴Нангин Бэшэг соо долоодохи үдэр тухай иигэжэ бэшээтэй: «Хэжэ байгаа ажалаа Бурхан долоодохи үдэртөө дүүргэжэ, хэжэ байгаа бүхы ажалнуудһаа долоодохи үдэртөө Бурхан амарба ха».

⁵«Тэдэниие амаруулха гэхэн газартаа хэзээшье оруулхагүйб», – гэжэ тэндэ баһа бэшээтэй байдаг.

⁶Һайн Мэдээсэл түрүүн дуулаһан хүнүүд этигэлгүй байһан хадаа амаралтада хүртээгүй. Тиин тэрэ амаралтада хүртээгүй зон үшөө байна.

⁷«Мүнөөдэр» гэгдэдэг ондоо үдэрые Бурханай шэлэһыень тэрэ харуулна. Нилээд сагай үнгэрһэн хойно тэрэнэй Давидаар дамжуулан



хэлэһэниинь Нангин Бэшэг соо үгтэнхэй байдаг: «Таанад мүнөөдэр Бурханай дуу дуулахадаа зүрхэ сэдхэлээрээ бү дошхорогты».

⁸Хэрбээ Бурханай найдуулһан амаралтые Навинай Иисусай үгэһэн байбал, Бурхан тэрэнэй һүүлдэ ондоо үдэр тухай хэлэхэгүй бэлэй.

⁹Гэхэтэй сасуу Бурхан өөрынгөө хүнүүдтэ субботын амаралтын үдэрые амалаа юм.

¹⁰Бурханай найдуулһан амаралтада хүртэһэн хүнүүд өөрынгөө хэрэгүүдһээ амаржа байһан Бурхандал адли баһал хэрэгүүдһээ амаржа байха.

¹¹Этигэлгүй байһанайнгаа тула унаһан тэдэ хүнүүдтэл адли нэгэмнайшые унангүй, тиимэ амаралтада хүртэхын тула бүхы шадалаараа шармайе.

¹²Бурханай үгэ амиды ба хүсэтэй юм, хоёр талаһаан хурсалуулагдаһан ямаршые эриһээ хурса юм. Тэрэнь хүнэһэ һүлдэ хоёрой уулзалта, бүридэл болон уураг тархи, алишые юумэн хүрэтэр хүрэдэг. Тэрэ зүрхэнэй хүсэлэн ба бодолнуудые шиидхэжэ байдаг.

¹³Бурханһаа далда, нюуса юумэн гэжэ үгы. Харин бүхы юумэн тэрэнэй харасада элиржэ, нээгдэжэ байдаг. Тиин бидэ булта тэрээндэ өөһэд тухайгаа тоосоо үгэхэ ёһотой гээшэбди.

Иисус бодото Ахамад Санаарта юм

¹⁴Бидэ Бурханай дэргэдэ байһан Бурханай Хүбүүн Иисус гэдэг агууехэ Ахамад Санаартатай ха юмди. Тиимэһээ өөһэдынгөө шүтэжэ байгаа һүзэг этигэлые хатуугаар сахижа ябаял.

¹⁵Манай Ахамад Санаарта бидэнэй ядаруу тулюур байдал тухай һанаагаа зобонгүй ябажа шадахагүй. Тэрэ бидэндэл тон адли бүхы талаһаа туршуулһан байбашые, нэгэшые нүгэл хээгүй юм.

¹⁶Тиин бидэ зоригжожо, буян хэшэгтэй Бурханай хаан шэрээдэ ойртожо үзээл даа. Бидэ маанадтал туһа болохо хэмжээгээр тэндэ үршөөл хайрада хүртэжэ, буян хэшэг олохобди.

Еврейнүүдтэ 5

¹Хүнүүдэй дундаһаа шэлэгдэжэ абтаһан ямаршые ахамад санаарта хүнүүдэйл аша туһада Бурханда алба хэхээр табигдадаг. Тэрэ санаарта хүнэй нүгэлые хүлисүүлхэ гэжэ Бурханда тахил тахидаг, үргэл асардаг.

²Тэрэ өөрөө олон дутагдалнуудтай ушарһаа эндүүржэ, алдуу хэжэ байһан хүнүүдые хүлисэдэг юм.

³Тиимэхээ тиимэ ахамад санаарта гансал хүнэй хэһэн нүгэлнүүдэй түлөө бэшэ, харин өөрынгөө нүгэлнүүдэй түлөө баһал үргэл үргэхэ ёһотой байдаг.

⁴Хүн өөртөө ахамад санаартын нэрэ хүндые олгодоггүй, харин Аарондол адли Бурханай уряалаар ахамад санаарта болодог.

⁵Тон тиигэжэл ахамад санаартын нэрэ хүндые Христос өөрөө өөртөө зүүгээгүй, харин «Ши минии Хүбүүн гээшэш. Мүнөөдэр би шинии Эсэгэшни болооб» гэхэн Бурхан тэрээндэ ахамад санаартын нэрэ түрые үгөө юм.

⁶Нангин Бэшэг соо нүгөө газарта Бурхан: «Мелхиседегэй табиһанаар ши хэтын хэтэдэ санаарта болоод байхаш», – гэжэ хэлэнэ.

⁷Газар дэлхэй дээрэ амидаржа байхадаа, тэрэниие абарха аргатай Бурханда Иисус шангаар хүхирэн, нулимсаа гоожуулан зальбараа, тэрэниие гуйгаа. Иисусай номгон, үнэр шударга байһан хада Бурхан тэрэниие дуулаа һэн.

⁸Бурханай Хүбүүн байһаншые һаа, зоболонгуудые дабан тэрэ хүнэй үгөөр байжа һураа.

⁹Эрхим түгэс болоходоо, тэрэ үгыень дууладаг бүхы хүнүүдэй мүнхын абаралгын эхиниинь болоо.

¹⁰Тиигээд Мелхиседегэй заяаһанаар Бурхан тэрэниие ахамад санаарта болгожо табяа юм.

Этигэл хүзэгөө урмашуулха тухай



¹¹Энэ талаар бидэ олон юумэ хэлэхэ байгаабди, гэхэтэй хамта таанадай ойлгосо доройтоһон тула тайлбарилжа үгэхэмнай ехэл бэрхэшээлтэй байна.

¹²Саг хугасаагаар багсаахада таанад багшанар болоод байха байгаат, харин Бурханай Үгын түрүүшын хэшээлнүүдые таанадта дахин дабтаха хэрэгтэй болоод байна. Хатуу хоол барихын орондо таанад хүгөөр ундалха болонот.

¹³Хүгөөр тэжээлгэжэ байһан хүн бүхэн үнэн зүбые, буруугай ушарые илгаха туршалгагүй үхибүүн гээшэ.

¹⁴Хатуу хоол бээе хүсэһэн хүнүүдэй эдеэн юм. Тэдэ хүнүүд туршалга дадалгатай хадаа һайн, муу хоёрые илгаха аргатай байдаг.

Еврейнүүдтэ 6

¹⁻²Христосой хургаалай түрүүшын хэшээлнүүдые хойноо орхижо, урагшаа дабшайл. Хэрэггүй ажалнуудаа орхижо, Бурханда хүзэглэхэ, уһаар арюудхаха болон гараараа адислаха тухай, үхэхэн хүнүүдэй амидырха, хэтын зарга шүүбэри тухай хургаалай һуури дахин табиха хэрэггүй.

³Бурханай зүбшөөбэл, бидэ энэниие бээлүүлхэбди.

⁴Хүзэг этигэлээ алдаһан хүнүүд яажа дахин гэм хэхээ болёод, Бурханда хандахаб? Тэдэнэр нэгэ үедэ Бурханай гэрэл туяада ябаа, тэнгэрийн бэлэг абажа, Нангин һүлдые тогтоожо абаһан байгаа.

⁵Тэдэнэр өөһэдынгөө туршалгаһаа Бурханай үгэ һайн гэжэ мэдээ, ерээдүйн зуун жэлүүдэй хүсэ шадал мэдэжэ абаа.

⁶Тиибэшье тэдэнэр хүзэг этигэлээ алдаа. Тэдэниие дахин нүгэлһөөнь Бурханда хандуулха аргагүй юм. Юундэб гэхэдэ, тэдэнэр Бурханай Хүбүүе дахин хэрээһэндэ хадажа, тэрэниие хүнүүдэй урда гутааха ха юм.



⁷Оло дахин орожо байһан бороогой уһаар уһалагдаад, эдлэжэ байгаа эзэдтээ аша туһатай ургаса үгэжэ байһан газар Бурханай үршөөлдэ хүртэнэ.

⁸Харин тиихэдэ хашаг болон буртаг үбһэ ургуулһан газар юундэшье хэрэггүй, Бурханай хараалда арай хүртөөгүй, галда шатаагдаха хойшолонтой байдаг.

⁹Инаг хайрата нүхэдни, маанадай иигэжэ хатуугаар хэлэжэ байһаншье хаа, таанад үлүү һайн нүхэсэлдэ байнат, тиимэһээ абарагдахат гэжэ найданабди.

¹⁰Бурхан болбол найдабаритай үнэн сэхэ юм. Тэрэ хэһэн хэрэгүүдыетнай, бусад хүзэглэгшэдтэ туһалһан, мүнөөшье туһалан, өөртэнь үзүүлһэн хайра дурыетнай мартахагүй.

¹¹Таанадай найдажа байһан юумэнэй үнэн зүб байхын тулада таанадай хүн бүхэн эсэстэ хүрэтэрөө зүдхэмжэтэй байһай гэжэ хүсэнэбди.

¹²Таанадые залхуурангүй, хүзэг этигэлтэй, тэсэбэритэй байгаад, Бурханай найдуулһан юумые хүлэжэ абадаг хүнүүдтэл адли байхыетнай хүсэнэбди.

¹³Бурхан Абраһамые найдуулхадаа, найдуулһанаа бээлүүлхэб гэһэн дашаа тангариг үгэһэн байгаа. Өөрһөөнь дээгүүр хүнэй үгы юм хада Бурхан өөрынгөө нэрээр тангариглаһан байгаа.

¹⁴«Би шамайе үршөөл хайрадаа хүртөөхэб, олон үри һадаһадые шамда хайрлахаб гэһэн үгөө үгэнэб», – гэжэ Бурхан Абраһамда хэлээ бэлэй.

¹⁵Абраһам ехэл тэсэбэритэй байжа, Бурханай найдуулһанда хүртэһэн байгаа.

¹⁶Бидэ тангариглахадаа өөһэдһөө ехэ дээгүүр хүнөөр тангаригладагбди, тиин тангариг ямаршье арсалдаа заргалдаае үгы хэдэг юм.

¹⁷Найдуулхан юумыень абаха ёһотой байһан хүнүүдтэ эрхэ хүсэлөө хубилгахагүй байһанаа элээр харуулхын тулада Бурхан найдуулгаа тангаригаараа баталһан байгаа.

¹⁸Бурханай худалаар хэлэжэ болохогүй, хубилдаггүй хоёр юумэн бии юм. Тиимэһээ бидэ урдамнай оршожо байһан найдуулга хатуугаар адхаад, ехэтэ урмашажа, Бурхантай хамтархадаа хоргодохо газар олобобди.

¹⁹Тэрэ найдалга манай амиин бархагтал мэтэ юм. Тэрэ найдалга аюулгүй, бата, тэнгэрийн хүмын хүшэгэй саагуур досоонь ородог юм.

²⁰Тиихэдэ Иисус бидэнэй аша туһада урдамнай тишээ ороод, Мелхиседегэй заяаһанаар хэтын хэтэдэ ахамад санаарта болоо бэлэй.

Еврейнүүдтэ 7

Христос мүнхэдөө бодото ахамад санаарта юм

¹Мелхиседек болбол Салимай хаан, Дээдын Бурханай санаарта байгаа юм. Абраһамай дүрбэн хаашуулые дараад, дайнһаа бусажа ябахадань, Мелхиседек тэрээнгэй ушаржа үршөөл хайрадаа хүртөөгөө бэлэй.

²Тиин Абраһам байһан юумэнэйгээ арбанай нэгэн хубиие Мелхиседегтэ үгэһэн байгаа. (Мелхиседегэй нэрынь нэгэ удха болбол «үнэн сэдхэлэй хаан»; тиихэдэ Салимай хаан байһан хадань тэрэнэй нэрэ үшөө «энхэ тайбанай хаан» гэһэн удхатай).

³Тэрэ эхэ эсэггүй, угай бэшэггүй; тэрэнэй түрэхэн гү, али үхэхэн тухай гэршэлгэ байдаггүй. Тэрэ Бурханай Хүбүүндэ тон адли, мүнхэдөө санаарта байха юм.

⁴Тэрэнэй агууехэ байхые таанар харагты. Манай үбгэ эсэгэ Абраһам дайнда олзолһон бүхы юумэнэйнгээ арбанай нэгэ хубиие тэрэндэ үгэһэн байгаа.



- ⁵Санаартадаар табигдаһан Левиин үри хадаһад Хуулиин ёһоор баһал Абраһамай үри хадаһад байһан өөрынгөө аха дүүнэрһээ, Израилиин арад түмэнэй олзын арбанай нэгэ хубиие суглуулха эрхэтэй.
- ⁶Мелхиседек болбол Левиин үри хадаһан бэшэшье хаа, Абраһамаа арбанай нэгэ хубиенъ абаад, Бурханай найдуулгада хүртэһэн тэрэ Абраһамые үршөөл хайрадаа хүртөөгөө.
- ⁷Үршөөлдөө хүртөөжэ байһан хүнэй үршөөгдэжэ байһан хүнһөө үлүү дээгүүр байһаниинъ арсашагүй.
- ⁸Эндэ арбанай нэгэ хубиие суглуулжа байдаг санаартад үхэлтэ хүнүүд юм, харин тэндэ арбанай нэгэ хубиие абаһан Мелхиседек амиды гэжэ гэршэлэгдээтэй юм.
- ⁹Абраһамай арбанай нэгэ хубиие түлэхэдэ, Левийшье (үри хадаһадынъ арбанай нэгэ хубиие суглуулдаг) өөрөө баһал түлөөһэ үгтэһэн болоно.
- ¹⁰Мелхиседегэй Абраһамтай уулзахада Левий үшөө түрөөгүй, харин үбгэ эсэгэ Абраһамайнгаа досоонъ байгаа гэжэ хэлэхэдэ болоно.
- ¹¹Израилиин арадта үгтэһэн Хуулиин ёһоор левидүүд санаартан болоо. Хэрбээ левидүүд түгэс түгэлдэр санаартад байбал, Аароной табиханаар бэшэ, харин Мелхиседегэй заяаһанаар ондоо санаартын гаража ерэхын хэрэг үгы һэн даа.
- ¹²Санаарталгын ээлжэлгэ хубилбал, Хуулииншье тогтоолнууд хубилгагдаха ёһотой байдаг.
- ¹³Бидэнэй дурдаһан Дээдын Эзэн ондоо обогой хүн байгаа, тиин обогойнь нэгэшье хүн санаартын алба гүйсэдхэдэггүй бэлэй.
- ¹⁴Дээдын Эзэн болбол Иудын обогой гэжэ һайн мэдээжэ юм. Санаартад тухай асуудал хүндэхэдөө Моисей энэ обог тухай юушье хэлээгүй һэн.
- ¹⁵Мелхиседегтэл адли ондоо санаартын бии болоһониинъ эндэһээ бүри элеэр харагдана.



¹⁶Тэрэ Хуулийн ёһоор гү, али тогтоолоор бэшэ, харин дууһашагүй амидаралай хүсөөр санаарта болоо юм.

¹⁷«Мелхиседегэй заяаһанаар ши хэтын хэтэдэ санаарта байхаш», – гэжэ Нангин Бэшэг соо хэлэгдэнэ.

¹⁸Хуушан тогтоол бирагүй, аша туһагүй байһан дээрэхээ мүнөө хүсэгүй болгогдонхой.

¹⁹Моисейн Хуули ямаршые юумые эрхим түгэс болгоогүй. Тиимэхээ маанадай Бурханда ойртохын тула мүнөө бүри хайн найдуулга үгтэнэ.

²⁰Тиихэдэ үшөө Бурханай тангариг үгтөө. Ондоо хүнүүдэй санаарта болоходо Бурхан тиимэ тангариг үгөөгүй хэн.

²¹Харин Иисус болбол Бурханай тэрээндэ үгэһэн тангаригай ёһоор санаарта болоо юм: «Дээдын Эзэн „Ши хэтын хэтэдэ санаарта байхаш“ гээд тангариглаа юм, тиин хэлэхэн үгөө бусаажа абахагүй».

²²Энэ илгаа Иисусые баһал бүри хайн хэлсээнэй найдабари болгоно.

²³Ондоошые илгаа байгаа: бусад санаартад үхэдэг ушарһаа ехэ олон байгаа.

²⁴Харин Иисусай мүнхэ амидаржа байһан хадань тэрэнэй санаартын албан баһа мүнхэ юм.

²⁵Тиимэхээ зоние үргэлжэ абаржа байха аргатай тэрэ санаарта хэтын хэтэдэ амиды байжа, тэрээгүүр дамжан Бурханда ерэхэн хүнүүдэй түлөө Бурханай урда гуйдаг юм.

²⁶Үнэндөө Иисус маанадтал хэрэгтэй Ахамад Санаарта юм. Тэрэ болбол арюун нангин; харата хэрэгүүдые үйлэдөөгүй, нүгэл шэбэлдэ унаагүй; нүгэлтэ зонһоо илгаруулагдаад, тэнгэридэ дэгдүүлхэн байгаа.

²⁷Ондоо ахамад санаартадтал адли түрүүн өөрынгөө нүгэлнүүдэй түлөө, һүүлдэнь арад зоной нүгэлнүүдэй түлөө үдэр бүхэн үргэл асарха тэрээндэ хэрэггүй. Тэрэ нэгэтэ, тиихэдэ хэтын хэтэдэ өөрыгөө үргэл болгон үргөө.

²⁸Моисейн Хуули дутагдалнуудтай хүнүүдые ахамад санаартаар табидаг, харин Хуулийн хүүлдэ үгтэһэн Бурханай тангариг хододоо эрхим түгэс Хүбүүниие ахамад санаартаар табья юм.

Еврейнүүдтэ 8

Христос болбол Шэнэ Хэлсээнэй дамжуулагша ба Ахамад Санаарта юм

¹Хэлэжэ байһан юумэнэймнай гол удха: бидэ тэнгэридэ Үндэр дээдэ түрэлтын баруун талада һууһан Ахамад Санаартатайбди.

²Тэрэ болбол хүнүүдэй гараар бариһан бэшэ, харин Дээдын Эзэнэй бодхоһон бодото майханда, хамагай нангин газарта ахамад санаартынгаа үүргэ гүйсэдхэжэ байна.

³Ямаршые ахамад санаарта Бурханда үргэл асархаар, тахил тахихаар табигдадаг юм, тиин манайшые Ахамад Санаарта үргэхэ юумэтэй байха ёһотой.

⁴Хэрбээ тэрэмнай газар дэлхэй дээрэ байбал, санаарташые бэшэ байха һэн, юундэб гэхэдэ, газар дэлхэйн санаартад Хуулийн ёһоор лэ үргэлнүүдые асардаг юм.

⁵Тэдэ санаартад ажалаа хэхэдээ үнэн дээрээ тэнгэрийн юумые һажаана, тэнгэрийн юумэнэй хүүдэрын лэ болоно. Тиимэл юумэн Моисейтэй тохёолдоо һэн. Тэрэнэй майханаа татаха гэжэ байхада, Бурхан тэрээндэ: «Хада дээрэ шамда харуулагдаһантайл адляар бүхы юумые хэ», – гэжэ хэлээ бэлэй.

⁶Үлүү һайн найдуулга дээрэ үндэһэлһэн Бурханай болон тэрэнэй хүнүүдэй хоорондохи Иисусаар дамжаһан хэлсээн хэды ехэ һайн гээшэб. Тон тиигэжэл Иисуста мүнөө тэдэ санаартадта ороходоо бүри эрхим түгэс албан тушаал үгтөө.

⁷Хэрбээ түрүүшын хэлсээн дутагдалгүй байбал, хоёрдохи хэлсээнэй хэрэг үгы байха һэн даа.



⁸Зүгөөр Бурхан арадаа зэмэлэн, иигэжэ хэлэбэ: «Израилиин арадтай болон Иудын арадтай шэнэ хэлсээн баталха үдэрнүүд ерэжэ байна гээд Дээдын Эзэн хэлэнэ.

⁹Энэ хэлсээн тэдэнэрэй үбгэ эсэгэнэрые гарһаань хүтэлэн Египедһээ гаргаха гэхэн үдэр тэдэнтэй баталһан хэлсээндэл адли бэшэ байха. Үбгэ эсэгэнэрынь минии хэлсээе сахидаггүй байгаа, тиимэһээ би тэдэниие тоохоёо болёоб.

¹⁰Тэдэ үдэрнүүдэй һүүлдэ Израилиин арадтай баталха хэлсээн иимэ: хуулинуудаа тэдэнэй һанал бодолдо оруулхаб, зүрхэ сэдьхэлдэнь бэшэхэб. Би тэдэнэй Бурханиинь болохоб, тэдэнэр минии арад болохо гэжэ Дээдын Эзэн хэлэнэ.

¹¹Тэдэнэй хэнииньшые Дээдын Эзэниие мэдэ гэжэ нүхэдөө гү, али аха дүүнэрээ һургахагүй, юундэб гэхэдэ, тэдэ бултадаа багаһаа агууехэ хүрэтэрөө намайе мэдэжэ байха.

¹²Тэдэнэй нүгэлнүүдые би хүлисэхэб, худал хуурмагыень дахин һануулхагүйб».

Христос эрхим түгэс тахил юм

¹³Шэнэ хэлсээн тухай хэлэхэдэ Бурхан түрүүшын хэлсээнэй хуушарһые харуулаа, тиихэдэ хуушаржа ба үмхиржэ байһан юумэн мэнэ гэхээр лэ хүнэн һаладаг.

Еврейнүүдтэ 9

¹Түрүүшын хэлсээн мүргэл тухай тогтоолтой, мүргэлөө хэхэ нангин газартай байгаа.

²Майханай нэгэдэхи таһалгые Нангин Газар гэжэ нэрлэдэг бэлэй. Досоонь зула, шэрээ дээрэ Бурханда үргэгдэһэн хилээмэн табяатай һэн.

³Хоёрдохи хүшэгэй саана Хамагай Нангин Газар байгаа.

⁴Досоонь алтан шэрээ дээрэ утадаг сан хүжэ, бүхы талаһаан алтаар хушагдаһан Хэлсээнэй абдар, тэрээн соо маннатай алтан домбо,



набшалжа байһан Аароной таяг, захяа заабари һиилэгдэнхэй шулуун хабтагайнууд байгаа.

⁵Абдарай хаабариин, абаралгын газарай дээгүүр тэнгэрийн амирад бии һэн. Мүнөө дээрээ энээн тухай тодорхойгоор хэлэһэнэй хэрэггүй.

⁶Энэ бүхэн ямар ёһо гуримтай байбаб гэбэл, санаартад үдэр бүхэн өөһэдынгөө алба хэхээ майханай гадаада таһалгада ородог байгаа,

⁷харин майханай дотоодо таһалгада жэлдээ нэгэл дахин гансал ахамад санаарта ородог бэлэй. Ахамад санаарта ороходоо өөрынгөө түлөө, арад зоной нүгэл хэжэ байнабди гэжэ мэдэрэнгүй хэжэ байһан нүгэлнүүдэйн түлөө Бурханда үргэхэ шуһа абажа ородог байгаа.

⁸Майханай гадаада таһалгын байха үедэ Хамагай Нангин газарта орохо харгы хаалгаатай байнал гэжэ Нангин һүлдэ элээр харуулна.

⁹Энэ болбол мүнөөнэй үе сагые зураглаһан бэлгэ тэмдэг болоно. Бурханда үргэгдэжэ байһан үргэл тахилнууд мүргэл хэжэ байһан хүниие гүйсэд абарха аргагүй гэхэн удхатай юм.

¹⁰Энэнь Бурханай шэнэ тогтоол зарлаха үе саг хүрэтэр эдихэ, ууха, янза бүрийн арюудхалга сэбэрлэлгын гадна талын заншалнуудтай холбоотой шухала бэшэ юумэнүүд байгаа.

¹¹Харин Христос ерээдүйн һайн һайханай Ахамад Санаарта болон ерээ. Тэрэнэй алба хэжэ байһан майхан бүри ехэ, улам һайхан юм, тэрэ майхан хүнүүдэй гараар бүтээгдээгүй, тиимэхээ зохёон бүтээгдэһэн энэ газар дэлхэйн хубинь бэшэ.

¹²Христос майханда нэгэтэ ороходоол Хамагай Нангин газарта хэтын хэтэдэ ороо, тиин тэрэ тэхын гү, али буха буруугай шуһа тахил болгон абажа ороогүй, харин өөрынгөө аминай ба шуһанай сэнгээр нүгэлнүүдыемнай арилгаа.

¹³Хэрбээ бузарлагдаһан хүнүүд дээрэ тэхын гү, али бухын шуһа, шатааһан үнээнэй үнэһэ сасахадань, тэрэ хүнүүдэй бузарынь арилгагдадаг юм бол,

¹⁴Христосой шуһан бузарнуудыень бүрин түгэс арилгадаг юм. Тэрэ мүнхын һүлдөөр дамжуулан өөрыгөө Бурханда үргөө. Тэрэнэй шуһань сэдхэлыемнай дэмы хэрэгүүдһээ арилгаад, амиды Бурханда алба хэхэ аргатай болгохо.

¹⁵Бурханай уряалһан хүнүүд Бурханай найдуулһан мүнхын үршөөлдэ хүртэхэ. Христос түрүүшын хэлсээнэй хүсэн түгэлдэр байхадань хүнүүдые үйлэдэһэн нүгэлнүүдһэнь сүлөөлөөд, Шэнэ хэлсээ баталха боломжо олгобо.

¹⁶Эдэ хүрэнгэ залгамжалхын тула һүүлшын захяа үгтэдэг. Тиимэ һүүлшын захяа байбал, тэрэ захяа орхиһон хүнэй үхэл баталһан гэршэлгэ хэрэгтэй.

¹⁷Һүүлшын захяа орхиһон хүнэй амиды байбал, тэрэ захяань юуншье бэшэ, харин тэрэ хүнэй үхэһэн лэ хойно һүүлшын захяа хүсэндөө ородог.

¹⁸Тиимэхээл адхарһан шуһаар баһа түрүүшын хэлсээн баталагдаа.

¹⁹Моисей түрүүн бүхы арад зондо захяа заабаринуудые Хуулиин ёһоор тайлбарилан айладхаад, тиигээд бухануудай ба тэхэнүүдэй шуһые уһантай худхаад, иссопой мүшэрөөр ба улайлгаһан нооһоор тэрэ шуһаараа Хуулиин ном болон бүхы арад зониие сасаба ха.

²⁰«Энэ шуһан Бурханай танда заяаһан хэлсээе батална», – гэжэ Моисей хэлэбэ.

²¹Моисей тон тиигэжэл Майханиее болон мүргэлдэ хэрэглэгдэдэг амһартануудые шуһаар сасаһан байгаа.

²²Үнэндөө Хуулиин ёһоор бүхы юумэн шуһаар лэ арюудхагдадаг, тиимэхээ шуһа адхаруулангүй нүгэл сагааруулжа болоогүй хэн.

²³Тэнгэридэхи юумые дуряаһан юумэнүүд тиигэжэ арюудхагдаха ёһотой байгаа. Тиигэхэдэ бодото тэнгэрийн юумэн бүри һайн тахилаар арюудхагдаха ёһотой.

²⁴Бодото юумые нажаан хүнэй гараар бүтээһэн Нангин Газарта Христос ороогүй юм. Тэрэ мүнөө манай орондо Бурханай урда зогсохын тулада тэнгэридэ өөртэнь ороо юм.

²⁵Тиихэдэ иудейн ахамад санаартын Хамагай Нангин газарта жэл болгон ондоо амитанай шуһа абаад ородогтол адляар өөрыгөө оло дахин тахил болгожо байхаар Христос тэнгэридэ ороогүй юм.

²⁶Тиигээгүй һаа, тэрэ газар дэлхэйн зохёон бүтээгдэхэнээ эхилээд оло дахин зобохо бэлэй. Үе сагай эсэстээ хүрэжэ байхада тэрэ өөрыгөө тахил болгон үргөөд, нүгэлые усадхахаар нэгэтэл, гэхэдэ хэтын хэтэдэ ерээ юм.

²⁷Хүн бүхэн нэгэтэ үхөөд лэ, удаань зарга шүүбэридэ орохо ёһотой.

²⁸Тон тиигэжэл Христос олон зоной нүгэлнүүдые хүлисүүлхээр өөрыгөө нэгэтэ үргэл болгон асараа бэлэй. Тэрэ хоёрдохийо нүгэлнүүдые арилгахаяа бэшэ, харин тэрэниие хүлээжэ байһан зоние абархаяа ерэхэ.

Еврейнүүдтэ 10

¹Иудейн Хуули болбол бодото юумэнүүдэй тон зүб хэбынь бэшэ, харин һайн юумэнүүдэй һүүдэрын лэ гээшэ. Жэлһээ жэлдэ, хододоо нэгэ адли амитадые тахил болгон үргэжэ, Бурханда ерэжэ байһан хүнүүдые Хуули яжа эрхим һайн болгохоб.

²Хэрбээ Бурханда мүргэл хэжэ байһан хүнүүдэй нүгэлнүүдын үнэхөөрөө хүлисэгдэһэн байгаа һаа, тэдэ хүнүүд нүгэлтэйбди гэжэ өөһэдыгөө тоолохоёо болёод, тахил үргэхээ болихо һэн лэ.

³⁻⁴Бухануудай болон тэхэнүүдэй шуһа хүнүүдэй нүгэлнүүдые хээээдэшье арилгажа шадахагүй юм. Тиимэһээ тэдэниие жэл бүри



үргэл болгожо асардаг. Тиигээд тэдэ тахилнууд хүнүүдтэ нүгэлнүүдыеень хануулаад байдаг.

⁵Тиимэхээ Христос энэ газар дэлхэйдэ ерэхэдээ, Бурханда иигэжэ хэлээ юм: «Ши үргэлнүүдые үргүүлхэ болон тахилнуудые тахюулха дурагүй байнаш. Тиихэдэ намда махабад бэе олгоош.

⁶Нүгэлнүүдые арилгаха гэжэ үргэлэй шэрээ дээрэ үргэгдэһэн бүтэн бүхэлээрээ шатаагдаһан амитадые, олон тахилнуудые ши хайшаагаагүйш.

⁷„Ай, Бурхамни, Хуулида нам тухай юун гэжэ бэшээтэй байнаб, тэрэниел, шинии эрхэ хүсэлые бээлүүлхээ би ерэнэб“ – гэжэ би удаань хэлэбэб».

⁸«Тахил, үргэлнүүдые, үргэлэй шэрээ дээрэ шатаагдаһан амитадые, нүгэлнүүдээ арилгахын тула тахигдаһан тахилнуудыешье ши абаха дурагүй байгааш, тэдэниие хайшаагаагүйш», – гэжэ тэрэ түрүүн хэлэбэ. Эдэ бүхы тахилнуудые Хуулиин ёһоор үргэдэг байһаншье хадань, тэрэ тиигэжэ хэлээ.

⁹«Ай, Бурхамни, шинии эрхэ хүсэлые бээлүүлхээ би ерэнэб», – гэжэ удаань тэрэ хэлэбэ. Тиихэдээ Бурхан бүхы хуушан тахилнуудые болюулжа, орондонь Христосые тахил болгон табина.

¹⁰Иисус Христосой Бурханай эрхэ хүсэл бээлүүлэн өөрынгөө махабад бэеые нэгэтэ болон хэтын хэтэдэ үргэл болгон асарһан юм хадань бидэ булта нүгэлнүүдһээн мултаран арюудхагдаһан байнабди.

¹¹Хэдышье иудейн санаартадай үдэр бүхэн өөрынгөө алба гүйсэдхэн, нэгэ адли юумээ оло дахин тахил болгон асардаг байхадань, тэдэ тахилнуудын нүгэлнүүдые хэзээшье арилгажа шададаггүй.

¹²Христос болбол нүгэлнүүдэй түлөө нэгэ тахил тахяад, хэтын хэтэдэ Бурханай баруун талада һуугаа.

¹³Тэрэ мүнөө дайсадыень хүлэйн ула доро Бурханай оруулхыень хүлэжэ байна.

¹⁴Нүгэлнүүдээ арилгажа байһан хүнүүдые Христос нэгэ үргэлөөрөө хэтын хэтэдэ эрхим түгэс болгоо.

¹⁵Нангин һүлдэшье энээн тухай бидэндэ гэршэлэн хэлэнэ:

¹⁶«Тэрэ үдэрнүүдэй һүүлдэ тэдэнтэй баталагдаха хэлсээн энэ байна: хуулинуудаа тэдэндэ һануулхаб, һанаа сэдхэлдэнь бэшэхэб гэжэ Дээдын Эзэн хэлэнэ.

¹⁷Тэдэнэрэй нүгэлнүүдые би хүлисэхэб, харата муухай хэрэгүүдыень дахин һануулхагүйб».

¹⁸Нүгэлнүүдэй хүлисэгдэһэн хойно тэдэнэй түлөө дахин үргэл хэхэ хэрэггүй юм.

Бурханай хажуудань ябаял

¹⁹Аха дүүнэрни, Иисусай үхэлэй ашаар бидэ Нангин Газарта орохо дүүрэн эрхэтэйбди.

²⁰Тэрэ болбол хүшэгэй саагуур – өөрынгөө махабад бэеэр – бидэндэ шэнэ, мүнхын амидаралда хүргэдэг харгы зам нээгээ.

²¹Бидэ Бурханай гэр хараха агууехэ санаартатайбди.

²²Тиимэхээ үнэн сэдхэлтэйгээр, дүүрэн хүзэг этигэлтэйгээр, бузар һанал бодолнуудһаан сэбэрлэгдэһэн зүрхэ сэдхэлтэйгээр, сэбэр уһаар угаагдаһан махабад бээтэйгээр Бурханай ойро ошоёл.

²³Бурхан найдуулһанаа дүүргэхэ гэжэ этигэлтэй байгаа юм хадаа этигэжэ байһан тэрэ найдуулгаяа бата баримталан ябаял.

²⁴Хүнүүдэй бэе бээдээ анхарал табижа, бэе бээдээ инаг хайраяа харуулхадань, дэмбэрэлтэй һайхан юумэ хэхэдэнь туһалжа байял.

²⁵Маанадай зариман суглаагаа хаяжа ошодог заншалтай. Тиигэхээ болёод, орондонь Дээдын Эзэнэй ерэхэ Үдэрэй ойртохо туһамынь бэе бээе бүри ехээр зоригжуулжа, урмашуулжа байял.

²⁶Үнэн зүбые мэдэрһэн хойноо бидэнэй зорюута нүгэл шэбэл хэжэ ороболнай нүгэлнүүдые арилгаха тахил дахин бидэндэ байхагүйл.

²⁷Тиимэхээ зарга шүүбэриин болохые, Бурханда эсэргүүсэһэн хүнүүдые хүнөөхэ дошхон галые айжа байгаад хүлээхэмнай үлэнэ гээшэ.

²⁸Моисейн Хуули буруушааһан хүн хоёр гурбан хүнэй гэршэлбэл, ямаршые үршөөл хайраггүйгөөр үхэлөөр хэһээгдэдэг.

²⁹Зүгөөр Бурханай Хүбүүндэ эбүүрхэдэг, өөһэдыень нүгэлнүүдһээн арилгаһан Бурханай хэлсээнэй шуһые нангин юумэн гэжэ тоодоггүй хүнүүд, үршөөл хайрын хүлдые доромжолдог хүнүүд тэрээнһээ долоон доро хэһээлтэдэ хүртэхэ ёһотой юм!

³⁰«Би үһөөгөө абахаб, би ашыень харюулхаб», баһа «Дээдын Эзэн арад зоноо шүүхэ», – гэжэ хэлэгшые бидэ мэдэнэбди.

³¹Амиды Бурханай гартань орохонь аймшагтай юм!

³²Таанадтай урдань юунэй тохёолдоһые һанаандаа оруулагты. Бурханай гэрэл туяагай таанадые гэрэлтүүлхэдэ, таанад зоболонгуудые дабан, агууехэ баатаршалга гаргабат.

³³Таанадые урдань хүнүүд гомдохоодог, доромжолдог бэлэй, тиимэхээ тон тиигэжэ доромжолуулжа байһан хүнүүдые таанад хамгаалхада бэлэн байдаг бэлэйт.

³⁴Таанад түрмэдэ һууһан хүнүүдэй зоболонгые хубаалсадаг, зөөри зөөшыетнай буляжа абахадань, баяртай байдаг һэнта, юундэб гэхэдэ, таанад тэнгэридэ хэтэдээ оршодог бүри һайн зөөри зөөшэтэй байһанаа мэдэжэ байгаат.

³⁵Зориггоо бү алдагты, тиигэбэл агууехэ шагналда хүртэхэт.

³⁶Бурханай эрхэ хүсэлые бээлүүлэн, найдуулһан юумыень абаха гэбэл, таанад тэсэбэритэй байха ёһотойт.

³⁷Үшөө нэгэ хэды болоод, уданшьегүй хаатангүй Заларан ерэгшэ ерэхэл.

³⁸Үнэн сэдхэлтэнгүүд этигэл хүзэгөөрөө амидаржа байха, хэрбээ хэн нэгэнэй таталзабалнь, би тэрэниие найшаахагүйб.

³⁹Бидэ татагалзан хосорогшод бэшэбди. Харин хүзэг этигэлтэй зомди, абарагдахабди.

Еврейнүүдтэ 11

Һүзэг этигэл

¹Һүзэг этигэлтэй байхань найдажа байһан юумэндээ бата ханалтай байха, нюдөөрөө харадаггүй юумэнүүдтэ найдажа байха гэшэ.

²Һүзэг этигэлээрээ манай үбгэ эсэгэнэр Бурханай найшаалда хүртэһэн байна.

³Һүзэг этигэлээрээ бидэ Бурханай үгөөр замбуулин зохёон бүтээгдээ гэжэ мэдэрнэбди, тиимэһээл нюдэндэмнай харагдадаг юумэнүүд харагдадаггүй юумэнүүдһээ бии болоо юм.

⁴Һүзэг этигэлээрээ Авель Каинһаа үлүү хайн үргэл Бурханда асарһан байгаа. Бурхан өөрөө тэрэнэй үргэлые найшаажа, хүзэг этигэлээрнь Авелиие үнэн сэдхэлтэн байна гэжэ найшаагаа юм. Авелиин үхэһэншье хаа, этигэл хүзэгынь мүнөө хүрэтэр маанадые хургажа байна.

⁵Һүзэг этигэлэйнгээ ашаар Енох үхэлтэй уулзаагүй. Үнэндөө болбол Бурхан тэрэниие дээшэнь дэгдээгээ, хэншье Енохые оложо шадаагүй юм. Дэгдүүлхынгээ урда тээ Енох Бурханай найшаалда хүртөө гэжэ Нангин Бэшэгтэ бэшээтэй байдаг.

⁶Һүзэг этигэлгүй хүнүүдэй хэнииншье Бурханай найшаалда хүртэжэ шадахагүй: Бурханда ерэжэ байһан хүн Бурхан бии, тэрэниие бэдэржэ байһан хүнүүдэй ашыень тэрэ харюулха гэжэ хүзэглэжэ байха ёһотой.

⁷Ерээдүйдэ тохёолдохо уһан галаб тухай хэнэйшье уридшалан мэдээгүй байхада Ной этигэл хүзэгөөрөө Бурханһаа һэргылэмжэ абаад, Бурханай үгөөр байжа, өөрыгөө болон өөрынгөө гэр бүлые абарха корабль бариһан байна. Эсэстэнь, газар дэлхэйнхид гэмнэгдээд, Ной этигэл хүзэгөөрөө Бурханһаа үнэн сэдхэлдэ хүртэбэ.

⁸Бурханай үгэхэб гэжэ найдуулһан орон нютаг руу ошо гэжэ Бурханай уряалхада Абраһам этигэл хүзэгөөрөө үгыень дуулаһан байна. Хайшаашье ошохо байһанаа мэдэнгүй, тэрэ өөрынгөө орон нютагыг орхёо бэлэй.

⁹Бурханай үгэхэб гэжэ найдуулһан орон нютагта тэрэ баһал Бурханай найдуулгада хүртэһэн Исаак Иаков хоёртойгоо этигэл хүзэгөөрөө хариин хүндэл майханууд соо амидардаг һэн.

¹⁰Бурханай зохёон бодхооһон бата һууритай хотые Абраһам хүлэжэ байгаа.

¹¹Абраһамай ехэ наһатай болоод, Саррын үри багагүй байһаншье хада, тэдэнэр этигэл хүзэгөөрөө үхибүүтэй болоо. Бурхан найдуулһанаа бээлүүлхэ гэжэ Абраһам ехэ этигэжэ байгаа.

¹²Үхэхын наана болоод байһан ганса Абраһамһаа огторгойн мүшэдтэл адли, далайн эрьсын элһэндэл адли тоогүй олон үри һадаһад түрэхэн байгаа.

¹³Тэдэ булта этигэл хүзэгтэйгөөр наһа бараа. Тэдэнэр Бурханай найдуулһан юумэндэ хүртэнгүй үхэхэншье һаа, тэрэ найдуулгыень холоһоо хаража баясадаг бэлэй, өөһэд тухайгаа бидэ газар дэлхэй дээрэ хариин хүнүүд, ерүүл хүнүүд гээшэбди гэжэ хэлэдэг бэлэй.

¹⁴Тиигэжэ хэлэдэг хүнүүд өөрынгөө орон нютагыг бэдэржэ байнабди гэжэ элеэр харуулна.

¹⁵Өөһэдынгөө орхижо ошоһон орон нютаг тухай тэдэнэр һанадаг байбал, һөөргөө бусажа ерэхэ аргатай байха һэн.

¹⁶Харин тэдэнэр үлүү хайн, тэнгэрийн орон нютагта зорижо байба. Тиимэһээ Бурхан тэдэнэй Бурханби гэхэдээ тэдэнһээ эшэдэггүй: Бурхан тэдэ зондо хото бэлдээд байна.

¹⁷Бурханай Абраһамые туршахадань, этигэл хүзэгөөрөө тэрэ Исаак хүбүүгээ тахил болгон үргөө. Бурхан Абраһамда найдуулга үгөө, тиимэһээ Абраһам ганса хүбүүгээ тахил болгон үргэхэдэ бэлэн байгаа.

¹⁸«Исаагаар дамжан, ши минии үгэхэб гэхэн үри хүүгэдтэй болохош», – гэжэ Бурхан тэрээндэ хэлэбэ.

¹⁹Исаагай үхэбэлнь Бурхан тэрэниие амидыруулха аргатай гэжэ Абраһам ханажа байгаа, тиин Абраһам Исаагыг үхэлһөө бусаажа абаа гэжэ хэлэхэдэ болохо.

²⁰Исаак ерээдүйдэ этигэн, Иаков Исав хоёрыг үршөөлдөө хүртөөһэн байгаа.

²¹Иаков наһа барахынгаа урда тээ этигэл хүзэгтэйгөөр Иосифой хүбүүдые бултыень буян хэшэгтээ хүртөөгөөд, таягаа тулажа байгаад Бурханда мүргэхэн байна.

²²Иосиф наһа баража байхадаа, Израилиин хүбүүдтэ Египедыг орхижо ошохыень этигэл хүзэгтэйгөөр дурадхаад, шарилыень хаана табихаб гэхэн захяа орхиһон юм.

²³Этигэл хүзэгтэйгөөр Моисейн аба эжынь хүбүүгээ түрэхэһөөнь эхилжэ гурбан нара хоргодуулжа байба. Тэдэнэр үхибүүнэйнгээ хайхан байхыень хараад, хаанай захиралтатай зүрилдэхээ айгаагүй.

²⁴Моисей наһаяа хүсэхэдөө, этигэл хүзэгөөрөө фараоний басаганай хүбүүн гэжэ нэрлүүлхээ арсаба.

²⁵Тэрэ богони хугасаанда нүгэлтэй амидаралтай байжа аяшаахын орондо Бурханай аралтай зобохонь дээрэ гэжэ тоолобо.

²⁶Христосой түлөө зобохо гээшэ бүхы Египедэй баялигһаа үлүү ехэ баялиг гэжэ Моисей бодожо байгаа, ушарынь гэхэдэ, тэрэ ерээдүйдэ харюулха шагналаа хаража байгаа бэлэй.

²⁷Тэрэ этигэл хүзэгөөрөө хаанай уур суخالһаа айнгүй, Египедые орхёо һэн. Нюдэндэ харагдадаггүй Бурхание хаража байһандал тэрэ бата хатуу байгаа һэн.

²⁸Этигэл хүзэгөөрөө тэрэ Паасхын баярые тогтоогоод, үхэлэй Эльгээмэлэй израильшуудай ууган хүбүүдтэнь хүрэнгүй үнгэрхын тула шуһаар үүдээ сасахыень арад зондоо захираа.

²⁹Этигэл хүзэгөөрөө израильшууд Улаан далайе хуурай газар мэтэл гаталба, харин египедэй сэрэгшэдэй тон тиимээр гаталжа туршахадань, уһан хана тэдэниие хушаба.

³⁰Израильшууд долоон үдэрэй туршада Иерихоние тойрожо ябаад, этигэл хүзэгөөрөө ханануудыень унагаагаа.

³¹Янхан эмэ Раав этигэл хүзэгөөрөө израилиин тагнуулшадые хайнаар угтан абаһандаал Бурханай үгые дуулаагүй хүнүүдтэй хамта хосороогүй.

³²Үшөө юун тухай хэлэхэбиб? Геден, Барак, Самсон, Иеффай, Давид, Самуил, бусадшые лүндэншэд тухай хөөрэхэдэмни саг хүрэхэгүй.

³³Тэдэнэр этигэл хүзэгөөрөө хаан оронуудые дайлан диилэдэг, үнэн зүб юумэ хэдэг, Бурханай найдуулһан юумэндэ хүртэдэг, арсалануудай амыень хаадаг,

³⁴галзуу гал унтараадаг, жадын эриһээ зайсадаг, нулахан бирагүй байгаад, шадалтай болодог, байлдаанда бүхэ байдаг, хариин сэрэгүүдые дарадаг бэлэй.

³⁵Эхэнэрнүүдэй этигэл хүзэгэйнь ашаар үхэхэн түрэлхидыень амидыруулдаг байгаа. Нүгөө зариман бүри һайн амидаралда хүртэхын тулада сүлөөлэлгэхөө арсан, тамалуулагдан үхэдэг һэн.

³⁶Зарим хүнүүд доромжолуулаад, сохюулаад, баһа гэнжэндэ хүлюулээд, түрмэдэ һуудаг бэлэй.

³⁷Нүгөөдүүлһынь шулуугаар шэдэдэг, хюрөөгөөр хоёр болгон таһалдаг, жадаар хадхан аладаг бэлэй. Тэдэнэр хониной гү, али ямаанай арһаар бээе орёогоод, дуталдан, хашуулан мүрдүүлэн, гомдохуулан тэнэдэг байгаа.

³⁸Бүхы газар дэлхэйн хүнүүд тэдэнэй хаананьшые хүрэхэгүй! Гэхэдэ тэдэнэр сүл губяар болон хада уулаар тэнэжэ ябаа, агы нүхэнүүдтэ болон жалгануудта амидаржа байгаа.

³⁹Этигэл хүзэгөөрөө тэдэнэр булта Бурханай һайшаалда хүртэһэншые һаа, Бурханай найдуулһан юумэндэ хүртөөгүй юм.

⁴⁰Ушарынь юун бэ гэхэдэ, Бурхан бидэндэ үлүү һайн юумэ түлэблөөд байна. Бидэнтэйл хамта тэдэниие эрхим түгэс болгохонь Бурханай зорилго мүн.

Еврейнүүдтэ 12

Эзэн Бурхан манай Эсэгэ мүн

¹Маниие тойроод үүлэндэл мэтэ олон гэршэнэр байна. Тиимэхээ бидэ замдамнай һаатуулжа байһан бүхы юумэнүүдһээ, тиихэдэ бидэниие амарханаар хүлижэрхидэг нүгэлһөө сүлөөлэгдэжэ, урдамнай байһан, бидэндэ заяагдаһан замаар ябаял.

²Һүзэг этигэлэймнай эхи татаһан, тэрэнииемнай түгэс түгэлдэр болгоһон Иисусые шэртэжэ байял. Ерээдүйдэ үзэгдэхэ баярай түлөө тэрэ өөрыгөө гутаалгахаяа айнгүй, хэрээһэндэ хадуулжа үхөөд, Бурханай баруун талада һуугаа.

³Нүгэлтэнүүдэй зүгһөө тэрэ аргагүй ехэ зэбүүрхэл үзэжэ, хэды ехэ зоболон дабажа гарааб гэжэ бодожо үзыт. Тиимэхээ таанад урмаа бү хухарагты.



⁴Нүгэлтэй эсэргүүсэн тэмсэжэ байхадаа, таанад үшөө үхэтэрөө тулалдаагүй ха юмта.

⁵Бурханай таанадые, өөһэдынгөө хүбүүдые, урмашуулан иигэжэ хэлэһые таанад мартаа аалта? «Хүбүүмни, Эзэн Бурханай шамда юумэ захижа байхадань, анхаралаа хандуулаарай, шамайе шүүмжэлэн элирүүлхэдэнь, урмаа хухарангүй байгаарай».

⁶Ушарынь гэхэдэ, Эзэн Бурхан өөртэнь хайратай баһан хүнөөл хэһээдэг, өөрынгөө хүбүүн гэжэ тоолоһон хүнөөл сохидог юм.

⁷Журамтай болохын тула хэһээхэдэнь тэсэбэритэй байгты, Бурхан таанадые өөрынгөө хүбүүд гэжэ тоолоно ха юм. Эсэгынгээ хэһээлтэдэ ороогүй ямар нэгэн хүбүүн олдохо аал?

⁸Бүхы үхибүүдтэнь лэ адли хэһээгдээгүй юм һаа, таанад бодото хүбүүдынь бэшэт, тиимэһээ энэ ушарта Бурхан танай хуулита эсэгэ бэшэ гээшэ.

⁹Газар дэлхэйдэхи эсэгэнэрэйнгээ маанадые хэһээхэдэ бидэ тэдэниие хүндэлдэг һэмди. Тиимэһээ бидэ тэнгэрийн Эсэгынгээ мэдэлдэнь бүрин байха ёһотой бэшэ аалди.

¹⁰Газар дэлхэйдэхи эсэгэнэрнай маанадые газар дэлхэйдэхи ажамидаралаймнай түлөө өөһэдынгөө дураар хэһээдэг байгаа, харин Бурхан бидэнэй аша туһада, арюун нангин юумэндээ хүртөөхын тула бидэниие хэһээнэ гээшэ.

¹¹Хэһээлгэжэ байха үедөө бидэ баярладаггүй, харин уйдадаг зантайбди. Тиин һүүлдэнь тэрэ хэһээлтэ ухаантай болоһон хүнүүдтэ үнэн сэдхэлтэнэй амидаралай амгалан үрэ дүн асардаг юм.

Захяа ба нэргылэмжэнүүд

¹²Эсэһэн гарнуудаа дээшэнь һарбайгты, һуларһан үбдэгүүдээ бэхижүүлэгты.

¹³Дохолон хүлтнай гэмтэнгүй, бүри эдэгэжэ байхын тулада таанад сэхэ замаар ябажа байгты.



14Хүн бүхэнтэй эбтэй эетэй байхые, арюун амидаралтай нуухые оролдожо байг, тиигээгүй хүнүүд Эзэн Бурхание харахагүй.

15Хэн нэгэнэй Бурханай үршөөл хайраһаа хаһагдан үлэшэхгүйень ойлгожо байгты. Хэн нэгэнэй хорото ургамалдал адли гэм хүргэжэ, олон хүнүүдые бузарлажа байхагүйень обёоржо байгты.

16Ууган хүбүүнэй эрхые нэгэ бариха хоолоор худалдажархидаг забхай, тиихэдэ Бурханһаа холодоһон Исавтай адли хүн таанадай дунда бү байг.

17Тэрэ эсэгынгээ буян хэшэгтэ хүртэхэ хүсэлэнтэй байһаншые һаа, нулимсаа гарган алдуугаа заһаха гэжэ оролдоһоншые һаа, хэнэн алдуугаа заһажа шадаагүй, тиимһээл эсэгэнь тэрэниие угтажа абаагүй гэжэ таанад мэдэнэт.

18Израилиин ардтал адли аһажа байһан галтай Синай хадада, харанхыда, боро хараанда, шуурганда,

19бүрээгэй дуугархада, дуунуудай шууяандашые таанад ерээгүйт. Хүнүүд тэрэ дуу дуулахадаа ондоо нэгэшые үгэ хэлэнгүй байхыень гуйжа байгаа,

20ушарынь ямар бэ гэхэдэ, «Ан амитаншые энэ хадын хаяае гэшхэбэл үхэтэрөө шулуудуулха» гэжэ хэлэхэдэнь, тэдэ хүнүүд тэсэхэ аргагүй байгаа.

21Энэ үзэгдэлэй ехэл хүртэй байһан хадань Моисейшые: «Би айн хүрдэжэ, һалаганажа байнаб», – гэжэ хэлээ бэлэй.

22Таанад Синай хадада, амиды Бурханай хотодо, тэнгэриин Иерусалимда, үй түмэн Бурханай Эльгээмэлнүүдэй баярай суглаанда ерээт.

23Нэрэнүүдынь тэнгэридэ бэшэгдэһэн Бурханай эгээн түрүүшын хүзэглэгшэдэй бүлгэмэй гэшүүдынь болон таанад ерээт. Таанад бүхы

хүнүүдэй Зарга шүүгшэ болохо Бурханда, эрхим түгэс болоһон үнэн сэдхэлтэнүүдэй хүлдэнүүдтэнь ерээт.

²⁴Таанад Авелиин сасаһан шуһанда ороходоо бүри һайн юумэнүүдые үгэхөөр найдуулан Шэнэ Хэлсээ баталһан Иисусай сасагдаһан шуһанда ерээт.

²⁵Дээдын Эзэнэй хэлэхэдэнь, шагнахагүйбди гэжэ бү арсаарайгты. Тэрэнэй газар дэлхэй дээрэ хэлэхэдэнь, шагнангүй өөрыень буруушааһан хүнүүд хэһээлтэһээ мултараагүй юм. Харин тэнгэриһээ хэлэхэдэнь арсабал, хэһээлтэһээ бүришые мултархагүйбди.

²⁶Урдань тэрэнэй абьяан газар дэлхэйе хүдэлгөө, харин мүнөө тэрэ: «Үшөө дахин би ганса газарые бэшэ, огторгой тэнгэриие хэлбэлзүүлхэб», – гэжэ үгөө үгэһэн байна.

²⁷Тэрэ хэлэһэниинь зохёон бүтээгдэһэн юумэнүүд сооһоо хубилгаха аргагүй юумэнүүдын үлэжэ, харин хубилгагдаха юумэнүүдын хүнэн хосорхо гэһые тайлбарилна.

²⁸Хубилгаха аргагүй хаан ороние эзэлээд, бидэ баяр баясхалангаар дүүрэн байял. Бурханда хүндэтэйгөөр хандан, хүгэдэн, тэрээндэ һайшаагдажа баймаар алба хэжэ байял.

²⁹Ушарынь гэхэдэ, манай Бурхан үнэхөөрөө хүнөөдэг гал дүлэн гээшэ.

Еврейнүүдтэ 13

Бурханда яжа һайшаагдахаб

¹Христосой хүзэглэгшэдтэл бэе бээдээ хайратай байгты.

²Аяншадые гэртээ угтан оруулхаяа бү мартагты. Тиигэжэ зарим хүнүүд өөһэдөөшые мэдэнгүй Бурханай Эльгээмэлнүүдые гэртээ айлшалууһан байна.

³Түрмэдэ һууһан хүнүүд тухай тэдэнтэй суг хаагдаһан мэтэл һанажа байгты. Зобожо байһан хүнүүдтэй адли зоболсон, тэдэндэ һанаагаа табижа байгты.

⁴Гэр бүлэ бүхы талаһаа үнэн сэхэ байг, үбгэн һамган хоёр бэе бээдээ шударга байг. Бурхан забхай ба ташаяаралдадаг зоние гэмнэхэ юм.

⁵Алта мүнгэндэ шунангүй, бии юумээрээ сэдхэл дүүрэн байгты. Ушарынь гэхэдэ, «Би шамайе хэээшье орхихогүйб, би шамайе хэээшье хаяхагүйб», – гэжэ Бурхан хэлээ.

⁶Тиимэхээ: «Бурхан минии туһалагша гээшэ, би айхагүйб. Хүн намда юу хэжэ шадахаб?» – гэжэ бидэ зоригтойгоор хэлэхэбди.

⁷Таанадта Бурханай үгэ хэлэдэг байһан хүтэлэгшэдөө һанагты. Тэдэнэй яажа амидаржа, яажа наһа бараһыень хараад, этигэл һүзэгыень һажаажа ябагты.

⁸Тэрэ этигэл һүзэгынь болохо Иисус Христос үсэгэлдэр, мүнөөдэршье, хэтын хэтэдэ хубилхагүй юм.

⁹Тиимэхээ элдэб янзын һургаалнуудһаа зайсан, үнэн зүб замаар ябагты. Эдэе хоол тухай гуримуудые сахихые бү оролдогты, тэдэ гуримууд хүнүүдтэ ямаршье аша туһагүй байгаа, харин Бурханай хайра үршөөлөөр сэдхэл зүрхэнтнай бэхижэбэл һайн гээшэ.

¹⁰Майханда алба хэжэ байһан санаартад үргэлэй шэрээ дээрэхээ манай үргэһэн юумэнһээ абажа эдихэ эрхэгүй юм.

¹¹Ушарынь юун бэ гэхэдэ, аһамад санаарта амитадай шуһые нүгэлнүүдэй түлөө үргэхээе Хамагай Нангин газарта абажа ородог, тиихэдэнь амитадай бэенүүдые отогһоо гаргаад шатаадаг юм.

¹²Тиимэхээ Иисусшье арад зоноо шуһаараа арюудхахын тула хотоһоо гаргуулжа үхэхэн байгаа.

¹³Бидэшье тэрэниие угтан хотоһоо гаража, доромжолуулгыень хубаалсаял.

¹⁴Бидэ газар дэлхэй дээрэ хододоо оршодог хотогүйбди, бидэ ерээдүйн хото бэдэржэ байнабди.

¹⁵Тиимэһээ Иисусаар дамжуулан магтаалай үргэл Бурханда хододоо асаржа байял, тэрэниие Дээдын Эзэн гэжэ зүбшөөн үрээлээрээ үргэл асаржа байял.

¹⁶Һайниие хэжэ, бэе бээдээ туһалхые бү мартагты. Эдэ болбол Бурханда һайшаагадаг үргэл гээшэ.

¹⁷Өөһэдынгөө хүтэлэгшэдэй мэдэлдэ байгты, захиралтануудыень дүүргэжэ байгты. Тэдэнэр һүүлдэнь алба хэһэн тухайгаа Бурханай урда тоосоо хэхэ ёһотой юм хадаа танай зүрхэ сэдхэлдэ үргэлжэ һанаагаа табидаг юм. Хэрбээ таанадай хүтэлэгшэдэйнгөө үгөөр байбалтнай, тэдэнэр баяртайгаар ажалаа хэхэ, үгы болбол, тэдэнэр гунигтайгаар үүргээ дүүргэжэ байха, тиимэ ажал хэрэгынь таанадта ашаг туһагүй юм.

¹⁸Үргэлжэ зүб юумые хэхэ гэжэ оролдон, арюун сэдхэлтэй байнабди гэжэ бидэ өөһэд тухайгаа найданабди. Тиимэһээ бидэнэй түлөө зальбаржал байгты.

¹⁹Илангаяа, таанадта түргэн бусажа ошохымни түлөө бүри һайса зальбархыетнай гуйнаб.

Түгэсхэлэй зальбаралга

²⁰⁻²¹Өөрынгөө шуһанай сэнгээр мүнхын хэлсээ оложо абаһан хонидой агууехэ Адуулагшые, Манай Дээдын Эзэн Иисусые Бурхан амидыруулаа юм. Энхэ тайбанай эрхэ хүсэлыень таанадай бээлүүлхын тула Бурхан таанадые хэрэгтэй һайн һайхан юумээр хангаг лэ, тиин өөртэнь һайшаагадаг юумые Иисус Христосоор дамжуулан таанад соо бүтээг лэ. Христосто хэтын хэтэдэ алдар соло! Болтогой!

Түгэсхэлэй үгэнүүд

²²Аха дүүнэрни, энэ урмашуулха зорилготой хандалга би тобшохоноор бэшээб, тиимэһээ тэсэбэритэйгээр шагнажа хайрлыт даа.

²³Манай дүү Тимофей түрмэһөө гараа гэжэ мэдэжэ байгты. Хэрбээ тэрэнэй һаяар хүрэжэ ерээбэлнь, би тэрээнтэй хамта таанадаа эрьехэб.



²⁴Өөһэдынгөө бүлгэмүүдэй хүтэлэгшэдтэ болон Бурханай хүнүүдтэ бултандань бидэнһээ мэндые дамжуулаарайгты. Италийн хүзэглэгшэд таанадта баһал мэндые дамжуулжа байна.

²⁵Та бүхэнтэй Бурханай үршөөл хайра байхань болтогой.



Гэршэлгэ

Гэршэлгэ 1

Энэ ном соо юун тухай хэлэгдэнэб

¹Һаяар юун болохоёо байнаб гэжэ бүгэдыень зарасанартаа харуулхын тула Иисус Христосой гэршэлгы Бурхан тэрээндэ даалгаа һэн. Христос Өөрынгөө зараса Иоаннда Бурханай Эльгээмэлые ябуулжа, энээн тухай соносхоһон юм.

²Иоанн хараһан үзэһэнөө бултыень үнэн зүб гэжэ баталба. Энэнь Бурханай үгэ, Иисус Христосой гэршэлгэ мүн.

³Энэ ном дотор бэшээтэй Бурханай хэлэһэн үгэнүүдые уншадаг, шагнадаг ба сахидаг хүнүүд жаргалтай юм, юуб гэхэдэ, саг ойртошоод байна.

Һүзэглэгшэдэй бүлгэмүүдые мэндэшэлгэ

⁴Аси можын һүзэглэгшэдэй долоон бүлгэмүүдтэ би Иоанн ханданаб. Бурхан бии юм, байһаншье, байхашье юм. Бурханһаа, тэрэнэй хаан шэрээгэй урдахи долоон һүлдэнүүдһээ,

⁵мүн үнэн бодото Гэршэ байһан, үхөөд, анха түрүүн амидырһан, газар дэлхэйн хаашуулай Эзэн бологшо Иисус Христосхоо таанадта амгалан байдал, буян хайра үршөөгдэнэ. Иисус Христос манда дуратай, тиимэһээ өөрынгөө шуһа адхажа, бидэниие нүгэлһөөмнай сүлөөлөө.

⁶Иисус Христос бидэниие хаан түрэ дотор нэгэдүүлээд, Эсэгэ Бурхандаа алба хэдэг санаартаниинь болгоо. Иисус Христосто хэтэ мүнхын алдар соло, эршэ хүсэн байхань болтогой!

⁷Хаража байгты: үүлэн соогуур тэрэ ерэхэ. Бүхы хүнүүд, мүн жадаар хадхаашадшье тэрээниие хараха. Газар дэлхэйн бүхы арадууд тэрээниие шаналан хайрлаха. Үнэхөөрөө тиихэ юм. Болтогой!

⁸«Би хадаа Альфа, Омега гээшэб! – гэжэ Эзэн Бурхан хэлэнэ». Тэрэ хододоо байгаа, байнашье, байхашье, Хамагы зонхилогшо гээшэ.

Амидырхан Иисусые Иоанн хараба

⁹Би Иисусай шаби, Иоанн ахатнай гээшэб. Бурханай хаан түрын эрхэтэн мүн туладаа би таанартал адляр зобожо тулижа, тэсэжэ байнаб. Бурханай үгэ номнононойнгоо, Иисусые гэршэлхэнэйнгээ түлөө би Патмос гэжэ олтирогто сүлэгдөө һэм.

¹⁰Дээдын Эзэнэй үдэр би Нангин һулдын нүлөөдэ абтабаб – ара тээмни бүдүүн дуутай бүрээ шэнги юумэнэй хүнхинэтэр дуугархые дуулабаб.

¹¹Тэрэ абяан намда иигэжэ хэлэбэ: хаража байһан юумээ ном соо бэшээд, Эфесэй, Смирнын, Пергамай, Тиатирай, Сардисай, Филадельфин, Лаодикийн хүзэглэгшэдэй бүлгэмүүдтэ эльгээлши.

¹²Намтай хэн хөөрэлдэнэб гэжэ һонирхон гэдэргээ эрьехэдээ, алтан долоон дэнгүүдые харабаб.

¹³Долоон дэнгүүдэй дундань хүнтэй адлирхуу амитанай зогсохые харааб. Тэрэ болбол уужам ута хубсаһатай, сээжээрээ боохон алтан бэхэтэй һэн.

¹⁴Тэрэнэй үһэниинь сагаанаар будаһан ноһондли, саһан шэнги саб сагаан, нюдэниинь дүлэтэн носожо байһан гал шэнги байгаа бэлэй.

¹⁵Хүлнүүдын шатама халуун пэшэндэ халаажа улайлгаһан зэд шэнги, хоолой гээшэнь хүүюур уһан мэтэ хүнхинэжэ байгаа һэн.

¹⁶Тэрэ хүн баруун гартаа долоон одонуудые баряад байгаа, тиин хоёр тээшээ хурса эритэй элдэ аманһаань бултайжа байгаа, шарайнь шатама шанга гэрэлтэй наран шэнги байһан юм.

¹⁷Тэрэниие харамсаараа, би үхэхэн шэнгээр хүлэйн хажууда унашабаб. Тиихэдэмни тэрэ хүн баруун гараа мүрэ дээрэмни табяад, намда иигэжэ хэлэбэ: бү ай; би хадаа Түрүүшынхинь, һүүлшынхинь гээшэб,

¹⁸би амидыб; үхөөд байһанаа мүнөө хэтэ мүнхэдөө амиды ябахаб; үхэлэй ба үхэлэй ороной түлхюурнүүдын намда бии юм.

¹⁹Ши юу хараабши, мүнөө ямар юумэн боложо байнаб, хожом юун болохоб – энээн тухай ши бэшээрэй.

²⁰Минии гартаа баряад байхые шинии хараһан долоон одонуудай, алтан долоон дэнгүүдэй нюусань иимэ: долоон одонууд хүзэглэгшэдэй долоон бүлгэмүүдэй Бурханай Эльгээмэлнүүд мүн, шинии хараһан долоон дэнгүүд хүзэглэгшэдэй долоон бүлгэмүүд мүн гээшэ.

Гэршэлгэ 2

Эфесэй хүзэглэгшэдэй бүлгэмдэ хандалга

¹Эфесэй хүзэглэгшэдэй бүлгэмэй түлөөлэгшэдэ иигэжэ бэшээрэй: «Баруун гартаа долоон одонуудые баряад, алтан долоон дэнгүүдэй дундуур ябагша иигэжэ хэлэнэ:

²танай бүтээһэн үйлэ хэрэгы, танай хэһэн ажалые, танай тэсэбэриие би мэдэнэб. Хара һанаатанда таанад тон дурагүйт гэжэ мэдэнэб, Иисусай элшэд бэшэ аад, элшэнэрынъ гээшэбди гээд өөһэдыгөө тоологшодые шалгажа үзөөд, тэдэнэр хадаа худалшад мэхэшэд мүн гэжэ таанадай элирүүлһыетнай би мэдэнэб;

³таанад ехэ бэрхэшээлнүүдые гаталаат, тэсэбэритэй байнат, минии нэрэ хүндын түлөө эсэшэ сусашагүйгөөр ажаллаат гэжэ мэдэнэб.

⁴Теэд анха түрүүшынхидээл адляар намда дурагүй болоһондотнай таанадые зэмэлнэб.

⁵Хаанаһаа бууһанаа һанажа, нүгэл хэхээ болиит, анханайнгаа хэрэгүүдые бүтээгьт. Нүгэл хэхээ болёогүй һаатнай таанадта ерээд, танай дэнгы абаад ябашахаб.

⁶Зүгөөр, николаидуудай үйлэ хэрэгүүдтэ дураа гутан зэбүүрхэдэгтнай һайн гээшэ. Бишье тэдэндэ дураа гутагшаб.

⁷хүзэглэгшэдэй бүлгэмүүдтэ Нангин һүлдэн хэлэһэниие шэхэтэй юм һаа, шагнаг лэ! Бурханай сэсэрлигтэ ургадаг мүнхэ амидаралай модоной жэмэсые амталха эрхэ илаашада үгэхэб».

Смирнын хүзэглэгшэдэй бүлгэмдэ хандалга



⁸Смирнын хүзэглэгшэдэй бүлгэмэй түлөөлэгшэдэ иигэжэ бэшээрэй: «Үхөөд байhanaa амидырhаниинь, Түрүүшынхи, һүүлшынхинь гээшэб:

⁹танай зоболон гашуудалые, үгытэй ядуу байһыетнай мэдэнэб, – үнэндөө хадаа таанад баянта! Мүн еврейнүүд бэшэ аад, еврейнүүдбди гэгшэдэй таанадые хардаашадые би мэдэнэб, юундэб гэбэл, тэдэнэр Сатанагай мэдэл доросуглархан улад гээшэ.

¹⁰Зобохо тулихаяа байнабди гэжэ бү айгаарайт. Таанарые туршажа үзэхээ заримыетнай Шолмос түрмэдэ хааха, арбаад хоног соо тамалуулхат. Теэд үхэн үхэтэрөө үнэн сэхэ байгаарайт, би танда мүнхын амидарал үршөөхэб!

¹¹Һүзэглэгшэдэй бүлгэмүүдтэ Нангин һүлдэн хэлэһэниие шэхэтэй юм хаа, шагнаг лэ! Илаашые хоёрдохийо хүнөөхэгүй».

Пергамай хүзэглэгшэдэй бүлгэмдэ хандалга

¹²Пергамай хүзэглэгшэдэй бүлгэмэй түлөөлэгшэдэ бэшээрэй: «Хоёр тээһээ хурса эритэй һэлмэтэ иигэжэ хэлэнэ:

¹³таанад сатанагай хаан шэрээгэй газарта байдагта гэжэ би мэдэнэб. Зүгөөр таанад намда үнэн сэхээр хандадагта, сатанагай байдаг газартатнай минии үнэн сэхэ гэршэ Антипын алуулхан үдэрнүүдтэшые намһаа таанад арсаагүйт.

¹⁴Теэд таанадые зэмэлхэ зарим юумэн намда бии: Валаамай һургаалые баримталагша хүнүүд таанарай дунда байдаг. Валаам хадаа Израилиин зоние нүгэл шэбэлдэ оруулха, хуурмаг бурхануудта үргэһэн эдеэнһээ амсуулха, зальхай һамуу ябадалтай болгохо тухай Валак хааниие һургаа һэн.

¹⁵Мүн баһа николаидуудай һургаалые баримталагшадшые таанадай дунда бии.

¹⁶Нүгэл хэхээ болигты! Тиигээгүй хаатнай, удангүй таанадта ерээд, аманһаамни гарагша эритэ һэлмээр николаидуудай һургаал баримталагшадтай тэмсэхэб.

¹⁷Һүзэглэгшэдэй бүлгэмүүдтэ Нангин Һүлдын хэлэһэниие шэхэтэй юм хаа, шагнаг лэ! Илагшада би далда хадагалаатай манна эдеэ үгэхэб, сагаан шулуу үгэхэб. Шулуун дээрэнь шэнэ нэрэ бэшээтэй байха, тиин шулуу абагшаһаа ондоо хэншье тэрэ нэрые мэдэхэгүй юм».

Тиатирай Һүзэглэгшэдэй бүлгэмдэ хандалга

¹⁸Тиатирай Һүзэглэгшэдэй бүлгэмэй түлөөлэгшэдэ бэшээрэй: «Носожо байһан гал дүлэн шэнги ялалзама нюдэтэй, халуун пезшэн соо халаажа улайлганан зэд шэнги хүлнүүдтэй Бурханай Хүбүүн иигэжэ хэлэнэ:

¹⁹танай бүтээһэн хэрэгы, танай дуратай байһые, алба хэһые, этигэл найдабарие, тэсэбэри зоригые мэдэнэб, мүнөө бүтээгшэ үйлэ хэрэгтнай урдынхиһаа бүри ехэ юм гэжэ мэдэнэб.

²⁰Теэд таанадые зэмэлхэ зарим юмэн намда бии: өөрыгөө лүндэншэ гээд тоолодог Иезавель һамгые таанад зүбшөөнэт; тэрэ һамган өөрынгөө һургаал заабарие номножо, минии зарасанарай тархи толгой эрьюулнэ, тэдэниием зальхай һамуу ябадалтай болгоно, худал бурхануудта үргэһэн хоол эдьюулжэ һургана.

²¹Нүгэл шэбэл үйлэдэхэе болихынь тула тэрэ эхэнэртэ саг гаргажа үгөөб, теэд нүгэл шэбэлээ тэрэ орхихо дурагүй байна.

²²Тиимэһээ би тэрэ һамганда үбшэн зоболон асаруулхаб, хэрбээ нүгэл үйлэдэхэе болёогүй һаань, тэрэ эмэтэй гүйлдэгшэдые туйлай ехэ уйдхар гашуудалда оруулхаб.

²³Тэрэ гэргэнэй үхибүүдые үхүүлхэб. Тиихэдэмни хүнэй зүрхэ сэдхэлые, һанал бодолые сүм мэдэдэг юм байна, тиин хүн бүхэндэ хэһэн үйлэ хэрэгэйн зэргээр хүртөөхэ юм байна гэжэ намайе Һүзэглэгшэдэй бүхы бүлгэмүүд ойлгохо.

²⁴Тиатирда байгша бусад бүхы таанадта, энэ һургаал заабарие баримталдаггүй ба сатанагай гүн нюуса гэдэгыень мэдэдэггүйшүүлдэ иигэжэ хэлэнэб: үшөө ондоо бэрхэшээлнүүдые таанадта эльгээхэгүйб.



²⁵Тeэд мүнөө таанадта бии байһан юумeэ минии ерэтэр баряад байгты.

²⁶⁻²⁸Минии бүхы зарлигыe эсэстэнь хүрэтэр бэелүүлдэг илагшын эрхэ мэдэлдэнь арадуудыe үгэхэб. Бишье баһал тиигэжэ өөрынгөө Эсэгэһээ засаг түрые абаа һэм. Илагша тэрэ хүн тэдэ арадуудыe түмэр таягаараа захиргаалан зонхилжо байха; тэдэ зон шабар амһартануудтал адляар хяа бута сохюулха. Тэрэ илагшада үглөөнэй одыe үгэхэб.

²⁹Һүзэглэгшэдэй бүлгэмүүдтэ Нангин Һүлдын хэлээшыe шэхэтэй юм һаа, шагнаг лэ!»

Гэршэлгэ 3

Сардисай хүзэглэгшэдэй бүлгэмдэ хандалга

¹Сардисай хүзэглэгшэдэй бүлгэмэй түлөөлэгшэдэ иигэжэ бэшээрэй: «Бурханай Нангин долоон Һүлдын, мүн долоон одонуудай Эзэн иигэжэ хэлэнэ: танай бүтээһэн үйлэ хэрэгыe мэдэнэб; таанад амиды гэжэ тоологдонот, үнэхөөрөө таанад үхөөд байнат.

²Һэргэлэн байгты; үлөөшэ юумeэ хуу барандаа хосороодүйдэнь бэхижүүлэгты, юуб гэбэл, үйлэ хэрэгүүдтнай Бурханаймни урда хүсэд дүүргэгдээгүй гэжэ би һананаб.

³Таанад юу абаа, юу дуулаа һэмта, тэрэнээ сахин хадагалжа байгты, нүгэл хэхээе болигты! Хэрбээ һэргэлэн байгаагүй һаатнай, би таанадта хулгайшан шэнгеэр гэнтэ ерэхэб, хэдыдэ ерһыемни таанад мэдэхэгүйт.

⁴Тeэд өөһэдынгөө хубсаһа бузарлаагүй хэдэн хүнүүд Сардистатнай бии байна, тэдэтнай сагаан хубсаһа үмдөөд, намтай хамта ябалсаха, юундэб гэбэл, этигэл найдабариде тэдэ хүрэнэ.

⁵Илагша баһал сагаан хубсаһа үмдэхэ; тэрэнэй нэрыe амидаралай номһоо би хэзээшыe зуража хаяхагүйб, тэрэ хүн минии юм гэжэ өөрынгөө Эсэгын урда, Бурханай Эльгээмэлнүүдэй урда мэдэрхэб.

⁶Һүзэглэгшэдэй бүлгэмүүдтэ Нангин Һүлдын хэлэһэниие шэхэтэй юм хаа, шагнаг лэ!»

Филадельфин Һүзэглэгшэдэй бүлгэмдэ хандалга

⁷Филадельфин Һүзэглэгшэдэй бүлгэмэй түлөөлэгшэдэ бэшээрэй: «Нээгээ хаа, хэнэйшые хаажа шадахагүй, хаагаа хаа, хэнэйшые нээжэ шадахагүй Давидай оньһон түлхюуртэй Нангин Үнэн сэдхэлтэн иигэжэ хэлэнэ:

⁸танай бүтээһэн үйлэ хэрэгые мэдэнэб, – тиин би урда тээхи үүдыетнай нээбэб, тэрэниие хэншые хаажа шадахагүй, юундэб гэхэдэ, таанад хүсэ багатайшые хаа, минии һургаал сахинат, минии һургаалһаа арсаагүйт.

⁹Хаража байгаарайт! Өөһэдыгөө еврейнүүд гэжэ тоолодог аад, сатанагай мэдэлдэ байһан уладые танда асараад, хүлдэтнай унан дохихыень баадхахаб. Үнэхөөрөө тэдэнэр еврейнүүд бэшэ юм, худалаар хэлэнэ. Мүн танда дуратай байһыемни тэдэ улад мэдэхэ.

¹⁰Тэсэбэритэй байха тухай минии зарлиг заабариие сахиһан туладатнай, газар дэлхэйнхидые туршажа үзэхээ бүхы юртэмсэдэ тохёолдохоёо байгаа гай аюулай үедэ би таанадые хамгаалан үлөөхэб.

¹¹Иигээд удангүй ерэхэб. Илалтынтнай аша үрые хэнэйшые абажа ябашахагүйн тула бии байһан юумээ шангаар баряад байгаарайт.

¹²Илагшые би өөрынгөө Бурханай Һүмэ доторхи бахана тулгань болгохоб, тиин тэрэ илагша хэтэ заяандаа тэндэ үлэхэ. Өөрынгөө Бурханай нэрые, минии Бурханай үршөөлөөр тэнгэриһээ бууха өөрынгөө Бурханай хотын, шэнэ Иерусалимай нэрые, мүн өөрынгөө шэнэ нэрые тэрэ Һүмын бахана дээрэ бэшэхэб.

¹³Һүзэглэгшэдэй бүлгэмүүдтэ Нангин Һүлдын хэлэһэниие шэхэтэй юм хаа, шагнаг лэ».

Лаодикийн Һүзэглэгшэдэй бүлгэмүүдтэ хандалга



¹⁴Лаодикийн хүзэглэгшэдэй бүлгэмэй түлөөлэгшэдэ иигэжэ бэшээрэй: «Болтогой гэжэ нэрэтэй үнэн бодото найдабаритай Гэршэ, Бурханай бүтээлэй Эхиниинь иигэжэ хэлэнэ:

¹⁵танай бүтээһэн үйлэ хэрэгыг мэдэнэб. Таанад хүйтэншыг бэшэт, халууншыг бэшэт. Ай даа, таанадай нэгэн гэбэл хүйтэн, али үгы хаа халуун байгаа хаатнай ямар хайн бэлэй даа!

¹⁶Теэд таанад хүйтэншыг бэшэ, халууншыг бэшэ, харин юрэл миин дулаан байнат. Би таанадыг аман сооһоо нөлбоһо гаргаһандал адляар, өөрһөө холуур намнахамни.

¹⁷Юундэб гэхэдэ, таанад: «Би баяжааб, ехэ зөөритэй болооб, юугээршыг дутанагүйб!» – гэнэт. Теэд таанад ямаршыг зол хубигүй, үгытэй ядуу, баарһан, хохор балай, нүсэгэн болоод байһанаа мэдэнэгүйт!

¹⁸Баян болохын тула галаар арюудхагдаһан алта намһаа худалдажа абахыетнай зүблэнэб, шарбай нүсэгэн бээг харуулжа ябахагүйн тула сагаан хубсаһа намһаа абажа үмдэгты, юумэ харадаг болохын тула нүдэнэй эм абажа, нүдэндөө түрхигты.

¹⁹Дуратай хүнүүдэ би элишэлэн шүүмжэлдэг, хэһээдэгби. Тиимэһээ таанад хэшээл оролдолго гаргагты, нүгэл хэхээг болигты.

²⁰Энэ би үүдэнэй хажууда ерээд, үүдэ тоншожо байнаб. Минии абяа дуулаад, үүдэ нээһэн хүнэйдэ би орожо, хамта эдеэлхэб, тэрэ хүн намтай суг эдеэлхэ.

²¹Би илажа гараад, өөрынгөө Эсэгэтэй хамта хаан шэрээдэнь һуугаа һэм, тэрээндэл адляар, намтай хамта минии хаан шэрээдэ һууха эрхыг би илагшада олгохоб.

²²Һүзэглэгшэдэй бүлгэмүүдтэ Нангин Һүлдын иигэжэ хэлэһэниг шэхэтэй юм хаа, шагнаг лэ!»

Гэршэлгэ 4

Тэнгэри дээрэхи Бурханда хүгэдэлгэ



¹Тэрэнэй удаа би тэнгэри өөдэ шэртэхэдээ, тэнгэрийн үүдэнэй онгорхой байхые обёорбоб. Тиин бүрээгэй дуугарһандал адли абяа дуулабаб. Түрүүн хандаһан абяан намда иигэжэ хэлэбэ: – Өөдөө гара. Тиигээд юунэй болохые шамда хөөрэхэб.

²Удангүй би Нангин һүлдэн нүлөөдэ абтажа, өөдөө дэгдэшэбэб. Тиин тэнгэридэ хаан шэрээ урдани байба, дээрэн хэншьеб һуужа һууба.

³Хаан шэрээ дээрэ тэрэ һуугаашань үнэтэ хас шулуун, мана шулуун шэнгээр толоржо байба. Хаан шэрээнэ тойроод, номин шулуун мэтээр һолонго ялалзан татажа байба.

⁴Энэ хаан шэрээ тойроод, баһа хорин дүрбэн хаан шэрээнүүд байгаа. Тэдэ хаан шэрээнүүд дээрэ хорин дүрбэн ахамадууд һуугаа. Эдэ ахамадууд сагаан сагаан хубсаһа үмдэнхэй, толгойдонь алтан алтан титим малгайнууд табяатай.

⁵Хаан шэрээһэнэ сахилгаан сахилжа, тэнгэрийн дуун нэрьежэ, шанга шууяан гаража байба. Хаан шэрээгэй урда долоон зула носоно. Эдэнэ Бурханай долоон Нангин һүлдэ мүн бэлэй.

⁶Баһа хаан шэрээгэй урда болор мэтэ сэбэр тунгалаг шэл далай шэнги юумэн байба. Хаан шэрээгэй дүрбэн буланда дүрбэн амитад байба. Тэдэ амитад урдаһаашье, хойноһоошье тон олон нюдэтэй хэн.

⁷Түрүүшынэ амитан арсалантай адлишуу, хоёрдохинэ залуу буха шэнги, гурбадахинэ нюураараа хүн мэтэ, харин дүрбэдэхинэ ниидэжэ байһан бүргэд шэнги бэлэй.

⁸Эдэ дүрбэн амитад тус бүридөө зургаа зургаан далитай хэн. Далинуудайнэ дээгүүршье, доогууршье олон нюдэнүүд байгаа. Тэдэ дүрбэн амитад эсэн сусангүй, үдэр хүнигүй иигэжэ ходо дабтагша хэн: – Хамагые зонхилогшо арюун нангин, арюун нангин, арюун нангин Эзэн Бурхан түрүүншье байгаа, мүнөөшье байна, саашадаашье байхал!



⁹Хаан шэрээ дээрэ һуугаашада – хэтэ мүнхэдөө Амидарагшада алдар соло, нэрэ түрэ, баяр баясхалангаа тэдэ амитадай хүргэхэдэнь,

¹⁰хорин дүрбэн ахамадууд хаан шэрээ дээрэ һуугаашын урда тээ газарта нюураараа сохин унаха, хэтэ мүнхэ Амидарагшын урда доро дохин мүргэхэ, тиин хаан шэрээгэйнэ урда титим малгайнуудаа табяад, иигэжэ хэлэхэ:

¹¹– Манай Эзэн Бурхан, ши али бүхы алдар солодо, нэрэ хүндэдэ, засаг түрэдэ хүртэмөөр байнаш, яахадааб гэбэл, бүхы юумэн шамаар бүтээгдээ, шинии хүсэл зоригоор байгуулагдаа.

Гэршэлгэ 5

Ном бэшэг, Үргэлэй Хурьган тухай

¹Тиигээд долоон тамгаар тамгалан хаагаатай, дотор, гадаргүй бэшээтэй номые хаан шэрээдэ һуугаашын баруун гартань би харабаб.

²Бурханай түгэлдэр хүсэтэ эльгээмэлые харабаб. – Хэн тамгыень эбдэжэ, энэ ном нээжэ шадахаб? – гэжэ Бурханай тэрэ эльгээмэл шангаар дуугарба.

³Теэд тэнгэридэшье, газар дээрэшье, газар дорошье энэ номые нээжэ, хаража шадаха хэншье байбагүй.

⁴Энэ номые зүйтэйгөөр нээгээд, уншажа шадаха, угайдхадаа үзэжэ хаража шадаха нэгэшье хүнэй олдоогүйдэнь би ехээр гашуудан уйлаа бэлэйб.

⁵– Бү уйла! Харалши! Илашань Иудын угай, Давидай үри хадаһан болохо Арсалан тээ тэрэ байна. Долоон тамгыень эбдэжэ, энэ номые тэрэл нээжэ шадаха, – гэжэ нэгэ ахаманынь намда хэлэбэ.

⁶Харан гэхэдэмни хаан шэрээгэй урда дүрбэн амитадай, мүн ахамадуудай урда тахил болгогдон табигдаһан янзатай Үргэлэй Хурьган зогсожо байба. Тэрэ Хурьган долоон эбэртэй, долоон нюдэтэй

hэн. Эдэнь бүхы газар дэлхэйдэ Бурханай эльгээhэн Нангин долоон хүлдэнь байгаа.

⁷Үргэлэй Хурьган хаан шэрээдэ дүтэлэн ерэжэ, тэндэ һуугаашын баруун гарһаань ном абаба.

⁸Номые тэрэнэй абахадань, дүрбэн амирад, хорин дүрбэн ахаматууд Үргэлэй Хурьганай урда хүгэдэн, доро дохибо. Тэдэнэр тус бүридөө нэгэ нэгэ ятагануудые, хүжэ санзай дүүрэтэр хэhэн алтан аягануудые гартаа баряад байгаа. Эдэ бүгэдэнь Бурханай зоной бүтээдэг мүргэл зальбаралынь мүн бэлэй.

⁹Тиин тэдэнэр иимэ шэнэ дуу дуулаба: ши энэ ном абажа, тамгыень эбдэжэ тайлаха эрхэтэйш, ши үргэл болгогдожо алуулаад, өөрынгөө улаан шуһанай сэнгээр али бүхы угсаатаниие, элдэб янзын хэлэтэй зониие, бүхы уг изагууртаниие, үндэhэ яһатаниие Бурханда абажа үгөөш.

¹⁰Ши манай Бурханай аша туһада тэдэ хүнүүдые санаартад, хаашуул болгоош – тэдэнэр газар дэлхэйн зониие зонхилжо байха!

¹¹Хаан шэрээе, амирадые, ахаматуудые тойроод, Бурханай олон эльгээмэлнүүдэй дуугаржа байхые би харааб, шагнааб. Тэдэнэр үй түмэн, тоо томшогүй олон байгаа бэлэй.

¹²Тэдэ шанга шангаар иигэжэ хашхаралдан байгаа hэн: Тахил болгогдожо табигдаһан Үргэлэй Хурьган засаг түрэ, зөөри баялиг, сэсэн бодол, хүсэ шадал, нэрэ түрэ, алдар соло, магтаал юрөөлдэ хүртэхэ эрхэтэй.

¹³Тэнгэри, газар дээрэ, газар доро, далайда байһан бүхы амирадай иигэжэ хэлсэхые би дуулааб: – Хаан шэрээ дээрэ һуугаашада, мүн Үргэлэй Хурьганда хэтэ мүнхын магтаал юрөөл, нэрэ хүндэ, алдар соло, хуули засаг олгогдохонь болтогой!

¹⁴Дүрбэн амираданынь: – Болтогой! гэбэд. Ахаматуудынь газарта дохин унажа, хүгэдэн мүргэбэ.

Гэршэлгэ 6

Түрүүшын зургаан тамга тайлбарилба

¹Долоон тамгын түрүүшынхиенъ Үргэлэй Хурьганай эбдэхые би харааб, тиигээд: «Наашаа ерэ!» – гэжэ түрүүшын амитанайнь тэнгэри дуугарһандал адляар хүнхинэмэ шангаар хэлэхые би дуулааб.

²Би сагаан мори харааб. Гартаа ном бариһан хүн тэрэ мори унаад ябаба. Толгойдоо үмдэхэ титим малгай абаһан тэрэ хүн илагша мэтээр гаража, илалта туйлахаяа ябаба.

³Хоёрдохи тамгыенъ Үргэлэй Хурьганай тайлахада: «Наашаа ерэ!» – гэжэ хоёрдохи амитанайнь хэлэхые би дуулааб.

⁴Тиихэдэнь ондоо, гал улаан зээрдэ морин гараба. Мори унаһан тэрэ хүндэ газар дайда дээрэхи амгалан тайбан байдалые эбдэжэ, дэлхэйн зоной бэе бэеэ алалсалгын эрхэ засаг олгогдоһон байгаа. Тиин тэрээндэ томо гэгшын һэлмэ үгтөө бэлэй.

⁵Гурбадахи тамгыенъ Үргэлэй Хурьганай тайлахада: «Наашаа ерэ!» – гэжэ гурбадахи амитанайнь хэлэхые би дуулааб. Харан гэхэдэмни, хара мори унаһан хүн гартаа шэгнүүр баринхай байба.

⁶Тиигээд дүрбэн амитанай зүгһөө иимэ абяанай гарахые дуулааб: «Нэгэ килограмм шэниисын түлөө бүхэли үдэр ажаллаха, гурбан килограмм ешмээнэй түлөө бүхэли үдэр ажаллаха! Теэд оливай модо үзэмэй модо хоёрые бү гутаа!»

⁷Дүрбэдэхи тамгыенъ Үргэлэй Хурьганай тайлахада: «Наашаа ерэ!» – гэжэ дүрбэдэхи амитанайнь хэлэхые би дуулааб.

⁸Харан гэхэдэмни, сунхигар сагаабтар морин байба. Дээрэнь Үхэл һууба, тэрэниие дахаад, Үхэлэй орон ябаба. Газар дэлхэйдэ һуугаашадай дүрбэнэй нэгэ хубиие һэлмэ жадаар, үлэсхэлэн хоһон байдалаар, үбшэн тахалаар, ан арьяатанаар алуулха хюдуулха эрхэ засаг Үхэлдэ, Үхэлэй орондо олгогдоһон байна.



⁹Табадахи тамгыень Үргэлэй Хурьганай тайлахадань, Бурханай Үгын түлөө, гэршэ болоһонойнгоо түлөө алуулагшадай хүнэхэ хүлдэнүүдые тахилай шэрээ доро харабаб.

¹⁰«Нангин гэгээн, хамагые зонхилогшо үнэн бодото Эзэн Бурхан аа! Газар дэлхэй дээрэ бидэниие алаашадые гэмнэнгүй, хэһээнгүй хэды болотор хүлээхэ гээ юмши!» – гэжэ тэдэ алуулагшад шанга шангаар хашхаралдаба.

¹¹Тэдэнэй хүн бүхэндэнь сагаан хубсаһа үгтэбэ. Тэдэ алуулагшадта: «Христосто алба хэһэн тусгаар тооной аха дүүнэрэйтнай алуултар таанар үшөө нэгэ бага амаржа байгты. Тэдэтнай таанартал адляар алуулха», – гэжэ хэлэгдэбэ.

¹²Зургаадахи тамгыень Үргэлэй Хурьганай тайлахадань, харан гэхэдэмни, газар ехээр хүдэлбэ; наран гээшэ үхэхэн хүнүүдэй хойноһоо шаналан уйлаашадай хара хубсаһандал адли баларташоод, һара гээшэ шуһан улаан болошоод байба.

¹³Аргагүй шанга хуй һалхинай болоходо боди модоной эдеэшээдүй үрэ жэмэсүүдэй хиидэн унадагтал адляар, огторгойн одо мүшэд газарта унашаба.

¹⁴Огторгой тэнгэри гээшэ орёһон саарһан мэтээр монсогойршобо, бүхы хада ууланууд, арал олтирогууд өөһэдынгөө һууринуудһаа хүдэлшэбэ.

¹⁵Газар дэлхэйн хаашуулшье, дээгүүр тушаалтай дарганаршье, сэрэгэй ноёдшье, баяшуулшье, засаг баригшадшье, барлаг богоолнуудшье, юрын хүнүүдшье агы нүхэнүүдтэ, хада уулын хабшалда орожо хоргодобо.

¹⁶Тэдэ хүнүүд хада, хабсагайнуудта хандан, иигэжэ гуйба: – Дээрэмнай унажа, хаан шэрээдэ һуугшаһаа, Үргэлэй Хурьганай уур сухалһаа абарыт!

¹⁷Юундэб гэбэл, эдэ хоёрой айхабтар ехэ уур сухалай үдэр хүрэжэ ерэбэ, тиин тэрэ ехэ уур сухалыень хэн тэсэжэ шадахаб?

Гэршэлгэ 7

¹Тэрэнэй һүүлээр газар дэлхэйн дүрбэн буланда Бурханай дүрбэн эльгээмэлнүүдэй зогсожо байхые харабаб. Тэдэ эльгээмэлнүүд газар дайда руу, уһан далай руу, ой модо руу һалхилхагүйн тула дэлхэйн дүрбэн һалхиие халхалан барижа байгаа.

²Гартаа амиды Бурханай тамга баряад, зүүн зүгһөө ерэжэ ябаһан баһа нэгэ Бурханай Эльгээмэлые харабаб. Тэрэ эльгээмэлынь газар дайдада, уһан далайда гэм хоро хүргэхэ эрхэтэй дүрбэн эльгээмэлнүүдтэ хандан, иигэжэ шангаар хашхарба:

³«Бурханай бүхы албатанай магнай духадань тамга даража тэмдэглээдүйдэмнай газар дайдадашые, уһан далайдашые, ой модондошые гэм хоро бү хэгты».

⁴Хэды хүн духадаа тамга табюулааб гэжэ хэлсэхые дуулааб. Израилиин бүхы угсаата зоной зуун дүшэн дүрбэн мянган хүниинь тамга даруулһан байна:

⁵Иудын угсаатанһаа арбан хоёр мянган хүн, Рувимай угсаатанһаа баһал арбан хоёр мянга, Гадай угсаатанһаа арбан хоёр мянга,

⁶Асирай угсаатанһаа арбан хоёр мянган хүн, Неффалимай угсаатанһаа арбан хоёр мянга, Манассиин угсаатанһаа арбан хоёр мянга,

⁷Симеоной угсаатанһаа арбан хоёр мянга, Левиин угсаатанһаа арбан хоёр мянган хүн, Иссахарай угсаатанһаа арбан хоёр мянга,

⁸Забулоной угсаатанһаа арбан хоёр мянга, Иосифой угсаатанһаа арбан хоёр мянга, Вениаминай угсаатанһаа арбан хоёр мянган хүн духадаа тамга даруулһан байна.

Тоолошогүй олон хүнүүд



⁹Тэрэнэй удаа харахадамни, тооложо барагдашагүй олон зон урдамни үзэгдэбэ. Тэдэ зоной дунда бүхы үндэһэ яһатан, арадууд, угсаатан, янза бүриин хэлэтэй хүнүүд ерээд байгаа һэн. Тэдэ зон хаан шэрээгэй урда, Үргэлэй Хурьганай урда зогсожо байгаа. Тэдэнэр сагаан хубсаһа үмдэнхэй, гартаа пальма модоной мүшэрнүүдые баринхай байһан юм.

¹⁰Тэдэ иигэжэ хашхаралдан байгаа бэлэй: «Хаан шэрээдэ һуугааша манай Бурхан, мүн Үргэлэй Хурьган абарха байна».

¹¹Хаан шэрээе, ахамадуудые, дүрбэн амигадые тойроод, Бурханай бүхы эльгээмэлнүүд зогсожо байба. Тэдэнэр хаан шэрээгэй урда уруугаа хаража бултадаа унаад, Бурханда мүргэбэд.

¹²Тиихэ зуураа, тэдэ иигэжэ хэлээ: «Болтогой! Манай Бурханда магтаал соло, сэсэн бодол, баяр баясхалан, нэрэ хүндэ, эрхэ засаг, хүсэ шадал хэтын хэтэдэ үршөөгдөө! Болтогой!»

¹³Тиигээд нэгэ ахаманынь: «Сагаан хубсаһа үмдөөд байһан ямар хүнүүд гээшэб? Тэдэ хаанаһаа ерээб?» – гэжэ намһаа һураа.

¹⁴«Ноён аа, ши мэдэнэш», – гэжэ харюусааб. Тиихэдэмни намда тэрэ иигэжэ хэлэбэ: «Эдэ хүнүүд гайтай ехэ гасалан зоболон үзэжэ ерэгшэд мүн. Эдэнэр хубсаһа хунараа Үргэлэй Хурьганай шуһанда угаажа, сагаан болгобо.

¹⁵Тиимэхээ эдэ хүнүүд Бурханай хаан шэрээгэй урда зогсоод, тэрэнэй хүмэ дотор үдэр хүнигүй тэрээндэ алба хэнэ. Тиин хаан шэрээдэ һуугааша эдэ хүнүүдые хамгаалха юм.

¹⁶Тэдэ хүнүүд саашадаа үлэн хооһоор ябахагүй, ундаа хүрэжэ зобохогүй, ааяма шанга наранда шаруулхагүй, бүгшэм халуунһаа боложо ядархагүй.

¹⁷Юундэб гэхэдэ, хаан шэрээгэй урда зогсожо байгааша Үргэлэй Хурьган тэдэ хүнүүдэй адуулагша эзэниинь боложо, мүнхэдөө

амидаралай уһанда тэдэниие залан абаашаха. Тиин эдэ хүнүүдэй нюдэнэй нулимсые Бурхан өөрөө аршаха».

Гэршэлгэ 8

Долоодохи тамгыень тайлаба

¹Долоодохи тамгыень Үргэлэй Хурьганай тайлахадань, хахад сагай туршада огторгой тэнгэридэ абяа шэмээгүй болошобо.

²Тиигээд Бурханай урда долоон эльгээмэлнүүдэйн зогсожо байхые харабаб. Тэдэ эльгээмэлнүүдтэ долоон бүрэнүүд үгтэһэн байба.

³Удаань Бурханай баһа нэгэ эльгээмэл дүтэлэн ерээд, үргэлэй шэрээгэй хажууда зогсобо. Тэрэ эльгээмэл гартаа алтан бойпуур баряад байгаа. Бурханай бүхы хүнүүдэй мүргэлтэй нэгэдүүлхын тула, хаан шэрээгэй урдахи тахилай алтан шэрээ дээрэ табяад утахынь тула обоо собоо хүжэ санзай Бурханай тэрэ эльгээмэлдэ үгтөө һэн.

⁴Хүжэ санзайн утааниинь Бурханай хүнүүдэй мүргэлтэй хамта Бурханай Эльгээмэлэй гартаа баряад байһан бойпуур сооһоо өөдөө дэгдээ бэлэй.

⁵Удаань тэрэ эльгээмэлынь бойпуур абажа, үргэлэй шэрээһээ залаһан галаар бойпуураа дүүргээд, газарта хаяжархиба. Тиихэдэнь газар дэлхэйдэ огторгойһоо дуун нэрьебэ, тэнгэри нижаганаса дуугарба, ехээр сахилгаан сахилба, газар хүдэлбэ.

Бүрэнүүдые дуугаргаба

⁶Долоон бүрэнүүдые баряад байһан Бурханай долоон эльгээмэлнүүд бүрээгээ дуугаргахаяа бэлдэбэд.

⁷Түрүүшын эльгээмэлэй бүрээгээ дуугаргахадань, шуһатай холисолдоһон мүндэр оробо, гал дүлэн гараба, тиихэдэнь газар дэлхэйн гурбанай нэгэ хубинь, ой модоной гурбанай нэгэ хубинь, бүхы үбһэ ногоон шаташаба.

⁸Бурханай хоёрдохи эльгээмэлэй бүрээгээ дуугаргахадань, дүрэжэ байһан мантан томо хада шэнги юумэн далайда унашаба. Тиихэдэнь далайн гурбанай нэгэ хубинь шуһан болошобо.

⁹Далайда байһан амиды бүхы юумэнүүдэй гурбанай нэгэ хубинь үхэшэбэ, далайн бүхы онгосонуудай гурбанай нэгэ хубинь хосоршобо.

¹⁰Гурбадахи эльгээмэлэй бүрээгээ дуугаргахадань, дүлэн шэнгээр носожо байһан угаа томо одо мүшэн огторгойһоо ерэжэ гол мүрэнүүдэй, уһа горхонуудай гурбанай нэгэ хуби дээрэ унашаба.

¹¹Тэрэ одо мүшэн Тобшо Үрмэдэһэн гэжэ нэрэтэй һэн. Уһа мүрэнэй гурбанай нэгэ хубинь үрмэдэһэндэл адли гашуун боложо, иимэ уһа уугаад, хүн түрэлхитэнэй гурбанай нэгэ хубинь үхөө бэлэй.

¹²Дүрбэдэхи эльгээмэлэй бүрээгээ дуугаргахадань, наран, һара, одо мүшэд гэмтэжэ, гурбанай нэгэ хуби саг соо тэдэнэр гэрэл туяа үгэхээ болёод байба. Наран үдэрэй гурбанай нэгэ хуби саг соо гэрэл туяа үгэхээ болёод, һара ба одо мүшэд һүниин гурбанай нэгэ хуби саг соо гэрэл туяа үгэхээ болёод байба.

¹³Зогсоод хаража байтарни, огторгойдо нэгэ бүргэд ниидэн, иигэжэ шангаар дуугаржа байба: «Газар дэлхэйдэ һуугшадта гайтай ехэ уйдхар гашуудал тохёолдохонь, юуб гэбэл, Бурханай бусад гурбан эльгээмэлнүүд бүрээгээ дуугаргахаяа байна».

Гэршэлгэ 9

¹Табадахи эльгээмэлэй бүрээгээ дуугаргахадань, огторгой дээрэһээ одо мүшэнэй газарта унаад байхые обёорон харабаб. Газарай оёоргүй гүнзэгы нүхэ руу орохо түлхюур тэрэ одо мүшэндэ үгтэһэн байгаа.

²Газарай тэрэ оёоргүй гүнзэгы нүхэнэй үүдые одо мүшэнэй нээхэдэнь, тэндэһэнь аргагүй томо пеэшэн сооһоо гараһан шэнги бөөн хара утаан дэгдэн гараба. Тэрэ утаанһаань боложо, огторгой тэнгэри, нараншые бүрүүл харанхы болошобо.



³Хара утаан сооһоо таршаанууд бии боложо, газарта унаба. Тэрэ таршаануудта газар дэлхэйн хорото абаахайнуудтал адли ехэ эрхэ засаг үгтэһэн байгаа.

⁴Теэд үбһэ ногоондошые, ургамал, модонуудташые хоро хүргэхэгүйт, харин духадаа Бурханай тамгагүйл хүнүүдтэ хоро хүргэхэт гэжэ тэдэ таршаануудта хэлэгдэһэн байгаа.

⁵Мүн тиимэ хүнүүдые алахагүйт, харин таба һара соо миил үбэдхөөжэ зобоохот гэжэ тэдэ таршаануудта захигдаһан байна. Тэрэ үбшэниинь хүниие хорото абаахайн хадхаһандал адли ехэ үбшэнтэй байгаа.

⁶Тиихэ үедэнь хүнүүд зобоходоо үхэлөө бэдэрхэ, теэд үхэлынь олдохогүй, үхэхэ гэжэ ехэ оролдохо, теэд үхэлынь тэдэндэ ерэхгүй.

⁷Тэдэ таршаанууд хараха янзада дайралдахаяа байһан морид шэнги һэн. Таршаануудай толгойнуудтань алтан титим малгайнуудтал адлишуу юмэн үмдөөтэй, тэдэнэй нюур шарайнуудынь хүнэйхидэл адлинууд һэн.

⁸Таршаануудай толгойнуудай үһэниинь эхэнэр хүнэй үһэндэл адли, шүдэнүүд гээшэнь арсаланай һоёонуудтал адлирхуу бэлэй.

⁹Тэдэ таршаанууд дээгүүрээ түмэр шэнги хуягтай һэн, тэдэнэй ниидэхэдэ далинуудайнь хииганаан гээшэ олон тоото мори тэргээр дайн байлдаанда наяргалдан түергэлдэн орожо байһандал үзэгдөө бэлэй.

¹⁰Тэдэ таршаануудай һүүлнүүдынь хорото абаахайнуудайхидал адли һэн, таршаануудай һүүлнүүдтэнь хадхуурнууд бии һэн; таршаанууд тэдэ хадхуурнуудаараа таба һарын туршада хүнүүдые хадхажэ зобоохо эрхэ засагтай байгаа.

¹¹Тэдэ таршаануудай хааниинь оёоргүй гүнзэгы нүхэнэй эльгээмэл байһан юм; тэрэ эльгээмэлынь еврей хэлээр Аваддон, грек хэлээр Аполлион (оршуулбал: «Эбдэгшэ») бэлэй.

¹²Нэгэ аюул зоболонгой үнгэрхэдэ, хойноһоонь баһа хоёр ехэ гашуудал зоболон ерэхэ ёһотой байгаа.

¹³Зургаадахи эльгээмэлэй бүрээгээ дуугаргахадань, Бурханай урдахи тахилай алтан шэрээгэй дүрбэн булангай эбэрнүүдһээ абяа дуулааб.

¹⁴Томо бүрээ барихан зургаадахи эльгээмэлдэ тэрэ абяан иигэжэ хэлэбэ: «Агууехэ Евфрат мүрэнэй шадар хүлээтэй Бурханай дүрбэн эльгээмэлнүүдые таби».

¹⁵Тиихэдэнь хүн зоной гурбанай нэгэ хубиие алаха хюдаха эгээл тэрэ саг, үдэрөө, һара, жэлээ хүлээжэ, бэлэн болоод байһан тэдэ дүрбэн эльгээмэлнүүд табигдаа бэлэй.

¹⁶Хамта дээрээ тэндэнь хоёр зуун сая морин сэрэгшэд байна гэлсэхые дуулааб.

¹⁷Эдэ моринуудай, унаад ябаһан хүнүүдэйн иимэ байхые харааб: сэрэгшэдын гал улаан, миндаргадад адли сэнхир, хүхэртэл адли шара хуягуудые үмдөөд байгаа. Моридойнь тархи толгой арсаланайхидал адли һэн. Моридой аман сооһоо гал, утаан, хүхэр гаража байгаа.

¹⁸Үхэлэй аюулта гал, утаан, хүхэр гурбан зүйлнүүд моридой аманһаа гараад, хүн зоной гурбанай нэгэ хубиие алаа хюдаа һэн.

¹⁹Юундэб гэбэл, моридойнь хүсэ шадал тэдэнэй амандань, һүүлнүүдтэнь байгаа. Тэдэнэй һүүлнүүдын тархи толгойнуудтай могойнуудай түхэлтэй һэн, тиимэ һүүлнүүдээрээ хүн зоние хорложо аладаг бэлэй.

²⁰Иимэ ехэ аюул зоболондо орожо үхөөгүй үлэхэн хүнүүд өөһэдынгөө нүгэлтэ хара хэрэгүүдые үйлэдэжэл байгаа. Тэдэнэр алта, мүнгөөр, гуули зэдээр, шулуу модоор хэгдэхэн худал хуурмаг шүтөөнүүдтэ, ада шүдхэрнүүдтэ урдынхидаал адляар хүгэдэн мүргэһөөр байгаа. Харин тиихэдэ тэдэ хуурмаг шүтөөнүүдын юумэ үзэжэ харажашье, дуулажа шагнажашье, ябажа хүдэлжэшье шадахагүй юм.



²¹Бусад үлэһэн тэдэ зон хүнүүдые аладаг хюдадаг, эльбэ шэди үйлэдэдэг, забхай зальхай ябадал гаргадаг, хулгай худал хэдэг ябадалаа орхёогүй байһаар.

Гэршэлгэ 10

Гартаа багахан ном бариһан эльгээмэл

¹Удаань үүлэ нэмэрһэн бата хүсэтэй ондоо нэгэ эльгээмэлэй тэнгэриһээ буужа ябахые харабаб. Толгой дээгүүрнь һолонго татанхай, нюур шарайнь наран шэнги, хоёр хүлынь гал баханануудтал адли һэн.

²Дэлгээтэй багахан ном тэрэнэй гарта байба. Тиигээд баруун хүлөө далай дээрэ, зүүн хүлөө газар дээрэ табиба.

³Тиигээд Бурханай Эльгээмэл арсаланай хэрхирһэндэл шангаар хашхарба. Тиихэдэнь долоон аянганууд өөһэдынгөө абяагаар дуугаралдаба.

⁴Тиигэжэ дуугаралдахадань, юумэ бэшэхээ бэлдээд байгаа, теэд: «Долоон аянгануудай хэлээшые бү бэшэ, нюугаад бай», – гэжэ тэнгэри дээрэһээ хэлэхые дуулабаб.

⁵Далай дээрэ, газар дээрэ байхыень минии хараһан Бурханай Эльгээмэл баруун гараа огторгой өөдэ үргэбэ.

⁶Огторгой тэнгэриие, газар дэлхэе, уһан далае, тэндэхи бүхы юумэнүүдые заяаһан хэтэ мүнхэдөө Амидаран мандагшын алдар нэрээр Бурханай тэрэ эльгээмэл иигэжэ тангариглан хэлэбэ: «Саашадаа удааруулагдахагүй.

⁷Теэд Бурханай долоодохи эльгээмэлэй бүрээгээ дуугаргахадань, Бурханай нюуса түсэб бүрин бэлүүлэгдэхэ. Бурхан энэ түсэб тухай өөрынгөө зарасанар-лүндэншэдтэ урид мэдээсэһэн байгаа».

⁸Удаань тэнгэриһээ дуулдаһан абяан дахин намда хандажа: «Далай газар хоёрой дээрэ зогсожо байһан эльгээмэлһээ дэлгээтэй ном ошожо аба», – гэбэ.



⁹Би тэрэ эльгээмэлдэ ошожо, дэлгээтэй номыень эрибэб. Тэрэ намда иигэжэ хэлэбэ: «Энэ ном абаад эдижэрхи. Хото гэдэһэндэшни гашуун байха, теэд аман соошни зүгын бал шэнги амтатай байха».

¹⁰Бурханай Эльгээмэлэй гарһаа номыень абаад эдижэрхибэб. Аман доторни ороходоо, зүгын бал шэнги амтатай байһанаа, харин тэрэ номоо эдихэдэмни, хото гэдэһэн соомни ехэ гашуун байгаа бэлэй.

¹¹Тиигээд Бурханай Эльгээмэл намда иигэжэ айладхан хэлэһэн юм: «Ши олон ондоо арадууд, үндэһэ яһатан, элдэб янзын хэлэтэй зон, хаашуул тухай урид мэдэжэ, дахин саашадаа абарал буулгадаг болохош».

Гэршэлгэ 11

Хоёр гэршэнэр

¹Газар хэмжэдэг модон шэнги таяг намда үгөөд, иигэжэ хэлэбэд: «Ши өөдөө бодоод, хүмэ, тахилай шэрээ хоёрые хэмжэ, тиигээд энэ хүмэ дотор хэр олон хүнүүд Бурханда мүргэнэб гэжэ тооло.

²Теэд хүмын гадаада хорёое бү тоололсо, бү хэмжэ, юуб гэбэл, тэрэ хорёонь бусад арадуудай мэдэлдэ үгтэнхэй юм. Тэдэ хүнүүд нангин хотые дүшэн хоёр харын туршада хүлөөрөө гэшхэжэ дэбһэжэ ябаха.

³Би хоёр гэршэнэрээ эльгээхэб: тэдэмни уйдхар гашуудалай хубсаһа үмдөөд, мянга хоёр зуун жаран үдэр соо Бурханай үгэ айладхажа ябаха».

⁴Эдэ лүндэншэд газарай Эзэнэй урдахи хоёр дэн, хоёр олива модон мүн гээшэ.

⁵Эдэ хоёр лүндэншэдые хорлохоёо һанаа һаань, тэдэ хоёрой аманһаа гал дүлэн гаража, дайсадыень үгы хэжэрхидэг байна. Эдэ хоёрто хоро хэхээе һанагшад үхэн хосорхо үйлэтэй юм.

⁶Тэдэ хоёрой Бурханай үгэ айладхажа байха бүхы үдэрнүүдтэнь хура бороогой орохогүйн тула тэдэндэ огторгой тэнгэриие хаажархиха эрхэ



засаг үгтэхэ; уһа мүрэнүүдые шуһан болгожорхихо, газар дэлхэйдэ өөһэдынгөө дура зоргоор гай аюул тохёолдуулха эрхэ засаг үгтэхэ.

⁷Тэдэ хоёр лүндэншэдэй гэршэлгээ хэжэ дүүргэхэдэнь, оёоргүй нүхэн сооһоо ан арьяатан гаража ерээд, тэдэ хоёртой дайралдан, алаха хюдаха байна.

⁸Тэдэнэй үхэнэн бэень Содом гү, али Египедтэл адли муу суутай хотонуудай нэгэ тон ехэ хотын гудамжада хэбтэхэ. Тэрэ хотодо мүн тэдэнэй Дээдын Эзэн хэрээһэндэ хадагдажа саазалуулаа һэн.

⁹Али бүхы арадууд, угсаатан, элдэб янзын хэлэтэй зон, бүхы үндэһэ яһатан тэдэ хоёрой үхэнэн бэеые гурба хахад үдэрэй туршада һонишоон хаража байгаа, хүдөөлүүлхыень зүбшөөнгүй байлгаа һэн.

¹⁰Газар дэлхэйдэ һуудаг хүнүүд хүхилдэн баясажа, найр зугаа хэнэ, бэе бээдээ бэлэг сэлэгүүдые барина, юундэб гэбэл, эдэ хоёр лүндэншэд газар дэлхэй дээрэ һуугшадые тамалан хэһээдэг байгаа.

¹¹Тээд гурба хахад үдэрэй үнгэрхэдэ тэдэ хоёрой досоонь амидарал үгэдэг Бурханай хүлдэ орожо, мүнөөхи хоёрын хүл дээрээ бодошобо, тиихэдэнь тэндэ хаража байһан хүнүүд айхын ехээр айжа мэгдээ бэлэй.

¹²«Наашаа дэгдэгты!» гэжэ тэнгэри дээрэһээ шангаар дуугарха абьяан лүндэншэдтэ дуулдаба. Тиин дайсадаингаа хараһаар байтарынь, лүндэншэд үүлэнэй дээгүүр тэнгэри өөдэ дэгдэшэбэ.

¹³Тэрэ үедэнь газар ехээр хүдэлжэ, хотын арбанай нэгэ хубинь һандарба. Долоон мянган хүн газарай хүдэлөөнһөө боложо үхэбэ, бэшэниинь айжа мэгдээд, Тэнгэрийн Бурхание алдаршуулан магтаба.

¹⁴Хоёрдохи гай аюул үнгэрбэ. Тиигээд гурбадахи гай аюул дүтэлшэбэ!

Долоодохи бүрээ

¹⁵Долоодохи эльгээмэл бүрээгээ дуугаргаба. Тиихэдэнь тэнгэридэ иигэжэ шангаар дуугарха абьяанууд дуулдаба: – Дэлхэйн засаг түрэ Эзэн Бурханаймнай, тэрэнэй Табисууртын засаг түрэ болоо. Тэрэ засаг түрые Бурхан хэтэ мүнхэдөө барижа байха.



¹⁶Бурханай урдахи хаан шэрээ дээрэ һууһан хорин дүрбэн ахамадууд Бурханай урда нюураараа уруугаа хаража газарта унаад, һүгэдэн мүргэбэ.

¹⁷Тэдэ иигэжэ хэлэбэ: – Хододоо байһан, мүнөөшье байгаа Хамагые зонхилогшо Бурхан, шамда баяр баясхалан хүргэнэбди, ушарынь гэбэл, ши агууехэ һүр хүсээе харуулжа, Хаан болобош.

¹⁸Бусад арадууд уур сухалаа хүрэбэ, баһа шишые уур сухалаа хүрэбэш – үхэхэн хүнүүдые шүүбэрилхэ сагшни, шинии зарасанар-лүндэншэдтэ, шинии арюун нангин арадта, шинии алдар нэрые хүндэлдэг юрыншые, засаг барыдагыше хүнүүдтэ шагнал хайра үршөөхэ сагшни, газар дайда усадхан хосороогшодые үгы хэхэ сагшни хүрэжэ ерэбэ.

¹⁹Тэнгэри дээрэхи һүмэ тайлдан нээгдэжэ, тэрэнэй Хэлсээнэй абдарынь һүмэ дотор харагдаба. Тиин гал ехэ сахилгаан сахилба, оог шууяан болобо, тэнгэрийн дуун нэрьебэ, газар хүдэлбэ, мүндэр ехээр оробо.

Гэршэлгэ 12

Эхэнэр луу хоёр тухай

¹Тиин тэнгэри дээрэ гайхамшаг дүлгэ тэмдэг үзэгдэбэ: нараар хубсаһа хэжэ үмдэхэн эхэнэр; тэрэнэй хүл доронь һара, толгойдонь – арбан хоёр одо мүшэтэй титим малгай.

²Хүл хүндэ байһан тэрэ эхэнэр түрэхын урдахана тохёолдодог үбшэнһөө зобожо хашхарна.

³Тэнгэридэ баһа ондоо нэгэ дүлгэ тэмдэг бии болобо: долоон толгойтой, арбан эбэртэй, толгойнууд дээрэ долоон титимтэй томо гэгшын улаан луу харагдаба.

⁴Тэрэнь одо мүшэдэй гурбанай нэгэ хубиие һүүлээрэе хамаад, тэнгэриһээ газарта хаяба. Үхибүүнэй түрэмсөөр залгижархихаяа бэлдээд, нарайлха эхэнэрэй урда луу зогсожо байба.

⁵Нарайлха эхэнэр хүбүү түрэбэ. Тэрэнь бүхы арадуудые түмэр таягаараа ударидан зонхилжо байха юм. Тэрэ хүбүүниинь Бурханда, Бурханай хаан шэрээдэ дэгдүүлэн абаашагдаба.

⁶Харин эхэнэр сүл губи руу тэрелжэ ошобо. Тэндэ эхэнэрэй байха байрые Бурхан түхээрээ хэн. Мянга хоёр зуун жаран үдэрэй турша соо тэрэ байрадань эхэнэрые харууһалжа байха юм.

⁷Харин тэнгэри дээрэ дайн сэрэг боложо байгаа: Михаил өөрынгөө эльгээмэлнүүдтэй суг луугай урдаһаа тэмсэн дайралдаа хэн. Луу өөрынгөө эльгээмэлнүүдтэй хамта дайралдаа.

⁸Теэд луу эльгээмэлнүүдтэйгээ диилдэжэ, тэнгэридэ байха һуури байраяа алдаа хэн.

⁹Юртэмсэ дэлхэйн бүхы зониие мэхэлжэ хууража байһан шолмос, сатана гэжэ нэрэтэй ехэ үнинэй Могой бологшо луу тэнгэриһээ газарта шэдүүлхэн, тэрээнтэйгээ хамта эльгээмэлнүүдыньшые шэдүүлхэн юм.

¹⁰Тэнгэри дээрэһээ шангаар хэлэхэн иимэ үгэнүүдые би дуулаа хэм: – Одоошые Бурханай хүнүүдэй абарагдаха саг ерэбэ. Одоошые манай Бурхан засаг түрые абаад, хаан болохо. Тиин Бурханай Табисуурта бүхы дэлхэие ударидан зонхилжо байха. Юуб гэбэл, бидэнэй аха дүүнэрые Бурханаймнай урда үдэр һүнигүй гэмнэгшэ газар руу шэдүүлэн унаба.

¹¹Манай аха дүүнэр Үргэлэй Хурьганай шуһаар, мүн гэршэлхэн үгөөрөө тэрэ гэмнэгшые илаа. Аха дүүнэрнай ами наһаа гамнаагүй, үхэлһөө айгаагүй.

¹²Огторгой тэнгэри, тэндэ байгшад бултадаа баясан хүхигты! Газар дэлхэйнхидтэ, уһан далайнхидта гашуудал зоболон болохонь! Айхабтар ехэ уур сухалтай шолмос танда бууба: хаһа сагынь бага үлөө гэжэ тэрэ шолмос ойлгоо.

¹³Луу газарта шэдүүлхэнээ мэдээд, хүбүү түрэхэн эхэнэрые хойноһоонь мүшхэн намнаба.



¹⁴Болзоото сүл губи газартаа лууда баригдангүй ниидэжэ ошохынь тула тэрэ эхэнэртэ бүргэд шубуунай аргагүй томо хоёр дали үгтэбэ. Гурба хахад жэл соо тэрэ эхэнэрые харууһалжа байха юм.

¹⁵Далай ехэ уһанда абтажа тэрэ эхэнэрэй урдашахынь тула тэрэнэй хойноһоонь луу хадаа гол мүрэн шэнги ехэ уһа аман сооһоо гаргажархиба.

¹⁶Төөд эхэнэртэ газар тухалаа: луугай гаргаһан уһа мүрэниие газар амаа ангайлгаад уужархиба.

¹⁷Тиихэдэнь луу тэрэ эхэнэртэ ехээр сухалдан хэрүүлхэжэ, эхэнэрэй бусад үхибүүдтэй дайралдахаяа ошобо. Тэдэ үхибүүдын Бурханай захяа заабариие дүүргэжэ, Иисусай үнэн зүб хургаалые үнэн сэхээр сахидаг һэн.

¹⁸Тэрэ луу далайн эрьедэ зогсожо байгаа.

Гэршэлгэ 13

Хоёр арьяатан

¹Далай сооһоо арбан эбэртэй, долоон толгойтой арьяатанай гаража ябахые харааб. Эбэрнүүд дээрэнь арбан титим табяатай, толгой дээрэнь Бурханиие доромжолһон нэрэнүүд бэшээтэй байба.

²Минии хараһан арьяатан болбол эрбэдэй түхэлтэй, хүлнүүдын баабгайнхитай адлишуу, аманиинь арсаланайхи шэнги байгаа бэлэй. Тэрэ арьяатанда луу өрынгөө хаба шадал, хаан шэрээ, тон ехэ түрэ засаг үгэбэ.

³Арьяатанай нэгэ толгойнь үхэлэй ехээр шархатаһан байбашье, эдэгэжэ, газар дэлхэйн хүнүүд бултадаа гайхалдан, тэрэ арьяатанай хойноһоо дахаба.

⁴Тэдэ хүнүүд арьяатанда засаг үгэһэн луугай урда хүгэдэн мүргөөд, мүн арьяатанда хүгэдэн мүргэхэ зуураа, иигэжэ хэлэбэ: «Энэ

арьяатантай тэнсэхэ амитад олдохо аал? Энээнтэй дайралдажа шадаха хүн амитан байха аал?»

⁵Өөрыгөө магтаха, Бурханиие доромжолхо эрхэ засаг тэрэ арьяатанда үгтэһэн байна. Дүшэн хоёр нара соо тиимэ юумэ хэжэ байха эрхэ тэрээндэ олгогдоһон юм.

⁶Бурханиие муушалхаяа, тэрэнэй алдар нэрые, майхан байрые, тэнгэридэ һуугшадые муушалхаяа тэрэ арьяатан амаа ангайлгаба.

⁷Бурханай табисуурта арад зоной урдаһаа тэмсэжэ, тэрэ зониие илаха эрхэ засаг тус арьяатанда үгтэнхэй. Алишье угсаатаниие, арадуудые, элдэб янзын хэлэтэй зониие, бүхы яһатан үндэһэтэниие захиран зонхилжо байха эрхэ засаг тэрэ арьяатанда үгтэнхэй.

⁸Үргэлэй Хурьганай тэмдэглэдэг амидаралай ном соо нэрэнүүдэйн бэшэгдээгүй бүхы газар дайдын зон тэрэ арьяатанда хүгэдэн мүргэхэ. Үргэлэй Хурьган тахил болгогдон Бурханда үргэгдэхэ юм гэжэ газар дэлхэйн бүтээгдэхэһээ түрүүн хараалагдаа һэн.

⁹Шэхэтэй юм наа, шагнаг лэ!

¹⁰Плендэ орохо хубитай хүн плендэ орохо. һэлмээр сабшуулжа үхэхэ хубитай хүн һэлмээр сабшуулжа үхэхэ. Бурханай табисуурта арад зон хатуу зоригтой, үнэн шударгы байха ёһотой гэжэ эдэ үгэнүүдһээ элирнэ бшуу!

¹¹Удаань газар дороһоо гаража ябаһан ондоо арьяатаниие харабаб. Тэрэнь Үргэлэй Хурьгандал адли хоёр эбэртэй байгаа һэн, теэд луу шэнгээр дуугараа.

¹²Энэ арьяатаниинь үхэтэрөө шархатуулаад эдэгһэн нэгэдэхи арьяатанда мүргэгты гэжэ газар дэлхэйн бүхы зониие баадхана. Хоёрдохи арьяатаниинь нэгэдэхи арьяатанай нэрээр, тэрэнэй эрхэ засагые хэрэглэн, тиимэ юумэ хэнэ.

¹³Хоёрдохи арьяатаниинь гайхамшаг ехэ дүлгэ тэмдэгүүдые үйлэдэнэ: хүнүүдэй хараһаар байтар тэнгэри дээрэһээ газар уруу гал дүлэ буулгана.

¹⁴Тиин энэнь нэгэдэхи арьяатанай нэрээр гайхамшаг ехэ дүлгэ тэмдэгүүдые харуулжа, газар дэлхэйн зоние мэхэлнэ. Һэлмээр сабшуулаад амидырһан арьяатанай нэрэ хүндэдэ тэрэнэй хүрэг дүрсэ хэгты гэжэ газар дэлхэйн зондо хоёрдохи арьяатан захиралта үгэбэ.

¹⁵Нэгэдэхи арьяатанай хүрэг дүрсые амидыруулха эрхэ, тэрэ хүрэг дүрсыень юумэ хэлэжэ шададаг болгохо эрхэ, нэгэдэхи арьяатанай хүрэг дүрсэдэ һүгэдэн мүргэдэггүй хүнүүдые алаха эрхэ хоёрдохи арьяатанда үгтэһэн байгаа.

¹⁶Энэ хоёрдохи арьяатан бүхы хүнүүдые: юрыншье, засаг баридагшье, баяншье, үгытэйшье уладые, эрхэ сүлөөтэйшье зоние, богоол барлагуудыешье баруун гартаа гү, али духа магнайдаа тамга табюулха гэжэ баадхадаг бэлэй.

¹⁷Тамгагүй һаа, хэншье юумэ наймаалха, худалдажа абаха эрхэгүй һэн. Тамга гээшэнь арьяатанай нэрэ гү, али тэрэнэй нэрын тоо мүн.

¹⁸Иихэдээ мэргэн бодолтой ябахые уряална гээшэ: ухаансар хүниинь арьяатанай тоое бодожо гаргаг лэ. Энэ тоонь, хүнэйхидэл адли, зургаан зуун жаран зургаа юм.

Гэршэлгэ 14

Үргэлэй Хурьган болон тэрээндэ абаруулһан хүнүүд

¹Би иимэ юумэ харааб: Сион хада дээрэ Үргэлэй Хурьган зогсоно, тэрээнтэй хамта зуун дүшэн дүрбэн мянган хүнүүдэй духада Үргэлэй Хурьганай нэрэ, тэрэнэй Эсэгын нэрэ бэшээтэй.

²Уһан хүүюур шэнги, тэнгэриин дуун шэнги абяан огторгойһоо дуулдаба. Намда тэрэ абяан ятагаар наадахадаа, ятагашадай наададаг дуундал адляар һанагдаба.

³Тэдэнэр хаан шэрээгэй урда, дүрбэн амитадай болон ахамадуудай урда байгаад, магтаал дуу зэдэлүүлнэ. Газар дэлхэйһээ сүлөөлэгдэнэн зуун дүшэн дүрбэн мянган тэдэ хүнүүдһээ бэшэ ондоо хэншые эдэ дуунуудые дуулажа шадаагүй.

⁴Тэдэ хүнүүд эхэнэрнүүдээр орёһолдон бээе бузарлаагүй, гэр бүлэ болоогүй зандаа үлөө, Үргэлэй Хурьганай ошоһон тээшэ дахажа ябаа. Гансал тэдэ хүнүүд газар дэлхэйһээ абтан абарагдаһан байгаа. Тэдэнэр Бурханда болон Хурьганда үргэнэн түрүүшын ургасын дээжэ мэтэ бэлэй.

⁵Тэдэнэр хэзээдэшые худал хуурмаг үгэ хэлэдэггүй, гэм зэмгүй байһан юм.

⁶Газар дэлхэй дээрэ һуугшадта, али бүхы арадуудта, угсаатанда, элдэб янзын хэлэтэй зондо, бүхы үндэнэ яһатанда хэтэ мүнхын һайн Мэдээсэл дуулгахын тула Бурханай үшөө нэгэ эльгээмэлэй огторгойдо элин ниидэжэ ябахые би удаань харааб.

⁷«Бурханһаа айжа түбэгшөөжэ байгыт! Тэрэнэй алдар солые суурхуулан магтажа байгыт! Юуб гэбэл, Бурханай зарга шүүбэри хэхэ сагынь ерээд байнал! Огторгой тэнгэриие, газар дайдые, далай, мүрэнүүдые Бүтээгшын урда хүгэдэн мүргыт!»

⁸Дары хойноһоонь баһа ондоо, хоёрдохи эльгээмэл иигэжэ хашхаран ниидэжэ ябаа: «Бүхы арад үндэнэтэниие забхайралайнгаа бузар архи уулгажа хорлоһон агуу ниислэл Вавилон хото хосороо, хосороо!»

⁹Тэдэнэй хойноһоо баһа ондоо, гурбадахи эльгээмэл шанга шангаар иигэжэ хашхаран ооглобо: «Арьяатанда, тэрэнэй хүрэг дүрсэдэ мүргэн хүгэдэжэ, духадаа гү, али баруун гартаа тамгатай байгаа һаа,

¹⁰Бурханай уур сухалай аягаһаа тэрэнэй уур сухалай холисогүй сэбэр архи ууха, тэдэ хүнүүдые арюун нангин эльгээмэлнүүдэй урда, Үргэлэй Хурьганай урда асараад, гал түймэр руу, хүхэрэй хүхэ дүлэн руу хаяжа, тамалан хэнээхэ.

11Тэдэниие зобоогшо галай хара утаан хэтын хэтэдэ өөдөө хөөрэн дэгдэхэ, тиин арьяатанда, тэрэнэй хүрэг дүрсэдэ хүгэдэн мүргэгшэдтэ, тэрэнэй нэрэтэй тамгатайшуулда үдэр хүнигүй амар заяа үзүүлэгдэхгүй».

12Бурханай табисуурта зон, Бурханай захяа заабари сахижа, Иисуста үнэн сэхэ ябадаг хүнүүд тэсэбэритэй шанга байха ёһотой гэжэ эдэ үгэнүүдһээ элирнэ бшуу!

13Удаань огторгойһоо иигэжэ дуугарха абяа дуулааб: «Буулгажа бэшээд аба: энэ саһаа эхилэн Дээдын Эзэндэ үнэн сэхэ байжа наһа бараһан хүнүүд ямар жаргалтайб даа!» «Тиимэл даа, тэдэнэр хүндэ хүшэр ажалһаа одоол сүлөөржэ амархань, юундэб гэбэл, тэдэнэй бүтээһэн буянтай һайхан хэрэгүүдынь хойноһоонь ябалсана гэжэ Нангин хүлдэ хэлэнэ».

Ургаса

14Иимэ юумэ харааб: сагаан үүлэн, тэрэнэй дээрэнь хүнтэй адлирхуу амитан һууна. Толгой дээрэнь алтан титим, гартаа хурса хадуур баринхай.

15Һүмэ сооһоо баһа нэгэ эльгээмэл гараад, үүлэн дээрэ һуугшада хандан, иигэжэ шангаар ооглон дуугарба: «Хадуураа наашань эльгээ, тиигээд таряагаа хада! Газар дээрэ ургаса таряан эдешээ – хуряаха саг ерээ!»

16Үүлэн дээрэ һуугаашань хадуураа газар уруу шэдэбэ. Тиихэдэнь газар дээрэхи таряан хадагдашаба.

17Ондоо нэгэ эльгээмэл тэнгэрийн хүмэ сооһоо гараба, баһал хурса хадуур гартаа баринхай.

18Гал гуламта даажа байһан баһа нэгэ эльгээмэл хүмын үргэлэй газарһаа гараба. Хурса хадууртай эльгээмэлдэ хандан, тэрэнь иигэжэ хашхарба: «Хурса хадуураа абаад яба, тиигээд газар дээрэ ургадаг үзэмэй модоной жэмэсүүдые хада, тэдэнь эдешээд байна».



¹⁹Тэрэ эльгээмэлын хадуураа газар уруу шэдэжэ, газарай үзэмэй баглаануудыг отолоод, үзэмэй шүүхэ шахадаг, Бурханай уур сухалай томо тогоо худар шэдэжэрхибэ.

²⁰Хотын гадна оршоһон томо мандагар тогоон соо үзэмэй баглаа жэмэсүүдыг низа тэһэ дэбһэбэ, тиихэдэнь тогооной халитар улаан шуһан урдажа, мориной хазаарта хүрэмөөр гурбан зуун хараа модоной зайда халин тарашаба.

Гэршэлгэ 15

Һүүлшын долоон гай аюулнууд

¹Удаань баһа нэгэ аргагүй ехэ, гайхамшаг дүлгэ тэмдэг: һүүлшын долоон гай аюултай долоон эльгээмэлнүүдыг тэнгэри дээрэ харабаб. Юундэ һүүлшын гай аюул юм гэбэл, Бурханай уур сухалын эдэнээр түгэсэһэн байна.

²Галтай холиһон шэл далай шэнги юумэ харабаб. Энэ шэл далайн хажууда арьяатаниие, тэрэнэй хүрэг дүрсые, арьяатанай нэрын тоое илаашад байна. Тэдэнэр тус бүридөө Бурханай ятага баряад зогсоно.

³Тиихэ зуураа, Бурханай зараса Моисейн дууе, Үргэлэй Хурьганай иимэ дууе дууланад: шинии бүтээһэн хэрэг аргагүй ехэл, гайхалтай һайхан лэ, Хамагыг зонхилогшо Дээдын Бурхан! Арадуудай Хаан! Шинии хэрэгүүд үнэхөөр зүб, үнэн сэхэ лэ!

⁴Хэн шамһаа айхагүйб даа, Эзэн Бурхан, шинии нэрэ солые хэн алдаршуулан магтахагүйб даа?! Гансал ши нангин гэгээн ха юмши! Бүхы арадууд шинии урда һүгэдэн унажа мүргэхэл. Юундэб гэбэл, шинии үнэн зүб хэрэгыг бултадаа үзэһэн хараһан ха юм.

⁵Удаань иимэ юумэ харааб: тэнгэри дээрэ Гэршэлгын Майханай Хамагай Нангин газарын нээгдэбэ.

⁶Тэндэһээ долоон гай аюултай долоон эльгээмэлнүүд гараба. Тэдэнэр сэбэрхэн, ялагар нарин улһаар оёһон хубсаһа үмдэнхэй, сээжээрэ алтан бэһэ бэһэлэнхэй байба.



⁷Дүрбэн амитадай нэгэниинь долоон эльгээгдэмэлнүүдтэ хэтэ мүнхэ оршодог Бурханай угаа ехэ уур сухалай долоон алтан аягануудые барюулба.

⁸Һүмэнь Бурханай Алдар солын, тэрэнэй Хүсэ шадалай утаагаар дүүрэшэбэ, тин долоон эльгээмэлнүүдэй долоон гай аюулай дууһан зайлатар һүмэдэ хэншые орожо шадаагүй.

Гэршэлгэ 16

Бурханай уур сухалай долоон аяга

¹Удаань долоон эльгээмэлнүүдтэ хандан, һүмэ доторһоо шангаар иигэжэ хэлэхые дуулааб: «Эндэһээ ошожо, Бурханай уур сухалай долоон аяга соохиие газарта адхагты!»

²Нэгэдэхи эльгээмэл өөрынгөө аяга соохиие газарта адхаба, тиигэмсээрнь арьяатанай тамгатай хүнүүдэй ба арьяатанай дүрсэдэ һүгэдэн мүргэгшэдэй бээдэнь бузар муухай эдеэртэй шарханууд гарашаба.

³Хоёрдохи эльгээмэл өөрынгөө аяга соохиие далайда адхаба, далай тиихэдэнь үхэхэн хүнүүдэй шуһан шэнги боложо, далайн амитад бултадаа хосорон һалашаба.

⁴Гурбадахи эльгээмэл өөрынгөө аяга соохиие гал мүрэн, уһа горхо руу адхаба, тиихэдэнь гол мүрэнүүд, уһа горхонууд улаан шуһан болошобо.

⁵Уһа мүрэнүүдэй эльгээмэлэй иигэжэ хэлэхыень дуулааб: мүнөөнэйшые, урданайшые Нангин гэгээн Бурхан, ши, зүбөөр иигэжэ шиидхэхэн байнаш:

⁶Тэдэнэр Бурханай арадай, лүндэншэдэй улаан шуһа адхаруулаа, тиихэдэнь ши тэдэндэ шуһа уулгажа, тэдэнэй гэмые зүб амсуулааш!



⁷Тахилай шэрээгэй хажуунаа иигэжэ хэлэхыень би дуулааб: Тиимэ даа, Хамагые зонхилогшо Эзэн Бурхан, шинии гаргаһан шийдхэбэринүүд үнэн зүб байна!

⁸Дүрбэдэхи эльгээмэл өөрынгөө аяга соохиие нара руу адхаба, тиихэдэнь хүнүүдые шатааха эрхэ наранда үгтэһэн байна.

⁹Аргагүй халуун болоходонь, хүнүүд шататараа халуудажа байгаа бэлэй. Иимэ ехэ гай аюул даажа байһан Бурханай нэрые хүнүүд хараалай муугаар хараагаа һэн. Теэд тэдэ хүнүүд гэм хэхээ болёогүй, Бурханиее магтаагүй бэлэй.

¹⁰Табадахи эльгээмэл өөрынгөө аяга соохиие арьяатанай хаан шэрээ руу адхаба, тиихэдэнь арьяатанай засаг түрэ соо балай харанхы болошобо. Тэнсэлгүй үбшэнтэй байһан туладань тэндэхи хүнүүд хэлээ хазажа байбад.

¹¹Тиин үбшэн зоболон, яра шарха асарһанайнь түлөө тэдэнэр Тэнгэрийн Бурханиее хараалай муугаар хараажа байгаа. Теэд тэдэ хүнүүд гэм хэхээ болёогүй һэн.

¹²Зургаадахи эльгээмэл өөрынгөө аяга соохиие асари ехэ Евфрат мүрэн руу адхаба. Тиихэдэнь тэрэ мүрэн хатажа, Зүүн зүгэй хаашуулай хуурай газараар ябаха харгы гаргагдашаба.

¹³Луугай аман сооһоо, арьяатанай аман сооһоо, худал хуурмаг лүндэншын аман сооһоо бахын түхэлтэй гурбан хүнэһэ һүлдэнүүдэй гаража байхые харабаб.

¹⁴Эдэ болбол дүлгэ тэмдэг үйлэдэдэг ада шүдхэрнүүдэй хүнэһэ һүлдэнүүд мүн: Хамагые зонхилогшо Бурханай агууехэ Үдэртэ дайралдахыень бүхы замбуулин дайдын хаашуулые суглуулхаяа тэдэ ошожо ябаа.

¹⁵Обёоржо байгты! Би хулгайшан шэнгээр гэб гэнтэ орожо ерэхэб. Хубсаһаа бэлдээд, һэргэлэн байһан хүн жаргалтай: тэрэ хүн улад зоной дунда салдаган нюсэгөөр гаража, нэрээ гутаахагүйл.

¹⁶Тиин гурбан хүнэнэ хүлдэнүүдынъ еврей хэлээр Армагедон гэжэ нэрэтэй газарта бүхы хаануудые суглуулба.

¹⁷Долоодохи эльгээмэл өөрынгөө аяга соохиие агаар руу сасан адхаба. Тиихэдэнь «Бүтэбэ даа!» – гэхэн шанга абьяан хүмын хаан шэрээгэй зүгһөө дуулдаба.

¹⁸Сахилгаан сахилгаалба, ооглоон хашхараан болохонь дуулдаба, тэнгэри дуугарба, газар хүдэлбэ. Дэлхэй дээрэ хүн амитанай бии болохоһоо нааша тиимэ ехээр газар хүдэлөөгүй юм.

¹⁹Аргагүй томо хото гурбан хуби боложо бутаран хандаршаба, бусад арадуудай хотонууд хяа бута хүрэн унашаба. Агуу ниислэл Вавилон тухай Бурхан ханажа, аргагүй ехэ уур сухалайнгаа аягатай архиие тэрэ ниислэлдэ уулгаба.

²⁰Ольторог аралнууд баран булта тэрьелшэбэ, хада уулануудшые олдохойо болишобо.

²¹Огторгой тэнгэриһээ дүшэн килограмм шахуу болохо томо гэгшын мүндэр орожо, хүнүүд дээрэ унаба. Теэд аргагүй томо мүндэр оруулжа, аюул тодхор асарһанайнь түлөө Бурхание хүнүүд хараалай муугаар харааба. Юундэб гэбэл, айхабтар ехэ гай аюул тохёолдоо бшуу.

Гэршэлгэ 17

Янхан эмэ арьяатан хоёр

¹Долоон аягатай долоон эльгээмэлнүүдэй нэгэниинь ерээд, намтай хөөрэлдэжэ эхилбэ: «Наашаа ерэ даа, олон гол мүрэнүүдэй эрьедэ һуугша аргагүй забхай Янхан эмые ямар хатуу шанга хэһээлтэдэ оруулха байһыень шамда харуулхамни.

²Газар дэлхэйн хаашуул тэрэ янхантай холбоорилдон забхайрдаг, газар дэлхэйнхид тэрэ эмын зальхайралай архиие һогтосороо уудаг байгаа».

³Удаань тэрэ эльгээмэл Нангин хүлдэтэй болгогдоһон намайе сүл губида асарба. Бурхание доромжолһон нэрэнүүдэй бэшээтэй, улаан



арьяатанай дээрэ һуужа байһан эхэнэрые харабаб. Тэрэ арьяатан долоон толгойтой, арбан эбэртэй һэн.

⁴Тэрэ эхэнэр улаабтар хүхэ ба шад улаан бүдөөр оёһон хубсаһатай, шэжэр алта, эрдэниин шулуу, һубад һубһа ялалзуулан зүүгээд байба. Гартаа алтан хундага баринхай. Тэрэ хундага соонь янхан эмын һамуу зальхай ябадалай жэрхэштэй муухай, бузар булай юумэнүүд хэгдээд байгаа.

⁵Духа дээрэнь нюуса удхатайгаар иигэжэ бэшээтэй: «Агуу ниислэл Вавилон – газар дэлхэйн янхан эмэнүүдэй жэрхэштэй муухай юумэнүүдэй эхэ».

⁶Бурханай арад зоной шуһа, Иисусай гэршэнэрэй шуһа уугаад, тэрэ эхэнэрэй һогтошоод байхые харахадаа, гайхахын ехээр гайхабаб.

⁷Эльгээмэл иигэжэ намда хэлэбэ: «Ши юундэ гайхаабши? Эхэнэрэй нюусые, тэрэ эхэнэрэй унажа ябагша долоон толгойтой, арбан эбэртэй арьяатанай нюусые, шамда тайлбарилан хэлэжэ үгэхэб.

⁸Шинии хараһан арьяатан бии байһанаа, мүнөө үгы болонхой. Оёоргүй гүнзэгы нүхэн сооһоо һаяар гаража ерэхэ, теэд тэрэ хосорон һалаха. Дэлхэйн бүтээгдэхэнэе нааша угай дэбтэртэ бэшэгдээгүй газар дэлхэйнхид тэрэ арьяатаниие харахадаа, хүхихэ баярлаха, ушарынь гэбэл, бии байһанаа, үгы болоод, дахин бии болохо арьяатаниие хараха юм.

⁹Эндэ сэсэн ухаан бодол хэрэгтэй. Долоон толгой гээшэнь эхэнэрэй һуугша долоон добо гүбээнүүдынь мүн. Тэдэ долоон гүбээнүүдынь мүн баһа долоон хаанууд гээшэ.

¹⁰Тэдэ хаануудай табаниинь хосоронхой, нэгэниинь бии, нүгөөдэхинь үшөө ерээдүй, ерэхэдээшье удаан байхагүй юм.

¹¹Бии байһанаа, үгы болоһон арьяатан наймадахи хааниинь болоно; энэнь түрүүшын долоон хаануудай нэгэниинь тиин хосорон һалаха тээшээ боложо байна.

¹²Шинии хараһан арбан эбэрнүүд хадаа хаан түрые үшөөл абаагүй арбан хаанууд гээшэ, теэд тэдэнэр арьяатантай хамта нэгэ сагай турша соо хаанай засаг түрэ абаад байха.

¹³Тэдэнэр хаба шадалаа, засаг түрээ арьяатанда үгэхэ гэхэн гансал зорилготой.

¹⁴Тэдэ хаанууд Үргэлэй Хурьганай урдаһаа дайралдаха, тиин Үргэлэй Хурьган тэрэнэй урижа асарагшадтай, тэрэнэй шэлэжэ абагшадтай, тэрээндэ үнэн шударгы байгшадтай хамта тэмсэжэ тэдэниие диилэхэ. Юуб гэбэл, Үргэлэй Хурьган эзэдүүдэй Дээдын Эзэн, хаануудай Хаан мүн».

¹⁵Эльгээмэл намда иигэжэ хэлээ: «Янхан эмын нуугша гол мүрэнүүд хадаа элдэб янзын арадууд, улад зон, үндэһэ яһатан, янза бүриин хэлэтэй зон гээшэ.

¹⁶Шинии хараһан эдэ арбан эбэрнүүд, мүн арьяатан тэрэ Янхан эмые үзэн ядажа зэбүүрхэхэ, тэрэниие үгырүүлэн хоһоруулха, салдаган нюсэгөөр үлөөхэ, тэрэ эмые эдижэрхихэ, тиигээд галда шатааха байна.

¹⁷Юундэб гэбэл, Бурхан номнол үгэнүүдыень бээлүүлэгдэтэр табиһан зорилгыень бээлүүлхэ хүсэл арбан хаануудай зүрхэ сэдхэлдэ хадуун оруулаа. Бурханай хүсэл иимэ: тэдэ хаанууд хоорондоо зүбшөөд, хаанай засаг түрые арьяатанда үгэхэ.

¹⁸Шинии хараһан эхэнэр болбол газар дэлхэйн хаануудые зонхилогшо агууехэ ниислэл мүн гээшэ».

Гэршэлгэ 18

Вавилониие хэнээлгэ

¹Тэрэнэй удаа иимэ юумэ харабаб: аргагүй ехэ эрхэ засагтай ондоо нэгэ эльгээмэл тэнгэриһээ буужа байба, тиин газар дайда тэрэнэй алдар солоор гэрэлтэн толоршобо.

²Тэрэ эльгээмэл бардаастай шангаар иигэжэ хашхарба: Агуу ниислэл Вавилон халаа, халаа! Энэ ниислэл ада шүдхэрнүүдэй шэбээлдэг газар,

элдэб эсын боохолдойнуудай обооролдодог үүр, элдэб эсын бузар шубуудай суглардаг үүр, элдэб эсын бузар булай, жэрхэштэй муухай арьяатадай шэбээлдэг газар болошоо.

³Юундэб гэхэдэ, ниислэл Вавилон забхайралайнгаа бузар архяар бүхы арадуудые һогтоогоо, тиин газар дэлхэйн хаашуул тэрээнтэй холбоорилдоо, наймаашад хонжоошодшые үлүүсэ һайн байдалдань дашууран орожо, хэтэртэрээ баяжаа.

⁴Тэнгэриһээ иигэжэ хэлэһэн ондоо абяан намда дуулдаа: Энэ ниислэлэй нүгэл шэбэлынь таанарта нүлөөлхэгүйн тула, гай аюулынь таанарые дайрахагүйн тула, арад зомни тэрэ хотые орхиит.

⁵Юундэб гэбэл, тэрэнэй нүгэл шэбэлынь огторгой тэнгэридэ туласараа обооршоод байна, тиин тэрэ ниислэлэй хэһэн гэмтэ ябадалые Бурхан һанаандаа оруулба.

⁶Тэрэ ниислэлые хэһэн үйлэйнь хэмжээгээр хэһээгты, хэһэн үйлэ хэрэгүүдэйнь түлөө хоёр дахин хатуугаар хэһээгты, хоёр дахин хатуу архи тэрэнэй аяга руу хэгты!

⁷Өөрыгөө тэрэ хэды ехээр магтуулаа гээшэб, хэды ехэ баялиг соо умбаа гээшэб, тэды ехэ ядарал зоболон, уйдхар гашуудал тэрээндэ асарагты! Юундэб гэбэл, тэрэ ниислэл иигэжэ досоогоо һанаа: «Би хатан шэнги һайн һуунаб, би бэлбэһэн эхэнэр бэшэб, уйдхар гашуудалые үзэхэгүйб!»

⁸Тиимэһээ али бүхы гай аюулнууд: үхэл хосорол, гай гашуудал, үлэсхэлэн зоболон тэрэ эмэдэ гэнтэ буужа ерэхэ даа! Тэрэниие галда шатааха, ушарынь гэбэл, тэрэниие шүүбэрилхэ Эзэн Бурхан угаа хүсэтэй юм.

⁹Тэрэ ниислэлэй шатахада гараһан гал түймэрэй утаа уняар харахадаа, зальхайралга, баялиг соогуур дураараа хүльбэрэлдэжэ ябаһан газар дайдын хаашуул тэрэ ниислэлые шаналжа уйлаха гашуудаха байна.

¹⁰Тиин хаашуул холо зогсон тэрээниие хараад, ядарал зоболонһоонь үхэтэрөө айжа, иигэжэ хэлэхэ юм: Аргагүй хүсэтэй, агуу ниислэл Вавилон, аймшагтай ехэ гашуудал зоболон шамда тудаба – зарга шүүбэридэ шаамайе үгэжэ хэһээхэ саг гэб гэнтэ ерэбэ!

¹¹Наймаашад хонжоошодшые тэрэ хотые шаналан уйлана, гашуудан зобоно, ушарынь гэбэл, тэдэнэй эд бараае хэншые худалдажа абахагүй.

¹²Тэдэнэй обоо собоо алта, мүнгые, үнэтэ шулуунуудые,hubадhubһые, нарин улһые, шад улаан бүдөөр, дардам торгоор, үнэтэй улаабтар бүдөөр оёһон хубсаһыень, хоншуухан үнэртэй модонуудые, заанай яһаар хэһэн бүтээлнүүдые, үнэтэ модоор, гуули, түмэрөөр, гантиг шулуугаар хэһэн амһартануудыень ондоо хэншые саашадаа абахагүйл.

¹³Эдее амтатай болгодог зүйлнүүдыеень, найхан үнэртэй ургамалай шүүһыень, хүжэ санзайень, либанон гэдэг уталгыень, архи дарһыень, оливай тоһыень, хурабшаадхан сагаан гурилыень, шэниисэ таряаень, үхэр, хони, моринуудыень, ута тэргэнүүдыеень, барлагуудыень, сэрэгэй плендэ абтаһан хүнүүдыеень ондоо хэншые саашадаа абахагүйл.

¹⁴Шинии сэдхэн шунажа байдаг юумэнүүдшни үгы болошобо, шинии бүхы алдар соло, үнэтэ баялигшни хосорон һалаа. Ондоо тэдэшни хэзээш бусажа ерэхгүй!

¹⁵Эдэ бүхы эд бараануудые худалдажа, тэһэ баяжаһан наймаашад тэрэ ниислэлые холоһоо хараад, ядарал зоболонһоонь үхэтэрөө айһандаа, уйлан, гэгэн,

¹⁶иигэжэ хэлэхэ юм: Нарин гэгшын улһаар, алта мүнгөөр, үнгэтэ шулуу,hubадаар толоржо байһан үнэтэй сэнтэй улаан бүд хубсаһа үмдэһэн агуу ниислэл, шамда гашуудал зоболон тудаба!

¹⁷Тиимэ ехэ баялиг зөөри гэб гэнтэ һалашабал! Тиин бүхы капитанууд, уһан далайгаар тамарагшад, морягууд, далайн албанда ябажа, амидаарагша бүхы хүнүүд холо зогсоод,

¹⁸ниислэл хотын шатаха дүрэхэдэ гараһан утаа уняарые харахадаа, орилон шашхан, иигэжэ хэлэхэ: Агуу ниислэлтэй жэшэмээр хото байха гү?

¹⁹Тиин тэдэ зон тархи дээрээ үнэнэ адхан, уйлалдан гэгэлдэн иигэжэ хашхаралдаха: Агуу ниислэл, шамда айхабтар ехэ гашуудал зоболон тудаб! Далайда онгосотой байһан хүнүүд ниислэл хотын баялигаар тэнэ баяжаа. Харин тэрэ хото гэб гэнтэ хоһон сүл губи болошоо!

²⁰Огторгой тэнгэри, Бурханай хүнүүд, элшэд, лүндэншэд, энээндэ хүхин баясыт! Таанарай түлөө тэрэ ниислэлые Бурхан хэнээгээл!

²¹Удаань баатар ехэ хүсэтэй эльгээмэл тээрмын шулуунай зэргын томо гэгшын шулуу үргэжэ, далай руу шэдэхэ зуураа, иигэжэ үгүүлбэ: Агуу ниислэл Вавилониие иимэл хүсэтэйгөөр холо шэдэжэ хаяхань! Энэ ниислэл саашадаа оршохоёо болёо!

²²Хүгжэмэй дуугархань дахин дуулдахагүй, ятага, жэмбүүршэдэйшье, бүрээ дуугаргагшадайшье хүгжэм дуун дахин дуулдахагүй. Гар дархашуулшье, урлалгын ажалшье саашадаа эндэ хэхэгүй. Тээрмын шулуунай эрьелдэн түерхые ондоо хэншье дуулахагүй.

²³Дэнгэй гэрэлые хотодо ондоо хэншье харахагүй. Гэрлэхээе байгаа хүбүүн басаган хоёрой хөөрэлдэжэ зугаалхые ондоо хэншье дуулахагүй. Юундэб гэбэл, шинии наймаашад газар дэлхэйн амбан һайдууд байгаа, шинии үйлэдэн хэдэг байһан эльбэ жадханууд али бүхы арад зониие мэхэлээ.

²⁴Бурханай хүнүүдэй, лүндэншэдэй, газар дэлхэйдэ амидаржа ябахадаа алуулһан зоной шуһа адхарһанда энэ хото зэмэтэй!

Гэршэлгэ 19

Тэнгэри дээрэхи баяр

¹Тэрэнэй удаа аргагүй олоороо хүнүүдэй суглараад, дүүлдэн шууялдан байһан шэнгээр иигэжэ хашхаралдаха абяан намда тэнгэри



дээрhээ дуулдаба: Бурханда магтаал соло! Манай Бурханда абарал, алдар соло, хүсэ шадал байна!

²Ушарынь хэлэбэл, тэрэнэй шиидхэбэринүүд үнэн зүб юм: бүхы газар дэлхэйнхидые зальхайруулһанайнь түлөө аргагүй забхай Янхан эмые Бурхан шүүбэрилэн гэмнээ: зарасанарайнь шуһа адхаруулһанайнь түлөө Янхан эмые Бурхан хэһээгээ!

³Тиин тэдэ дахин ооглон хашхаралдаа: Бурханда магтаал соло! Янхан эмые шатаахада гараһан утаан хэтын хэтэдэ дэгдэжэ байна!

⁴Хорин дүрбэн ахамадууд, дүрбэн амитад ерэжэ, хаан шэрээдээ һууһан Бурханай урда һунан унаад, һүгэдэн мүргэхэ зуураа: Болтогой! Бурханда магтаал соло! – гэжэ хэлэбэд.

Үргэлэй Хурьганай түрэ найр

⁵Хаан шэрээгэй зүгһөө иигэжэ хэлэхэ абьяан дуулдаба: Бурханай бүхы зарасанар, Бурхание хүндэлдэг бүхы хүнүүд, юрыншые хүнүүд, засаг баридагыше хүнүүд, манай Бурхание магтан һайшаагыт!

⁶Аргагүй олоороо хүнүүдэй суглараад дүүелдэжэ байһан шэнги гү, али уһан хүүюурэй шуужа, шангаар тэнгэри дуугаржа байһан шэнги иимэ абьяан намда дуулдаба: Бурханда магтаал соло! Хамагые зонхилогшо Бурхамнай, Дээдын Эзэн засаг түрөө абаба!

⁷Бидэ баярлахабди, хүхихэбди, тэрэниие магтан, алдар сууень дуудахабди, ушарынь хадаа Үргэлэй Хурьганай түрэ болохонь! Хадамда ошохо басаганиинь бэлэн болоод, тэрэнээ хүлэжэ байна:

⁸Басагандань нарин улһаар оёһон ялагар, сэбэр хубсаһан үгтэнхэй. Нарин улһан гээшэнь Бурханай арад зоной үнэн зүб үйлэ хэрэг гэһэн удхатай.

⁹Удаань намда Бурханай Эльгээмэл иигэжэ хэлэбэ: «Буулгажа бэшээд аба! Үргэлэй Хурьганай түрэ найрта урилга абагшад жаргалтай! Энэ Бурханай хэлэһэн ёһотойл үнэн зүб үгэнүүд гээшэ!»



¹⁰Би газарта хүнэн хэбтэжэ, хүлдэнь мүргөөб. Теэд тэрэ намда хэлэбэ: «Иимэ юумэ бү хээрэй, мэдэжэ бай! Би Иисус тухай гэршэлдэг шамтайл адли, шинии аха дүүнэртэл адли зарасань гээшэб! Бурханда хүгэдэн мүргэ! Иисус тухай гэршэлэгшэд лүндэншэдые урмашуулдаг хүлдэтэй юм».

Сагаан мори унахан хүн

¹¹Тиин сэлээтэй байхан тэнгэри харабаб – тэндэ сагаан морин байба, тэрэниие хүн унаад нууба. Мори унашань Үнэн зүб, Сэхэ шударгы гэжэ нэрэтэй юм. Тэрэ нуугаашань зарга шүүбэриие, дайн сэрэгые үнэн зүбөөр хэгшэ юм.

¹²Тэрэнэй нүдэнүүдынъ гал дүлэн шэнги ялалзана, толгой дээрэн олон тоото титимүүд байна. Бэе дээрэн нэрэн бэшээтэй, тэрэниенъ өөрөөнъ бэшэ хэншье мэдэнэгүй.

¹³Шуһан соо шиихажа норгоһон суба нэмэрэнхэй; тэрэнэй нэрэн – Бурханай Үгэ юм.

¹⁴Тэнгэри дээрэхи сэрэгшэд сагаан моринуудые унаад, нарин сагаан улһаар оёһон сэбэрхэн хубсаһа үмдөөд, хойноһоонъ дахажа ябанад.

¹⁵Арадуудые илан дарахын тула амандаа хурса һэлмэтэй; тэрэнъ бүхы арадуудые түмэр таягаараа ударидан зонхилжо байха. Тэрэ Хамагые зонхилогшо Бурханай ехэ уур сухалай томо тогоон соо үзэмэй жэмэсые низа тэһэ дэбһэнэ.

¹⁶Тэрэнэй суба дээрэ, гуя дээрэ иигэжэ бэшээтэй: хаашуулай Хаан, эзэдүүдэй Дээдын Эзэн.

¹⁷Нара дээрэ зогсожо байхан эльгээмэлые би харааб. Огторгой доохонуур ниидэжэ ябаһан бүхы шубуудта хандан, тэрэ эльгээмэл иигэжэ шангаар хашхаржа байба: «Бурханай ехэ эдее хоол барихаяа эндэ сугларагты!»

¹⁸Хаашуулай, сэрэгэй дарганарай, хүсэ ехэтэ хүнүүдэй мяха, моринуудай, тэдэниие унаад ябагшадай мяха, сүлөө ажалтанай, барлаг богоолнуудай мяха, багашуул, ехэшүүлэй мяха эдихэт».

¹⁹Сагаан мори унаад ябагшын, тэрэнэй сэрэгшэдэй урдаһаа тэмсэн дайралдахая арьяатанай, газар дэлхэйн хаашуулай, тэдэнэй сэрэгүүдэй суглараад байхые би харааб.

²⁰Арьяатаниие шүүрэн бариба, тэрээнэй урда элдэб дүлгэ тэмдэг харуулжа, арьяатанай тамга табяад, тэрэнэй хүрэг дүрсэдэ хүгэдэн мүргүүлжэ байһан хуурмаг лүндэншые арьяатантай хамта шүүрэн бариба. Тэдэ хоёрые хоюулыень дүрэжэ байһан хүхэртэй нуур худар амидыгаар шэдэбэ.

²¹Бэшэниинь сагаан мори унаад ябагшын аман соохи хэлмээр сабшуулжа алуулһан байна. Тэдэнэй мяхые бүхы шубуу шонхорнууд эдижэ садаба.

Гэршэлгэ 20

Мянган жэл

¹Тэнгэриһээ буужа ябаһан эльгээмэлые харабаб. Оёоргүй гүнзэгы нүхэнэй түлхюур тэрээндэ байгаа. Гартаа аргагүй томо гэнжэ баринхай.

²Ехэ үнинэй могой, шолмос, сатана байһан лууе Бурханай Эльгээмэл барижа ерээд, мянган жэлдэ мултархагүй бүхөөр гэнжэлэн хүлижэрхибэ.

³Тэрэ лууе Бурханай Эльгээмэл оёоргүй гүнзэгы нүхэ руу шэдэжэ хаагаад, нүхыень тамгалжархиба. Мянган жэлэй дууһатар тэрэ луу арадуудые саашадаа мэхэлхэ аргагүй болоһон байна. Тэрэ болзоройнь үнгэрхэдэ, луу ойро зуураhana сүлөөлэгдэхэ юм.

⁴Зарга шүүбэри хэхэ эрхэтэй хүнүүдэй һууһан хаан шэрээнүүдые харабаб, мүн Иисус тухай, Бурханай Үгэ тухай гэршэлһэнэйнгээ түлөө толгойгоо таһа сабшуулаашадай хүнэһэнүүдые, арьяатанда, тэрэнэй

хүрэг дүрсэдэ хүгэдэн мүргөөгүйшүүлэй, духадаа гү, али гартаа тэрэ арьяатанай тамга табуулаагүйшүүлэй хүнэһэнүүдые би харабаб. Тэдэнэр дахин амидыруулагдажа, мянган жэл соо Иисустай хамта засаг түрэ барижа байгаа.

⁵Бусад үхөөшэдынь мянган жэлэй үнгэртэр һөөргөө амидыруулагдаагүй һэн. Энэ анха түрүүшын амидыралга мүн байгаа.

⁶Түрүүшын амидыруулгын үедэ дахин амидырагдаха хүнүүд жаргалтай. Тэдэнэр Бурханай хүнүүд мүн. Тэдэнэр хоёрдохийо үхэхэгүй юм. Тэдэнэр Бурханай, Христосой санаартадынь болохо, мянган жэлэй туршада Иисустай хамта засаг түрэ барижа байха.

⁷Мянган жэлэй үнгэрхэдэ сатана түрмэхөө табигдаха байна.

⁸Тиигээд сатана арадуудые мэхэлхээе ошохо, дайн сэрэг үүдхэхын тула дэлхэйн бүхы дүрбэн зүгүүдээр ябаха, гога, магого гэжэ арадуудта ошохо. Далайн эрьсын элһэ хайр мэтэ үй түмэн хүнүүдые сатана гулидхан суглуулха байна.

⁹Тэдэнэр бүхы газар дайдые алхалан гаража, Бурханай зоной байрлаһан газарые, тэрэ зоной эгээн дуратай хотые хүрээлхэ. Теэд тэрэ үедэнь тэнгэри дээрэхэ гал буужа ерээд, бултыень шатаажархиха юм.

¹⁰Тэдэ зониие мэхэлэгшэ Шолмос дүрэжэ байһан дүүрэн хүхэртэй нуур худар хаюулаа һэн. Түрүүн тэрэ нуур руу арьяатан, хуурмаг лүндэншэ хоёр шэдүүлһэн байна. Тэдэниие хэтын хэтэдэ, үдэр хүнигүй тэндэ зобоожо туляжа байха юм.

Һүүлшын зарга шүүбэри

¹¹Тиигээд би сагаан үнгэтэй асари томо хаан шэрээе, тэрэ шэрээ дээрэ һуугшые харабаб. Шэрээдэ һуугшын байһан ушарһаа газар тэнгэри хоёр тэрелэн далда орошобо: тэрэ хоёрой һууха һуури байгаагүй.

¹²Үхөөшэдые, багашуулые, ехэшүүлые хаан шэрээгэй урда зогсожо байхыень би харабаб. Номууд нээлгээтэй байба. Удаань баһа нэгэ ном – ажамидаралгын ном дэлгэгдэбэ. Үхөөшэд тэдэнэй өһөдынь үйлэ

хэрэгэй ёһоор, мүн номуудта бэшээтэй байһан ёһоор шиидхүүлээ бэлэй.

¹³Бии байһан үхөөшэдөө далай үгөө, бии байһан үхөөшэдөө үхэл, үхэлэй орон хоёр үгөө, тиин үхөөшэн бүхэниие тэрэнэй хэһэн үйлэ хэрэгэйн хэмжээгээр шиидхээ.

¹⁴Удаань үхэл, үхэлэй орон хоёрые гал дүлэтэ нуур руу хаяһан байна. Энэнь хоёрдохи үхэл – гал дүлэтэ нуур мүн байһан юм.

¹⁵Амидаралгын ном соо бэшэгдээгүйшүүлэе гал дүлэтэ нуур худар шэдээ һэн.

Гэршэлгэ 21

Шэнэ тэнгэри, шэнэ газар

¹Тиигээд би шэнэ тэнгэри, шэнэ газар хоёрые харабаб. Түрүүшын тэнгэри, түрүүшын газар хоёр хэтэ заяанда үгы болоо, далайшые хосороо бшуу.

²Нангин Хотые – шэнэ Иерусалимые би харааб. Хадамда гарахаяа нүхэр хүбүүгээ хүлээжэ байһан шэнэ Иерусалим гоёнхой юумэ тэнгэриһээ, Бурханһаа буужа ябаба.

³Хаан шэрээгэй тэндэһээ шангаар иигэжэ хэлэхые дуулабаб: «Харалши, энэ Бурханай майхан гээшэ. Хүнүүдшые тэрэ майханда байна, Бурхан хододоо тэдэнтэй байха! Тэдэ хүнүүд тэрэнэй арад зонинь болохо, Бурхан өөрөөшые тэдэ хүнүүдтэй хамта ажаһууха, тэдэнэй Бурханиинь болохо.

⁴Бурхан тэдэ хүнүүдэй нюдэнһөө гараһан дуһал нулимса бүхэниие аршаха. Үхэлгэ хосоролгошые саашадаа байхагүй, уйдхар гашуудал, орилолдоон бархиралдаан, үбдэлгэ хабдалгашые саашадаа байхагүй, ушарынь гэбэл, урданай бүхы юумэн урдажа ошоо».

⁵Хаан шэрээдэ һуугша иигэжэ хэлээ: «Харалши, би баран шэнэ юумэ хэнэб!» Тиигээд тэрэ иигэжэ хэлэбэ: «Буулгажа бэшээд аба, эдэ



үгэнүүдтэ этигэхэдэ болохо, юундэб гэбэл, эдэ бүхы үгэнүүд үнэн зүб юм».

⁶Намда тэрэ хэлэбэ: – Бүтэбэ! Би Альфа, Омега гээшэб, Түрүүшынхинь, һүүлшынхинь гээшэб. Ундаа хүрэхэн хүндэ амидаралгын булагай уһанһаа миинтэ уулгахаб.

⁷Илагша бүхы эдэ юумэнүүдые намһаа абаха. Би тэрэнэй Бурханиинь болохоб, тэрэ минии хүбүүмни болохо.

⁸Аймхай дүүлэгэрнүүд, Иисуста хүзэглэдэггүй хүнүүд, бузар муухай нүгэл хэгшэд, алууршад дээрмэшэд, зальхай ябадалтан, эльбэ хэгшэд, онгондо шүтэгшэд, элдэб худалшад гал, хүхэрөөр дүлэтэн носогшо нуур руу хаюулха. Энэнь хоёрдохи үхэлгэ мүн.

⁹Удаань гай аюулай һүүлшын долоон дүүрэн аягатай долоон эльгээмэлэй нэгэниинь ерэжэ, намтай хөөрэлдэбэ: «Харалши даа, би шамда бэриэе – Үргэлэй Хурьганай һамгые үзүүлхэб!» – гэбэ.

¹⁰Тиин Нангин һүлдөөр намайе аргагүй үндэр хада дээрэ абаашаад, тэнгэри дээрэхээ Бурханһаа доошоо буужа ябаһан Арюун нангин Иерусалим хотые намда харуулба.

¹¹Тэрэ хотонь Бурханай алдар солоор толорон гэрэлтэжэ байба. Тэрэ гэрэл туяань болор мэтын сэбэр тунгалаг хас шулуун шэнги үнэтэй шухаг шулуунуудтал адляар ялалзажа байгаа бэлэй.

¹²Иерусалим хотые тойроод арбан хоёр хаалгатай үндэр гэгшын хананууд байба. Хаалгануудайнь хажууда – арбан хоёр эльгээмэлнүүд, хаалганууд дээрэнь Израилиин арбан хоёр угсаатанай нэрэнүүд бэшээтэй.

¹³Гурбан хаалгань зүүн тээшээ, гурбаниинь – хойшоо, гурбаниинь – урагшаа, гурбаниинь – баруун тээшээ харанхай.

¹⁴Хотын хана арбан хоёр шулуутай һуури дээрэ табяатай, тэдэнэй дээгүүр Бурханай Хурьганай арбан хоёр элшэдэй нэрэнүүд бэшээтэй.

¹⁵Намтай хөөрэлдэһэн эльгээмэл хотые, тэрэнэй хаалгануудые, ханануудые хэмжэхын тула алтан таяг баряд ябаа.

¹⁶Тэрэ хото болбол ута үргэнөөрөө адли, тэбхэрхэн хэмжээнэй байгаа хэн. Эльгээмэлэй өөрынгөө таягаар хото хэмжэхэдэнь, утаашаа хоёр мянга дүрбэн зуун модо байба, үргэниинь, үндэрынь утатайгаа адли байба.

¹⁷Эльгээмэлэй хотын хана хэмжэхэдэнь, үндэрынь жаран зургаан метр байба. Эльгээмэл хүнэй хэмжэдэг хэмжүүрые хэрэглээ хэн.

¹⁸Ханань хас шулуугаар, харин хотонь нэбтэ харагдадаг шэл шэнги сэбэр алтаар баригданхай байгаа.

¹⁹Хотын ханын нууринуудын элдэб янзын эрдэни шулуунуудаар хэгдэһэн: нэгэ нууринь хас шулуугаар, хоёрдохи нууринь – миндарга шулуугаар, гурбадахинь – халтар манаар, дүрбэдэхинь – номин шулуугаар хэгдэһэн байба.

²⁰Табадахи нууринь – сардониксаар, зургаадахинь – мана шулуугаар, долоодохинь – кризолидаар, наймадахинь – бериллээр, юһэдэхинь – бэгтэ болор шулуугаар, арбадахинь – кризопразаар, арбан нэгэдэхинь – оюун шулуугаар, арбан хоёрдохинь – аметистээр хэгдэһэн байба.

²¹Арбан хоёр хаалгануудын арбан хоёр нубадаар, хаалга болгониинь үргэлжэ хүжэ нубадаар хэгдээтэй. Хотын гол гудамжань шэл шэнги нэбтэ харагдажа байдаг сула алтаар хэгдэнхэй.

²²Хото соо хүмэ би хараагүйб. Тэрэнэй хүмэнь – Хамагые зонхилогшо Эзэн Бурхан өөрөө, мүн Үргэлэй Хурьган ха юм.

²³Хотын харуул гэрэлтэй байхын тула нара, харашье хэрэггүй байгаа, юундэб гэбэл, Бурханай алдар солонь хотые гэрэлтүүлээ ха юм. Хурьган тэрэнэй дэнгын мүн.

²⁴Арадууд тэрэ хотын гэрэл туяа соо ябаха, газар дэлхэйн хаашуул өөһэдынгөө баялиг зөөриие тэрээндэ асаржа үгэхэ.

²⁵Хотын хаалганууд бүхэли үдэртөө суургалагдангүй, нээлгэтэй байха, ушарын гэбэл, тэндэ хүни болохогүй бшуу.

²⁶Арадуудай нэрэ солые, баялиг зөөриие тэрэ хотодо асарха.

²⁷Бузарлагдаһан ямаршые юумэн тэрэ хотодо орохогүй, гутамшаг муухай юумэ хэгшэд, мэхэ гохо гаргагшад тэрэ хотодо орохогүй. Үргэлэй Хурьганай амидаралгын ном дэбтэртэ нэрээ бэшүүлһэн хүнүүд лэ тиишэ оруулагдаха.

Гэршэлгэ 22

Амидаралгын гол мүрэн

¹Болор мэтэ ялалзаһан амидаралгын уһанай гол мүрэниие удаань намда эльгээмэл харуулаа. Тэрэ гол мүрэн Бурханай болон Үргэлэй Хурьганай хаан шэрээгэй дороһоо урдан гарадаг.

²Тиигээд эгээн ехэ гудамжын дундуур урдагша юм. Мүрэнэй хоёр эрьеэрнь амидаралгын модон ургадаг, тэрэ модон һара бүри ургаса үгэхэ зуураа, жэлдээ арбан хоёр дахин үрэ жэмэс асардаг, тэрэ модоной набшаһануудын арадуудые аргалжа эдэгээхэдэ туһалдаг.

³Бурханай хараалда хүрэмөөр муу юумэн тэндэ хэзээдэшые болохогүй. Бурханай ба Үргэлэй Хурьганай хаан шэрээ тэрэ хотодо байха. Бурханай зарасанар тэрэндэ алба хэхэ байна.

⁴Зарасанарын тэрэнэй нюурые хараха, тэрэнэй нэрэн тэдэнэй магнайда байха.

⁵Тэндэнь дахин хүни болохогүй, тэдэндэ дэнгэйшые гэрэл, наранайшые туяа ондоо хэрэггүй, юуб гэбэл, тэдэниие Эзэн Бурхан гэрэлтүүлхэ байна. Тиин тэдэнэр хэтын хэтэдэ хаан түрэ засаг барижа байха юм.

Иисусай ерэхэ тухай

⁶Бурханай Эльгээмэл намда иигэжэ хэлээ: «Эдэ үгэнүүдтэ этигэхэдэ болохо, юундэб гэбэл, эдэ үгэнүүд үнэн зүб юм. Лүндэншэдтэ өөрынгөө

hүлдые үгэгшэ Эзэн Бурхан хаяар ямар юумэнэй болохые өөрынгөө зарасанарта харуулхын тула эльгээмэлээ ябуулһан байна.

⁷Иигээд лэ би хаяар ерэхэб! Энэ номой уридшалан хэлэһые сахин бээлүүлэгшэ жаргалтайл!»

⁸Би, Иоанн энэниие дуулааб, харааб. Энэниие дуулаад, хараад байхадаа, эдэ бүгэдые намда харуулһан эльгээмэлэй хүлдэнь унажа, хүгэдэн мүргөөб.

⁹Теэд эльгээмэл намда иигэжэ хэлээ: «Боли даа, иимэ юумэ бү хэ! Би шам шэнгил, шинии лүндэншэд – аха дүүнэр шэнгил, энэ номой үгэнүүдые сахин бээлүүлэгшэдтэйл адли зараса гээшэб. Ши Бурханда хүгэдэн мүргэ!»

¹⁰Намда тэрэ иигэжэ хэлээ: «Энэ номой уридшалан хэлэһэн үгэнүүдые бү суургалан тамгалаарай! Саг бүри дүтэлөөд байна.

¹¹Муу хүн муу юумээ хэжэ үргэлжэлүүлэг! Жэрхэмшэг муухай хүн тэрэл муухай юумээ хэг, һайн хүн һаие хэжэл байг, арюун нангин хүн тэрэл зандаа арюун ябаг».

¹²«Иигээд Би хаядаа ерэхэб! Хүн болгониие хэһэн хэрэгэйн зэргээр шагнаха, хэһээхын тула шагналаа, хэһээлтээ өөртөө абажа ябанаб.

¹³Би Альфа, Омега гээшэб, Түрүүшынхинь, һүүлшынхинь, Эхиниинь, Эсэсын гээшэб».

¹⁴Хубсаһаа сэбэрлэгшэд жаргалтай! Тэдэнэр амидаралгын модондо хүртэлсэхэ эрхэтэй, тэдэнэр хаалгын үүдээр хотодо орохо эрхэтэй.

¹⁵Теэд нохосууд, эди шэдитэн, зальхай забхай ябадалтан, алуурша этэгээдүүд, онгонуудта шүтэгшэд, худал хуурмаг ябадалда дуратайшуул, тиимэ юумэ хэгшэд – хотын гадаа тээ үлэхэ юм.

¹⁶«Иимэ гэршэлгы таанадта хүзэглэгшэдэй бүлгэмүүдэй дамжуулхын тула өөрынгөө эльгээмэлые би, Иисус, ябуулһан байнаб. Би Давидай Үндэһэ, һалааниинь гээшэб. Би үүрэй ялагар одон гээшэб».

¹⁷Нангин хүлдэшье, хадамай басаганшье: «Ерэ!»– гэнэд. Шагнажа байгаашашье: «Ерэ!»– гэг. Ундаа ехээр хүрэгшэдшье ерэг! Амидаралгын уһа абаха дуратайшуул ерэжэ, тэрэ уһа миинтэ абаг лэ!

Түгэсхэл

¹⁸Энэ номой уридшалан хэлэһэн үгэнүүдые шагнагша бүхэндэ иигэжэ дуулганаб: эдэ үгэнүүдтэ ямар нэгэн юумэ хэн нэмэлтэ оруулнаб, энэ ном соо бэшээтэй гай аюулые Бурхан нэмэжэ, бүри ехэ болгохо.

¹⁹Энэ номой уридшалан хэлэгдэһэн үгэнүүд сооһоо ямар нэгэн юумэ хаһажа хаяа болболынь, тэрэнэй амидаралай модоной үрэ жэмэс эдихэ эрхые, Нангин Хотодо орохо эрхые Бурхан хаһаха юм. Энэ модон ба энэ хото тухай энэ ном соо бэшээтэй.

²⁰Энээниие гэршэлэн баталагша иигэжэ хэлэнэ: «Тиимэ даа, би һаядаа ерэхэб!» Болтогой, Дээдын Эзэн Иисус, заларжа ерэ!

²¹Дээдын Эзэн Иисусай үршөөл хайрань бултанда хүртэхэ байна!



Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2022, Vitória/ES - Brasil